


Tuhun tsaá tsa nacoꝝ jutu mañi yo Jesucristo

tsi yo



New Testament in Mixtec, San Juan Colorado (MX:mjc:Mixtec,  
San Juan Colorado)

**Tuhun tsa tsa naco jutu mañi yo Jesucristo tsi yo  
New Testament in Mixtec, San Juan Colorado (MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

**Copyright Information**

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
c270ec54-172a-541f-83e6-7760f619c744

## Contents

San Mateo . . . . .	1
Marcos . . . . .	62
Lucas . . . . .	101
Juan . . . . .	166
Los Hechos . . . . .	213
Romanos . . . . .	274
I Corintios . . . . .	299
II Corintios . . . . .	322
Gálatas . . . . .	339
Efesios . . . . .	348
Filipenses . . . . .	356
Colosenses . . . . .	362
I Tesalonicenses . . . . .	368
II Tesalonicenses . . . . .	373
I Timoteo . . . . .	376
II Timoteo . . . . .	383
Tito . . . . .	388
Filemón . . . . .	391
Hebreos . . . . .	393
Santiago . . . . .	412
I San Pedro . . . . .	418
II San Pedro . . . . .	425
I San Juan . . . . .	429
II San Juan . . . . .	435
III San Juan . . . . .	436
San Judas . . . . .	437
El Apocalipsis . . . . .	439

## Tuhun Nyoo Tsa Tyaa Ra Mateo

*Nyivi ra Jesucristo tsa tsicoo tsa ndi  
cumañi ca cacu ra  
(Lc. 3.23-38)*

<sup>1</sup> Ihya nyecú tandihi sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuvi tsi ra.

<sup>2</sup> Sehe ra Abraham cuvi tsi ra Isaac, tan sehe ra Isaac cuvi tsi ra Jacob. Tan sehe ra Jacob cuvi tsi ra Judá tsihin tandihi ra yañi ra.

<sup>3</sup> Tan ra Fares tsihin ra Zara sehe ra Judá tsihin ña Tamar cuvi tsi ra naha. Tan sehe ra Fares cuvi tsi ra Esrom, ra cuvi jutu ra Aram.

<sup>4</sup> Tan sehe ra Aram cuvi tsi ra Aminadab, jutu ra Naasón. Tan sehe ra Naasón cuvi tsi ra Salmón.

<sup>5</sup> Tan ra Booz, sehe ra Salmón tsihin ña Rahab cuvi tsi ra. Tan sehe ra Booz tsihin ña Rut cuvi tsi ra Obed, jutu ra Isaí.

<sup>6</sup> Tan ra David, ra cuvi rey, sehe ra Isaí cuvi tsi ra. Tan sehe ra rey David tsihin ñaha tsa cuvi ñasihhi ra Urías cuvi tsi ra Salomón.

<sup>7</sup> Tan sehe ra Salomón cuvi tsi ra Roboam, ra cuvi jutu ra Abías. Tan sehe ra Abías cuvi tsi ra Aza.

<sup>8</sup> Tan sehe ra Aza cuvi tsi ra Josafat, ra cuvi jutu ra Joram. Tan sehe ra Joram cuvi tsi ra Uzías.

<sup>9</sup> Tan sehe ra Uzías cuvi tsi ra Jotam, ra cuvi jutu ra Acáz. Tan sehe ra Acáz cuvi tsi ra Ezequías.

<sup>10</sup> Tan sehe ra Ezequías cuvi tsi ra Manasés, ra cuvi jutu ra Amón. Tan sehe ra Amón cuvi tsi ra Josías.

<sup>11</sup> Tan sehe ra Josías cuvi tsi ra Jeconías tsihin tandihi ra yañi ra. Tsicoo ra naha quivi tin ra ñuu Babilonia naha ra tsi nyivi Israel, tsa cua cahun ñi cuvi ñi musu ra ñuu Babilonia can naha ra.

<sup>12</sup> Tsa yaha can, tan tsicoo sehe ra Jeconías, tan ra ican cuvi ra Salatiel, jutu ra Zorobabel.

<sup>13</sup> Tan sehe ra Zorobabel cuvi tsi ra Abiud, ra cuvi jutu ra Eliaquim. Tan sehe ra Eliaquim cuvi tsi ra Azor.

<sup>14</sup> Tan sehe ra Azor cuvi tsi ra Sadoc, ra cuvi jutu ra Aquim. Tan sehe ra Aquim cuvi tsi ra Eliud.

<sup>15</sup> Tan sehe ra Eliud cuvi tsi ra Eleazar, ra cuvi jutu ra Matán. Tan sehe ra Matán cuvi tsi ra Jacob.

<sup>16</sup> Tan ra Jacob cuvi jutu ra José, yii ña María. Juvín ña cuvi sibi ra Jesús ra cuvi Cristo, o cuñi tsi catyí, ra tsa jaquitsi Nyoo tyin quihhi ndaha tsi yo.

<sup>17</sup> Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tin ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

*Nu cacu ra Jesucristo  
(Lc. 2.1-7)*

<sup>18</sup> Tyehen cuvi tan cacu ra Jesucristo: tsa yaha cundaa tyiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihhi sehe ña tsa cuenda Tatyí Ii Nyoo.

<sup>19</sup> Tan ra José, ra cua cuvi yii ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsica iñi ra tsa naco xeehe ra tsi ña tan ña cua tindaha ca ra tsihin ña.

<sup>20</sup> Tan tsitsi tsa tsica iñi ra yacan, quituvi iin ángel Jutu Mañi yo nuu ra nu quixí ra. Tan nyehe ra ñumaahna, tan catyí ángel can tsihin ra:

—José, tata ra David, ña caca iñi un quihin un tsi ña María cuvi ña ñasihhi un, tyin sehe ña tsa cua cacu, sehe Tatyí Ii Nyoo cuvi tsi.

<sup>21</sup> Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

<sup>22</sup> Tacan cuvi tyin tacan tan cundaa tsa cahan ra cuvi ndusu yuhu Jutu Mañi yo tahañ tsanaha.

<sup>23</sup> Tan catyí ra tyehen: Ñaha yoco tsa ñaha ca coo yii, cua cahun sehe ña.

Tan cua coo iin sehe ña. Tan cua cunañi ra: Emanuel. Tan sivi can cuñi tsi catyi: “Nyoo iyó ra tsihin yo.”

<sup>24</sup> Tan tsa ndoto ra José, javaha ra tumaa catyi ángel can tsihin ra. Quihin ra tsi ña María tyin cuvi ña ñasihi ra.

<sup>25</sup> Maa tyin ña quixi ra tsihin ña nda cuanda tsa yaha cacu sehe ña. Tan jacunañi ra tsi lee can: Jesús.

## 2

*Nu cuahán ra tsitó xaan, ra cuví rey, cua nyehe ra naha nu cacu ra Jesús*

<sup>1</sup> Cacú ra Jesús ñuu Belén tsa canyií nu cuví Judea. Tan quivi can ra cuví rey Judea nañi ra Herodes. Tacan tan tsaá juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuví ra naha.

<sup>2</sup> Tsiçá tuhun ra naha tsi nyivi tan catyi ra naha:

—¿Nu maa nyii ra cuví rey cuenda nyivi Israel? Tyin ityi nu caná ñicanyii nyehe ndi tiñuu tsa tsahá cuenda tyin cacú ra ityi ihya. Tan vatsi ndi vatsi jacahnu ndi tsi ra —catyi ra naha.

<sup>3</sup> Quivi tsa tsito ra rey Herodes tsa cahán ra can naha ra, tuñu xaan cuñi ra cuvi. Tacan tucu tandihi nyivi ñuu Jerusalén can.

<sup>4</sup> Tacan tan cana ra Herodes tsi tandihi ra jutu tsa cuvi ityi nuu tsihin ra cuvi jutu tan tsihin tandihi ra cuvi maestro cuenda ley vehe ñuhu naha ra. Tan tsiçá tuhun ra tsi ra naha numaa nda taahán tsi cacu ra Cristo.

<sup>5</sup> Tan nacañan ra can naha ra tan catyi ra naha:

—Ñuu Belén tsa canyií Judea, ndacan taahán tsi cacu ra tyin tyehen tyaa ra cuvi ndusu yuhu Nyoo nu tutu tahañ tsanaha:

<sup>6</sup> Tan yooho Belén ñavin iin ñuu luhlu ñi cuvi un tsa nuu tandihi maa ñuu tsa cayucú Judá

tyin nuu yooho cua quita ra cua quih ndaha tsi nyivi ñuu yu Israel. Maa ra cua jaha cuenda ra tsi ñi.

Tacan catyi nu tutu Nyoo, —catyi ra can naha ra tsihin ra Herodes.

<sup>7</sup> Tacan tan cana xeehe ra Herodes tsi ra tsitó xaan can naha ra, tan tsiçá tuhun ra tsi ra naha náa quivi tan náa hora quituvi tiñuu can.

<sup>8</sup> Tacan tan jacuhun ra tsi ra naha nda ñuu Belén, tan catyi ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quitsi catyi tuhun ndo tsihin yu, tyin cuhun ndihi yu cujacahnu yu tsi ra —catyi ra Herodes tsihin ra naha.

<sup>9</sup> Tsa tsiñi ra tsa tsitó xaan can naha ra tsa cahán ra Herodes, tan quihin ra naha ityi cuahán ra naha. Tan tiñuu tsa nyehe ra naha ityi nu caná ñicanyii can, cuahán tsi ityi nuu ra naha. Tan tsiçuiñi tsi maa maa siqui nu canyií ra lee can.

<sup>10</sup> Tan tsa nyehe ra tsitó xaan can naha ra tyin tsiçuiñi tiñuu can, sii xaan cuñi ra naha.

<sup>11</sup> Tan quihvi ra naha tsitsi vehe nu canyií lee can. Tan nyehe ra naha tsi ra tsihin ña María, sihi ra. Tan tsiçuiñi tsi ra naha tyin jacahnu ra naha tsi lee can. Tacan tan nuña ra naha yuhu caja tsa ndahá ra naha. Tan tava ra naha regalo tsa cuvi xuhun cuaan, tan cutu vixi, tan ndutya tami tsa nañi mirra. Tan tsahá ra naha tsi lee can.

<sup>12</sup> Tsa yaha tsa nyehe ra naha tsi ra Jesús tan cuanuhu ra naha. Tan tsa cuanuhu ra naha nyehe ra naha ñumaahna tan catyi tsi tyin ña taahán tsi cuhun ra naha cucatyi tuhun ra naha tsihin ra Herodes. Yacan cuenda sin ityi cuanuhu ra naha.

*Nu tsinu xeehe ra José tan ña María tsihin lee sehe ñi nda Egipto*

<sup>13</sup> Tsa yaha cuahán ra tsa tsitó xaan can naha ra, tacan tan iin ángel Jutu Mañi yo quituvi nuu ra José tsitsi ñumaahna. Tan catyi ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi

ra lee ihya tyin cuñí ra cahñi ra tsi ra —catyí ángel can tsihin ra José.

<sup>14</sup> Tacan tan nduvitá ra José tsacuaa can. Tan quihin ra tsi lee can tsihin sihi tsi. Tan cuahán ñi nda Egipto.

<sup>15</sup> Ndacan tsicoo ñi nda cuanda tsa tsihi ra Herodes. Tacan cuvi tyin cundaá tsa cahán ra cuvi ndusu yuhu Jutu Mañi yo tahañ tsanaha jahá Nyoo. Tyehen catyí ra: “Nda Egipto caná yu tsi Sehe yu”, catyí ra.

*Nu tava tyiñu ra Herodes na cahñi ra naha tsi ra nyihi*

<sup>16</sup> [Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra] tan tsa tuví iñi ra Herodes tyin ra tsitó xaan can naha ra jandaví ñaha ra naha tsi ra, tan nduxaán xaan ra. Tan tava tyiñu ra na cahñi andaru tsi tandihi ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacú nda cuanda ra nyihi tsa uvi cuiya. Tacan javahá ra tyin tsicá iñi ra tyin tacan cuiya ra Jesús tumaa catyí ra tsitó xaan can naha ra tsihin ra.

<sup>17</sup> Tacan cuvi tyin cundaá tsa cahán Nyoo tan tyaa ra Jeremías, ra cuvi ndusu yuhu ra tahañ tsanaha. Tyaa ra tyehen:

<sup>18</sup> Tsiñí yo iin ndusu ñuu Ramá, tsacú tsa nyivi, tan iyo taahán ñi. Juvín ñi nyivi cuví tata ña Raquel, nyivi Israel, tsacú tsa ñi tsa cuenda sehe ñi.

Maa tyin ña cuñí ñi tsa naquihin ndaahvi nyivi tsi ñi tyin tsa yaha tsihi sehe ñi, catyí tsi nu tutu Nyoo.

<sup>19</sup> Maa tyin tsa yaha tsa tsihi ra Herodes, tacan tan quituví nyico iin ángel Jutu Mañi yo nuu ra José nu quixí ra nda Egipto. Tan catyí ra tsihin ra:

<sup>20</sup> —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahñi tsi ra lee ihya.

<sup>21</sup> Tacan tan nduvitá ra José, tan quihin ra tsi lee can tan tsihin sihi ra. Tan cuanuhu ñi nda Israel.

<sup>22</sup> Maa tyin quivi tsitó ra José tyin ra Arquelao, sehe ra Herodes, cuví ra rey nda Judea, nayuhví ra tan ña cuñí ra cahun ra ndacan. Tan cuanuhu ñi nda Galilea tyin tacan jacotó Nyoo tsi ra tsitsi ñumaahna.

<sup>23</sup> Tsa tsaá ñi ican, tan cuahán ñi nda ñuu Nazaret, cua coo ñi. Tan ican tsicoo ñi. Tacan cuvi tyin cundaá tsa cahán ra cuvi ndusu yuhu Nyoo tahañ tsanaha. Tyin catyí ra naha tyin ra Jesús ra ñuu Nazaret cua cuvi ra.

### 3

*Nu cahán ra Juan tuhun Nyoo tsihin nyivi*

(Mt. 1.1-8; Lc. 3.1-9, 15-17; Jn. 1.19-28)

<sup>1</sup> Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahán ra nu tsiqui tsa iyó Judea. Tan quit-sahá caahán ra tuhun Nyoo tsihin nyivi tsa tsaá nu nyii ra.

<sup>2</sup> Tan catyí ra:

—Ndu uvi iñi ndo cuatyí ndo tyin tsa cuñí tsa quivi cundaca ñaha Nyoo tsi yo.

<sup>3</sup> Juvín ra Juan cuví ra tsa cahán ra Isaías ra cuvi ndusu yuhu Nyoo tahañ tsanaha. Tan tyaa ra tsa tsahá Nyoo tsi ra tyehen:

Cua tyaa soho yo ndusu ra nu caná tsa ra nu tsiqui tan catyí ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaa ra Isaías.

<sup>4</sup> Tan ra Juan nditsí ra jahma tsinu tsihin ixi camellu. Tan cinturón ra, ñi cuví tsi. Tan tica xama tsatsí ra tan tsihi ra ndutya ñuñu.

<sup>5</sup> Quitsi nyivi ñuu Jerusalén tan tandihi ñuu tsa cayucú Judea, tan nyivi tsa iyó yatyin ñi ityi yutya cahnu Jordán can; quitsi tyaa soho ñi tuhun caahán ra.

<sup>6</sup> Tan tsa yaha nahma ñi cuatyí ñi, ra Juan jacoondutya ra tsi ñi yutya cahnu Jordán ican.

<sup>7</sup> Maa tyin nyehe ra Juan tyin cuaha xaan ra fariseo, ra tsa tyaá yahvi xaan ley vehe ñuhu, tan cuaha xaan ra saduceo, quitsi ra naha tyin coondutya ra naha. Tan catyí ra tsihin ra naha:

—¡Nyooho, tumaa tata coo xaan cuví ndo! ¿A cuñí maa ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

<sup>8</sup> Nasama ndo cuhva iyó ndo, na nyehe yo tyin tsa ndu uvi ñi ndo cuatyí ndo nuu Nyoo.

<sup>9</sup> Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin yuu ihya, Nyoo cuví jananduvi ra nyivi ra Abraham.

<sup>10</sup> Tsa ndatú yatsa Nyoo tsi tandihi ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—.

<sup>11</sup> Tsa nditsa tyin yuhu jacoondutya yu tsi nyivi tsihin ndutya, tan cuví tsi iin seña tyin tsa ndu uvi ñi ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí Ii Nyoo tan tsihin ñuhu ihñi. Iyó ca tunyee ñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra.

<sup>12</sup> Tan ra ican ndahá ra pala tyin cua jandava ra trigu. Cua tava sin ra trigu vaha, tan cua natyihí vaha ra itsi. Tan cua cahmi ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan.

#### *Nu tsicoondutya ra Jesús (Mr. 1.9-11; Lc. 3.21-22)*

<sup>13</sup> Tacan tan quitá ra Jesús Galilea tan tsaá ra yutya cahnu Jordán nu nyii ra Juan, tyin cuñí ra tsa jacoondutya ra Juan tsi ra.

<sup>14</sup> Tsa jihna ñi ña cuñí ra Juan jacoondutya ra tsi ra, tan quitsahá catyí ra tsihin ra:

—Cuñí un tsa jacoondutya yu tsi un, maa tyin ña taahán tsi tsa jacoon-

dutya yu tsi un. Maa un taahán tsi jacoondutya tsi yu —catyí ra.

<sup>15</sup> Maa tyin ra Jesús catyí ra tsihin ra:

—Tsa vityin, na cuvi tsi cuhva catyí yu tsihin un. Tyin cuñí tsi tsa javaha yo tandihi tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

<sup>16</sup> Tsa yaha tsicoondutya ra Jesús tan quitá ra tsitsi ndutya. Tan nuña andivi, tan ra Jesús nyehe ra vatsí nuú Tatyí Ii Nyoo, tumaa iin paloma. Tan tsaá tsi siqui ra.

<sup>17</sup> Tacan tan cahan iin ndusu ityí andivi, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihin ra —catyí ndusu can.

## 4

### *Nu nducu cuhva nu ña vaha tsi ra Jesús*

*(Mr. 1.12-13; Lc. 4.1-13)*

<sup>1</sup> Tacan tan tsindaca Tatyí Ii Nyoo tsi ra Jesús iin nu tsiqui, tyin cua nducu cuhva nu ña vaha tsi ra.

<sup>2</sup> Tsicoo nyitya ra uvi xico nduvi tan uvi xico tsacuaa. Tsa yaha can tan quitsi socó tsi ra.

<sup>3</sup> Tacan tan natuhva nu ña vaha nu nyaá ra, tyin cuñí nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahan tsihin yuu ihya, na nanduvi tsi paan —catyí nu ña vaha tsihin ra Jesús.

<sup>4</sup> Maa tyin ra Jesús nacahan ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihi tuhun caahán Nyoo” —catyí ra Jesús tsihin nu ña vaha.

<sup>5</sup> Tacan tan quihin nu ña vaha tsi ra. Tan cuahán ra tsihin nu nda ñuu ii Jerusalén. Tan jandaá nu tsi ra jiñi vehe ñuhu cahnu.

<sup>6</sup> Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda



cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un, tan ña cua nañi tsaha un nuu yuu.

<sup>7</sup> Tan nacahan ra Jesús tan catyí ra: —Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

<sup>8</sup> Tacan tan quihin nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janaha nu tandihi tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi.

<sup>9</sup> Tan catyí nu tsihin ra: —Yuhu cuhva yu tandihi maa tsa janaha yu tsi un, tatun yoocho tan cuiñi tsiti un nuu yu tan jacahnu un tsi yu.

<sup>10</sup> Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi in-tuhun ñi maa Jutu Nyoo, tan jaha tyiñu tyiñu ra.”

<sup>11</sup> Tacan tan cuahán nu ña vaha, tan ndoo ra Jesús. Tan tsaá ángel tan jatyinyee ra naha tsi ra.

*Nu quitsaha caahán ra Jesús tuhun Nyoo tsihin nyivi tsa iyó ñuu tsa cayucú Galilea*

(Mr. 1.14-15; Lc. 4.14-15)

<sup>12</sup> Quivi tsa tsito ra Jesús tyin ra Juan nyii ra vehe caa, cuahán ra nda Galilea.

<sup>13</sup> Maa tyin ña ndoo ra ñuu Nazaret, nu tsahnu ra. Cuahán ra cua coo ra nda ñuu Capernaum, iin ñuu tsa canyí yatyin ñi yuhu miñi, nu ñuhu ra Neftalí yatyin ñuhu ra Zabulón.

<sup>14</sup> Tacan tan cundaá tsa cahan ra Isaías, ra cuví ndusu yuhu Nyoo, tahan tsanaha. Tan catyí ra:

<sup>15</sup> Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

<sup>16</sup> Nyivi iyó nu naa, ñi iyó nu iyó tix-ahñu tuhun tsihi, nyehé ñi iin ñuhu nditsin tsa jandunditsín nu yucú ñi, catyí ra Isaías.

<sup>17</sup> Nda cuanda quiivi can, tan quit-saha caahán ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñi tsa quiivi cundaca ñaha Nyoo tsi ndo —catyí ra Jesús tsihin nyivi.

*Nu cana ra Jesús tsi cumi taahan ra tsa tñ tyaca*

(Mr. 1.16-20; Lc. 5.1-11)

<sup>18</sup> Ra Jesús tsicá ra yuhu miñi tsa nañi Nduya Ñuhu Galilea. Tan nyehe ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tñ tyaca cuví ra naha. Tan cañi ra naha traya ra naha nu ndutya.

<sup>19</sup> Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tñ ndo tyaca, tacan cua ñihi ndo nyivi cua cuví nyivi Nyoo —catyí ra Jesús tsihin ra naha.

<sup>20</sup> Juvin ñi cuhva can nacoo ra naha traya can, tan cuahán ra naha tsihin ra Jesús.

<sup>21</sup> Luxu ñi tsicá ra naha ityi nuu, tan nyehe ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cana ra Jesús tsi ra naha.

<sup>22</sup> Juvin ñi cuhva can tan nacoo ra naha tsi jutu ra naha tan yutun ndoo can, tan cuahán ra naha tsihin ra.

*Nu cuaha xaan nyivi jacuaha ra Jesús*

(Lc. 6.17-19)

<sup>23</sup> Cuahán ra Jesús tsicá ra tandihi ñuu cuenda Galilea jacuaha ra tsi nyivi tsitsi vehe ñuhu tan iin tan iin ñuu. Caahán ra tuhun vaha náca ndacá ñaha Nyoo tsi yo. Tan janduvaha ra tsi nyivi cuuhví tsihin tandihi ñi nuu cuehe tsa yihí tsi ñi.



<sup>24</sup> Tacan tan tsito tandihí nyívi ñuu cuenda Siria tuhun ra Jesús. Tan tsindaca ñi tandihí nyívi cuuhví tsi ra: juhva ñi yihí tatyí ña vaha. Tan yihí ñi tsihí naaha ñi. Tan yihí ñi ndohó ñi cuehe xii. Tan janduvaha ra Jesús tsi tandihí ñi.

<sup>25</sup> Cuaha xaan nyívi nyicún tsi ra Jesús: nyívi iyó ñuu tsa cayucú Galilea, nyívi tsa quee nu utsi taahan ñuu tsa nañí Decápolis, nyívi iyó ñuu Jerusalén tan tandihí ca ñuu tsa cayucú Judea, tan nyívi iyó inga tsiyo yutya cahnu Jordán.

## 5

*Nu cahan ra Jesús tsihin nyívi nu tsiqui*

*(Lc. 6.20-23)*

<sup>1</sup> Nyehe ra Jesús tyin cuaha xaan nyívi, tan ndaa ra iin nuu yucu. Tan tsicunya ra ican. Tacan tan nyívi tsicá tsihin ra, tsinunduví ñi tsi ra.

<sup>2</sup> Tacan tan quitsaha jacuahá ra tsi ñi tan catyí ra:

<sup>3</sup> Nasocó Nyoo tsi tandihí nyívi tsa tsitó tyin tsiñí ñuhu ra tsi ñi, tan tsa cuenda ñi cuví nu ndacá ñaha ra.

<sup>4</sup> Tan tandihí nyívi tsa cuiihya cuñí tsa cuenda cuatyí ñi, nasocó Nyoo tsi ñi tan ña cua coo ca ñi tucuihya iñi.

<sup>5</sup> Tan tandihí nyívi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayívi tsa catyí Nyoo tyin cuhva ra tsi ñi.

<sup>6</sup> Tan tandihí nyívi tsa cuñí xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuvi javaha ñi cuhva cuñí maa ra.

<sup>7</sup> Tan tandihí nyívi tsa cundaahví iñi tsi inga nyívi, nasocó Nyoo tsi ñi, tan cua cundaahvi iñi ra tsi ñi.

<sup>8</sup> Tan tandihí nyívi tsa janduvaha Nyoo aña, nasocó ra tsi ñi, tan cua nyehe ñi tsi ra.

<sup>9</sup> Tan nyívi tsa nducú cuhva tsa coo vaha nyívi tsihin Nyoo tan tsihin inga nyívi, nasocó ra tsi ñi tan cua catyí ra tyin sehe ra cuví tsi ñi.

<sup>10</sup> Tan tandihí nyívi tsa javahá cuhva cuñí Nyoo tan ndasi cuñí nyívi

nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra.

<sup>11</sup> Nasocó Nyoo tsi nyooho tsa caahan nyívi ndavaha ñi tsata, tan javahá ñi tsa uhvi tsi ndo, tan caahan ñi cuendu tsa ña nditsa siqui ndo tsa cuenda tsa tsinú iñi ndo tsi yu.

<sup>12</sup> Cusi iñi ndo tun tacan javahá nyívi tsihin ndo; si cuñi ndo, tyin cahnu xaan tan si xaan caá tsa cua ñihi ndo nda gloria. Tyin juvin ñi tacan javaha nyívi tsa ña vaha tsihin tandihí ra cuví ndusu yuhu Nyoo tahañ tsanaha.

*Tatun jandihí yo tsa tsinú iñi yo tsi Nyoo cuví yo tumaa ñi tsa ndihí tsa uhva*

*(Mr. 9.50; Lc. 14.34-35)*

<sup>13</sup> Nyooho tsa tsinú iñi tsi yu, tumaa ñi vaha cuví ndo. Maa tyin tatun ñi, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñi can. Tacan tan javita yo can, tan cuañi nyívi tsata can.

*Tatun tyaá yahvi vaha yo tuhun caahan Nyoo, cuví yo tumaa ñuhu tsa jandunditsín nu tsicá nyívi nu naa*

<sup>14</sup> Nyooho cuví ndo tumaa ñuhu tsa jandunditsín nu tsicá nyívi. Iin ñuu tsa canyí jiñi iin yucu, ña cua cuvi quihí xeehe tsi.

<sup>15</sup> Ña tuhvá yo tyaá ñuhu tyuma, tan tyihí xeehe yo itsi tsitsi iin caja. Tyin tuhvá yo tyaá ñuhu tan tinyí yo itsi iin nu sucun tyin tacan tan jandunditsin tsi nu yucú yo tsitsi vehe yo.

<sup>16</sup> Tan tacan taahan tsi jandunditsin tucu nyooho tsihin ñuhu Nyoo tsa iyó aña ndo nu tsicá nyívi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

*Nu jacuaha ra Jesús tyin ñiñi xaan javaha yo tandihí tuhun tsa tsaha Nyoo tsi yo tan jacuaha yo itsi tsi nyívi*

<sup>17</sup> Ña cuñi ndo tyin yuhu vatsí janaa yu ley tsa tsaha Nyoo tsi ra Moisés tyin tyaa ra. Tan ndi ña vatsí janaa yu tuhun tsa tyaa tandihí ra cuví ndusu yuhu Nyoo tahañ tsanaha. Ñavin tyiñu can vatsí yu.

Yuhu vatsí yu vatsí tyaa yahvi yu tsa caahán ley can, tan catyí tuhun yu tsihin ndo náa cuñí tsi catyí ley can.

<sup>18</sup> Tsa nditsa catyí yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley tsa tyaa ra Moisés tyin tandihí maa tsa tyaa ra naha tan cua cundaa tsi.

<sup>19</sup> Yacan cuenda, ra tsa ña tyaa yahvi cuhva catyí Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuvi ra nu ndacá ñaha Nyoo. Maa tyin ra tsa tyaa yahvi tandihí, tan janahá ra tsi inga nyivi, cahnu xaan cua cuvi ra nu ndacá ñaha Nyoo.

<sup>20</sup> Catyí yu tsihin ndo tyin tun ña tyaa yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuví quihvi ndo nu ndacá ñaha Nyoo.

*Nu caahán ra Jesús tsihin yo tyin ña taahán tsi cahan yo tsi nyivi*

<sup>21</sup> 'Nyooho tsa cuaha tsaha tsiñi ndo tsa catyí Nyoo tsihin nyivi tsicoo tahañ tsanaha. Catyí ra: "Ña cahñi ndo tsi nyivi, tyin tatun cahñi ndo nyivi, taahán tsi tsa cutuñi ndo."

<sup>22</sup> Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cuhun ndo anyaya tsa cuenda cuatyí can.

<sup>23</sup> "Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javaha un tsi yañi un,

<sup>24</sup> nacoo tsa cuahán tsihin un ityi nu altar vehe ñuhu. Tan cuhun jihna un ndacan un tucahnu iñi tsi yañi un. Tacan tan cuhun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

<sup>25</sup> "Tatun iin ra tsicán cuatyí tsaha un, tan cuahán un tsihin ra nda nu nyaá ra cumi tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumi tyiñu,

tyin ra cumi tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihí ra naha tsi un vehe caa.

<sup>26</sup> Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihí xuhun tsa cua ndacan ra naha.

*Nu caahán ra Jesús tyin ndi tsa tsicá iñi yo tsa coo inga ñaha, o inga rayi tsi yo, tan ña vaha*

<sup>27</sup> 'Nyooho tsa tsiñi ndo tyin catyí Nyoo tahañ tsanaha tyin nyooho tsa iyó ñasihí, ña cua coo inga ñaha tsi ndo, tan ndi ñaha tsa iyó yí tan ña taahán tsi coo inga rayi tsi ña.

<sup>28</sup> Maa tyin yuhu catyí yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoo cuatyí ndo.

<sup>29</sup> "Tatun tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quihvi un nu ndacá ñaha Nyoo tsihin intuhun ñi tinuu un, tan ñavin ca tsa cuhun un anyaya tsihin nduvi taahan tsi.

<sup>30</sup> O tatun iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quihvi un nu ndacá ñaha Nyoo tsihin tsa lundu ndaha un, tan ñavin ca tsa nani un tan cuhun un anyaya.

*Nu caahán ra Jesús tyin ña vaha tsa nacoo ihñi rayi tsi ñasihí ra*

*(Mt. 19.9; Mr. 10.11-12; Lc. 16.18)*

<sup>31</sup> "Tan juvin ñi catyí Nyoo tsihin nyivi tsicoo tahañ tsanaha tyin yóo ra nacoo ihñi ñasihí ra, cuñi tsi tsa cani ra tutu tsa tindaha ra tsihin ña.

<sup>32</sup> Maa tyin catyí yu tsihin ndo tyin nduve ndatu iyó tsi rayi tsa nacoo ra ñasihí ra tatun ña quituví ña tsihin inga rayi. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayi cua coo ndihí cuatyí ña. Tan tacan ra tsa cua quihin tsi ña cua coo ndihí cuatyí ra.

*Ña cahan yo “naha Nyoo maa”*

<sup>33</sup> Tan tsiñi ndihi ndo, tyin catyi tucu Nyoo tsihin nyivi tsicoo tahan tsanaha: “Tatun catyi ndo ‘naha Nyoo maa’ tyin cua javaha ndo iin tsa cua javaha ndo nuu ra, taahan tsi tsa javaha ndo can tan ña jandavi ñaha ndo.”

<sup>34</sup> Maa tyin yuhu catyi yu tsihin ndo tyin ña cahan ndo “naha Nyoo maa”. Tan ña cahan ndo tuhun andivi, tyin yacan cuvi nu nyaá Nyoo.

<sup>35</sup> Tan ndi tuhun ñuhu ñayivi ihya ña cahan ndo, tyin ihya cuvi nu tsañi Nyoo. Tan ndi ña cahan ndo tuhun ñuu Jerusalén, tyin ican cuvi ñuu maa Nyoo tsa cuvi ra Rey cahnu ca.

<sup>36</sup> Tan ndi ña cahan ndo tuhun jiñi ndo, tyin ña cuvi janducuitsin ndo tan ndi tsa jandutuun ndo ndi in-tuhun ixi jiñi ndo.

<sup>37</sup> Vaha ca cahan ndo iin ndaha ñi tun nditsa o tun ña nditsa tsa caahan ndo. Tyin tsa catyi ndo “naha Nyoo maa” nu ña vaha jacahan tsi ndo tsa cahan ndo tacan.

*Nu caahan ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi*

*(Lc. 6.29-30)*

<sup>38</sup> Tan tsiñi tucu ndo tsa catyi Nyoo tahan tsanaha: “Tatun cañi nyivi tsi ndo, tan tavá ñi iin nuhu ndo, o iin tinuu ndo, taahan tsi tyin javaha ndihi ra cumi tyiñu tacan tsihin ñi, tumaa tsa javaha ñi tsihin ndo.”

<sup>39</sup> Maa tyin yuhu catyi yu tsihin ndo, tyin ña javaha ndo tsa ña vaha tsa javahá nyivi xaan cuñi nyehe tsi ndo. Tyin tun yoo cañi iin tsiyo nuu ndo, taahan tsi tsa cuhva ndihi ndo inga tsiyo na cañi ndihi ñi, tan ña cuxaan ndo tsi ñi.

<sup>40</sup> O tatun tsicán ñi cuaty tsaha ndo, tan cuñi ñi quihin nyaa ñi iin camisa ndo. Taahan tsi cuhva ndihi ndo chamarra ndo tsi ñi tan ña cua cuxaan ndo tsi ñi.

<sup>41</sup> O tatun yoo cuñi cundaca ndo ndaha tyiñu ñi iin kilómetro, taahan tsi cundaca ndo can uvi kilómetro.

<sup>42</sup> Tatun yoo nyivi tsicán tumañi iñi tsi ndo, cuhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

*Na cuñi yo tsi nyivi xaan iñi tsi yo*  
*(Lc. 6.27-28, 32-36)*

<sup>43</sup> Tan tsiñi tucu ndo tyin catyi Nyoo tahan tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.”

<sup>44</sup> Maa tyin yuhu catyi yu tsihin ndo, cuñi ndo tsi nyivi xaan iñi tsi ndo. Tan javaha ndo tsa vaha tsihin nyivi caahan tsi ndo, tan tsi nyivi ña cuñi nyehe tsi ndo. Tan ndacan tahvi ndo tsi Nyoo tsa cuenda nyivi tsa caahan nyaa tsi ndo tan tsa cuenda ñi tsa jacuvi tsa uhvi tsi ndo.

<sup>45</sup> Tatun javahá ndo tacan, cuvi ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyivi vaha tan nyivi ña vaha.

<sup>46</sup> Tatun nyoocho tan cuñi ndo tsi nyivi vaha iñi tsi ndo tan ndasi cuñi ndo nyehe ndo tsi nyivi xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quiñi xaan iyó ra can naha ra.

<sup>47</sup> Tatun tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyivi, nduve tsa vaha xaan javahá ndo. Tyin juvin ñi tacan javahá nyivi tsa ña tsitó tuhun Nyoo.

<sup>48</sup> Tumaa Jutu yo tsa nyaá gloria cuiti xaan iyó ra, tacan taahan tsi coo tucu nyoocho.

## 6

*Nu caahan ra Jesús nácaa javaha yo tumañi iñi*

<sup>1</sup> Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatun javaha ndo tumañi iñi tyin nyehe nyivi, Jutu yo, ra nyaá gloria, nduve náa cua cuhva ra tsi ndo.

<sup>2</sup> Tun cua javaha ndo tumañi iñi, ña cua jacoto ndo tsi inga nyivi tyin

javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyivi tyin vaha xaan iñi ra naha. Yacan ñi ñihí ra can naha ra, tan nduve náa cua cuhva Nyoo tsi ra naha.

<sup>3</sup> Yacan cuenda quivi javahá ndo tumañi iñi tsi nyivi ndaahvi, ña jacoto ndo ndi tsi ra tsa vaha xaan ca iñi tsi ndo.

<sup>4</sup> Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

*Nu caahán ra Jesús nácaa ndacan tahvi yo tsi Jutu yo Nyoo (Lc. 11.2-4)*

<sup>5</sup> Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyivi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyivi tyin vaha xaan ra naha. Tsa nditsa catyí yu tsihin ndo tyin yacan ñi ñihí ra naha.

<sup>6</sup> Maa tyin nyooho quivi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyivi tsi ndo. Quihvi ndo tsitsi vehe ndo tan nacasi ndo yuvehe ndo tan ndacan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyivi. Tan cua cuhva ra tsa vaha tsi ndo.

<sup>7</sup> Tatun cua cahan ndo tsihin Nyoo, ñavin juvin ñi tuhun tsa nduve yahvi nyaa cahan ndo. Tacan javahá nyivi tsa ña tsitó tsi Nyoo. Cuñí maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yaha cahan ñi.

<sup>8</sup> Ña javaha ndo tacan. Tyin Nyoo tsa tsitó ra náa tsíñi ñuhu tsi ndo tsa ndi cumañi ca ndacan ndo tsi ra.

<sup>9</sup> Yacan cuenda nyooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

<sup>10</sup> Na quitsi tsa ndaca ñaha un nu ñuhu ñayivi ihya,

tan na javaha tandihi nyivi tandihi cuhva cuñí maa un, tumaa cuví nda gloria.

<sup>11</sup> Cuhva tsa catsi ndi tahan tahan quivi.

<sup>12</sup> Jaha tucahnu iñi tsi ndi náa tsa ña vaha javaha ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

<sup>13</sup> Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihi tunyee iñi tsi un. Tan taahán tsi tyin jacahnu tandihi nyivi tsi maa ñi un tandihi maa quivi tan na ña cundihí tsi. Na cuví tsi tacan ñi.

Tyehen taahán tsi ndacan tahvi ndo tsi Nyoo.

<sup>14</sup> Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo.

<sup>15</sup> Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

*Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi*

<sup>16</sup> Tan catyí tucu ra Jesús tsihin nyivi:

—Quivi tsa iyó nyitya ndo tyin nanducú ndo tsi Nyoo, ña cuiihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaa nuu ñi tyin cuñí ñi tsa nyehe nyivi tyin iyó nyitya ñi tan nanducú ñi tsi Nyoo.



Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi.

<sup>17</sup> Maa tyin nyooho qui<sup>vi</sup> tsa iyó nyitya ndo tyin nanducú ndo tsi Nyoo, nācatya ndo nuu ndo. Tan tyihí ndo cuca jiñi ndo.

<sup>18</sup> Tacan tan ña cua tuvi iñi nyi<sup>vi</sup> tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

*Tsa vaha tsa iyó nda gloria  
(Lc. 12.33-34)*

<sup>19</sup> Ña jacaya ndo tsa cuca tsa iyó nu ñuhu ñay<sup>vi</sup> ihya. Tyin coto tiv<sup>i</sup> tsi jaha tiqixin o jaha cuxi. O cuv<sup>i</sup> quihv<sup>i</sup> ñasuhu, tan suhu nu tandih<sup>i</sup> tsa jacaya ndo.

<sup>20</sup> Vaha ca jacaya ndo tsa cuca tsa iyó nda gloria. Tyin ña cua cundi<sup>hi</sup> tsi ndacan. Tyin ña cuv<sup>i</sup> tiv<sup>i</sup> tsi ndacan, tan nduve qui<sup>ti</sup> jat<sup>iv</sup> itsi, ndi nduve ñasuhu.

<sup>21</sup> Tyin nu natyih<sup>i</sup> vaha ndo tsa cuca, ican cua cunyaa ndih<sup>i</sup> aña ndo.

*Nu caahán ra Jesús tyin na jaha yo cuenda ñuhu nditsin tsa tyih<sup>i</sup> ra aña yo*

*(Lc. 11.34-36)*

<sup>22</sup> Tinuu ndo cuv<sup>i</sup> ñuhu nditsin tsi ndo. Tatun vaha tinuu ndo, tan<sup>ii</sup> cuñu ñuhu ndo tan iyó ñuhu nditsin. [Tan tuhun ihya cuñ<sup>i</sup> tsi caty<sup>i</sup> tyin tatun iyó ñuhu nditsin Nyoo aña ndo cuv<sup>i</sup> ndo nyi<sup>vi</sup> vaha.]

<sup>23</sup> Maa tyin tatun ña vaha tinuu ndo, tandih<sup>i</sup> cuñu ñuhu ndo tan nyi<sup>i</sup> tsi nu naa. Tan tacan tucu tatun nduve ñuhu Nyoo iyó aña ndo, [cuv<sup>i</sup> ndo tumaa iin ra cuaa. Nu naa cuahán ndo tan ña cuv<sup>i</sup> nyehe ndo ity<sup>i</sup> vaha tsa cuahán nu nyaá Nyoo].

*Nu caahán ra Jesús tyin ña cuv<sup>i</sup> tyaa yahvi yo tsi Nyoo tatun cuñ<sup>i</sup> xaan ca yo xuhun*

*(Lc. 16.13)*

<sup>24</sup> Iin musu ña cuv<sup>i</sup> coo uvi tsitoho ra. Tyin musu can cuñ<sup>i</sup> ca ra tsi iin ra tan ñavin ca tsi inga ra. Tan tyaa

yahvi ra tsi iin ra, tan ñavin ca tsi inga ra. Tan tacan tucu nyooho, ña cuv<sup>i</sup> cuñi ndo tsi Nyoo, tan cuñi tucu ndo xuhun.

*Nu caahán ra Jesús tyin ña caca xaan iñi yo naa ndih<sup>i</sup> tsa tsiñ<sup>i</sup> ñuhu tsi yo*

*(Lc. 12.22-31)*

<sup>25</sup> Yacan cuenda caty<sup>i</sup> yu tsihin ndo, tyin ña caca xaan iñi ndo nácaa ñih<sup>i</sup> ndo tsa catsi ndo tan tsa coho ndo. Ndi ña caca iñi ndo nácaa cua ñih<sup>i</sup> ndo jahma ndo. Tyin nu Nyoo nyaá yahvi ca ñay<sup>vi</sup> tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñay<sup>vi</sup> iyó yo. Tan ña y<sup>ii</sup> cuhva ra inga tsa tsiñ<sup>i</sup> ñuhu tsi yo].

<sup>26</sup> Nyehe ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyih<sup>i</sup> vaha ti tsa catsi ti. Maa tyin tsatsí ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuv<sup>i</sup> nyooho tan ñavin ca saa can naha ti.

<sup>27</sup> Tan vasu ndi maa tsicá xaan iñi ndo maa tyin ña cua cuv<sup>i</sup> jandusucun ca ndo ndi luxu ca tsi ndo.

<sup>28</sup> Tan tatun ndi luxu can ña cuv<sup>i</sup> tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña tavi tun yuhva.

<sup>29</sup> Maa tyin caty<sup>i</sup> yu tsihin ndo tyin ndi ra cuv<sup>i</sup> rey Salomón tsihin tandih<sup>i</sup> tsa cuca ra, tan ña tsindits<sup>i</sup> ra jahma s<sup>ii</sup> ca caá tan ñavin ca tsa jacundits<sup>i</sup> Nyoo tsi yutun ita can.

<sup>30</sup> Tatun tacan ñi jacundits<sup>i</sup> Nyoo tsi yutun ita tsa iyó tsitsi cuhu vityin, tan tyaan cua cuv<sup>i</sup> tun nducu tan cayu tun. ¿A ña cua jatyinyee cuaha ca ra tsi ndo? Tyin nyooho cahnu ca cuv<sup>i</sup> ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra.

<sup>31</sup> Yacan cuenda ña cua caca xaan iñi yo tan caty<sup>i</sup> yo: “¿Náa cua catsi yo, o náa cua coho yo, o nácaa cua ñih<sup>i</sup> yo jahma cunditsi yo?”

<sup>32</sup> Tyin nyi<sup>vi</sup> tsa ña tsitó tsi Nyoo tsicá xaan iñi ñi yacan. Maa tyin

nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsiñí ñuhu tsi ndo.

<sup>33</sup> Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsiñí ñuhu tsi ndo.

<sup>34</sup> Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñí ñuhu tsi ndo ityaan. Caca iñi ndo tan nyehe ndo nácaa yahá ndo quivi vityin jahá Nyoo.

## 7

*Ña cahan yo tsa caá inga nyivi  
(Lc. 6.37-38, 41-42)*

<sup>1</sup> Ña cahan ndo tsa caá inga nyivi, tacan tan Nyoo ña cua cahan ra tsa caá ndo.

<sup>2</sup> Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo.

<sup>3</sup> ¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un?

<sup>4</sup> Tatun tinuu maa un nyii iin yutun cahnu, ¿nacaa cuví catyi un tsihin ra yañi un: “Ñaha, na tava yu tsahan luhlu tsa nyii tinuu un”?

<sup>5</sup> Yooho tsa jahá tyin vaha xaan un! Tava jihna yutun cahnu tsa nyii tinuu un. Tyin tacan tan cuvi nyehe vaha un tsahan luhlu tsa cua tava un tinuu yañi un.

<sup>6</sup> Ña jañihi ndo cahan ndo tuhun Nyoo tsihin nyivi ña cuñí coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

*Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo  
(Lc. 11.9-13; 6.31)*

<sup>7</sup> 'Ndacan ndo tsa tsiñí ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña.

<sup>8</sup> Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

<sup>9</sup> 'Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi?

<sup>10</sup> O tatun tsicán tsi tyaca, ¿a cua cuhva ndo iin coo itsi?

<sup>11</sup> Nyoooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

<sup>12</sup> 'Tumaa cuñí ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsaha Nyoo tsi ra Moisés tan tacan tucu nyaá nu tandihi libru tsa tyaá ra cuvi ndusu yuhu Nyoo tahañ tsanaha.

*Yuvehe tihin tan ityi cuiñi tsa cuahán nu nyaá Nyoo  
(Lc. 13.24)*

<sup>13</sup> 'Nducu ndo cuhva quihvi ndo yuvehe tihin. Tyin quihin yuvehe, tan quihin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can.

<sup>14</sup> Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

*Tsihin tsa javahá nyivi, tan nacotó yo tatun nyivi vaha, a nyivi ña vaha cuví ñi  
(Lc. 6.43-44)*

<sup>15</sup> 'Jaha ndo cuenda tsi ndo tsihin ra vatya naha ra. Tyin catyi ra naha tyin ndusu yuhu Nyoo cuví ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quiti xaan cuví ra naha.



16 Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua kuhva tun mangu, tan ndi iñu nduhva ña cuví kuhva tsi yucu vixi.

17 Tan tacan tucu tandihí yutun vaha. Tsahá tun tsiti vaha. Tan tandihí yutun ña vaha, tsahá tun tsiti ña vaha.

18 Tyin yutun vaha, ña cuví kuhva tun tsiti ña vaha. Tan ndi yutun ña vaha ña cuví kuhva tun tsiti vaha.

19 Tan tandihí yutun tsa ña tsahá tsiti vaha, cahnya yo tsi tun. Tan cayu tun.

20 Tan tacan tsihin tsa javahá nyívi, cuví nacoto ndo tsi ñi tatun nyívi vaha o nyívi ña vaha cuví ñi.

*Nu catyí ra Jesús tyin ña tandihí nyívi tan cua quihvi ñi nu ndacá ñaha Nyoo*

*(Lc. 13.25-27)*

21 'Ña tandihí nyívi tsa catyí tsihin yu: "Jutu Mañi yu, Jutu Mañi yu", cua quihvi ñi nu ndacá ñaha Nyoo nda gloria. Maa tyin nyívi tsa javahá tsa catyí maa Nyoo Jutu yu, juvin ñi can cua quihvi nu ndacá ñaha ra.

22 Quiví tatsi tuñi Nyoo tsi nyívi, cuaha xaan ñi cua catyí ñi tsihin yu tyehen: "Jutu Mañi yu, nyuhu cañan ndi tuhun cun tsihin nyívi. Tan tsihin sívi un tava ndi tatyí ña vaha tsa yihí tsi ñi. Tan cuaha xaan tsa iyo javaha ndi tsihin sívi un", cua catyí ñi tsihin yu.

23 Tacan tan yuhu cua catyí yu tsihin ñi: "Ña nacotó yu tsi nyooho. Catsbyo nyaha ndo nu nyaá yu tandihí nyooho tsa javahá maa maa ñi tsa ña vaha", cua catyí yu tsihin ñi.

*Nu caahán ra Jesús nácaa cua cacu nyívi tsa tyaá yahvi tuhun caahán ra, tan nyívi tsa ña tyaá yahvi tsa caahán ra, ña cua cacu ñi*

*(Lc. 6.47-49; Mr. 1.22)*

24 'Tacan catyí yu tsihin ndo, tyin nyívi tsa tsiñi tsa caahán yu tan

javahá ñi kuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava.

25 Tan quitsaha cuún ñihi savi. Tan cuaha xaan ndutya ñuhu yaha tsata vehe can. Tan ñihi xaan quitsaha yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava.

26 Maa tyin nyívi tsa tsiñi tuhun caahán yu, tan ña javahá ñi kuhva cuñi yu; cuví ñi tumaa iin ra soho, ra tsa javaha vehe nu nyívi.

27 Tan quitsaha cuún ñihi savi. Tan cuaha xaan ndutya ñuhu yaha nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduva tsi tan cuna tsi —catyí ra Jesús tsihin ñi tsa nyicún tsi ra.

28 Kuhva tsa ndihí cañan ra Jesús tsihin ñi, iyo xaan cuñi ñi tsihin tsa caahán ra,

29 tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

## 8

*Nu janduvaha ra Jesús tsi iin ra ndohó cuehe tyaahyú*

*(Mr. 1.40-45; Lc. 5.12-16)*

1 Kuhva tsa nuu ra Jesús yucu can, cuaha xaan nyívi nyicún tsi ra.

2 Tan tsa iin ra ndohó cuehe tyaahyú, tan tsicuiñi tsiti ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

3 Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvaha ra.

4 Tacan tan catyí ra Jesús tsihin ra:

—Jihna, coto ñahñi catyí tuhun un tsihin nyívi. Maa tyin cuaahan nu nyaá ra cuví jutu, tan janaha un tsi un tsi ra. Tan kuhva un tsa taahán tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuví

tsi iin tsa ndaa tsi ra jutu can tan tsi nyivi tyin tsa nduvaha un.

*Nu janduvahá ra Jesús tsi musu iin ra cuví capitán*

*(Lc. 7.1-10)*

<sup>5</sup> Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyii ra Jesús tan caahán ndaahvi ra tsihin ra,

<sup>6</sup> tan catyí ra:

—Jutu Mañi yu, musu yu ñihi xaan cuuhví ra, canyí ra nu cama. Ña cuví nduvita ra tyin nduxii ra, tan yaha xaan cuhva cuñi ra.

<sup>7</sup> Tan catyí ra Jesús tsihin ra:

—Cuhun maa yu tan kujanduvaha yu tsi ra —catyí ra tsihin ra.

<sup>8</sup> Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahan ñi un tan musu yu cua nduvaha ra.

<sup>9</sup> Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

<sup>10</sup> Tan tsa tsiñi ra Jesús tsa cahan ra can, tan iyo xaan cuñi ra. Tan catyí ra tsihin nyivi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan ñni tumaa tsinú ñni ra ihya.

<sup>11</sup> Tan catyí yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo.

<sup>12</sup> Tan nyivi tsa taahán tsi cuhun gloria, ña cua cuhun ñi, tyin cua cuhun ñi nu naa. Tan cua vacu tsaá ñi tan catsan ña cua cuví nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyivi nyicún tsi ra.

<sup>13</sup> Tacan tan catyí ra tsihin ra capitán can:

—Cuaahan, tan na nduvaha musu un tsa cuenda tyin tsinú ñni un tsi yu —catyí ra Jesús tsihin ra capitán.

Tan juvin ñi cuhva can nduvaha musu ra.

*Nu janduvaha ra Jesús tsi tyiso ra Pedro*

*(Mr. 1.29-31; Lc. 4.38-39)*

<sup>14</sup> Tsa yaha can, tan cuahán ra Jesús yuvehe ra Pedro. Tan nyehe ra tsi ña tyiso ra, canyí ña nu tsito tyin yihí cahñi tsi ña.

<sup>15</sup> Tan tñin ra ndaha ña, tan iin yaha ñi quita cahñi tsi ña. Tan nduvita ña, tan quitsaha nanducú ña tsa catsi ra naha.

*Nu cuaha xaan nyivi cuuhví janduvaha ra Jesús*

*(Mr. 1.32-34; Lc. 4.40-41)*

<sup>16</sup> Tan tsa cunaaha, cuaha xaan nyivi yihí tatyí ña vaha tsindaca nyivi tsi ra Jesús. Tan tsihin intuhun ñi tuhun cahan ra Jesús tan quita tatyí ña vaha tsi ñi. Tan tandihí ñi cuuhví iin yaha ñi nduvaha ñi.

<sup>17</sup> Tacan cuví tyin tacan tan cundaá tsa cahan Jutu Mañi yo tsihin yuhu ra Isaías, ra cuví ndusu yuhu ra tahañ tsanaha. Tan catyí ra tyehen: “Maa ra quihñin ra cuehe tsa yihí tsi yo, tan quihñin nyaa ra tsa uhvi tsi yo.”

*Nyivi tsa cuñi quihvi cuenda ra Jesús*

*(Lc. 9.57-62)*

<sup>18</sup> Tan tsa nyehe ra Jesús tyin cuaha xaan nyivi tsinú nduvi nu nyii ra, catyí ra tsihin ra tsicá tsihin ra tyin cua yaha ra naha inga tsiyo miñi.

<sup>19</sup> Tacan tan tsaá iin ra maestro cuenda ley vehe ñuhu tan catyí ra tsihin ra:

—Maestro, cuñi yu cunyicun yu tsi un tandihí ñi ityi nu cuahán un —catyí ra.

<sup>20</sup> Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayi tsa quee nda gloria, nduve nu maa cunyanaa luxu jiñi yu iyó —catyí ra.

<sup>21</sup> Inga ra tsa tsicá tsihin ra nacahan ra tsihin ra:

—Taa, cūhva na cūhun jihna yu cucutsi yu tsi jutu yu, —catyí ra.

<sup>22</sup> Tan catyí ra Jesús tsihin ra:

—Naha yooho quitsi nyicun un tsi yu. Tan nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

*Nu jacutaxín ra Jesús tatyí xaan nu miñi*

(Mr. 4.35-41; Lc. 8.22-25)

<sup>23</sup> Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra.

<sup>24</sup> Tan ñihi xaan quitsaha yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixí ra.

<sup>25</sup> Tan ra tsicá tsihin ra jandoto ra naha tsi ra, tan catyí ra naha:

—¡Jutu Mañi yu, jacacu tsi yo, tyin cuñi cunaa yo!

<sup>26</sup> Tan catyí ra Jesús tsihin ra naha:

—¿Nacuenda yuuhvi xaan ndo? ¡Nyooho tsa luxu xaan tsinú iñi tsi yu! —catyí ra Jesús.

Tacan tan nduvita ra tan cahan ra tsihin tatyí tan tsihin ndutya, tan cutaxin tsi.

<sup>27</sup> Tan iyo xaan cuñi ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

*Nu nduvaha uvi ra ñuu Gadara ra yihí tatyí ña vaha naha ra*

(Mr. 5.1-20; Lc. 8.26-39)

<sup>28</sup> Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quita ra naha nu ñaña cumí sandu. Xaan xaan ra naha, tan yoñi maa cuví yaha ityi can.

<sup>29</sup> Tan caná tsaá ra naha, tan catyí ra naha:

—¿Náa cuñi un tsihin ndi, yooho Jesús Sehe Nyoo? ¿A vatsi un vatsi janyehe un tundoho tsi ndi tsa ndi cumañi ca tsaá quivi? —catyí ra naha jahá tatyí ña vaha can.

<sup>30</sup> Tan yatyin ñi can yucú cuaha quini tsatsi ti naha ti.

<sup>31</sup> Tan catyí nu tatyí ña vaha can tsihin ra Jesús:

—Tatun cua tava un tsi ndi, cūhva tsa quihvi ndi tsitsi quini can naha ti —catyí nu tatyí ña vaha can nahnu.

<sup>32</sup> —Vaha. Quihvi ndo —catyí ra Jesús.

Tan quita nu tatyí ña vaha can nahnu, tan quihvi nahnu tsitsi tandihí quini tsa nyecú can. Tan tandihí quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

<sup>33</sup> Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihí tsa cuví tsi ra tsa yihí tatyí ña vaha can naha ra.

<sup>34</sup> Tacan tan tandihí nyivi ñuu can, tsañan ñi tsinyehe ñi tsi ra Jesús, tan cahan ndaahvi ñi tsihin ra na quita ra ñuu can.

## 9

*Nu janduvaha ra Jesús tsi iin ra xii*  
(Mr. 2.1-12; Lc. 5.17-26)

<sup>1</sup> Tacan tan quihvi ra Jesús tsitsi iin yutun ndoo tan yahá ra miñi, tan tsaá ra nda ñuu nu iyó ra.

<sup>2</sup> Nu nyii ra ican, tsindaca nyivi tsi iin ra cuuhvi tsa ña cuví nacanda tyin nduxii ra, tan canyii ra nu tsito. Tan tsa nyehé ra Jesús tyin tsinú xaan iñi ñi tsi ra, quitsaha caahán ra tsihin ra cuuhvi can:

—Jandu iin iñi un, sehe yu, tyin tsa tsicoo tucanhu iñi cuatyí un —catyí ra Jesús tsihin ra.

<sup>3</sup> Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoo cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

<sup>4</sup> Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha?

<sup>5</sup> Tyin ¿ndáa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Nduvita tan caça un”?

<sup>6</sup> Vityin cua janaha yu tsi ndo tyin yuhu Rayi tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihin tsito un tan cuanuhu nda yuvehe un —catyí ra.

<sup>7</sup> Tacan tan nduvita ra tan cuanuhu ra nda yuvehe ra.

<sup>8</sup> Tan nyivi tsa nyehe tsa cuvi, nayuhvi xaan ñi. Tan quitsaha jacahnú ñi tsi Nyoo tyin tsaha ra tunyee iñi tsi nyivi.

*Nu cana ra Jesús tsi ra Mateo  
(Mr. 2.13-17; Lc. 5.27-32)*

<sup>9</sup> Yaha can tan quita ra Jesús ican. Tan nyehe ra tsi iin ra tsa nañi Mateo, nyaá ra naquihin ra xuhun tsa tyahvi nyivi Israel tsi ra ndaca ñaha. Tan catyí ra tsihin ra:

—Cohon tsihin yu.

Tacan tan nduvita ra Mateo tan cuahán ra tsihin ra Jesús.

<sup>10</sup> Tacan tan cuvi tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaa, tan tsihin inga ca ra iyó cuatyí naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra.

<sup>11</sup> Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsica tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

<sup>12</sup> Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi.

<sup>13</sup> Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quiti tan cuhva cuenda ndo tsi

yu.” Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

*Nu tsica tuhun nyivi tsi ra Jesús  
tatan taahán tsi tsa coo nyitya ñi  
(Mr. 2.18-20; Lc. 5.33-35)*

<sup>14</sup> Tacan tan ra nyicún tsi ra Juan, ra jacoondutya tsi nyivi, natuhva ra naha nu nyaá ra Jesús tan tsica tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yoocho ña tuhvá ra naha coo nyitya?

<sup>15</sup> Tan nacahan ra Jesús tan catyí ra:

—¿A cuví cunyece cuihya nyivi yucú vico tindaha tun nyii ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

*Nu caahán ra Jesús tyin ña nacatsi  
tahan tuhun tsahnu tsa iyó nyivi tsihin  
tuhun tsaa tsa jacuahá ra tsi ñi  
(Mr. 2.21-22; Lc. 5.36-39)*

<sup>16</sup> Ña tuhvá nyivi naquicú iin jahma tuuhu tsihin iin jahma tsaa, tyin cua nandiyi nu naquicu ñi tsihin tsa tsaa can, tan cua tyahnya tsi inga tsaha.

<sup>17</sup> Tan tacan tucu, ña cuví tyihí nyivi vinu tsaa tsitsi ñi tsaahnu tyin tatun tacan javaha ñi, cua tyahnya ñi can, tan cua tivi vinu can tan cua tivi ndihi tucu ñi can. Yacan cuenda taahán tsi tyihi yo vinu tsaa tsitsi ñi tsaa. Tyin tacan tan ña tyahnya ñi can tan ndi vinu can ña tivi tsi.

*Nu nduvaha ñaha sehe ra Jairo tan  
ñaha tsa tñi jahma ra Jesús  
(Mr. 5.21-43; Lc. 8.40-56)*

<sup>18</sup> Tsitsi tsa caahán ra Jesús tuhun ihya, tsaa iin ra cumí tyiñu cuenda vehe ñuhu nyivi Judea tan tsicuñi tsi ra nuu ra Jesús, tan catyí ra:

—Ndi tsihi cui ñi sehe yu, maa tyin tatun yoocho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.



<sup>19</sup> Nduvita ra Jesús tsihin ra tsicá tsihin ra tan cuahán ra naha tsihin ra.

<sup>20</sup> Tacan tan iin ñaha cuuhvi natuhva ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaa ña ndaha ña jahma ra,

<sup>21</sup> tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

<sup>22</sup> Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Jandunhi iñi un, xihí, tsa nduvaha un tyin tsinú iñi un —catyí ra.

Tan juvin ñi cuhva can tan tsicuiñi tsa cuún niñi ña.

<sup>23</sup> Yaha can tan tsaá ra Jesús vehe ra cumi tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyivi tsa yucú can iyo xaan tsacú ñi.

<sup>24</sup> Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixi ña —catyí ra.

Tan tsa cahan ra tacan quitsaha tsacú naaha ñi.

<sup>25</sup> Tan ra Jesús tava ra tsi ñi ityi tsata vehe. Tacan tan quihvi ra tsitsi vehe nu canyi ñaha can, tan tin ra ndaha ñaha luhlu can, tan nduvita ña.

<sup>26</sup> Tan tandihi nyivi iyó ityi ñuu can tsito ñi tsa nandoto ñaha luhlu can.

*Nu janduvaha ra Jesús tsi uvi taahan ra cuaa*

<sup>27</sup> Tsa quita ra Jesús ican, tan uvi taahan ra cuaa nyicún tsi ra, caná tsa ra naha tan catyí ra naha:

—¿Cundahvi iñi tsi ndi, yooho ra cuví tata ra David! —catyí ra naha.

<sup>28</sup> Tan tsa yaha quihvi ra Jesús tsitsi vehe, ra cuaa can, natuhva ra naha nu nyaá ra, tan maa ra Jesús quitsaha tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahan ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

<sup>29</sup> Tacan tan tyanaa ra Jesús ndaha ra tinuu ra naha tan catyí ra tsihin ra naha:

—Na cuvi maa tumaa cuhva tsinú iñi ndo —catyí ra.

<sup>30</sup> Tan nduvaha tinuu ra naha. Tan catyí ra Jesús tsihin ra naha:

—Coto ñahñi catyí tuhun ndo tsihin ndi intuhun nyivi.

<sup>31</sup> Maa tyin cuahán ra naha tan quitsaha catyí tuhun ra naha tsa javaha ra Jesús tsihin ra naha tsihin tandihi nyivi iyó ityi ñuu can.

*Nu janduvaha ra Jesús tsi iin ra ñihí*

<sup>32</sup> Tsa cuahán ra naha, juhva nyivi tsindaca ñi tsi iin ra ñihí tsa yihí tatyí ña vaha nu nyii ra Jesús.

<sup>33</sup> Tan tsa tava ra Jesús tatyí ña vaha can, tacan tan nacahan ra can. Tan iyo xaan cuñi nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tava tatyí ña vaha tsi nyivi —catyí ñi.

<sup>34</sup> Maa tyin ra cuvi fariseo naha ra, catyí ra naha:

—Ra ihya tava ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

*Nu caahan ra Jesús tyin ña cuaha maa nyivi jahá tyiñu cuenda Nyoo iyó*

<sup>35</sup> Ra Jesús tsahan ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahan ra tuhun Nyoo nácaa ndacá ñaha ra tsi nyivi. Tan janduvahá ra tandihi nuu cuehe tsa ndohó ñi.

<sup>36</sup> Tan tsa nyehé ra tsi nyivi, cundaahvi xaan iñi ra nyehe ra tsi ñi, tyin nyehé ñi tundoho tan iyó ñi tucuihya iñi, tumaa mbee ticatyí tsa nduve tsi-toho iyó.

<sup>37</sup> Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha.

<sup>38</sup> Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

## 10

*Nu nacatsi ra Jesús tsa utsi uvi ra  
cua caca tyiñu ra*

(Mr. 3.13-19; Lc. 6.12-16)

<sup>1</sup> Tacan tan cana ra Jesús tsi tsa utsi uvi ra tsicá tsihin ra tan tsaha ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhví náa ndihi ca nu cuehe tan tsa uhvi.

<sup>2</sup> Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañí tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha;

<sup>3</sup> tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañí tucu Tadeo;

<sup>4</sup> tan ra Simón ra nyii cuenda partido tsa cuñi cahun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

*Nu tava tyiñu ra Jesús tsi tsa utsi uvi  
ra tsicá tsihin ra tyin cahan ra naha  
tuhun Nyoo*

(Mr. 6.7-13; Lc. 9.1-6)

<sup>5</sup> Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cahun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria.

<sup>6</sup> Cuaahan ndo nu yucú mbee tsa tsinaa tsa cuví nyivi Israel.

<sup>7</sup> Cuaahan ndo cua cahan ndo tyin tsa tsa quivi tsa cua cundaca ñaha Nyoo tsi nyivi.

<sup>8</sup> Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyooho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

<sup>9</sup> Ña cuiso ndo xuhun; ndi xuhun cuaan, ndi xuhun cuitsin, ndi xuhun cuaaha.

<sup>10</sup> Tan ña cuiso ndo ndi yunu tsa cuenda tsa caca ityi ndo. Intuhun ñi camisa tsa nditsín ndo cahun tsihin ndo. Tan ña cuiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

<sup>11</sup> Tatun tsa ndo iin ñuu cahnu o iin ñuu luhlu, nducu ndo iin nyivi vaha iñi, tan ndoo ndo yuvehe ñi nda cuanda quita ndo ñuu can.

<sup>12</sup> Tatun cua quihvi ndo iin vehe, cuhva ndo nacumi tsi nyivi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”.

<sup>13</sup> Tan tatun nyivi iyó yuvehe can tan nacotó ñi tyin tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can.

<sup>14</sup> Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi.

<sup>15</sup> Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

*Nu catyí tuhun tsi náa ndihi tun-  
doho cua nyehe nyivi tsicá tyiñu Nyoo*

<sup>16</sup> ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quití xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti.

<sup>17</sup> Jaha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu.

<sup>18</sup> Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví.

<sup>19</sup> Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsa cuhva tsa cua cahan



ndo, Nyoo cua cuhva ra tuhun cahan ndo.

<sup>20</sup> Tyin ñavin maa ndo cua cahan, tyin maa Tatyí Ii Jutu yo Nyoo tsa iyó añima ndo cua cuhva ra tsa cahan ndo.

<sup>21</sup> 'Yihí rayíi cua xico ra naha juven ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahñi nyivi can tsi ñi.

<sup>22</sup> Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú iñi ndo tsi yu, tacan tan cua cacu ndo.

<sup>23</sup> Tatun nyaa ndaha ñi tsi ndo iin ñuu, cahun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cahun ndo tandihí ñuu nu iyó nyivi Israel tan cua quitsi nyico yuhu, Rayíi tsa quee nda gloria.

<sup>24</sup> 'Iin ra luhlu tsa tsicá escuela, ña cahnú cuví ra tan ñavin ca ra jacuahá tsi ra. Tan iin musu, ña cahnú ca cuví ra tan ñavin ca tsitoho ra.

<sup>25</sup> Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnú ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyivi cuenda yu.

*¿Yóo tsii taahán tsi nayuhvi yo, a tsii nyivi o tsii Nyoo?*

*(Lc. 12.2-7)*

<sup>26</sup> Yacan cuenda ña nayuhvi ndo tsi nyivi, tyin nduve tsa nyíi xeehe tsa ña cua quituvi. Tan nduve tsa xeehe tsa ña cua coto nyivi.

<sup>27</sup> Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe çana tsa ndo can, na coto tandihí nyivi.

<sup>28</sup> Ña nayuhvi ndo tsi nyivi tsahñi cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi

maa Nyoo, ra cuví janaa cuñu ñuhu ndo tan añima ndo tsitsi anyaya.

<sup>29</sup> 'Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo.

<sup>30</sup> Tyin nda cuanda ixi jiñi ndo tan tsitó Nyoo najava taahan tsi iyó, tyin tsa nacahví ra intuhun intuhun tsi.

<sup>31</sup> Yacan cuenda ña nayuhvi ndo. Nyooho, nyaá yahvi ca ndo nu Nyoo tan ñavin ca tsa cuaha saa.

*Ña cua nayuhvi yo cahan yo tuhun ra Jesucristo tsihin nyivi*

*(Lc. 12.8-9)*

<sup>32</sup> Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi.

<sup>33</sup> Maa tyin nyivi cua tyihi xeehe tsi yu nuu inga nyivi, tacan tucu yuhu cua tyihi xeehe yu tsi ñi nuu Jutu yu ra nyaá gloria.

*Nu caahán ra Jesús tyin tsa cuenda ra tan cua cañi tahan nyivi tsihin tahan ñi*

*(Lc. 12.51-53; 14.26-27)*

<sup>34</sup> 'Ña cuñi ndo tyin yuhu vatsí cuhva yu tsa coo taxin nyivi nu ñuhu ñayivi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan.

<sup>35</sup> Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña.

<sup>36</sup> Tan yacan cuenda juven ñi maa nyivi vehe ndo cua cuxaan iñi tsi ndo.

<sup>37</sup> Nyivi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyivi cuenda yu. Tan nyivi cuñi ca tsi sehe yíi ñi a sehe sihi ñi, tan ñavin ca tsi yuhu, ña cuví cuví ñi nyivi cuenda yu.

<sup>38</sup> Tan nyivi tsa ña cuñi nyehe tundoho tan ndi ña cuñi ñi cuhva ñi ñayivi iyó ñi tsa cuenda yu, ña taahán tsi cuví ñi nyivi cuenda yu.

<sup>39</sup> Tyin nyivi cuñi xaan ca ñayivi iyó ñi, cua cunaa ñi. Maa tyin nyivi cua cuhva ñayivi iyó ñi tsa cuenda yu, cua ñihi ñi ñayivi nyito coo ñi.

*Nu caahán ra Jesús nácaa cua ñihi yo tsa vaha Nyoo*

(Mr. 9.41)

<sup>40</sup> 'Nyivi tsa naquihín cuenda tsi nyooho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsi tsi yu.

<sup>41</sup> Nyivi naquihín cuenda tsi iin ra cuví ndusu yuhu Nyoo tyin Nyoo jaquitsi tsi ra, cua ñihi ndihi ñi tsa vaha tsa cua ñihi ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi.

<sup>42</sup> Tan yoo nyivi tsa cuhva intuhun vasu ndutya vitsin coho nyivi tsa nyicún tsi yu, cua ñihi ndihi ñi tsa cua cuhva Nyoo tsi ñi tsa nyicún tsi yu —catyí ra Jesús.

## 11

*Nu jacuhun ra Juan tsi ra tsicá tsihin ra nu nyii ra Jesús*

(Lc. 7.18-35)

<sup>1</sup> Tsa ndihi cahan ra Jesús tsihin tsa utsi uvi ra tsicá tsihin ra, tacan tan quitá ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

<sup>2</sup> Tan ra Juan nyii ra vehe caa quivi can, tan ñihi tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyii ra.

<sup>3</sup> Tan catyí ra naha tsihin ra:

—¿A juvin yooho cuví ra Cristo tsa nyaa tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

<sup>4</sup> Nacahan ra Jesús tan catyí ra:

—Cuaahan ndo tan catyí tuhun ndo tsihin ra Juan tandihi tsa nyehé ndo, tan tsa tsiñi ndo.

<sup>5</sup> Tan catyí ndo tsihin ra: nyivi cuaa nanyehé ñi, nyivi coxo nacacá ñi,

nyivi ndohó cuehe tyaahyú nduvahá ñi, nyivi soho nacuñi ñi, tan nandotó nyivi tsa tsa tsihi, tan nyivi ndaahvi tsiñi ñi tuhun Nyoo nácaa cua cacu ñi.

<sup>6</sup> 'Tan catyí ndo tsihin ra tyin sii xaan cua cuví tsi nyivi tsa nyicún tsi yu tun ña ndu uvi iñi ñi —catyí ra Jesús tsihin ra naha.

<sup>7</sup> Tsa cuahán ra naha, tan quitsaha caahán ra Jesús tuhun ra Juan tsihin nyivi, tan catyí ra:

—Quivi tsa tsahan ndo tsinyehé ndo nu tsiqui, ¿náa cua nyehe ndo cuñi maa ndo? ¿A nyehe ndo iin ndoo tsa janduvá tatyí?

<sup>8</sup> ¿O náa cuví tsa tsinyehé ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuví rey.

<sup>9</sup> ¿A ña tsahan ndo tsinyehé ndo tsi iin ra cuví ndusu yuhu Nyoo? Juvin. Tyin ra ican cahnu ca cuví ra tan ñavin ca tandihi ra cuví ndusu yuhu Nyoo.

<sup>10</sup> Juvin ñi tuhun ra Juan cuví tsa nyaá nuu tutu Nyoo. Tan catyí tsi tyehen:

Yuhu cua jacuhun yu iin ra cahan tuhun yu tsa ndi cumañi ca cuhun yu.

Tyin natyiso vaha ra ityi nu cua cuhun un.

<sup>11</sup> 'Tsa nditsa catyí yu tsihin ndo, tyin tsitsi tsa tandihi nyivi tsa tsicoo tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo aña, vasu ra lihli ñi cuví ra, cahnu ca ra cuví ra tan ñavin ca ra Juan.

<sup>12</sup> 'Nda cuanda quivi tsa tsaá ra Juan tan nda vityin, nyivi ñihi iñi, nducú xaan ñi cuhva ñihi ñi tsa cundaca ñaha Nyoo tsi ñi.

<sup>13</sup> Ra Moisés cahan ra tuhun nácaa cua cundaca ñaha Nyoo tsi nyivi, tan tacan tucu tandihi ra cuví ndusu yuhu Nyoo. Tacan tan quitsi ra Juan jacoto ra tsi nyivi tyin tsa tsaá quivi tsa cua cundaca ñaha Nyoo.

14 Tan ra Juan cuví ra Elías ra tsa nyaá tsa cua quitsi, tun nyooho tan cuñí ndo tsinu iñi ndo tsa caahán yu.

15 Nyooho tsa iyó soho, tyaa soho ndo tsa caahán yu.

16 '¿Náa tsihin jandu inducu yu tsi nyooho, nyivi tsa iyó quivi ihya? Tumaa ra nyihi cuví nyooho. Tyin ra nyihi jasiqui nuyahvi. Caná tsa tahan ra naha tan catyí ra naha:

17 “Tivi ndi tiyoo tan ña tsañi ndo yaa. Tan tsita ndi yaa cuihaya, tan ña tsacu ndo”, catyí ra nyihi. [Tan tacan cuví nyooho tyin ndi intuhun cuhva ña taahán iñi ndo.]

18 Tyin ra Juan, ra jacoondutyá, quitsi ra tan ña tsatsi vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi ra.

19 Yahá can tan tsaá tucu yuhu Rayii tsa quee nda gloria. Tan tsatsi yu tan tsihi yu. Tan catyí ndo tyin tsatsi xaan yu tan tsihi xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahán ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

*Nyivi ña cuñi naquihin cuenda tuhun caahán ra Jesús cua nyehe ñi tundoho*

*(Lc. 10.13-15)*

20 Tacan tan quitsahá caahán ra Jesús tsihin nyivi tandihi ñuu nu javahá ra cuaha tsa iyo, tyin ña nasamá ñi cuhva iyó ñi, tan catyí ra:

21 —¡Ndahvi nyooho, nyivi ñuu Corazin! ¡Ndahvi nyooho nyivi ñuu Betsaida! Tyin nyehe ndo tsa iyo tsa javahá yu tan ña nasamá ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehe nyooho vityin, numi xaan cua cunditsi ñi jahma tucuihaya iñi tan cua coso ñi nyaa nuu ñi: tyin ndu uvi iñi ñi cuatyí ñi.

22 Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón.

23 Tan nyooho nyivi ñuu Capernaum, cuñí maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihi anyaya. Tun tsatyin tsicoo tsa iyo nyehe ñi ñuu Sodoma tumaa tsa nyehe ndo ihya, ñuu can ña tsinaa tsi tan iyó tsi nda cuanda vityin.

24 Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi nyooho tan ñavin ca nyivi ñuu Sodoma.

*“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo*

*(Lc. 10.21-22)*

25 Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihi xeehe un tuhun ihya nuu ra tsitó xaan tan ra nyityi xaan naha ra. Tan jandunditsi un tuhun ihya nuu ra nyihi.

26 Tacan Tyaa, tyin tacan cuñí maa un —catyí ra Jesús.

27 Tacan tan catyí tucu ra tsihin nyivi:

—Jutu yu nacuhva cuenda ra tandihi tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñí yu tsa nacoto tsi Jutu yu, cua janaha yu tsi ra tsi ñi.

28 Tandihi nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo.

29 Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo.

30 Ña yii tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

## 12

*Quīvī quitatú nȳivī cuví tsi tan ra tsicá tsihin ra Jesús tuhún ra nahayoco itya trigu*

*(Mr. 2.23-28; Lc. 6.1-5)*

<sup>1</sup> Iin quīvī quitatú nȳivī, yaha ra Jesús mahñu nu iyó tsa tatsi nȳivī. Tan tsaꝯ soco tsi ra tsicá tsihin ra. Tan quitsaha tuhún ra naha yoco trigu can tan tsatsí ra naha.

<sup>2</sup> Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quīvī quitatú yo —catyí ra naha tsihin ra.

<sup>3</sup> Tan ra Jesús catyí ra tsihin ra naha:

—¿A ñaha ca cahvi ndo tsa javaha ra David tsihin ra cutahan tsihin ra quīvī tsa tsaꝯ soco tsi ra naha?

<sup>4</sup> Quihv̄ī ra tsitsi vehe Nyoo, quihin ra paan ii, tan tsatsi ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can.

<sup>5</sup> ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quīvī quitatú yo? Tan ñavin cuatyí cuví can.

<sup>6</sup> Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu.

<sup>7</sup> Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñí ca yu javaha ndo cuví tsa cundaahvi iñi ndo nyehe ndo tsi nȳivī tahan ndo, tan ñavin ca tsa cahñi ndo quīti tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nȳivī tsa nduve cuatyí.

<sup>8</sup> Yuhu, Rayī tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quīvī quitatú yo —catyí ra Jesús.

*Nu janduvaha ra Jesús tsi iin ra na ityi ndaha*

*(Mr. 3.1-6; Lc. 6.6-11)*

<sup>9</sup> Tacan tan quitá ra Jesús ican, tan cuahán ra vehe ñuhu.

<sup>10</sup> Tan ican nyīi iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicá tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nȳivī cuuhví quīvī quitatú yo? —catyí ra naha tsihin ra Jesús.

<sup>11</sup> Tan nacahan ra Jesús tan catyí ra:

—¿Ndáa nyooho, tatun canacava iin mbee jana ndo tsitsi iin yavi quīvī quitatú yo, a ña cua cuhun ndo tan tava ndo tsi ti?

<sup>12</sup> Tan ¿a ña nyaá yahvi ca iin nȳivī tan ñavin ca mbee? Yacan cuenda taahán tsi javaha yo tsa vaha quīvī quitatú yo —catyí ra.

<sup>13</sup> Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvaha tsi tumaa inga tsiyo.

<sup>14</sup> Tacan tan quitá ra fariseo naha ra cua natuhun tahan ra naha nácaa cua cahñi ra naha tsi ra Jesús.

*Tsa cahan ra Isaías, ra cuv̄i ndusu yuhu Nyoo, tsa cuenda ra Jesús tahan tsanaha*

<sup>15</sup> Tsa tsito ra Jesús tyin nducú ra naha tsi ra, quitá ra ican. Tan cuaha nȳivī tsinyicun tsi ra. Tan maa ra janduvaha ra tsi tandihi ñi cuuhví.

<sup>16</sup> Tan catyí ra tsihin ñi tyin na ña catyí tuhun ñi yoo ra cuví ra.

<sup>17</sup> Tacan cuv̄i tyin tacan cahan ra Isaías, ra cuv̄i ndusu yuhu Nyoo tahan tsanaha. Tan tyehen tyaa ra tuhun Nyoo:

<sup>18</sup> Ra ihya cuví musu yu, ra tsa nacatsi vaha yu.

Cuñí xaan yu tsi ra, tan sī xaan cuñí yu tsihin ra.

Cua cuhva yu Tatyí li yu tsi ra.

Tan cua jacoto ra tsi nȳivī tsa ñavin nȳivī Israel cuví, nácaa cua janduvaha yu tsi ñi nuu yu.

<sup>19</sup> Tan ña cua cahan yuhu ra tan ndi ña cua cana tsa ra, tan ña cua cahan ñihi ra ityi cahnu.



20 Tan ndi intuhun ndoo yacua, tan ña  
cua cahnu ndihí ra.

Tan ndi ña cua ndahva ndihí ra tiñuhu  
lihli nu caná luxu yuhma.

Nda cuanda coto tandihí nyívi tyin  
maa ra cuví ra ndacá ñaha tsi  
ñi.

21 Tan tandihí nyívi, tan cua cuita iñi  
ñi tsi ra.

*Nu xaan iñi tsi ra Jesús catyí nahnu  
tyin tsihin tunyee iñi nu ña vaha javahá  
ra tsa iyo*

*(Mr. 3.20-30; Lc. 11.14-23; 12.10)*

22 Tacan tan tsindacá nyívi tsi iin  
ra yihí tatyí ña vaha nu nyí ra Jesús,  
cuaa ra tan ñihí ra. Tan ra Jesús jan-  
dudahá ra tsi ra. Tacan tan nacahan  
ra, tan nanyehe ra.

23 Iyo xaan cuñí tandihí nyívi, tan  
catyí ñi:

—¿A ñavin ra ihya cuví tata ra rey  
David? —catyí ñi.

24 Tan cuhva tsa tsiñi ra fariseo  
naha ra tsa caahán ñi, catyí ra naha:

—Tsihin tunyee iñi nu Beelzebú,  
nu cuví ityi nuu tsihin nu ña vaha  
nahnu, tavá ra ihya tatyí ña vaha  
—catyí ra naha.

25 Maa tyin ra Jesús tsitó ra tsa tsicá  
iñi ra naha, yacan cuenda catyí ra  
tsihin ra naha:

—Tatun ra ndacá ñaha naha ra tan  
cua natahvi ra naha, tan cua cañi  
tahan ra naha, tacan tan cundihí  
tyiñu tsa ndacá ñaha ra naha. Tan  
tatun iin ñuu o tandihí nyívi iin vehe  
tan cusin ñi, tacan tan cua tiví nu  
yucú ñi.

26 Tan tacan tucu tatun nu ña vaha  
tan tava nu juvin ñi tahan maa nu,  
cuñí tsi catyí tyin ña iin ñi cuví nahnu,  
tan cundihí tunyee iñi tsa iyó tsi  
nahnu.

27 Tan nyooho catyí ndo tyin tsihin  
tunyee iñi nu Beelzebú tavá yu tsi nu  
tatyí ña vaha nahnu. Tun tsatyin tavá  
yu tsi nahnu tumaa cuhva catyí ndo,  
yóo tsahá tunyee iñi tsi ra nyicun tsi  
ndo tan tavá ra naha tsi nahnu. Maa  
ra naha cua cahan tsa nditsa tsihin  
ndo, tyin nyooho soho xaan tsicá iñi  
ndo.

28 Yacan cuenda catyí yu tsihin ndo,  
tyin yuhu tavá yu tatyí ña vaha tsihin  
tunyee iñi Tatyí Ii Nyoo. Tan cuñí tsi  
catyí yacan tyin nditsa tyin tsa tsaá  
cuhva ndacá ñaha Nyoo nu yucú ndo.

29 'Tan ¿yóo cuví quihvi tsitsi vehe  
iin ra xaan, tan quihin nyaa ra ndaha  
tyiñu ra? Yoñi. Maa tyin tatun cuhñi  
jihna ra tsi ra can, tacan tan cuví  
quihin nyaa ra tandihí tsa iyó tsi ra.

30 'Nyívi tsa ña nyaá tumañi iñi tsi-  
hin yu, ñi xaan iñi tsi yu cuví ñi. Ñi  
tsa ña jatyinyeé tsi yu tsa caahán yu  
tuhun Nyoo tsihin nyívi, cuñí tsi catyí  
tyin ña tsahá ñi tsa coto nyívi tuhun  
caahán yu.

31 Yacan cuenda catyí yu tsihin ndo  
tyin Nyoo jahá ra tucahnu iñi cu-  
atyí nyívi, tan tsihin náa tsa ña vaha  
caahán ñi, maa tyin tatun cua cahan  
ñi ndavaha ñi siqui Tatyí Ii Nyoo, ya-  
can nditsa, ña cua jaha Nyoo tucahnu  
iñi tsi ñi.

32 Tan yóo nyívi tsa caahán tsa  
ndavaha ñi siqui yuhu Rayi tsa quee  
nda gloria, Nyoo cua jaha ra tucahnu  
iñi tsi ñi tsa cuenda can. Maa tyin  
nyívi tsa caahán tsa ndavaha ñi siqui  
Tatyí Ii Nyoo, ña cua coo tucahnu iñi  
tsi ñi tsa cuenda cuatyí can, ndi ñuu  
ñayívi ihya, tan ndi inga ñuu ñayívi tsa  
cua coo.

*Tsihin tsa javahá nyívi tan nacoto  
yo tsi ñi tatun vaha ñi a ña vaha ñi*  
*(Lc. 6.43-45)*

33 'Iin yutun vaha tsahá tun tsiti  
vaha. Tan iin yutun ña vaha tsahá tun  
tsiti ña vaha. Nacotó yo tatun yutun  
vaha cuví tun tsa cuenda tsiti tun.

34 ¡Nyooho, nyívi caquiñi tumaa tata  
coo xaan cuví ndo! ¿Nacaa cuví quitá  
tsa vaha yuhu ndo, tan nyívi caquiñi  
cuví ndo? Tyin tsa quitá tsitsi añima  
yo, yacan caahán yo.

35 Nyívi vaha, vaha caahán ñi tyin  
yihí tsa vaha añima ñi. Tan nyívi  
caquiñi, tsa caquiñi caahán ñi, tyin  
tsa caquiñi yihí tsitsi añima ñi.

36 Tan yuhu catyí yu tsihin ndo tyin  
quíví cua tatsi tuñi Nyoo tsi tandihí

nyiví, cua cuhva cuenda ñi tandihí tuhun tsa ña vaha cahan ñi.

<sup>37</sup> Tyin tsa cuenda tsa caahán ndo, tan cua catyi Nyoo tun vaha ndo o ña vaha ndo.

*Nyiví ña vaha, tsa iyo ñi cuñí ñi nyehe ñi*

*(Mr. 8.12; Lc. 11.29-32)*

<sup>38</sup> Tacan tan juhva ra fariseo tan ra maestro cuenda ley vehe ñuhu catyi ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

<sup>39</sup> Tan nacahan ra Jesús tan catyi ra:

—Nyiví ña vaha tan nyiví tsa nyicún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, in-tuhun ñi tsa cua nyehe ñi, tumaa tsa javaha Nyoo tsihin ra Jonás ra cuví ndusu yuhu ra tahañ tsanaha.

<sup>40</sup> Tyin tumaa tsinyij ra Jonás tsitsi tyaca cahnu uñi quiví tan uñi tsacuaa, tacan cua cunyij yuhu Rayí tsa quee nda gloria tsitsi ñuhu uñi quiví tan uñi tsacuaa.

<sup>41</sup> Tan quiví cua tatsi tuñi Nyoo tsi tandihí nyiví, cua nduvita nyiví tsi-coo ñuu Nínive tahañ tsanaha tan cua catyi ñi na tatsi tuñi Nyoo tsi nyooho nyiví tsa iyó vityin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasama ñi cuhva iyó ñi quiví cahan ra Jonás tuhun Nyoo tsihin ñi. Tan ihya nyí ra cahnu ca cuví tan ñavin ca ra Jonás. [Tan ña cuñí ndo tyaa soho ndo tsa caahán yu.]

<sup>42</sup> Tan tacan tucu ñaha tsa tsindaca ñaha ityi Sur, cua nduvita ña quiví cua cutuñi nyiví tan cua catyi ña tyin cua cunaa nyooho nyiví iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahan ra Salomón. Tan vityin cahnu ca ra caahán tsihin ndo tan ñavin ca ra Salomón.

*Nu caahán ra Jesús tsihin yo nácaa quihvi nu tatyí ña vaha aña yoy inga tsaha tatun naa iñi yoy tsi Nyoo*

*(Lc. 11.24-26)*

<sup>43</sup> Tatun iin nu tatyí ña vaha quita nu tsitsi aña iin nyiví, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu:

<sup>44</sup> “Cunuhu yu nda vehe yu nu quee yu.” Tacan tan cuahán nyico nu aña nu quee nu. Tan nyehe nu tyin ndi xaan, tan yoñi iyó, tan si xaan caá.

<sup>45</sup> Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihí tatyí ña vaha can aña ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuví tsi nyiví quiñi iyó —catyí ra Jesús.

*Nu tsaha cuenda ra Jesús tyin tumaa cuví yañi ra, tan tumaa cuví sihi ra, cuví tsi nyiví tsa javahá cuhva cuñí Nyoo*

*(Mr. 3.31-35; Lc. 8.19-21)*

<sup>46</sup> Ndi caahán ca ra Jesús tsihin nyiví, tan tsa sihi ra tan yañi ra, tan nyecú ñi ityi tsata vehe, tan cuñí ñi cahan ñi tsihin ra.

<sup>47</sup> Tacan tan jacoto iin ra tsi ra Jesús, tan catyi ra:

—Sihí un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

<sup>48</sup> Tan nacahan ra Jesús tan catyi ra tsihin ra can:

—¿Yóo cuví sihi yu tan yóo cuví yañi yu? —catyí ra.

<sup>49</sup> Tacan tan janaha ndaha ra nu nyecú ra tsicá tsihin ra, tan catyi ra:

—Ra ihya naha ra cuví sihi yu tan yañi yu.

<sup>50</sup> Tyin tandihí nyiví tsa javahá cuhva cuñi Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

## 13

*Nu caahán ra Jesús tyin tumaa iin ra tatsí, tacan cuví ra caahán tuhun Nyoo*

*(Mr. 4.1-9; Lc. 8.4-8)*



<sup>1</sup> Quiví can quitá ra Jesús vehe nu nyíí ra tan cuahán ra, tsicunyaá ra yuhu miñi.

<sup>2</sup> Tan cuaha xaan nyívi ndu iin nu nyaá ra, yacan cuenda quihví ra tsitsi iin yutun ndoo tan tsinyaá ra. Tan tandihí nyívi ndoo ñi yuhu ndutya.

<sup>3</sup> Tacan tan quitsaha jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitá iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra.

<sup>4</sup> Tan cuhva tsa quití ra tsiti can, cucoyo juhva tsi yuhu ityi. Tan quitsi saa tan tsatsi ti tsiti can.

<sup>5</sup> Tan juhva ca tsiti can cucoyo tyañu yuu nu ña cuaha nyahyu yihí. Tan ican caná tsiti can tsa numi ñi tyin ña cuaha nyahyu yihí tyañu yuu can.

<sup>6</sup> Maa tyin cuhva tsa caná ñicanyii, numi ñi na ityi tsi, tyin ña cunu yihí yoho tsaha tsi.

<sup>7</sup> Juhva ca tsiti can cucoyo tyañu iñu. Tan quívi caná trigu can tsahnú tsi iin caa ñi tsihin iñu can, tan iñu can numi xaan ca tsahnú tsi tan tsahní tsi trigu can.

<sup>8</sup> Maa tyin juhva ca tsiti can cucoyo nu ñuhu vaha. Tan quívi tsahnú tsi, vaha xaan tsaha tsi tsiti. Tyin tsa iin tsiti can, cientu tsiti quitá tsihin tsi. Tan inga tsiti can, uñi xico, tan inga tsi oco utsi tsiti tsaha tsi.

<sup>9</sup> ¡Tatun nyaá soho ndo, tyaa soho ndo tuhun caahán yu! —catyí ra Jesús.

*Nu catyí tuhun ra Jesús nacuenda jacuahá ra tsi nyívi tan ña catyí tuhun catsi ra tsihin ñi*

*(Mr. 4.10-12; Lc. 8.9-10)*

<sup>10</sup> Tacan tan natuhvá ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi nyívi, tan ña catyí tuhun catsi un tsihin ñi? —catyí ra naha.

<sup>11</sup> Tan nacahan ra Jesús tan catyí ra:

—Tsi nyoocho jacotó Nyoo tuhun xeehe, cuhva ndacá ñaha ra, maa tyin

nyívi ihya ña cuví coto ñi tsa tsaha Nyoo tsi nyoocho.

<sup>12</sup> Tyin tandihí nyívi tsa cutuñí iñi tsa caahán yu tan javahá ñi, cuaha ca cua cutuñí iñi ñi. Tan nyívi tsa ña cutuñí iñi, tan ña cuñí ñi javaha ñi, cua quihin nyaa ndihí yu tsa luxu ñi tsa tsitó ñi.

<sup>13</sup> Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñí ñi maa tyin ña cutuñí iñi ñi, tumaa tsa ña tsiñí ñi cuví can.

<sup>14</sup> Tyin tacan tan cundaa tsa cahan ra Isaías ra cuví ndusu yuhu Nyoo tahanan tsanaha, tan catyí ra:

Tsa nditsa tyin nyoocho tsiñí ndo tuhun yu, maa tyin ña cutuñí iñi ndo.

Cua nyehe ndo tsa javahá yu, tan ña cua cutuñí iñi ndo.

<sup>15</sup> Tyin tsa ndundavá xaan añima nyívi ihya,

tan ña catsi vaha tsiñí ñi.

tan ndasí tinuu ñi,

na ña cua nyehe ñi tsihin tinuu ñi,

tan ña cua cuñí ñi tsihin soho ñi.

Tan ndi ña cua cutuñí iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

<sup>16</sup> Maa tyin sñi xaan cuví tsi nyoocho, tyin nyehé ndo tsihin tinuu ndo, tan tsiñí ndo tsihin soho ndo.

<sup>17</sup> Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyívi vaha, cuñí ñi nyehe ñi tsa nyehé nyoocho tsa javahá yu, maa tyin ña nyehe ñi. Tan cuñí ñi tyaa soho ñi tandihí tsa tsiñí nyoocho vityin, maa tyin ña tsiñí ñi.

*Nu catyí tuhun ra Jesús tsa cuñí tsi catsi cuhva tsa cahan ra tsihin nyívi tsa cuenda ra tatsi can*

*(Mr. 4.13-20; Lc. 8.11-15)*

<sup>18</sup> Tyaa soho ndo tsa cuñí tsi catsi cuhva tsa cahan yu tsa cuenda ra tsa tatsi tsiti trigu can:

<sup>19</sup> Nyívi tsa tsiñí tuhun nácaa cuñí Nyoo cundaca ñaha ra añima ñi, tan ña cutuñí iñi ñi, cuví ñi tumaa nu cucoyo tsiti trigu yuhu ityi. Tan quitsi nu ña

vaha tan quih̄in nyaa nu tuhun Nyoo tsa iyó añima ñi.

<sup>20</sup> Tan tumaa nu cucoyō tsiti can tyañu yuu, juvin ñi nyivī tsa tsiñī tuhun Nyoo cuví can. Tan sīi xaan naquih̄in vaha ñi itsi juhva ñi quivī.

<sup>21</sup> Tyin nduve ñuhu cunu ican, yacan cuenda canā tsiti can, maa tyin ña cuví cuhun yoho tsi. Tan tacan cuví nyivī can. Juhva ñi quivī tsinú iñi ñi. Maa tyin quivī tsa quitsahá nyehe ñi tundoho, tan caahán ndasi nyivī tsata ñi tsa cuenda tuhun Nyoo, tacan tan jandih̄i ñi tsa tsinú iñi ñi.

<sup>22</sup> Tan tumaa nu cucoyō tsiti can tsitsi iñu, juvin ñi nyivī tsa tsiñī tuhun Nyoo cuví can. Tsiñī ñi, maa tyin ña cuñī ñi javaha ñi tumaa tsiñī ñi. Tyin tyaá xaan ca iñi ñi tundoho ñayivī tan ñavin ca tuhun Nyoo. Tan nyiyo ca iñi ñi tsa cuca. Tan tandih̄i tuhun can jatyañú tsi tsi ñi, tan cuví ñi tumaa yutun tsa ña tsahá tsiti.

<sup>23</sup> Tan ñuhu vaha nu cucoyō tsiti can, yacan cuví inga nyivī tsa tsiñī tuhun Nyoo, tan cutuñī iñi ñi, tan javahá ñi tandih̄i tuhun caahán ra. Yih̄i ñi cuví ñi tumaa tsiti tsa canā tan tsahá tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

*Nu caahán ra Jesús nácaa cuahán tuhun trigu tan cuhu ña vaha*

<sup>24</sup> Tan cahan̄ tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyivī cuví tsi tumaa iin ra tsa tatsī tsiti trigu nu ñuhu ra.

<sup>25</sup> Tan cuhva tsa quixí tandih̄i ra jahá tyiñu naha ra, quih̄vī iin ra xaan iñi tsi ra jatsii can, tan quit̄i ra tsiti cuhu ña vaha, tan cuahán ra.

<sup>26</sup> Tan quivī canā tsiti trigu can, tan canā yoco tsi, canā ndih̄i tucu cuhu ña vaha can.

<sup>27</sup> Tacan tan ra cuví musu can naha ra, tsahan̄ ra naha tsicatyī tuhun ra naha tsihin tsitoho ra naha: “Tata, maa ñi tsiti trigu tatsī ndi, ¿tan nacuenda tyin canā cuhu ña vaha can?” catyí ra naha.

<sup>28</sup> Tan nacahan̄ ra can tan catyī ra: “Iyó iin ra xaan iñi tsi yu javahá tsehe, tun cuvī.” Tacan tan musu can, catyí ra naha tsihin tsitoho ra: “¿A cuñī un tyin cuhun ndi tan tuhun ndi cuhu ña vaha can?”

<sup>29</sup> Tan tsitoho ra naha catyí ra: “Ña tuhun ndo, tyin coto tuhun ndih̄i ndo trigu can.

<sup>30</sup> Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñī ra naha cuenda jucun, tan cahmi ra naha. Tan yaha can tan natyihi vaha ra naha tsa vaha can tsitsi yaca yu.”

*Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo*

*(Mr. 4.30-32; Lc. 13.18-19)*

<sup>31</sup> Tacan tan cahan̄ ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivī cuví tsi tumaa iin tsiti mostaza tsa tatsī iin ra nu ñuhu ra.

<sup>32</sup> Tyin tsiti can lihli ñi tsi tan ñavin ca tandih̄i ca tsiti. Maa tyin quivī tsahnū tsi cuví tsi iin yutun. Tan quitsī saa, tan javahá ti taca ti soco tun —catyí ra Jesús.

*Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo*

*(Lc. 13.20-21)*

<sup>33</sup> Tan cahan̄ ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivī cuví tsi tumaa yutsan iya tsa nasacā nuu iin ñaha tsihin uñi jahma yutyi paan. Tyin tumaa ndaá tandih̄i yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

*Nu catyī tuhun ra Jesús nacuenda jacuahá ra tsi nyivī tsihin cuhva*

*(Mr. 4.33-34)*

<sup>34</sup> Tandih̄i tuhun can cahan̄ ra Jesús tsihin nyivī tsihin cuhva. Tan tandih̄i tsa cahan̄ ra tsihin ñi ña cahan̄ catsi

maa ra, maa ñi maa tsihin cuhva cahan ra.

<sup>35</sup>Tacan cuvi tyin tacan tan cundaa tsa cahan Jutu Mañi yo tsihin yuhu ra cuvi ndusu yuhu ra tahañ tsanaha tan tyaa ra tyehen:

Tsihin cuhva cua cahan yu tsihin nyivi.

Cua cahan yu tsihin ñi tuhun tsa yihí xeehe nda cuanda tsa javaha Nyoo ñuhu ñayivi.

*Nu caahan ra Jesús náa cuñí tsi catyí cuhu ña vaha tsa caná tsihin tsiti trigu can*

<sup>36</sup>Tacan tan jacunuhu ra Jesús tsi nyivi, tan quihvi ra tsitsi vehe nu nyii ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Catyí tuhun tsihin ndi náa cuñí tsi catyí tsa cahan un tsihin nyivi tsa cuenda cuhu ña vaha tan trigu can.

<sup>37</sup>Tacan tan quitsaha catyí ra Jesús tsihin ra naha:

—Ra tsa tatsi tsiti trigu can cuvi yuhu Rayi tsa quee nda gloria.

<sup>38</sup>Tan ñuhu can cuvi nyivi iyó nu ñuhu ñayivi. Tan tsiti trigu can cuvi nyivi tsa ndacá ñaha Nyoo. Tan cuhu ña vaha can cuvi nyivi tsa nyicún tsi nu ña vaha.

<sup>39</sup>Tan nu tsa tatsi cuhu ña vaha can, nu ican cuvi nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñí tsi catyí quivi cua cundihi ñuhu ñayivi. Tan ra tsa cua naquihin tsiti can, cuvi ra ángel naha ra.

<sup>40</sup>Tumaa jataca ra naha cuhu ña vaha can tyin cayu tsi, tacan cua cuvi quivi cua cundihi ñayivi.

<sup>41</sup>Yuhu Rayi tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí.

<sup>42</sup>Tan cua tyihi ra naha tsi ñi tsitsi ono nu cayú ñuhu. Tan ican cua vacu tsaa ñi tan cahyu ña cua cuvi nuhu ñi.

<sup>43</sup>Nyooho tan nyivi javahá cuhva cuñí Nyoo cua quituvi ndo nuu Jutu yo. Tan cua cuvi ndo tumaa tsa nditsin ñuhu ñicanyii, nu ndacá ñaha

Jutu yo. Tatun iyó soho ndo, tyaa soho ndo tsa caahan yu.

*Xuhun cuaan tsa yihí xeehe*

<sup>44</sup>Tsa ndacá ñaha Nyoo tsi nyivi cuvi tsi tumaa xuhun cuaan tsa yihí xeehe tsitsi ñuhu. Tan iin ra nañihi ra xuhun cuaan can, tan tyihi xeehe nyico ra inga tsaha, tan sii xaan cuñí ra cuanuhu ra tan xico ra tandihi tsa iyó tsi ra. Tacan tan jata ra ñuhu nu yihí xeehe xuhun cuaan can.

*Iin cuhva tsa cahan ra Jesús cuenda iin yuu xiñu tsa yahvi xaan nyaá*

<sup>45</sup>Tan tsa ndacá ñaha Nyoo tsi nyivi, cuvi tucu tsi tumaa iin ra najatá yuu xiñu tan naxico nyico ra,

<sup>46</sup>tan tsa ñihi ra iin tsa yahvi xaan nyaá, xico ra tandihi maa tsa cumi ra, tan jata ra yuu xiñu vaha can.

*Nu caahan ra Jesús iin cuhva cuenda traya*

<sup>47</sup>Tan juvin ñi cuvi tucu tsa ndacá ñaha Nyoo tsi nyivi tumaa iin traya tsa cañí ra naha nu ndutya ñuhu, tan ñihi ra naha tandihi nuu tyaca.

<sup>48</sup>Tan tsa tsitu traya can tsihin tyaca, tava ra naha traya can nu ityi. Tan ican nacatsi ra naha tsi ti, naquihin vaha ra naha quiti vaha tsitsi iin tyica, tan javitá ra naha quiti ña vaha can.

<sup>49</sup>Tan tacan cua cuvi quivi naa ñayivi, cua quitsi ángel, quitsi tava siin ra naha tsi nyivi vaha tan nyivi ña vaha.

<sup>50</sup>Tan cua tyihi ra naha tsi nyivi ña vaha can anyaya nu cayú ñuhu, nu cua vacu tsaa ñi tan cahyu ña cua cuvi nuhu ñi.

*Nu caahan ra Jesús tyin vaha tuhun tsahnu Nyoo tan tuhun tsaa Nyoo*

<sup>51</sup>Tacan tan ra Jesús tsica tuhun ra tsi ra tsicá tsihin ra, tan catyí ra tsihin ra naha:

—¿A cutuñi iñi ndo tandihi tsa cahan yu?

Tan nacahan ra naha tan catyí ra naha:

—Cutuñi iñi ndi, Jutu Mañi yu.

<sup>52</sup> Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihí ra nácaa ndacá ñaha Nyoo tsihin tandihí tuhun tsa tsa caahán yu, cua cuvi ra tumaa iin ra jatsii vehe tan cua jacuaha ra nduvi taahan tuhun vaha can tsi nyívi —catyí ra Jesús.

*Nu tsinuhú ra Jesús ñuu Nazaret nu tsahnu ra*

(Mr. 6.1-6; Lc. 4.16-30)

<sup>53</sup> Tsa ndihí cahan ra Jesús cuhva ihya tan quitá ra cuahán ra.

<sup>54</sup> Tan tsaá nyico ra ñuu ra. Tan quitsaha jacuahá ra tsitsi vehe ñuhu ñuu can. Tan iyo cuñí nyívi tan catyí ñi:

—¿Nu maa tahan cutuhva ra ihya tsa tsitó xaan ra? ¿Tan nácaa cuví javaha ra tsa iyo?

<sup>55</sup> Tyin sehe ra tahví yutun can cuví tsi ra. Tan ña María cuví síhi ra. Tan yañi ra cuví tsi ra Jacobo, ra José, ra Simón tan ra Judas.

<sup>56</sup> Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhva ra tandihí tsa tsitó ra? —catyí ñi.

<sup>57</sup> Tan yacan cuenda ña cuñí ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyívi tandihí ñi ityi jahá ñi tsa ñayívi tsi ra ndusu yuhu Nyoo, maa tyin nyívi ñuu ra ña tyaá yahvi ñi tsi ra tan ndi nyívi vehe ra —catyí ra Jesús.

<sup>58</sup> Tan ña cuaha tsa iyo javaha ra ñuu ra tsa cuenda tyin ña tsinú iñi ñi tsi ra.

## 14

*Nu catyí tsi nácaa tsihi ra Juan, ra jacoondutyá tsi nyívi*

(Mr. 6.14-29; Lc. 9.7-9)

<sup>1</sup> Quívi can ra Herodes, ra ndacá ñaha nicahnu nu cuví Galilea, ñihi tuhun ra tsa javahá ra Jesús.

<sup>2</sup> Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyívi, ra tsa tsihi tan vityin

nandoto nyico ra. Yacan cuenda iyó tunyee iñi tsi ra tsa javahá ra tsa iyo.

<sup>3-4</sup> Tacan catyí ra tyin juvin ñi maa ra tava tyiñu tyin tñn ra naha tsi ra Juan. Tan cuhñi ra naha tsi ra tsihin cadena, tan tyihi ra naha tsi ra vehe caa. Tacan javaha ra Herodes tyin xaan cuñí ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasihi ra Felipe, yañi ra.

<sup>5</sup> Yacan cuenda ra Herodes cuñi ra cahñi ra tsi ra Juan, maa tyin yuuhví ra tsi nyívi, tyin tandihí ñi tsinú iñi ñi tyin ra Juan, ndusu yuhu Nyoo cuví ra.

<sup>6</sup> Tan iin quívi iyó vico ra Herodes, tan sehe ña Herodías quitsaha tsañi ña yaa nu yucú ñi vico can. Tan tahañ xaan iñi ra Herodes.

<sup>7</sup> Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

<sup>8</sup> Tacan tan natyuhú síhi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyívi, tsi yu nu iin coho —catyí ña.

<sup>9</sup> Tsa tsiñi ra rey Herodes tsa cahan ña, nducuiihya cuñi ra. Maa tyin tsa cuenda tsa cahan ra tyin tandihí tsa cua ndacan ña tan cua cuhva ra, yacan cuenda ña cuvi jandaví ñaha ra tyin tandihí nyívi yucú vico can tan tsiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho.

<sup>10</sup> Tan tava tyiñu ra na cucahnya ra naha jucun ra Juan nu nyíi ra vehe caa.

<sup>11</sup> Tacan tan tsindaca ra naha jiñi ra Juan tsi ña, nyíi tsi nu iin coho. Tan tsañi ra naha tsi ñaha tyuvaa can. Tan maa ña nacuhva cuenda ña tsi síhi ña.

<sup>12</sup> Tacan tan tsaá ra nyicun tsi ra Juan naha ra tan naquihñi ra naha cuñu ñuhu ra, tan tyihi ra naha tsitsi ñuhu. Yaha can tan tsañi ra naha tsijacoto ra naha tsi ra Jesús.



*Nujacatsi ra Jesús tsi uhun mil rayii*  
(Mr. 6.30-44; Lc. 9.10-17; Jn. 6.1-14)

<sup>13</sup> Tsa tsito ra Jesús tsa taħan ra Juan, quihın ra iin yutun ndoo, tan cuahán intuhun ñi maa ra nu taxin caa. Tan tsa tsito nyivi, quita ñi ñuu ñi, tan cuahán tsihin tsaha ñi nu nyii ra.

<sup>14</sup> Tsa quita ra Jesús tsitsi yutun ndoo can, tan nyehe ra tyin cuaha xaan nyivi nyicún tsi ra. Tan cundaahvi iñi ra nyehe ra tsi ñi. Tan janduvaha ra tsi nyivi cuuhvi tsa tsaa tsihin ñi.

<sup>15</sup> Tan tsa cuñi cuaa, tacan tan natuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca caħan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

<sup>16</sup> Tan ra Jesús catyí ra:

—Nduve náa nducu ñi cuhun ñi. Cuhva nyooħo tsa catsi ñi.

<sup>17</sup> Tan nacahañ ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

<sup>18</sup> Tan catyí ra Jesús:

—Ndaça ndo can tsi yu.

<sup>19</sup> Tacan tan catyí ra tsihin nyivi tyin na cunyecú ñi nu cuhu can. Yaha tsa tsinyecu ñi tan quihın ra uhun taahan paan can, tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo tan tsahnú cuatyí ra paan can. Tan tsaha ra tsi ra tsicá tsihin ra, na tsatsa ra naha tsi nyivi can.

<sup>20</sup> Tan tandihı nyivi tsatsi ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyica tsihin tsa ñahñu ican.

<sup>21</sup> Tan tsa tandihı ñi tsa tsatsi can, quita maa tumaa uhun mil tsa maa ñi maa rayii. Tan siin maa ñiñaha tan tsa nyihi.

*Nu tsicá ra Jesús nu ndutya*  
(Mr. 6.45-52; Jn. 6.16-21)

<sup>22</sup> Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi.

<sup>23</sup> Tsa yaha tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaa.

<sup>24</sup> Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñihi xaan yihı tatyí nu cuahán ra naha.

<sup>25</sup> Tan tsa cua tuvi cuahán ndihı ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya.

<sup>26</sup> Tan cuhva tsa nyehe ra naha tsi ra, tsicá ra nu ndutya can, nayuhvi xaan ra naha. Tan caná tsaa ra naha, tan catyí ra naha:

—jijhna ndo xin. Tatyí vatsı can!

<sup>27</sup> Maa tyin nacahañ ra Jesús tsihin ra naha, tan catyí ra:

—jña nayuhvi ndo tyin maa yu cuvı! —catyí ra.

<sup>28</sup> Tacan tan nacahañ ra Pedro tan catyí ra:

—Jutu Mañi yu, tatun maa un vatsı juvin, cuhva tsa quitsi ndihı yu nu vatsı un.

<sup>29</sup> Tan ra Jesús catyí ra tsihin ra:

—Ñaha jiin.

Tacan tan quita ra Pedro tsitsi yutun ndoo can, tan quitsaha tsicá ra nu ndutya tan cuahán ra nda nu vatsı ra Jesús.

<sup>30</sup> Maa tyin cuhva tsa tuvi iñi ra tyin ñihi xaan quitsaha yihı tatyí, nayuhvi xaan ra, tacan tan quitsaha cuñi nyee ra, tan quitsaha caná tsaa ra tan catyí ra:

—jJacacu tsi yu, Jutu Mañi yu!

<sup>31</sup> Tan iin yaha ñi tıin ra Jesús ndaha ra, tan catyí ra tsihin ra:

—¿Nacuenda tsa nayuhví un, yooho tsa luxu xaan tsinú ñi tsi yu? —catyí ra Jesús tsihin ra.

<sup>32</sup> Tan cuhva tsa quihví ra naha tsitsi yutun ndoo can, cutaxin tatyí can.

<sup>33</sup> Tacan tan ra yucú tsitsi yutun ndoo can tsicuiñi tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

*Nu janduvaha ra Jesús tsi nyivi cuhvi tsa iyó Genesaret*

*(Mr. 6.53-56)*

<sup>34</sup> Tsa yaha sava ra naha miñi can, tsa ra naha ñuhu Genesaret.

<sup>35</sup> Tan cuhva tsa nacoto nyivi iyó ican tsi ra Jesús tyin juvin ra cuví, jacoto ñi tsi tandihi nyivi iyó tan cahnu can. Tan tsindaca ñi tandihi nyivi cuuhví nu nyii ra.

<sup>36</sup> Tan caahán ndaahvi ñi tsihin ra, na cuhva ra tsa tin ñi vasu luxu jahma ra. Tan tandihi ñi tsa tin jahma ra, nduvaha ñi.

## 15

*Tsa jativí tsi nyivi nuu Nyoo*

*(Mr. 7.1-23)*

<sup>1</sup> Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyii ra Jesús tan tsicá tuhun ra naha tsi ra, tan catyí ra naha:

<sup>2</sup> —¿Nacuenda ña javahá ra tsicá tsihin un naha ra cuhva nacoq tsii tsaahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyí ra naha.

<sup>3</sup> Tan tsicá tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñi ndo tyaa yahvi ndo tsa caahán Nyoo?

<sup>4</sup> Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandihi nyivi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo.

<sup>5</sup> Maa tyin nyooho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsaha yu tandihi tsa iyó tsi yu tsi Nyoo.”

<sup>6</sup> Tatun tsa catyí ndo yacan, ña cuñi tsi tsa jatyinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo.

<sup>7</sup> ¡Nyooho cuñi ndo tyin vaha xaan ndo, maa tyin ña nditsa ndo! Nditsa tsa cahan ra Isaías, ra cuví ndusu yuhu Nyoo, siqui ndo jaha Nyoo. Tan catyí ra tyehen:

<sup>8</sup> Nyivi ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi.

<sup>9</sup> Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jaha Nyoo, catyí ra Jesús tsihin ra ican naha ra.

<sup>10</sup> Tacan tan cana ra Jesús tsi nyivi tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi ñi ndo.

<sup>11</sup> Tyin nyivi tsa tiví nuu Nyoo, ñavin tsa quihví yuhu ñi jativí tsi ñi. Tyin tiví ñi jahá tsa quitá yuhu ñi.

<sup>12</sup> Tacan tan natuhva ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñi ra naha tsa tsiñi ra naha tsa cahan un.

<sup>13</sup> Tan maa ra Jesús nacahan ra tan catyí ra:

—Tandihi yutun tsa ña tatsi Jutu yu, ra nyaá gloria, cua tuhun ra nda cuanda yoho tun.

<sup>14</sup> Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

<sup>15</sup> Tacan tan quitsaha catyí ra Pedro tsihin ra Jesús:



—Catyí tuhun tsihin ndi náa cuñí tsi catyí tsa cahan un nañi.

<sup>16</sup> Tacan tan ra Jesús catyí ra tsihin ra naha:

—Ndi nyooho tan ña cutuñí ndihi iñi ndo.

<sup>17</sup> ¿A ña cutuñí iñi ndo tyin tsa tsatsi yo, tsitsi yo cuahán tsi? Yahá can tan cua quita nyico tsi.

<sup>18</sup> Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi.

<sup>19</sup> Tyin tsa caquiñi tsicá iñi ñi tsitsi añima ñi quitá can, tan cuñí ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñí nyaa ñi tsi inga ca nyivi. Yihí ra cuñí ra coo inga ñaha ra, o ñiñaha iyó yihí tsicá nuu ñi tsihin inga rayihí. Yihí ra tsicoó ra tsihin ñaha tan ña tindaha ra tsihin ña. Tan yihí rayihí quixí ra tsihin juvin ñi maa rayihí. Tan ñiñaha yihí ñi quixí ñi tsihin juvin ñi maa ñaha. Tan tandihi ca maa tsa caquiñi tsa javahá ñi tsihin cuñu ñuhu ñi.

<sup>20</sup> Yacan cuví tsa jativí tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jativí can tsi ñi —catyí ra Jesús.

*Nu tsinu iñi iin ñaha inga ñuu tsi ra Jesús*

*(Mr. 7.24-30)*

<sup>21</sup> Quitá ra Jesús ñuu can tan cuahán ra ityi ñuu Tiro tan Sidón.

<sup>22</sup> Tan ityi can iyó iin ñaha Canaán. Tan tsa nyehe ña tsi ra Jesús natuhva ña nu nyaá ra tan caná tsaa ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

<sup>23</sup> Maa tyin tumaa tsa ña tsiñi ñi ra Jesús jahá ra tsi ra tan ña nacahan ra tsa iin yaha ñi. Tacan tan natuhva ra tsicá tsihin ra tan catyí ra naha tsihin ra:

—Cahan tsihin ña na cunuho ña tyin utsan xaan yo tsa caná tsaa ña tsata yo.

<sup>24</sup> Tacan tan catyí ra Jesús tsihin ra naha:

—Vatsí yu jahá Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

<sup>25</sup> Tan ñaha can natuhva ña nu nyaá ra tan tsicuiñi tsiti ña nuu ra, tan catyí ña tsihin ra:

—Jutu Mañi yu, ijatyinyee tsi yu!

<sup>26</sup> Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

<sup>27</sup> Maa tyin ña ndasi cuñí ña tsa cahan ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xuu mesa tsitoho ti —catyí ña.

<sup>28</sup> Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuví maa cuhva tsicá iñi un.

Tan juvin ñi cuhva can tan ndu-vahá sehe ña.

*Nu cuaha xaan nyivi cuuhví janduvaha ra Jesús*

<sup>29</sup> Tsa yaha yacan tan ra Jesús cuahán ra ityi yuhu miñi Galilea, tan ndaa ra iin jiñi yucu tan ican tsinyaa ra.

<sup>30</sup> Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñihí ñi, lundu ñi. Tan yihí ñi yihí inga ca nu cuehe tsi ñi. Tan tsaquin nyecu ñi tsi tandihi ñi cuuhví can nu nyaá ra Jesús. Tan janduvaha ra tsi ñi.

<sup>31</sup> Tan iyo xaan cuñí nyivi can nyehé ñi tyin nacahan ñi ñihí tan nduvaha ñi lundu, tan nacacá ñi coxo, tan nanyehé ñi cuaa. Tan quitsaha jacahnu xaan ñi tsi Nyoo ñi, tsa cuví ñi nyivi Israel.

*Nu tsahá ra Jesús tsa catsi cumi mil rayihí*

*(Mr. 8.1-10)*

<sup>32</sup> Tacan tan cana ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyivi ihya, tyin tsa uñi quivi yucú

ñi ihya tsihin yo, tan nduve náa catsi ñi. Tan ña cuñi yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

<sup>33</sup> Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyivi cuaha ihya, tyin ihya nduve nyivi iyó?

<sup>34</sup> Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

<sup>35</sup> Tan catyí ra tsihin nyivi na cun-yeu ñi nu ñuhu.

<sup>36</sup> Tacan tan quihin ra tsa utsa paan can tan tyaca can, tan nacuhva ra tyahvi nyoo tsi Nyoo. Tan quitsaha tsahnú cuatyí ra paan tsihin tyaca, tan tsaha ra tsi ra tsicá tsihin ra tyin na tsatsa ra naha tsi nyivi.

<sup>37</sup> Tandihí ñi tsatsi ñi, tan ndaha vaha iñi ñi. Tan tsa ndihí tsatsi ñi tan naquihin ra naha tsa ñahñu tsa ndoo can tan quitá utsa tyica cuví tsi.

<sup>38</sup> Tan ra tsa tsatsi can naha ra quita maa cumi mil ra naha tan siin maa ñiñaha tan tsa nyihi.

<sup>39</sup> Yahá can tan jacunuhu ra tsi ñi, tan quihvi ra tsitsi yutun ndoo, tan cuahán ra ityi Magdala.

## 16

*Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo*

*(Mr. 8.11-13; Lc. 12.54-56)*

<sup>1</sup> Tacan tan ra fariseo naha ra tan ra saduceo naha ra tsahan ra naha nu nyii ra Jesús, tyin cuñi ra naha nducuuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo.

<sup>2</sup> Maa tyin nacahan ra Jesús tan catyí ra tsihin ra naha:

—Tsa cueñi, tuhvá ndo catyí: “Siñ xaan caa ityaan cua cuvi tyin cuaaha xaan nu vico”.

<sup>3</sup> Tan tsa tuvi catyí tucu ndo tyin ña siñ maa caa cua cuvi, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha?

<sup>4</sup> Nyivi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñi ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

*Tuhun caahán ra fariseo naha ra cuví tsi tumaa yutsan iya*

*(Mr. 8.14-21)*

<sup>5</sup> Cuhva tsa yaha ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha.

<sup>6</sup> Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

<sup>7</sup> Tacan tan quitsaha natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

<sup>8</sup> Tan tsa tuvi iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo?

<sup>9</sup> ¿A ñaha ca cutuñi iñi ndo? ¿A ña nducuhún iñi ndo quivi tsa jacatsi yu tsi uhun mil rayiñ tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can?

<sup>10</sup> ¿A tsa naá ndihí tucu iñi ndo quivi tsa jacatsi yu cumi mil rayiñ, tan najava taahan tyica jacutu ndo tsihin tsa ndoo tsa utsa taahan ñi paan?

<sup>11</sup> ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

12 Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

*Nu catyí ra Pedro tyin ra Jesús cuví ra Cristo, ra jacacú tsi yo*

(Mr. 8.27-30; Lc. 9.18-21)

13 Cuhva tsa tsaá ra Jesús ityi ñuu Cesarea Filipo, tsicá tuhun ra tsi ra tsicá tsihin ra tan catyí ra:

—¿Náa catyí nyivi? ¿Yóo ra cuví yu, Rayi tsa quee nda gloria? —catyí ra.

14 Tan nacahan ra naha tan catyí ra naha:

—Yihí nyivi catyí ñi tyin ra Juan ra jacoondutya tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

15 Tacan tan catyí ra tsihin ra naha:

—Tan nyooho, ¿yóo ra cuví yu, catyí ndo?

16 Tacan tan nacahan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

17 Tan nacahan ra Jesús tan catyí ra:

—Si xaan cuví tsi yooho, Simón, sehe ra Jonás, tyin ñavin nyivi janaha tuhun ihya tsi un, tyin maa Jutu yu, ra nyaá gloria janaha tsi un.

18 Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi.

19 Yuhu cua kuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhni un ihya nu ñuhu ñayivi, tsa nuuhni jaha Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

20 Tacan tan catyí ra Jesús tsihin ra tsicá tsihin ra tyin ña cahan ra naha tsihin nyivi tun juvin ra cuví ra Cristo ra tsa quee nu nyaá Nyoo.

*Nu caahán ra Jesús tyin cua cahni nyivi tsi ra*

(Mr. 8.31—9.1; Lc. 9.22-27)

21 Nda quivi can quitsaha catyí ra Jesús tsihin ra tsicá tsihin ra, tyin cuñi tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahni ra naha tsi ra, maa tyin tsa tsinu uñi quivi cua nandoto ra inga tsaha.

22 Tacan tan quihin ra Pedro tsi ra tan quita sin ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña kuhva Nyoo tsa tahan un tacan, Jutu Mañi yu —catyí ra.

23 Tan nanyico coo ra Jesús, tan quitsaha caahán ra tsihin ra Pedro:

—¡Jatsiyo nyaha tsi un, cuihna! Tyin cuñi un casi un tsi yu. Tyin yooho ña tsicá iñi un kuhva cuñi Nyoo, tyin kuhva cuñi nyivi tsicá iñi un —catyí ra.

24 Tacan tan ra Jesús catyí ra tsihin ra tsicá tsihin ra:

—Tatun ndaa nyooho cuñi cunyi-cun tsi yu, cahnya iñi ndo tsa cuñi maa ndo javaha ndo, tacan tan cuví javaha ndo tsa cuñi Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuví cruu tsa taahan tsi cuiso ndo tatun cua cunycun ndo tsi yu.

25 Tan nyooho tsa ña cuñi nyehe tundoho, tan ña cuñi ndo kuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua kuhva ñayivi ndo tsa cuenda yu, cua cacu ndo.

26 Tyin nduve yahvi nyaá tsa cua ñihi ndo tandihi tsa iyó nu ñuhu ñayivi tun aña ndo tan ña cua cacu tsi. Tyin nduve maa náa tsihin tan cuví tyahvi ndo tan ña cua cunaa aña ndo.

27 Tyin yuhu, Rayi tsa quee nda gloria, cua quitsi nyico yu inga tsaha, maa tyin tsihin tsa cahnú cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun

intuhun ndo tsa cuenda tsa javaha ndo.

<sup>28</sup>Tan tsa nditsa catyí yu tsihin ndo, tyin yíhí nyoooho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

## 17

*Nu nyehe uñi taahán ra tsicá tsihin ra Jesús nácaa tsa sñi caá xiñu ra Jesús nu ndacá ñaha ra nda gloria (Mr. 9.2-13; Lc. 9.28-36)*

<sup>1</sup>Tan tsa yaha iñu quívi, tan quihín ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha.

<sup>2</sup>Tan ican nasama cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu.

<sup>3</sup>Tacan tan nyehe ra naha tsi ra Moisés tan ra Elías, natuhún ra naha tsihin ra Jesús.

<sup>4</sup>Tan quitsaha caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñí un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

<sup>5</sup>Tsitsi tsa caahán ra Pedro, quitsi iin vico tsa xiñu xaan siquí ra naha. Tan tyasi tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan sñi xaan cuñi yu tsihin ra. Tyaa yahvi ndo tsa caahán ra —catyí ndusu can.

<sup>6</sup>Tsa tsiñi ra tsicá tsihin ra Jesús tuhun ihya, tsicava tsihin nuu ra naha nda nu ñuhu, tyin nayuhvi xaan ra naha.

<sup>7</sup>Tacan tan natuhva ra Jesús nu cayucú ra naha, tan tñin ra tsi ra naha, tan catyí ra:

—Nduvita ndo, tan ña nayuhvi ndo.

<sup>8</sup>Tan cuhva tsa nanyehe ra naha, intuhun ña ra Jesús nyaá, tan nduve inga uvi ca ra naha.

<sup>9</sup>Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehe ndo ihya tsihin nyívi. Tsa yaha tsa cúu Rayñi tsa quee nda gloria tan nandoto ra, tacan tan cua cahan ndo can —catyí ra.

<sup>10</sup>Tacan tan tsicá tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

<sup>11</sup>Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandíhi.

<sup>12</sup>Maa tyin yuhu catyí yu tsihin ndo tyin tsa yaha quitsi ra Elías, tan ña nacoto nyívi tsi ra, tan javaha ñi tsihin ra tandíhi cuhva cuñi maa ñi. Tan tacan tucu yuhu, Rayñi tsa quee nda gloria, cua janyehe ñi tundoho tsi yu —catyí ra tsihin ra naha.

<sup>13</sup>Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

*Nu janduvaha ra Jesús tsi iin ra luhlu tsa tsiihí naaha jahá tatyí ña vaha*

*(Mr. 9.14-29; Lc. 9.37-43)*

<sup>14</sup>Cuhva tsa tsaá ra naha nu yucú nyívi, natuhva iin ra tan tsicuiñi tsiti ra nuu ra Jesús, tan catyí ra tsihin ra:

<sup>15</sup>—Tata, cundaahvi iñi tsi sehe yu, tyin yíhí cuehe tsiihí naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yíhí tsaha nduvá ra nu ñuhu tan cayú ra, tan nduvá tucu ra nu yíhí ndutya.

<sup>16</sup>Tan tsindaca yu tsi ra tsi ra tsicá tsihin un, maa tyin ña cuví janduvaha ra naha tsi ra —catyí ra.

<sup>17</sup>Tan nacahan ra Jesús tan catyí ra:

—¿Nyoooho, nyívi tsa ña tsinú iñi cuví ndo! ¿Tan caquiñi ndo! ¿Ndáa nda quívi cua cunyii yu tsihin ndo? ¿Tan



ndáa nda quiví cua cunyeé iñi yu tsihin ndo, tyin nyooho ña tsinú vaha maa iñi ndo tsi yu? Tindaca ndo tsi ra luhlu tsi yu —catyí ra.

<sup>18</sup> Tacan tan tava ra Jesús tsi nu tatyí ña vaha can, tan quitá nu tsi ra luhlu can. Tan juvin ñi cuhva can nduvahá ra.

<sup>19</sup> Tsa yahá can tan tsicá tuhun siin ra tsicá tsihin ra Jesús tsi ra tan catyí ra naha:

—¿Nacuenta tyin nyuhu ña cuví tava ndi tatyí ña vaha can?

<sup>20</sup> Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuvi javaha ndo tatun nditsa tsa tsinú iñi ndo tsi yu.

<sup>21</sup> Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

*Inga tsaha cahán ra Jesús tsa cua cahñi nyivi tsi ra*

(Mr. 9.30-32; Lc. 9.43-45)

<sup>22</sup> Yucú ra naha Galilea can, tan ra Jesús catyí ra tsihin ra naha:

—Yuhu, Rayi tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra.

<sup>23</sup> Tan cua cahñi ra naha tsi yu. Maa tyin tsa tsinu uñi quiví tan cua nandoto yu —catyí ra.

Tsa tsiñi ra naha tuhun ihya, cui-ihya xaan cuñi ra naha cuvi.

*Nu tyahví ra naha cuenda tsa nduvaha vehe ñuhu cahnu*

<sup>24</sup> Cuhva tsa tsaá ra Jesús tan ra tsicá tsihin ra ñuu Capernaum, ra tava xuhun cuenda vehe ñuhu naha ra, tsahan ra naha tsinyehé ra naha nu nyii ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

<sup>25</sup> Tan nacahan ra Pedro tan catyí ra:

—Tuhvá ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacahan tan catyí ra:

—¿Nacaa cuñi yooho, Simón? ¿Yóo tsi quihín ra cuví rey tsa iyó nu ñuhu ñayivi ihya yahvi? ¿A tsi nyivi ñuu maa ra o tsi inga nyivi?

<sup>26</sup> Nacahan ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahan tsi tyahvi ñi.

<sup>27</sup> Maa tyin ña cuñi yo tsa cahan ra naha siqui yo, yacan cuenda vaha ca tsa cuhun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

## 18

*Nu janahá ra Jesús yóo ra cahnu ca cuví nuu tandihi nyivi tsa ndacá ñaha Nyoo*

(Mr. 9.33-37; Lc. 9.46-48)

<sup>1</sup> Quiví can natuhvá ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuví nu ndacá ñaha Nyoo?

<sup>2</sup> Tacan tan ra Jesús caná ra tsi iin ra luhlu, tan tyaa ra tsi ra mahñu ra naha.

<sup>3</sup> Tan catyí ra:

—Tsa nditsa catyí yu tsihin ndo, tyin tatun nyooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuvi quihvi ndo nu ndacá ñaha Nyoo.

<sup>4</sup> Tyin ra tsa cahnu ca cuví nuu Nyoo, juvin ra cuví ra tsa janduluhlu tsi, tumaa ra luhlu ihya.

<sup>5</sup> Nyivi tsa naquihín tsi iin nyivi tumaa ra luhlu ihya, tyin tsinú iñi ñi tsi yu, yuhu naquihín cuenda ñi.



*Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha*

(Mt. 5.29-30; Mr. 9.42-48; Lc. 17.1-2)

<sup>6</sup> 'Tatun yóo nyívi natyuhú tsi iin nyívi tsa ñaha ca tsinú vaha iñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cujanehñi nyívi tsi ñi nu cunu ndutya ñuhu.

<sup>7</sup> ¡Ndahvi nyívi ñuu ñayívi, tyin tacan iyó tsa jatívi tsi ñi! ¡Tan ndahvi tucu ra ndaahvi tsa jatívi tsi ñi!

<sup>8</sup> 'Yacan cuenda tatun ndaha un o tsaha un javahá tsa ña vaha, cahnya can tan javita un. Tyin vaha ca quihvi un nu coo un tsihin Nyoo tsihin tsa lundu ndaha un o lundu tsaha un, tan ñavin ca tsa nanii un tan jacuhun Nyoo tsi un nu cayú ñuhu tsa ña cua ndahva maa.

<sup>9</sup> Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhu tsitsi anyaya.

*Nu cahan ra Jesús tyin tumaa mbee tsa cunaa, tacan cuvíyo*  
(Lc. 15.3-7)

<sup>10</sup> 'Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria.

<sup>11</sup> Tyin yuhu, Rayii tsa quee nda gloria, vatsí jacacu yu tsi nyívi tsa cuanaa.

<sup>12</sup> ¿Nacaa cuñi nyoocho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cahun ra cunanducu ra tsi quití tsa cuanaa can?

<sup>13</sup> Tan tatun nañihi ra tsi ti, tsa nditsa tyin sii ca cua cuñi ra tsihin quití can, tan ñavin ca tsihin tsa cumi xico tsahun cumi quití tsa ña tsinaa.

<sup>14</sup> Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyívi tsa cuví tumaa ra nyihi ihya.

*Nacaa taahán tsi jahá tahan yo tucahnu iñi tsiyo*  
(Lc. 17.3)

<sup>15</sup> 'Tatun ra yañi un tan javaha ra tsa ña vaha tsi un, cahan tsihin intuhun ñi maa ra tan catyí un tsihin ra tyin ña vaha cuhva javaha ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can.

<sup>16</sup> Maa tyin tatun ña tyaa yahvi ra tsi un, tacan tan cana un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can.

<sup>17</sup> Tatun ña tyaa yahvi ra ndi maa tsi ra tsa tsahan tsihin un naha ra, tacan tan cahan tsihin tandihi nyívi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jahá ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

<sup>18</sup> 'Tsa nditsa catyí yu tsihin ndo, tyin tandihi tsa cuhñi ndo ihya nu ñuhu ñayívi, tsa nuuhñi tsi jahá maa Nyoo nda gloria. Tan tandihi tsa ndatsi ndo ihya nu ñuhu ñayívi, tsa ndatsi maa Nyoo nda gloria.

<sup>19</sup> 'Tan juvin ñi catyí tucu yu tsihin ndo, tatun uvi ndo ihya nu ñuhu ñayívi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo.

<sup>20</sup> Tyin nu yucú uvi o uñi nyívi tan jacahnú ñi tsi yu, ican nyaá yu mahñu ñi —catyí ra Jesús.

<sup>21</sup> Tacan tan tsahan ra Pedro tsindaca tuhun ra tsi ra Jesús tan catyí ra: —Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

<sup>22</sup> Tan nacahan ra Jesús tan catyí ra: —Catyí yu tsihin un tyin ñavin utsa taahan ñi tsaha; nda cumi cientu

cumi xico utsi tsaha taahán tsi jaha un tucahnu iñi.

*Nu cahān ra Jesús iin cuhva cuenda iin ra tsa ña cuñi jaha tucahnu iñi*

<sup>23</sup> Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihi musu ra tyin cua nyehe ra nácaa nyaá cuenda ra naha tsi ra.

<sup>24</sup> Tan cuhva tsa quitsaha natavá ra cuenda, tan tsindaca ra tsi iin musu tsa cuaha millón pesu nyaá cuenda tsi ra.

<sup>25</sup> Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasihi ra, tan tsihin sehe ra tan tandihi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.”

<sup>26</sup> Tacan tan musu can tsicuiñi tsiti ra nuu tsitoho ra, tan cahān ndaahvi ra tsihin ra, tan catyí ra: “Tata, jaha tumañi iñi, cuatu un luxu, tan tyahvi yu tandihi tsa nyaá cuenda yu tsi un nda ñihi yu xuhun”, catyí ra.

<sup>27</sup> Tan cundahvi iñi tsitoho ra tsi ra, tan jaha ra tucahnu iñi tsi ra, tan janaa ra tandihi tsa nyaá cuenda ra, tan jandoo nuña ra tsi ra.

<sup>28</sup> Maa tyin cuhva tsa quita musu can, nañihi ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tñin ra tsi ra can, tan quitsaha tñin ra jucun ra, tan catyí ra tsihin ra: “Tyahvi tsa nyaá cuenda un tsi yu.”

<sup>29</sup> Tacan tan tsicuiñi tsiti ra can nuu ra, tan cahān ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra.

<sup>30</sup> Maa tyin maa ra ña cuñi ra cuatu ra, tan tsahan ra tsityihi ra tsi ra can vehe caa nda cuanda tsa tyahvi ra tsa nyaá cuenda ra tsi ra.

<sup>31</sup> Tsa nyehe inga ca musu tsa javaha ra, cuihya xaan cuñi ra naha, tan tsahan ra naha tsinacatyí tuhun ra naha tsihin tsitoho ra naha tsa ña vaha tsa javaha ra can.

<sup>32</sup> Tacan tan tsitoho ra can tava tyiñu ra na quitsi ra can. Tan tsa tsaā ra, tan catyí ra tsihin ra: “Musu ña vaha cuví un. Yuhu jaha yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu.

<sup>33</sup> Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra.

<sup>34</sup> Tan cuxaan xaan tsitoho ra, tan tava tyiñu ra na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

<sup>35</sup> Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tucahnu iñi tsi nyivi ndo tsihin tsa ñi iñi añima ndo.

## 19

*Nu caahán ra Jesús tyin ña vaha tsa nacoo ihñi rayi tsi ñasihi ra*

(Mr. 10.1-12; Lc. 16.18)

<sup>1</sup> Tsa yaha tsa cahān ra Jesús tuhun ihya, tan quita ra cuenda Galilea can, tan cuahān ra cuenda Judea inga tsiyo yutya cahnu Jordán, ityi nu caná ñicanyii.

<sup>2</sup> Cuaha xaan nyivi tsinyicun tsi ra, tan janduvaha ra tsi nyivi cuuhví.

<sup>3</sup> Tacan tan juhva ra fariseo naha ra natuhva ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuví tyaa ra naha cuatyí siqui ra. Tan tsica tuhun ra naha tsi ra tan catyí ra naha:

—¿A vaha tsa nacoo rayi tsi ñasihi ra tsa cuenda náa ñi tsihi tsaha ña tsi ra?

<sup>4</sup> Tan nacahan ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javaha tsi ndo nda quivi jihna ñi, javaha ra rayi tan ñaha?

<sup>5</sup> Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuví ñi tumaa tsa intuhun ña nyivi.”

<sup>6</sup> Yacan cuenda, ñavin ca uvi taahan ñi, maa tyin nduvi ñi intuhun ña nyivi

cuví ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

<sup>7</sup> Tacan tan tsicá tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuví caní iin rayíi tutu cuenda ley ra tan nacoo ra ñasiíhi ra?

<sup>8</sup> Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsahá ra Moisés ndatu tsa nacoo ndo ñasiíhi ndo. Maa tyin quiví jihna ñi ñavin tacan tsicoo nyiví.

<sup>9</sup> Yuhu catyí yu tsihin ndo tye-hen: Ra tsa nacoo ñasiíhi, tan ñavin tsa cuenda tsa quituví ña tsihin inga rayíi, tan tindahá ra tsihin inga ñaha, tsicoó cuatyí ra nuu Nyoo. Tan ra tsa tindahá tsihin ñaha tsa nacoo rayíi can, juvin ñi tsicoó tucu cuatyí ra can —catyí ra.

<sup>10</sup> Tacan tan ra tsicá tsihin ra, catyí ra naha tsihin ra:

—Tatun tacan taahán tsi coo rayíi tsihin ñasiíhi ra, vaha ca ña tindaha yo.

<sup>11</sup> Tan ra Jesús catyí ra tsihin ra naha:

—Ña tandihí nyiví cuví naquihin cuenda tuhun ihya. Maa tyin nyiví tsa tsahá Nyoo cuví naquihin cuenda ñi can.

<sup>12</sup> Tsa ña tindaha nyiví, cuaha ñi cuenda cuví tsi. Yihí ñi ña cuñí ñi tindaha ñi tyin iin cuhva caa maa ñi nda cacu ñi. Tan inga ñi ña cuñí ñi tindaha ñi tyin tsa nducapun ñi jahá nyiví. Tan yihí ñi ña tindahá ñi tsa cuenda tsa cuñí ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihí nyiví tsa cuví javaha yacan na javaha ñi —catyí ra Jesús.

*Nu nasocó ra Jesús tsi tsa nyihí  
(Mr. 10.13-16; Lc. 18.15-17)*

<sup>13</sup> Tacan tan quitsi ndaca nyiví juhva tsa nyihí tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsahá caahán

ra naha tsi nyiví tsa cuahán tsihin tsa nyihí can.

<sup>14</sup> Maa tyin ra Jesús catyí ra:

—Jaña ndo tsi tsa nyihí na quitsi maa tsi naha tsi nu nyaá yu. Tan ña casi ndo. Tyin nyiví ndacá ñaha Nyoo cuví ñi tumaa tsa nyihí ihya —catyí ra.

<sup>15</sup> Tacan tan tyiso ndaha ra jiñi tsi naha tsi. Yahá can tan cuahán ra.

*Nu tsahá ra Jesús cuhva tyin yí  
xaan nacuhva cuenda iin ra cuca tsi ra  
tsi Nyoo*

*(Mr. 10.17-31; Lc. 18.18-30)*

<sup>16</sup> Iin ra tyuvaa tsahan ra tsindaca tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayiví nyito tsa ña cua naa maa?

<sup>17</sup> Tan ra Jesús catyí ra tsihin ra:

—¿Nacuenda catyí un tyin ra vaha cuví yu? Intuhun ñi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatun cuñí un coo un ñayiví tsa ña cua naa maa, javaha tandihí tuhun tsa tsahá Nyoo tyin javaha yo —catyí ra tsihin ra.

<sup>18</sup> Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cahñi un nyiví. Ña coo inga ñaha tsi un. Ña suhu un tsa tsii nyiví. Ña cahan un cuendu siqui nyiví.

<sup>19</sup> Tyaa yahvi tsi jutu un tan tsi sihi un. Tan cuñi tsi nyiví, tumaa tsa cuñí un tsi maa un.

<sup>20</sup> Tan ra tyuvaa can, catyí ra tsihin ra:

—Tandihí maa yacan tan tyaa yahvi yu nda tahan luhlu yu tan nda cuanda vityin. ¿Náa ca cumañi tsi yu?

<sup>21</sup> Tan ra Jesús catyí ra tsihin ra:

—Tatun cuñí un tsa iin ndaha ñi cuví un iin ra cuiti nuu Nyoo, cuaahan tan xico un tsa iyó tsi un, tan cuhva un tsi nyiví ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

<sup>22</sup> Maa tyin cuhva tsa tsiñi ra tyuvaa can tsa cahan ra Jesús tsihin

ra, cuiihya xaan cuñí ra cuví tan cuanuhú ra tyin cuca xaan ra.

<sup>23</sup> Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yíi xaan tan cuví nacuhva cuenda nyívi cuca tsi ñi na cundaca ñaha Nyoo tsi ñi.

<sup>24</sup> Catyí yu tsihin ndo inga tsaha, tyin vasu yíi xaan yaha iin camellu xuu iin yiqui tucu, maa tyin yíi xaan ca tsa quihvi iin nyívi cuca nu ndacá ñaha Nyoo —catyí ra Jesús.

<sup>25</sup> Tsa tsiñi ra tsicá tsihin ra Jesús tsa cahán ra, iyo xaan cuñí ra naha, tan quitsahá tsicá tuhun tahan ra naha, tan catyí ra naha:

—Tun tacan, yoñi cua cuvi cacu

<sup>26</sup> Tacan tan nanyehe ra Jesús nu nyecú ra naha tan catyí ra:

—Nyívi ña cuví javaha ñi yacan, maa tyin Nyoo cuví javaha ra tandihí.

<sup>27</sup> Tacan tan quitsahá caahán ra Pedro tsihin ra:

—Jutu Mañi yu, nyuhu tandihí maa tsa iyó tsi ndi nacoq ndi tan nyicún ndi tsi un. ¿Náa cua ñihi ndi? —catyí ra tsihin ra.

<sup>28</sup> Tan nacahán ra Jesús tan catyí ra:

—Tsa nditsa catyí yu tsihin ndo, tyin quívi tsa cua ndutsaa tandihí tsa iyó, yacan cuví quívi cua cunyaa yuhu Rayí tsa quee nda gloria nu tyayu síi xaan caá tan cua cundaca ñaha yu. Tan nyoocho tsa nyicún tsi yu, cua cunyecu ndihí ndo nu utsi uvi taahan tyayu síi caá. Tan cua cundaca ñaha ndo tsi tandihí nyívi cuví tata tsa utsi uvi taahan sehe ra Israel.

<sup>29</sup> Tan tandihí nyoocho tan tandihí inga nyívi tsa nacoq vehe, o yañi ñi, o cuhva ñi, o jutu ñi, o sihi ñi, o ñasihi ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siqui can, tan cua ñihi tucu ñi ñayívi nyito tsa ña cua naa maa coo ñi.

<sup>30</sup> Cuaha xaan nyívi cuahán ityi nuu vityin, ñi ican cua cuhun nu ndihí ña. Tan cuaha xaan nyívi cuahán nu ndihí vityin, ñi ican cua cuhun ityi nuu.

## 20

*Nu jacuahá ra Jesús iin cuhva cuenda ra jahá tyiñu*

<sup>1</sup> Tsa ndacá ñaha Nyoo tsi nyívi, cuví tsi tumaa iin ra iyó cora uvas. Tan tuvi ñi quita ra cuahán ra cuanducú ra musu jahá tyiñu nu tyiñu jahá ra.

<sup>2</sup> Tan ndoo ra tuhun tsihin musu can tyin cua tyahvi ra yahvi tsa iin quívi. Tan jacuhun ra tsi ra naha cua jahá tyiñu ra naha nu iyó tyiñu jahá ra.

<sup>3</sup> Yahá can tan cuahán ra inga tsaha cuhva caa iin tsa tuvi. Tan nyehe ra tsi juhva ca ra yucú taxin nuyahvi can.

<sup>4</sup> Tan catyí ra tsihin ra naha: “Cuaahan ndihí tucu nyoocho jahá tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihí tucu ra can naha ra.

<sup>5</sup> Tan tsitoho cora can quita ra inga tsaha tsa ora. Tan juvin ñi musu nducú ra. Tan caa uñi tsa tseñi, quita ra inga tsaha nducú ra musu.

<sup>6</sup> Yahá can tan quita nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.”

<sup>7</sup> Tan nacahán ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndihí ndo jahá tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra.

<sup>8</sup> Tan cuhva tsa cua cuaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihí naha ra, tan nu cua ndihí tan tyahvi un tsi ra tsa quihvi tsa jihna ñi naha ra”, catyí ra.

<sup>9</sup> Tacan tan tsaá ra tsa quihvi caa uhun tsa tseñi can naha ra. Tan intuhun intuhun ra naha quihin ra naha yahvi naní iin quívi.



<sup>10</sup> Yaha can, tan cuhva tsa tahañ tsi tsi ra tsa quihvi tsa jihna ñi can naha ra, cuñi maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihin ra naha.

<sup>11</sup> Tan cuhva tsa quihin ra naha, quitsaha caahan ra naha tsi tsitoho tyiñu can.

<sup>12</sup> Tan catyí ra naha: “Ra tsa tsa nu ndihi ihya naha ra, intuhun ñi hora jaha tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jaha tyiñu ndi nu ihñi”, catyí ra naha.

<sup>13</sup> Maa tyin nacahan tsitoho tyiñu can, tan catyí ra tsihin iin ra can: “¡Tsa!, nduve tsa ña vaha javaha yu tsihin un. ¿A ñavin yahvi tsa iin quivi ndoo yo tuhun tyin cua tyahvi yu tsi un?”

<sup>14</sup> Quihin yahvi un, tan cuanuhu. ¿A nduve ndatu iyó tsi yu tsa tyahvi yu tsi ra tsa quihvi nu ndihi iin ñi cuhva tsa tyahvi yu tsi yoocho?

<sup>15</sup> ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra.

<sup>16</sup> Tacan nyivi quihvi nu ndihi, cuhun ñi ityi nuu. Tan nyivi cuahan ityi nuu, nda nu ndihi ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

*Inga tsaha jacotó ra Jesús cuhva cua cahñi nyivi tsi ra*

*(Mr. 10.32-34; Lc. 18.31-34)*

<sup>17</sup> Cuhva tsa cuñi cuhun ra Jesús nda ñuu Jerusalén, cana sñin ra tsi tsa utsi uvi ra tsicá tsihin ra tan catyí ra tsihin ra naha:

<sup>18</sup> —Nyehe ndo tyin cuahan yo Jerusalén vityin. Tan ndacan cua nacuhva cuenda nyivi tsi yuhu, Rayñi tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyi ra naha tyin taahan tsi cúu yu.

<sup>19</sup> Tan cua nacuhva cuenda ra naha tsi yu tsi ra ñuu Roma naha ra, tyin

vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyí ra Jesús tsihin ra naha.

*Nu tsicán sihi ra Jacobo tan ra Juan iin tumañi iñi tsi ra Jesús*

*(Mr. 10.35-45)*

<sup>20</sup> Tacan tan ñasñi ra Zebedeo natuhva ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiti ña nuu ra tyin cua ndacan ña iin tumañi iñi tsi ra.

<sup>21</sup> Tan tsicá tuhun ra Jesús tsi ña tan catyí ra:

—¿Náa cuñi un?

Tan catyí ña:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

<sup>22</sup> Maa tyin nacahan ra Jesús tan catyí ra:

—Nyoocho ña tsitó ndo tsa tsicán ndo. ¿A cuví nyehe nyoocho tundoho tsa cua nyehe yuhu? ¿A cuví cuhun ndo tuhun tsihi tumaa cua cuhun yuhu? —catyí ra.

Tan nacahan ra naha tan catyí ra naha:

—Cuví maa.

<sup>23</sup> Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tumaa cuhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahan tsi cuhva yacan tsi ndo, tyin tsa tsitó maa Jutu yu yoo cua cuhva ra can —catyí ra Jesús tsihin ra naha.

<sup>24</sup> Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra.

<sup>25</sup> Maa tyin cana ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha.



<sup>26</sup> Maa tyin ñavin tacan taahán tsi javaha nyooho. Tyin ra tsa cuñí nducahnu ca cuví nu Nyoo, cuñí tsi cuví ra musu tandihí nyooho.

<sup>27</sup> Tan ndáa nyooho tsa cuñí ndo cuví ndo ityi nuu, cuñí tsi cuví ndo musu tandihí ca ra naha.

<sup>28</sup> Tumaa yuhu, Rayí tsa quee nda gloria, ña vatsí yu tyin jatyinyee nyívi tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayívi yu tsa cuenda ñi. Tyin tsihin yacan cua tyahvi yu cuatyí tandihí ñi.

*Nu janduvahá ra Jesús tsi uvi taahan ra cuaa*

(Mr. 10.46-52; Lc. 18.35-43)

<sup>29</sup> Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyívi cuahán cua nyicun tsi ra naha.

<sup>30</sup> Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsaha caná tsaa ra naha. Tan catyí ra naha:

—¡Jutu Mañi yu, tata ra David, cundaahvi iñi tsi ndi! —catyí ra naha.

<sup>31</sup> Tan nyívi quitsaha caahán ñi tsihin ra naha na casi ra naha yuhu ra naha. Maa tyin ñihi ca caná tsaa ra naha:

—¡Jutu Mañi yu, tata ra David, cundaahvi iñi tsi ndi!

<sup>32</sup> Tacan tan tsicuñi ra Jesús tan caná ra tsi nduvi taahan ra cuaa can, tan tsicá tuhun ra tsi ra naha tan catyí ra:

—¿Náa cuñí ndo javaha yu tsi ndo?

<sup>33</sup> Tan nacahan ra naha tan catyí ra naha:

—Jutu Mañi yu, jananyehe tsi ndi.

<sup>34</sup> Tacan tan cundaahvi iñi ra Jesús tsi ra naha, tan tñin ra tinuu ra naha. Tan iin yaha ñi nanyehe ra naha, tan cuíti cuanyicún ndihí ra naha tsi ra Jesús.

## 21

*Nu cuahán ra Jesús ñuu Jerusalén*

(Mr. 11.1-11; Lc. 19.28-40; Jn. 12.12-19)

<sup>1</sup> Tsa cua tsaa ra naha ñuu Jerusalén, tan tsaa ra naha ñuu Betfagé, yatyin ñi yucú Olivo nu iyó

yutun olivo. Tacan tan tava tyiñu ra Jesús tsi uvi ra tsicá tsihin ra.

<sup>2</sup> Tan catyí ra tsihin ra naha:

—Cuaahan ndo ñuu tsa canyí ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu.

<sup>3</sup> Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyí ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndí tsi ti naha ti”, catyí ndo tsihin ñi —catyí ra.

<sup>4</sup> Tacan cuví tyin cundaa tsa cahan ra cuví ndusu yuhu Jutu Mañi yo tahan tsanaha nu catyí ra tyehen:

<sup>5</sup> Cahan ndo tsihin nyívi ñuu Sión: “Nyehe ndo, vatsí rey ndo nu iyó ndo. Ndaahvi ñi vatsí ra yosó ra iin urru luhlu, sehe iin quití tsa tuhvá nyisó carga”, catyí ra cuví ndusu yuhu Nyoo can.

<sup>6</sup> Tacan tan cuahán ra tsicá tsihin ra Jesús, tan javahá ra naha tumaa tsa cahan ra tsihin ra naha.

<sup>7</sup> Quitsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaa ra Jesús tsi ti.

<sup>8</sup> Tan cuaha xaan nyívi tsaquin ñi jahma ñi nu ñuhu ityi nu cuahán ra, tan inga ñi tsahnya ñi ndaha yutun tsaquin ñi tsitsi ityi.

<sup>9</sup> Tan nyívi tsa cuahán ityi nuu tan ityi tsata, quitsaha caná tsaa ñi tan catyí ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsi Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

<sup>10</sup> Cuhva tsa tsaa ra Jesús ñuu Jerusalén can, tandihí maa nyívi ñuu quitsaha cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

<sup>11</sup> Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

*Nu tava ra Jesús tsi nyivi xicó tsitsi vehe ñuhu cahnu*

(Mr. 11.15-19; Lc. 19.45-48; Jn. 2.13-22)

<sup>12</sup>Yaha can tan quihvi ra Jesús tsitsi vehe ñuhu cahnu Nyoo. Tan tava ra tsi tandihi nyivi jatá tan xicó ican. Tan janduvá ra mesa nu nasamá ñi xuhun. Tan janduvá ra tyayu nu xicó ñi paloma.

<sup>13</sup>Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduví ndo vehe ihya, vehe ñasuhu —catyí ra tsihin ñi.

<sup>14</sup>Tan tsa tsito juhva ra cuaa tan ra coxo naha ra tyin nyii ra Jesús tsitsi vehe ñuhu cahnu, quihvi ra naha tan janduvahá ra Jesús tsi ra naha.

<sup>15</sup>Tan nyehe ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñi ra naha tyin caná tsa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaan ra naha tsa tsiñi ra naha tsa caahán tsa nyihi can.

<sup>16</sup>Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahan ra Jesús tan catyí ra:

—Tsiñi yu. Maa tyin ¿a ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sii xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

<sup>17</sup>Tacan tan nacoq ra tsi ra naha, tan quitá ra ñuu can cuahán ra ñuu Betania. Tan ican ndoo ra tsacuaa can.

*Nu cahan ra Jesús tsi yutun higo tsa ña tsahá tsiti*

(Mr. 11.12-14, 20-26)

<sup>18</sup>Tan tsa tuvi cuii ñi inga quivi can, vatsí nyico ra Jesús nda ñuu Jerusalén, tan tsaq soco tsi ra.

<sup>19</sup>Tan nyehe ra nyaá iin yutun higo yatyin ñi yuhu ityi can. Tan natuhvá ra nu nyaá tun, maa tyin nduve maa náa nañihi ra nuu tun. Maa ñi ndaha tun ñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun.

<sup>20</sup>Tan tsa nyehe ra tsicá tsihin ra tsa javahá ra tsi tun, iyo xaan cuñi ra naha, tan tsicá tuhun ra naha tsi ra tan catyí ra naha:

—¿Nacuenta tsa numi xaan na ityi yutun higo can?

<sup>21</sup>Tan nacahan ra Jesús tan catyí ra:

—Tsa nditsa catyí yu tsihin ndo, tyin tatun tsinú ñi ndo tan ña ndu uvi ñi ndo, ñavin tsa javahá yu tsihin yutun higo ihya ñi cuví javaha tucu nyooho, tyin cuví ndihi tucu catyi ndo tsihin yucu ihya: “Cuatsiyo ihya tan cahun un nda tsitsi ndutya ñuhu.” Tan cua cahun tsi.

<sup>22</sup>Tan tandihi tsa cua ndacan ndo nu cua ndacan tahvi ndo tsi Nyoo, tatun tsinú ñi ndo tyin cua cuhva ra, cua ñihi ndo —catyí ra Jesús.

*Nu tsicq tuhun ra cumi tyiñu vehe ñuhu naha ra tsi ra Jesús yoo tava tyiñu tsi ra tyin cahan ra tsihin nyivi*

(Mr. 11.27-33; Lc. 20.1-8)

<sup>23</sup>Yaha can tan quihvi ra Jesús tsitsi vehe ñuhu cahnu, tan tsitsi tsa jacuahá ra ican, natuhvá ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyí ra naha:

—¿Yoo tava tyiñu tsi un tsa javahá un tyehen? —catyí ra naha.

<sup>24-25</sup>Tan nacahan ra Jesús tan catyí ra:

—Yuhu tucu cuñi yu ndaca tuhun yu tsi nyooho. ¿Yoo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, o nyivi? Tatun catyi tuhun ndo tsihin yu, cua catyi tuhun tucu yuhu tsihin ndo yoo tava tyiñu tsi yu tsa javahá yu tyehen —catyí ra Jesús tsihin ra naha.

Tacan tan ra ican naha ra quitsahá caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyi ra tsihin yo: “Tun tacan, ¿nacuenta ña tsinu iñi ndo tsi ra?”

<sup>26</sup> Tan tatun catyi yo tyin nyivi jaquitsi tsi ra, yuuhvi yo coto cuxaan nyivi tsi yo, tyin tandihi ñi tsinú iñi ñi tyin ra Juan, cuenda Nyoo cahan ra —catyí ra naha.

<sup>27</sup> Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyi tuhun yu tsihin ndo yóo tava tyiñu tsi yu.

*Nu caahán ra Jesús iin cuhva cuenda uvi taahan sehe iin rayi*

<sup>28</sup> Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayi, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.”

<sup>29</sup> Tan nacahan sehe ra tan catyí ra: “¡Ña cuhun yu!” Maa tyin yaha can tan nasama cuhva tsicá iñi ra tan tsahan ra tsijaha tyiñu ra.

<sup>30</sup> Yaha can tan jutu ra cahan ra tsihin inga sehe ra. Tan catyí tucu ra tsihin ra na cuhun ra kujaha tyiñu ra. Tan ra ican numi ñi quihin ra tyiñu tan catyí ra: “Vaha, tyaa, cuhun maa yu.” Maa tyin ña tsahan ra.

<sup>31</sup> Tsitsi tsa nduvi taahan ra can naha ra, ¿ndaa ra javaha tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tava xuhun cuenda ra ndacá ñaha tan ñi sii iñi caca nuu, jihna ca ñi cua quihvi nu ndacá ñaha Nyoo tan ñavin ca nyooho.

<sup>32</sup> Tyin ra Juan, ra jacoondutya tsi nyivi, quitsi ra jacuaha ra tsi ndo nácaa taahan tsi coo cuiti ndo, tan nyooho ña tsinu iñi ndo tsi ra. Maa tyin ra tava xuhun naha ra tan ñi sii

iñi caca nuu tsinu iñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinu iñi ndo tsi ra.

*Nu caahán ra Jesús tyin tumaa cuvi juhva nu caquiñi nahnu, tacan cuvi ra tsa cua cahñi tsi ra*

(Mr. 12.1-12; Lc. 20.9-19)

<sup>33</sup> Tyaa soho ndo inga cuhva ihya: Tsi coo iin rayi, tan iyó ñuhu ra. Tan tatsi ra yoho yucu vixi tsa nañi uvas, tan tyihi ra cora. Tan javaha ra iin nu cua tava ra ndutya uvas can. Tan javaha tucu ra iin vehe sucun tyin cuvi jaha cuenda ra tandihi.

Yaha can tan tsaha nuu ra ñuhu can tsi juhva ra cua jaha tyiñu naha ra, tan cuahán ra inga ñuu.

<sup>34</sup> Tan tsa tsa quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahan tsi tsi ra.

<sup>35</sup> Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra.

<sup>36</sup> Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javaha ra naha tsihin ra tsa tsahan jihna naha ra, tacan ñi javaha nyico ra naha tsihin ra ihya naha ra.

<sup>37</sup> Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra.

<sup>38</sup> Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihi tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha.

<sup>39</sup> Tacan tan tñin ra naha tsi ra, tan tava ra naha tsi ra ityi tsata cora can, tan tsahñi ra naha tsi ra —catyí ra Jesús.

<sup>40</sup> Tacan tan tsica tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

<sup>41</sup> Tan nacahan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quivi coo uvas, cua nacuhva cuenda ra naha juhva tsa taahan tsi tsi ra cuví tsitoho cora can.

<sup>42</sup> Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tyehen?

Yuu tsa javita ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javaha tandihi can.

Tan iyo xaan cuñi yo nyehé yo, catyí tsi.

<sup>43</sup> Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahá cuhva cuñi ra tyin nditsa tsahá ñi tsi ñi cundaca ñaha ra.

<sup>44</sup> Tan tsa cuenda yuu can, yoo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yoo nyivi, cua taxin nyihi ñi —catyí ra Jesús.

<sup>45</sup> Cuhva tsa tuví iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahan ra Jesús cuhva ihya,

<sup>46</sup> cuñi ra naha tin ra naha tsi ra, maa tyin yuuhví ra naha tsi nyivi tyin tsinú iñi ñi tyin ra Jesús caahan ra cuenda Nyoo.

## 22

### *Nu cahan ra Jesús iin cuhva cuenda vico tindaha*

*(Lc. 14.15-24)*

<sup>1</sup> Quitsaha caahan ra Jesús tsihin nyivi inga tsaha tsihin cuhva, tan catyí ra:

<sup>2</sup> —Tsa ndacá ñaha Nyoo tsi nyivi cuví tsi tumaa iin rey tsa javaha iin vico tsa cuenda tsa cua tindaha sehe ra.

<sup>3</sup> Tan jacuhun ra tsi musu ra na cucana ra naha tsi nyivi tsa jacoto ra tyin cuhun ñi, maa tyin ñi ican, ña cuñi ñi cuhun ñi.

<sup>4</sup> Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihi. Yacan na quitsi ñi”, catyí ra.

<sup>5</sup> Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra.

<sup>6</sup> Tan inga ra naha tin ra naha tsi musu rey can naha ra tan cañi xaan ra naha tsi ra naha nda cuando tsahñi ra naha tsi ra naha.

<sup>7</sup> Tacan tan ra rey can cuxaan xaan ra, tan jacuhun ra tsi andararu ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha.

<sup>8</sup> Tacan tan catyí ra rey can tsihin musu ra: “Tandihi tan tsa iyó vaha tsa cuenda vico tindaha, maa tyin ñi cana yu, ña taahan tsi tsa quitsi ñi.

<sup>9</sup> Cuaahan ndo ityi cahnu tan cana ndo tsi tandihi nyivi tsa nañihi ndo na quitsi ñi vico tindaha”, catyí ra rey can.

<sup>10</sup> Musu can cuahan ra naha tandihi ñi ityi, tan jandu iin ra naha tsi tandihi nyivi nañihi ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

<sup>11</sup> Tacan tan quihvi ra rey can cua nyehe ra tsi tandihi nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsi.

<sup>12</sup> Tan catyí ra rey tsihin ra: “Tsaa, ¿nacuenda nyii un ihya tan nduve jahma vico tindaha nditsi un?” Tan ña nacahan maa ra can.

<sup>13</sup> Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra.

<sup>14</sup> Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

*Nu caahan ra Jesús tsa cuenda tsa tyahvi nyivi xuhun tsi ra ndacá ñaha*



*nda ñuu Roma*

*(Mr. 12.13-17; Lc. 20.20-26)*

<sup>15</sup> Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra.

<sup>16</sup> Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñí un nyehe un tsi nyivi cuca tan nyivi ndaahvi.

<sup>17</sup> ¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

<sup>18</sup> Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu?

<sup>19</sup> Janaha jihna ndo iin xuhun tsa tuhvá yo tyahví tsi ra ndacá ñaha tsi yu —catyí ra.

Tan tsindaca ra naha iin xuhun tsa nañí denario tsi ra.

<sup>20</sup> Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

<sup>21</sup> Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

<sup>22</sup> Tsa tsiñi ra naha tsa cahan ra Jesús, iyo xaan cuñi ra naha. Tan cuahán ra naha.

*Nu cuñi ra cuví saduceo naha ra jandavi ñaha ra naha tsi ra Jesús*

*(Mr. 12.18-27; Lc. 20.27-40)*

<sup>23</sup> Juvín ñi quivi can juhva ra cuví saduceo naha ra tsahan ra naha nu nyíi ra Jesús. Tan ra cuví saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi.

Yacan cuenda tsicá tuhun ra naha tsi ra Jesús, tan catyí ra naha:

<sup>24</sup> —Maestro, ra Moisés catyi ra tyin tatun iin ra tindaha tan tsihi ra tan ña tsicoo sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi.

<sup>25</sup> Vaha. Tun iin ra tan iyó utsa sehe yhi ra, tan ra tsa jihna ñi tindaha ra. Tan nduve sehe ra tsicoo tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi.

<sup>26</sup> Tan juvin ñi tsihi ndihi ra can. Tan ndoo ñaha can tsihin ra tsa tsinu uñi, maa tyin juvin ñi tacan tahan ndihi ra. Tan inducu ñi tahan tandihi tsa utsa ra naha.

<sup>27</sup> Tan nu ndihi ña tsihi ndihi maa ñaha can.

<sup>28</sup> Tatun nditsa tsa cua nandoto nyivi tsihi, ¿ndáa tsa utsa taahan ra can naha ra cua cuvi yhi ña? Tyin tandihi maa ra naha tindaha tsihin ña —catyí ra naha.

<sup>29</sup> Tan nacahan ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo.

<sup>30</sup> Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvi ñi tumaa cuví ángel tsa iyó gloria.

<sup>31</sup> Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

<sup>32</sup> “Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito aña ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuví ra, tyin Nyoo cuví ra Nyoo cuenda nyivi nyito —catyí ra.

<sup>33</sup> Tan tsa tsiñi nyivi tsa caahán ra Jesús, iyo xaan cuñi ñi.

*Ley tsa ñiñi ca tsa tsaha Nyoo*  
*(Mr. 12.28-34)*



<sup>34</sup>Tsa tsito ra fariseo naha ra tyin ra Jesús tyasi ra yuhu ra saduceo naha ra, ndu iin ra naha.

<sup>35</sup>Tan iin ra tsa nyii tsihin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsicá tuhun ra tsi ra, tan catyí ra:

<sup>36</sup>—Maestro, ¿ndáa ley cuví tsa ñiñi ca?

<sup>37</sup>Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa ñi iñi un tan tsihin tsa ñi iñi añima un, tan tsihin tandihi tsa tsiñi tuñi jiñi un.”

<sup>38</sup>Ley ihya cuví tsa ñiñi ca, tan tsa jihna ñi taahán tsi javaha yo.

<sup>39</sup>Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi tyehen: “Cuñi tsi nyivi tahan un tumaa cuñi un tsi maa un.”

<sup>40</sup>Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jaha Nyoo, tan tandihi tuhun tsa jacuahá ra cuví ndusu yuhu Nyoo tahan tsanaha.

*Ra Cristo cuví ra Sehe Nyoo tan juvin ñi cuví ra tata ra David*

(Mr. 12.35-37; Lc. 20.41-44)

<sup>41</sup>Tsitsi tsa ndi yucú ra fariseo naha ra nu ndu iin ra naha,

<sup>42</sup>ra Jesús tsicá tuhun ra tsi ra naha, tan catyí ra:

—¿Nacaa tsicá iñi nyoocho cuenda ra cuví Cristo? ¿Yóo tata cuví ra, cuñi maa ndo?

Tan nacahan ra naha tan catyí ra naha:

—Tata ra David cuví ra.

<sup>43</sup>Tacan tan ra Jesús catyí ra tsihin ra naha:

—Tun tacan, ¿nacuenta jacahan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

<sup>44</sup>Nyoo cahan tsihin Jutu Mañi yu, ra Cristo, tan catyí ra tsihin ra:

“Cunya xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

<sup>45</sup>¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

<sup>46</sup>Tan yoñi maa cuví nacahan nu cahan ra ndi intuhun maa tuhun. Tan nda quiivi can, yoñi ca maa cuñi nducu tuhun tsi ra.

## 23

*Nu caahan ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra*

(Mr. 12.38-40; Lc. 11.37-54; 20.45-47)

<sup>1</sup>Tacan tan ra Jesús catyí ra tsihin tandihi nyivi, tan tsihin ra tsicá tsihin ra:

<sup>2</sup>—Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaá ra Moisés.

<sup>3</sup>Yacan cuenda tyaá yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, sin tsa jacuahá ra, tan sin tsa javahá ra naha.

<sup>4</sup>Janducuahá ca ra naha ley tsa tsaha Nyoo tahan tsanaha. Tan cuñi ra naha tsa javaha nyivi tandihi can. Maa tyin ña cunye ñi javahá ñi tandihi can, tan ndi maa ra naha tan ña cuñi ra naha javaha ra naha can.

<sup>5</sup>Tyin maa ra naha tyaá ra naha caja ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi. Javahá ra naha tandihi can tyin na nyehe nyivi tyin vaha xaan ca ra naha.

<sup>6</sup>Tan nu vaha ca, cuñi ra naha cunye cu ra naha nu iyó vico tan catsi ra naha. Tan nu vaha ca cuñi ra naha cunye cu ra naha tsitsi vehe ñuhu.

<sup>7</sup>Tan nu tsicá nuu ra naha cuñi ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan cuñi tucu ra naha tsa catyí ñi “maestro” tsihin ra naha.

<sup>8</sup> Maa tyin nyooho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyii tsihin ndo, tan tandihi ca maa ra naha yañi ndo cuví tsi ra naha.

<sup>9</sup> Tan ña cahan ndo Jutu ndo tsihin ndi intuhun rayi ñuu ñayivi ihya, tyin intuhun ñi ra nyaá gloria cuví Jutu ndo.

<sup>10</sup> Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo.

<sup>11</sup> Ra tsa jahá tyiñu tyiñu tandihi ca ra naha, ra ican cuví ra cahnu ca nu yucú ndo.

<sup>12</sup> Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

<sup>13</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo tyin jahá ndo tyin vaha xaan ndo, tan ña nditsa! Tyin tyasi ndo yuvehe nu ndacá ñaha Nyoo, tan ña cuví quihvi nyivi. Tan ndi maa ndo ña quihvi ndo, tan ndi ña tsahá ndo tsa quihvi nyivi tsa cuñi quihvi.

<sup>14</sup> ¡Ndahvi nyooho ra cuví maestro cuenda ley tan nyooho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyí tyin quihín nyaa ndo vehe ñi ndaahvi tsa tsihi yí tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundocho cua nyehe ndo jaha Nyoo.

<sup>15</sup> ¡Ndahvi nyooho ra maestro cuenda ley vehe ñuhu tan nyooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñi ndo nañihi ndo vasu intuhun nyivi cunyicun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cahun ñi anyaya tsihin ndo.

<sup>16</sup> ¡Ndahvi nyooho ra ndaahvi! Tyin cuñi ndo jaquihin ityi ndo tsi nyivi,

¡maa tyin cuaa ndo! Caahán ndo tyin yóo nyivi cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo.

<sup>17</sup> ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu í tsi xuhun cuaan can?

<sup>18</sup> Tan juvin ñi catyí tucu ndo tyin yóo nyivi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañi ñi nu altar, tacan tan taahán tsi javaha ñi tsa cahan ñi, catyí ndo.

<sup>19</sup> ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañi ndo nu altar can, o maa altar tsa jandu í tsa jamañi ndo?

<sup>20</sup> Tyin nyivi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihi ñi tsa cuenda tandihi tsa yosó nu altar can.

<sup>21</sup> Tan nyivi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican.

<sup>22</sup> Tan tacan tucu nyivi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

<sup>23</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaa yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandihi nyivi, tsa cundaahvi iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñi tsi javaha ndo tandihi can, tan ña cua

jandihí ndo tsa cuhva ndo diezmo can.

<sup>24</sup> Nyooho ra cuaa, cuñí ndo jaquihin ityi ndo tsi nyivi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

<sup>25</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo.

<sup>26</sup> ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndihí ityi tsata.

<sup>27</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandihí nuu tsa caquiñi.

<sup>28</sup> Tacan cuví nyooho, tyin cuñí nyivi tyin vaha xaan iñi ndo, maa tyin añima ndo ican quitá tsa jandaví ñaha ndo tan tandihí tsa caquiñi ndo.

<sup>29</sup> ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyaquí ndo ñaña ra cuví ndusu yuhu Nyoo, tan nacahyi ndo ñaña nyivi vaha tsi-coo tahan tsanaha.

<sup>30</sup> Tacan tan catyí ndo: “Tun tsatyin tsicoo yo quivi tsicoo tsii tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo.

<sup>31</sup> ¡Tsihin yacan ñi tan nacotó ndo tyin cuví ndo tata nyivi tsahñi tsi ra cuví ndusu yuhu Nyoo!

<sup>32</sup> ¡Yacan vityin nyehe maa ndo na jaha ndo, javaha ndihí ndo tsa javaha

tsii tsaahnu ndo, tun cuñí ndo!

<sup>33</sup> ¡Nyooho nyivi caquiñi cuví ndo, tan nyivi cuví tata coo! ¿Nacaa cua cacu ndo tan ña cua cuhun ndo anyaya? Ña cua cuví.

<sup>34</sup> Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu.

<sup>35</sup> Yacan cuenda, tsata nyooho cua cunyaa cuatyí tsa cuenda tandihí ra vaha tsa tsahñi tsii tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo.

<sup>36</sup> Tsa nditsa catyí yu tsihin ndo, tyin tandihí cuatyí can cua coso siqui nyooho, nyivi tsa iyó vityin —catyí ra Jesús tsihin ra naha.

*Nu nducuihya cuñi ra Jesús nyehe ra tsi nyivi ñuu Jerusalén (Lc. 13.34-35)*

<sup>37</sup> ¡Ñuu Jerusalén! ¡Ndahvi nyooho nyivi ñuu Jerusalén! Tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihí ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndivi sihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo.

<sup>38</sup> Nyehe ndo vityin, tyin tsa nacoo ihñi Nyoo tsi ndo.

<sup>39</sup> Tan catyí yu tsihin ndo, tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan cuví ra vatsí tsihin sivi Nyoo Jutu yo —catyí ra Jesús.

## 24

*Nu caahán ra Jesús tyin cua tani vehe ñuhu cahnu*

(Mr. 13.1-2; Lc. 21.5-6)

<sup>1</sup> Quita ra Jesús tsitsi vehe ñuhu cahnu can, tan tsa cuñi cahun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra.

<sup>2</sup> Maa tyin nacahan ra Jesús tan catyí ra:

—¿A nyehé ndo tandihi tsa iyó ihya? Tsa nditsa catyí yu tsihin ndo, tyin ihya ndi intuhun ca yuu tan ña cua coso tsata inga tsi. Tandihi maa can tan cua tani —catyí ra.

*Nu caahán ra Jesús náa cua cuvi tsa ndi cumañi ca naa ñuhu ñayivi*

(Mr. 13.3-23; Lc. 21.7-24; 17.22-24)

<sup>3</sup> Tacan tan cuahan ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahan ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñi ndi tsa catyí tuhun un tsihin ndi, ama cua cuvi tandihi tsa cahan un. ¿Nacaa tan coto ndi tatun tsa cuy- atyin tsa cua quitsi un inga tsaha tan tsa cua naa ñuhu ñayivi?

<sup>4</sup> Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo.

<sup>5</sup> Tyin cuaha xaan ra cua quitsi, tan cua cutyiñu ra naha sivi yu, tan cua catyí ra naha: “Yuhu cuví ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha.

<sup>6</sup> Tan cua ñihi tuhun ndo tyin iyó cu- atyi tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahan maa tsi cua cuvi tsa ndi cumañi ca naa ñuhu ñayivi.

<sup>7</sup> Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi.

<sup>8</sup> Tandihi yacan cua cuvi nu ndi cua quitsaha nyehe nyivi tundoho.

<sup>9</sup> Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua

cahñi ra naha tsi ndo. Tan tandihi nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu.

<sup>10</sup> Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi.

<sup>11</sup> Tan cuaha xaan ra caahán cuendu cua coo, tan cua catyí ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha.

<sup>12</sup> Tan cuaha xaan tsa caquiñi cua coo. Yacan cuenda cua jandhi ñi tsa cuñi tahan ñi tsi ñi.

<sup>13</sup> Maa tyin nyivi tsa tsinú iñi tsi yu nda cuanda nu ndihi, tan ña cua ndu uvi iñi ñi, cua cacu ñi.

<sup>14</sup> Tan tani cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quiivi cua coto nyivi tandihi ñuu tuhun vaha ihya, tacan tan cua naa ñayivi.

<sup>15</sup> Ra Daniel, ra cuvi ndusu yuhu Nyoo, tyaa ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu Ii, (nyooho tsa cahvi, na cutuñi iñi ndo).

<sup>16</sup> Tyin quiivi can, nyivi tsa iyó Judea taahan tsi tsa quita ñi ican tan cahun ñi ityi yucu.

<sup>17</sup> Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi.

<sup>18</sup> Tan nyivi yucú tsitsi cuhu ña cua cunuhu jihna ñi cunaquihin ñi jahma ñi.

<sup>19</sup> Ndahvi ñiñaha tsa ñuhú sehe quiivi can! O tatun iyó sehe ñi tsa tyaxín, jndahvi ñi can!

<sup>20</sup> Ndacan ndo tsi Nyoo na ña tahan tsi cunu ndo quiivi vitsin, tan ndi quiivi quitatú yo.

<sup>21</sup> Tyin tundoho tsa cua nyehe nyivi quiivi can, ñaha ca maa coo can nda quiivi tsa tsinú ñuhu ñayivi. Tan ndi ityi nuu ca ña cua nyehe nyivi tun- doho tacan inga tsaha.

<sup>22</sup> Tyin tatun ña cua janducuti Nyoo quiivi can, yoñi maa cua cacu.



Maa tyin cua janducuiti ra tsa cuenda tsa cuñi ra tsi nyivi nacatsi maa ra.

<sup>23</sup> "Tatun yoo cua cahan tsihin ndo: "Jihna ndo, ihya nyaá ra Cristo" o "Nyehe ndo, ndacan nyaá ra Cristo", ña tsinu iñi ndo.

<sup>24</sup> Tyin cua quitsi ra jandavi ñaha naha ra tan cua catyi ra naha tyin ra Cristo cuví ra naha. Cua catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatyin cuvi jaha ra naha.

<sup>25</sup> Vaha tyin tsa tsitó ndo vityin ihya, jaha ndo cuenda tsi ndo quivi can.

<sup>26</sup> Yacan cuenda tatun catyi nyivi tsihin ndo: "Nyehe ndo, va ra Cristo nyii nu tsiqui can", Ña cahun ndo. O tatun catyi ñi tsihin ndo: "Nyehe ndo, nyii ra tsitsi quartu ihya", ña tsinu iñi ndo.

<sup>27</sup> Tyin tumaa tsa cañi tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayi tsa quee nda gloria.

<sup>28</sup> Tumaa natacá nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

*Nacaa cua quitsi Rayi tsa quee nda gloria inga tsaha*

(Mr. 13.24-37; Lc. 21.25-33; 17.26-30, 34-36)

<sup>29</sup> "Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihi tsa iyó andivi cua nacanda.

<sup>30</sup> Tacan tan cua quituvi seña ityi andivi tyin vatsi yuhu Rayi tsa quee nda gloria. Cua quitsi yu nu vico ityi andivi tsihin tunyee iñi cahnu tan tsihin tsa cahnu cuví Nyoo. Tan tandihi nyivi iyó nu ñuhu ñayivi, cua vacu tsa xaan ñi tsa cua nyehe ñi tsi yu.

<sup>31</sup> Tan cuaha ángel cuenda yu cua jaquitsi yu tyin ñihi cua tivi ra naha cutu tan cua jandu iin ra naha tsi nyivi nacatsi maa Nyoo. Cua quita

ñi tani cahnu nu ñuhu ñayivi, nda cuanda nu ndihi ñuhu ñayivi tan nda cuanda nu ndihi andivi.

<sup>32</sup> 'Cutuñi iñi ndo iin cuhva yutun tsa nañi higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun.

<sup>33</sup> Tan juvin ñi tacan, tatun tsa cuví tandihi yacan nyehé ndo, cua coto ndo tyin tsa cuyatyn quitsi yu; tan tsa nyanaá yu yuvehe cuví tsi.

<sup>34</sup> Tsa nditsa catyi yu tsihin ndo tyin tandihi yacan cua cuvi jihna, tsa ndi cumañi ca cúu nyivi iyó nu ñuhu ñayivi.

<sup>35</sup> Tan coo quivi cua cunaa andivi tan tsihin ñuhu ñayivi, maa tyin tuhun caahan yuhu, ña cua cundihí tsi tyin cua cundaa tandihi tsi.

<sup>36</sup> "Maa tyin quivi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

<sup>37</sup> "Tumaa cuví quivi tsa tsicoo ra Noé, tacan cua cuvi quivi tsa cua quitsi nyico yuhu Rayi tsa quee nda gloria.

<sup>38</sup> Quivi tsa ndi cumañi ca cuun savi xaan, nyivi can, tsatsi ñi, tsihi ñi, tindahá ñi, tan tsahá ñi tsi sehe sihi ñi tindaha nda cuanda quivi quihvi ra Noé tsitsi yutun ndoo.

<sup>39</sup> Tan sana iñi ñi tan tsa savi tan tañi tandihi ñi. Tan tacan sana iñi ñi tan cua tahan tsi quivi quitsi nyico yuhu Rayi tsa quee nda gloria.

<sup>40</sup> Tan tatun yucú uvi taahan rayi tsitsi cuhu quivi can, intuhun ñi ra cua quihin yu, tan cua naco yu tsi inga ra.

<sup>41</sup> Tan quivi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña.

<sup>42</sup> Cuatu vaha ndo tyin ña tsitó ndo náa hora cua quitsi ra ndacá ñaha tsi ndo.

<sup>43</sup> Tan coto ndo tuhun ihya tyin tatun iin tsitoho vehe tan tsitó ra náa cuhva cua quihvi ñasuhu tsitsi vehe ra, cua cuatu vaha ra tan ña cua cuhva ra tsa quihvi ñasuhu can.



44 Yacan cuenda nyooho, cuatu vaha ndo. Tyin sana iñi ndo, tan cua quitsi nyico yuhu Ray# tsa quee nda gloria.

*Musu vaha tan musu ña vaha*  
(Lc. 12.41-48)

45 'Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihí ca musu.

46 Tan s*i* xaan cuñí ra cuví musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihí tsa taahán tsi ica ra.

47 Tan tsa nditsa catyí yu tsihin ndo, tyin tsitoho ra cua nacuhva ra tandihí cuii tsa cumí ra, cua quihí ndaha ra, tyin vaha tyaá yahvi ra tsihin tyiñu jahá ra.

48 Maa tyin iin musu ña vaha tsicá iñi ra tyin cua cucuee tsitoho ra.

49 Tacan tan quitsaha cañí ra tsi inga musu, tan tsatsí ra tan tsihí ra nyixi tsihin ra tsiñi naha ra.

50 Tacan tan sana iñi ra tan cua tsa tsitoho ra quiví tsa ña ndatú ra tsi ra, tan hora tsa ña tsitó ra.

51 Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyiví tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuví nuhu ra tsa nyehé ra tundoho.

## 25

*Nu cahan ra Jesús iin cuhva cuenda utsi taahan ñaha yoco*

1 'Tsa ndacá ñaha Nyoo tsi nyiví cuví tsi tumaa utsi taahan ñaha yoco tsa quihin lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha.

2 Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi.

3 Ñi tsa soho ñuhú iñi can, nyisó ñi lámpara ñi maa tyin ña quihin ñi juhva ca acetye tsa natyihí ñi tsitsi lámpara ñi tatun ndihí tsi.

4 Tan ñi tsa catsi tsicá iñi can, nyisó s*i*in ñi inga yutyi acetye tsa cua natyihí ñi tsitsi lámpara can tatun ndihí acetye tsa yihí tsitsi lámpara can.

5 Tan ra tsa cua tindaha can cucueé xaan ra, tacan tan t*i*n ñumaahna tsi tandihí ñi, tan quixi ñi.

6 Tacan tan maa ñuu tsiñi ñi iin ndusu tsa catyí tyehen: “¡Tsa vatsí ra tsa cua tindaha! ¡Quita ndo, jatahan ndo tsi ra!”

7 Tandihí ñi can nduvita ñi tan quitsaha janduvahá ñi lámpara ñi.

8 Tacan tan quitsaha caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñí ndahva lámpara ndi”, catyí ñi.

9 Maa tyin ñi yoco tsa catsi tsicá iñi can nacahan ñi tyehen: “Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo kujata ndo nu cuyahví tsi.”

10 Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaá ra tsa cua tindaha can. Tan ñi yoco tsa ndatú vaha can, quihv*i* ñi tsihin ra tsitsi vehe nu cua coo vico tindaha. Tan tsicundas*i* yu-vehe can.

11 Yahá can tan tsaá nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quihv*i* ndi!”, catyí ñi.

12 Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

13 Tacan tan quitsaha caahán ra Jesús:

—Cuatu vaha ndo, tyin ña tsitó ndo ndáa quiví tan náa hora cua quitsi nyico yuhu Ray# tsa quee nda gloria.

*Nu caahán ra Jesús tsihin yo na jaha tyiñu yo tsihin tsa tsaha Nyoo tsi yo*

(Lc. 19.11-27)

14 'Tsa ndacá ñaha Nyoo tsi nyiví cuví tsi tumaa iin ray# tsa nyaá cua quita cuhun inga ñuu nu cañi. Tan cana ra tsi musu ra, tan tsaha cuenda ra xuhun ra tsi ra naha tyin jaha cuenda ra naha.

<sup>15</sup> Iin ra tsaha ra uhun mil xuhun, tan inga ra tsaha ra uvi mil xuhun, tan inga ra tsaha ra iin mil. Tsaha ra tsi intuhun intuhun ra nácaa cuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra.

<sup>16</sup> Musu tsa quihín uhun mil xuhun can, ñihi jaha tyiñu ra tsihin xuhun can, tan jaha canaa ra inga uhun mil ca siqui tsi.

<sup>17</sup> Tan juvin ñi tacan tucu ra tsa quihín uvi mil can, jaha canaa ra uvi mil ca tsihin xuhun can.

<sup>18</sup> Maa tyin ra tsa quihín intuhun ñi mil can, tsahan ra tan tsatya ra iin yavi tsitsi ñuhu tan tyihí xeehe ra xuhun tsitoho ra.

<sup>19</sup> 'Cuaha quivi yaha tan tsa nyico tsitoho musu can. Tan quitsaha natavá cuenda ra tsihin intuhun intuhun ra naha.

<sup>20</sup> Jihna ca ra tsa quihín uhun mil xuhun can tsa, tan nacuhva cuenda ra uhun mil ca siqui can, tan catyí ra: "Taa, uhun mil tsaha un tsi yu, juhun inga uhun mil ihya tsa jaha canaa yu siqui tsi."

<sup>21</sup> Tan tsitoho ra catyí ra tsihin ra: "Vaha. Iin musu vaha xaan cuví un. Tan javaha un tandihí tsa cahán yu tsihin un. Luxu ñi xuhun tsaha yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihví nu vaha ihya, tan sii cuñi un tsihin yu."

<sup>22</sup> Yaha can tan tsa musu tsa quihín uvi mil xuhun can, tan catyí ra: "Taa, uvi mil ñi tsaha un tsi yu, juhun uvi mil ca ihya tsa jaha canaa yu siqui tsi."

<sup>23</sup> Tan catyí tsitoho ra tsihin ra: "Vaha. Iin musu vaha xaan cuví un, tan javaha un tandihí tsa cahán yu tsihin un. Luxu ñi xuhun tsaha yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihví nu vaha ihya, tan sii cuñi un tsihin yu", catyí ra.

<sup>24</sup> Tan cuhva tsa tsa musu tsa quihín intuhun ñi mil xuhun can, catyí ra tsihin tsitoho ra: "Taa, yuhu tsitó yu tyin xaan xaan un tan cuñi un

naquihín un xuhun nu ña jahá tyiñu un, tan cuñi un naquihin un cosecha nu ña tatsí un.

<sup>25</sup> Yacan cuenda nayuhví yu tan tsahan yu tan tyihí xeehe yu xuhun un tsitsi ñuhu. Juhun xuhun ihya tsa tsaha un tsi yu", catyí ra.

<sup>26</sup> Tacan tan nacahan tsitoho ra, tan catyí ra tsihin ra: "Musu ña vaha cuví un, tan musu jutsan cuví yooho. Tatun tsitó un tyin naquihín yu nu ña jaha tyiñu yu, tan quihín yu cosecha nu ña tatsí yu,

<sup>27</sup> ¿nácaa tyin ña tsityihí un xuhun yu nu banco? Tun tsatyin tacan javaha un, tsa cua quitsi nyico yu cuví naquihin yu xuhun can tsihin xuhun siqui tsa jaha canaa tsi", catyí ra.

<sup>28</sup> Tacan tan quitsaha caahán ra tsihin ra tsa yucú can naha ra: "Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil.

<sup>29</sup> Tyin nyivi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyivi tsa ña cuñi jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndihí yu.

<sup>30</sup> Tan musu tsa ña tsiñí ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsa ra, tan cahyu ña cua cuví nuhu ra tsihin tsa nyehé ra tundoho."

### *Nu cahán ra Jesús tyin cua cutuñi tandihí nyivi*

<sup>31</sup> 'Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu sii caá tan cua cundaca ñaha yu.

<sup>32</sup> Tandihí cuivi nyivi iyó naní cahnu nu ñuhu ñayivi cua nataca ñi nuu yu. Tan cua natava sijn yu tsi intuhun intuhun ñi, tumaa ra jahá cuenda mbee tavá sijn ra tsi mbee ticatyí tan tavá sijn tucu ra tsi mbee chivo.

<sup>33</sup> Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu.

<sup>34</sup> Tacan tan yuhu tsa cuví yu Rey cua catyi yu tsihin nyívi nyecú tsiyo cuaha yu: “Naha nyooho nyívi tsa nasoco Jutu yu. Na quíhin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihya quívi javahá ra ñuhu ñayívi.

<sup>35</sup> Tyin quívi tsioco yu, nyooho tsahá ndo tsa tsatsi yu. Quívi na ityi ñi yu, tsahá ndo ndutya tsihi yu. Tan quívi tsicá nuu yu cuví yu ra inga ñuu, tsahá ndo nu quixi yu.

<sup>36</sup> Quívi cumañi jahma yu, tsahá ndo jahma tsinditsi yu. Quívi cuhvi yu, tsinyehe ndo nu canyi yu. Tan quívi tsinyi yu vehe caa, tsinyehe ndo nu nyi yu”. Tacan cua cahan yu tsihin ñi.

<sup>37</sup> Tan ñi tsa vaha ñi can cua ndaca tuhun ñi tsi yu, tan catyi ñi: “Jutu Mañi yu, ¿ama nyehe ndi tsioco un, tan tsahá ndi tsa tsatsi un? ¿Ama nyehe ndi na ityi ñi un tan tsahá ndi tsa tsihi un?

<sup>38</sup> ¿Ama nyehe ndi tsi un tsicá nuu un cuví un ra inga ñuu tan tsahá ndi vehe nu quixi un? ¿Ama cumañi jahma un, tan tsahá ndi jahma tsinditsi un?

<sup>39</sup> ¿Ama nyehe ndi cuhvi un, o tsinyi un vehe caa, tan tsahan ndi tsinyehe ndi tsi un?” cua catyi ñi.

<sup>40</sup> Tan yuhu tsa cuví Rey cua catyi yu tsihin ñi: “Tsa nditsa catyi yu tsihin ndo, tyin tandihi tumañi ñi tsa javahá ndo tsi ra ndaahvi, ra yañi yu, tsi yuhu javahá ndo tumañi ñi”, cua catyi yu tsihin ñi.

<sup>41</sup> Tacan tan yuhu tsa cuví Rey cua cahan yu tsihin nyívi tsa yucú tsiyo satyin yu tyehen: “Catsiyo ndo nuu yu, nyooho, nyívi taahan tsi cahun anyaya. Cuaahan ndo nu ñuhu tsa ña cua ndahva maa. Tsinu anyaya can tyin ican cua coo nu ña vaha tan taty ña vaha cuenda nu.

<sup>42</sup> Tyin tsioco yu tan nyooho ña tsahá ndo tsa catsi yu. Na ityi ñi yu tan ña tsahá ndo ndutya coho yu.

<sup>43</sup> Tsicá nuu yu cuví yu iin ra inga ñuu, tan ña tsahá ndo nu cusu yu.

Cumañi jahma yu tan ña tsahá ndo jahma cunditsi yu. Nacuhvi yu tan tsinyi yu vehe caa, maa tyin ña tsahan ndo tsinyehe ndo tsi yu nu tsinyi yu”, cua catyi yu tsihin ñi.

<sup>44</sup> Tacan tan cua catyi ñi tsihin yu: “Jutu Mañi yu, ¿ama nyehe ndi tsioco un, o na ityi ñi un, o tsicá nuu un cuví un ra inga ñuu, o nduve jahma un, o nacuhvi un, o tsinyi un vehe caa, tan ña jatinye ndi tsi un?” cua catyi ñi.

<sup>45</sup> Tan yuhu tsa cuví yu Rey cua catyi yu tsihin ñi: “Tsa nditsa caahan yu tsihin ndo tyin tandihi maa tsa ña javahá ndo tsihin nyívi ndaahvi ihya, ña javahá ndi ndo tsihin yu, cuví can”, cua catyi yu tsihin ñi.

<sup>46</sup> Tacan tan ñi can cua cahun ñi nu cayú ñuhu tsa ña cua ndahva maa. Tan nyívi vaha can cua cahun ñi coo ñi ñayívi nyito tsa ña cua naa maa.

## 26

*Nu nducú ra mandoñi naha ra cuhva nácaa tan tñn ra naha tsi ra Jesús (Mr. 14.1-2; Lc. 22.1-2; Jn. 11.45-53)*

<sup>1</sup> Cuhva tsa ndihi cahan ra Jesús tandihi tuhun can, tan quitsahá catyi ra tsihin ra tsicá tsihin ra:

<sup>2</sup> —Nyooho tsitó ndo tyin ndi cumañi uvi ca quívi tan tahan tsi vico pascua. Tan yuhu, Rayi tsa quee nda gloria, cua cuhva cuenda nyívi tsi yu na tyaa ra cumi tyiñu tsi yu nu cruu —catyi ra.

<sup>3</sup> Quívi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu.

<sup>4</sup> Tan jandaa ra naha tyiñu nácaa cua jandavi ñaha ra naha tsi ra Jesús tan tñn ra naha tsi ra tan cahñi ra naha tsi ra.

<sup>5</sup> Tan catyi ra naha:

—Ña cua cahñi yo tsi ra quívi maa vico, coto nduvaa xaan nyívi —catyi ra naha.

*Nu tyosó iin ñaha ndutya tami jiñi ra Jesús*

*(Mr. 14.3-9; Jn. 12.1-8)*

<sup>6</sup> Ra Jesús nyii ra ñuu Betania, vehe ra Simón, ra tsa yihí cuehe tyaahyu.

<sup>7</sup> Tan natuhva iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyoso ña ndutya can jiñi ra.

<sup>8</sup> Tsa nyehe ra tsicá tsihin ra, nduxaan ra naha tan catyí ra naha:

—¿Nacuenda jativí ña ndutya tami can?

<sup>9</sup> Vaha ca tun tsatyin xico ña can, tan ñihi cuaha ña xuhun tsihin can. Tan cuvi jatyinyee ña tsi nyivi ndaahvi tsihin xuhun can —catyí ra naha.

<sup>10</sup> Tan tsa tsiñi ra Jesús tsa caahán ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi.

<sup>11</sup> Tyin nyivi ndaahvi tandihí ñi quivi cua coo ñi tsihin ndo, maa tyin yuhu, ña naha ca cua cunyi yu tsihin ndo.

<sup>12</sup> Tyoso ña ndutya tami siqui cuñu ñuhu yu, tyin janduvaha ña itsi tyin cua cahun tsi tsitsi ñuhu.

<sup>13</sup> Tsa nditsa catyí yu tsihin ndo, tyin tandihí ñi nu cua cahan nyivi tuhun Nyoo tani cahnú ñuhu ñayivi, cua nacatyí tuhun tucu ñi tsa javaha ñaha ihya, na nducuhun iñi nyivi tsi ña —catyí ra Jesús.

*Nu xico ra Judas Iscariote tsi ra Jesús*

*(Mr. 14.10-11; Lc. 22.3-6)*

<sup>14</sup> Tacan tan iin ra tsicá tsihin ra Jesús, ra tsa nañi Judas Iscariote, tsahan ra tsicahan ra tsihin ra jutu tsa cuví ityi nuu naha ra.

<sup>15</sup> Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsaha ra naha oco utsi xuhun cuitsin tsi ra.

<sup>16</sup> Tan nda quivi can tan quitsaha nducú ra Judas cuhva cua nacuhva cuenda ra tsi ra Jesús tsi ra jutu can naha ra.

*Nu cuxiñi ra Jesús tsihin ra tsicá tsihin ra*

*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup> Quivi jihna ñi tsa quitsaha vico nu tsatsí nyivi paan tsa nduve yut-san iya yihí, ra tsicá tsihin ra Jesús natuhva ra naha nu nyaá ra tan quitsaha tsicá tuhun ra naha tsi ra tan catyí ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

<sup>18</sup> Tan catyí ra Jesús tsihin ra naha:

—Cuaahan ndo tsitsi ñuu nda vehe rayi ihya. Tan catyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnú ndi vico pascua”, catyí ndo tsihin ra —catyí ra Jesús.

<sup>19</sup> Tacan tan javaha ra naha cuhva cahan ra Jesús tsihin ra naha. Tan janduvaha ra naha tsa cuxiñi ra naha vico pascua can.

<sup>20</sup> Tsa cunaaha tan tsicunyaá ra Jesús nu mesa tsihin tandihí utsi uvi ra tsicá tsihin ra.

<sup>21</sup> Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyoocho cua xico ndo tsi yu tsi ra xaan iñi tsi yu.

<sup>22</sup> Tan nducuihya xaan cuñi ra naha, tan quitsaha tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

<sup>23</sup> Tan nacahan ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu.

<sup>24</sup> Yuhu, Rayi tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacú ra —catyí ra Jesús.

<sup>25</sup> Tacan tan nacahan ra Judas, ra tsa xico tsi ra, tan catyí ra:



—Maestro, ¿a yuhu cuví can?

Tan nacahan ra Jesús, tan catyí ra:

—Juvín un.

<sup>26</sup> Tsitsi tsa tsatsí ra naha, ra Jesús quihín ra paan tan nacuhva ra tyahvi nyoo tsi Nyoo, tan tsahnú sava ra, tan tsaha ra tsi ra tsicá tsihin ra, tan catyí ra tsihin ra naha:

—Catsi ndo. Paan ihya cuví tumaa cuñu ñuhu yu.

<sup>27</sup> Yahá can tan quihín tucu ra vasu vinu, tan nacuhva ra tyahvi nyoo tsi Nyoo, tan jayahá ra tsi tandihí ra naha tan catyí ra:

—Coho tandihí ndo vinu ihya.

<sup>28</sup> Tyín cuví tsi tumaa niñi yu. Tan tsihin niñi yu cua cundaa tyiñu tsa ndoo Nyoo tsihin ndo, tyín cua cati niñi yu tsa cuenda tsa vaha tsi nyivi cuaha, tyín tsihin niñi yu cua coo tuc-ahnu iñi cuatyí ñi.

<sup>29</sup> Tan catyí yu tsihin ndo, tyín ña cua coho ca yu tahan vinu tsa cuví ndutya uvas ihya, nda cuanda tsa coho yu vinu tsa tsihin ndo nda nu ndacá ñaha Jutu yu gloria —catyí ra.

*Nu cahan ra Jesús tyín cua cahan ra Pedro tyín ña nacotó ra tsi ra*

(Mr. 14.26-31; Lc. 22.31-34; Jn. 13.36-38)

<sup>30</sup> Tsa yahá tsa tsita ra naha iin yaa Nyoo, tan cuahán ra naha yucu Olivo.

<sup>31</sup> Tacan tan quitsaha caahán ra Jesús tsihin ra naha:

—Tandihí nyooho tan cua nacoo ihñi ndo tsi yu vityín tsacuaa ihya. Tyín nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi.

<sup>32</sup> Maa tyín tsa yahá nandoto yu, jihna ca yu cua cuhun Galilea, tsa ndi cumañi ca cuhun nyooho.

<sup>33</sup> Tacan tan nacahan ra Pedro tan catyí ra:

—Vasu ndi maa tandihí ra tan ndu uvi iñi ra naha tsa nyicún ra naha tsi un, maa tyín yuhu ña cua ndu uvi iñi yu.

<sup>34</sup> Tacan tan catyí ra Jesús tsihin ra:

—Tsa nditsa catyí yu tsihin un tyín juvin ñi maa tsacuaa vityín, tsa ndi

cumañi ca vacu tsitooho, uñi tsaha cua cahan un tyín ña nacotó un tsi yu —catyí ra Jesús.

<sup>35</sup> Tan ra Pedro catyí ra:

—Vasu ndi maa cúu yu tsihin un, maa tyín ña cua catyí yu tyín ña nacotó yu tsi un —catyí ra.

Tan juvin ñi tacan catyí tandihí ca ra tsicá tsihin ra.

*Nu tsican tahvi ra Jesús tsi Nyoo nda Getsemaní*

(Mr. 14.32-42; Lc. 22.39-46)

<sup>36</sup> Tacan tan tsaá ra Jesús tsihin ra tsicá tsihin ra iin nu iyó cuaha yutun nu nañi Getsemaní, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

<sup>37</sup> Tan quihín ra tsi ra Pedro tan nduvi sehe ra Zebedeo cuahán tsihin ra. Tan quitsi tucuiihya iñi cahnu tsi ra, tan tsa tuñu cuñi ra.

<sup>38</sup> Tacan tan catyí ra tsihin ra naha: —Cahnu xaan tucuiihya iñi nyaá añima yu, nda cuanda cuñi cahñi ña can tsi yu. Ndo ndo ihya tan coo nyito ndo tsihin yu —catyí ra.

<sup>39</sup> Tacan tan cuahán ra Jesús luxu ca ityi nuu tan tsicuiñi tsiti ra tan tsaquin ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyín cuví jatsiyo nyaha un tundoho ihya siqui yu, vaha xaan. Maa tyín na ña cuví cuhva cuñi maa yu, tan na cuví cuhva cuñi maa un —catyí ra.

<sup>40</sup> Tacan tan tsaá ra nu yucú ra tsicá tsihin ra, tan nyehe ra tyín quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora?

<sup>41</sup> Coo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyín añima ndo, cuñi xaan tsi nanducu tsi tsi Nyoo, maa tyín cuñu ñuhu ndo cuví tsa vita cuñi —catyí ra Jesús.

<sup>42</sup> Tan tsa tsahan ra tsa tsinu uvi tsaha, tsican tahvi ra tyehen:



—Tyaa, tatun ña cuvi tsa jatsiyo nyaha un tundoho ihya siqui yu, na cuvi cuhva cuñi maa un —catyí ra.

<sup>43</sup> Tacan tan tsaá ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñi xaan ra naha cusu ra naha.

<sup>44</sup> Tacan tan nacoó ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsican tahvi ra tsi Nyoo juvin ñi maa tsihin tuhun tsa tsa yaha cahan ra.

<sup>45</sup> Tacan tan tsaá nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tsa tsaá cuhva tsa cua nacuhva cuenda ra can tsi Rayi tsa quee nda gloria tsi ra iyó cuatyí naha ra.

<sup>46</sup> Nduvita ndo, cohon ndo. Tyin tsa vatsí ra tsa xico tsi yu —catyí ra Jesús.

*Nu tsaha cuenda ra Judas tsi ra Jesús tsi nu xaan iñi tsi ra nahnu*

(Mr. 14.43-50; Lc. 22.47-53; Jn. 18.2-11)

<sup>47</sup> Ndi caahán ca ra Jesús yacan, tan tsaá ra Judas, ra tsa cuví iin ra tsicá tsihin ra Jesús. Tan tsihin ra Judas tsaá tucu cuaha xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyivi Israel naha ra.

<sup>48</sup> Tan ra Judas, ra tsa tsahá cuenda tsi ra Jesús, tsa yaha tsaha ra iin seña tsi ra can naha ra, tyin coto ra naha yóo cua tñin ra naha. Tyin tsa yaha cahan ra tsihin ra naha:

—Ra tsa cua tyayuhu yu, ra ican cuví ra tsa cua tñin ndo.

<sup>49</sup> Tacan tan natuhva ra Judas nu nyaá ra Jesús tan catyí ra:

—Nacumi tsi un, Maestro. Tan tyayuhu ra tsi ra.

<sup>50</sup> Tacan tan nacahan ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhva ra can naha ra tan tñin ra naha tsi ra Jesús.

<sup>51</sup> Tacan tan iin ra cutahán tsihin ra Jesús, tava ra mityi tan tsahnya ra soho musu jutu tsaahnu tsa cuví ityi nuu.

<sup>52</sup> Tan catyí ra Jesús tsihin ra:

—Natyihi mityi un tsitsi vena un. Tyin tandihi nyivi tsa cañi tahan tsihin mityi, juvin ñi tsihin mityi cua cúu ñi.

<sup>53</sup> ¿A ña tsitó un tyin tatun yuhu tan cuñi yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu?

<sup>54</sup> Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

<sup>55</sup> Tacan tan catyí ra Jesús tsihin tandihi nyivi:

—¿A vatsí tñin ndo tsi yu tumaa cua tñin ndo iin ñasuhu? tyin ndahá ndo mityi tan yutun. Tandihi quivi tsinyii yu jacuhá yu tsi ndo tsitsi vehe ñuhu cahnu, tan ña tñin ndo tsi yu.

<sup>56</sup> Tandihi yacan cuví tyin tacan tan cundaa cuhva catyí tuhun Nyoo, tsa tyaa ra cuví ndusu yuhu Nyoo tahan tsanaha.

Tacan tan tandihi ra tsicá tsihin ra, tsinu ra naha. Tan ndoo intuhun ña maa ra.

*Nu tsica tuhun ra mandoñi naha ra tsi ra Jesús tatun Sehe Nyoo cuví tsi ra*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Tan ra tsa tñin tsi ra Jesús, tsindaca ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra.

<sup>58</sup> Tan ra Pedro cuahán ra tsata ra naha, tan tsaá ra nda nuquehe vehe ra Caifás can. Tan quihvi ra tan ndoo ra nyii ra tsihin vitya can naha ra, tyin cua nyehe ra nácaa cua quita tuhun can.

<sup>59</sup> Ra jutu tsa cuví ityi nuu naha ra, tan ra mandoñi naha ra, tan tandihi ra cumí tyiñu naha ra, nducu ra naha tsi ra cahan cuendu siqui ra Jesús. Tyin tacan tan cuvi cahni ra naha tsi ra.

<sup>60</sup> Maa tyin ña ñihi maa ra naha cuatyí tyaa ra naha siqui ra, vasu ndi maa cuaha nyivi tsahan ñi tsicahan

ñi cuendu siqui ra. Tan nu ndihi tuhun, tsaḡ uvi ca tsa ndaa tsa caahán cuendu.

<sup>61</sup> Tan catyí ra naha:

—Ra ihya, catyí ra tyin cuví cani ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyí ra naha.

<sup>62</sup> Tacan tan ra jutu tsa cuví ityi nuu can, nduvita ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

<sup>63</sup> Maa tyin ra Jesús ña nacahan ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

<sup>64</sup> Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayii tsa quee nda gloria, cun-yaa yu xiin cuaha Nyoo ra iyó tandihi tunyee iñi, tan cua nyehe ndo nu cua quitsi yu nu vico ityi andivi inga tsaha —catyí ra.

<sup>65</sup> Tacan tan ra jutu tsaahnu tsa cuví ityi nuu can tsahnya ra jahma ra tumaa iin seña tyin cuñí maa ra tyin ña vaha tsa caahán ra Jesús, tan catyí ra tsihin tandihi ca ra naha:

—Ra ihya tsicoḡ cuatyí ra nuu Nyoo tsihin tsa caahán ra. ¡Nyehe ndo vityin! Ña cuñí ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra.

<sup>66</sup> ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cúu ra.

<sup>67</sup> Tacan tan tiví sii ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui.

<sup>68</sup> Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

*Nu cahan ra Pedro tyin ña nacotó ra tsi ra Jesús*

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Tsitsi tsa ndi nyii ra Pedro nuquehe ityi tsata vehe can, tan iin ñaha tsa cuví musu jutu can, natuhva ña nu nyaá ra tan catyí ña tsihin ra:

—Yooho tucu tsicaḡ un tsihin ra Jesús, ra Galilea can.

<sup>70</sup> Tan ra Pedro catyí ra nuu tandihi nyivi yucú can:

—Ña tsicaḡ yu tsihin ra can. Ña tsitó yu náa caahán un.

<sup>71</sup> Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsicaḡ ndihi tucu ra ihya tsihin ra Jesús, ra ñuu Nazaret —catyí ña.

<sup>72</sup> Tan inga tsaha tyihí xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

<sup>73</sup> Tañi cuii ca, tan ra yucú can natuhva ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

<sup>74</sup> Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvín ñi cuhva can navacu tsi-tooho.

<sup>75</sup> Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho, yooho tsa yaha cahan un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quita ra ican, tan tsacuḡ xaan ra tsa cuihya cuñi ra tsa javaha ra tacan.

## 27

*Nu nacuhva cuenda ra naha tsi ra Jesús tsi ra Pilato*

(Mr. 15.1; Lc. 23.1-2; Jn. 18.28-32)

<sup>1</sup> Tan tsa tuv̄i inga quiv̄i, tandih̄i ra jutū tsa cuv̄i ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús.

<sup>2</sup> Tan nuuhñi ra jahā ra naha. Tan tsahan ra naha tsinacuhvā cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

### *Nu tsihi ra Judas*

<sup>3</sup> Tsa nyehe ra Judas, ra tsa xico tsi ra Jesús, tyin cua cúu ra, tan ndu uv̄i iñi ra tsa javahā ra, tan nacuhvā ra tsa oco utsi xuhun cuitsin can tsi ra jutū tsa cuv̄i ityi nuu naha ra, tan tsi ra mandoñi ñuu naha ra.

<sup>4</sup> Tan catyí ra:

—Tsicoo cuatyí yu, tyin tsahā cuenda yu tsi iin ra nduve cuatyí na cúu ra.

Tan nacahan ra naha tan catyí ra naha:

—¿Nacuenda nyuhu? ¡Nyehe maa yooho!

<sup>5</sup> Tacan tan tyoso ihñi ra Judas xuhun can tsitsi vehe ñuhu cahnu, tan quita ra cuahán ra tsityih̄i ra yoho jucun ra tan ticaā ra tsi ra iin nu yutun, tan tsih̄i ra.

<sup>6</sup> Ra cuv̄i ityi nuu tsihin jutū can naha ra naquih̄in ra naha xuhun can tan catyí ra naha:

—Ña cuv̄i tyih̄i yo xuhun ihya tsitsi caja nu yih̄i xuhun tsa tsahá nyiv̄i tsi Nyoo tyin xuhun tsa cuyahv̄i ra tsa cua cati niñi cuv̄i can.

<sup>7</sup> Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyiv̄i inga ñuu tun tsihiñi ñi ñuu can.

<sup>8</sup> Yacan cuenda nañi ñuhu can nda cuanda vityin “Ñuhu Cuenda Tsa Tsati Niñi Nyiv̄i”.

<sup>9</sup> Tacan cuv̄i tyin cundaā tsa tyaa ra Jeremías, ra cuv̄i ndusu yuhu Nyoo tahan tsanaha nu catyí tsi tyehen: “Juv̄in ñi maa ra naha quih̄in nyico tsa oco utsi xuhun cuitsin, tsa jata ra naha tsi ra Cristo.

<sup>10</sup> Tan tsihin can, jata ra naha ñuhu tsa nañi “Ñuhu Ra Javahá Quisi”, tacan catyí Jutu Mañi yo tsihin yu”, catyí tsi.

### *Nu nyehe ra Pilato tyin nduve cuatyí ra Jesús*

(Mr. 15.2-5; Lc. 23.3-5; Jn. 18.33-38)

<sup>11</sup> Tsindaca ra mandoñi can naha ra tsi ra Jesús nuu ra ndacá ñaha, tan ra can tsica tuhun ra tsi ra, tan catyí ra:

—¿A yooho cuv̄i rey cuenda nyiv̄i Israel?

Tan ra Jesús catyí ra tsihin ra:

—Juv̄in yu, tumaa cuhva catyí maa un.

<sup>12</sup> Tan cuhva tsa tyaa ra jutū can naha ra tan ra mandoñi naha ra cuatyí siqui ra, ña nacahan maa ra.

<sup>13</sup> Tacan tan catyí ra Pilato tsihin ra: —¿A ña tsiñi un tandih̄i tsa caahán ra naha siqui un?

<sup>14</sup> Maa tyin ra Jesús ña nacahan maa ra. Tan iyo xaan cuñi ra ndacá ñaha can tyin ña nacahan ra.

### *Nu cahan ra cumí tyiñu tyin taahán tsi cúu ra Jesús*

(Mr. 15.6-20; Lc. 23.13-25; Jn. 18.38—19.16)

<sup>15</sup> Tan vico pascua tuhvā ra ndacá ñaha jañá intuhun ra yucú vehe caa. Ndáa ra tsa nacatsi maa nyiv̄i, juvin ra cua quita nuña.

<sup>16</sup> Tan quiv̄i can nyii iin ra tsa nañi Barrabás vehe caa. Tan tandih̄i nyiv̄i tsitó tuhun ra.

<sup>17</sup> Tan cuhva tsa ndu iin nyiv̄i, ra Pilato tsica tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

<sup>18</sup> Tyin tsitó ra tyin tsa cuenda tsa ndasi cuñi ra jutū can naha ra nyehe ra naha tsi ra Jesús, yacan cuenda tsahā cuenda ra naha tsi ra tsi ra Pilato.

<sup>19</sup> Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyih̄i un tsi un tsihin ra vaha can. Tyin cuñi nyehe yu ñumaahna tsa cuenda

ra. Tan jayuhv̄i xaan tsi tsi yu”, catyí ña.

<sup>20</sup> Maa tyin ra jutu can naha ra tan ra mandoñi naha ra, cuñih̄i ra naha natyuhú ra naha tsi nyiv̄i na ndacan ñi tsa jaña ra Pilato tsi ra Barrabás, tan na cúu ra Jesús.

<sup>21</sup> Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahan̄ ñi, tan catyí ñi:

—Jaña tsi ra Barrabás.

<sup>22</sup> Tan ra Pilato tsic̄a tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandih̄i ñi nacahan̄ ñi tan catyí ñi:

—¡Tyaa tsi ra nu cruu na cúu ra!

<sup>23</sup> Tacan tan catyí ra Pilato tsihin ñi:

—Tan ¿náa tsa ña vaha javaha ra?

Maa tyin maa ñi canā tsaa ñi inga tsaha tan catyí ñi:

—¡Tyaa tsi ra nu cruu na cúu ra!

<sup>24</sup> Tsa nyehē ra Pilato tyin ña cuv̄i jaha ra tsi nyiv̄i, tyin ñihi xaan cuvaá jahá ñi. Tacan tan tsican̄ ra ndutyá, tan nacatyá ra ndaha ra nuu nyiv̄i can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyooho cua ndoo cuatyí can.

<sup>25</sup> Tan tandih̄i nyiv̄i nacahan̄ ñi, tan catyí ñi:

—Na ndoo maa tsi siqui ndi tan siqui sehe ndi.

<sup>26</sup> Tacan tan ra Pilato jañā ra tsi ra Barrabás, tan tavā tyiñu ra na ndoho ra Jesús, tan nacuhvā cuenda ra tsi ra tsi ra andaru naha ra na cúu ra nu cruu.

<sup>27</sup> Tacan tan ra andaru cuenda ra Pilato, ra ndacá ñaha can tsindacā ra naha tsi ra Jesús nda vehe tyiñu ra Pilato, tan jandu iin ra naha tsi tandih̄i ca andaru nu nyaá ra.

<sup>28</sup> Tacan tan tavā ra naha jahma ra tan jacunditsī ra naha iin jahma cuaaha tsi ra.

<sup>29</sup> Tan tyih̄i ra naha iin corona tsa tsinū tsihin iñu jiñi ra. Tan tsahā ra naha iin yutun tatun na cundaha ra

tsihin ndaha cuaaha ra. Tacan tan tsicuiñī tsiti ra naha nuu ra, tan tsacū nducu ra naha tsi ra tan catyí ra naha:

—¡Nacumi tsi un, yooho Rey cuenda nyiv̄i Israel!

<sup>30</sup> Tan tiv̄i sī ra naha tsi ra. Tan quih̄in ra naha yutun tatun can tan cañī ra naha jiñi ra.

<sup>31</sup> Tsa yahā tsa tsacū nducu ra naha tsi ra tan tavā ra naha jahma cuaaha tsa nditsī ra, tan jacunditsī nyico ra naha jahma maa ra tsi ra. Tacan tan cuahan̄ ra naha tsihin ra cua cahñī ra naha tsi ra nu cruu.

*Nu tyaā ra naha tsi ra Jesús nu cruu (Mr. 15.21-32; Lc. 23.26-43; Jn. 19.17-27)*

<sup>32</sup> Tsa quitā ra naha ican, tahan̄ ra naha tsi iin ra ñuu Cirene, tsa nañi Simón. Tan jañiñī ra naha tsi ra na cuiso ra cruu ra Jesús.

<sup>33</sup> Tan tsaā ra naha iin nu nañi Gólgota, tan cuñī tsi catyí “Yiqui Jiñi Ndiȳi”.

<sup>34</sup> Tan ican tsahā ra naha vinu nasacā tsihin ndutyá uva xaan coho ra Jesús. Tan tsa yahā tsa tsih̄i ra luxu can, ña cuñī ca ra coho ra.

<sup>35</sup> Tan tsa yahā tsa tyaā ra naha tsi ra nu cruu, tacan tan ra andaru can quih̄in ra naha jahma ra tan tavā cuenda ra naha tyin cua nyehē ra naha ndáa ra jaha canaa intuhun intuhun jahma ra. Tacan cuv̄i tyin cundā tuhun tsa tyaā iin ra cuv̄i ndusu yuhu Nyoo tahan̄ tsanaha nu catyí tsi tyehen: “Tavā cuenda ra naha tan tsatsā ra naha jahma yu”, catyí tsi.

<sup>36</sup> Tacan tan tsinyecū ra naha ican tyin jaha cuenda ra naha tsi ra.

<sup>37</sup> Tan ityi jiñi ra tyaā ra naha letra tsa catyí nacuenda cua cúu ra. Tan catyí tsi tyehen: “Ra ihya cuv̄i ra Jesús, rey cuenda nyiv̄i ñuu Israel.”

<sup>38</sup> Tan tyaā tucu ra naha uvi taahan ra suhu tsihin ra nu uvi taahan ca cruu. Iin ra tyaā ra naha xiin cuaaha ra, tan inga ra xiin satyin ra.

<sup>39</sup> Tan nyiv̄i tsa yahā ican, caahan̄ ñi tsi ra, tan javicó ñi jiñi ñi tsa tsacū nducu ñi tsi ra.

<sup>40</sup> Tan catyí ñi tsihin ra:

—jYooho tsa cahān un tyin cua canī un vehe ñuhu cahnu, tan tsitsi tsa uñi quivī tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuvī tsi un! —catyī ñi tsihin ra.

<sup>41</sup> Tan juvin ñi tacan tsacú nducu ra jutu tsa cuvī ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyī ra naha:

<sup>42</sup> —Jacacu ra tsi inga nyivi, maa tyin ña cuvī jacacu ra tsi maa ra. Tun nditsa tyin Rey cuenda nyivi Israel cuvī ra, na nuu ra nu cruu can, tan cua tsinu iñi yo tsi ra.

<sup>43</sup> Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyī ra tsihin yo tyin Sehe Nyoo cuvī tsi ra.

<sup>44</sup> Tan nda cuanda nu ñasuhu nahnu tsa nyaá nu cruu xiin ra tan tsacu nducu ndihi nahnu tsi ra.

#### *Nu tsihi ra Jesús*

(Mr. 15.33-41; Lc. 23.44-49; Jn. 19.28-30)

<sup>45</sup> Tacan tan ndunaā taniī cahnu ñuhu ñayivi tsa ora tan nda cuanda caa uñi tsa tseñi.

<sup>46</sup> Tan juvin ñi cuhva can, ñihi xaan canā tsaa ra Jesús. Tan catyī ra:

—Elí, Elí, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenda nacoq ihñi un tsi yu?

<sup>47</sup> Juhva ra yucú can naha ra, tsiñi ra naha tsa cahān ra, tan catyī ra naha:

—Ra Elías, ra cuvī ndusu yuhu Nyoo tsanaha, caná tsaa ra.

<sup>48</sup> Tan juvin ñi cuhva can, cuahán iin ra cua quihin ra iin yahma cuhva caá catyi, tan jatyi ra tsihin vinu iya, tan tyaa ra nu yutun, tan jatuhva ra yuhu ra Jesús tyin na coho ra.

<sup>49</sup> Maa tyin inga ra naha catyī ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

<sup>50</sup> Inga tsaha canā tsaa ñihi ra Jesús, tacan tan tsihi ra.

<sup>51</sup> Tan juvin ñi cuhva can ndata sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan taan. Tan tahvi cuatyī cava nahnu.

<sup>52</sup> Tan nuña yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi.

<sup>53</sup> Tan tsa yahā nandoto ra Jesús quita ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi.

<sup>54</sup> Tacan tan ra capitán tan ra andaru tsa jahá cuenda tsi ra Jesús, nayuhvi xaan ra naha tsa taan, tan tsa nyehe ra naha inga ca tsa cuvī. Tan catyī ra naha:

—Nditas nditsa cuii, tyin Sehe Nyoo cuvī tsi ra ihya.

<sup>55</sup> Cuaha ñiñaha tsa tsinyicun tsi ra Jesús nda Galilea tan jatinyee ñi tsi ra, yucú ñi nyehe ñi ndasava.

<sup>56</sup> Tan juhva ñi ican cuvī ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

#### *Nu tsicutsi ra naha tsi ra Jesús*

(Mr. 15.42-47; Lc. 23.50-56; Jn. 19.38-42)

<sup>57</sup> Cuhva tsa cuñi cuaa, quitsi iin ra cuca tsa nañi José, ra ñuu Arimatea. Tan tsinú iñi ra tsi ra Jesús.

<sup>58</sup> Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra.

<sup>59</sup> Tacan tan quihin ra José cuñu ñuhu ra, tan cava nuu ra iin jahma cuitsin vaha tsi ra.

<sup>60</sup> Tan tyihī ra cuñu ñuhu ra Jesús tsitsi iin ñaña tsaa tsa cuvī iin yavi yuu tsa tava tyiñu ra tsatya ra naha. Tan tsa yahā tsa nacasi ra yuhu ñaña can tsihin iin yuu cahnu, tan cuahán ra.

<sup>61</sup> Tan ña María tsa quee Magdala, tan inga ña María, ndoo ñi yucú ñi yuhu ñaña can.

*Nu jahá cuenda ra andaru ñaña ra Jesús*



<sup>62</sup> Tan tsa inga quivi, quivi quitatú nyivi cuví can, tan ra jutu tsa cuví ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato.

<sup>63</sup> Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tahan nyito ra tyin tsa yaha tsa uñi quivi tsa cua cúu ra tan cua nandoto ra.

<sup>64</sup> Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cuhun ra tsica tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuvi, yaha ca cuhva cua cuvi tan ñavin ca tsa jihna ñi —catyí ra naha.

<sup>65</sup> Tan ra Pilato catyí ra:

—Quihin ndo andaru ihya. Cuaahan ndo, tan jaha cuenda vaha ndo ñaña can, nácaa cunye maa ndo jaha cuenda ndo —catyí ra.

<sup>66</sup> Tacan tan cuahan ra naha, tan jaha cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndasí can tyin tatun nacanda yuu can coto ra naha. Tan nacoo ra naha tsi ra andaru jahá cuenda ra naha ican.

## 28

### *Nu nandoto ra Jesús*

(Mr. 16.1-8; Lc. 24.1-12; Jn. 20.1-10)

<sup>1</sup> Tsa yaha quivi tsa quitatú nyivi, cuhva tsa cuñí cunditsin, nu quit-saha tsaha vitya, tan ña María tsa quee Magdala can, tan inga ña María tsahan ñi nu ñaña.

<sup>2</sup> Tan ñihi xaan taan tyin quitsi iin ángel Jutu Mañi yo quee ra andivi, tan tsaá ra nu ñaña can. Tan jatsiyoo ra yuu tsa ndasí yuhu can, tan tsicunyaá ra tsata can.

<sup>3</sup> Tan xiñu xaan ra, tumaa tsa cañi tatsa. Tan cuitsin xaan jahma ra.

<sup>4</sup> Cuhva tsa nyehe ra andaru can naha ra tsi ra, nayuhvi xaan ra naha tan quitsaha níhi ra naha, tan nda cuanda tsihi naaha ra naha tsihin tsa yuuhví ra naha.

<sup>5</sup> Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo.

<sup>6</sup> Yoñi ca ra nyii ihya, tyin tsa nandoto ra, tumaa catyí ra. Naha ndo tan nyehe ndo nu tinyii ra naha tsi ra.

<sup>7</sup> Janumi xaan ndo cuhun ndo cucatyí tuhun ndo tsihin ra tsica tsihin ra tyin tsa nandoto ra, tan tsa cuahan ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

<sup>8</sup> Tacan tan numi ñi quita ñi nu ñaña can. Yuuhví ñi, tan sii xaan cuñi tucu ñi. Tan tsinú xaan ñi cuahan ñi cua catyí tuhun ñi tsihin ra tsica tsihin ra Jesús.

<sup>9</sup> Tan cuhva can quituvi ra Jesús nuu ñi tan tsaha ra nacumi tsi ñi. Tacan tan natuhva ñi nu nyaá ra tan tsicuiñi tsiti ñi nuu ra tan jacahnu ñi tsi ra, tan tsicunumi nyaá ñi tsaha ra.

<sup>10</sup> Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

### *Tuhun tsa nacatyí tuhun ra andaru naha ra*

<sup>11</sup> Tsitsi tsa cuahan ñi can, juhva andaru tsa jahá cuenda ican, cuahan ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra.

<sup>12</sup> Tacan tan ra jutu can naha ra tsahan ra naha tsicahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsaha ra naha tsi ra andaru can naha ra.

<sup>13</sup> Tan catyí ra naha tsihin ra naha: —Nyooho cua cahan ndo tyin tsa tsacuaa tsitsi tsa quixí ndo, tsahan ra tsica tsihin ra Jesús tan quihin ra naha cuñu ñuhu ra.

<sup>14</sup> Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho

ña caca ñi ndo. Nduve náa cua tahan ndo.

<sup>15</sup> Tacan tan quih̄in ra andaru can xuhun can, tan cuahán ra naha cua-javahá ra naha cuhva catȳi ra naha tsihin ra naha. Tan nda quiv̄i vityin tan tacan caahán nyiv̄i ñuu Israel.

*Nu tavā tyiñu ra Jesús tsi ra tsicá tyiñu ra*

*(Mr. 16.14-18; Lc. 24.36-49; Jn. 20.19-23)*

<sup>16</sup> Tan tacan, tandih̄i tsa utsi iin ra tsicá tsihin ra, cuahán ra naha nda Galilea nda yucu nu catȳi maa ra Jesús tsihin ra naha tyin cuhun ra naha.

<sup>17</sup> Tan cuhva tsa nyehē ra naha tsi ra Jesús, jacahn̄u ra naha tsi ra, maa tyin juhva ra naha uvi ñi tsicá ñi ra naha.

<sup>18</sup> Tacan tan natuhvā ra Jesús nu nyecú ra naha tan catȳi ra tsihin ra naha:

—Nyoo tsahā ra tsa cundaca ñaha yuhu tandih̄i andiv̄i tan nu ñuhu ñayiv̄i ihya.

<sup>19</sup> Yacan cuenda, cuaahan ndo tandih̄i nu iyó nyiv̄i, tandih̄i ñi ñuu, tan catȳi ndo tsihin ñi na cunycun ñi tsi yu. Tan jacoondutya ndo tsi ñi tsihin siv̄i Jutu yo Nyoo tan tsihin siv̄i yuhu Sehe ra, tan tsihin siv̄i Tatȳi li ra.

<sup>20</sup> Tan jacuaha ndo tsi ñi na tyaa yahvi ñi tandih̄i tsa catȳi yu tyin javaha ndo. Tan coto ndo tyin yuhu cunyaa yu tsihin ndo tandih̄i quiv̄i nda cuanda naa ñayiv̄i —catȳi ra Jesu-cristo tsihin ra tavā tyiñu ra.

Tan na cuvi tsi tacan ñi.

## Tuhun Nyoo Tsa Tyaa ra Marcos

*Nu caahán ra Juan, ra jacoondutya tsi nyivi, tuhun Nyoo*

*(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Tyehen quitsaha tuhun ra Jesucristo, Sehe Nyoo.

<sup>2</sup> Tسانaha ra Isaías, ra cuvi ndusu yuhu Nyoo, tyaa ra nácaa cua quitsi ra Jesucristo, Sehe Nyoo. Tan catyi tsi tyehen:

Cua jacuhun yu iin ra cua jacoto tsi nyivi

na janduvaha ñi tsi ñi tsa ndi cumañi ca cuhun un nu yucú ñi, catyi Nyoo tsihin ra Cristo.

<sup>3</sup> Cua tyaa soho yo ndusu ra nu cana tsa ra nu tsiqui, tan catyi ra:

“Nuña ndo iin ityi cuii

tan natyiso vaha ndo tsi ndo tyin tsa vatsi Jutu Mañi yo”, catyi tuhun tsa tyaa ra Isaías.

<sup>4</sup> Tacan cuvi; quitsi ra Juan nu tsiqui, tan javaha ra cuhva tyaa ra Isaías. Catyi ra tsihin nyivi tyehen: “Ndu uvi iñi ndo cuaty ndo tan coondutya ndo tyin tacan tan jaha Nyoo tucahnu iñi tsi ndo tsa cuenda cuaty ndo.”

<sup>5</sup> Tan tandihi nyivi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uvi iñi ñi cuhva iyó ñi tan nahma ñi cuaty ñi nu Nyoo. Tacan tan tsicoondutya ñi yutya Jordán.

<sup>6</sup> Tan jahma ra Juan tsinu tsi tsihin ixi camellu. Tan cinturón ra cuvi ñi. Tan maa ñi tica xama tsatsi ra, tan tsihi ra ndutya ñuñu tsa iyó tsitsi cuhu.

<sup>7</sup> Caahán ra tuhun Nyoo tsihin nyivi tan catyi ra:

—Tsa yatyin cuii quitsi ra tsa cahnu ca cuvi tan ñavin ca yuhu. Tan ndi ña taahán tsi tsi yu tsa ndatsi yu ñi

nditsan ra, tyin cahnu ca cuvi maa ra tan ñavin ca yuhu.

<sup>8</sup> Yuhu jacoondutya yu tsi ndo tsihin ndutya ñi. Maa tyin maa ra cua jacoondutya ra tsi ndo tsihin Tatyí li Nyoo —catyi ra Juan.

*Nu tsicoondutya ra Jesús*

*(Mt. 3.13-17; Lc. 3.21-22)*

<sup>9</sup> Quivi can quita ra Jesús ñuu Nazaret, tsa canyi Galilea, tan cuahán ra nu nyi ra Juan yutya Jordán tyin jacoondutya ra tsi ra.

<sup>10</sup> Tsa quita ra Jesús tsitsi ndutya tsa yaha tsicoondutya ra, nuña andivi tan nyehe ra vatsi nuú Tatyí li Nyoo siqui ra tan caá tsi tumaa caá iin paloma.

<sup>11</sup> Tan nacahan iin ndusu ityi andivi tan catyi tsi tsihin ra tyehen:

—Yooho cuvi Sehe yu tan cuñi xaan yu tsi un. Tan si xaan cuñi yu nyehé yu tsi un —catyi ndusu can.

*Nu nducy cuhva nu ña vaha tsi ra Jesús*

*(Mt. 4.1-11; Lc. 4.1-13)*

<sup>12</sup> Tsa yaha tsa tsicoondutya ra Jesús tan tsindaca Tatyí li Nyoo tsi ra nu tsiqui.

<sup>13</sup> Tan tsinyi ra ican uvi xico quivi nu nduve nyivi iyó, maa ñi quití xaan iyó. Tan nducy cuhva nu ña vaha tsi ra. Yaha can tan tsaá ángel Nyoo tan jatyinye ra naha tsi ra.

*Nu quitsaha caahán ra Jesús tuhun Nyoo tsihin nyivi iyó Galilea*

*(Mt. 4.12-17; Lc. 4.14-15)*

<sup>14</sup> Tsa yaha tsa tyihí nyivi tsi ra Juan vehe caa, tan tsinuhu ra Jesús Galilea tan caahán ra tsihin nyivi nácaa ndaca ñaha Nyoo.

<sup>15</sup> Tan catyi ra:

—Tsa tsaá quivi tsa cua cundaca ñaha Nyoo tsi nyivi iyó nu ñuhu ñayivi ihya. Yacan cuenda ndu uvi iñi ndo cuaty ndo, tan tsinu iñi ndo tuhun tsa jacacú Nyoo tsi nyivi —catyi ra Jesús.

*Nu cana ra Jesús cumi taahan ra tñ tyaca*

*(Mt. 4.18-22; Lc. 5.1-11)*

16 Iin quiví cuahán ra Jesús tsicá ra yuhu miñi tsa nañi Nduya Ñuhu Galilea. Tan nyehe ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tñn tyaca cuví ra naha.

17 Tan catyí ra Jesús tsihin ra naha:

—Naha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tñn ndo tyaca ihya, tacan cua ñihi ndo nyiví cua cuví nyiví Nyoo —catyí ra Jesús tsihin ra Simón tan tsihin ra Andrés.

18 Juvín ñi cuhva can tan nacoq ra naha traya can, tan cuahán ra naha cuanyicún ra naha tsi ra.

19 Ña cuaha ñi tsicá ra naha, tan nyehe ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya.

20 Cana ra tsi nduvi taahan ra naha. Tan nacoq ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

*Nu quitá tatyí ña vaha tsi iin rayi*  
(Lc. 4.31-37)

21 Tsa tsaá ra Jesús ñuu Capernaum tsihin ra tsicá tsihin ra, quihví ra Jesús tsitsi vehe ñuhu quiví quitatú nyiví. Tacan tan quitsaha jacuahá ra tuhun Nyoo tsi nyiví.

22 Tan iyo xaan cuñi ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra.

23 Tan tsitsi vehe ñuhu can nyii iin ra yihí tatyí ña vaha. Tan cana tsa ra tan catyí ra:

24 —¿Nacuví tyihí un tsi un tsihin nyuhu, yoocho Jesús, ra ñuu Nazaret? ¿A vatsí un vatsí janaa un tsi ndi? Yuhu nacotó vaha yu tsi un, tan tsitó yu tyin Sehe Ii Nyoo cuví un —catyí ra can tsihin ra Jesús jahá nu tatyí ña vaha can.

25 Tacan tan nduxaan ra Jesús tsi nu tan catyí ra tsihin nu:

—¿Ña cahan ca un! ¡Quita tsi ra ihya! —catyí ra tsihin nu.

26 Tacan tan quitsaha ñihi rayi can jahá nu. Tan ñihi xaan cana tsa ra jahá nu, tan quitá nu tsi ra.

27 Tandihí nyiví iyo xaan cuñi ñi tan tsicá tuhun tahan ñi tsi ñi, tan catyí ñi:

—¿Naa cuví tsa nyehé yo ihya? ¿Naa tuhun tsa jacuahá ra ihya? ¡Tyin iyó vaha tunyee iñi tsi ra, nda cuando tatyí ña vaha tan tyaá yahvi tsi ra! —catyí ñi.

28 Tan numi ñi tsito nyiví iyó tandihí ñuu tsa cayucú Galilea tuhun ra Jesús.

*Nu nduvaha tyiso ra Simón Pedro*  
(Mt. 8.14-15; Lc. 4.38-39)

29 Tsa ndihí jacuahá ra Jesús tsi nyiví tsitsi vehe ñuhu, quitá ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra.

30 Tan ña tyiso ra Simón cuuhví ña tsihin cahñi canyí ña nu tsito. Tan catyí tuhun nyiví ña tsihin ra Jesús tyin cuuhví ña.

31 Tacan tan natuhva ra Jesús yuhu tsito nu canyí ña, tñn ra ndaha ña, tan cañihí ra tsi ña. Juvín ñi cuhva can, quitá cahñi tsi ña, tan quitsaha nanducú ña tsa catsi ra naha.

*Nu cuaha xaan nyiví cuuhví janduvaha ra Jesús*

(Mt. 8.16-17; Lc. 4.40-41)

32 Tsa tsa cuñi cuaa tsa tsa yaha tyiso ñicanyii, tandihí nyiví cuuhví tan nyiví yihí tatyí ña vaha tsindaca nyiví tsi ñi nu nyii ra Jesús.

33 Tan ndu iin tandihí nyiví ñuu can nu yucú ra naha.

34 Tan janduvaha ra tsi tandihí ñi tsa yihí siin siin cuehe, tan cuaha tatyí ña vaha tava ra. Maa tyin ña tsa ra tsa cahan tatyí ña vaha can, tyin tsitó nahnu yóo ra cuví ra.

*Nu tsicá ra Jesús caahán ra tuhun Nyoo tandihí ñuu tsa cayucú Galilea*

(Lc. 4.42-44)

35 Ra Jesús nduvita ra tsa ndi naa ca inga quiví, quitá ra ñuu can tan cuahán ra iin nu taxin caá cuandacán tahvi ra tsi Nyoo.

<sup>36</sup> Tsa nyehe ra Simón tyin nduve ra, tacan tan cuahán ra tsihin tandihi ca ra naha cuananducú ra naha tsi ra.

<sup>37</sup> Tan tsa nañihi ra naha tsi ra, catyí ra naha tsihin ra:

—Tandihí nyivi tan nanducú ñi tsi un —catyí ra naha.

<sup>38</sup> Maa tyin catyí ra tsihin ra naha: —Cohon ndo ñuu tsa cayucú yatyin ñi ihya, tyin cuñí tsi cahan ndihi yu tuhun Nyoo ican, tyin yacan tyiñu vatsí yu —catyí ra Jesús tsihin ra naha.

<sup>39</sup> Tan tacan tsicá ra Jesús caahán ra tuhun Nyoo tsihin nyivi tsitsi vehe ñuhu tan iin tan iin ñuu tsa cayucú Galilea. Tan tavá ra tatyí ña vaha tsi nyivi.

*Nu janduvaha ra Jesús tsi ra ndohó cuehe tyaahyú*

*(Mt. 8.1-4; Lc. 5.12-16)*

<sup>40</sup> Tsa ndi cuahán ra Jesús tsicá ra tan quita iin ra ndohó cuehe tyaahyú tsicuñi tsiti ra nuu ra, tan catyí ra tsihin ra:

—Tun yooho tan cuñí un, cuví janduvaha un tsi yu —catyí ra.

<sup>41</sup> Tan cundaahvi iñi ra Jesús nyehe ra tsi ra, tan tyiso ndaha ra jiñi ra, tan catyí ra tsihin ra:

—Cuñí yu janduvaha yu tsi un. Tan vityin tsa nduvaha un —catyí ra tsihin ra.

<sup>42</sup> Tsa cahan ra Jesús tacan tsihin ra, juvin ñi cuhva can tan nduvaha ra.

<sup>43</sup> Tacan tan catyí ra Jesús tyin tsa cuvi cunuhu ra, maa tyin cahan vaha xaan ra tsihin ra na javaha ra tyehen:

<sup>44</sup> —Coto catyí tuhun un tsihin nyivi yoo janduvaha tsi un. Maa tyin cūaahan nu nyaá ra cuví jutu, tan janaha un tsi un tsi ra. Tan cuhva tsa catyí ra Moisés tyin cuhva ndo tsa cuenda tsa nduvaha ndo tun cuhvi ndo. Yacan cua cuvi tsa ndaa tsi ra jutu tan tsi nyivi tyin tsa nduvaha un —catyí ra Jesús tsihin ra.

<sup>45</sup> Maa tyin ra ican cuahán ra, tan quitsaha catyí tuhun ra tsihin tandihi nyivi nácaa nduvaha ra. Yacan cuenda ña cuvi ca quihvi nditsin ra Jesús tsitsi ndi intuhun maa ñuu.

Tan tsicá ra ityi tsata ñuu ñi nu nduve nyivi iyó, maa tyin tandihi ñi ityi tan quita nyivi, tan tsinyehe ñi tsi ra.

## 2

*Nu janduvaha ra Jesús tsi iin ra xii (Mt. 9.1-8; Lc. 5.17-26)*

<sup>1</sup> Tsa yaha juhva quivi tan cuahán ra Jesús ñuu Capernaum inga tsaha. Tan tsa tsito nyivi tyin tsaá nuhu ra yuvehe ra,

<sup>2</sup> iin yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi.

<sup>3</sup> Tacan tan tsaá cumi taahan rayii nyisó ra naha iin ra xii. Cuñí ra naha cuhun ra naha tsihin ra nda nu nyaá ra Jesús.

<sup>4</sup> Maa tyin ña cuvi yaha ra naha yuvehe tan cuhun ra naha nu nyaá ra Jesús tyin cuaha xaan nyivi nyecú yuvehe can. Yacan cuenda ndaa ra naha jiñi vehe, tan jatsiyó ra naha juhva tyiyo ndihi cuhva nu nyaá ñi ra Jesús. Tacan tan januu ra naha tsi ra cuuhvi can nu nyaá ra Jesús tsihin iin tsito.

<sup>5</sup> Tsa nyehe ra Jesús tyin tsinú xaan iñi ra can naha ra, catyí ra tsihin ra cuuhvi can:

—Vityin, tsa jaha yu tucahnu iñi tsi un tsa cuenda tandihi cuatyí un —catyí ra Jesús tsihin ra.

<sup>6</sup> Tan nyecú juhva ra cuví maestro cuenda ley vehe ñuhu naha ra ican, tacan tan quitsaha tsicá iñi ra naha tuhun ihya:

<sup>7</sup> “¿Nacuenda tyin caná iñi ra ihya caahán ra tyehen? Tan intuhun ñi maa Nyoo cuví ra jaha tucahnu iñi tsi yo. Tsicoo cuatyí ra nuu Nyoo tsa cuenda tsa caahán ra tacan”, cuñí ra naha, tsicá iñi ra naha.

<sup>8</sup> Maa tyin ra Jesús iin yaha ñi tuví iñi ra cuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

<sup>9</sup> ¿Náa yí ca cahan yo; “Cuatyí un tsa yaha ndatsi”, o catyí yo: “Nduvita, naquihin tsito un tan caa?”



10 Vaha. Cua janaha yu tsi ndo tyin yuhu, tsa cuví yu Rayi quee nda gloria, iyó ndatu tsi yu nu ñuhu ñayivi ihya tsa jaha yu tucahnu iñi tsi nyivi tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

11 —Catyí yu tsihin un; nduvita, naquihin tsito un, tan cuanuhu yuvehe un —catyí ra Jesús tsihin ra.

12 Tan iin yaha ñi nduvita ra cuuhví can, naquihin ra tsito ra, tan cuanuhu ra. Tan iyo xaan cuñi tandihi maa nyivi tsa nyehe can, tan quitsaha jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

*Nu cana ra Jesús tsi ra Leví  
(Mt. 9.9-13; Lc. 5.27-32)*

13 Tsa yaha yacan tan cuahan ra Jesús yuhu miñi inga tsaha. Tacan tan tsa cuaha nyivi nu nyii ra, tan quitsaha jacuahá ra tsi ñi.

14 Tsa ndihi jacuahá ra tsi ñi, tan cuanuhú ra. Tan tsa cuahan ra yaha ra nu nyaá vehe nu tyahví nyivi xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra:

—Cohon tsihin yu.

Tacan tan nduvita ra Leví, tan cuahan ra tsihin ra.

15 Yaha can tan cuahan ra Jesús cuacatsí ra yuvehe ra Leví tsihin ra tsicá tsihin ra. Tsinyaa ra nu mesa tan tsinyecu ndihi tucu ra tavá xuhun cuenda ra ndacá ñaha tan inga ca nyivi iyó cuatyí. Tyin cuaha xaan nyivi nyicún tsi ra.

16 Maa tyin tsa nyehe ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihí ra maestro ndo tsihin ra tavá xuhun tan ra iyó cuatyí?

17 Tsa tsiñi ra Jesús tsa cahan ra naha tan catyí ra:

—Yuhu ña vatsí yu vatsí jatyinyee yu tsi nyivi cuñi tyin vaha iyó ñi; vatsí yu vatsí jatyinyee yu tsi nyivi tsitó tyin iyó cuatyí ñi tumaa nyivi cuuhví, tyin nyivi cuuhví tsiñi ñuhu doctor tsi ñi. Maa tyin nyivi vaha cuñi, ña tsiñi ñuhu doctor tsi ñi —catyí ra Jesús tsihin ra naha.

*Nu tsica tuhun nyivi tsi ra Jesús tun taahan tsi coo nyitya ñi  
(Mt. 9.14-15; Lc. 5.33-35)*

18 Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyivi nu nyii ra Jesús, tan tsica tuhun ñi tsi ra, tan catyí ñi:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyí ñi.

19 Nacahan ra Jesús tan catyí ra:

—¿A cuví coo nyitya nyivi yucú nu iyó vico tindaha tun ndi nyii ra cua tindaha tsihin ñi? Ña cuví coo nyitya ñi tun ndi nyii ra tsihin ñi.

20 Maa tyin coo quivi ña cua cunyii ca ra tsihin ñi. Tacan tan cua coo nyitya ñi —catyí ra Jesús tsihin ñi.

*Nu caahan ra Jesús tyin ña nacatsi tahan tuhun tsahnu tsa iyó nyivi tsihin tuhun tsa jacuahá ra tsi ñi  
(Mt. 9.16-17; Lc. 5.36-39)*

21 Tan catyí ra Jesús:

—Ña tuhvá nyivi natyaá jahma tsaa iin jahma tuuhu, tyin jahma tsaa can cua nandiyi can tan cua nducahnu ca nu ndata jahma tuuhu can jaha can.

22 Tacan tucu ñi ñi yihí vinu tun tyihí yo vinu tsaa tsitsi ñi tsahnu cua ndata ñi can, tan cua cati vinu can tan cua tiví can. Yacan cuenda cuñi tsi tsa tyihí yo vinu tsaa tsitsi ñi tsaa —catyí ra Jesús.

*Nu jocón ra tsicá tsihin ra Jesús yoco trigu quivi quitatú nyivi  
(Mt. 12.1-8; Lc. 6.1-5)*

23 Iin tsaha yaha ra Jesús tsitsi tsa tatsi nyivi tan cuví tsi quivi quitatú

ñi. Tan tsa yaha ra tsicá tsihin ra quitsaha tuhún ra naha yoco trigu.

<sup>24</sup> Tacan tan tsa nyehe ra fariseo naha ra can quitsaha caahán ra naha tsihin ra Jesús:

—¡Nyehe tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quivi ihya —catyí ra naha.

<sup>25</sup> Tan nacahan ra Jesús tsihin ra naha:

—¿A ñaha ca cahvi ndo nu tutu nu tsahá cuenda tsi tsa javaha ra David tan ra cutahán tsihin ra quivi tsisoco ra naha?

<sup>26</sup> Ra David quihvi ra tsitsi vehe Nyoo quivi cuvi ra Abiatar jutu tsaahnu cuvi ityi nuu. Tan quihin ra paan ii, tsa taahán tsi catsi maa ñi maa ra jutu naha ra. Maa ra tan tandihi ra cutahán tsihin ra tsatsi ra naha paan can —catyí ra Jesús.

<sup>27</sup> Tacan tan catyí ra Jesús tsihin ra naha:

—Nyoo javaha ra quivi quitatú yo tyin tacan tan cuvi quitatu cuñu ñuhu yo; tan ñavin maa yo tsinu tsa cuenda quivi quitatú yo.

<sup>28</sup> Yacan cuenda yuhu tsa cuvi yu Rayi quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

### 3

#### *Nu nduvaha ra na ityi iin ndaha (Mt. 12.9-14; Lc. 6.6-11)*

<sup>1</sup> Tsa quihvi ra Jesús inga tsaha tsitsi vehe ñuhu, nyii iin ra na ityi iin ndaha ican.

<sup>2</sup> Tan ra cuvi fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuvi tsi quivi quitatú nyivi. Tyin tun cua janduvaha ra tsi ra can, tacan tan cua cuvi tyaa ra naha cuatyí siqui ra.

<sup>3</sup> Tacan tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihya.

<sup>4</sup> Tacan tan tsica tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quivi quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyivi, o cahñi yo tsi ñi? —catyí ra Jesús.

Maa tyin ña nacahan ra naha.

<sup>5</sup> Tacan tan nanyehe xaan ra Jesús nuu ra naha, tan nducuihya cuñi ra tyin ña cuñi ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvaha ndaha ra.

<sup>6</sup> Tacan tan quitá ra fariseo naha ra, tan quitsaha natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

#### *Nu cuaha xaan nyivi cuahán cuanyehé nu nyii ra Jesús yuhu miñi*

<sup>7</sup> Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha.

<sup>8</sup> Tsa tsito nyivi tyin nahnu xaan tsa iyo javahá ra, cuaha ñi tsahan nu nyii ra tyin cuñi ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihi ca ñuu tsa cayucú yatyin nu cayucú nduvi ñuu can.

<sup>9</sup> Tsa nyehe ra Jesús tsaá nyivi, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuvi ca nyivi, cuvi quihvi ra tsitsi yutun ndoo can tyin tacan tan ña cua tindahñi ñi tsi ra.

<sup>10</sup> Tsa cuaha xaan nyivi janduvaha ra, yacan cuenda tsahan cuaha ca nyivi cuuhví nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi.

<sup>11</sup> Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuñi

tsiti ñi, tan nu tatyí ña vaha tsa yihí tsi ñi cana tsaa nu tan catyí nu tsihin ra:

—¡Yooho cuví Sehe Nyoo!

<sup>12</sup> Tan tandihí ñi cuhva tsa caahán tatyí ña vaha yóo ra cuví ra, tyasí ra nu cahan nu.

*Nu nacatsi ra Jesús tsi utsi uvi ra caca tyiñu ra*

(Mt. 10.1-4; Lc. 6.12-16)

<sup>13</sup> Tsa yahá yacan tan ndaa ra Jesús iin yucu tan cana ra tsi ra tsa cuñi maa ra cana ra. Tacan tan cuahán ra naha nu nyii ra.

<sup>14</sup> Tan tsitsi tsa tandihí ra tsa cana ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo.

<sup>15</sup> Tan tsaha ra ndatu tsi ra naha tsa janduvaha ra naha tsi nyivi cuuhví, tan tava ra naha tatyí ña vaha yihí tsi nyivi.

<sup>16</sup> Ihya nyecú sivi ra naha: ra Simón, tsa jacunañi tucu ra Jesús Pedro;

<sup>17</sup> tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyí: “ra caahán tumaa ñihi caahán savi”.

<sup>18</sup> Tan tandihí ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cuhun cuatyí siqui ñuu Roma tsa ndacá ñaha tsi ñi;

<sup>19</sup> tan ra Judas Iscariote, tsa xico tsi ra Jesús.

Tsa yahá yacan tan cuahán ra Jesús tsitsi iin vehe tsihin ra tsicá tsihin ra.

*Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo*

(Mt. 12.22-32; Lc. 11.14-23; 12.10)

<sup>20</sup> Tan nducuahá nyivi nu yucú ra naha inga tsaha, tan nda cuanda ña cuyatyí ca ra naha catsi ra naha.

<sup>21</sup> Tsa tsito nyivi ra Jesús tyin nyii ra ican, tsahan ñi tsiquihin ñi tsi ra tyin cunuhu ra tsihin ñi, tyin catyí nyivi tsihin ñi tyin ndusaná iñi ra.

<sup>22</sup> Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaa ra naha nu nyii ra Jesús tan catyí ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihí tatyí ña vaha —catyí ra naha.

<sup>23</sup> Tsa tuví iñi ra Jesús tyin tacan caahán ra naha, cana ra tsi ra naha tan tsaha ra iin cuhva tsi ra naha, tan catyí ra tsihin ra naha:

—¿A cuví tavá nu ña vaha juvín ñi maa tahan nu? Ña cuví.

<sup>24</sup> Tyin tun ra ndacá ñaha naha ra tan cua natahvi sava ra naha, tan cua quitsaha cañi tahan ra naha, cua cundihí tsa ndacá ñaha ra naha.

<sup>25</sup> Tacan tucu ñi tun nyivi iyó iin caa ñi iin vehe tan cañi tahan ñi, cua cusin ñi tan ña cua cuví coo vaha ñi.

<sup>26</sup> Tan tun nu ña vaha tan ndusin nu tan nduvita iin nu siqui inga nu, ¿náa cua tahan nahnu? Cua ndusin nahnu tan cua cundihí nahnu.

<sup>27</sup> Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuhni jihna ra tsi ra. Maa ñi cuñi tsi cuhni jihna ra tsi ra jatsii vehe can tan cuví quihvi ra suhu ra tsa tsii ra.

<sup>28</sup> Tsa nditsa catyí yu tsihin ndo tyin cuví coo tucahnu iñi tsi nyivi tsa cuenda tandihí nuu cuatyí javahá ñi, tan tsa cuenda tucu tsa caahán ñi tsa ña vaha.

<sup>29</sup> Maa tyin tun cahan ñi ndavaha ñi siqui Tatyí Ii Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyí ra Jesús.

<sup>30</sup> Tacan cahan ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

*Nu catyí ra Jesús tyin nyivi tyaa yahvi tuhun Nyoo, juvín ñi cuví yañi ra, tan sihi ra*

(Mt. 12.46-50; Lc. 8.19-21)

<sup>31</sup> Tacan tan tsaa sihi ra Jesús tan yañi ra nu nyii ra, maa tyin ndoo ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús.

<sup>32</sup> Tan catyí nyívi nyecú naníi can-duvi xiin ra Jesús tsihin ra:

—Sihí un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

<sup>33</sup> Maa tyin catyí ra:

—¿Yóo cuví sihi yu tan yañi yu?

<sup>34</sup> Tacan tan nanyehé ra naníi can-duvi nu nyaá ra, tan catyí ra:

—Nyívi nyecú ihya cuví sihi yu, yañi yu tan cuhva yu.

<sup>35</sup> Tyin tandíhi nyívi javahá cuhva cuñí Nyoo, juvin ñi cuví yañi yu, cuhva yu tan sihi yu —catyí ra Jesús.

## 4

*Nu caahán ra Jesús tyin ra caahán tuhun Nyoo cuví ra tumaa iin ra tatsí (Mt. 13.1-9; Lc. 8.4-8)*

<sup>1</sup> Quitsaha jacuahá ra Jesús inga tsaha yuhu miñi. Tan cuaha xaan nyívi ndu iin nu nyíi ra. Tan tsa cuenda tsa cuaha xaan ñi cuví, quíhví ra tsitsi yutun ndoo tsa canyíi nu ndutya yuhu miñi can, tan tsinyaa ra tsitsi can. Tan ndoo tandíhi maa nyívi nu nyíti.

<sup>2</sup> Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

<sup>3</sup> —Tyaa soho ndo tsa cua cahan yu. Iin ra quitá ra yuvehe ra. Tan cuahán ra cua tatsí ra trigu nu ñuhu ra.

<sup>4</sup> Tan cuhva tsa quití ra tsiti trigu can, cucoyo juhva tsi yuhu ityi. Maa tyin quítsi saa tan tsatsi ti naha ti itsi.

<sup>5</sup> Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi caná tsiti can tyin ña cuaha nyahyu yihí tyañu yuu can.

<sup>6</sup> Maa tyin tsa caná ñicanyii, iin yaha ñi na ityi tsi tyin ña cunu cuahán yoho tsi.

<sup>7</sup> Tan juhva ca tsiti can cucoyo tsi tyañu iñu. Quívi caná tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahní can trigu can. Yacan cuenda ña tsaha trigu can tsiti.

<sup>8</sup> Maa tyin juhva ca tsiti can cucoyo tsi nu ñuhu vaha. Caná tsi tan tsahnú tsi, tan cuaha tsiti tsaha tsi. Tyin tsa

intuhun tsiti can, tsaha tsi oco utsi tsiti tsitsi yoco tsi. Tan inga tsiti can tsaha tsi uñi xico, tan inga tsi tsaha tsi iin cientu —catyí ra Jesús tsihin ñi.

<sup>9</sup> Tan catyí nyico ra tsihin ñi:

—Nyooho tsa iyó soho, tyaa soho ndo tsa caahán yu.

*Nu tsahá cuenda ra Jesús nacuenda jacuahá ra tsi nyívi tsihin cuhva (Mt. 13.10-17; Lc. 8.9-10)*

<sup>10</sup> Tsa yaha yacan tan ndoo maa ña ra Jesús tsihin ra tsicá tsihin ra tan nyívi nyicún tsi ra. Tan tsicá tuhun ñi:

—¿Náa cuñi tsi catyí tsa cahan un nañi?

<sup>11</sup> Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyívi jacotó yu can tsi ñi tsihin cuhva ñi tyin ña cuñi ñi cunyicun vaha ñi tsi yu.

<sup>12</sup> Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñi iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ra Jesús tsihin ñi.

*Nu tsahá cuenda ra Jesús tsa cuñi tsi catyí tuhun ra tatsí (Mt. 13.18-23; Lc. 8.11-15)*

<sup>13</sup> Tan catyí ndíhi ra tsihin ñi:

—Tun ña cutuñi iñi ndo tuhun cahan yu nañi, ndi ña cua cutuñi iñi ndo tandíhi ca tsa cua jacuahá yu tsi ndo tsihin cuhva ñi.

<sup>14</sup> Ra tatsí trigu can cuví ra caahán tuhun Nyoo.

<sup>15</sup> Yihí nyívi cuví ñi tumaa nu cucoyo tsiti trigu yuhu ityi tyin tsiñi ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi.

<sup>16</sup> Tan juhva nyívi cuví ñi tumaa nu cucoyo tsiti trigu tsata yuu tyin sii xaan cuñi ñi tsiñi ñi tuhun Nyoo juhva ñi quívi.

<sup>17</sup> Maa tyin ña ndoo tsi añima ñi tan ña cuví cuahnu ñi tan juhva ñi



quíví tsinú iñi ñi, yacan cuenda cuví ñi tumaa nu cucoyo tsítí tsata yuu tyin tsata yuu can luxu cuii ñi nyahyu yíhí. Yacan cuenda ña tsahnú tsi tyin ña ñihí tsi nu cuhun yoho tsi. Tacan cuví nyíví can, tyin quíví vatsí tundoho síqui ñi, tan caahán nyíví tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo.

<sup>18</sup> Tan juhva nyíví cuví ñi tumaa nu cucoyo tsítí tyañu iñu tyin tsiñí ñi tuhun Nyoo,

<sup>19</sup> maa tyin tsicá xaan iñi ñi tundoho ñayíví ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñí ñi coo tandihí tsa iyó nu ñuhu ñayíví ihya tsi ñi. Tan tandihí yacan jatyañú can tsi ñi, tan cuví ñi tumaa cuví yutun tsa ña tsahá tsítí.

<sup>20</sup> Maa tyin nyíví tsa tsiñí tuhun Nyoo tan naquihín vaha ñi itsi, tan javahá ñi tandihí tsa caahán tsi, juvin ñi cuví tumaa ñuhu vaha nu cucoyo tsítí can tyin tsítí tsa cucoyo can caná vaha tsi, tsahnú tsi, tan yíhí tsi tsahá tsi oco utsi tsítí. Inga tsi tsahá tsi uñi xico tsítí, tan inga tsi tsahá tsi cientu tsítí.

*Nu cahan ra Jesús tyin ña taahán tsi tyihí xeehe yo ñuhu Nyoo tsa janditsín añima yo coto quihin nyaa ra itsi (Lc. 8.16-18)*

<sup>21</sup> Tan catyí tucu ra tyehen tsihin ñi: —¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyíi yo can iin nu sucun tyin tacan tan janditsin can naní tsitsi vehe.

<sup>22</sup> Tyin nduve tsa yíhí xeehe tan ña cua quituvi, tan ndí tsa xeehe tan ña cua coto nyíví. Tyin tandihí maa tan cua quita nu nditsin tan coto yo can.

<sup>23</sup> Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

<sup>24</sup> Tan catyí tucu ra: —Tyaa soho vaha ndo tsa caahán yu tyin tun tyaá yahvi ndo tuhun tsiñí ndo, cuaha ca tsa cua cuhva Nyoo tsi ndo.

<sup>25</sup> Tyin nyíví tyaá soho tsa caahán yu, cuaha ca cua cuhva Nyoo tsi ñi.

Maa tyin nyíví tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yaha ñihí ñi.

*Nu tsahá ra Jesús iin cuhva nácaa tsahnú iin tsítí*

<sup>26</sup> Tan catyí tucu ra Jesús:

—Tsa ndacá ñaha Nyoo tsi nyíví cuví tsi tumaa tsítí tsa tatsí nyíví.

<sup>27</sup> Tyin nyíví tatsí ñi maa ñi tsítí can tan cuanuhú ñi yuvehe ñi. Tan tatun tsa yaha cuaha quíví tsa tatsí ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi,

<sup>28</sup> tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsahá tsi tsítí.

<sup>29</sup> Tan tatun tsa tsitsa tsítí tsi, tacan tan jocón ñi itsi tyin tsa tahañ maa tsi quíví coyo tsi —catyí ra Jesús.

*Nu caahán ra Jesús tyin tumaa cuví tsítí mostaza, tacan cuví tsa ndacá ñaha Nyoo tsi yo*

*(Mt. 13.31-32; Lc. 13.18-19)*

<sup>30</sup> Tan catyí tucu ra Jesús:

—¿Nacaa cuví tsa ndacá ñaha Nyoo tsi nyíví? ¿A cuví jandu inducu yo itsi tsihin náa tsihin? Cuví.

<sup>31</sup> Tyin cuví tsi tumaa iin tsítí mostaza tsa tatsí nyíví. Tsítí can cuví tsa nyihí ca tan ñavin ca tandihí ca tsítí tsa iyó nu ñuhu ñayíví.

<sup>32</sup> Maa tyin tsa yaha tatsi tsi, caná tsi tan ndunahnú tsi, tan cuví tsi yutun tumaa nducuaya. Ndunahnú soco tun, tan cuahán saa cua quitatu ti naha ti nuu tun.

*Nu tsahá cuenda ra Jesús nacuenda jacuahá ra tsi nyíví tsihin cuhva ñi*

*(Mt. 13.34-35)*

<sup>33</sup> Tacan jacuaha ra Jesús tsi nyíví, tsihin cuaha cuhva, ndihí cuhva cuví cutuñí iñi ñi.

<sup>34</sup> Tan tandihí tsaha tsa cahan ra tsihin ñi maa ñi maa tsihin cuhva cahan ra. Maa tyin cahan catsi ra tsihin ra tsicá tsihin ra.

*Nu jacutaxín ra Jesús tatyí xaan nu miñi*

*(Mt. 8.23-27; Lc. 8.22-25)*



<sup>35</sup> Tsa tseñi juvin ñi maa quivi can, catyí ra Jesús tsihin ra tsicá tsihin ra: —Cohon ndo inga tsiyo miñi.

<sup>36</sup> Tacan tan ra Jesús tan ra tsicá tsihin ra nacoq ra naha tsi nyivi tan quihvi ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha.

<sup>37</sup> Tan quitsaha yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsaha cuñi cutu yutun ndoo can.

<sup>38</sup> Tan ra Jesús canyií ra quixí ra tsa yatyin xuu yutun ndoo can, tan nyanaá iin jahma jiñi ra. Jandotoq ra naha tsi ra, tan catyí ra naha tsihin ra: —¡Maestro! ¿a ña jahá un cuenda tyin cuñi nyee yo?

<sup>39</sup> Tacan tan nduvitaq ra Jesús tan jacutaxin ra tatyí xaan can. Tan catyí ra tsihin ndutya:

—¡Taxin ñi!

Tan cutaxin tatyí can tan ndutya can. Tacan tan taxin cuii ñi cuví.

<sup>40</sup> Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

<sup>41</sup> Maa tyin iyo xaan cuñi ra naha tsa nyehe ra naha tsa cuví. Tan tsicá tuhun tahan ra naha tan catyí ra naha:

—¿Yoo ra cuví ra ihya? Tyin nda cuanda tatyí tan ndutya tyaá yahvi tsi naha tsi tsi ra —catyí ra naha.

## 5

*Nu caahán ra Jesús tyin ra caahán tuhun Nyoo cuví ra tumaa iin ra tatsí Nunduvahaq iin ra Gadara tsayihí tatyí ña vaha*

(Mt. 8.28-34; Lc. 8.26-39)

<sup>1</sup> Tsaq ra naha inga tsiyo miñi nda nu ñuhu cuenda Gadara.

<sup>2</sup> Tsa quitq ra Jesús tsitsi yutun ndoo, tan quitq iin ra yihí tatyí ña vaha nu ndaa cumi santu, tan tsaq ra nu nyaá ra.

<sup>3</sup> Tan nu ndaa can iyó maa ra can. Tsaahñi ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñi ra.

<sup>4</sup> Cuaha xaan tsaha tsahñi nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yoñi maa cuví cunye tsi ra.

<sup>5</sup> Tan tsicá nuu maa ra caná tsa ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu.

<sup>6</sup> Maa tyin ndi cañi ca quitq ra Jesús, tan nyehe ra can tsi ra, tan tsinú xaan ra tsahan ra, tsicuiñi tsiti ra nuu ra.

<sup>7</sup> Tan canq tsa ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundo ho tsi yu.

<sup>8</sup> Tacan catyí nu tatyí ña vaha can tsihin ra Jesús tyin tsa yahq cahan ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

<sup>9</sup> Tan ra Jesús tsicq tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

<sup>10</sup> Tan caahán ndaahvi nu tsihin ra Jesús na ña jacuhun cañi ra tsi nahnu.

<sup>11</sup> Yatyin ñi yucu can yucú cuaha quini tsatsi ti naha ti.

<sup>12</sup> Tacan tan catyí tandihí nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

<sup>13</sup> Tacan tan tsahaq ra Jesús ndatu tsi nahnu, tan quihvi nahnu tsitsi quini can. Quitq nahnu tsi ra can tan quitq tumaa uvi mil quini yucú can. Tsa quihvi nahnu tsitsi ti naha ti, quitsahaq tsinú ti naha ti, tan yahq ti naha ti yuhu xahva tan cucoyoq ti naha ti tsitsi miñi, tan tsihi ti naha ti tsitsi ndutya.

<sup>14</sup> Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra

naha cuanuhú ra naha cuacatyí tuhun ra naha tsa cuví can tsihin nyívi ñuu can tan inga ca nyívi tsa taahán ra naha ityi cuhu. Tan tandihí nyívi tsa cahan ra naha tsihin, tsahan ñi tsinyehé ñi tsa cuví can.

<sup>15</sup> Cuhva tsa tsaá ñi nu nyí ra Jesús, nayuhví xaan ñi tsa nyehe ñi tsi ra tsa yihí tatyí ña vaha can. Nyaá taxin ra, nditsí ra jahma, tan vaha cuñí ra.

<sup>16</sup> Tan tandihí maa nyívi tsa nyehe tsa tahanan ra can tan tsa tahanan quini can, catyí tuhun ñi can tsihin inga ca nyívi.

<sup>17</sup> Tacan tan quitsaha caahán ndaahvi ñi tsihin ra Jesús, na ña ndoo ra nu ñuhu ñi.

<sup>18</sup> Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra.

<sup>19</sup> Maa tyin ña tsaha ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyívi un, tan catyí tuhun tsihin ñi tandihí tsa javaha Jutu Mañi yo Nyoo tsihin un, tan náca cundaahví iñi ra tsi un.

<sup>20</sup> Tacan tan cuanuhú ra tan quitsaha catyí tuhun ra tsihin nyívi iyó tandihí ñuu tsa cayucú Decápolis tandihí tsa javaha ra Jesús tsihin ra. Tan iyo xaan cuñí ñi.

*Nu nduvaha sehe ra Jairo tan ñaha tsa tñin jahma ra Jesús  
(Mt. 9.18-26; Lc. 8.40-56)*

<sup>21</sup> Tsa tsaá ra Jesús tsihin yutun ndoo nda inga tsiyo miñi can, tsaá cuaha nyívi nu tsaá ra. Tan ndoo ra yuhu miñi ican.

<sup>22</sup> Tacan tan tsaá iin ra nyisó tyiñu vehe ñuhu, nañí ra Jairo. Cuhva tsa nyehe ra tsi ra Jesús, tsicuiñi tsiti ra nuu ra.

<sup>23</sup> Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñí cúu cuii ña ña.

<sup>24</sup> Tacan tan cuahán ra Jesús tsihin ra, tan cuaha xaan nyívi cuahán

cuanyicún tsi ra, nda cuanda catyihí tahan ña maa ñi.

<sup>25</sup> Tsihin nyívi can cuahán ndihí iin ñaha cuuhví. Ñaha ihya tsa quitá maa utsi uvi cuiya ndohó ña cuehe tsa cuún niñi ña.

<sup>26</sup> Tan cuaha xaan tundoho nyehe ña tsihin tsa cuaha doctor. Tandihí xuhun ña janaa ña tsihin ra naha, maa tyin nduve maa náa catyí janaa ña xuhun ña tyin vihi ca nduñihí cuuhvi ña.

<sup>27</sup> Tsa tsiñi ña caahán nyívi tyin tsaá ra Jesús, natuhvá ña ityi tsata ra tan tñin ña jahma ra.

<sup>28</sup> Tyin tsicá iñi maa ña: “Tatun tñin yu vasu tan jahma ra, cua nduvaha yu”.

<sup>29</sup> Tsa tñin ña jahma ra iin yaha ñi cutaxin tsa cuún niñi ña. Tan tuví iñi cuñu ñuhu ña tyin tsa janduvaha ra tsi ña.

<sup>30</sup> Tsa tuví iñi ra Jesús tyin nduvaha iin nyívi tsihin tunyee iñi tsa iyó tsi ra. Tacan tan nanyico coo ra ityi tsata ra tan tsica tuhun ra tan catyí ra:

—¿Yóo tñin jahma yu?

<sup>31</sup> Tacan tan catyí ra tsicá tsihin ra:

—¿Nacuenda tsicá tuhun ca un: yóo tñin jahma un? tan nyehé vaha un tyin cuaha xaan nyívi nyicún tsi un tan tyañu xaan jahá ñi —catyí ra naha tsihin ra.

<sup>32</sup> Maa tyin ra Jesús nanyehe ra nani ñi tyin cuñí ra coto ra yóo tñin jahma ra.

<sup>33</sup> Tacan tan ñaha can tsahan ña tsicuiñi tsiti ña nuu ra Jesús tyin tsitó vaha ña tyin tsa nduvaha ña. Yuuhví ña tan nihí ña tsahan ña tsicatyí tuhun ña tandihí tsa nditsa tsihin ra.

<sup>34</sup> Tan catyí ra Jesús tsihin ña:

—Nduvaha un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

<sup>35</sup> Ndi caahán ca ra Jesús tan tsaá nyívi quee yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña cahan yuhu ca un tan ña jatyañu ca un tsi ra Maestro ihya —catyí ñi tsihin ra.

<sup>36</sup> Maa tyin ra Jesús ña tyaa yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsjnu iñi yooho —catyí ra tsihin ra.

<sup>37</sup> Tan ña tsaha ra cuhun cuaha nyivi tsihin ra. Tan quihjín ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra.

<sup>38</sup> Tsa tsaá ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsaá ñi.

<sup>39</sup> Quihvi ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihi ña —catyí ra tsihin ñi.

<sup>40</sup> Maa tyin ña tsinu iñi ñi tan tsacu naaha ñi nyehé ñi tsi ra. Tacan tan tava ra tsi tandihi ñi nuquehe, tan quihjín ra tsi jutu ñaha luhlu tsa tsihi can tan sihi ña tan ra tsa tsaá tsihin ra, tan quihvi tandihi ñi nu canyí ña.

<sup>41</sup> Tan tijn ra ndaha ña, tan catyí ra tsihin ña:

—Talita cumi —tan cuñí tsi catyí tsi tyehen: Catyí yu tsihin yooho ñaha luhlu, jnduvita!

<sup>42</sup> Juvín ñi cuhva can tan nduvita ña, tan nacaca ña. Utsi uvi cuiya ña. Tan tsa nyehe nyivi tsa iyo tsa javaha ra Jesús, iyo xaan cuñí ñi cuvi.

<sup>43</sup> Maa tyin ra Jesús ñihi tsaha cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

## 6

*Nu tsinuhu ra Jesús ñuu Nazaret nu tsahnu ra*

(Mt. 13.53-58; Lc. 4.16-30)

<sup>1</sup> Tacan tan quitá ra Jesús ican, tan cuanuhu ra nda ñuu ra. Tan ra tsicá tsihin ra cuahán ndihi ra naha tsihin ra.

<sup>2</sup> Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsaha jacuahá ra Jesús tsi nyivi. Tan cuaha ñi yucú tyaá soho ñi tsa caahán ra. Iyo cuñí ñi tsa tsiñí ñi tsa caahán ra, tan catyí ñi:

—¿Numaa tahan cutuhva ra ihya tandihi tsa tsitó ra? ¿Yóo tsaha tsa tsiñi tuñi iñi ra? ¿Tan nácaa cutuhva ra javahá ra tsa iyo?

<sup>3</sup> Tan ra tahvi yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñi ñi tyaa yahvi ñi tsi ra.

<sup>4</sup> Maa tyin catyí ra tsihin ñi:

—Tandihi ñi ityi tan jahá tandihi nyivi tsa ñayivi tsi ra cuví ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaá yahvi ñi tsi ra —catyí ra Jesús.

<sup>5</sup> Tan tyiso ndaha ra jiñi juhva nyivi cuuhvi, tan janduvaha ra tsi ñi, maa tyin ña cuvi javaha ra inga ca tsa iyo.

<sup>6</sup> Tan iyo cuñí ra tyin ña tsinu iñi ñi tsi ra. Tacan tan cuahán ra cuajacuahá ra tsi nyivi iyó tandihi ñi ñuu nyihi tsa cayucú yatyin ñi ñuu can.

*Nu jacuhun ra Jesús tsi ra tsicá tsihin ra cucahan ra naha tuhun Nyoo*  
(Mt. 10.5-15; Lc. 9.1-6)

<sup>7</sup> Tsa yaha yacan tan cana ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsaha jacuhún ra uvi uvi ra naha. Tan tsaha ra ndatu tsi ra naha tsa tava ra naha tatyí ña vaha tsi nyivi.

<sup>8</sup> Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ñi.

<sup>9</sup> Tan cunyaa nditsan tsaha ra naha. Tan ña cundaha ra naha inga nditsi jahma, na cuhun ra naha tsihin cuhva nditsi ñi maa ra naha.

<sup>10</sup> Tan catyí ra tsihin ra naha:

—Cuhva tsa tsaá ndo iin ñuu, quihvi ndo iin vehe, tan ndoo ndo ican nda cuanda quita ndo ñuu can.

<sup>11</sup> Tan tatun tsaá ndo iin ñuu tan ña naquihin cuenda nyivi iyó ñuu can tsi ndo, tan ña cuñi ñi tyaa soho ñi tsa cua cahan ndo, quita ndo ican tan

naquisi ndo nyaca tsaha ndo tan yacan janaha tyin ndoo cuatyí ñi siqui ñi. Tsa nditsa catyí yu tsihin ndo, tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra —catyí ra Jesús tsihin ra naha.

<sup>12</sup> Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi ñi ñi cuatyí ñi, tan na nanducu ñi tsi Nyoo.

<sup>13</sup> Tan cuaha ñi nyivi tava ra naha tatyí ña vaha. Tan tyihí ra naha acetye tsi nyivi cuuhví tan nduvaha ñi.

*Nu tsahá cuenda tsi nácaa tsihi ra Juan, ra jacoondutyá tsi nyivi*

*(Mt. 14.1-12; Lc. 9.7-9)*

<sup>14</sup> Ra rey Herodes tsitó ra tsa javahá ra Jesús tyin tandihi nyivi tan caahán ñi tsa javahá ra, tan tsicá ñi ra tye-hen:

—Ra ihya cuví ra Juan, ra jacoondutyá tsi nyivi, ra tsa tsihi. Vityin nandoto ra. Juvín ra cuví can, yacan cuenda iyó tunyee ñi tsi ra —cuñí ra Herodes, tsicá ñi ra.

<sup>15</sup> Yihí nyivi catyí ñi:

—Ra Elías, ra cuví ndusu yuhu Nyoo tahañ tsanaha, cuví ra.

Tan catyí tucu inga ñi:

—Ndusu yuhu Nyoo cuví ra, tumaa ra tsicoo tahañ tsanaha naha ra —catyí ñi.

<sup>16</sup> Tsa tsiñi ra Herodes tandihi tsa caahán nyivi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandoto ra —catyí ra Herodes.

<sup>17</sup> Tacan catyí ra tyin juvin ñi maa ra tava tyiñu na tyihí ra naha tsi ra Juan vehe caa tan cuhñi ra naha tsi ra tsihin carena. Tacan javaha ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihin ra tsi ña Herodías tyin cuví ña ñasihi ra

<sup>18</sup> Tan tsa tacan javaha ra, catyí ra Juan tsihin ra tyin ña vaha tsa quihin ra tsi ña Herodías tyin ñasihi yañi ra cuví ña.

<sup>19</sup> Yacan cuenda ndasi cuñí ña Herodías nyehé ña tsi ra Juan. Cuñí ña cahñi ña tsi ra, maa tyin ña cuví,

<sup>20</sup> tyin ña tsahá ra Herodes tyin tsitó ra tyin ra vaha cuví ra Juan tan cuiti iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñi ñi ra Herodes tandihi tsa caahán ra Juan, maa tyin vaha cuñi ra tyaá soho ra tsa caahán ra.

<sup>21</sup> Maa tyin tsa tahañ tsi quivi cacu ra Herodes javaha ra iin vico. Tan cana ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galilea. Quivi ihya tsican ña Herodías tsa cuñí ña tsi ra Herodes.

<sup>22</sup> Tyin ñaha sehe ña tahañ ña tsicuañi ña yaa nu iyó vico ra Herodes. Tan tahañ xaan ñi ra Herodes tan ra nyecú cuxiñi tsihin ra cuhva tsañi ña. Tacan tan catyí ra Herodes tsihin ña:

—Ndañan tsi yu náa cuñí maa un. Náa tahañ ñi maa tsi cua ndañan un tsi yu cua cuhva maa yu can tsi un.

<sup>23</sup> Tsitó maa Nyoo tyin cua cuhva yu tsa cua ndañan un. Tun ndañan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

<sup>24</sup> Tacan tan quita ña, cuahán ña cuandacá tuhun ña tsi sihi ña tan catyí ña:

—¿Náa ndañan yu tsi ra?

Tan catyí sihi ña:

—Ndañan jiñi ra Juan, ra jacoondutyá tsi nyivi tsi ra —catyí ña.

<sup>25</sup> Tacan tan numi ñi quihvi nyico ñaha tyuvaa can nu nyií ra rey Herodes, tan catyí ña tsihin ra:

—Cuñí yu jiñi ra Juan, ra jacoondutyá tsi nyivi. Cahnya jucun ra tan tinyi un jiñi ra nuu iin coho, cuhva un tsi yu vityin vityin ñi —catyí ña tsihin ra.

<sup>26</sup> Tacan tan cuihaya xaan cuñí ra rey can cuví. Maa tyin tsa cuenda tsa cahan ra tyin cua cuhva maa ra tsa cua ndañan ña, ña cuñí ra jandaví ñaha ra tsi ña tyin tandihi maa nyivi



yucú vico can tan tsiñi ñi tsa cahan ra, yacan cuenda tsaha ra tsa tsican ña.

<sup>27</sup> Numi ñi tava tyiñu ra rey can tsi iin andaru na cuquihin ra jiñi ra Juan.

<sup>28</sup> Tsahan andaru can tsitsi vehe caa, tan tsahnya ra jucun ra Juan. Tan tsindaca ra jiñi ra Juan tsi ñaha tyuvaa can, nyii tsi nu iin coho. Tan nacuhva cuenda ña can tsi sihi ña.

<sup>29</sup> Tsa tsito ra nyicun tsi ra Juan tsa cuvi, tsahan ra naha tsiquihin ra naha cuñu ñuhu ra, tan tsicutsi ra naha can.

*Nu jacatsi ra Jesús uhun mil rayii*  
(Mt. 14.13-21; Lc. 9.10-17; Jn. 6.1-14)

<sup>30</sup> Tsa yaha yacan tan ndu iin ra tsica tyiñu ra Jesús tsihin ra, tan catyi tuhun ra naha tsihin ra tandihi tsa javaha ra naha, tan tsa jacuaha ra naha nu tsahan ra naha tsicahan ra naha tuhun Nyoo tsihin nyivi.

<sup>31</sup> Tan catyi ra Jesús tsihin ra naha: —Cohon ndo iin nu taxin caa, quitatu yo luxu.

Tacan catyi ra tsihin ra naha tyin cuaha xaan nyivi cuahan tan vatsi, tan ndi ña cuyatyi ra naha catsi ra naha jahá ñi.

<sup>32</sup> Tacan tan quihvi ra Jesús tsihin ra naha tsitsi iin yutun ndoo tan cuahan ra naha iin nu taxin caa.

<sup>33</sup> Maa tyin cuaha xaan nyivi nyehe ñi cuahan ra naha. Tan nacoto ñi tsi ra Jesús. Tacan tan cuahan ñi tsihin tsaha ñi, quita ñi tandihi ñi ñuu tan jihna ca ñi tsa nu cua tsa ra Jesús.

<sup>34</sup> Cuhva tsa tsa ra naha, quita ra Jesús tsitsi yutun ndoo tan nyehe ra tyin cuaha xaan nyivi yucú ican. Tan cundaahvi iñi ra nyehe ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsaha jacuaha ra cuaha xaan tuhun vaha tsi ñi.

<sup>35</sup> Tsa tsa cua cuiso ñicanyii, tan natuhva ra tsica tsihin ra Jesús xiin ra tan catyi ra naha tsihin ra:

—Tsa cueñi xaan, tan nduve nyivi iyó yatyin ñi ihya.

<sup>36</sup> Vaha ca jacunuhu un tsi nyivi tyin ihya nduve tsa catsi ñi. Tan na

cujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi —catyi ra naha tsihin ra.

<sup>37</sup> Maa tyin nacahan ra Jesús, tan catyi ra:

—Cuhva nyooho tsa catsi ñi.

Tacan tan nacahan ra naha tan catyi ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihi nyivi ihya.

<sup>38</sup> Tan catyi ra Jesús tsihin ra naha: —Nyehe jihna ndo najava paan ndahá ndo —catyi ra.

Cuhva tsa tsito ra naha najava paan ndahá ra naha, tacan tan tsicahan ra naha tsihin ra tan catyi ra naha:

—Ndahá ndi uhun taahan ñi paan tan uvi taahan ñi tyaca.

<sup>39</sup> Tacan tan catyi ra tsihin nyivi na cunyecu ñi nu cuhu can.

<sup>40</sup> Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi.

<sup>41</sup> Tacan tan quihin ra Jesús tsa uhun paan can tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo, tsa yaha tan tsahnu cuatyi ra paan can, tan tsaha ra can tsi ra tsica tsihin ra tyin tsatsa ra naha can tsi nyivi. Tsa ndihi tsatsa ra naha paan can, tan tsatsa ndihi ra naha tyaca.

<sup>42</sup> Tsatsi tandihi ñi tan ndaha iñi ñi.

<sup>43</sup> Tan jacutu ra naha utsi uvi tyica tsihin paan tan tyaca tsa ndoo.

<sup>44</sup> Tan uhun mil rayii tsatsi paan can.

*Nu tsica ra Jesús nu ndutya*  
(Mt. 14.22-27; Jn. 6.16-21)

<sup>45</sup> Tacan tan catyi ra Jesús tsihin ra tsica tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhu ra tsi nyivi yuvehe ñi.

<sup>46</sup> Tsa yaha cuanuhu nyivi, tacan tan cuahan ra Jesús cuandacán tahvi ra tsi Nyoo iin jiñi yucu.

<sup>47</sup> Tsa tsa cuñi cuaa, yutun ndoo nu cuahan ra tsica tsihin ra Jesús tsa



cuahán can nda mahñu miñi, tan maa ra ndi nyíi ra yuhu miñi can.

<sup>48</sup> Tan tsa nyehe ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñí tuvi, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha.

<sup>49</sup> Maa tyin tsa nyehe ra naha tsicá ra nu ndutya, tsicá iñi ra naha tyin tatyí cuví ra, tacan tan quitsahá caná tsa ra naha

<sup>50</sup> tyin tandihí ra naha nyehe ra naha tsi ra tan nayuhví ra naha. Maa tyin nacahan ra tan catyí ra tsihin ra naha:

—¿Ña nayuhvi ndo tyin maa yu cuví!

<sup>51</sup> Tacan tan quihví ra tsitsi yutun ndoo nu yucú ra naha, tan tsa yaha quihví ra, iin yaha ñi cutaxin tatyí can. Tan iyo xaan cuñí ra naha cuví

<sup>52</sup> tyin ñaha ca cutuñi iñi ra naha tsa iyo tsa javahá ra tsihin paan, tyin ndi ndava añima ra naha.

*Nu janduvahá ra Jesús nyivi cuuhví tsa iyó nduhva tsa nañi Genesaret (Mt. 14.34-36)*

<sup>53</sup> Yaha sava ra naha nu miñi can tan tsaá ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya.

<sup>54</sup> Cuhva tsa quitá ñi ra naha tsitsi yutun ndoo can, tan nacotó nyivi tsi ra Jesús.

<sup>55</sup> Tacan tan tsinú xaan ñi cuahán ñi cuajacotó ñi tsi nyivi iyó nanñi cahnu ityi can tyin tsaá ra Jesús. Tan tsaá cuaha nyivi quee tandihí ñi ñuu nu nyíi ra, tan yucú nyivi cuuhví nu tsitó tsaá tsihin ñi.

<sup>56</sup> Tan tandihí ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquín nyivi nyivi cuuhví yuhu ityi. Tan caahán ndaahvi ñi tsihin ra na cuhva ra tñin ñi cuuhví can vasu tan yuhu jahma ra tan nduvaha ñi. Tan tandihí maa nyivi tsa tñin jahma ra nduvahá ñi.

## 7

*Tsa jativi tsi nyivi nu Nyoo (Mt. 15.1-20)*

<sup>1</sup> Tacan tan tsaá juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyíi ra Jesús.

<sup>2</sup> Ra ihya naha ra nyehe ra naha tyin juhva ra tsicá tsihin ra Jesús ña nacatyá ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahá ra can naha ra.

<sup>3</sup> Tyin ra fariseo naha ra javahá ra naha tumaa catyí costumbre tsii tsaahnu ra naha tacan tucu ñi tandihí ca nyivi Israel ña cuví catsi ñi tun ña nacatyá ñi ndaha ñi cuaha tsaha tumaa iyó maa ñi.

<sup>4</sup> Tan tatun ña nacatya ñi ndaha ñi tsa tsaá ñi quee ñi nuyahvi, ña cuví catsi ñi. Iyó cuaha ca costumbre tsa tuhvá ñi javahá tumaa tsa nacatyá ñi vasu, jarra, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi.

<sup>5</sup> Tacan tan tsicá tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoó tsii tsaahnu yo naha ra? Tyin ña nacatyá jihna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

<sup>6</sup> Tan nacahan ra Jesús, tan catyí ra: —Nditsa tsa cahan ra Isaías, ra cuví ndusu yuhu Nyoo tuhun nyooho tsa jahá ndo tyin vaha xaan ndo tan ña nditsa ndo. Tyin catyi ra tyehen: Nyivi ihya jacahnú ñi tsi yu tsihin yuhu ñi.

Maa tyin ñavin tsihin tsa ñi iñi añima ñi.

<sup>7</sup> Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyi ra Isaías tuhun ndo jahá Nyoo, catyí ra Jesús tsihin ra naha.

8 Tyin nyooho nacoꝝ ndo cuhva caahán Nyoo, tan nyicún ndo cuhva caahán nyívi ñi, tumaa tuhvá ndo nacatya ndaha tyiñu ndo, tan inga ca tsa tuhvá ndo javahá.

9 Nyooho tyaá tsiyo ndo tuhun caahán Nyoo, tacan tan javahá ndo tuhun tsahnu tsa nacoꝝ tsi tsaahnu ndo.

10 Tyin catyí ley Nyoo tsa tyaá ra Moisés: “Tyaá yahvi ndo tsi jutu ndo tan tsi sihi ndo, tyin tandihi nyívi tsa cua cahan ndavaha ñi tsi jutu o tsi sihi, cua cúu ñi” catyí ley Nyoo tsa tyaá ra Moisés.

11 Maa tyin nyooho catyí ndo tyin cuví catyí iin nyívi tsihin jutu ñi o sihi ñi tyehen: “Ña cuví jatinyee yu tsi un tyin tandihi tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndihi can tsahá cuenda yu tsi Nyoo.”)

12 Tan tatun catyí nyívi tacan, ña cuñí ca tsi jatinyee ñi tsi jutu ñi o tsi sihi ñi, catyí ndo.

13 Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

14 Tacan tan cana nyico ra Jesús tsi nyívi tan catyí ra tsihin ñi:

—Tyaá soho vaha tandihi ndo tsa cua cahan yu, tan nducu ndo cuhva cutuñi iñi ndo.

15 Tsa quihví yuhu nyívi, ña cuví jatívi tsi tsi ñi. Tsa jatívi tsi ñi cuví tsa quitá aña ñi.

16 Nyooho tsa iyó soho, tyaá soho ndo tsa caahán yu —catyí ra Jesús tsihin ñi.

17 Tsa yaha nacoꝝ ra Jesús tsi nyívi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra.

18 Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo tyin tsa quihví tsitsi yo ña cuví jatívi tsi tsi yo?

19 Tyin tsitsi yo quihví tsi tan ñavin aña yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janaha ra tyin tandihi nyayu tan vaha catsi yo itsi.

20 Tan catyí tucu ra:

—Tsa quitá aña nyívi, yacan jatívi tsi ñi.

21 Tyin tsa caquiñi tsa tsicá iñi ñi tsitsi aña ñi quitá can, tacan tan rayi cuñí ra coo inga ñaha tsi ra, o ñiñaha cuñí ñi coo inga rayi tsi ñi. Yihí ra tsicoó ra tsihin inga ñaha tan ña tindaha ra tsihin ña. Yihí rayi tsicoó ra tsihin ra ndusihi. Tan yihí ñiñaha tsicoó ñi tsihin ñi nduyi. Tan yihí ñi cuñi ñi cahñi ñi nyívi,

22 o cuñí ñi suhu ñi. Yihí ñi cuñí ñi coo tsa tsi inga nyívi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi.

23 Tandihi tsa ña vaha ihya, quitá can tsitsi aña nyívi, tan jatívi can tsi ñi —catyí ra Jesús tsihin ra naha.

*Nu tsinu iñi iin ñaha inga ñuu tsi ra Jesús*

*(Mt. 15.21-28)*

24 Tsa yaha yacan tan quitá ra Jesús ñuu can, tan cuahán ra ñuhu nu canyí ñuu Tiro tan ñuu Sidón. Tsa tsaá ra ícan, quihví xeehe ra tsitsi iin vehe tyin ña cuñí ra coto nyívi numaa nyíi ra. Maa tyin ña cuví cunyi xeehe ra

25 tyin yatyi xaan tsito sihi iin ñaha tyuvaa tsa yihí tatyí ña vaha nu nyíi ra. Tacan tan cuahán ña nu nyíi ra. Tsa tsaá ña tan tsicuiñi tsiti ña nuu ra.

26 Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaá ña nu nyíi ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña.

27 Maa tyin catyí ra Jesús tsihin ña:

—Ña cahan yuhu ca un; na catsi jihna nyívi Israel, ñi cuví sehe Nyoo, tyin ña vaha quihin nyaa yo paan

yuhu sehe yo tan cuhva yo itsi catsi ina —catyí ra Jesús tsihin ña.

<sup>28</sup> Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuví ndatú ti tan tsatsí ti titsehe tsa cucoyó xuu mesa jahá sehe tsitoho ti —catyí ña tsihin ra.

<sup>29</sup> Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yaha quita tatyí ña vaha tsi sehe un. Cuanuhu vityin —catyí ra tsihin ña.

<sup>30</sup> Tan cuhva tsa tsaá ña yuvehe ña, canyí taxin sehe ña nu cama, tyin tsa yaha quita tatyí ña vaha tsi ña.

*Nu janduvaha ra Jesús tsi ra soho tan ñihi*

<sup>31</sup> Quita nyico ra Jesús ñuhu nu canyí ñuu Tiro, tan yaha ra ñuu Sidón, tan cuahán ra inga ca ñuu tsa cayucú Decápolis. Yaha ra ican tan tsaá ra miñi Galilea.

<sup>32</sup> Tsa tsaá ra Jesús ican, tsahan nyivi tsindaca ñi iin ra soho tsa ña cuví cahan nu nyí ra. Cahan ndaahvi ñi tsihin ra na tyiso ra ndaha ra jiñi ra can.

<sup>33</sup> Tacan tan quihin ra tsi ra can cuahán tsiyo tsihin ra nu nduve nyivi. Tan tyaxin ra nundaha ra tsitsi soho ra can, tan tiví sii ra, tan tijn ra nu yaa ra can.

<sup>34</sup> Tacan tan nanyehe ndaa ra ityi andivi. Tan ixta tatyí ra, tan catyí ra:

—¡Efata! —tan tuhun ihya cuñi tsi catyí: ¡Nuña!

<sup>35</sup> Tan tsihin can nuña soho ra can, tan nduvaha yaa ra, tan cuví nacahan ra.

<sup>36</sup> Tan catyí ra Jesús tsihin ñi tyin ña cahan ñi can tsihin nyivi, maa tyin vasu ndi maa caahán ra tacan tsihin ñi, cuñihi ca ñi caahán ñi tsa javaha ra.

<sup>37</sup> Iyo cuñi ñi tan catyí ñi:

—Tandihí tsa javahá ra tan vaha javahá ra itsi. Nyivi soho nacuñi ñi jahá ra tan nyivi ñihi nacahan ñi.

## 8

*Nu tsaha ra Jesús tsa catsi cumi mil nyivi*  
(Mt. 15.32-39)

<sup>1</sup> Quivi can nataca cuaha nyico nyivi nu nyí ra Jesús. Tan nduve maa tsa catsi ñi iyó. Tacan tan cana ra Jesús tsi ra tsicá tsihin ra, tan catyí ra tsihin ra naha:

<sup>2</sup> —Ndaahvi xaan cuñi yu nyehé yu nyivi ihya, tyin tsa uñi quivi yucú ñi tsihin yo, tan nduve ca tsa catsi ñi.

<sup>3</sup> Tyin tun jacuhun yu tsi ñi yuvehe ñi tsa ndi cumañi ca catsi ñi, cua cúu naaha ñi ityi cahun ñi, tyin yihí ñi cañi xaan quee ñi —catyí ra Jesús tsihin ra naha.

<sup>4</sup> Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

<sup>5</sup> Tan tsica tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

<sup>6</sup> Tacan tan catyí ra tsihin nyivi na cunyecú ñi nu ñuhu. Tsa yaha cahan ra yacan, tacan tan quihin ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnú cuatyí ra can tan tsaha ra can tsi ra tsicá tsihin ra, tyin tsatsa ra naha can tsi nyivi.

<sup>7</sup> Tan ndahá tucu ra naha juhva tyaca nyihi. Tsaha ndihí ra Jesús tyahvi nyoo tsi Nyoo tsa cuenda can, tacan tan tsaha ra can tsi ra naha tyin tsatsa ra naha tsi nyivi.

<sup>8</sup> Tandihí ñi tsatsi ñi, tan ndaha vaha iñi ñi. Tsa ndihí tsatsi ñi tan jacutu ra naha utsa tyica tsihin tsa ndoo.

<sup>9</sup> Tan quita maa cumi mil nyivi jacatsi ra. Yaha can tan jacunuhu ra tsi ñi.

<sup>10</sup> Tsa yaha cuanuhu ñi, tacan tan quihvi ra tsihin ra tsicá tsihin ra tsitsi iin yutun ndoo. Tan cuahán ra naha ityi Dalmanuta.

*Nu tsicán ra fariseo naha ra tsi ra Jesús tyin javaha ra iin tsa iyo*

(Mt. 16.1-4; Lc. 12.54-56)

<sup>11</sup> Tsaá ra fariseo naha ra nu nyí ra Jesús, tan quitsaha caahán yuhu

tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsj tsi ra, yacan cuenda catyí ra naha tsihin ra tyin javaha ra iin tsa iyo nyehe ra naha.

<sup>12</sup> Tacan tan ra Jesús ñihi xaan ixta tatyí ra, tan catyí ra:

—¿Nacuenda tyin tsicán nyivi iyó vi-tyin tsa iyo? Tsa nditsa catyí yu tsihin ndo tyin ña cua nyehe ndo ndi intuhun tsa iyo —catyí ra tsihin ra naha.

<sup>13</sup> Tacan tan nacoq ra tsi ra naha, tan quihvi nyico ra tsitsi yutun ndoo tan cuahán ra inga tsiyo miñi.

*Nu catyí ra Jesús tyin tsa jacuahá ra fariseo naha ra cuví can tuma yutsan iya*

*(Mt. 16.5-12)*

<sup>14</sup> Ra tsicá tsihin ra Jesús naq iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can.

<sup>15</sup> Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

<sup>16</sup> Tan ra tsicá tsihin ra quitsaha natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

<sup>17</sup> Tsa tuví iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan aña ndo?

<sup>18</sup> Nyecú tinuu ndo, tan ña nyehé ndo. Nyecú soho ndo, tan ña tsiñi ndo. ¿A ña nducuhún iñi ndo tsa javaha yu

<sup>19</sup> quivi tsa jacatsj yu uhun mil rayii tsihin uhun taahan ñi paan? ¿A ña ñuhú iñi ndo najava tyica jacutu ndo tsihin tsa ndoo? —catyí ra Jesús, tsica tuhun ra tsi ra tsicá tsihin ra.

Nacahan ra naha tan catyí ra naha: —Utsi uvi tyica.

<sup>20</sup> Tan catyí nyico ra Jesús tsihin ra naha:

—Tan quivi jacatsj yu cumi mil nyivi tsihin utsa taahan ñi paan, ¿naja tyica jacutu ndo tsihin tsa ndoo?

Nacahan ra naha tan catyí ra naha: —Utsa taahan tyica.

<sup>21</sup> Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

*Nu janduvaha ra Jesús iin ra cuanda ñuu Betsaida*

<sup>22</sup> Tsa yaha yacan tan cuahán ra Jesús tsihin ra tsicá tsihin ra nda ñuu Betsaida. Tsa tsaq ra naha ican, tsindaca nyivi ñuu can iin ra cuanda nu yucú ra naha. Tan cahan ndaahvi ñi tsihin ra Jesús tyin tñin ra tsi ra cuanda can tan janduvaha ra tsi ra.

<sup>23</sup> Tacan tan tñin ra ndaha ra cuanda can, tan quihin ra tsi ra cuahán tsihin ra ityi tsata ñuu. Tyaa sii ra nu ndaha ra tan tñin ra tinuu ra can, tan tyiso ra ndaha ra soco ra can, tan tsica tuhun ra tsi ra tun nditsin nyehé ra luxu.

<sup>24</sup> Ra cuanda can nanyehé ra tan catyí ra:

—Nyhé yu juhva nyivi, tan caá ñi tuma caá yutun, maa tyin tsicá ñi —catyí ra.

<sup>25</sup> Tacan tan tñin nyico ra Jesús tinuu ra inga tsaha, tan nanyehé vaha ra tan nduvaha ra. Nanyehé catsi vaha ra tandihi tsa iyó.

<sup>26</sup> Tacan tan jacunuhu ra Jesús tsi ra yuvehe ra, tan catyí ra tsihin ra:

—Ña quihvi un tsitsi ñuu ihya tan ña nacatyí tuhun tsehe tsihin nyivi —catyí ra Jesús tsihin ra.

*Nu cahan ra Pedro tyin ra Jesús cuví Cristo, ra jacacú tsiyo*

*(Mt. 16.13-20; Lc. 9.18-21)*

<sup>27</sup> Yaha can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javaha ra Felipe. Tsitsi tsa cuahán ra naha, tan tsica tuhun ra Jesús tsi ra naha, tan catyí ra:

—¿Náa caahán nyivi tuhun yu? ¿Yóo ra cuví yu catyí ñi? —catyí ra tsihin ra naha.



28 Nacahan ra naha tan catyí ra naha:

—Yihí nyivi catyí ñi tyin ra Juan, ra jacoondutyá tsi nyivi, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

29 Tacan tan tsicá tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñí ndo?

Tan nacahan ra Pedro tsihin ra:

—Yooho cuví ra Cristo, ra jacacú tsi nyivi.

30 Maa tyin cahan ra Jesús tsihin tandihi ra naha tyin ña cahan ra naha can tsihin ndi intuhun maa nyivi.

*Nu cahan ra Jesús tyin cua cúu ra (Mt. 16.21-28; Lc. 9.22-27)*

31 Tacan tan quitsahá jacuahá ra tyin Rayi tsa quee nda gloria cua nyehe xaan ra tundoho. Tan ña cua tsinu iñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyivi tsi ra maa tyin cua nandoto ra tsa tsinu uñi quivi.

32 Tacan cahan catsi ra tsihin ra naha. Tacan tan quihin ra Pedro tsi ra cuahán tsihin ra tsata vehe tan quitsahá caahán ra tsihin ra Jesús tyin ña vaha tsa cahan ra.

33 Maa tyin ra Jesús nanyico coo ra, tan nanyehé ra nu nyecú inga ra tsicá tsihin ra. Tan quitsahá caahán ra tsihin ra Pedro, tan catyí ra:

—¡Cuatsiyo nuu yu ihya, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyivi —catyí ra Jesús tsihin ra Pedro.

34 Tacan tan cana ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyooho cuñí cunycun tsi yu, cahnnya iñi ndo nacoo ndo tsa cuñí maa ndo javaha ndo, tyin tacan tan cuvi javaha ndo cuhva cuñí Nyoo. Tan ña cua ndu uvi iñi ndo tsa yihí ndo cuenda yu, vasu ndi maa

tandihi quivi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunycun ndo tsi yu.

35 Tyin nyooho tsa ña cuñí nyehe tundoho tan cuhva ndo ñayivi ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi tsa cuenda yu tan tsa cuenda tuhun Nyoo, cua cacu ndo.

36 Tyin nduve yahvi nyaá cua ñihi ndo tandihi tsa iyó nu ñuhu ñayivi ihya tun ña cua cacu añima ndo.

37 Tyin nduve maa náa tsihin tyahvi ndo tan cuvi cacu añima ndo tan ña cunaa tsi.

38 Tyin nyivi cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyivi caquiñi tsa ña tyaá yahvi tuhun Nyoo, yuhu Rayi tsa quee nda gloria cua nducahan nuu yu nyehe yu tsi ñi quivi quitsi yu tsihin ángel cuenda Nyoo Jutu yu tan tsihin tsa si caá ra.

## 9

1 'Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nácaa ndacá ñaha Nyoo tsihin tunyee iñi ra tsa ndi cumañi ca cúu ndo.

*Nu nyehe uñi ra tsicá tsihin ra Jesús nu nasama cuhva caá ra (Mt. 17.1-13; Lc. 9.28-36)*

2 Tsa yaha iñu quivi, tacan tan quihin ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasama cuhva caá ra tan nyehe ra yucú tsihin ra can.

3 Xiñu xaan tan cuitsin xaan jahma ra cuvi tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuví janducuitsin ñi jahma tumaa cuitsin jahma ra.

4 Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra.

5 Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa



cuenda ra Moisés, tan iin tsa cuenda ra Elías —catyí ra Pedro.

<sup>6</sup> Cahān ra tacan tyin ña tsitó ra náa cahan ra tyin maa ra tan ra yucú tsihin ra nayuhvı̄ xaan ra naha.

<sup>7</sup> Tacan tan nuu iin vico siquı̄ ra naha tan tyası̄ tsi tsi ra naha. Tan tsitsi vico can nacahān iin ndusu tan catyí tsi:

—Ra ihya cuvı̄ Sehe yu, tan cuñı̄ xaan yu tsi ra. Tyāa yahvi ndo tsa caahān ra —catyí ndusu can.

<sup>8</sup> Tan cuhva tsa nanyehe ra naha, nduve ca ra Elías tan ra Moisés nyaá, intuhun ña maa ra Jesús nyaá.

<sup>9</sup> Tan cuhva tsa vatsı̄ nuu ra naha yucu can, catyí ra Jesús tsihin ra naha tyin ña cahan naha ra naha tsa nyehe ra naha. Cuvı̄ cahan maa ra naha can nda yaha nandoto Rayı̄ quee nda gloria, tan rayı̄ can cuvı̄ maa ra.

<sup>10</sup> Yacan cuenda ña cahan maa ra naha tuhun can, tan natuhún tahan ra naha náa cuñı̄ tsi catyí tuhun tsa cua nandoto ra.

<sup>11</sup> Tacan tan tsicā tuhun ra naha tsi ra Jesús tan catyí ra naha:

—¿Nacuenda tyin catyí ra cuvı̄ maestro cuenda ley vehe ñuhu naha ra tyin jihna ca ra Elías taahān tsi quitsi nu ñuhu ñayı̄vı̄ ihya inga tsaha?

<sup>12</sup> Tan nacahān ra, tan catyí ra:

—Nditsa tyin jihna ca ra Elías taahān tsi quitsi tsa ndi cumañi ca quitsi yuhu tyin janduvaha ra tandı̄hi. ¿Tan náa catyí tuhun Nyoo cuenda yuhu Rayı̄ quee nda gloria? Catyí tsi tyin cua nyehe yu tundoho, tan ña cua cuñı̄ nyı̄vı̄ nyehe ñi tsi yu.

<sup>13</sup> Maa tyin yuhu catyí yu tsihin ndo tyin tsa yahā quitsı̄ ra Elías. Tan nyı̄vı̄ javahā ñi tsihin ra cuhva cuñı̄ maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

*Nujanduvahā ra Jesús iin ra tyuvaa tsa yı̄hı̄ tatyı̄ ña vaha*

(Mt. 17.14-21; Lc. 9.37-43)

<sup>14</sup> Tsa yahā yacan tan cuahān ra naha nu yucú tandı̄hi ca ra tsicā tsihin ra naha. Tsa tsaā ra naha ican, nyehe ra naha tyin yucú cuaha nyı̄vı̄

nanı̄ canduvi. Tan yucú tucu ra maestro cuenda ley vehe ñuhu naha ra, tan caahān yuhu tahan ra naha tsihin ra tsicā tsihin ra Jesús.

<sup>15</sup> Tsa nyehe nyı̄vı̄ can tsi ra Jesús, iyo xaan cuñı̄ tandı̄hi ñi cuvı̄. Tacan tan tsahān ñi nu nyaá ra tsicuhvā ñi nacumi tsi ra.

<sup>16</sup> Tacan tan tsicā tuhun ra tsi ñi tan catyí ra:

—¿Nacuenda caahān yuhu tahan ndo? —catyí ra.

<sup>17</sup> Tacan tan nacahān iin ra tsa nyaá tyañu tandı̄hi nyı̄vı̄ can, tan catyí ra:

—Maestro, vatsı̄ yu vatsı̄ ndacá yu sehe yu tsi un tyin yı̄hı̄ tatyı̄ ña vaha tsi ra tan nduñı̄hı̄ ra jahā nu.

<sup>18</sup> Tyin tandı̄hi ñi nu tı̄n tatyı̄ can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yahā cahan yu tsihin ra tsicā tsihin un naha ra tyin tava ra naha tatyı̄ ña vaha can, maa tyin ña cuvı̄ tava ra naha tsi nu —catyí ra can tsihin ra Jesús.

<sup>19</sup> Nacahān ra Jesús tan catyí ra:

—ı̄Nyooho nyı̄vı̄ ña tsinú iñi tan caquiñi! ¿Ndáa nda quı̄vı̄ cua cunyı̄ yu tsihin ndo? ¿Tan najava ca quı̄vı̄ cua cunyeer iñi yu nyehe yu tsi ndo tyin ña tsinú vaha iñi ndo tsi yu? Ndāca ndo tsi ra luhlu can tsi yu ihya —catyí ra.

<sup>20</sup> Tacan tan tsindacā jutu ra luhlu can tsi ra tsi ra Jesús. Tan cuhva tsa nyehe nu tatyı̄ ña vaha can tsi ra Jesús, janduvā nu tsi ra luhlu can tan quitsahā tsicó tuvi ra nu ñuhu jahā nu. Tan quita tiñuu yuhu ra.

<sup>21</sup> Tacan tan tsicā tuhun ra Jesús tsi jutu ra luhlu can tan catyí ra:

—¿Ama quitsahā taahān ra tyehen?

Tan nacahān jutu ra luhlu can, tan catyí ra:

—Nda ndi luhlu xaan ra.

<sup>22</sup> Tan cuaha tsaha tyihı̄ tatyı̄ ña vaha can tsi ra nu cayú ñuhu, tan nu ndutya. Cuñı̄ nu cahñi nu tsi ra. Maa tyin tun cuvı̄ javaha un náa javaha un tsihin ra, cundaahvi iñi tsi ndi, tan jatı̄nyee tsi ndi —catyí jutu ra luhlu can tsihin ra Jesús.

<sup>23</sup> Tan catyí ra Jesús tsihin ra:

—Tun tsinú iñi un, tandihí tan cua cuví tyin tsa cuenda ra tsa tsinú iñi tandihí tan cuví —catyí ra Jesús.

<sup>24</sup> Tacan tan cana tsa jutu ra tan catyí ra tsihin ra Jesús:

—¡Tsinú iñi yu! ¡Jatyinyee tsi yu na tsinu ca iñi yu! —catyí ra tsihin ra.

<sup>25</sup> Cuhva tsa nyehe ra Jesús tyin cuaha nyivi ndu iin nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduhí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihví ca un tsi ra —catyí ra Jesús tsihin nu tatyí ña vaha can.

<sup>26</sup> Tacan tan quiñi xaan cana tsa nu tatyí can tan janduva nu tsi ra inga tsaha, tan quita nu tsi ra. Tan jacúu naaha nu tsi ra. Tan cuñí maa nyivi tyin tsa tsihi ra.

<sup>27</sup> Maa tyin ra Jesús tñin ra ndaha ra luhlu can, tan cañihí ra tsi ra, tan tsinyaa nyityi ra.

<sup>28</sup> Tacan tan quihví ra Jesús tsitsi iin vehe, tan tsicá tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

<sup>29</sup> Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

*Nu cahan ra Jesús inga tsaha tyin cua cahñi nyivi tsi ra*

(Mt. 17.22-23; Lc. 9.43-45)

<sup>30</sup> Quiví tsa quita ra Jesús ican, tan ra tsicá tsihin ra yaha ra naha ñuhú Galilea. Tan ña cuñí ra Jesús tsa coto nyivi iyó ican tyin nyíi ra nu iyó ñi.

<sup>31</sup> Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayi tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi.

<sup>32</sup> Maa tyin ra ican naha ra ña cuñí iñi ra naha tsa caahán ra tsihin

ra naha. Tan ña cuñí ra naha ndaca tuhun ra naha tsi ra tyin yuuhví ra naha.

*Nu janahá ra Jesús yoo ra cahnu ca cuví tsitsi tsa tandihí nyivi tsa ndacá ñaha Nyoo*

(Mt. 18.1-5; Lc. 9.46-48)

<sup>33</sup> Tan tsa tsaá ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicá tuhun ra Jesús tsi ra naha tan catyí ra:

—¿Náa natuhún xaan ndo ityi vatsi yo? —catyí ra tsicá tuhun ra.

<sup>34</sup> Tsa cahan ra Jesús tacan, taxin ña cuví ra naha, tyin ityi vatsi ra naha natuhun ra naha yoo ra cahnu ca cuví tsa nuu tandihí ra naha.

<sup>35</sup> Tacan tan tsinyaa ra Jesús tan cana ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñí cuvi ityi nuu, cuñí tsi cuví ndo nda nu ndihí ña tsa nuu tandihí ndo, tan jatyinyee ndo tsi tandihí nyivi —catyí ra Jesús tsihin ra naha.

<sup>36</sup> Tacan tan quihin ra iin ra luhlu tyaa ra mahñu ra naha. Tan tyihí jucun ndaha ra tsi ra luhlu can, tan catyí ra:

<sup>37</sup> —Nyivi naquihin iin nyivi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñí ñi tsi yu. Tan nyivi naquihin cuenda tsi yuhu, naquihin cuenda tucu ñi tsi ra tsa jaquitsi tsi yu tan ñavin maa ñi maa yu naquihin cuenda ñi.

*Nyivi tsa ña cuxaán tsi yo, juvin ñi ican jatyinyee tsi yo*

(Mt. 10.42; Lc. 9.49-50)

<sup>38</sup> Tacan tan catyí ra Juan tsihin ra Jesús:

—Maestro, nyehe ndi iin ra tava tatyí ña vaha tsi nyivi tsihin sivi un. Maa tyin tyasi ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

<sup>39</sup> Maa tyin catyí ra Jesús tsihin ra:

—Ña casi ndo nu javaha nyivi tacan. Tyin ndi intuhun ñi tsa javaha tsa iyo tsihin sivi yu tan ña cua cana iñi ñi cahan ñi ndavaha ñi tsi yu.

<sup>40</sup> Tyin nyiví tsa ña xaan iñi tsi yo, tsihin yo cutahán ñi.

<sup>41</sup> Tan nyiví tsa cua cuhva vasu tan iin yatsin ndutya coho ndo tyin tsinú iñi ndo tsi yu, cua cuhva Nyoo tsa cua cuhva ra tsi ñi.

*Nu tsahá cuenda ra Jesús tsi yo nácaa jaha cuenda yo tsi yo tan ña javaha yo tsa ña vaha*

*(Mt. 18.6-9; Lc. 17.1-2)*

<sup>42</sup> 'Nyiví cua natyuhu tsi iin nyiví tsa ñaha ca tsinú vaha iñi tsi yu tyin javaha ñi tsa caquiñi, vaha ca cuhñi nyiví yuu yoso vee jucun ñi tan cujaneñi ñi tsi ñi tsitsi nu cunu ndutya ñuhu.

<sup>43</sup> Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihví un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un.

<sup>44</sup> Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

<sup>45</sup> Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu.

<sup>46</sup> Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

<sup>47</sup> Tun tinuu un javahá tsa ña vaha, çasi nu javahá can tacan. Tatun ña cuví, çava can tan javita un tyin vaha ca quihví un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un.

<sup>48</sup> Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

<sup>49</sup> 'Maa tyin tandihí nyiví nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua

nduvaha ñi jahá Nyoo, tumaa tuhvá nyayu nduvahá tsihin ñi.

<sup>50</sup> Vaha xaan ñi. Maa tyin tun ndihí tsa uhva tsi, ña jandu uhva ca tsi tan ña cuvi ca cuatyíñu nyiví itsi. Yacan cuenda nyoocho, ña jandihí ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuvi coo taxin ndo tsihin tahan ndo.

## 10

*Nu caahán ra Jesús tyin ña vaha nacoo rayí ñasihi ra*

*(Mt. 19.1-12; Lc. 16.18)*

<sup>1</sup> Quita ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyiví nu nyí ra, tacan tan quitsaha jacuahá ra tsi ñi tumaa tuhvá maa ra javahá.

<sup>2</sup> Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatun vaha nacoo rayí ñasihi ra.

<sup>3</sup> Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

<sup>4</sup> Tan nacahan ra naha tan catyí ra naha:

—Ra Moisés catyí ra tyin cuví caní ndi tutu cuenda ley ndi, tacan tan cuvi nacoo ndi ñasihi ndi —catyí ra naha tsihin ra.

<sup>5</sup> Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo.

<sup>6</sup> Maa tyin quiví jihna ñi, quiví javaha Nyoo tandihí maa tsa iyó, catyí nu tutu ra tyin javaha ra rayí tan ñaha.

<sup>7</sup> “Yacan cuenda taahán tsi nacoo rayí jutu ra tan sihi ra tan ndu iin ra tsihin ñasihi ra.

<sup>8</sup> Tan nduvi ñi cua cuvi ñi tumaa intuhun ña nyiví.” Yacan cuenda ñavin ca uvi taahan ñi, tyin intuhun ña nyiví cua cuvi ñi.

<sup>9</sup> Yacan cuenda, ña cuví jasiin nyiví tsa jandu iin Nyoo —catyí ra Jesús tsihin ra naha.

<sup>10</sup> Yaha can tan cuanuhu ra nda yuvehe, tan quitsaha nducú tuhun nyico ra tsicá tsihin ra siqui tuhun can.

<sup>11</sup> Tan catyí ra Jesús tsihin ra naha: —Ra tsa cua nacoo ñasiihi tan quihin ra inga ñaha, cua coo cuatyí ra nu Nyoo.

<sup>12</sup> Tacan tucu ñi ñaha: Tun nacoo ña tsi yí ña tan tindaha ña tsihin inga rayí, juvin ñi cua coo tucu cuatyí ña —catyí ra Jesús.

*Nu nasoco ra Jesús tsi tsa nyihi*  
(Mt. 19.13-15; Lc. 18.15-17)

<sup>13</sup> Tacan tan tsindaca nyívi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyívi cuahán cuandacá tsa nyihi.

<sup>14</sup> Maa tyin tsa nyehe ra Jesús tsa javahá ra naha tacan, cuxaán ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña casi ndo itsi naha tsi tyin nyívi ndacá ñaha Nyoo cuví ñi tumaa cuví tsa nyihi tyin tsinú ñi ñi tsi Nyoo.

<sup>15</sup> Tan tsa nditsa catyí yu tsihin ndo tun ña cuita ñi nyívi tsi Nyoo tumaa nyitá ñi iin ra luhlu tsi jutu ra, ña cua cuví quihvi ñi nu ndacá ñaha Nyoo —catyí ra Jesús tsihin ra naha.

<sup>16</sup> Tacan tan quihin ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

*Nu tsaha cuenda ra Jesús tyin yí xaan nacuhva cuenda iin ra cuca tsi ra tsi Nyoo*

(Mt. 19.16-30; Lc. 18.18-30)

<sup>17</sup> Yaha yacan tan cuahán ra Jesús. Tan tsinú xaan iin rayí cuahán ra cuanyicún ra tsi ra. Tsa tahan ra tsi ra, tsicuiñi tsi ra nuu ra, tan tsica tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayívi nyito tsa ña cua naa maa? —catyí ra tsihin ra Jesús.

<sup>18</sup> Tan catyí ra Jesús tsihin ra: —¿Nacuenda catyí un tyin ra vaha cuví yu? Tan intuhun ñi ra vaha iyó

tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu.

<sup>19</sup> Yooho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyívi. Ña suhu un. Ña cahan un cuendu. Ña jandavi ñaha un tsi nyívi. Tyaa yahvi tsi jutu un tan tsi sihi un” —catyí ra Jesús tsihin ra.

<sup>20</sup> Nacahan ra tan catyí ra:

—Maestro, tandihi tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

<sup>21</sup> Tacan tan sii cuñi ra Jesús nyehe ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihi tsa iyó tsi un, tan cuhva un xuhun can tsi nyívi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyívi tsi un —catyí ra Jesús tsihin ra.

<sup>22</sup> Tsa tsiñi ra tyuvaa can tsa cahan ra Jesús tacan, cuihya xaan cuñi ra cuví, tan tsihin tucuihya ñi cuanuhu ra yuvehe ra tyin cuca xaan ra.

<sup>23</sup> Tacan tan nanyehe ra Jesús nanii canduvi nu nyaá ra, tan catyí ra tsihin ra tsicá tsihin ra:

—¿Yí xaan tan cuví nacuhva cuenda nyívi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

<sup>24</sup> Tsa tsiñi ra tsicá tsihin ra tsa caahán ra, iyó xaan cuñi ra naha cuví. Maa tyin catyí tucu ra tsihin ra naha inga tsaha:

—¿Sehe yu, nyívi tyaá xaan jiñi tandihi tsa cuca, yí xaan tan quihvi ñi nu ndacá ñaha Nyoo!

<sup>25</sup> Yatyí ca cuví yaha iin camellu xuu iin yíqui tucu, tan ñavin ca tsa quihvi iin nyívi cuca nu ndacá ñaha Nyoo —catyí ra Jesús.

<sup>26</sup> Tsa tsiñi ra naha tuhun ihya, iyó xaan cuñi ra naha cuví, tan quitsaha tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.



<sup>27</sup> Tacan tan nanyehę ra Jesús tsi ra naha tan catyí ra tsihin ra naha:

—Nyiví ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yíi.

<sup>28</sup> Tacan tan catyí ra Pedro tsihin ra:

—Jutu Mañi yu, tandihi maa tsa iyó tsi ndi nacoó ndi can tan nyicún ndi tsi un.

<sup>29</sup> Nacahan ra Jesús tan catyí ra:

—Tsa nditsa catyí yu tsihin ndo tyin tandihi nyooho tan tandihi inga ca nyiví tsa cua nacoó vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyiví tyin cuñí Nyoo jacacu ra tsi ñi,

<sup>30</sup> cua ñihi ñi cientu ca tsaha siquí tsa nacoó ñi nu ñuhu ñayiví ihya. Cua ñihi ñi vehe, cua ñihi ñi nyiví cua cuví yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyiví tundoho tsi ñi. Tan nu inga ñuhu ñayiví tsaa tsa vatsí, cua ñihi ñi ñayiví nyito tsa ña cua naa maa coo ñi.

<sup>31</sup> Cuaha ñi nyiví cuahán ityi nuu vityin, cua cuhun ñi nda nu ndihi ña. Tan nyiví cuahán nu ndihi ña vityin, cuaha ñi cua cuhun ityi nuu —catyí ra Jesús.

*Nu jacotó nyico ra Jesús nácaa cua cahñi nyiví tsi ra*

*(Mt. 20.17-19; Lc. 18.31-34)*

<sup>32</sup> Tsa tsa cuñí cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihi nyiví tsa cuahán cuanyicún tsi ra. Iyo xaan cuñí ñi tan tsihin tsa yuuhví ñi cuahán ñi. Tacan tan tava sñin ra tsi tsa utsi uvi ra tsicá maa tsihin ra. Tan quitsahę catyí tuhun ra tsihin ra naha tsa cua tahan ra.

<sup>33</sup> Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyiví tsi yuhu, Rayi quee nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyi ra naha tyin

taahán tsi cúu yu tan cua nacuhva cuenda ra naha tsi yu tsi ra ñuu Roma naha ra.

<sup>34</sup> Cua vacu nducu ra naha tsi yu, cua cañi ra naha tsi yu, cua tiví sñi ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quiví —catyí ra Jesús.

*Nu tsicán ra Jacobo tan ra Juan iin tumañi iñi tsi ra Jesús*

*(Mt. 20.20-28)*

<sup>35</sup> Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

<sup>36</sup> Tacan tan tsicę tuhun ra Jesús tsi ra naha tan catyí ra:

—¿Náa cuñí ndo javaha yu?

<sup>37</sup> Tan nacahan ra naha tan catyí ra naha:

—Cuñí ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

<sup>38</sup> Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

<sup>39</sup> Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu.

<sup>40</sup> Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyi yoo cua ñihi can —catyí ra Jesús tsihin ra naha.

<sup>41</sup> Tsa tsiñi tsa utsi ca ra tsicá tsihin ra Jesús yacan, cuxaan ra naha tsi ra Jacobo tan ra Juan.

<sup>42</sup> Maa tyin canę ra Jesús tsi ra naha tan catyí ra tsihin ra naha:



—Tsa tsitó ndo tyin ra ndacá ñaha tsi nyívi iyó nu ñuhu ñayívi ihya, ñihi xaan ndacá ñaha ra naha tsi ñi.

<sup>43</sup> Maa tyin ñavin tacan taahán tsi javaha nyooho tyin ra tsa cuñi cuvi ra cahnu ityi nuu Nyoo, cuñi tsi cuvi ra musu tandihí ndo.

<sup>44</sup> Tan nyooho tsa cuñi cuví ityi nuu, cuñi tsi cuví ndo musu tandihí ca ndo.

<sup>45</sup> Tyin yuhu, Rayí tsa quee nda gloria, ña vatsí yu tyin cuñi yu jatyinyee nyívi tsi yu. Yuhu vatsí yu vatsí jatyinyee yu tsi maa ñi tan cuhva yu ñayívi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

*Nu jananyehę ra Jesús tsi ra Bartimeo*

(Mt. 20.29-34; Lc. 18.35-43)

<sup>46</sup> Tacan tan tsaá ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyívi cuahán cua nyicun tsi ra naha. Tan ityi yaha ra naha nyaá iin ra cuaa nañi Bartimeo, sehe ra Timeo, tsicán ra caridaa.

<sup>47</sup> Tan cuhva tsa tsitó ra cuaa can tyin tsa cua cuyatyin yaha ra Jesús, ra ñuu Nazaret, nu nyaá ra, quitsaha caná tsa ra, tan catyí ra:

—¡Jesús, tata ra David, cundaahvi iñi tsi yu! —catyí ra caná tsa ra.

<sup>48</sup> Tacan tan quitsaha cuxaan nyívi tsi ra tan catyí ñi tsihin ra na cutaxin ra, maa tyin cuñihí ca ra caná tsa ra tan catyí ra:

—¡Tata ra David, cundaahvi iñi tsi yu! —catyí ra.

<sup>49</sup> Tacan tan tsicuiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, cohon tyin caná ra tsi un —catyí ra naha tsihin ra.

<sup>50</sup> Tacan tan janehñi ra jahma ndasi ra nda sava. Tan cuahan ra iin yaha ñi nda nu nyaá ra Jesús.

<sup>51</sup> Tacan tan tsicá tuhun ra Jesús tsi ra:

—¿Náa cuñi un javaha yu?

Tan nacahan ra cuaa can tan catyí ra:

—Maestro, cuñi yu janduvaha un tinuu yu na nanyehe nyico yu —catyí ra.

<sup>52</sup> Tan catyí ra Jesús tsihin ra:

—Cuanuhu. Tsa nduvaha un tyin tsinú iñi un tsi yu.

Juvin ñi cuhva can tan nanyehe ra can. Tan cueta cuahán ra cuanyicún ra tsi ra Jesús.

## 11

*Nu quihvi ra Jesús ñuu Jerusalén*

(Mt. 21.1-11; Lc. 19.28-40; Jn. 12.12-19)

<sup>1</sup> Tsa tsa cuñi tsa ra Jesús tan nyívi nyicún tsi ra nda ñuu Jerusalén, yatyin nu canyí ñuu Betfagé tan ñuu Betania, tan yatyin ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

<sup>2</sup> —Cuaahan ndo ñuu tsa canyí ityi nuu ihya. Tsa tsa ndo ican cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quihí tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu.

<sup>3</sup> Tatun cusana ndaca tuhun nyívi tsi ndo: “¿Nacuu ndo urru ihya?” Tacan tan catyí ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyí ndo tsihin ñi —catyí ra Jesús tsihin ra naha.

<sup>4</sup> Tacan tan cuahán ra naha, tan tsa tsaá ra naha, nañihí ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti.

<sup>5</sup> Tan catyí juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsí ndo urru can? —catyí ra naha tsihin ra naha.

<sup>6</sup> Tacan tan nacahan ra naha tumaa cahan ra Jesús tsihin ra naha. Tan tsaha ra can naha ra quihin ra naha urru can.

<sup>7</sup> Tacan tan tsindaca ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti.

8 Tan tsaquın cuaha nyivi jahma ñi tsitsi ityi nu yaha ra, tan inga ñi tsahnya ñi ndaha yutun tan tsaquın ñi tsitsi ityi.

9 Tacan tan nyivi tsa cuahán ityi nuu ra tan ityi tsata ra, quitsaha caná tsa ñi tan catyí ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo!

10 ¡Na jacahnu yo tsi ra vatsí cundaca ñaha tumaa tsindaca ñaha ra David, tsii tsaahnu yo! ¡Cahnu xaan cuví ra nyaá gloria! —catyí ñi.

11 Tacan tan quihvi ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yaha nyehe ra tandihí tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

*Nu cahan ra Jesús tsi yutun higo tsa ña tsahá tsiti*

*(Mt. 21.18-19)*

12 Tsa tuvi inga quivi tsa quita ra Jesús tan ra tsicá tsihin ra ñuu Betania, tsaá soco tsi ra Jesús.

13 Tsa quita ra naha ndasava nyehe ra Jesús nu nyaá iin yutun higo tsa iyó numa. Tsahan ra tsinyehé ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti.

14 Tacan tan cahan ra Jesús tsi tun, tan catyí ra:

—Ndi iin sava ca quivi ña cua quee ca tsiti catsi nyivi nuu un —catyí ra tsihin tun.

Tan tsiñi ra tsicá tsihin ra tsa caahán ra.

*Nu jacunu ra Jesús nyivi xicó nuquehe vehe ñuhu cahnu*

*(Mt. 21.12-17; Lc. 19.45-48; Jn. 2.13-22)*

15 Tsa tsaá ra naha ñuu Jerusalén, cuahán nyico ra Jesús vehe ñuhu cahnu tan quitsaha jacunú ra nyivi xicó tan jatá tsa yucú nuquehe yu-vehe ñuhu can. Janduvá ra mesa nu nyecú nyivi samá xuhun nyivi. Tan janduvá tucu ra tyayu nu nyecú nyivi xicó paloma.

16 Tan ña tsaha ca ra yaha sava ñi nuquehe vehe ñuhu can tsihin ndaha tyiñu.

17 Tan quitsaha jacuahá ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé nani nu ñuhu ñayivi tsi Nyoo”? Tan nyooho jananduví ndo itsi vehe ñasuhu —catyí ra tsihin ñi.

18 Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsaha nducú ra naha cuhva cahni ra naha tsi ra tyin yuuhví ra naha nyehe ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nycún tsi ra.

19 Maa tyin tsa tsa cuñi cuaa, quita ra Jesús ñuu can tsihin ra tsicá tsihin ra.

*Nu na ityi yutun higo*

*(Mt. 21.20-22)*

20 Tsa tuvi inga quivi, yaha nyico ra naha nu nyaá yutun higo tsa cahan ra Jesús. Tan nyehe ra naha tyin na ityi tun tan nda cuanda yoho tun na ityi.

21 Tacan tan tsa nyehe ra Pedro yutun higo can, nducuhun iñi ra tsa javaha ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahan un —catyí ra.

22 Nacahan ra Jesús, tan catyí ra:

—Tsinu iñi ndo tsi Nyoo.

23 Tyin tsa nditsa catyí yu tsihin ndo tyin nyivi cua cahan tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatun tsinú iñi ñi tyin cua cundaa tsa cahan ñi tan ña uvi tsicá iñi ñi, cua cundaa tsi.

24 Yacan cuenda catyí yu tsihin ndo tyin tandihí tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihin cuenda ndo can, cua naquihin ndo can.

25 Tan tsa cua ndacan tahvi ndo tsi Nyoo, tun nducuhun iñi ndo tyin

xaan cuñí ndo tsihin nyívi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo.

<sup>26</sup> Maa tyin tun ña jaha ndo tucahnu iñi tsi nyívi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

*Nu tsicā tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyívi*

(Mt. 21.23-27; Lc. 20.1-8)

<sup>27</sup> Tacan tan tsaā nyico ra naha ñuu Jerusalén. Tsa nyíi ra Jesús tsicá nuu ra nuquehe vehe ñuhu cahnu, natuhva ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyívi Israel naha ra nu nyaá ra.

<sup>28</sup> Tan tsicā tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

<sup>29-30</sup> Tan nacahan ra Jesús, tan catyí ra:

—Cuñí tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyívi? ¿A Nyoo o nyívi? Tatun catyí tuhun ndo tsihin yu yóo jaquitsi tsi ra, cua catyí tuhun tucu yuhu tsihin nyooho yóo tava tyiñu tsi yu javahá yu tyehen —catyí ra Jesús tsihin ra naha.

<sup>31</sup> Tacan tan quitsaha caahán yuhu tahan ra naha, tan catyí ra naha:

—Tun catyí yo tyin Nyoo jaquitsi tsi ra Juan, cua catyí ra tsihin yo tyehen: “Tun Nyoo jaquitsi tsi ra, ¿nacuenta ña tsinu iñi ndo tsa cahan ra?”

<sup>32</sup> ¿A vaha tun catyí yo tyin nyívi jaquitsi tsi ra? Ña cuvi —catyí ra naha, tyin yuuhví ra naha tsi nyívi, tyin tandihí ñi tan tsinú iñi ñi tyin ndusu yuhu Nyoo cuví ra.

<sup>33</sup> Tacan tan catyí ra naha tsihin ra Jesús:

—Ña tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyí tuhun yu tsihin ndo

yóo tava tyiñu tsi yu tsa javahá yu tyehen —catyí ra Jesús tsihin ra naha.

## 12

*Nu caahán ra Jesús tuhun ra ña vaha jaha tyiñu*

(Mt. 21.33-46; Lc. 20.9-19)

<sup>1</sup> Tacan tan quitsaha caahán ra Jesús tsihin ra naha tsihin cuhva ihya, tan catyí ra:

—Tsicoo iin rayi tsa tatsi yoho yucu vixi tsa nañi uva, ra ican tyasi ra iin cora nanii canduvi nu tatsi ra yucu vixi can. Tan javaha ra iin nu cua tava ra ndutya uvas can. Tan javaha tucu ra iin vehe sucun tyin tacan tan cuvi jaha cuenda ra nanii cahnu nu ndaha tyiñu ra.

“Tsa yaha yacan tan tsaha nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu.

<sup>2</sup> Tsa tahan tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra.

<sup>3</sup> Maa tyin ra ican naha ra tñin ra naha tsi ra. Tan cañi ra naha tsi ra. Tan jacunuhu ra naha tsi ra tsihin ndaha ndii ra.

<sup>4</sup> Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahan nyaa ra naha tsi ra.

<sup>5</sup> Tsitoho ñuhu can jacuhun nyico ra inga musu. Tan tsahñi ra naha tsi ra. Yaha yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

<sup>6</sup> “Tan cumañi intuhun ña ra tsa cuví jacuhun ra. Tan ra ican cuví sehe ra tsa cuñi xaan ra. Nu ndihí tuhun jacuhun ra sehe ra tyin cuñi maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuví ra”, cuñi ra.

<sup>7</sup> Maa tyin tsa nyehe ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihya cua naquihin cora ihya. Yacan

vaha ca cahñi yo tsi ra, tan ndoo maa yo tsihin can”, catyí ra naha.

<sup>8</sup> Tacan tan tñin ra naha tsi ra tan tsahñi ra naha tsi ra. Tan tava ra naha cuñu ñuhu ra ityi tsata cora can —catyí ra Jesús.

<sup>9</sup> Tacan tan tsica tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can.

<sup>10</sup> ¿A ñaha ca cahví ndo nu tutu Nyoo nu catyí tsi tyehen?

Yuu tsa javita ra javahá vehe naha ra, yacan cuví yuu tsa tsiñi ñuhu ca.

<sup>11</sup> Maa Nyoo Jutu yo jahá tsa cahnu ca cuví yuu ihya. Tan iyo xaan cuñi yo nyehé yo can, catyí tsi —catyí ra Jesús tsihin ra naha.

<sup>12</sup> Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyiñu ra cuhva can. Maa tyin ña tñin ra naha tsi ra tyin yuuhví ra naha nyehé ra naha tsi nyivi. Nacoo ra naha tsi ra, tan cuahán ra naha.

*Nu caahán ra Jesús siqui tuhun tsa tyahví nyivi xuhun tsi ra ñuu Roma tsa ndacá ñaha tsi nyivi Israel*

*(Mt. 22.15-22; Lc. 20.20-26)*

<sup>13</sup> Tacan tan jacuhun ra naha juhva ra yihí cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahan ra Jesús iin tsa ña vaha tyin tacan tan cuvi tyaa ra naha cuatyí tsi ra.

<sup>14</sup> Tsa tsaa ra can naha ra tan quit-sahá caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñi un nyehé un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñi ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi

yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

<sup>15</sup> Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Naca ndo iin xuhun tsi yu ihya, na nyehé yu —catyí ra.

<sup>16</sup> Tsindaca ra naha xuhun can tsi ra. Tsa nyehé ra can tan tsica tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

<sup>17</sup> Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñi ra naha tsihin tsa nacahan ra.

*Nu cuñi ra saduceo naha rajandavi ñaha ra naha tsi ra Jesús*

*(Mt. 22.23-33; Lc. 20.27-40)*

<sup>18</sup> Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto nyivi. Yacan cuenda cahan ra naha tyehen tan catyí ra naha tsihin ra Jesús:

<sup>19</sup> —Maestro, ra Moisés tyaa ra nácaa taahán tsi javaha yo tatun iin rayii tsihi tan ndoo ñasihí ra tan nduve sehe ña tsicoo tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi.

<sup>20</sup> Iin tsaha iin rayii tsicoo utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoo tsihin ña, tan tsihi ra.

<sup>21</sup> Tacan tan tindaha ra yañi ra tsa tsinu uvi tsihin ñaha tsa ndoo can. Maa tyin juvin ñi ña tsicoo sehe ra tsihin ña tan tsihi ra. Juvin ñi tacan tahañ tucu ra tsa tsinu uñi.



22 Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoo sehe ra naha tsihin ña. Tan nu ndihí tuhun, tsihí ndihí maa ña.

23 Tan vityin, tun nditsa tsa cua nandoto nyivi, ¿ndáa tsa utsa taahan ra can naha ra cua cuvi yí ña quivi cua nandoto ñi? Tyin tandihí maa ra naha tan tindaha ra naha tsihin ña —catyí ra naha tsihin ra Jesús.

24 Tacan tan nacahan ra Jesús tan catyí ra tsihin ra naha:

—Caahán soho ñi maa nyooho, tyin ña tsitó ndo tsa catyí tuhun Nyoo, tan ndi ña tsitó ndo nácaa tsa cahnu cuvi tunyee iñi tsa iyó tsi Nyoo.

25 Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuvi ñi tumaa ángel iyó gloria.

26 Tan tuhun tsa cua nandoto nyivi, ¿a ñaha ca cahvi ndo nu libru tsa tyaa ra Moisés nu catyí tsi nácaa cahñ Nyoo tsihin ra nu cayú yutun iñu? Tyin catyí ra tsihin ra tyehen: “Yuhu cuvi Nyoo ra Abraham, ra Isaac, tan ra Jacob”, catyí Nyoo tsihin ra Moisés.

27 Ihya nyehé yo tyin nyito añaima ra can naha ra vasu ndi maa tsanaha tsihí ra naha tyin Nyoo ñavin Nyoo nyivi tsihí cuvi ra, tyin Nyoo cuvi ra Nyoo nyivi nyito. Yacan cuenda catyí yu tyin nyooho caahán soho ñi maa ndo —catyí ra Jesús tsihin ra naha.

*Ley tsa ñiñi ca tsa tsaha Nyoo*  
(Mt. 22.34-40)

28 Ña naha ñi tan tsañ iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsito ra tyin ra Jesús vaha nacahan ra tsihin ra naha, tsicā tuhun ra tsi ra tan catyí ra:

—Tsitsi tsa tandihí ley, ¿ndáa tsa ñiñi ca cuñi tsi javaha yo? —catyí ra.

29 Tan nacahan ra Jesús tan catyí ra:

—Ley tsa jihna ñi tan ñiñi ca cuñi tsi javaha yo tsa nuu tandihí ley, cuvi ley ihya: “Nyooho nyivi Israel, tyaa soho ndo: intuhun ñi maa Nyoo Jutu yo iyó.

30 Cuñi ndo tsi Jutu Mañi yo Nyoo tsihin tsa ñi iñi ndo, tan tsihin tsa ñi iñi añaima ndo, tan tsihin tandihí tsa tsiñi tuñi jiñi ndo, tan tsihin tandihí tunyee iñi tsa iyó tsi ndo.” Ley ihya cuví tsa ñiñi ca tan tsa jihna ñi taahán tsi javaha yo.

31 Tan tsa tsinu uvi tsa yatyin inducu ñi caahán tsi tsihin tsa jihna ñi tan catyí tsi tyehen: “Cuñi tahan ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

32 Tacan tan ra maestro cuenda ley can catyí ra tsihin ra:

—Vaha xaan nacahan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó.

33 Tan tsa cuñi yo tsi Nyoo tsihin tsa ñi iñi yo, tan tsihin tandihí tsa tsiñi tuñi jiñi yo, tan tsihin tsa ñi iñi añaima yo, tan tsihin tandihí tunyee iñi iyó tsi yo, tan tsa cuñi tahan yo tsi yo tumaa cuñi yo tsi maa yo, tandihí yacan tan cahnu ca cuvi can tan ñavin ca tsa jamañi yo tsi Nyoo, tsa tsahñi yo quití tan tsahmí yo can nu altar —catyí ra maestro cuenda ley can tsihin ra Jesús.

34 Tsa nyehe ra Jesús tyin vaha nacahan ra tsihin tsa catsi jiñi ra, tan catyí ra tsihin ra:

—Luxu cui ña tan ñihi un cuhva nácaa nacuhva cuenda un añaima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyivi tan ña cana ca iñi ñi ndaca tuhun ñi náa ndaca tuhun ñi tsi ra Jesús.

*Ra Cristo Sehe Nyoo tsi ra tan juveni ñi cuvi tucu ra tata ra David*  
(Mt. 22.41-46; Lc. 20.41-44)

35 Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuvi ra Cristo?

36 Tan juveni ñi maa ra David catyí tuhun ra Cristo tyehen:

Nyoo cahñ ra tsihin Jutu Mañi yu, tan catyí ra:

“Cunya xiin cuaha yu ihya nda cuanda caquin yu tsi ra xaan



iñi tsi un naha ra tsaha un”,  
catyí ra David tahañ tsanaha  
jaha Tatyí li Nyoo.

<sup>37</sup> ¿Nacaa cuví cuú tucu ra Cristo tata  
ra David, tan juvin ñi maa ra David  
catyí tyin ra Cristo cuví Jutu Mañi ra?  
—catyí ra Jesús.

Tan cuaha nyívi yucú tyaá soho tsa  
caahán ra tan sii xaan cuñí ñi.

*Nu caahán ra Jesús tyin iyó cuaha  
cuatyí ra maestro cuenda ley vehe  
ñuhu naha ra*

(Mt. 23.1-36; Lc. 11.37-54; 20.45-  
47)

<sup>38</sup> Quitsaha jacuahá ra Jesús tan  
catyí ra tyehen:

—Jaha ndo cuenda tsi ndo tsihin ra  
maestro cuenda ley vehe ñuhu naha  
ra, tyin taahán xaan iñi ra naha cun-  
ditsí ra naha jahma nañi tan caca  
nuu ra naha nuyahvi na jaha ndo  
tsa ñayívi tsi ra naha, tan cuhva ndo  
nacumi tsi ra naha.

<sup>39</sup> Tan nanducú ra naha tyayu vaha  
ca cunyecú ra naha tsitsi vehe ñuhu.  
Tan tsa cua catsi ra naha nu iyó vico,  
nanducú ra naha nu vaha ca cunyecú  
ra naha.

<sup>40</sup> Tan quihín nyaá ra naha vehe  
ñi ndaahvi tsa tsihi yí tyin ña cuví  
tyahvi ñi xuhun tsa tsicán ra naha tsi  
ñi. Tan cuñí ra naha tsa vaha cahan  
nyívi tuhun ra naha. Yacan cuenda  
naha tsicán tahvi ra naha tsi Nyoo nu  
tuvi nyívi. Maa tyin nduve náa catyí  
javahá ra naha tacan tyin ñihi ca cua  
tatsi tuñi Nyoo tsi ra naha —catyí ra  
Jesús.

*Tsa tsaha ñaha ndaahvi tsihi yí*  
(Lc. 21.1-4)

<sup>41</sup> Iin tsaha nyíi ra Jesús tsitsi vehe  
ñuhu cahnu tan nyaá ra yatyin ñi nu  
nyíi tsatun nu tyihí nyívi xuhun tsa  
tsahá ñi tsi Nyoo. Tan nyehé ra nu  
tyihí nyívi xuhun tsitsi tsatun can.  
Tan cuaha nyívi cuca tyihí ñi cuaha  
xaan xuhun.

<sup>42</sup> Tsitsi tsa nyaá ra ican tsaá iin  
ñaha ndaahvi tsihi yí, tan tyihí ña uvi  
taahan ñi xuhun tyihí tsa caaha xaan  
nyaá.

<sup>43</sup> Tacan tan cana ra Jesús tsi ra  
tsicá tsihin ra, tan catyí ra tsihin ra  
naha:

—Tsa nditsa catyí yu tsihin ndo  
tyin nuu Nyoo cuaha ca xuhun tsaha  
ñaha ndaahvi ihya tan ñavin ca inga  
nyívi.

<sup>44</sup> Tyin tsahá ñi tsa ndoo siqui  
xuhun ñi. Maa tyin ñaha ihya tyihí ña  
tandihí tsa iyó tsi ña —catyí ra Jesús.

## 13

*Nu caahán ra Jesús tyin cua tani  
vehe ñuhu cahnu*

(Mt. 24.1-2; Lc. 21.5-6)

<sup>1</sup> Cuhva tsa cua quita ra Jesús tsitsi  
vehe ñuhu cahnu can, iin ra tsicá tsi-  
hin ra catyí ra tsihin ra:

—¡Maestro, nyehé jihna tsa sii caá  
yuu yíhi vehe ihya! ¡Nyehé tsa nahnu  
vehe ihya! —catyí ra tsihin ra Jesús.

<sup>2</sup> Maa tyin nacahan ra Jesús, tan  
catyí ra tsihin ra:

—Nditsa nahnu vehe ihya tan sii  
caá tsi nyehé yo vityin. Maa tyin catyí  
yu tsihin un tyin coo quívi nduve ca  
maa náa cua ndoo ihya. Ndi intuhun  
yuu tan ña cua coso tahan tsi tsihin  
inga tsi, tyin tandihí maa tsi tan cua  
tani tsi —catyí ra Jesús.

*Nu tsahá cuenda ra Jesús náa cua  
cuví tsa ndi cumañi ca naa ñuhu ñayívi*  
(Mt. 24.3-28; Lc. 21.7-24; 17.22-24)

<sup>3</sup> Tacan tan cuahán ra Jesús tsihin  
ra tsicá tsihin ra yucu yutun Olivo tsa  
canyí inga tsiyo nu nditsin nyehé tsi  
vehe ñuhu cahnu. Tsa tsinyaá ra Jesús  
ican, ra Pedro, ra Jacobo, ra Juan, tan  
ra Andrés tsicá tuhun xeehe ra naha  
tsi ra tan catyí ra naha:

<sup>4</sup> —Cuñí ndi tsa catyí tuhun un  
tsihin ndi ama cua cuví tandihí tsa  
cahan un. ¿Nacaa tan coto ndi tatun  
tsa cuyatyin cundaa tandihí can?  
—catyí ra naha.

<sup>5</sup> Nacahan ra Jesús tan catyí ra:  
—Jaha ndo cuenda tsi ndo coto jan-  
davi ñaha nyívi tsi ndo.

<sup>6</sup> Tyin cuaha xaan nyívi cua quitsi,  
tan cua cuatyí ñu ñi sívi yu, tan cua  
catyí ñi: “Yuhu cuví ra Cristo, ra tsa

jaquitsj Nyoo.” Tan cuaha xaan nyiví cua jandavi ñaha ñi.

<sup>7</sup> Maa tyin tun ñihi tuhun ndo tyin iyó cuatyí tan cañí tahan nyiví ityi can tan ityi ihya, ña nayuhvi ndo tyin tacan taahán maa tsi cuví tsa ndi cumañi ca naa ñuhu ñayiví.

<sup>8</sup> Tyin nyiví iin ñuu cua cañi tahan ñi tsihin nyiví inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyiví. Vasu ndi maa nyehe nyiví tundoho ihya, ña cua naa naha ñuhu ñayiví tyin ndi nyaa ca cua nyehe ñi tundoho.

<sup>9</sup> Maa tyin jaha ndo cuenda tsi ndo tyin cua kuhva cuenda nyiví tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. Cua kuhva cuenda ñi tsi ndo tsi ra cumi tyiñu tan tsi ra cuví rey tsacatyí yuhu. Tyin tacan tan cuví cahan ndo tuhun yu nuu ra naha.

<sup>10</sup> Tyin tsa ndi cumañi ca naa ñuhu ñayiví, cuñí tsi coto tandihí nyiví inga ñuu tyin Nyoo jacacú ra tsi nyiví.

<sup>11</sup> Tan kuhva tsa cua cundaca ñi tsi ndo nuu ra cumi tyiñu naha ra, ña caca iñi ndo náa cua cahan ndo. Tyin juvin ñi maa hora can tan cua kuhva Nyoo tsa cahan ndo. Tyin ñavin maa ndo cua cahan; tyin maa Tatyí li Nyoo cua cahan.

<sup>12</sup> Yihí ra naha cua nacuhva cuenda ra naha juvin ñi maa yañi ra naha tan cua ndacan ra naha tsa cúu ra can naha ra. Yihí nyiví cua nacuhva cuenda ñi juvin ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cúu ñi.

<sup>13</sup> Tandihí nyiví iyó nu ñuhu ñayiví ndasi cua cuñi ñi nyehe ñi tsi ndo tsacatyí yuhu. Maa tyin nyooho tsa cua cunyeé iñi tsinú iñi tsi yu nda nu ndihí, cua cacu ndo.

<sup>14</sup> Tandihí nyooho tsa cahví nu tutu Nyoo nu tyaa ra Daniel, ra cuví ndusu yuhu Nyoo tsa tsicoo tahan tsanaha, cutuñi iñi ndo tyin iyó tsa janducaquiñi tan tsa jatívi. Quiví tsa nyehe ndo tyin tsa nyíi yacan nu ña taahán tsi cunyii can, nyooho nyiví iyó Judea,

quita ndo ñuu ndo tan kuhun ndo ityi yucu.

<sup>15</sup> Nyooho tsa cua cuyucu jiñi vehe quiví can, cua nuu ndo, maa tyin ña cua nuu ndo tsa quihví ndo tsitsi vehe ndo tan tava ndo tsa iyó tsi ndo.

<sup>16</sup> Nyooho tsa cua cuyucu tsitsi huhu, ña cua cunuhu jihna ndo cuquihin ndo jahma ndo.

<sup>17</sup> ¡Ndahvi ñiñaha tsa ñuhú sehe quiví can! ¡Tan ndahvi ñi iyó sehe lee tsa ndi tyaxín! ¡Ndahvi ñi!

<sup>18</sup> Ndacan tahvi ndo tsi Nyoo na ña tahan tsi cunu ndo quiví vitsin.

<sup>19</sup> Tyin tundoho tsa cua nyehe nyiví quiví can, ñaha ca maa coo can ndaha tsinu maa ñuhu ñayiví nda cuanda vityin. Tan ndi ityi nuu ca tan ña cua nyehe nyiví tahan tundoho can inga tsaha.

<sup>20</sup> Tun tsatyin Jutu Mañi yo tan ña jandihí ra tsa cua nyehe yo tundoho quiví can, yoñi maa cua cacu. Maa tyin cua jandihí ra can tsa cuenda tsa cuñí ra tsi nyiví yihí cuenda ra, nyiví nacatsj vaha maa ra.

<sup>21</sup> Tatun catyi nyiví tsihin ndo: “Jihna ndo, ihya nyaá ra Cristo” o “Nyehe ndo, ican nyaá ra Cristo”, ña tsinu iñi ndo.

<sup>22</sup> Tyin cua quitsi nyiví jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyiví nacatsj maa Nyoo, tatun cunyeé ñi javaha ñi tacan.

<sup>23</sup> Maa tyin nyooho jaha cuenda vaha ndo tsi ndo vityin tsa tsa tsitó ndo tandihí yacan tsa ndi cumañi ca tahan tsi quiví can —catyí ra Jesús.

*Nu jacoto ra Jesús nácaa cua quitsi nyico ra inga tsaha*

(Mt. 24.29-35, 42-44; Lc. 21.25-36)

<sup>24</sup> Tan catyi nyico ra Jesús tyehen:

—Maa tyin tsa cua yaha nyehe nyiví tundoho quiví can, cua ndunaa ñicanyii, yoo ña cua jandunditsin ca tsi,

<sup>25</sup> tan cua cucoyo tiñuu. Tan tandihi tsa iyó andiví tan cua nacanda tsi naha tsi.

<sup>26</sup> Tacan tan cua nyehe ndo tsi yuhu, Rayi tsa quee nda gloria, vatsí yu nu vico tsihin tunyee iñi cahnu tan tsihin tsa cahnu cuví Nyoo.

<sup>27</sup> Tan cuaha ángel cuenda yu cua jaquitsi yu tyin jandu iin ra naha nyiví nacatsi maa Nyoo. Cua quita ñi naní cahnu nu ñuhu ñayiví, nda nu ndihi ñuhu ñayiví tan nda nu ndihi andiví.

<sup>28</sup> 'Cutuñi iñi ndo cuhva iyó yutun tsa nañi higo: Tun tsa nduyutyá soco tun tan cana ndaha yutya tun, tsitó ndo tyin tsa cua quee tsiti tun.

<sup>29</sup> Tan juvin ñi tacan, tatun tsa cuví tandihi tsa iyo tsa caahán yu tuhun tsihin ndo, cua coto ndo tyin tsa cuyatyn quitsi yu; tan tsa nyanaá yu yuvehe cuví tsi.

<sup>30</sup> Tsa nditsa catyí yu tsihin ndo tyin tsa ndi cumañi ca cúu nyiví iyó nu ñuhu ñayiví ihya tan cua cuví tandihi tsa caahán yu tuhun tsihin ndo.

<sup>31</sup> Tan coo quiví cua cundihí andiví tan cua cundihí ñuhu ñayiví, maa tyin tuhun caahán yuhu, ña cua cundihí maa tsi tyin tandihi tsi tan cua cun-  
daa tsi.

<sup>32</sup> 'Maa tyin quiví tan hora tsa cua cuví tandihi yacan, yoñi maa tsitó can, ndi maa ca ángel tan ña tsitó ra naha, ndi yuhu tsa cuví yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihi.

<sup>33</sup> 'Yacan cuenda coo nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsitó ndo náa quiví tan náa cuhva cua quitsi nyico yu.

<sup>34</sup> Tumaa iin rayi tsa cua cahun nu cañi. Ra ican tsa ndi cumañi ca cahun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra.

<sup>35</sup> Yacan cuenda nyoocho coo nyito ndo tyin ña tsitó ndo náa cuhva cua quitsi yu tsa cuví yu tumaa tsitoho

vehe can, tyin cuví quitsi yu tsa cua cunaaha, maa ñuu, o cuhva tsacú tsi-tooho, o tsa cua cana ñicanyii.

<sup>36</sup> Yacan cuenda coonyito vaha ndo tan ña cusu ndo tyin sana iñi ndo tan cua quitsi yu.

<sup>37</sup> Tsa caahán yu tsihin nyoocho, caahán tucu yu tsihin tandihi ca nyiví: Coo nyito ndo.

## 14

*Nu nducú ra jutu cuví ityi nuu naha ra cuhva tñin ra naha tsi ra Jesús*

(Mt. 26.1-5; Lc. 22.1-2; Jn. 11.45-53)

<sup>1</sup> Tsa ndi cumañi uvi quiví ca tan tahan tsi vico pascua tan vico nu tuhvá nyiví tsatsí paan tsa nduve yut-san iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducú ra naha cuhva tñin xeehe ra naha tsi ra Jesús tan cahñi ra naha tsi ra.

<sup>2</sup> Maa tyin natuhun tahan ra naha tan catyí ra naha:

—Ña cua tñin naha yo tsi ra quiví maa vico tyin coto nduvaa xaan nyiví —catyí ra naha.

*Nu tyihí iin ñaha ndutya tami jiñi ra Jesús*

(Mt. 26.6-13; Jn. 12.1-8)

<sup>3</sup> Tsa ndi cumañi ca tahan tsi vico can, nyii ra Jesús ñuu Betania, vehe ra Simón, ra tsa tsindoho cuehe tyaahyu. Tsitsi tsa nyaá ra Jesús tsatsí ra, tsaq iin ñaha ndahá ña iin yutyi tsa tsinu tsihin yuu tsa nañi alabastro. Tsiñu can yihí ndutya tami tsa nañi nardo. Tan yahvi xaan nyaá ndutya tami can. Nuñá ña yuhu yutyi can tan tava ña ndutya tami can tan tyihí ña can jiñi ra Jesús.

<sup>4</sup> Maa tyin juhva ra tsa yucú ican naha ra nduxaan ra naha tan catyí ra naha:

—¿Nacuenda tyin jativí ñaha ihya ndutya tami can?

<sup>5</sup> Tun tsatyn xico ña can, cuaha xaan xuhun cua ñihi ña tsihin can, tan cuví jatynyee ña tsi nyiví ndaahvi tsihin xuhun can —catyí ra naha.

Tan cuxaan ra naha tsi ña.

<sup>6</sup> Maa tyin ra Jesús catyí ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu.

<sup>7</sup> Tyin nyivi ndaahvi tandihí ñi quiivi cua cuyucu ñi tsihin ndo, maa tyin yuhu, ña naha ca cunyii yu tsihin ndo.

<sup>8</sup> Ñaha ihya javahá ña ndihí cuhva cuví ñi javahá ña. Tyihí ña ndutya tami cuñu ñuhu yu, tumaa tuhvá maa yo javahá tsihin cuñu ñuhu nyivi tsa ndi cumañi ca quihvi ñuhu ñi.

<sup>9</sup> Tsa nditsa catyí yu tsihin ndo, tyin tandihí ityi nu cua cahan nyivi tuhun Nyoo nanií cahnu nu ñuhu ñayivi, cua cahan ñi tuhun ñaha ihya tan tsa javahá ña, tyin tacan tan ña naa iñi nyivi tsi ña —catyí ra Jesús.

*Nu xico ra Judas tsi ra Jesús  
(Mt. 26.14-16; Lc. 22.3-6)*

<sup>10</sup> Tsa yahá yacan tan quita iin ra tsitsi tsa utsi uvi ra tsicá tsihin ra Jesús. Ra ihya cuví ra Judas Iscariote. Tsahan ra tsicahan ra tsihin ra jutu cuví ityi nuu naha ra, tan jandaá ra tyiñu tsihin ra naha tyin cua cuhva cuenda ra tsi ra Jesús tsi ra naha.

<sup>11</sup> Cuhva tsa tsiñi ra naha tsa caahán ra, sii xaan cuñi ra naha cuví, tan catyí ra naha tsihin ra tyin cuhva ra naha xuhun tsi ra. Tacan tan quitsahá nducú ra Judas cuhva cuhva cuenda ra tsi ra Jesús tsi ra naha.

*Nu cuxiñi ra Jesús tsihin ra tsicá tsihin ra*

*(Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Quiivi jihna ñi tsa quitsahá vico nu tsatsí nyivi paan tsa nduve yut-san iya yihí tan quiivi tuhvá ñi tsahñi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhun ndi janduvaha ndi tsa cuxiñi un cuenda vico pascua ihya?

<sup>13</sup> Tacan tan tava tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsi ñuu, tan ican cua nañihi ndo iin rayi yosó soco iin quiyi ndutya. Tsa nyehe ndo tsi ra, cuanyicun ndo tsi ra.

<sup>14</sup> Tsa tsa ndo yuvehe nu cua quihvi ra, catyí ndo tyehen tsihin tsi-toho vehe can: “Ra Maestro cuñi ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo.

<sup>15</sup> Tan cua janaha ra iin cuarto cahnu nu tsinu uvi pisu tsi ndo. Tsa nduvahá maa tsitsi tsi jahá ra, javaha ndo tsa cuxiñi yo tsitsi vehe can—catyí ra Jesús tsihin ra naha.

<sup>16</sup> Tacan tan cuahán ra naha. Tsa tsaá ra naha tsitsi ñuu can, nañihi ra naha tandihí maa cuhva catyí ra Jesús tsihin ra naha. Tan javahá ra naha tsa cua cuxiñi ra naha cuenda vico pascua.

<sup>17</sup> Tsa ndihí javahá ra naha tsa cua cuxiñi ra naha, tacan tan cuahán nyico ra naha nu nyii ra Jesús. Tan tsa cunaaha, cuahán ra Jesús, cuacuxiñi ra tsihin tsa utsi uvi ra tsicá tsihin ra.

<sup>18</sup> Tan cuhva tsa nyecú ra naha tsatsí ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyooho tsa tsatsí tsihin yu cua xico tsi yu tsi ra xaan iñi tsi yu.

<sup>19</sup> Tacan tan nducuihyá xaan cuñi ra naha, tan quitsahá tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

<sup>20</sup> Tan nacahan ra Jesús tan catyí ra:

—Ña tandihí ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyií paan iin ñi tsitsi coho tsihin yu.

<sup>21</sup> Tyin yuhu, Rayi tsa quee nda gloria, cua tahan yu tumaa caahán maa nu tutu Nyoo tyin cua tahan yu. Maa tyin jndahvi ra ndaahvi tsa cua xico tsi yu! Vaha ca tun tsatyin ña cacu ra —catyí ra Jesús.

<sup>22</sup> Tan tsitsi tsa tsatsí ra naha, tacan tan quihin ra Jesús iin paan tan



nacuhva ra tyahvi nyoo tsi Nyoo tsa cuenda can, tan tsahnū sava ra can, tan tsaha ra can tsi ra tsicá tsihin ra, tan catyí ra:

—Catsi ndo paan ihya tyin tsehe cuví tumaa cuñu ñuhu yu —catyí ra tsihin ra naha.

<sup>23</sup> Tsa yaha yacan quihin ndihi ra vasu nu yihí vinu. Tsa yaha tsaha ra tyahvi nyoo tsi Nyoo, tacan tan tsaha ra can tsi ra naha. Tandihí ra naha tan tsihi ra naha vinu tsa yihí tsitsi vasu can.

<sup>24</sup> Tan catyí ra tsihin ra naha:

—Vinu ihya cuví tumaa niñi yu tyin tsihin niñi yu cua ndoo Nyoo tuhun tsa tsihin ndo tyin cua cati niñi yu tsa cuenda tsa vaha tsi nyooho tan tsa vaha tsi cuaha nyivi.

<sup>25</sup> Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuanda coho yu vinu tsa nda nu ndacá ñaha Nyoo quivi tsa yu ndacan —catyí ra Jesús tsihin ra naha.

*Nujacotó ra Jesús tyin cua cahan ra Pedro tyin ña nacotó ra tsi ra*

(Mt. 26.30-35; Lc. 22.31-34; Jn. 13.36-38)

<sup>26</sup> Tsa ndihi tsita ra naha yaa Nyoo, tan cuahán ra naha yucu yutun Olivo.

<sup>27</sup> Tacan tan catyí ra Jesús tsihin tandihí ra naha:

—Tandihí maa ndo tan cua naco ihñi ndo tsi yu tsa cuaa vityin tyin catyí nu tutu Nyoo tyehen: “Tandihí mbee ticatyí jana yu cua cuhun tsiyo ti naha ti siin siin ityi tyin cua cahñi yu tsi ra jahá cuenda tsi ti naha ti”, catyí tsi.

<sup>28</sup> Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyooho —catyí ra Jesús tsihin ra naha.

<sup>29</sup> Tacan tan catyí ra Pedro tsihin ra:

—Vasu ndi maa naco ihñi tandihí ra naha tsi un, maa tyin yuhu ña cua naco ihñi maa yu tsi un —catyí ra tsihin ra Jesús.

<sup>30</sup> Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitooho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

<sup>31</sup> Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandihí ca ra naha.

*Nu nyii ra Jesús Getsemaní tsicán tahvi ra tsi Nyoo*

(Mt. 26.36-46; Lc. 22.39-46)

<sup>32</sup> Tacan tan tsaá ra Jesús tan ra tsicá tsihin ra iin nu nañi Getsemaní. Tan catyí ra Jesús tsihin ra naha:

—Ndo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

<sup>33</sup> Tan quihin ra tsi ra Pedro, ra Jacobo tan ra Juan cuahán tsihin ra. Tan tsaá tucuihya iñi cahnu tsi ra tan tuñu cuñi ra.

<sup>34</sup> Tan catyí ra tsihin ra naha:

—Cuihya xaan cuñi yu; cahñi ña maa tucuihya iñi ihya tsi yu, cuñi yu. Ndo ndo ihya, tan ña cusu ndo —catyí ra.

<sup>35</sup> Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaquin ra nuu ra nda nu ñuhu. Tan tsicán tahvi ra tsi Nyoo tan catyí ra:

—Tun tsatyin cuví ña cuhva un nyehe yu tundoho tsa cua nyehe yu —catyí ra tsicán tahvi ra.

<sup>36</sup> Tan tsa tsicán tahvi ra, catyí ra:

—Jutu Mañi yu, tsa cuenda yooho nduve tsa ña cuví javaha un. Tun yooho tan cuñi un cuví jatsiyo un tundoho ihya siqui yu. Maa tyin na cuví maa cuhva cuñi maa un, tan ñavin cuhva cuñi maa yu —catyí ra Jesús tsicán tahvi ra.

<sup>37</sup> Tacan tan cuahán ra nu naco ra tsi uñi ra tsicá tsihin ra. Tsa tsaá ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeé iñi un coo nyito un tsihin yu ndi intuhun hora?



<sup>38</sup> Ña cusu ndo; ndacan tahvi ndo tsi Nyoo, tyin tacan tan ña cua javaha ndo cuhva cuñí nu ña vaha. Tsa nditsa tyin añima ndo cuñí xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñí —catyí ra Jesús tsihin ra naha.

<sup>39</sup> Tacan tan cuahán nyico ra inga tsaha. Tan tsican tahvi ra tsi Nyoo juven ñi tsihin tuhun tsa cahan ra tsa jihna ñi.

<sup>40</sup> Tacan tan tsaá nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasi maa tinuu ra naha jahá ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cahan ca ra.

<sup>41</sup> Tan cuahán nyico ra. Tsa tsaá ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaa tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa taha tsi hora tsa cua cuhva cuenda ra tsi yuhu, Rayi tsa quee nda gloria.

<sup>42</sup> Nduvita ndo, cohon ndo tyin tsa vatsí ra tsa xico tsi yu —catyí ra Jesús tsihin ra naha.

*Nu tsaha cuenda ra Judas tsi ra Jesús tsi nu xaan iñi tsi ra nahnu*

(Mt. 26.47-56; Lc. 22.47-53; Jn. 18.2-11)

<sup>43</sup> Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhun ra naha tsihin ra Judas, iin ra tsicá tsihin ra Jesús, tyin tñn ñi tsi ra Jesús. Juhva ñi ndahá mityi tan juhva ñi ndahá yutun. Ndi caahan ca ra Jesús nyaá ra tan tsaá ra Judas tsihin nyivi cuaha can.

<sup>44</sup> Tsa ndi cumañi ca cuhun ra Judas, ra tsa xico tsi ra Jesús, tsa catyí maa ra tsihin nyivi náa cua javaha ra tan coto ñi ndáa ra cuvi ra Jesús. Tan cahan ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jahá cuenda

vaha ndo coto cunu ra —catyí ra nu quitsi tsi.

<sup>45</sup> Tsa tsaá ra Judas nu nyií ra Jesús natuhva ra nu nyaá ra tan catyí ra tsihin ra:

—Maestro.

Tan tyaa yuhu ra tsi ra.

<sup>46</sup> Tacan tan quihin ra naha tsi ra Jesús cuahán tsihin ra naha.

<sup>47</sup> Maa tyin iin ra nyií tsihin ra Jesús, tava ra mityi ra tan tsahnya ra soho musu ra jutu tsaahnu cuví ityi nuu.

<sup>48</sup> Tacan tan catyí ra Jesús tsihin ra quihin tsi ra:

—¿A ñasuhu cuví yuhu? tyin vatsí ndo vatsí quihin ndo tsi yu tsihin mityi tan yutun.

<sup>49</sup> Ndihi quivi tsinyi yu jacuaha yu tsi ndo tsitsi vehe ñuhu cahnu, tan ña quihin ndo tsi yu. Tandihí tsehe cuví tyin tacan tan cundaa tsa catyí nu tutu Nyoo —catyí ra Jesús tsihin ra naha.

<sup>50</sup> Tacan tan tsinu tandihí ra tsicá tsihin ra, tan ndoo intuhun ña maa ra jahá ra naha.

<sup>51</sup> Maa tyin ndoo intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tñn ndihí ra naha tsi ra.

<sup>52</sup> Maa tyin naco ihñi ra ticatyí can tan tsinu tandihí ra.

*Nu tsica tuhun ra mandoñi naha ra tsi ra Jesús tun juven Sehe Nyoo tsi ra*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Tacan tan tsindaca ra naha tsi ra Jesús tsi ra jutu tsaahnu cuví ityi nuu tan ndu iin tucu tandihí ra jutu cuví ityi nuu naha ra tan ra cuví mandoñi nyivi Israel naha ra, tan ra maestro cuenda ley vehe ñuhu naha ra.

<sup>54</sup> Ra Pedro nyicún tsica nyicún tsica ñi ra tsi ra naha cuahán ra. Tan tsaá ra nda nuquehe yuvehe ra jutu tsaahnu cuví ityi nuu can. Tan ndoo ra tuñú ra ñuhu tsihin ra vitya naha ra.

<sup>55</sup> Ra cuví jutu ityi nuu naha ra, tan tandihí ca ra cumí tyiñu naha ra nducú ra naha cuatyí tyaa ra naha siqui ra Jesús, tyin tacan tan cuvi

cahñi ra naha tsi ra. Maa tyin ña ñihí maa ra naha cuatyi tyaa ra naha tsi ra.

<sup>56</sup> Cuaha xaan nyivi cahan cuendu siqui ra, maa tyin ña nacatsi tahan maa tuhun caahan ndi intuhun ñi.

<sup>57</sup> Yihí ñi nduvita ñi tan cahan ñi maa ñi maa cuendu siqui ra, tan catyi ñi:

<sup>58</sup> —Nyuhu tsiñi ndi tsa cahan ra tan catyi ra tyehen: “Yuhu cua cani yu vehe ñuhu cahnu tsa javaha nyivi. Tan cua janduvita yu inga vehe ñuhu tsitsi tsa uñi quivi ñi. Maa tyin ñavin tahan vehe ñuhu tsa javaha nyivi” catyi ra —catyi ñi.

<sup>59</sup> Vasu ndi maa tacan caahan ñi, maa tyin ña nacatsi tahan maa tsa cahan ñi.

<sup>60</sup> Tacan tan nduvita ra jutu tsaahnu cuvi ityi nuu mahñu tandihi ra yucu ican naha ra, tan tsica tuhun ra tsi ra Jesús, tan catyi ra:

—¿A ña cua nacahan un nu caahan nyivi ihya? ¿A nditsa tsa caahan ñi, o ña nditsa? —catyi ra

<sup>61</sup> Maa tyin ña nacahan maa ra Jesús tan nduve maa náa cahan ra. Tacan tan ra jutu tsaahnu cuvi ityi nuu tsica tuhun ra tsi ra inga tsaha, tan catyi ra:

—¿A yooho cuvi ra Cristo, Sehe Nyoo ii tsa tsaha tsa vaha?

<sup>62</sup> Tan ra Jesús catyi ra tsihin ra:

—Juvin. Nyooho cua nyehe ndo tsi yuhu, Rayi tsa quee nda gloria, nyaá yu xiin cuaha Nyoo, ra iyó tandihi tunyee iñi, tan cua nyehe tucu ndo nu quitsi yu nu vico ityi andivi —catyi ra tsihin ra.

<sup>63</sup> Tacan tan tsahnya ra jutu tsaahnu cuvi ityi nuu jahma ra tumaa iin seña tyin ña taahan iñi ra tsa caahan ra Jesús tyin cuñi maa ra tyin ña vaha tsa caahan ra, tan catyi ra:

—Ña tsiñi ñuhu ca tsa nducu yo tsi ra cuvi tsa ndaa.

<sup>64</sup> Tyin tsa tsiñi maa ndo tsa cahan ra. Tsicoo cuatyi ra nuu Nyoo tsihin tuhun cahan ra. ¿Náa catyi ndo vi-tyin? —catyi ra.

Tacan tan nacahan tandihi ra naha tan catyi ra naha tyin taahan tsi cúu ra.

<sup>65</sup> Tacan tan quitsaha tivi si juhva ra naha tsi ra. Tyasi ra naha nuu ra, tan cañi ra naha tsi ra tsihin siqui tan catyi ra naha tsihin ra:

—¿Cahan tsihin ndi yoo cañi tsi un! —catyi ra naha tsihin ra.

Tan cañi tucu ra vitya naha ra nuu ra.

*Nu cahan ra Pedro tyin ña nacotó ra tsi ra Jesús*

(Mt. 26.69-75; Lc. 22.56-62; Jn. 18.15-18, 25-27)

<sup>66</sup> Tsitsi tsa ndi nyii ra Pedro nuquehe tsata vehe ra jutu tsaahnu cuvi ityi nuu, tsa iin ñaha cuvi musu ra jutu can.

<sup>67</sup> Cuhva tsa nyehe ñaha can tsi ra Pedro nyaá ra tuñu ra ñuhu, quitsaha nyehé xaan ña tsi ra, tan catyi ña tsihin ra:

—Tsica tucu yooho tsihin ra Jesús, ra ñuu Nazaret can —catyi ña tsihin ra.

<sup>68</sup> Maa tyin ra Pedro tyihí xeehe ra, tan catyi ra:

—Yuhu ña nacotó yu tsi ra can, tan ndi ña tsitó yu náa caahan un —catyi ra tsihin ña.

Tacan tan quita ra ityi yuhu cora. Tan tsacu ñi tsitooho.

<sup>69</sup> Tacan tan ñaha can nanyehe nyico ña nu nyaá ra inga tsaha tan catyi ña tsihin ra nyecú ican naha ra:

—Ra vaha iñi tsi ra can cuvi ra ihya —catyi ña.

<sup>70</sup> Maa tyin tyihí xeehe nyico ra inga tsaha. Tacan tan ña naha ñi tan catyi ra yucu ican naha ra tsihin ra Pedro:

—Nditsa tyin ra vaha iñi tsi ra can cuvi yooho, tyin ra Galilea cuvi un, tan caahan un tumaa caahan nyivi Galilea —catyi ra naha tsihin ra.

<sup>71</sup> Tacan tan iyo xaan caahan ra Pedro, tan catyi ra:

—¿Tsitó vaha maa Nyoo tyin ña nacotó yu tsi ra tsa caahan ndo tuhun! ¿Na cahñi maa Nyoo tsi yu tun ña nditsa yu tsa caahan yu! —catyi ra.

72 Juvín ñi cuhva can navacū tsi-tooho tsa tsinu uvi tsaha. Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yaha cahan un uñi tsaha tyin ña naco-tó un tsi yu.” Tsa nducuhun iñi ra Pedro tsehe, quitsaha ra tsacú ra.

## 15

*Nu jaqueé yuhu ra Pilato tsi ra Jesús*

(Mt. 27.1-2, 11-14; Lc. 23.1-5; Jn. 18.28-38)

1 Tan tsa tuvī inga quivī ndu iin ra jutu cuvī ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihī ca ra cumí tyiñu tsa yihī ndaha tsi nyivī Israel. Nuuhñi ñi maa ra Jesús tan tsindacā ra naha tsi ra nuu ra Pilato.

2 Tan tsicā tuhun ra Pilato tsi ra, tan catyí ra:

—¿A juvin un cuvī rey nyivī Israel? Nacahan ra Jesús tan catyí ra:

—Juvín yu, tumaa caahán maa un.

3 Tan cuaha xaan cuendu cahan ra cuvī jutu ityi nuu naha ra siquī ra Jesús.

4 Tacan tan tsicā tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehe, cuaha xaan cuatyī tyaá ra naha siquī un —catyí ra.

5 Maa tyin ra Jesús ña nacahan maa ra. Yacan cuenda ña ñihī ra Pilato náa cahan ra.

*Nu tsahá ra Pilato ndatu tsa cúu ra Jesús*

(Mt. 27.15-31; Lc. 23.13-25; Jn. 18.38—19.16)

6 Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñi maa nyivī tyin tava ra.

7 Quivī can nyií iin ra nañi Barrabás vehe caa, tsihin inga ca ra tsahñi nyivī nu cuvaá nyivī siquī ra ndacá ñaha.

8 Tan tsahan nyivī tsicahan ñi tsihin ra Pilato na jaña ra iin ra yucú vehe can tumaa tuhvá maa ra javahá.

9 Tan nacahan ra Pilato, tan catyí ra:

—¿A cuñi ndo tsa jaña yu tsi ra cuvī Rey ndo?

10 Tacan cahan ra tyin tuvī iñi ra tyin tsaha cuenda ra jutu cuvī ityi nuu naha ra tsi ra Jesús tsi ra tsa cuenda tsa ndasi cuñi ra naha nyehe ra naha tsi ra tyin cuaha nyivī nyicún tsi ra.

11 Maa tyin ra jutu cuvī ityi nuu can naha ra natyuhū ra naha tsi nyivī tsa cahan ñi na tava ra Pilato tsi ra Barrabás vehe caa.

12 Tacan tan tsicā tuhun ra Pilato tsi ñi, tan catyí ra:

—¿Tun tacan, náa cuñi ndo javaha yu tsihin ra tsa jacunañi ndo Rey cuenda ndo? —catyí ra tsihin ñi.

13 Tacan tan canā tsaa ñi, tan catyí ñi:

—¿Tyaa tsi ra nu cruu na cúu ra! —catyí ñi.

14 Tan catyí ra Pilato tsihin ñi:

—Maa tyin, ¿náa tsa ña vaha javaha ra? —catyí ra.

Ñi ican quitsaha caná tsaa nyico ñi tan catyí ñi:

—¿Tyaa tsi ra nu cruu na cúu ra! —catyí ñi.

15 Tacan tan tsa cuñi ra Pilato ndoo vaha ra nuu nyivī, tava ra tsi ra Barrabás vehe caa. Tsa yaha tava ra tsi ra can, tava tyiñu ra na ndoho ra Jesús. Tsa yaha ndoho ra Jesús, tan tsaha cuenda ra tsi ra tsi andaru na ticaa ra naha tsi ra nu cruu.

16 Tacan tan tsindacā ra andaru can naha ra tsi ra nuquehe vehe tyiñu. Tan jandu iin ra naha tandihī ca andaru.

17 Tan jacunditsj ra naha iin jahma cuaaha tuun tsi ra. Tan javaha ra naha iin corona iñu. Tan tyihī ra naha can jiñi ra.

18 Tsa yaha yacan tan quitsaha caná tsaa ra naha tsata ra tan tsacú nducu ra naha tsi ra, tan catyí ra naha:

—¿Nacumi tsi un, yooho Rey nyivī Israel! —catyí ra naha.

19 Tan cañi ra naha jiñi ra tsihin yutun, tan tivī sñi ra naha tsi ra. Tan

tsicuiñi tsi ra naha nuu ra jahá ra naha tyin jacahnú ra naha tsi ra.

<sup>20</sup> Tsa yahá tsacu nducu ra naha tsi ra, tavá ra naha jahma cuaaha tuun tsa jacunditsi ra naha tsi ra. Tacan tan jacunditsi nyico ra naha jahma maa ra tsi ra. Tan cuahán ra naha tsihin ra cuaticáá ra naha tsi ra nu cruu.

*Nu tyaa ra naha tsi ra Jesús nu cruu (Mt. 27.32-44; Lc. 23.26-43; Jn. 19.17-27)*

<sup>21</sup> Ityi cuahán ra naha tahan ra naha iin ra ñuu Cirene tsa nañi Simón. Tan cuví ra jutu ra Alejandro tan ra Rufo. Ndi vatsi nuhu ra quee ra cuhu. Cuhva tsa cua yaha ra, jañiñi ra andaru naha ra tsi ra na cuiso ra cruu ra Jesús.

<sup>22</sup> Tan tsindaca ra naha tsi ra Jesús iin nu nañi Gólgota, tan cuñi tsi catyi Yiqui Jiñi Ndiyí.

<sup>23</sup> Tan ican jacoho ra naha vinu saca nuu tsihin numeri tsa nañi mirra tsi ra. Maa tyin ra Jesús ña cuñi ra coho ra can.

<sup>24</sup> Tsa yahá tyaa ra andaru naha ra tsi ra nu cruu, quihin ra naha jahma ra tan tavá cuenda ra naha tyin cuñi ra naha coto ra naha yoo cua jaha canaa intuhun intuhun jahma can.

<sup>25</sup> Tyaa ra naha tsi ra nu cruu caa iin tsa tuvi.

<sup>26</sup> Tan letra tsa tyaa ra naha jiñi cruu ra, catyi tsi nacuenda cua cúu ra. Tan catyi tsi tyehen: “Ra ihya cuví Rey nyivi Israel.”

<sup>27</sup> Tan tyaa ndihi ra naha uvi taahan ñasuhu tsihin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra.

<sup>28</sup> Tacan cuví tan cundaa cuhva catyi nu tutu Nyoo tyehen: “Javaha nyivi tsihin ra tumaa javahá ñi tsihin ra caquiñi.”

<sup>29</sup> Tan nyivi yahá ican jacuñi nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyi ñi:

—Jaan! ¡Yooho tsa cahan tyin cua cani un vehe ñuhu cahnu, tan tsitsi tsa uñi quivi cua janduvaha nyico un itsi,

<sup>30</sup> jacacu tsi un vityin tan nuu nu cruu juvin! —catyi ñi.

<sup>31</sup> Tan juvin ñi tacan tsacú nducu tucu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyi ra naha:

—¡Jacacu ra tsi inga ca nyivi, maa tyin ña cuví jacacu ra tsi maa ra!

<sup>32</sup> Tun nuu ra nu cruu vityin nyehe yo, tacan tan cua tsinu iñi yo tyin juvin ra cuví ra Cristo, Rey cuenda yo tsa cuví yo nyivi Israel —catyi ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacu nducu ndihi nahnu tsi ra.

*Nu tsihi ra Jesús (Mt. 27.45-56; Lc. 23.44-49; Jn. 19.28-30)*

<sup>33</sup> Cuhva tsa cua tahan hora, ndunaa nani cahnu nda cuanda caa uñi tsa tseñi.

<sup>34</sup> Tan juvin ñi cuhva can cana tsa ra Jesús tsihin tandihi tunyee iñi ra, tan catyi ra:

—Eloi, Eloi, ¿lama sabactani? —tan cuñi tsi catyi: Nyoo Jutu yu, Nyoo Jutu yu, ¿nacuenta nacoo ihñi un tsi yu? —catyi ra.

<sup>35</sup> Juhva ra yucú ican naha ra tsiñi ra naha tsa cahan ra tan catyi ra naha:

—¡Jihna ndo! Caná tsa ra tsi ra Elías, ra cuví ndusu yuhu Nyoo tahan tsanaha —catyi ra naha.

<sup>36</sup> Tacan tan tsinú xaan iin ra tsiquihin ra iin yahma tsa caá tumaa caá catyi, tan jatyi ra can tsihin vinu iya. Tan tyaa ra can iin nu yutun tan jatuhva ra yuhu ra Jesús tyin coho ra vinu can, tan catyi ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyi ra.

<sup>37</sup> Tacan tan ñihi xaan cana tsa ra Jesús, tan tsihi ra.

<sup>38</sup> Tan jahma tsa ticaá tsitsi vehe ñuhu cahnu ndata sava tsi, nda siqui tan nda cuanda ityi tsaha.

<sup>39</sup> Tan ra capitán tsa yihí ndaha andaru tsa nyaá yatyin ñi nu ticaá ra Jesús nyehe ra nácaa cana tsa ra, tan nácaa tsihi ra, tacan tan catyi ra:

—Nditsa nditsa cuii tyin Sehe Nyoo tsi ra ihya —catyí ra.

<sup>40</sup> Tan ndasava ñi nyecú tucu juhva ñiñaha nyehé ñi. Tan mahñu ñi can nyíi ña María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyíi tucu ña Salomé.

<sup>41</sup> Ñiñaha ihya tsinyicun ñi tsi ra Jesús, tan jatyinyee ñi tsi ra quivi tsica nuu ra ityi Galilea. Tan yucú cuaha tucu ñiñaha inga ñuu tsa tsaá tsihin ra ñuu Jerusalén ican.

#### *Nu tsicutsi ra naha tsi ra Jesús*

(Mt. 27.57-61; Lc. 23.50-56; Jn. 19.38-42)

<sup>42</sup> Quivi tsa tuhvá nyivi janduvaha tsa catsi ñi cuenda inga quivi tuhvá ñi quitatu, juvin ñi tseñi can

<sup>43</sup> tsaá ra José ra ñuu Arimatea nu nyíi ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayivi. Ña nayuhvi ra tan tsahan ra tsindacan ra cuñu ñuhu ra Jesús tsi ra Pilato.

<sup>44</sup> Tsa tsito ra Pilato tyin tsa yaha tsihi ra Jesús, iyo xaan cuñí ra. Tacan tan cana ra tsi iin capitán tan tsica tuhun ra tsi ra tun nditsa tyin tsa tsihi ra Jesús.

<sup>45</sup> Tan tsa tsito vaha ra Pilato tyin tsa yaha tsihi ra Jesús, tava tyiñu ra na cuhva ra andaru naha ra cuñu ñuhu ra tsi ra José.

<sup>46</sup> Tacan tan tsijata ra José iin jahma cuitsin tsa tsinu tsihin jahma vaha tsa nañí linu, tan januu ra cuñu ñuhu ra Jesús nu cruu. Yaha can tan cava nuu ra jahma can cuñu ñuhu ra. Tacan tan tyihí ra cuñu ñuhu ra tsitsi iin ñaña tsa nyaá nduvaha tsitsi iin cava. Tan tyasi ra yuhu ñaña can tsihin iin yuu cahnu.

<sup>47</sup> Tan ña María, tsa quee ñuu Magdala, tan ña María, sihi ra José, tsahan ñi, tsinyehé ñi nu tinyi ra José can cuñu ñuhu ra Jesús.

## 16

### *Nu nandoto ra Jesús*

(Mt. 28.1-10; Lc. 24.1-12; Jn. 20.1-10)

<sup>1</sup> Tsa yaha quivi quitatú nyivi, ña María ñuu Magdala, tan ña María sihi ra Jacobo, tan ña Salomé jata ñi ndutya tami tyin cuñí ñi cuhun ñi cutyihí ñi can cuñu ñuhu ra Jesús.

<sup>2</sup> Tacan tan cuahán ñi nu nyaá ñaña ra tsa cunditsin cuii ñi quivi quitsaha vitya. Tan tsaá ñi ican cuhva tsa cua cana cuii ñi ñicanyii.

<sup>3</sup> Tan ityi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

<sup>4</sup> Maa tyin cuhva tsa tsaá ñi nyehe ñi tyin tsa catsiyo yuu cahnu tsa ndasí yuhu ñaña can.

<sup>5</sup> Tan cuhva tsa quihvi ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Nditsí ra jahma cuitsin cañi. Tan nayuhvi xaan ñi.

<sup>6</sup> Maa tyin catyí ra tsihin ñi:

—Ña nayuhvi ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve ca ra nyíi ihya vityin tyin tsa nandoto ra. Nyehe ndo nu tinyi ra naha tsi ra.

<sup>7</sup> Cuaahan ndo tan jacoto ndo tsi ra Pedro tan tsi inga ca ra tsica tsihin ra Jesús. Tan catyí ndo tsihin ra naha tyin tsa cuahán ra Galilea tan cua atu ra tsi ra naha ndacan, tumaa catyi maa ra tsihin ra naha tsa ndi cumañi ca cúu ra —catyí ángel can tsihin ñi.

<sup>8</sup> Tacan tan tsinú xaan ñi cuahán ñi, tyin nihí ñi jahá tsa yuuhví ñi. Tan ña cahan maa ñi tsa cahan ñi tsihin ndi intuhun maa nyivi tyin yuuhví xaan ñi.

### *Nu quituvi ra Jesús nuu ña María quee ñuu Magdala*

(Jn. 20.11-18)

<sup>9</sup> Ra Jesús nandoto ra quivi quitsaha vitya. Tan quituvi ra jihna cuii ca nuu ña María ñuu Magdala. Juvin



ña cuví ña tsa tava ra utsa tatyí ña vaha.

<sup>10</sup> Tsahan ña tsijacoto ña tsi ra tsicá tsihin ra, tyin yucú ra naha tsihin tucuihya iñi tan tsacú ra naha.

<sup>11</sup> Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

*Nu quituvi ra Jesús nuu uvi ra tsicá tsihin ra*

(Lc. 24.13-35)

<sup>12</sup> Tsa yaha yacan, tan quituvi ra Jesús nuu uvi ra tsa cuahan ityi cuhu naha ra. Maa tyin sin cuhva caá ra nyehe ra naha.

<sup>13</sup> Tan tsinuhu ra naha tsijacoto ra naha tsi tandihi ca ra naha. Maa tyin juvin ñi ña tsinu iñi ra naha tsa cahan ra can naha ra.

*Nu tsaḥa ra Jesús tyiñu tsi ra tsa tsicá tsihin ra*

(Mt. 28.16-20; Lc. 24.36-49; Jn. 20.19-23)

<sup>14</sup> Yaha yacan tan quituvi ra Jesús nuu tandihi tsa utsi iin ra tsa tsicá tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cahan nyivi tsa nyehe tsi ra tsa yaha nandoto ra.

<sup>15</sup> Tan catyí ra tsihin ra naha:

—Cuaahan ndo nanñi cahnu nu ñuhu ñayivi, tan cahan ndo tuhun Nyoo tsihin tandihi nyivi, tan catyi ndo tsihin ñi nácaa jacacú Nyoo tsi ñi.

<sup>16</sup> Tan nyivi tsa cua tsinu iñi tan coondutya ñi, cua cacu ñi. Maa tyin ñi tsa ña cua tsinu iñi cua ndoo cuatyí ñi siqui ñi tan cua cunaa ñi.

<sup>17</sup> Tan tandihi tsa iyo ihya cua javaha nyivi tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahan ñi inga yuhu tsa ña tuhva ñi cahan.

<sup>18</sup> Cua tin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyivi cuuhví, tan cua nduvaha nyivi.

*Nu ndaa ra Jesús andivi*  
(Lc. 24.50-53)

<sup>19</sup> Tsa ndihi cahan Jutu Mañi yo Jesús tsihin ra naha, tacan tan ndaa ra andivi, tan tsinyaa ra xiin cuaha Nyoo.

<sup>20</sup> Tacan tan ra tsicá tsihin ra quita ra naha tan tsahan ra naha tandihi ñi ityi tsicahan ra naha tuhun Nyoo nácaa jacacú ra tsi yo. Juvín ñi maa Jutu Mañi yo jatyinyee tsi ra naha tyin tsaḥa ra tsa javaha ra naha cuaha tsa iyo. Tan tsihin yacan nyehe nyivi tyin nditsa tsa caahan ra naha.

Tan na cuvi tsi tacan ñi.

## Tuhun Nyoo Tsa Tyaa Ra Lucas

*Nu quitsaha jacotó ra Lucas tuhun ra Cristo tsi ra Teófilo*

<sup>1</sup> Cuaha ñi nyivi nducu ñi cuhva tyaa ñi nuu tutu tandihi tsa cuvī nu yucú ndi ihya. Tyaa ñi cuhva

<sup>2</sup> nacatyí tuhun nyivi tsihin yo, ñi tsa nyehe tan cahan tuhun ra Jesús nda quivi jihna ñi.

<sup>3</sup> Tan yuhu tucu tsa yaha cahvi yu tan nducu tuhun vaha yu tandihi tsa cuvī nda nu quitsaha. Yacan cuenda cuñi yu tyaa yu tuhun ihya tsa cuenda un, yooho Teófilo, nda nu quitsaha tan nda nu ndihi.

<sup>4</sup> Tyin tacan tan coto un tyin nditsa tsa jacuaha nyivi tsi un.

*Nu jacoto iin ángel tsi ra Zacarías ama cua cacu ra Juan, ra cua jacoondutya tsi nyivi*

<sup>5</sup> Quivi tsa cuvī ra Herodes rey tani cahnú cuenda Judea, tsicoo iin ra cuvī jutu, nañi ra Zacarías. Tan yihí ra cuenda ra cuvī jutu naha ra tsa nañi Abías. Tan ñasihi ra nañi ña Elisabet. Tata ra Aarón, ra cuvī jutu tahañ tsanaha, cuvī ña.

<sup>6</sup> Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun caahan Nyoo Jutu yo. Tan yoñi maa cuvī tyaa cuatyí tsi ñi.

<sup>7</sup> Tan nduve maa sehe ñi tsicoo. Tyin ña Elisabet, ña cuvī coo sehe ña. Tan tsa tsahnu xaan nduvi taahan ñi.

<sup>8</sup> Iin quivi taahan tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo.

<sup>9</sup> Tan cuhva iyó maa ra cuvī jutu naha ra, tava ra naha suerte, ndaa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quivi can tahañ tsi tsi ra Zacarías.

<sup>10</sup> Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can.

<sup>11</sup> Tan tsitsi tsa ndi nyii ra ican tan quituvi iin ángel Jutu Nyoo nu nyii

ra. Tan nyaá nyityi ángel can ityi xiin cuaha nu nyaá altar nu tsahmí ra cutu.

<sup>12</sup> Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra.

<sup>13</sup> Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahan un tsihin ra. Tan cua coo iin sehe ña Elisabet ñasihi un. Tan cua cunañi ra Juan.

<sup>14</sup> Sii xaan cua cuñi un. Tan cuaha xaan nyivi cua cusi ndihi iñi quivi cua cacu ra.

<sup>15</sup> Tyin sehe un, cahnú xaan cua cuvī ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihí Tatyí Ii Nyoo tsi ra tsa ndi cumañi ca cacu ra tan tandihi tyembu tsa cua coo ra.

<sup>16</sup> Tan cuaha xaan nyivi Israel cua cunyicun ñi tsi Jutu yo Nyoo jaha ra.

<sup>17</sup> Juvín ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihí xaan Tatyí Ii Nyoo tsi ra. Tyin cua cuvī ra tumaa ra Elías, ra cuvī ndusu yuhu Nyoo tahañ tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaa yahvi ñi tuhun caahan Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyí ángel tsihin ra Zacarías.

<sup>18</sup> Tan tsica tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

<sup>19</sup> Tan ángel can nacahan ra tan catyí ra:

—Yuhu Gabriel nañi yu. Tan tsicá yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un.

<sup>20</sup> Tan vityin cua nduñihi un. Tyin ña tsinú iñi un tsa caahan yu tsihin un. Tan ña cua cuvī cahan un nda cuanda tsa yaha cacu sehe ñasihi un. Tan nda quivi cundaa tandihi tsa cahan yu tsihin un —catyí ángel ican tsihin ra.

<sup>21</sup> Tan nyivi tsa ndatú tsi ra Zacarías ityi tsata vehe ñuhu, iyo xaan cuñi ñi tyin cucuee xaan ra tsitsi vehe ñuhu can.

<sup>22</sup> Tan cuhva tsa quitã ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsaha caahán ra tsihin ñi tsihin ndaha ra. Tyin ña cuví cahan ra.

<sup>23</sup> Tan quivi ndihí tyiñu jahá ra Zacarías vehe ñuhu can, tan cuanuhu ra yuvehe ra.

<sup>24</sup> Tsa yaha quivi can tan tsicuhun sehe ñasihí ra, ña Elisabet. Tan ña quitã maa ña tsata vehe tsa tandihí tsa uhun yoo. Tan tsicá iñi ña:

<sup>25</sup> “Tyehen javaha Jutu Mañi yu tsihin yu, tyin tacan tan ña cahan nyaa ca nyivi tsi yu”, cuñi ña tsicá iñi ña.

*Nu jacoto iin ángel tsi ña María tyin  
cua cacu ra Jesús*

<sup>26</sup> Tsa quitã iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea.

<sup>27</sup> Tyin cahan ra tsihin iin ñaha yoco tsa nañi María. Tan tsa nyaa maa tsa cua tindaha ña tsihin ra nañi José, ra cuví tata ra rey David.

<sup>28</sup> Tan quihví ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihí ca ñaha —catyí ángel ican tsihin ña.

<sup>29</sup> Tan tsa tsiñi ña tsa cahan ra, iyo xaan cuñi ña tsa cahan ra. Tan tsicã iñi ña: “¿Nacuenda tacan caahán ra ihya nacumi tsi yo?” tsicá iñi ña.

<sup>30</sup> Tan catyí ángel ican:

—Ña nayuhvi un, María, tyin ñihí un tumañi iñi Nyoo.

<sup>31</sup> Vityin cua cuhun sehe un. Tan cua cunañi ra Jesús.

<sup>32</sup> Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuvi ra David, tsii tsaahnu ra.

<sup>33</sup> Tyin cua cundaca ñaha ra tsi nyivi Israel tandihí maa tyembu. Tan ña

cua ndihí maa tsa cundaca ñaha ra —catyí ángel can tsihin ña.

<sup>34</sup> Tacan tan tsicã tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yíi yu.

<sup>35</sup> Tan nacahan ángel tan catyí ra:

—Maa Tatyí Ii Nyoo cua quitsi siqui un. Tan tunyee iñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo.

<sup>36</sup> Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuví coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña.

<sup>37</sup> Tyin Nyoo nduve tsa ña cuví jaha ra —catyí ángel tsihin ña.

<sup>38</sup> Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

*Nu cuahán ña María cuanyehé ña  
nu nyii ña Elisabet*

<sup>39</sup> Tan iin quivi can, numi ñi cuahán ña María iin ñuu tsa canyí Judea nu maa ñi maa yucu iyó.

<sup>40</sup> Tan quihví ña tsitsi vehe ra Zacarías. Tan nacuhva ña nacumi tsi ña Elisabet.

<sup>41</sup> Tan tsa tsiñi ña Elisabet tsa cahan ña María, tan natuñu sehe ña tsitsi ña. Tan ñihí nyaá Tatyí Ii Nyoo tsihin ña.

<sup>42</sup> Tan ñihí xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihí ca ñiñaha. Tan nasoco ra tsi sehe un.

<sup>43</sup> ¿Tan yóo cuví yuhu? Tyin quitsi sihi Jutu Mañi yu quitsi nyehe ña nu nyaá yu.

<sup>44</sup> Cuhva tsa tsiñi yu tsa cahan un, tan natuñu sehe yu tsitsi yu. Tyin sii xaan cuñi ra.

<sup>45</sup> Tan sii xaan cuñi tucu maa aña un tyin tsinú iñi un. Tyin cua cuvi cuhva tsa cahan Nyoo tsihin un —catyí ña Elisabet.

<sup>46</sup> Tan catyí ña María:

—Jacahnú yu tsi Nyoo tsihin tandihí  
añima yu.

47 Tan sii xaan cuñí añima yu tsihin  
Nyoo ra jacacú tsi yu.

48 Tyin cuví yuhu iin ñaha ndaahvi  
tan Nyoo nyehe ndaahvi ra tsi  
yu.

Tan vityin tandihí quiví cua cahan  
nyiví tyin cahnu xaan tumañi  
iñi ñihí yu.

49 Tyin Nyoo, cahnu xaan cuví ra. Tan  
cahnu tsa javahá ra tsihin yu.

Tan ii xaan siví ra.

50 Tan ndaahvi cuñí ra tsihin tandihí  
nyiví tsa cua coo tan tyaa yahvi  
ñi tsi ra.

51 Cahnu xaan tsa javahá ra tsihin  
tunyeé iñi tsa iyó tsi ra.

Jatsiyó ra tsi nyiví tsa cahnu xaan  
tsicá iñi ñi.

52 Quinyaá ra tunyeé iñi iyó tsi nu  
cuví rey.

Tan cua janducahnu ra tsi nyiví  
ndaahvi.

53 Tsahá Nyoo tsa vaha tsi nyiví cuñí  
coto tsa vaha.

Tan nyiví cuca tsa cuñí tyin nduve tsa  
tsiñi ñuhu tsi ñi, tsihin ndaha  
ndi ñi, jacuhún ra tsi ñi.

54 Jatyinyeé ra tsi nyiví Israel tsa cuví  
ñi musu ra.

Tan ña naá iñi ra tsi ñi. Nyehe  
ndaahvi ra tsi ñi.

55 Tumaa cuhva catyí Nyoo tsihin ra  
Abraham, tsii tsaahnu yo, tan  
tsihin sehe ra, tacan ñi javahá  
maa Nyoo —catyí ña María.

56 Tan ña María ndoo ña tsihin ña  
Elisabet uñi yoo. Tan tsa yahá uñi yoo  
can tan cuanuhú ña nda yuvehe ña.

*Quiví cacú ra Juan, ra tsa jacoon-  
dutyá tsi nyiví*

57 Tsa tsaá quiví tsa cacú sehe ña  
Elisabet, jacacú ña iin rayi.

58 Tan nyiví vehe ña tsihin nyiví tsa  
iyó yatyin ñi yuvehe ña, sii xaan cuñí  
ñi. Tacan tucu maa ña. Tyin vaha  
xaan tsa javahá Nyoo tsihin ña.

59 Tan tsa quita una quiví tsa cacú  
ra, tan tyaa ra naha tuñi Nyoo tsi ra  
tumaa cuhva iyó maa ñi. Tan cuñí  
ra naha tsa cunañi ra Zacarías tumaa  
nañi maa jutu ra.

60 Maa tyin sihi ra catyí ña:

—Ña cuví. Tyin Juan cua cunañi ra.

61 Tan catyí ra naha:

—¿Nacuenda jacunañi un Juan tsi  
ra? Tan yoñi nyiví ndo nañi tacan  
—catyí ra naha.

62 Tan quitsaha tsicá tuhun ra naha  
tsihin ndaha ra naha tsi jutu ra. Tyin  
coto ra naha náa siví cuñí ra tsa cu-  
nañi ra.

63 Tan tsican jutu ra iin vitu, tan  
nuu vitu ican tyaa ra: “Juan cua cu-  
nañi ra”, tyaa ra.

Tan tandihí maa ra ican naha ra iyo  
xaan cuñí ra naha tsa tacan.

64 Juvín ñi maa hora can nacahan  
ra Zacarías. Tan quitsaha jacahnú ra  
tsi Nyoo.

65 Tan tandihí maa nyiví iyó yatyin  
yuvehe ñi, iyo xaan cuñí ñi cuví. Tan  
tandihí maa nyiví tsa iyó yucu iyó  
Judea ican nacatyí tuhun tahan ñi tsa  
cuví can.

66 Tan tandihí maa nyiví tsa tsito  
can, tsicá iñi ñi, tan tsicá tuhun tahan  
ñi tsi ñi:

—¿Yóo ra cua cuví ra lee ihya?  
—catyí ñi.

Tyin nditsa, Nyoo nasocó xaan ra  
tsi ra.

### *Nu jacahnú ra Zacarías tsi Nyoo*

67 Ra Zacarías jutu ra Juan, ñihi  
nyaá Tatyí Ii Nyoo tsihin ra. Tan  
tsaha cuenda ra tsa caahan Nyoo tsi-  
hin ra, tan catyí ra:

68 —Cahnu xaan ra cuví Jutu yo  
Nyoo cuenda yo nyiví Israel.

Tyin quitsi ra nu yucú yo, tsa cuví yo  
nyiví maa ra. Tan jacacú ra tsi  
yo.

69 Tan tsaha ra iin ra tsa cahnu xaan  
cuví tsi yo, ra cua jacacu tsi yo.

Tata ra David, ra tsa cuví musu Nyoo  
cuví ra.

70 Tacan cua javaha ra, catyí Nyoo  
tahan tsanaha, quiví cahan ra  
cuví ndusu yuhu ra, tan catyí  
ra naha tyehen:

71 Cua jacacu Nyoo tsi yo ndaha nu  
xaan iñi tsi yo, tan nuu tandihí  
nu tsa ndasi cuñí nyehe tsi yo.

72 Tan cua cundaahvi iñi ra nyehe ra tsi nyivi yo tsa tsicoo tahan tsanaha.

Tan cua nducuhun iñi ra tsa cahān ra tsihin ñi tahan tsanaha.

73 Cahān maa Nyoo tsihin ra Abraham, tsii tsaahnu yo,

74 tan catyi ra tyin cua jacacu ra tsi yo ndaha nu xaan iñi tsi yo.

Tyin ña cua nayuhvi ca yo jacahnu yo tsi ra.

75 Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa cuenda maa ra tandihī quivi tsa cua coo yo ñayivi —catyī ra Zacarías.

76 Tan catyī ra Zacarías tsihin lee can:

—Sehe luhlu yu, yooho cua cuvi un ndusu yuhu Nyoo, ra nyaá gloria.

Tyin cuhun un ityi nuu Jutu Mañi yo. Tan cua cahan un tuhun ra tsihin nyivi tyin tsa cuñi quitsi ra.

77 Tan cua jacoto un tsi nyivi tyin cua jaha Nyoo tucahnu iñi tsi ñi.

Tacan tan cacu añima ñi.

78 Tyin Jutu yo Nyoo cuñi ra tsi yo. Tan cundaahvi xaan iñi ra tsi yo.

Tan cua jaquitsi ra iin ra jatyinyee tsi yo. Tan cuvi ra tumaa ñuhu ñicanyii.

79 Tyin cua janaha ra ñuhu nditsin nu iyó nyivi nu naa, nu ndatú tuhun tsihi tsi ñi.

Cua janaha ra ityi ra tsi yo, ityi vaha —catyī ra Zacarías.

80 Tan ra luhlu can cua cuahnu ca ra. Ñihi xaan tsicoo tunyee iñi tsi ra tsihin Tatyī Ii Nyoo. Tan tsicoo ra iin tsiqui ndi nda cuanda quivi tsa nacoto nyivi Israel tsi ra.

## 2

### *Quivi cacu ra Jesús (Mt. 1.18-25)*

1 Quivi ican tsicoo iin ra ndacá ñaha, ra cuvi rey cahnu, nañi ra Augusto. Tava tyiñu ra tsi ra nyisó tyiñu naha ra na tyaa ra naha sivi tandihī nyivi taniñi cahnu ñuu ñayivi.

2 Ihya cuvi tsa jihna ñi tsinyaa sivi nyivi. Tan ra Cirenio cuvi ra ra ndacá ñaha tandihī ñuu nu cuvi Siria.

3 Tan tandihī nyivi cuanuhu ñi ñuu ñi, tyin cua ndaca ñi sivi ñi.

4 Yacan quee ra José ñuu Nazaret tsa canyī Galilea. Tan cuahān ra ñuu Belén tsa canyī Judea, nu cacu ra rey David, tyin tata ra David cuvi ra.

5 Cuahān ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña.

6 Tan tsa ndi yucú ca ñi ñuu Belén ican tan quitsaha cuuhvi tsitsi ña tyin tsa cua cacu sehe ña.

7 Tan ican cacu sehe nuu ña. Tan cava nuu ña jahma tsi ra. Tan nacaquin ña tsi ra tsitsi iin canuva nu tsatsi quiti itya. Tyin ña ñihī ñi iin vehe coo ñi.

### *Cuhva cahān ángel tsihin ra jahá cuenda mbee*

8 Yatyin ñi ñuu Belén can yucú ra jahá cuenda mbee tsa tsacuaa.

9 Tan sana iñi ra naha quituvi iin ángel Nyoo. Tan jandunditsin Jutu yo Nyoo taniñi cahnu nu yucú ra naha. Tan nayuhvi xaan ra naha.

10 —Ña nayuhvi ndo —catyī ángel can—. Tyin vatsi cahan yu iin tsa vaha xaan tsihin ndo. Sii xaan cua cuñi tandihī cuui maa nyivi tsa cuenda tsi.

11 Vityin nda ñuu ra David cacu iin ra cua jacacu tsi nyivi. Cuví ra Cristo, ra cuvi Jutu Mañi yo.

12 Tan tsihin cuhva ihya cua nacoto ndo tsi ra: cua nañihi ndo tsi ra lee ican, cava nuu ra jahma tan canyī ra tsitsi iin canuva nu tsatsi quiti —catyī ángel can tsihin ra jahá cuenda mbee can.

13 Tan juvin ñi cuhva ican quituvi cuaha xaan ángel tsihin ángel can, tan jacahnú xaan ra naha tsi Nyoo, tan catyī ra naha:

14 Cahnu xaan cuvi Nyoo, ra nyaá gloria.

Tan nu ñuhu ñayivi, na coo tsa vaha añima nyivi tsa ñihí tumañi iñi Nyoo, catyī ra ángel naha ra.



15 Tacan tan tsa cuanuhu ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacoto tsi yo —catyí ra naha.

16 Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyí ra lee can tsitsi iin canuva nu tsatsí quití itya.

17 Tan cuhva tsa nyehe ra naha tsi ra, quitsaha natuhún ra naha tandihí tuhun cahán ángel tsihin ra naha tsa cuenda lee ican tsihin ñi.

18 Tan tandihí nyívi tsa tsiñi tuhun caahán ra naha, iyo xaan cuñí ñi.

19 Maa tyin ña María naquihin cuenda ña tuhun ican tsitsi añima ña, tan tandihí tuhun ican tsicá iñi ña.

20 Tan cuanuhu ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cundaá cuhva tsa catyí ángel ican tsihin ra naha.

*Nu tyaa cuenda ñi tsi ra Jesús ndaha Nyoo tsitsi vehe ñuhu cahnu*

21 Tsa ndu una quívi ra Jesús, tan tyaa ñi tuñi Nyoo tsi ra tyin tacan catyí tuhun tsahnu maa ñi. Tan jacanañi ñi Jesús tsi ra. Juvín ñi maa sivi tsa catyí ángel tsihin ña María quívi tsa ndi cumañi ca cahun ra Jesús tsitsi ña.

22 Tan tsa yaha quívi cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

23 Tacan ñi javaha ñi tyin catyí ley Nyoo tyin: “Tandihí sehe nuu ñi tsa cuví rayí, cua tyaa cuenda ñi tsi ra ndaha Jutu yo Nyoo”, catyí ley ican.

24 Tan tsahan ñi tsijamañi ñi uvi taahan quití, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

25 Tan quívi can iyó iin ra ñuu Jerusalén nañí ra Simeón. Iin ra cuíti

xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyívi ñuu Israel ican. Tan nyaá Tatyí Ii Nyoo tsihin ra Simeón.

26 Tan jacoto Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo.

27 Tan Tatyí Ii jacuhun ra tsi ra Simeón can nda vehe ñuhu. Tan juvín ñi cuhva can tsaá jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley.

28 Tan cuhva tsa tsaá ñi nu nyaá ra Simeón tan quihín ra Simeón tsi ra Jesús. Tan tyihí jucun ndaha ra tsi ra. Tacan tan quitsaha jacahnú ra tsi Nyoo, tan catyí ra:

29 —Jutu Mañi yu, vityin tsa cundaá cuhva tsa catyí maa un tsihin yu, tsa cuví yu musu un, cuví jaña ndaha un tsi yu vityin, tan na cúu yu tsihin tsa vaha.

30 Tyin tsa nyehe tsihin nuu yu tsi ra cua jacacu tsi ndi.

31 Tsa iyó ra ihya ityi nuu tandihí nyívi.

32 Tan cua cuvi ra ñuhu tsa cua jandunditsin añima nyívi tsa ñavin nyívi Israel cuví.

Tan cahnu ca cua jaha ra tsi nyívi Israel, tsa cuví ndi nyívi cuenda maa un —catyí ra Simeón.

33 Tan ra José tsihin sihi ra Jesús, iyo xaan cuñí ñi tsa tsiñi ñi tsa cahán ra Simeón tsa cuenda lee ican.

34 Tacan tan tsican tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaha xaan nyívi Israel ñuu Nyoo cua tsinu iñi tsi ra quívi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaha ra tsi ra tan cuví ra tumaa seña tsa cuenda yo.

35 Tacan tan coto tandihí yo náa tsicá iñi nyívi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin

mityi xaan tsa cua yaha añima un —catyí ra Simeón tsihin ña.

<sup>36</sup> Tan ican, tsitsi vehe ñuhu cahnu can, nyí tucu iin ñaha tsa cuví ndusu yuhu Nyoo. Nañí ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindaha ña, maa tyin utsa cuiya ñi tsicoo ña tsihin yí ña tan tsihi ra.

<sup>37</sup> Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña.

<sup>38</sup> Tan juvin ñi tsa ndi nyí ca ra José tan ña María tsihin lee ican, tan tsaá ña Ana nu yucú ñi. Tan quitsaha nacuhvá ña tyahvi nyoo tsi Nyoo. Tan cahan ña tuhun ra Jesús tsihin tandihí nyívi tsa yucú ican, nyívi tsa ndatú tsa cacu ñuu Jerusalén.

#### *Nu cuanuhu ñi nda ñuu Nazaret*

<sup>39</sup> Tacan tan tsa yaha tsa javaha ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhu ñi nda ñuu Nazaret tsa canyí Galilea nu cuví ñuu maa ñi.

<sup>40</sup> Tan ra luhlu Jesús vatsí cuahnu ca ra. Tan cua ndunye ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

#### *Nu cahan ra luhlu Jesús tsihin ra maestro cuenda ley vehe ñuhu naha ra*

<sup>41</sup> Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya.

<sup>42</sup> Tan tsa quitá tsa utsi uvi cuiya ra Jesús, tan tsahan tandihí ñi nda ñuu Jerusalén, cuhva tuhun tsa iyó maa ñi.

<sup>43</sup> Tan quívi ndihí vico, tan vatsí nuhu ñi, maa tyin ra luhlu Jesús ndoo ra ñuu Jerusalén can. Tan ña jahá jutu ra tan sihi ra cuenda.

<sup>44</sup> Tsicá iñi maa ñi tyin vatsí maa ra tyañu tandihí nyívi ican. Tan ndihí iin quívi tsicá ityi ñi. Tacan tan quitsaha nanducú ñi tsi ra tyañu nyívi nacotó tsi ñi.

<sup>45</sup> Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

<sup>46</sup> Tan tsa yaha uñi quívi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha.

<sup>47</sup> Tan tandihí nyívi tsiñi tsa caahán ra, iyo xaan cuñí ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra.

<sup>48</sup> Cuhva tsa nyehe jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javaha un tyehen? Jutu un tan yuhu tuñú xaan cuñi ndi tan nanducú xaan ndi tsi un —catyí ña.

<sup>49</sup> Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñi tsi nyehé yu tyiñu Jutu yu? —catyí ra.

<sup>50</sup> Maa tyin ña cutuñi iñi ñi tsa caahán ra tsihin ñi.

<sup>51</sup> Tacan tan cuanuhu ra tsihin ñi nda ñuu Nazaret. Tan vaha javahá ra tyin tyaá yahvi ra tsi ñi. Tan sihi ra naquihín vaha ña tandihí tuhun ihya tsitsi añima ña.

<sup>52</sup> Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan si xaan cuñi Nyoo tsihin ra, tacan tucu nyívi, si xaan cuñi ñi tsihin ra.

## 3

#### *Nu cahan ra Juan, ra jacoondutyá tsi nyívi, tuhun Nyoo nuu tsiqui (Mt. 3.1-12; Mr. 1.1-8; Jn. 1.19-28)*

<sup>1</sup> Tsa quitá tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisantias ndacá ñaha ra Abilinia quívi can.

<sup>2</sup> Tan ra Anás tsihin ra Caifás cuví ra naha jutu tsahnu tsa cuví ityi nuu. Quívi can cahan Nyoo tsihin ra Juan sehe ra Zacarías iin nu tsiqui.

<sup>3</sup> Tan ra Juan tsicá nuu ra tandihí ñuu tsa cayucú yatyin ñi yutya cahnu

Jordán, caahán ra tuhun Nyoo tsihin nyívi. Tan catyí ra tsihin ñi tyin na ndu uvi iñi ñi cuatyí ñi tan coondutya ñi. Tacan tan Nyoo cua jaha ra tuc-ahnu iñi cuatyí ñi, catyí ra.

<sup>4</sup> Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahañ tsanaha. Tan catyí ra:

Cua tyaa soho yo ndusu ra nu caná tsa ra nu tsiqui tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsi Jutu Mañi yo.

<sup>5</sup> Tumaa tsa tahví ndo yucu tan jandutú ndo xahva cunu, jandoó ndo ityi yacua, tan janduvahá ndo nu quiñi.

<sup>6</sup> Tacan tan tandihí nyívi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyívi.

<sup>7</sup> Tan tsa cuahán nyívi tsa cuñí ñi jacoondutya ra tsi ñi, tan catyí ra tsihin ñi:

—¿Nyooho cuví ndo tumaa tata cool? ¿A cuñí ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

<sup>8</sup> Yacan nasama ndo cuhva iyó ndo, na nyehe yo tyin tsa ndu uvi iñi ndo cuatyí ndo nuu Nyoo. Tan ña nduyaa ndo cahan ndo tyin nyívi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyívi ra Abraham.

<sup>9</sup> Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

<sup>10</sup> Tacan tan nducú tuhun ñi tsi ra tan catyí ñi:

—¿Tan nácaa javaha ndi? —catyí ñi.

<sup>11</sup> Tacan tan nacahan ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

<sup>12</sup> Tan tsaa tucu ra tsa tavá xuhun cuenda ra ndacá ñaha nda ñuu Roma,

tsa cuñí ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

<sup>13</sup> Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

<sup>14</sup> Tacan tan tsica tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyívi.

Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndo ndo vaha tsihin yahvi ndo —catyí ra Juan.

<sup>15</sup> Tan quívi can tandihí nyívi ndatú ñi tsi ra Cristo. Tan tsicá iñi ñi tun juvin ra Juan cuví Cristo.

<sup>16</sup> Maa tyin ra Juan catyí ra tsihin tandihí ñi:

—Tsa nditsa tyin jacoondutyá yu tsi ndo tsihin ndutya. Maa tyin vatsí inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuví yu musu ra tan ndatsi yu ñi nditsan ra. Tan ra ican cua jacoondutya ra tsi ndo tsihin Tatyí Ii Nyoo, tan tsihin ñuhu ihñi.

<sup>17</sup> Tan ra ican ndahá ra pala tyin cua jandava ra trigu. Cua natava sijn ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan tsihin ñi.

<sup>18</sup> Tan tacan cahan ra Juan tsihin nyívi can. Tan náa ndihí ca maa cuhva cahan ra tan jacoto ra tsi ñi nácaa tsa cua quitsi Sehe Nyoo.

<sup>19</sup> Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihñi ra tsi ña Herodías, ñasihi ra Felipe, yañi ra, tsihin tsa cuenda náa ndihí tsa ña vaha javahá ra.

<sup>20</sup> Maa tyin ña tyaa yahvi maa ra Herodes tuhun cahan ra Juan. Nu ndihí tuhun tinyi ra tsi ra Juan tsitsi vehe caa.

*Nu jacoondutyā ra Juan tsi ra Jesu-  
cristo*

(Mt. 3.13-17; Mr. 1.9-11)

<sup>21</sup> Tsa ndi cumañi ca cuhun ra Juan vehe caa tan jacoondutyā ra tsi tandihi nyivi. Tan jacoondutyā ndihi ra tsi ra Jesús. Tsa yaha tsicoondutyā ra, tsican tahvi ra tsi Nyoo, tacan tan nuña andivi.

<sup>22</sup> Tan nuu Tatyí li Nyoo siqui ra tumaa iin paloma. Tan cahan iin ndusu ityi siqui andivi, tan catyí tsi tyehen:

—Yooho cuví Sehe yu, tan cuñi xaan yu tsi un. Tan si xaan cuñi yu nyehé yu tsi un —catyí ndusu ican tsihin ra.

*Cuhva quitsi tata ra Jesucristo*

(Mt. 1.1-17)

<sup>23</sup> Tan tsa iyó maa tan oco utsi cuiya ra Jesús tan quitsaha jahá tyiñu ra tyiñu Nyoo. Tan tandihi nyivi cuñi maa ñi tyin sehe ra José cuví tsi ra. Tan ra José, sehe ra Elí cuví tsi ra.

<sup>24</sup> Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra.

<sup>25</sup> Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra.

<sup>26</sup> Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra.

<sup>27</sup> Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra.

<sup>28</sup> Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam,

sehe ra Elmodam cuví tsi ra. Tan ra Elmodam, sehe ra Er cuví tsi ra.

<sup>29</sup> Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra.

<sup>30</sup> Tan ra Matat, sehe ra Leví cuví tsi ra. Tan ra Leví, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquim cuví tsi ra.

<sup>31</sup> Tan ra Eliaquim, sehe ra Melea cuví tsi ra. Tan ra Melea, sehe ra Mainán cuví tsi ra. Tan ra Mainán, sehe ra Matata cuví tsi ra. Tan ra Matata, sehe ra Natán cuví tsi ra.

<sup>32</sup> Tan ra Natán, sehe ra David cuví tsi ra. Tan ra David, sehe ra Isaí cuví tsi ra. Tan ra Isaí, sehe ra Obed cuví tsi ra. Tan ra Obed, sehe ra Booz cuví tsi ra. Tan ra Booz, sehe ra Salmón cuví tsi ra. Tan ra Salmón, sehe ra Naasón cuví tsi ra.

<sup>33</sup> Tan ra Naasón, sehe ra Aminadab cuví tsi ra. Tan ra Aminadab, sehe ra Aram cuví tsi ra. Tan ra Aram, sehe ra Esrom cuví tsi ra. Tan ra Esrom, sehe ra Fares cuví tsi ra. Tan ra Fares, sehe ra Judá cuví tsi ra.

<sup>34</sup> Tan ra Judá, sehe ra Jacob cuví tsi ra. Tan ra Jacob, sehe ra Isaac cuví tsi ra. Tan ra Isaac, sehe ra Abraham cuví tsi ra. Tan ra Abraham, sehe ra Taré cuví tsi ra. Tan ra Taré, sehe ra Nacor cuví tsi ra.

<sup>35</sup> Tan ra Nacor, sehe ra Serug cuví tsi ra. Tan ra Serug, sehe ra Ragau cuví tsi ra. Tan ra Ragau, sehe ra Peleg cuví tsi ra. Tan ra Peleg, sehe ra Heber cuví tsi ra. Tan ra Heber, sehe ra Sala cuví tsi ra.

<sup>36</sup> Tan ra Sala, sehe ra Cainán cuví tsi ra. Tan ra Cainán, sehe ra Arfaxad cuví tsi ra. Tan ra Arfaxad, sehe ra Sem cuví tsi ra. Tan ra Sem, sehe ra Noé cuví tsi ra. Tan ra Noé, sehe ra Lamec cuví tsi ra.

<sup>37</sup> Tan ra Lamec, sehe ra Matusalén cuví tsi ra. Tan ra Matusalén, sehe ra Enoc cuví tsi ra. Tan ra Enoc, sehe ra Jared cuví tsi ra. Tan ra Jared,



sehe ra Mahalaleel cuv̄i tsi ra. Tan ra Mahalaleel, sehe ra Cainán cuv̄i tsi ra.

<sup>38</sup> Tan ra Cainán, sehe ra Enós cuv̄i tsi ra. Tan ra Enós, sehe ra Set cuv̄i tsi ra. Tan ra Set, sehe ra Adán cuv̄i tsi ra. Tan ra Adán, sehe Nyoo cuv̄i tsi ra.

## 4

*Nu nducú cuhva nu ña vaha tsi ra Jesús*

*(Mt. 4.1-11; Mr. 1.12-13)*

<sup>1</sup> Tan ñihi nyaá Tatyí Ii Nyoo tsihin ra Jesús tsa yaha tsicoondutya ra, quita ra yutya Jordán tan cuanuhu ra. Tan quih̄in Tatyí Ii Nyoo tsi ra, tan tsahan ra iin nu cuv̄i nu tsiqui

<sup>2</sup> nu tsinyij̄i ra uvi xico nduvi. Tan ña tsatsi maa ra tandih̄i quiv̄i ican. Yaha can tan quitsi tsa tsisocó ra. Tan nducú cuhva nu ña vaha tsi ra.

<sup>3</sup> Tan catyí nu tsihin ra:

—Tatun juvin Sehe Nyoo cuv̄i tsi un, cahan tsihin yuu ihya, na nanduvi tsi paan catsi un.

<sup>4</sup> Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyiv̄i coonyito ñi, tyin coonyito ñi tsihin tandih̄i tuhun caahán Nyoo —catyí ra Jesús tsihin nu ña vaha.

<sup>5</sup> Tacan tan quih̄in nu ña vaha tsi ra Jesús, cuahán ra iin jiñi yucu sucun. Tan iin yaha ñi janaha nu tandih̄i tsa cuca nu ndacá ñaha nu ñuu ñayiv̄i ihya tsi ra Jesús.

<sup>6</sup> Tan catyí nu tsihin ra:

—Cuhva yu tandih̄i tsa nyehé un tun cuñi un tyin maa Nyoo tsaha tsa cundaca ñaha yu tandih̄i can, tan ndáa ra cuñi yu cuhva yu can, cuv̄i tsii ra.

<sup>7</sup> Tatun yoocho tan cuiñi tsiti un nuu yu ihya tan jacahnu un tsi yu, tandih̄i can cua cuhva yu tsi un —catyí nu ña vaha tsihin ra.

<sup>8</sup> Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

<sup>9</sup> Tacan tan quih̄in nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaa nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuv̄i tsi un, ndava nu nyaá un ihya nda cuando nu ñuhu.

<sup>10</sup> Tyin catyí tsi nu tutu Nyoo tyin: Nyoo cua tava tyiñu ra tsi ángel ra tan jaha cuenda ra naha tsi un.

<sup>11</sup> Cua janahndi ra naha tsi un. Tan ña cua nañi tsaha un nu yuu.

<sup>12</sup> Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducú cuhva xaan un tsi Nyoo un” —catyí ra Jesús.

<sup>13</sup> Tan tsa ndih̄i nducú cuhva nu ña vaha tsi ra Jesús, tacan tan nacoq̄ nuu nu tsi ra.

*Nu quitsaha caahán ra Jesús tuhun Nyoo tsihin nyiv̄i*

*(Mt. 4.12-17; Mr. 1.14-15)*

<sup>14</sup> Tan tsa yaha tsa nducú cuhva nu ña vaha tsi ra Jesús tan cuanuhu ra nda Galilea tsihin tsa tsitú tunyee ñi Tatyí Ii Nyoo tsi ra. Tan tsitó nyiv̄i tuhun ra ñi cahnu Galilea can.

<sup>15</sup> Tan jacuahā ra tsi nyiv̄i nu cuv̄i vehe ñuhu tandih̄i ñi ñuu. Tan tandih̄i ñi jacahnu ñi tsi ra.

*Tsa tsaq̄ nyico ra Jesús ñuu Nazaret nu tsahnu ra*

*(Mt. 13.53-58; Mr. 6.1-6)*

<sup>16</sup> Tacan tan tsaq̄ nyico ra Jesús ñuu Nazaret nu tsahnu ra. Tan iin quiv̄i quitatú nyiv̄i, quih̄vi ra tsitsi vehe ñuhu, tumaa tsa tuhvá maa ra tsicá. Tan nduvitā ra cua cahvi ra tuhun Nyoo.

<sup>17</sup> Tan tsaha ra naha iin libru tsa tyaa ra Isaías ra cuv̄i ndusu yuhu Nyoo. Tan cuhva tsa nuñā ra, nañih̄i ra iin nu catyí tsi:

<sup>18</sup> Iyó Tatyí Ii Nyoo tsihin yu, tyin maa Nyoo tava tyiñu tsi yu

cahan yu tuhun ra tsihin nyiv̄i ndaahvi.

Tan janduvaha yu tsi nyiv̄i tsa uhvi añima.



Tan maa ra tava tyiñu tsi yu tyin jacoto yu tsi nyivi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyivi cuaa. Tan cua nacoo nuña yu tsi nyivi tsa iyó tundoho.

19 Tan jacoto yu tsi nyivi tyin tsa quita quivi tsa nyaá Nyoo tumañi iñi tsihin ñi.

20 Tacan tan ndihí cahvi ra tan nacasí ra nuu libru can. Tan nacuhva ra tsi iin ra tsa jatinyeé tsihin tyiñu vehe ñuhu can. Tan tsinyaá ra Jesús. Tacan tan tandihí nyivi tsa nyecú ican, ndoo ñi tsa nyehé ñi tsi ra.

21 Tacan tan catyí ra tsihin ñi:

—Vityin quivi ihya tsa cundaa cuhva catyí tuhun Nyoo tsa cahvi yu tsiñi ndo —catyí ra Jesús tsihin ñi.

22 Tan tandihí nyivi tsa nyecú can, vaha xaan cahán ñi tuhun ra. Tan iyo xaan cuñí ñi tsihin tandihí tsa vaha tsa cahán ra. Tacan tan quitsaha tsicá tuhun tahan ñi:

—¿A ñavin ra ihya cuví sehe ra José?

23 Tan nacahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyivi, janduvaha jihna tsi maa un.” Tan cuñí tucu ndo catyí ndo: “Tandihí tsa javaha un ñuu Capernaum tsitó ndi, javaha ndihí tucu can ñuu maa un ihya.”

24 Tan cahán ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyivi ñuu ra naha tsi ra naha.

25 Tan tsa nditsa tyin cuaha xaan ñi ndaahvi tsa tsihi yí tsicoo Israel ihya quivi tsa tava Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicá ra cahán ra tuhun Nyoo. Tan quivi can ña cuun maa savi uñi cuiya sasava. Tan tsicoo tama cahnu xaan.

26 Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahan ra jatinyeé ra tsi iin ñaha ndaahvi tsihi

yí tsa tsicoo ñuu Sarepta tsa canyí Sidón.

27 Tacan tucu quivi tsicá inga ra cuví ndusu yuhu Nyoo cuenda nyivi Israel, ra Eliseo. Cuaha xaan ra cuhvi tsihin cuehe tyaahyú tsicoo Israel ihya, tan ndi intuhun ra naha tan ña nduvaha ra naha. Nduvaha intuhun ñi ra Naamán ra quee ñuu Siria —catyí ra Jesús.

28 Tsa yaha tsiñi ñi tandihí tuhun can, tandihí nyivi tsa yucú tsitsi vehe ñuhu can xaan xaan cuñí ñi cuví.

29 Tan nduvita ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñí ñi janacava ñi tsi ra ican.

30 Maa tyin ra Jesús yaha ra tyañu ñi tan cuahán ra.

*Nu quita tatyí ña vaha tsayihí tsi iin rayí*

*(Mr. 1.21-28)*

31 Tan cuahán ra Jesús ñuu Capernaum tsa canyí Galilea. Tan jacuahá ra tsi nyivi tsitsi vehe ñuhu tandihí sauru, quivi tuhvá nyivi quitatú.

32 Tan iyo xaan cuñí ñi tsihin tsa cahán ra. Tyin ñihi xaan cahán ra tumaa tuhvá ra cumí tyiñu caahán.

33 Tan iin quivi nyí ra Jesús vehe ñuhu tan iin ra yihí tatyí ña vaha catyí ra caná tsa ra jahá tatyí ña vaha can:

34 —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe Ii Nyoo.

35 Tacan tan nduxaan ra Jesús tsi tatyí ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyivi nduva ra can nu ñuhu jahá tatyí ña vaha can, tan nduve ca náa javaha nu tsi ra can. Tan quita nu cuahán nu.

36 Tandihí nyivi tsa nyehe can, iyo xaan cuñí ñi tan yuhví ñi cuví. Tan quitsaha tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyí

ña vaha tan ñihi caahán ra, tan quitá tatyí ña vaha ican —catyí ñi.

<sup>37</sup> Tacan tan tandihí ñi ityi quitá natuhun nyívi tuhun ra Jesús.

*Nu janduvaha ra Jesús tsi ña tyiso ra Simón Pedro*

(Mt. 8.14-15; Mr. 1.29-31)

<sup>38</sup> Tacan tan quitá ra Jesús tsitsi vehe ñuhu can. Tan cuahán ra vehe ra Simón. Tan nu tsaá ra can, canyí ña tyiso ra Simón cuuhví ña tan ñihi xaan yíhí cahñi tsi ña. Tacan tan caahán ndaahvi ñi tsihin ra na janduvaha ra tsi ña.

<sup>39</sup> Tacan tan natuhva ra nu canyí ña tan nacañi nuu ra jiñi ra tan cahan ra tsihin cahñi can na quitá tsi. Tacan tan quitá cahñi can iin yaha ñi, tan nduvitá ña can, quitsaha nanducú ña tsa catsi ra Jesús.

*Nu cuaha xaan nyívi cuuhví janduvaha ra Jesús*

(Mt. 8.16-17; Mr. 1.32-34)

<sup>40</sup> Tan tsa tyiso ñicanyii, tandihí nyívi tsa iyó ñi cuuhví vehe ñi tsihin sñin sñin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvaha ra tsi ñi.

<sup>41</sup> Tan cuaha xaan nyívi quitá tatyí ña vaha tan caná tsa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaan ra tsi nahnu tan ña tsaá ra tsa cahan nahnu, tyin tsitó nahnu tyin juvin ra cuví Cristo.

*Nu tsica ra Jesús cahan ra tuhun Nyoo tandihí ñuu cayucú Galilea*

(Mr. 1.35-39)

<sup>42</sup> Tsa tuvi inga quívi, tan quee ra Jesús ñuu can. Tan cuahán ra iin nu taxin caá. Tan nyívi nanducú ñi tsi ra. Tan tsaá ñi nda nu nyí ra ican. Tan cuñí ñi tsa ña cuhun ca ra.

<sup>43</sup> Tacan tan catyí ra Jesús tsihin ñi: —Ndi cuñí ca tsi jacoto yu tsi nyívi tandihí ca ñuu nácaa tan quívi Nyoo aña ñi tan cundaca ñaha ra tsi ñi. Tyin yacan cuenda vatsí yu nu ñuhu ñayívi ihya.

<sup>44</sup> Tan tacan ñi tsicá ra Jesús caahán ra tuhun Nyoo vehe ñuhu tandihí ñi ñuu tsa cayucú Galilea.

## 5

*Nu tsaá ra Jesús ndatu tsa cuaha xaan tyaca ñihí ra naha*

(Mt 4.18-22; Mr. 1.16-20)

<sup>1</sup> Iin quívi nyaá ra Jesús yuhu miñi nu cuví Genesaret. Tan tsaá cuaha xaan nyívi, tyin cuñí ñi tyaa soho ñi tuhun Nyoo. Tan tihín xaan nyí ra Jesús tyañu ñi.

<sup>2</sup> Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quitá ra tñin tyaca. Tan nacatyá ra naha traya.

<sup>3</sup> Tacan tan quívi ra Jesús tsitsi iin yutun ndoo tsa cuví tsi ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaá ra Jesús tsitsi yutun ndoo can. Tan quitsaha caahán ra tsihin nyívi.

<sup>4</sup> Cuhva tsa ndihí cahan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tñin ndo tyaca.

<sup>5</sup> Tan nacañan ra Simón tan catyí ra:

—Maestro, tsa jaha tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

<sup>6</sup> Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsaha tyaahnyá tsihin tsa vee tyaca can.

<sup>7</sup> Tacan tan jandaha ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaá ra can naha ra. Tan jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca.

<sup>8</sup> Tsa nyehe ra Simón Pedro tsa cuví tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

<sup>9</sup> Tyin ra Simón tsihin tandihí ra yucú tsihin ra, nayuhví xaan ra naha tsa cuenda tsa cuaha xaan tyaca ñihí ra naha.

<sup>10</sup> Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tsihin ra Simón:

—Ña nayuhvi un, tyin vityin tan nda nu cuahán ca tsi ityi nuu, tumaa tsa tñin ndo tyaca ihya, tacan cua ñihí un nyívi cua cuví nyívi Nyoo, tan cua tava un tsi ñi nu caquiñi, na quihví ñi cuenda Nyoo —catyí ra Jesús tsihin ra Simón.

<sup>11</sup> Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

*Nu janduvaha ra Jesús tsi iin ra ndohó cuehe tyaahyú*

(Mt 8.1-4; Mr. 1.40-45)

<sup>12</sup> Iin quívi nyíi ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús, tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yooho tan cuñi un, cuví janduvaha un tsi yu —catyí ra.

<sup>13</sup> Tacan tan tyiso ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvaha ra.

<sup>14</sup> Tacan tan catyí ra Jesús tsihin ra:

—Coto catyí tuhun un tsihin nyívi. Intuhun ñi tsa cua cahan yu tsihin un, cuaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaq ra Moisés, tan cua cuví tsi iin tsandaa tsi ra jutu can tan tsi nyívi tyin tsa nduvaha un —catyí ra Jesús tsihin ra.

<sup>15</sup> Vasu ndi maa tsa ña cuñi ra Jesús tsa coto nyívi, ñihí ca quitá tuhun ra.

Tan cuaha xaan nyívi ndu iin tyin cuñi ñi tyaa soho ñi tsa caahán ra tan janduvaha ra tsi ñi.

<sup>16</sup> Maa tyin ra Jesús, jatsiyó, jatsiyó ñi ra tsi ra nu iyó nyívi. Tan cuahán ra nu taxin caá, cua ndacan tahvi ra tsi Nyoo Jutu ra.

*Nu janduvaha ra Jesús tsi iin ra xii*  
(Mt. 9.1-8; Mr. 2.1-12)

<sup>17</sup> Iin quívi jacuahá ra Jesús tsi nyívi. Tan yucú juhva ra fariseo, ra tyaá yahvi xaan ley Nyoo tsa tyaq ra Moisés tsanaha. Tan yucú tucu juhva ra maestro cuenda ley vehe ñuhu ican. Quitá ra naha ñuu Jerusalén, tan inga ñuu nyihí tan cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyívi cuuhví.

<sup>18</sup> Tacan tan tsaq ra naha tan nyiso ra naha iin ra cuuhví tsihin cuehe xii nu tsito. Tan cuñi ra naha quihví ra naha tsitsi vehe tan caquin ra naha tsi ra cuuhví can nu nyíi ra Jesús.

<sup>19</sup> Maa tyin ña ñihí ra naha nu quihví ra naha tyin tuvi xaan nyívi. Tacan tan ndaaq ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nu nyíi ra Jesús tyañu nu tuvi nyívi can.

<sup>20</sup> Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoq tucahnu iñi tsi un, tsa cuenda cuatyí un —catyí ra Jesús tsihin ra can.

<sup>21</sup> Tacan tan ra maestro cuenda ley vehe ñuhu tsihin ra cuví fariseo, quit-saha tsicá iñi ra naha: “¿Yóo ra cuví ra ihya? Tsicoq cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoq tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñi ra naha tsicá iñi ra naha.

<sup>22</sup> Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

<sup>23</sup> ¿Náa tsa yñi ca catyí yo? ¿A yñi catyí yo: “Cuatyí un tsa yaha ndatsi”,

a yí ca catyí yo tsihin iin nyívi xii: “Nduvita tan caca un”?

<sup>24</sup> Maa tyin vityin cua janaha yu tsi ndo tyin yuhu Rayí tsa quee nda gloria iyó ndatu tsi yu tsa jahá yu tucahnu íñi tsi ndo —catyí ra Jesús.

Tsa yaha cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

<sup>25</sup> Tan nduvita ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo.

<sup>26</sup> Tandíhi nyívi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

*Nu cana ra Jesús tsi ra Leví*

*(Mt. 9.9-13; Mr. 2.13-17)*

<sup>27</sup> Yaha can tan quita ra Jesús vehe can. Tan nanyehé ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañí ra Leví. Tan nyaá ra nu tyahví nyívi. Tan catyí ra Jesús tsihin ra:

—Cohon tsihin yu —catyí ra.

<sup>28</sup> Tacan tan nduvita ra Leví. Tan nacoo ra tandíhi tsa iyó tsi ra. Tan cuahán ra tsihin ra Jesús.

<sup>29</sup> Tacan tan javaha ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyívi.

<sup>30</sup> Tan ra fariseo naha ra tsihin ra cuví maestro cuenda ley vehe ñuhu naha ra, quitsaha cahán nyaá ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

<sup>31</sup> Tan ra Jesús nacahan ra, tan catyí ra:

—Ña tsiñí ñuhu doctor tsi ra tsa vaha maa. Ra cuuhví, cuví ra tsiñí ñuhu doctor.

<sup>32</sup> Yuhu ña vatsí yu jatinyee yu tsi nyívi tsa tsicá íñi tyin vaha ñi, vatsí yu jatinyee yu tsi nyívi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

*Nu janaha ra Jesús tyin tatun tsa cuahán ra cua coo nyitya nyívi nyicún tsi ra*

*(Mt. 9.14-15; Mr. 2.18-20)*

<sup>33</sup> Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yoocho, ndíhi quívi tsatsí ra naha tan tsihí ra naha. ¿Nacuvi? —catyí ra naha.

<sup>34</sup> Tan nacahan ra Jesús, tan catyí ra:

—¿A cuví coonyitya nyívi yucú vico tindaha jaha ndo tatun nyíi ra tsa cua tindaha tsihin ñi? Ña cuvi. [Tyin síi cuñí ñi, tan cuñí ñi catsi ñi.]

<sup>35</sup> Maa tyin cua quita quívi tsa cua jatsiyo ra tindaha ícan tsi ra nu yucú ñi. Tacan tan cua coonyitya ñi.

*Nu jacuahá ra Jesús tyin ña nacatsí tahan tuhun tsahnu tsa iyó nyívi tsihin tuhun tsa tsa jacuahá ra*

*(Mt. 9.16-17; Mr. 2.21-22)*

<sup>36</sup> Tacan tan cahan tucu ra Jesús iin cuhva tsihin nyívi, tan catyí ra:

—Yoñi tsaahnyá iin jahma tsaá, tan naquicú ñi tsihin jahma tuuhu. Tyin tatun javaha ñi tacan, nandíyi jahma tsaá can. Tan ña ndoo vaha tsi tsihin jahma tuuhu can.

<sup>37</sup> Tan tacan tucu, ña cuví tyihi nyívi vinu tsaá tsitsi ñi tsaahnu. Tyin cua tyahnya ñi can tsihin vinu tsaá can. Tan cua tiví vinu can tan tiví ndíhi tucu ñi tsaahnu can.

<sup>38</sup> Yacan cuenda taahán tsi tyihi yo vinu tsaá tsitsi ñi tsaá. Tyin tacan tan nduvi taahan tsi tan cua jaha cuenda tahan tsi itsi.

<sup>39</sup> Tan yoñi tsihí vinu tsahnu, tan cuñí ñi coho ñi vinu tsaá. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi cuhva iyó maa ñi.]

## 6

*Nu tuhun ra tsicá tsihin ra Jesús yoco itya trigo quívi quitatú nyívi*  
*(Mt. 12.1-8; Mr. 2.23-28)*



<sup>1</sup> Iin quiví quitatú nyiví, yaha ra Jesús mahñu tsa tatsí nyiví. Tan ra tsicá tsihin ra tuhún ra naha yoco trigu. Tan jocon ra naha can tsihin ndaha ra naha. Tan tsatsí ra naha tsiti can.

<sup>2</sup> Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quiví quitatú yo?

<sup>3</sup> Tan nacahan ra Jesús, tan catyí ra: —¿A ñaha ca cahvi ndo nu tsahá cuenda tsi tsa javahá ra David tan ra cutahán tsihin ra quiví tsa tsisoco ra naha?

<sup>4</sup> Quihví ra tsitsi vehe Nyoo. Tan quihín ra paan tsa tyiso nyiví nuu altar Nyoo. Tan tsatsí ra. Tan tsahá ndihí ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

<sup>5</sup> Tacan tan catyí ra Jesús:

—Rayí tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quiví quitatú yo —catyí ra.

*Nu janduvaha ra Jesús tsi iin ra na ityi ndaha*

*(Mt. 12.9-14; Mr. 3.1-6)*

<sup>6</sup> Inga quiví quitatú nyiví quihví ra Jesús tsitsi vehe ñuhu. Tan quitsaha jacuahá ra tsi nyiví. Tan nyehe ra tsi iin ra tsa na ityi ndaha cuaha.

<sup>7</sup> Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quiví quitatú nyiví, tyin tacan tan cuví tyaa ra naha cuatyí tsi ra Jesús.

<sup>8</sup> Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can:

—Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinyaa nyityi ra mahñu ra naha.

<sup>9</sup> Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quiví quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyiví, o cahñi ndihí yo tsi ñi?

<sup>10</sup> Tacan tan ra Jesús nyehé ra intuhun intuhun ra naha. Yaha can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihí ra ndaha ra. Tan nduvaha ndaha ra.

<sup>11</sup> Maa tyin ra yucú ican naha ra, cuxaan ra naha. Tan quitsaha tsicá tuhun tahan ra naha tsi ra naha:

—¿Nacaa javaha yo tan cuví casi yo nu caahán ra Jesús ihya? —catyí ra naha.

*Nu nacatsí ra Jesús tsa utsi uvi taahan ra cua caca tyiñu ra*

*(Mt. 10.1-4; Mr. 3.13-19)*

<sup>12</sup> Quiví ican ndaa ra Jesús iin yucu. Tan ñiñu maa tsican tahvi ra tsi Nyoo.

<sup>13</sup> Tan tsa tuvi, cana ra tsi tandihí ra nyicún tsi ra. Tan nacatsí ra utsi uvi taahan ra naha. Tan jacunañi ra tsi ra naha apóstol, tan cuñí tsi catyí tsi “ra tsa tava tyiñu Nyoo”.

<sup>14</sup> Tan ihya nyaá sivi tandihí tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé;

<sup>15</sup> ra Mateo; ra Tomás; ra Jacobo, sehe ra Alfeo; tan ra Simón ra nyanaá cuví ra cuenda partido tsa cuñí cuhun cuatyí siqui ñuu Roma tsa ndacá ñaha tsi ñi;

<sup>16</sup> tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

*Nu jacuahá ra Jesús tsi nyiví cuaha*

*(Mt. 4.23-25)*

<sup>17</sup> Tacan tan nuu ra Jesús yucu ican tsihin tsa utsi uvi ra naha. Tan ndu iin nyiví tsa nyicún tsi ra tsaha yucu can. Tan tsa cuaha tucu nyiví quee ñuu Jerusalén tsihin tandihí ca ñuu cayucú Judea, tsihin tucu nyiví quee ityi yuhu ndutya ñuhu tsa cayucú yatyín ñi ñuu Tiro tsihin ñuu Sidón.



Tan tsaꞗ ñi tyin tyaa soho ñi tuhun caahán ra Jesús. Tan tandihí nyívi cuuhví cuñí ñi tsa janduvaha ra tsi ñi.

18 Tan tandihí nyívi tsa yíhí tatyí ña vaha janduvaha ra tsi ñi.

19 Tan tandihí ñi cuñí ñi tñin ñi tsi ra, tyin janduvaha ra tsi ñi tsihin tunyee iñi tsa iyó tsi ra.

*Tsehe cahán ra Jesús tsihin nyívi tsa naquihín ndaahvi ra*

(Mt. 5.1-12)

20 Tacan tan nanyehé ra Jesús tsi ra tsicá tsihin ra. Tan catyí ra tsihin ra naha:

—Tandihí nyoooho tsa ndaahvi, sñi xaan cua cuñi ndo, tyin taahán tsi cundaca ñaha Nyoo tsi ndo.

21 'Tandihí nyoooho tsa tsisocó vityin, sñi xaan cua cuñi ndo. Tyin coo quívi ña cua cusoco ca maa ndo. Tan tandihí nyoooho tsa tsacú tsa cuiihya cuñí ndo, sñi xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sñi cuñi ndo.

22 'Cusñi iñi ndo, quívi ndasi cuñi nyívi nyehe ñi tsi ndo, quívi tava ñi tsi ndo nu iyó ñi, quívi nduxaan ñi tsi ndo, quívi catyí ñi tyin nyívi ña vaha cuví ndo tyin tsinú iñi ndo tsi maa yu tsa cuví yu Rayñi quee nda gloria.

23 Sñi cuñi ndo quívi can tyin tacan tucu javaha nyívi ñi tahan tsanaha. Cuxaan ñi tsi ra cuví ndusu yuhu Nyoo. Nðava ndo tsihin tsa sñi cuñi ndo. Tyin cahnu xaan ndatu cua ñihi ndo nda gloria.

*Tsehe cahán ra Jesús tsihin nyívi ña tsinú iñi tsi ra*

24 'Maa tyin ndahvi nyoooho, ñi cuca. Tyin vityin sñi xaan cuñi ndo tsihin tandihí tsa cuca ndo. Maa tyin cua coo quívi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

25 'Tan ndahvi nyoooho tsa cuñi maa ndo tyin nduve tsa cumañi tsi ndo tsa vityin, tyin coo quívi cua cusoco ndo. Nyoooho tsa sñi cuñi vityin, ndahvi nyoooho, tyin coo quívi cua coo ndo tucuiihya iñi. Tan cua vacu xaan ndo.

26 Tan ndahvi nyoooho tsa vaha caahán nyívi tuhun ndo. Tyin tacan caa tucu nyívi tsicoo tsanaha, vaha xaan cahán ñi tuhun ra tsa cahán tsa ña nditsa tsihin ñi.

*Cuñi ndo tsi nyívi xaan iñi tsi ndo*

(Mt. 5.38-48; 7.12)

27 'Tandihí nyoooho tsa tsiñí tsa caahán yu, catyí yu tsihin ndo tyin: Cuñi ndo tsi nyívi xaan iñi tsi ndo. Javaha ndo tsa vaha tsihin nyívi tsa ndasi cuñi nyehe tsi ndo.

28 Cahán ndo tsa vaha tsihin nyívi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyívi caahán nyaá tsi ndo.

29 Tatun iin ra cañi iin tsiyo nuu ndo, cñhva ndihí ndo inga tsiyo, nacañi ndihí maa ra. Tatun iin ra quinyaá tsaqueta nditsí ndo, cñhva ndihí ndo camiseta ndo.

30 Cñhva ndo náa ndihí tsicán nyívi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi.

31 Tumaá cuñi ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi.

32 'Tatun cuñi ndo tsi maa ñi maa nyívi tsa cuñi tsi ndo, nduve tsa vaha javahá ndo. Tyin tacan icá tucu nyívi quiñi iyó.

33 Tan tatun tsihin nyívi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyívi, nduve tsa vaha icá ndo cuví can, tyin nyívi caquiñi, tacan icá tucu ñi can.

34 Tatun javahá ndo tumañi iñi tsi iin nyívi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyívi caquiñi, tacan icá ñi. Tatun náa tumañi iñi javahá ñi tsi nyívi vaha iñi tsi ñi, ndatú ñi tsa nacuhva tucu ñi can tumañi iñi tsi ñi.

35 Maa tyin nyoooho, cuñi ndo tsi nyívi xaan iñi tsi ndo. Tan javaha ndo tsa vaha tsihin ñi. Tan cñhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuví ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin

nyivi tsa ña nacuhvá tyahvi nyoo tsi ra, tan tsihin nyivi caquiñi.

<sup>36</sup> Cu uhvi iñi ndo tsi nyivi, tumaa uhvi cuñi Nyoo Jutu yo nyehé ra tsi yo.

*Ña cahan nyaa yo tsi inga nyivi  
(Mr. 7.1-5)*

<sup>37</sup> 'Ña cahan nyaa ndo tsi nyivi, tacan tan Nyoo ña cua cahan nyaa ra tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo.

<sup>38</sup> Cuhva ndo tsa tsiñi ñuhu tsi nyivi. Tacan tan cua cuhva tucu maa Nyoo tsa tsiñi ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyivi, tacan cuhva cua cuhva Nyoo tsi ndo —catyi ra Jesús.

<sup>39</sup> Tan tsahá ra Jesús cuhva ihya tsi ñi, tan catyi ra:

—iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva.

<sup>40</sup> Ndi intuhun ra cutuhvá ña cua cuví coto ra tsa tsitó ra jacuahá tsi ra. Tyin ndi quitsahá cahví ra. Cua coto ra nda ndihi cahvi ra.

<sup>41</sup> '¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un?

<sup>42</sup> Tatun tinuu maa un nyii iin yutun cahnu, ¿nacaa cua cuví catyi un tsihin ra yañi un: “Naha, na tava yu tsahan luhlu tsa nyii tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuví nyehe vaha un tsahan luhlu tsa cua tava un tinuu yañi un.

*Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuví ñi*

*(Mt. 7.17-20; 12.34-35)*

<sup>43</sup> 'Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha.

<sup>44</sup> Tandihí yutun nacotó yo tsi tun tsihin tsiti tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuví yucu vixi].

<sup>45</sup> Tan tacan tandihí nyivi vaha, vaha caahán ñi, tyin yihí tsa vaha añaima ñi. Maa tyin nyivi ña vaha, maa ñi maa tsa ña vaha caahán ñi tyin yihí tsa caquiñi añaima ñi. Tyin tsihin yuhu yo caahán yo tandihí tsa quitá tsitsi añaima yo.

*Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi  
(Mt. 7.24-27)*

<sup>46</sup> '¿Nacuenda catyi ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu?

<sup>47</sup> Vityin cua catyi yu tsihin ndo yóo ndacú nyooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyi yu.

<sup>48</sup> Cuví ndo tumaa cuví iin ra tsitó janduvita vehe. Tyin jihna ca tahvi cunu xaan ra tan tahán ra yuu. Tan tyaá ra tyihyo tsaha vehe can tsata yuu can. Tan quivi nduñihí cuún savi, ndutya can tsatya xaan tsi tsaha vehe, maa tyin vehe can ña tani maa tsi tyin vaha xaan quita tyihyo tsaha tsi.

<sup>49</sup> Maa tyin nyivi tsa tsiñi tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivi tsaá savi, tan cuñihí cuún savi, tan yahá ndutya cuaha tsaha vehe can. Tan vehe can, iin yaha ñi tani tsi —tacan catyi ra Jesús.

## 7

*Nu janduvahá ra Jesús musu iin ra capitán andaru  
(Mt. 8.5-13)*

<sup>1</sup> Ndihi cahan ra Jesús tsihin nyivi, tacan tan cuanuhu ra inga tsaha nda ñuu Capernaum.

<sup>2</sup> Tan ñuu can iyó iin ra capitán. Tan iyó iin musu ra tsa cuñi xaan ra. Tan cuuhví ra can. Tan tsa cuñi cúu ra.

<sup>3</sup> Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra.

<sup>4-5</sup> Tacan tan tsaā ra tsahnu ican naha ra nu nyíí ra Jesús. Tan quitsaha caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyívi cuví ra tsihin yo tsa cuví yo nyívi Israel. Nda cuenda javaha ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñi ra tyin janduvaha un tsi ra.

<sup>6</sup> Tacan tan cuahán ra Jesús tsihin ra naha. Maa tyin tsa ndi cumañi ca tsaā ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaā ra naha nu nyíí ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra.

<sup>7</sup> Yacan ña cana iñi ra quitsi ra nu nyíí un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra?

<sup>8</sup> Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

<sup>9</sup> Tsa tsiñi ra Jesús tsa cahan ra can naha ra, tan iyo xaan cuñi ra. Tan nanyehe ra tsi nyívi tsa nyecú tsihin ra, tan catyí ra:

—Nditza nditza tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

<sup>10</sup> Tacan tan cuanuhu ra vaha iñi tsi ra capitán can naha ra. Tan tsa tsaā ra naha nda yuvehe, tan nyehe ra naha tyin tsa nduvaha musu ra.

*Nu janandotó ra Jesús tsi sehe iin ñaha ndaahvi tsihi yí*

<sup>11</sup> Tsa yaha yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyívi.

<sup>12</sup> Tacan tan cuhva tsa cua tsaā ra yatyin ñuu ican, nyehe ra tyin cuaha xaan nyívi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi yí. Tan intuhun ñi maa ra cuví sehe ña, tan tsihi ra.

<sup>13</sup> Tan tsa nyehe ra Jesús tsi ña, tan cundaahvi iñi ra nyehe ra tsi ña. Tan catyí ra tsihin ña:

—Ña vacu un.

<sup>14</sup> Tsahan natuhva ra tan tñin ra tsatun tsa nyíí ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

<sup>15</sup> Tacan tan nduvita ndiyi can. Tan nacunyaā ra. Tacan tan quitsaha caahán ra. Tan ra Jesús nacuhva cuenda ra tsi ra tsi sihi ra.

<sup>16</sup> Tsa nyehe ñi tsa tacan nandoto ra jaha ra Jesús tan yuuhví xaan ñi, tan quitsaha jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaā nu yucú yo ihya.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

<sup>17</sup> Tan tandihi maa nyívi taniñi cahnu Judea, tsito ñi tsa javaha ra Jesús.

*Nu jacuhun ra Juan uvi taahan ra tsa tsicá tsihin ra nu nyíí ra Jesús (Mt. 11.2-19)*

<sup>18</sup> Tan ra tsicá tsihin ra Juan naha ra nacatyí tuhun ra naha tsa javaha ra Jesús. Tacan tan cana ra Juan tsi uvi taahan ra naha.

<sup>19</sup> Tan tava tyiñu ra tsi ra naha na cuhun ra naha nu nyíí ra Jesús, tan

ndaca tuhun ra naha tsi ra tatun juvin ra cuví Cristo, ra tsa cua jacuitsi Nyoo. Tyin tatun ñavin ra Cristo cuví ra, cuatu ra naha tsi inga ra.

<sup>20</sup> Tacan tan ra tsa jacuhun ra Juan, cuahán ra naha. Tan tsaá ra naha nu nyíi ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jacuitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

<sup>21</sup> Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yíhí tatyí ña vaha. Tan cuaha tucu nyívi cuaa nanyehe ñi jahá ra.

<sup>22</sup> Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyi tuhun ndo tsihin ra Juan tandihí tsa nyehe ndo, tan tandihí tsa tsiñi ndo. Tan catyi ndo tsihin ra: ra cuaa nanyehe ra, ra coxo nacaca ra, ra ndohó cuehe tyaahyú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyi ndo tsihin ra tyin

<sup>23</sup> sñi xaan cuñi ñi nyicún tsi yu tun ña ndu uví iñi —catyí ra Jesús tsihin ra naha.

<sup>24</sup> Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyívi. Tan catyí ra:

—¿Náa nyehe ndo quívi tsahan ndo nuu tsiqui ndi ícan? ¿A nyehe ndo iin ndoo tsa janduvá tatyí?

<sup>25</sup> ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey.

<sup>26</sup> ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo.

<sup>27</sup> Juvín ñi tuhun ra Juan cuví tsa nyaá nuu tutu tsa tyaa ra Isaías tahanan tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahán tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

<sup>28</sup> Tan catyí yu tsihin ndo tyin tsitsi tsa tandihí ra tsa cacu jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

<sup>29</sup> Tandihí nyívi tan ra tavá xuhun naha ra, tsa tsicoondutyá jahá ra Juan, nacoto ñi tyin cuhva javahá Nyoo, cuii xaan tsi.

<sup>30</sup> Maa tyin tandihí ra fariseo tsihin ra maestro cuenda ley vehe ñuhu, ña cuñi ra naha tsa jacoondutyá ra Juan tsi ra naha, tyin ña cuñi ra naha quihin ra naha tsa tsahá Nyoo tsi ra naha —catyí ra Jesús.

<sup>31</sup> Tan catyí tucu ra:

—¿Náa cua jandu inducu yu tsihin nyooho, nyívi iyó quívi ihya? ¿Yóo caá tumaa caá ndo?

<sup>32</sup> Tumaa ra nyihi cuví nyooho. Tyin ra nyihi jasiquí nuyahvi. Tan caná tsa tahan ra naha, tan catyí ra naha: “Tívi ndi tiyoo tan ña tsañi ndo yaa. Tan tsita ndi yaa cuiihya, tan ña tsacu ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.]

<sup>33</sup> Tyin ra Juan, ra jacoondutyá, quitsi ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yíhí tsi ra.

<sup>34</sup> Tan quitsi tucu yuhu tan cuví yu Rayi tsa quee nda gloria. [Tan tsatsí yu tan tsihí yu.] Tan nyooho catyí ndo tyin tsatsí xaan yu tan tsihí xaan yu vinu. Tan ña taahán iñi ndo tsa cutahán yu tsihin ra iyó cuatyi naha ra, tan tsihin ra tavá xuhun naha ra.

<sup>35</sup> Maa tyin catyí yu tsihin ndo tyin tsa tsiñi tuñi Nyoo tsahá ra tsi nyívi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.



*Nu nyii ra Jesús vehe ra Simón ra cuví fariseo*

<sup>36</sup> Iin ra fariseo tsa nañi Simón jacoto ra tsi ra Jesús tyin cuhun ra cucatsi ra nda yuvehe ra. Tan tsaꝯ ra Jesús vehe ra, tan tsicunyaꝯ ra nu mesa.

<sup>37</sup> Tacan tan iin ñaha sꝯi iñi ñuu ican tsito ña tyin nyii ra Jesús ican. Tan tsaꝯ ña tsihin iin yutyi yuu xiñu tsitú tsi ndutya tami.

<sup>38</sup> Tan tsinyaꝯ ña yatyin ñi tsaha ra. Tan quitsahaꝯ tsacú ña tyin ndu uvi iñi ña cuatyí ña. Tan cuún ndutya nuu ña. Tan tsihin ndutya nuu ña nacatyá ña tsaha ra Jesús. Yahaꝯ can tan jana ityi ña tsaha ra tsihin ixi jiñi ña. Tan tyayuhꝯ ña tsaha ra. Tacan tan tyoso ña ndutya tami ican tsata tsaha ra.

<sup>39</sup> Tsa nyeheꝯ ra fariseo can tsa tacan ica ña, tan tsicá iñi ra: “Tatun nditsa tsa Nyoo jaquitsꝯ tsi ra ihya, cua nacoto ra yoo ñaha tñn tsaha ra, tyin ñaha ican, ñaha iyó cuatyí cuví ña.”

<sup>40</sup> Tacan tan ra Jesús catyí ra tsihin ra fariseo ican:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro —catyí ra.

<sup>41</sup> Tan catyí ra Jesús tyehen tsihin ra:

—Uvi taahan rayꝯi nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican nyaá cuenda ra uhun cientu denario. Tan inga ra nyaá cuenda ra uvi xico utsi ñi denario.

<sup>42</sup> Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jahꝯ ra tucahnu iñi tsi nduvi taahan ra naha. Tan vityin catyí tsihin yu, yooho Simón, ¿ndáa ra cua cuñi ca tsi ra tsa tsahá nuu xuhun ican? —catyí ra Jesús.

<sup>43</sup> Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

<sup>44</sup> Tacan tan nanyeheꝯ ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihvꝯi yu tsitsi vehe un, tan ña tsahaꝯ un ndutya tsa ndoo tsaha yu tumaa cuhva tsa iyó yo. Tan ñaha ihya nacatyꝯ ña tsaha yu tsihin ndutya nuu ña. Tan jana ityi ña tsihin ixi jiñi ña.

<sup>45</sup> Yooho ña tyayuhꝯ un ndaha yu, tumaa cuhva tsa iyó yo, maa tyin maa ña nda cuanda tsa quihvꝯi yu ihya tan ña jandihí ña tsa tyayuhú ña tsaha yu.

<sup>46</sup> Tan yooho ña tyihꝯ un acetye jiñi yu, maa tyin ñaha ihya tyihꝯ ña ndutya tami tsaha yu.

<sup>47</sup> Tan catyí yu tsihin un, yooho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñi ñi tsi yu —catyí ra Jesús.

<sup>48</sup> Tacan tan catyí ra Jesús tsihin ña can:

—Cuatyí un tsa yahaꝯ catsiyꝯ, tyin tsa jahꝯ Nyoo tucahnu iñi tsi un —catyí ra Jesús tsihin ña.

<sup>49</sup> Tacan tan ra yucú tsihin ra quitsahaꝯ tsicá iñi ra naha: “¿Yoo ra cuví ra ihya? tyin jahá ra tucahnu iñi cuatyí nyivi.”

<sup>50</sup> Tacan tan catyí ra Jesús tsihin ñaha ican:

—Cuaahan vityin, tsa cacꝯ un tyin tsinꝯ iñi un tsi yu. Cuaahan tsihin tsa vaha —catyí ra tsihin ña.

## 8

*Ñiñaha tsa jatyinyeꝯ tsi ra Jesús*

<sup>1</sup> Tsa yahaꝯ can, tan cuahán ra Jesús tsicá ra iin iin ñuu nahnu tan iin iin ñuu nyihí. Tan caahán ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tavaꝯ tyiñu ra, cuahán ra naha tsihin ra.

<sup>2</sup> Tan cuahán tucu juhva ñiñaha tsa janduvahaꝯ ra: ñi cuhvꝯi tan ñi yihꝯ tatyí ña vaha. Tan tsihin ñi cuahán ña María tsa queꝯ ñuu Magdala, tan



juvin ña cuví ña yihí utsa tatyí ña vaha tan nduvaha ña.

<sup>3</sup> Tan cuahán tucu ña Juana, ñasiihi ra Chuza, ra cumí tyiñu cuenda ra Herodes, tan ña Susana tsihin tandihí ca ñiñaha tsa jatyinyeé tsi ra Jesús tsihin tsa iyó tsi ñi.

*Nu caahán ra Jesús tyin tumaa iin ra tatsí tacan cuví ra caahán tuhun Nyoo*

*(Mt. 13.1-9; Mr. 4.1-9)*

<sup>4</sup> Tan cuaha xaan nyivi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsaha caahán ra tsihin ñi tsihin iin cuhva tsaha cuenda ra, tan catyí ra:

<sup>5</sup> —Quitá iin ra vehe ra. Cuahán ra nu iyó tyiñu jahá ra, tyin cua tatsí ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva yuhu ityi. Tan tsañi nyivi tsata can. Tan quitsi saa tan tsatsi ti.

<sup>6</sup> Tan juhva ca tsiti can cucoyo tyañu yuu. Caná tsiti ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin.

<sup>7</sup> Tan juhva ca tsiti cucoyo tyañu iñu. Maa tyin quivi caná trigu iin caa ñi tsihin iñu can, iñu can tsahñi tsi trigu can.

<sup>8</sup> Maa tyin juhva ca tsiti cucoyo nu ñuhu vaha. Tan quivi tsahnú tsi, vaha xaan tsaha tsi tsiti. Tyin tsa iin ñi tsiti ican, cientu tsiti quitá tsihin tsi —catyí ra Jesús.

Tan tsa yaha tsaha ra cuhva can, tan quitsaha caná tsaa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

*Nu jacoto ra Jesús nacuenda jacuahá ra tsi nyivi tsihin cuhva caahán ra tsihin ñi*

*(Mt. 13.10-17; Mr. 4.10-12)*

<sup>9</sup> Yaha can tan ra tsicá tsihin ra, nducu tuhun ra naha tsi ra náa cuñi tsi catyi cuhva tsa cahan ra tsihin nyivi.

<sup>10</sup> Tacan tan catyí ra tsihin ra naha:

—Tsi nyooho jacotó Nyoo tuhun xeehe, nácaa ndacá ñaha ra. Maa tyin

tandihí ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi iñi ñi náa tuhun cuví can.

*Nu tsaha cuenda ra Jesús cuenda ra tsa tatsí*

*(Mt. 13.18-23; Mr. 4.13-20)*

<sup>11</sup> Cuhva tsa tsaha yu tsi ñi, cuñi tsi catyi tsi tyehen: tsiti can, tuhun Nyoo cuví tsi.

<sup>12</sup> Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi.

<sup>13</sup> Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Sii xaan naquihin vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsaha nyehé ñi tundoho, tan jandihí ñi tsa tsinú iñi ñi.

<sup>14</sup> Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaá ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi sii ca cuñi ñi tsihin tsa sii caá tsa iyó nu ñuhu ñayivi. Tan cuví ñi tumaa cuví yutun tsa ña tsaha tsiti.

<sup>15</sup> Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha aña ñi tyin tsinú iñi ñi tsihin tanii aña ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihí tuhun caahán ra.

*Nu cahan ra Jesús tyin ña cua tyihi xeehe yo ñuhu tsa jandunditsin Nyoo aña yo coto quinyaa ra itsi*

*(Mr. 4.21-25)*

<sup>16</sup> Ndi intuhun yo ña tyaá yo ñuhu tyuma tan tyihí xeehe yo xuu tsito a inga nu xeehe. Tyaá yo ñuhu tyuma maa tyin tsaquin nyaa yo can iin nu sucun, tacan tan quihvi nyivi tsitsi vehe maa tyin nditsin.

<sup>17</sup> Tyin nduve iin tsa nyíí xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo.

<sup>18</sup> Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñí maa ndo tyin cumí ndo.

*Nu tsaha cuenda ra Jesús tyin tumaa yañi ra, tan tumaa sihi ra, tacan cuví nyívi tyaá yahvi tuhun Nyoo*

*(Mt. 12.46-50; Mr. 3.31-35)*

<sup>19</sup> Tacan tan tsaá sihi ra Jesús tsihin yañi ra nu nyíí ra. Maa tyin ña cuví tsaá ñi tyin tuvi xaan nyívi.

<sup>20</sup> Tacan tan jacoto nyívi nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

<sup>21</sup> Tacan tan nacahan ra Jesús, tan catyí ra:

—Tandihí maa nyívi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

*Nu jacutaxin ra Jesús tatyí ñihi nu miñi*

*(Mt. 8.23-27; Mr. 4.35-41)*

<sup>22</sup> Cuví tsi iin quívi quíhví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican.

<sup>23</sup> Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaá tatyí ñihi xaan. Tan quitsaha tyihí tsi ndutya tsitsi yutun ndoo ican. Tan cuñí nyee yutun ndoo can tyin cuaha xaan ndutya quíhví.

<sup>24</sup> Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutya —catyí ra naha.

Tacan tan nduvita ra Jesús. Tan caahán ra tsihin tatyí can tan tsihin

ndutya can, na cutaxin tsi. Tan cutaxin tsi.

<sup>25</sup> Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsaha tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

*Nu nduvaha iin ra yihí tatyí ña vaha nda Gadara*

*(Mt. 8.28-34; Mr. 5.1-20)*

<sup>26</sup> Tacan tan tsaá ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can.

<sup>27</sup> Tan quita ra Jesús tsitsi yutun ndoo ican. Tan ican tsaá iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu.

<sup>28-29</sup> Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyívi iyó. Ra ican tsaá ra nu nyíí ra Jesús. Tan cuhva tsa nyehe ra can tsi ra Jesús, tsicuiñi tsiti ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tava tyiñu ra tsi nu tsa quita nu tsi ra ndaahvi ican.

<sup>30</sup> Tan nducu tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.]

<sup>31</sup> Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuvi maa quita nahnu.

<sup>32</sup> Tan tsican nahnu tsi ra Jesús na cuhva ra quihvi nahnu tsitsi quini tsa yucú yuhu miñi ican tsatsí ti naha ti. Tacan tan tsaha ra Jesús ndatu tsa quihvi nahnu tsitsi quini ican naha ti.

<sup>33</sup> Tan quita nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinu quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

<sup>34</sup> Tacan tan ra jahá cuenda tsi quini ican naha ra, nayuhvi xaan ra naha. Tan tsinú ra naha cuahán ra naha cua nacatyí tuhun ra naha tsa cuvi can tsihin nyivi nda ñuu. Tan tandihi ñi nyivi tsa nyehe ra naha, tan nacatyí tuhun ra naha tsa cuvi ican.

<sup>35</sup> Tacan tan tsahan nyivi tsinyehe ñi náa tsa cuvi, tan tsaá ñi nu nyii ra Jesús. Tan nañihí ñi tsi ra tsa tsa yaha quita tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñi jiñi ra. Tan nayuhvi xaan ñi cuvi.

<sup>36</sup> Tacan tan tandihi ñi tsa nyehe tsa cuvi ican, nacatyí tuhun ñi tsihin tandihi ca nyivi nácaa quita tatyí ña vaha tsi ra ndaahvi can, tan nduvaha ra.

<sup>37-39</sup> Tacan tan tandihi nyivi iyó Gadara can quitsaha caahán ñi tsihin ra Jesús na cunuhu ra ityi nu quee ra. Tyin nayuhvi xaan ñi tsa javaha ra tsihin nu tatyí ña vaha ican. Tacan tan ra tsa quita nu tatyí ña vaha can nahnu, cahan ndaahvi ra tsihin ra Jesús, na cuhva ra cuhun ndihi ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihi tsa javaha Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvaha ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihi nyivi ñuu ican nácaa janduvaha ra Jesús tsi ra.

*Nu nduvaha ña sehe ra Jairo tan ñaha tsa tñin jahma ra Jesús*  
(Mt. 9.18-26; Mr. 5.21-43)

<sup>40</sup> Quivi tsa tsaá ra Jesús inga tsaha tsa tsahan ra inga tsiyo miñi can, cuaha xaan nyivi ndatú tsi ra. Tan sii xaan cuñi ñi tyin tsaá nyico ra.

<sup>41</sup> Tacan tan tsaá iin ra tsa nañi Jairo, ra cuvi ityi nuu vehe ñuhu, tan tsicuiñi tsi ti ra nuu ra Jesús. Tan quitsaha caahán ndaahvi ra tsihin ra na cuhun ra vehe ra.

<sup>42</sup> Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi.

<sup>43</sup> Tan tsihin nyivi ican cuahán iin ñaha cuuhvi. Tsa iyó utsi uvi cuiya ndohó ña cuehe tsa cuún niñi ña. Tan tsa ndihi maa xuhun ña janaa ña tsihin doctor tan ña nduvaha ña.

<sup>44</sup> Maa tyin tsaá ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuún niñi ña.

<sup>45</sup> Tacan tan catyí ra Jesús:

—¿Yóo tñin jahma yu?

Tan tandihi ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñin jahma yu?” —catyí ra naha.

<sup>46</sup> Maa tyin ra Jesús catyí ra:

—Tsitó maa yu tyin iyó iin nyivi tñin jahma yu, tyin tui iñi yu cuahán juhva tunyee iñi tsa iyó tsi yu —catyí ra.

<sup>47</sup> Tacan tan ñaha can nyehé ña tyin tsa tsitó ra. Tan quitsaha ñihí ña tsihin tsa yuuhví ña. Tan tsicuiñi tsiti ña nuu ra. Tan nacatyí tuhun ña tsihin ra nacuenta tñin ña jahma ra, tan nácaa nduvaha ña iin yaha ñi ican. Tan tsiñí tandihí nyívi tsa nacatyí tuhun ña.

<sup>48</sup> Tacan tan catyí ra Jesús tsihin ña:  
—Tsa nduvaha un tyin tsinú iñi un tsi yu. Cuaahan tsihin tsa vaha —catyí ra.

<sup>49</sup> Ndi caahán ca ra Jesús, tan tsaá ñi iin ra quee vehe ra Jairo, ra cuví ityi nuu vehe ñuhu. Tan catyí ra tsihin ra Jairo:

—Sehe un tsa yaha tsihi ña. Ña cuhva ca un tsihí tsi ra Maestro ihya —catyí ra.

<sup>50</sup> Maa tyin tsa tsiñi ra Jesús tsa cahan ra ican, tan catyí ra tsihin ra Jairo:

—Ña nayuhvi un. Tsñinu iñi. Tan ña sehe un cua nduvaha ña —catyí ra.

<sup>51</sup> Tan cuhva tsa tsaá ra Jesús vehe ra Jairo, ña tsaaha ra quihvi nyívi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyí ñaha luhlu tsa tsihi can.

<sup>52</sup> Tan tandihí ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsihi ña. Quixí ña —catyí ra.

<sup>53</sup> Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihi ña.

<sup>54</sup> Tacan tan tñin ra Jesús ndaha ña. Tan tsaá nacahan ra tan catyí ra tsihin ña:

—Nduvita, ñaha luhlu —catyí ra.

<sup>55</sup> Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

<sup>56</sup> Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuví ican.

## 9

*Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo*

*(Mt. 10.5-15; Mr. 6.7-13)*

<sup>1</sup> Cana ra Jesús tsa utsi uvi taahan ra tsicá tsihin ra. Tan tsaaha ra tunyee iñi cahnu tsi ra naha tyin cuvi tava ra naha tatyí ña vaha tsi nyívi, tan cuvi janduvaha ra naha tsi nyívi cuuhví.

<sup>2</sup> Tan tava tyiñu ra tsi ra naha na cahan ra naha nácaa ndacá ñaha Nyoo tsi nyívi. Tan tava tucu ra tyiñu tsi ra naha na janduvaha ra naha tsi nyívi cuuhví.

<sup>3</sup> Tan catyí ra tsihin ra naha:

—Nduve tsa cuiso ndo ityi cahun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cahun tsihin ndo.

<sup>4</sup> Tan ndáa cuví ñi vehe tsaá ndo, ndoo ndo ican nda cuanda quita quívi tsa cahun ndo inga ñuu.

<sup>5</sup> Tan nu ña cuñi nyívi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó catyí ñi siqui ñi —catyí ra Jesús tsihin ra naha.

<sup>6</sup> Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñi tsi tan cacu ñi. Tan janduvaha ra naha tsi nyívi cuuhví.

*Nu cuñi ra Herodes coto ra yoo ra cuví ra tsicá nuu caahán tuhun Nyoo tan janduvahá ra nyívi*

*(Mt. 14.1-12; Mr. 6.14-29)*

<sup>7</sup> Ra Herodes, ra cuví ra ndacá ñaha [taní cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yoo ra cuví ra. Tyin yihí nyívi catyí ñi tyin ra Juan nandoto.

<sup>8</sup> Tan yihí ñi catyí ñi tyin ra Elías quituvi nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto.

<sup>9</sup> Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, zyoo ra



cuví ra tsa caahán xaan nyívi tuhun catyí ñi tsiñí yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

*Nu tsahá ra Jesús tsa catsi uhun mil rayí*

(Mt. 14.13-21; Mr. 6.30-44; Jn 6.1-14)

<sup>10</sup> Tan cuhva tsa tsaa nyico ra tava tyiñu ra Jesús, tan nacatyí tuhun ra naha tsihin ra Jesús tandíhi maa tsa cuví nu tsahan ra naha. Tacan tan tava sñn ra Jesús tsi ra naha tan cuahán ra naha yatyin ñi iin ñuu tsa nañí Betsaida.

<sup>11</sup> Maa tyin cuhva tsa ñihi tuhun nyívi tyin cuahán ra Jesús ndacan, tan cuahán ñi nda nu nyí ra. Tan naquihin cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyívi cuuhví.

<sup>12</sup> Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyívi ihya, na cunuhu ñi na quitatu ñi, na nanducu ñi tsa catsi ñi ñuu tsa canyí yatyin ñi ihya, tyin ihya nduve maa tsa catsi yo iyó —catyí ra naha.

<sup>13</sup> Tacan tan catyí ra Jesús tsihin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihi tsa catsi tandíhi nyívi ihya. Ndi maa cuhun ndi kujata ndi, maa tyin ña cua ñihi tsa catsi ñi tyin cuaha xaan ñi —catyí ra naha.

<sup>14</sup> Tyin vasiquí quitá maa uhun mil rayí yucú ican. Tan sñn maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyívi tsa uvi xico utsi taahan ñi iin iin nu cunyecu ñi.

<sup>15</sup> Tacan tan tsicunyecu tandíhi ñi jahá ra naha.

<sup>16</sup> Tan quihín ra Jesús uhun taahan paan ican tsihin uvi taahan tyaca

ican. Tan nanyehe ndaa ra ityi andívi, tan nacuhvá ra tyahvi nyoo tsi Nyoo tsa cuenda can. Tan tsahnya sava ra paan tan tyaca ican. Tan tsahá ra tsi ra tsicá tsihin ra, na tsatsa ra naha can tsi nyívi.

<sup>17</sup> Tacan tan tandíhi ñi tsatsi ñi, tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi taahan tyica tsihin tsa ñahñu ican.

*Nu catyí ra Pedro tyin ra Jesús cuví ra Cristo, ra jacacú tsi yo*

(Mt. 16.13-19; Mr. 8.27-29)

<sup>18</sup> Iin quívi quitá sñn ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndíhi tsican tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyívi tuhun yu, yóo ra cuví yu, catyí ñi?

<sup>19</sup> Tan nacahan ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyá tsi nyívi, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo tahanan tsanaha cuví un —catyí ra naha.

<sup>20</sup> Tacan tan nducu tuhun ra Jesús tsi ra naha, tan catyí ra:

—Tan nyooho, ¿yóo ra cuví yuhu, cuñí maa ndo?

Tan nacahan ra Pedro, tan catyí ra:

—Yooho cuví ra Cristo, ra tsa quee nu nyaá Nyoo.

<sup>21</sup> Tan catyí ra Jesús tsihin ra naha tyin ña cahan ra naha can tsihin nyívi.

*Nu jacoto ra Jesús nácaa cua cahñi nyívi tsi ra*

(Mt. 16.20-28; Mr. 8.30—9.1)

<sup>22</sup> Tacan tan catyí ra tsihin ra naha inga tsaha:

—Yuhu Rayí tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quívi cua nandoto yu —catyí ra Jesús.



<sup>23</sup> Tacan tan catyí ra tsihin ra naha: —Nyooho tsa cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Ña ndu uvi iñi ndo tsa yihí ndo cuenda yu vasu tandihi quiví nyehé ndo tundoho. Tyin yacan cuvi tumaa cruu tsa taahán tsi cuiso ndo tatun cua cunyicun ndo tsi yu.

<sup>24</sup> Tan nyooho tsa ña cuñí nyehe tundoho tan ña cuñí ndo cuhva ndo ñayiví iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayiví iyó ndo tsa cuenda yu, cua cacu ndo.

<sup>25</sup> Nduve yahvi nyaá cua ñihi ndo tandihi tsa iyó nu ñuhu ñayiví ihya, tun ña cua cacu aña ndo.

<sup>26</sup> Tyin tatun cahan nuu ndo tsa xaan cuñí nyiví nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsa quiví quitsi yu inga tsaha. Tyin cua quitsi nyico yuhu Rayi tsa quee nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra.

<sup>27</sup> Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

*Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo*

*(Mt. 17.1-8; Mr. 9.2-8)*

<sup>28</sup> Una quiví yahá tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra.

<sup>29</sup> Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Siñ xaan cuitsin tsi tan xiñu tsi.

<sup>30</sup> Tacan tan quituví uvi taahan ra natuhún tsihin ra, ra Moisés tan ra Elías.

<sup>31</sup> Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra.

<sup>32</sup> Tan vasu cuñí xaan ra Pedro naha ra cusu ra naha, maa tyin ña quixi maa ra naha tyin nyehé ra naha tsa nditsin cuví nu nyaá ra Jesús tsihin ra nyecú tsihin ra.

<sup>33</sup> Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

<sup>34</sup> Tan tsa ndi caahán ca ra tan quitsi iin vico siqui ra naha. Tan nayuhví xaan ra naha tsa quihví ra naha tsitsi vico ican.

<sup>35</sup> Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuví Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

<sup>36</sup> Tan tsa yahá cahan ndusu ican, tan nanyehe ra naha tyin intuhun ña maa ra Jesús nyaá ican. Tan yoñi maa tsihin cahan ra naha tsa nyehe ra naha.

*Nu janduvahá ra Jesús tsi iin ra luhlu tsa yihí tatyí ña vaha*

*(Mt. 17.14-21; Mr. 9.14-29)*

<sup>37</sup> Tan tsa inga quiví tsa nuu ra Jesús yucu ican, cuaha xaan nyiví tsijatahan tsi ra.

<sup>38</sup> Tacan tan caná tsa iin ra cuahán tsihin nyiví cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu.

<sup>39</sup> Tan tuhvá tatyí ña vaha quihví tsi ra. Tan tuhvá ra caná tsa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra.

<sup>40</sup> Tsa cahan yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tavá ra naha tsi nu —catyí ra.

<sup>41</sup> Tacan tan nacahan ra Jesús tan catyí ra:

—Nyooho, nyivi ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyeé iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

<sup>42</sup> Tan cuhva tsa natuhva ra luhlu can nu nyaá ra Jesús, tan janduva nu tatyí ña vaha ican tsi ra ndasava. Maa tyin ra Jesús tava ra tsi nu tatyí ña vaha ican. Tan janduvaha ra tsi ra. Tacan tan nacuhva cuenda ra tsi ra tsi jutu ra.

<sup>43</sup> Tan tandihi nyivi, iyo xaan cuñi ñi tsa cahnu tsa javaha Nyoo nu yucú ñi.

Tsitsi tsa iyo cuñi nyivi tsa javaha ra Jesús, tan catyí ra tsihin ra tsicá tsihin ra:

*Nu cahan ra Jesús inga tsaha tyin cua cahñi nyivi tsi ra*

(Mt. 17.22-23; Mr. 9.30-32)

<sup>44</sup> —Tyaa soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

<sup>45</sup> Maa tyin ra tsicá tsihin ra ña cutuñi iñi ra naha nacuenda cahan ra tacan. Tyin Nyoo ña tsaha ra tsa cutuñi iñi ra naha. Tan yuhví ra naha nducu tuhun ra naha tsi ra Jesús náa cuví tsa caahán ra.

*Nujanaha ra Jesús yoo ra tsa cahnu ca cuví nu ndacá ñaha Nyoo*

(Mt. 18.1-5; Mr. 9.33-37)

<sup>46</sup> Tacan tan ra tsicá tsihin ra quit-saha caahán yuhu tahan ra naha, ndaa ra cahnu ca cuví tsitsi tsa utsi uvi taahan ra naha.

<sup>47</sup> Tan tsitó ra Jesús tsa tsicá iñi ra naha, tan quihin ra iin ra luhlu.

<sup>48</sup> Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú

ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

*Nyivi tsa ña cuxaán tsi yo, juvin ñi ican jatyinyeé tsi yo*

(Mr. 9.38-40)

<sup>49</sup> Tacan tan ra Juan catyí ra tsihin ra Jesús:

—Maestro, nyehe ndi tsi iin ra tava tatyí ña vaha. Caahán ra sivi un tan tava ra tatyí ña vaha. Maa tyin ña tsaha ca ndi javaha ra tacan. Tyin ñavin tsihin yo tsicá ra —catyí ra.

<sup>50</sup> Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

*Nu cahan ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha*

<sup>51</sup> Tuví iñi ra Jesús tyin tsa nyaa naa yatyin quivi tsa cunuhu ra gloria. Tan jandu iin ra iñi ra, tan quihin ra ityi tan cuahán ra ñuu Jerusalén.

<sup>52</sup> Tan tava tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús.

<sup>53</sup> Maa tyin nyivi Samaria ican, ña cuñi ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñi ñi nyehe ñi tsi nyivi ñuu Jerusalén.

<sup>54</sup> Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñi un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñi ñi tsa ndoo yo ñuu ñi —catyí ra naha.

<sup>55</sup> Tacan tan nyehe ra Jesús nuu ra naha. Tan cuxaán ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñi iñi ndo náa tyiñu vatsí yuhu.

<sup>56</sup> Tyin Rayi tsa quee nda gloria, ña vatsí ra tyin janaa ra tsi nyivi,

maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

*Nyivi tsa cuñi quihvi cuenda ra Jesús*

*(Mt. 8.19-22)*

<sup>57</sup> Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñi yu cunyicun yu tsi un. Tan cuhun yu tsihin un tandihi ñi ityi cuhun un —catyí ra.

<sup>58</sup> Tacan tan catyí ra Jesús tsihin ra: —¿A nditsa un? Tyin ñicuii iyó vehe ti. Tan saa iyó taca ti. Maa tyin Rayii tsa quee nda gloria ndi nu cava jiñi ra tan nduve iyó —catyí ra tsihin ra ican.

<sup>59</sup> Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cuatu nuu tsi yu, na cuhun jihna yu cucutsi yu tsi jutu yu —catyí ra.

<sup>60</sup> Tacan tan ra Jesús nacahan ra tan catyí ra tsihin ra:

—Nacoo tsi nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cuaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

<sup>61</sup> Tacan tan catyí inga ra tsihin ra Jesús:

—Cuñi yu cunyicun yu tsi un, tata. Maa tyin cuhva na cuhun jihna yu cucahan yu tsihin nyivi vehe yu —catyí ra.

<sup>62</sup> Tan ra Jesús catyí ra tsihin ra:

—Tumaa iin ra tahví ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñi nyico ra tsa tsa nacoq ra, ña cuvi cuhva ra tsi ra cundaca ñaha Nyoo —catyí ra Jesús tsihin ra.

## 10

*Nu tava ra Jesús tyiñu tsi uñi xico utsi taahan ra cua cahan tuhun Nyoo tsihin nyivi*

<sup>1</sup> Tsa yaha can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihi ñi ñuu, uvi uvi ra cuahan tsa iin nu cuahán ra nu cua cuhun ra Jesús.

<sup>2</sup> Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyivi.

<sup>3</sup> Tan cuaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuví quiti xaan. Tyin lobo tuhvá ti tsahñi tsi mbee. Tan tacan tucu cua cuñi nyivi cahñi ñi tsi ndo.

<sup>4</sup> Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cuhva ndo nacumi tsi ñi tan ña cucuiñi ndo natuhun ndo tsihin ñi.

<sup>5</sup> Cuhva tsa quihvi ndo tsitsi vehe iin nyivi, cahan ndo tsihin ñi. Tan catyi ndo, na coo tsa vaha añima ñi.

<sup>6</sup> Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yoñi ñi vaha añima, ña cua ndoo tsa vaha tsihin ñi.

<sup>7</sup> Tan ndoo ndo juven ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaa quivi tsa cuhun ndo inga ñuu.

<sup>8</sup> Tan nu tsaa ndo iin ñuu tan vaha cahan ñi tsihin ndo, catsi ndo tandihi tsa cuhva ñi catsi ndo.

<sup>9</sup> Tan janduvaha ndo tsi ñi cuuhví ñuu ican. Tan catyi ndo tsihin ñi: “Tsa nyanaá yatyin Nyoo, ra cuñi quihvi añima ndo cundaca ñaha ra tsi ndo.”

<sup>10</sup> Maa tyin tatun tsaa ndo iin ñuu tan ña cuñi nyivi tyaa soho ñi tsa caahán ndo, quita ndo ityi cahnu. Tan catyi ndo tsihin ñi:

11 “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñi tsi catyi tyin cuatyí ndo ndoó can siqui ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñi tsi tsa cundaca ñaha ra tsi ndo.” Tacan catyi ndo tsihin ñi —catyi ra Jesús tsihin ra tsa uñi xico utsi can naha ra.

12 Tan catyi tucu ra tsihin ra naha:

—Quiyi cua tatsi tuñi Nyoo tsi nyivi, yaha ca cuhva cua nyehe nyivi ñuu ican tundoho tan ñavin ca nyivi tsicoo tahañ tsanaha ñuu Sodoma, —catyi ra Jesús.

*Nyivi ña tyaá soho tuhun caahán ra Jesús cua nyehe ñi tundoho (Mt. 11.20-24)*

13 Tan catyi ra Jesús:

—¡Ndahvi nyooho, nyivi ñuu Corazin! Tan jndahvi nyooho nyivi ñuu Betsaida! Tyin nyehé ndo tsa iyo javahá yu, tan ña cuñi ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihya iñi tan cunyecu ñi nu nyaa: tsa ndu uvi iñi ñi cuatyí ñi cuví can.

14 Yacan cuenda, nyooho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can.

15 Tan nyooho nyivi ñuu Capernaum, cuñi maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyi ra Jesús.

16 Tan catyi ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyooho, tsa caahán yuhu tyaá soho ñi. Tan nyivi ña tyaá soho tsa caahán nyooho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyi ra Jesús tsihin ra naha.

*Nu tsaq nyico tsa uñi xico utsi ra tsa tsañan tsicahán tuhun Nyoo*

17 Ihya cuví nu tsaq nyico tsa uñi xico utsi ra tsa tsañan tsicahán tuhun Nyoo tsihin nyivi. Tan sii xaan cuñi ra naha. Tan catyi ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cañan ndi tsihin siyi un —catyi ra naha.

18 Tacan tan catyi ra Jesús tsihin ra naha:

—Tacan tyin yuhu nyehe yu andivi nu canacava nu ña vaha, nu nañi Satanás. Tumaa cañi iin tatsa savi, tacan canacava nu.

19 Tan maa yuhu, tsañan tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo.

20 Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaá siyi ndo nu libru Nyoo nda gloria —catyi ra Jesús tsihin ra naha.

*Nu jacahnú ra Jesús tsi Nyoo tsa sii cuñi ra tyin janahá Nyoo tsa vaha tsi nyivi ndaahvi*

*(Mt. 11.25-27; 13.16-17)*

21 Tacan tan sii xaan cuñi ra Jesús jahá Tatyí li Nyoo, tan catyi ra:

—Jacahnú yu tsi un, Jutu yu, tyin yooho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñi maa un —catyi ra Jesús.

22 Tan catyi ra Jesús tsihin tandihi ra naha:

—Tandihí maa tsañan Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yoo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yoo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñi Sehe Nyoo jacoto ra tsi ñi —catyi ra Jesús.



23 Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—Sii xaan cuñi nyooho tan nyivi tsa iyó vityin tyin nyehé ndo tsa javahá yu.

24 Tyin cuaha xaan rey tan ra cuví ndusu yuhu Nyoo tahañ tsanaha, cuñi ra naha nyehe ra naha tsa nyehé nyooho vityin. Maa tyin ña nyehe ra naha. Tan cuñi ra naha tyaa soho ra naha tsa tsiñi nyooho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

*Nu jacuahá ra Jesús tsi yo tyin taahán tsi jatyinyee yo tsi tandihí ñi maa nyivi*

25 Tacan tan tsaá iin ra maestro cuenda ley vehe ñuhu. Tan quitsahá tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayivi nyito tsa ña cua naa maa?

26 Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

27 Tacan tan nacahan ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin tanii añima yo tan tsihin tandihí cuhva tsicá iñi yo, tan tsihin tandihí tunyee iñi tsa iyó tsi yo, tan tsihin tandihí tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

28 Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

29 Maa tyin ra maestro cuenda ley can cuñi ra cuvi ra ra vaha nuu ra Jesús, tan catyí ra tsihin ra:

—¿Tan yoo nyivi cuñi yu? —catyí ra.

30 Tacan tan nacahan ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahañ ra tsi nu ñasuhu nahnu. Tan suhú nahnu tandihí maa tsa nyisó ra, nda cuanda jahma ra. Tan cañi nahnu tsi ra nda

cuanda tsaquin taxin ña nahnu tsi ra. Tan nacoó ihñi nahnu tsi ra ican.

31 Tacan tan yahá iin ra cuví jutu ityi can. Maa tyin tsa nyehe ra tsi ra canyí ican, ndasava ñi yahá tsiyo ra.

32 Tacan tan yahá tucu iin ra yihí cuenda vehe ñuhu, ra cuví tata ra Leví. Maa tyin tsa nyehe ra tsi ra canyí ican, juvin ñi ndasava yahá ra.

33 Tacan tucu iin ra Samaria yahá ra juvin ñi ityi can. Tan nyehe ra tsi ra canyí ican, tan quitsi tsa ndaahvi cuñi ra nyehé ra tsi ra.

34 Tan natuhva ra nu canyí ra, tan quitsahá tyaa ra numeri tsi ra, tyihí ra acetye tsihin vinu nu uhvi can. Tan tyaa ra iin jahma vita nu uhvi can. Yahá can tan jandaá ra tsi ra tsata burru jana ra, tan quihin ra tsi ra, cuahán tsihin ra nu nyaá iin vehe. Tan jahá cuenda ra tsi ra.

35 Tan tsa inga quivi tsa cuñi cuhun ra Samaria. Tan tava ra uvi taahan xuhun. Tan tsahá ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñi ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

36 Nu ndihí nacatyí tuhun ra Jesús, tan nducú tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinyaa ndaha nu ñasuhu nahnu? —catyí ra Jesús.

37 Tacan tan catyí ra maestro ican:

—Ra tsa cundaahvi iñi tsi ra —catyí ra.

Tacan tan catyí ra Jesús:

—Cuaahan tan ica tucu yooho tacan tsihin nyivi tsa nyehé tundoho —catyí ra.

*Nu tsinyaa ra Jesús vehe ña Marta tsihin ña María*

38 Tan quihin ra Jesús ityi cuahán ra. Tan tsaá ra iin ñuu. Tan ican iyó iin ñaha tsa nañi Marta. Tan tsaá ra vehe ña. Tan tsahá ña quihvi ra tsitsi vehe ña.

<sup>39</sup> Tan ña Marta, iyó iin tahan ña nañí María. Tan ña María tsicunyaa ña yatyin ñi tsaha ra Jesús, tyin tyaa soho ña tsa caahán ra.

<sup>40</sup> Tan ña Marta cuaha xaan tyiñu javahá ña. Tan tsaá ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoq ña tsi intuhun ñi maa yu tsihin tyiñu ihya? Cahán tsihin ña na jatyinyee ña tsi yu —catyí ña tsihin ra.

<sup>41</sup> Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñí un tsihin tyiñu can.

<sup>42</sup> Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsi ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

## 11

*Nu jacuahá ra Jesús tsi ra tsicá tsihin ra nácaa ndacan tahvi ra naha tsi Nyoo*

(Mt. 6.9-15; 7.7-11)

<sup>1</sup> Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janahá ra Juan tsi ra tsicá tsihin ra —catyí ra.

<sup>2</sup> Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tyehen ndacan tahvi ndo, catyí ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quiñi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihí cuhva cuñí maa un, tumaa cuhva cuví nda gloria.

<sup>3</sup> Cuhva tsa catsi ndi tan yaha ndi iin iin quiñi.

<sup>4</sup> Jaha tucahnu iñi tsi ndi tsa cuenda cuatyí ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jacacu tsi

ndi tan ña cua cunyee nu ña vaha tsihin ndi.

Tacan ndacan tahvi ndo —catyí ra Jesús.

<sup>5</sup> Tan catyí tucu ra:

—Na catyí yo tyin iin nyooho iyó iin ra vaha iñi tsi ndo, tan tsaá ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu.

<sup>6</sup> Tyin iin ra vaha iñi tsi yu ndi tsaá ra yuvehe yu. Tan cañi xaan quee ra. Tan nduve tsa cuhva yu catsi ra.”

<sup>7</sup> Tan nyooho cua nacahan ndo tan catyí ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuví nduvita yu tan cuhva yu tsa cuhva yu tsi un tsa vityin.” Tacan cua catyí ndo tsihin ra.

<sup>8</sup> Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuví cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo.

<sup>9</sup> Tan tacan tucu nyooho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña.

<sup>10</sup> Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

<sup>11</sup> Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca.

<sup>12</sup> Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi.

<sup>13</sup> Nyooho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí Ii ra cunyaa aña ndo tun ndacan ndo tsi ra.

*Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo*

*(Mt. 12.22-30; Mr. 3.20-27)*

<sup>14</sup> Ra Jesús tava ra tatyí ña vaha tsa janduñihí tsi iin rayí. Tsa quita nu tatyí can tsi ra can, cuví nacahan ra. Tacan tan iyo xaan cuñí nyívi tsa nyehe ñi tsa cuví.

<sup>15</sup> Tan yihí ñi catyí ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandihí tatyí ña vaha —catyí ñi.

<sup>16</sup> Tan yihí ñi cuñí ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andívi.

<sup>17</sup> Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihi tyiñu tsa ndacá ñaha ra naha. Tan tatun iin vehe tan natahvi nyívi tsihin tahan ñi, tacan tan cua tiví nu yucú ñi.

<sup>18</sup> Tan tacan tucu nu ña vaha, tatun natahvi nahnu, cua cundihi tunyee iñi tsa iyó tsi nahnu. Caahán yu tye-hen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu.

<sup>19</sup> Maa tyin tun tsatyin tavá yu tsi nahnu tumaa cuhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo.

<sup>20</sup> Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi catyí yacan tyin nditsa tyin Nyoo, ra taahán tsi cundaca ñaha tsi nyívi, tsa tsaá ra nu yucú ndo.

*Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha*

<sup>21</sup> Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu.

<sup>22</sup> Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

<sup>23</sup> Nyívi ña jahá tyiñu tsihin yu, jatíví ñi tyiñu jahá yu. Tan tatun ña caahán ñi tuhun Nyoo tsihin nyívi, tyin cunyicun ñi tsi yu; cuñí tsi catyí tsi tyin ña tsahá ñi tsa cunyicun nyívi tsi yu.

*Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa iñi yo*

<sup>24</sup> Tatun iin nu tatyí ña vaha quita nu tsi iin nyívi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: “Cunuhu nyico yu nda vehe yu nu quee yu.”

<sup>25</sup> Tacan tan tsaá nyico nu añaima nu quee nu. Tan nyehé nu tyin ndí xaan tan síi xaan caá.

<sup>26</sup> Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihí nahnu añaima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

*Nyívi tsa nditsa iyó vaha ñi nu ñuhu ñayívi*

<sup>27</sup> Tsitsi tsa ndi caahán ca ra Jesús yacan, tan caná tsaá iin ñaha tsa nyíi mahñu nyívi ican. Tan catyí ña:

—¡Náa tsa síi cuñí ñaha tsa jacacu tsi un, ñaha tsa jacaxin tsi un! —catyí ña.

<sup>28</sup> Maa tyin ra Jesús catyí ra:

—Síi xaan ca cuñi nyívi tsa tsiñi tuhun caahán Nyoo tan tyaá yahvi ñi itsi —catyí ra.

*Nyívi ña vaha, maa ñi maa tsa iyo cuñí ñi nyehe ñi*

*(Mt. 12.38-42; Mr. 8.12)*

<sup>29</sup> Tacan tan tsaá ca nyívi nu nyíi ra Jesús. Tan catyí ra tsihin ñi:

—Nyívi tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan

cuví tsa javahá Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi.

<sup>30</sup> Tumaa tsa janahá ra Jonás tsi nyívi ñuu Nínive tahán tsanaha tyin ii Nyoo, tacan tucu yuhu, Rayíi tsa quee nda gloria, janahá yu tsi nyívi tsa iyó vityin tyin ii Nyoo.

<sup>31</sup> Quiívi cua tatsi tuñi Nyoo tsi nyívi, cua nandoto ñaha cuví reina ityi sur tahán tsanaha, tan cua catyi ña tyin cuhun ndo anyaya tyin maa ña vasu cañi ñuu ña, maa tyin quítsi ña, quítsi tyaa soho ña tsa tsiñi tuñi tsa cahan ra Salomón. Tan vityin cahnu ca cuví ra nyaá tsihin ndo tan ñavin ca ra Salomón.

<sup>32</sup> Tan quiívi cua cutuñi tandihí nyívi, cua nandoto nyívi tsicoo ñuu Nínive tahán tsanaha, tan cua catyi ñi tyin nyooho nyívi tsa iyó vityin cuhun ndo anyaya, tyin nyívi Nínive ican, nasama ñi cuhva iyó ñi quiívi cahan ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

*Nu janahá ra Jesús tyin na jaha yo cuenda añaima yo na coo tsa nditsin jahá Nyoo*

(Mt. 5.15; 6.22-23)

<sup>33</sup> 'Ndi intuhun ndo tan ña tuhvá ndo tyaá ñuhú tyuma tan tyihí xeehe ndo can, a tinyíi ndo can tsitsi iin caja. Tyin ñuhú can taahán tsi cunyi can nu sucun. Tyin tatun quiívi nyívi tsitsi vehe ndo, nditsin.

<sup>34</sup> Tinuu yo, iin ñuhú nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añaima yo. Tatun iyó tsa nditsin jahá Nyoo añaima yo, vaha nyívi cuví yo. Tatun nduve tsa nditsin jahá Nyoo añaima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo.

<sup>35</sup> Yacan cuenda jaha ndo cuenda tsi ndo, na coo tsa nditsin jahá Nyoo añaima ndo, tan ña coo tsa naa.

<sup>36</sup> Tatun tsitú añaima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi taníi cahnu ndo. Tumaa tsa nyaá

iin ñuhú tyuma jandunditsín tsi taníi cahnu ndo cuví can —catyi ra Jesús.

*Nu cuxaan ra Jesús tsihin ra maestro cuenda ley vehe ñuhu naha ra tan tsihin ra fariseo naha ra*

(Mt. 23.1-36; Mr. 12.38-40; Lc. 20.45-47)

<sup>37</sup> Tsa ndihí cahan ra Jesús tsihin nyívi, iin ra fariseo, catyi ra tsihin ra, na cuhun ra cucatsi ra yuvehe ra. Tan tsaá ra Jesús vehe ra. Tan quiívi ra tsicunyaá ra nu mesa.

<sup>38</sup> Tacan tan ra fariseo ican iyo cuñí ra tyin ña nacatyá ra Jesús ndaha ra tsa ndi cumañi ca catsi ra, tumaa cuhva iyó maa ra naha.

<sup>39</sup> Maa tyin Jutu Mañi yo Jesús catyi ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooho. Tyin cuñí nyívi tyin vaha ndo. Maa tyin xeehe ñi suhú ndo tan javahá ndo tsa ña vaha.

<sup>40</sup> Ndava xaan iñi ndo. ¿A ña tsitó ndo tyin ra tsa javahá ityi tsata ndo, juvin ñi maa ra javahá ityi tsitsi ndo?

<sup>41</sup> Taahán tsi javaha ndo tumañi iñi tsi nyívi ndaahvi, tan jatyinyee ndo tsi ñi tsihin taníi añaima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

<sup>42</sup> ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihí ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaá yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva cuñí ra, tan ña jandihí ndo tsa cuhva ndo diezmo can.

<sup>43</sup> ¡Ndahvi nyooho tsa cuví ndo fariseo! tyin cuñí ndo cunyaá ndo nu tyayu vaha tsitsi vehe ñuhu. Tan cuñí ndo tsa tyaa yahvi nyívi tsi ndo nuyahvi.

<sup>44</sup> ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña



nditsa ndo. Cuví ndo tumaa iin ñaña ndiyi tsa ña nditsin ca canyií. Tyin tsañi nyivi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyií nu nyii ndiyi ican. Cuñi maa nyivi tyin vaha ndo, tan ña tsitó ñi tyin ña vaha añima ndo —catyí ra Jesús.

<sup>45</sup> Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihi un tsi ndi —catyí ra.

<sup>46</sup> Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsaḥa Nyoo tahaḥan tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyivi can, tan maa ndo ndi luxu ña jatyiñeé ndo tsi ñi.

<sup>47</sup> ¡Ndahvi nyooho! tyin janduvahá vaha ndo ñaña nu ñuhú yiqui ra cuvi ndusu yuhu Nyoo tsa tsaḥñi ra cuvi tsii tsaahnu ndo tahaḥan tsanaha.

<sup>48</sup> Yacan cuñi tsi catyí tyin ndoó ndo vaha tsa javahá tsii tsaahnu ndo naha ra. Tyin tsii tsaahnu ndo tsaḥñi ra naha tsi ra cuvi ndusu yuhu Nyoo. Tan nyooho janduvahá ca ndo ñaña ra naha.

<sup>49</sup> Yacan cuenda catyí Nyoo tahaḥan tsanaha tsihin tsa tsiñi tuñi ra tyin cua jaquitsi ra tsi ra cua cuvi ndusu yuhu ra tan ra caca tyiñu ra nu iyó ndo. Tan cua cañi ndo juhva ra naha tan inga ra cua jacunu ndo tsi ra naha.

<sup>50</sup> Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandihi ra cuvi ndusu yuhu ra tsa tsaḥñi tsii tsaahnu ndo naha ra nda cuanda tsinu ñuhu ñayivi tan nda cuanda vityin.

<sup>51</sup> Nda cuanda niñi ra Abel tsa tsati tsa tsaḥñi ra Caín yañi ra tsi ra, tan nda cuanda niñi ra Zacarías tsa tsaḥñi nyivi tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyivi tsa iyó vityin

tsa catyí cuatyí nyivi tsa tsicoḡ tahaḥan tsanaha.

<sup>52</sup> ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihví nyivi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihvi inga nyivi tsa cuñi quihvi —catyí ra Jesús.

<sup>53</sup> Ndihi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaan xaan ra naha tan quitsahá nducú tuhun xaan ra naha tsi ra Jesús.

<sup>54</sup> Tyin cuñi ra naha tsa cahan ra Jesús iin tsa ña vaha, tyin tacan tan cuvi tyaa ra naha cuatyí tsi ra.

## 12

*Nu jacuahá ra Jesús tyin ña cuvi tyihi xeehe yo cuatyí yo*

<sup>1</sup> Cuenda mil nyivi ndu iin nda cuanda catyihí tahaḥan ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuvi tumaa yutsan iya. Tyin ndaá paan jahá yutsan iya, tan tacan cuvi cuatyí ra can naha ra. Tyin jahá ra naha tyin vaha ra. Maa tyin ña cuvi tyihi xeehe ra naha cuatyí ra naha.

<sup>2</sup> Tyin nduve iin tsa yihí xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyivi.

<sup>3</sup> Yacan cuenda, náa ndihi tsa caahán ndo nu xeehe, cua quita tsi nu nditsin. Tan náa ndihi tsa caahán ndo tsitsi vehe ndo, cua cana tsa nyivi jiñi vehe.

*¿Yóo taahán tsi nayuhvi yo, a tsi nyivi a tsi Nyoo?*

*(Mt. 10.28-31)*

<sup>4</sup> Tan catyí yu tsihin ndo tsa cuvi ndo ra vaha iñi tsi yu, tyin ña nayuhvi ndo tsi nu tsañi cuñu ñuhu yo. Tyin yaha can tan nduve ca tsa cuvi javaha nu tsi yo.

<sup>5</sup> Maa tyin cua catyi yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

<sup>6</sup> 'Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti.

<sup>7</sup> Tan nyooho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

*Na ña nayuhvi yo cahan yo tuhun ra Jesucristo tsihin nyivi*

*(Mt. 10.32-33; 12.32; 10.19-20)*

<sup>8</sup> 'Catiyí yu tsihin ndo tyin tandihi nyooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayi nda gloria quee yu.

<sup>9</sup> Maa tyin nyooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo.

<sup>10</sup> Tan vasu cuxaan nyivi tsi yuhu, Rayi tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí Ii Nyoo ña cua coo tucahnu iñi tsi ñi cuenda yacan.

<sup>11</sup> 'Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo.

<sup>12</sup> Tyin cuhva tsa cua nacahan ndo, cua cuhva maa Tatyí Ii Nyoo náa tuhun taahán tsi cahan ndo —catyí ra Jesús.

*Nu tsaha cuenda ra Jesús tyin ña taahán tsi nyiyo iñi yo tsa cuca*

<sup>13</sup> Iin ra tsa nyii tsihin nyivi cuaha tsa ndu iin nu nyii ra Jesús, catyí ra tsihin ra Jesús:

—Maestro, cahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

<sup>14</sup> Tacan tan catyí ra Jesús tsihin ra:

—¿Tsaa, yóo tsaha tsi yu tsa cuví yu juez tan natahvi yu ndaha tyiñu ndo? —catyí ra.

<sup>15</sup> Tan yaha can tan catyí ra nuu nyivi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

<sup>16</sup> Tacan tan tsaha cuenda ra Jesús iin cuhva tsi tandihi nyivi, tan catyí ra:

—Tsicoo iin ra cuca. Tan cuaha xaan ndaha tyiñu ñihí ra nu jaha tyiñu ra.

<sup>17</sup> Tacan tan tsicá iñi ra: “¿Nacaa javaha yu? Nduve nu quihi tandihi ndaha tyiñu ihya.”

<sup>18</sup> Tan catyí ra: “Tsa tsitó yu nácaa cua javaha yu. Cua cani yu tandihi yaca nyihi yu, tan cua javaha yu tsa nahnu ca, tan natyihí yu tandihi ndaha tyiñu can tsihin tandihi ca tsa iyó tsi yu tsitsi can.

<sup>19</sup> Tacan tan cua catyi yu tsihin yu: Cuaha xaan ndaha tyiñu naquihin vaha un, tan vityin cuahán maa cuiya, quitatu, catsi vaha, coho vaha, tan cusii iñi.”

<sup>20</sup> Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihin vaha un ¿Yóo tsii cua cuví yacan?” catyí Nyoo tsihin ra can.

<sup>21</sup> Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

*Ña caca xaan iñi yo náa ndihi tsa tsiñi ñuhu tsi yo*

*(Mt. 6.25-34)*

<sup>22</sup> Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo.

<sup>23</sup> Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo.

<sup>24</sup> Jaha ndo cuenda saa tyin ña jahá tyiñu ti. Tan ndi ña tyihí vaha ti tsa

catsi ti. Maa tyin tsatsí ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa.

<sup>25</sup> Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo.

<sup>26</sup> Tatun ndi luxu can tan ña cuví jahá ndo, ¿nacuenta tsa tsicá xaan iñi ndo tandihí ca tsa tsiñi ñuhu tsi ndo?

<sup>27</sup> Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandihí tsa cuca ra tan ña sii caá tsa tsinditsi ra tumaa tsa jacunditsi Nyoo tsi yutun ita ican.

<sup>28</sup> Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra.

<sup>29</sup> Ña caca xaan iñi ndo tuhun tsa catsi ndo tan tsa coho ndo.

<sup>30</sup> Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñi ñuhu tsi ndo.

<sup>31</sup> Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsiñi ñuhu tsi ndo.

*Tsa vaha tsa iyó gloria  
(Mt. 6.19-21)*

<sup>32</sup> Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñi ra tsi ndo. Yacan cuenda cua cuhva ra quihvi ndo nu ndacá ñaha ra.

<sup>33</sup> Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yoñi yóo jativí can ndacan, ndi nu ñasuhu, tan ndi quití.

<sup>34</sup> Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihí aña ndo —catyí ra.

*Nu jacuahá ra Jesús tsi yo nácaa cu-  
atu yo tsi ra quivi quitsi ra inga tsaha*

<sup>35</sup> 'Cuatu vaha ndo tsi yu tsihin ñuhu nditsin Nyoo quivi quitsi yu inga tsaha.

<sup>36</sup> Tan cuvi ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra.

<sup>37-38</sup> Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra.

<sup>39</sup> Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra.

<sup>40</sup> Tan tacan cuví tucu nyooho, cuatu ndo. Tyin yuhu, Rayi tsa quee nda gloria, sana iñi ndo tan cua quitsi yu —catyí ra Jesús.

*Musu vaha tan musu ña vaha  
(Mt. 24.45-51)*

<sup>41</sup> Tacan tan quitsaha nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihí nyivi?

<sup>42</sup> Tacan tan nacahan ra Jesús, tan catyí ra tsihin ra:

—Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihí ca musu ican.

<sup>43</sup> Tan sii xaan cuñi musu ican tatun cuhva tsa jahá tyiñu ra, tan cua tsaa tsitoho ra. Tyin tyaá yahvi ra tandihí tsa taahán tsi ica ra.

<sup>44</sup> Tan catyí yu tsihin ndo tyin tsa nditsa. Tyin tsitoho ra cua nacuhva ra tandihí tsa cumí ra, cua quihí ndaha ra. Tyin vaha tyaá yahvi ra tsihin tyiñu jahá ra.

<sup>45</sup> Maa tyin tatun tsicá iñi musu ican tyin naha xaan cuahán tsitoho ra, tan quitsaha cañi ra tsi inga musu tsa cutahán tsihin ra tan ñiñaha jahá

tyiñu ican, tan ña cuñí ra jaha tyiñu ra. Tyiñu tsatsí ñi tan tyiñu tsiñí nyixi ñi iyó ra.

<sup>46</sup> Tacan tan sana iñi ra cua tsa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahán ra.

<sup>47</sup> Tan iin musu tsa tsitó nácaa iyó tsitoho ra tan ña javahá ra cuhva cuñí tsitoho ra, cuaha xaan tundoho cua nyehe ra.

<sup>48</sup> Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahá ra. Tatun iin musu tan cuaha tsa tsahá tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

*Nu cahán ra Jesús tyin tsacatyí ra  
cua cañi tahan nyivi tsihin nyivi ñi*  
(Mt. 10.34-36)

<sup>49</sup> Tumaa tsa jatahán yu ñuhu nu ñuhu ñayivi, tacan cuví tyiñu vatsí yu. ¡Tan cuñí xaan yu tsa nacayu catyin ña ñuhu ihya!

<sup>50</sup> Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihi tyiñu jahá yu.

<sup>51</sup> Cuñí maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo.

<sup>52</sup> Tyin tsa vityin tan ityi nuu ca, uhun taahan nyivi iin vehe ñi cua cusin ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi.

<sup>53</sup> Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

*Nu cahán ra Jesús tsihin nyivi tyin  
ñá nacotó ñi tyin tsa tsaq Sehe Nyoo nu  
yucú ñi*

(Mt. 16.1-4; Mr. 8.11-13)

<sup>54</sup> Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuí cuví.

<sup>55</sup> Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuí nu caahán ndo.

<sup>56</sup> Nyooho jahá ndo tsa tsitó xaan ndo, tan nacotó ndo tandihi tsa cuví andivi, tan tandihi tsa cuví nu ñuhu ñayivi ihya. Tan ¿nacuenta tsa ña nacotó ndo náa tyembu iyó ndo vityin?

*Nducu yo cuhva nácaa coo vaha yo  
tsihin ra tsicán cuatyí tsaha yo coto  
cuhun yo anyaya*

(Mt. 5.25-26)

<sup>57</sup> ¿Nacuenta ña jahá ndo cuenda, ndáa tsa vaha tan ndáa tsa ña vaha?

<sup>58</sup> Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa.

<sup>59</sup> Tatun tacan cua cuví, catyí yu tsihin ndo tyin ña cua quita ndo nda cuanda tyahvi ndo tandihi tsa taahán tsi tyahvi ndo —catyí ra Jesús.

## 13

*Cuñí tsi tsa nasama yo cuhva iyó  
yo, tun ña cuñí yo cuhun yo anyaya*

<sup>1</sup> Tacan tan juven ñi quivi can nyecu juhva ra naha. Tan quitsahá nacatyí tuhun ra naha tsihin ra Jesús tsa javahá ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacá nuu niñi ra ican naha ra tsihin niñi quiti tsa tsijamañi ra ican naha ra.



<sup>2</sup> Tan nacahan ra Jesús tan catyí ra tsihin ra naha:

—¿A tsicá iñi nyooho tyin cahnu xaan ca cuatyí ra Galilea ican naha ra tan ñavin ca tandihi ca ra ñuu ra naha, tan yacan tsihi ra naha?

<sup>3</sup> Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo.

<sup>4</sup> Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñi maa ndo?

<sup>5</sup> Ñavin. Tyin tatun nyooho tan ña nasama ndo cuhva iyó ndo, cua cunaa ndo.

*Nu tsaha cuenda ra Jesús iin cuhva nácaa ndatú Nyoo tsa nasama yo cuhva iyó yo*

<sup>6</sup> Tacan tan tsaha cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaa tun nu ñuhu ra. Tan tsahan ra tsinyehé ra tatun iñi tsiti tun. Tan nyehe ra tyin nduve.

<sup>7</sup> Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra.

<sup>8</sup> Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú.

<sup>9</sup> Vasiqui tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

*Quivi quitatú nyivi janduvaha ra Jesús tsi iin ñaha tihí tsata*

<sup>10</sup> Iin quivi tsa quitatú nyivi, jacuahá ra Jesús tsi nyivi tsitsi vehe ñuhu.

<sup>11</sup> Tan ican nyaá iin ñaha tsa yihí tatyí ña vaha. Tan tsa tsahun uñi

cuiya cuuhví ña tsa tihí tsata ña. Tan ña cuví ndundoo ña.

<sup>12</sup> Tacan tan nyehe ra Jesús tsi ña. Tan cana ra tsi ña. Tan quitsaha caahan ra tsihin ña, tan catyí ra:

—Tsa nduvaha un. Nduve ca cuehe ndohó un —catyí ra tsihin ña.

<sup>13</sup> Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsaha jacahnú ña tsi Nyoo.

<sup>14</sup> Maa tyin ra cuví ityi nuu vehe ñuhu, cuxaan xaan ra tsi ra. Tyin quivi quitatú janduvaha ra tsi ña. Tan catyí ra tsihin nyivi nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuvi ndo numeri. Tan ña quitsi ndo quivi quitatú yo —catyí ra.

<sup>15</sup> Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsi tucu nyooho quiñi jana ndo tan jacohó ndo ndutya tsi ti quivi quitatú yo?

<sup>16</sup> Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

<sup>17</sup> Tacan tan cuhva tsa cahan ra Jesús yacan, tandihi maa nu xaan iñi tsi ra nducahan nuu nahnu. Maa tyin tandihi ca maa nyivi sii xaan cuñi ñi tsihin tsa cahnu tsa iyo javaha ra Jesús.

*Nu cahan ra Jesús tyin tumaa iin tsiti mostaza cuví tsa ndacá ñaha Nyoo tsi yo*

<sup>18</sup> Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi?

<sup>19</sup> Tumaa iin tsiti mostaza, tacan cuví tsi. Tyin iin ra tatsi ra iin tsiti ican nu ñuhu ra, tan cana iin yutun luhlu, tan tsahnú tun. Tan cuví tun iin yutun cahnu xaan. Tacan tan tsaa saa naha ti nuu yutun ican. Tan javaha ti taca ti nuu tun.

*Nu cahan ra Jesús tyin tumaa yutsan iya, tacan cuví tsa ndacá ñaha Nyoo tsi yo*

*(Mt. 13.33)*

<sup>20</sup> Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo?

<sup>21</sup> Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tanii yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

*Yuvehe tihin tan ityi cuiñi tsa cuahán nu nyaá Nyoo*

*(Mt. 7.13-14, 21-23)*

<sup>22</sup> Ityi cuahán ra Jesús ñuu Jerusalén caahán ra tuhun Nyoo tsihin nyivi tandihi ñi ñuu nu yahá ra.

<sup>23</sup> Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahan ra Jesús, tan catyí ra:

<sup>24</sup> —Nanducu ndo cuhva quihvi ndo yuvehe tihin. Tyin tacan cuví quihvi ndo nu ndacá ñaha Nyoo. Tyin cuaha xaan ndo cuñi ndo quihvi ndo ndacan, tan ña cuví.

<sup>25</sup> Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyoocho tsa nyecú ndo ityi tsata cua jandatsan ndo yuvehe, tan cua catyí ndo: “Nuña yuvehe.” Tan ra ican cua catyí ra tsihin ndo: “Ña tsitó yu ndáa ityi quee nyoocho.”

<sup>26</sup> Tacan tan nyoocho cua catyí ndo: “Nyuhu tsatsi ndi tan tsihi ndi tsihin un. Maa un jacuahá un tuhun Nyoo tsi ndi ityi nu nyecú vehe ndi”, cua catyí ndo tsihin ra.

<sup>27</sup> Maa tyin ra ican cua nacahan ra tsihin ndo tan cua catyí ra: “Tsa catyí yu tsihin ndo tyin ña tsitó yu ndáa ityi quee ndo. Catsiyo nyaha ndo nu nyaá yu tandihi nyoocho nyivi javahá tsa ña vaha”

<sup>28</sup> Tacan tan cua vacu ndo tan catan ña cua cuví nuhu ndo tsa cua nyehe ndo tsi ra Abraham tsihin ra

Isaac tan ra Jacob, tan tsihin tandihi ra cuví ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyoocho ndoo ndo ityi tsata.

<sup>29</sup> Tan cua quitsi nyivi ityi ndutyá ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra.

<sup>30</sup> Tan juhva nyivi tsa cuahán ityi nuu vityin, ñi can cuhun nu ndihi. Tan juhva nyivi tsa cuahán nu ndihi ña, ñi can cua cuhun ityi nuu —catyí ra.

*Nu cuihya xaan cuñi ra Jesús nyehe ra tsi nyivi ñuu Jerusalén*

*(Mt. 23.37-39)*

<sup>31</sup> Juvín ñi maa quivi can tsaá juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñi ra cahñi ra tsi un —catyí ra naha.

<sup>32</sup> Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuii, tyin nda cuanda quita quivi tsa ndihi tyiñu jahá yu tsa tavá yu tatyí ña vaha tsi nyivi tan tsa janduvahá yu tsi nyivi cuuhvi tsihin cuehe, tacan tan cundihí tyiñu jahá yu.

<sup>33</sup> Maa tyin nda cuanda tahan tsi tsa ndihi maa tyiñu jahá yu, tacan tan cuhun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

<sup>34</sup> ¡Ndahvi nyoocho nyivi Jerusalén! tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa jahá cuenda iin ndivi sihi sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuñi ndo.

<sup>35</sup> Nyehe ndo vityin tyin tsa nacoó yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quivi tsa cua catyí ndo

tyin cahnu xaan ra vatsí tsihin siví Nyoo Jutu yo —catyí ra Jesús.

## 14

*Nu janduvaha ra Jesús tsi iin ra cuuhví tsa iyó cuiñu quiví quitatú nyívi*

<sup>1</sup> Cuví tsi iin quiví quitatú nyívi. Tan ra Jesús cuahán ra cua catsi ra vehe iin ra cuví ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús.

<sup>2</sup> Tacan tan yatyin ñi nuu ra Jesús nyaá iin ra cuuhví tsa iyó cuiñu.

<sup>3</sup> Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyívi cuuhví quiví quitatú yo? ¿Náa catyí ley Nyoo? —catyí ra.

<sup>4</sup> Tacan tan tandihí ra naha, taxin ña tsinyecu ra naha. Tacan tan tyiso ndaha ra Jesús jiñi ra cuuhví can. Tan janduvaha ra tsi ra. Tan catyí ra tsihin ra na cunuhu ra.

<sup>5</sup> Tacan tan catyí ra Jesús tsihin ra fariseo naha ra:

—Tatun nyoocho tan canacava iin burru jana ndo, a inga quití jana ndo, tsitsi xahva, ¿a ña cua tava ndo tsi tí tsa numi ñi, vasu ndi maa quiví quitatú yo cuví? —catyí ra.

<sup>6</sup> Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

*Nu jacuahá ra Jesús tsi yo tyin ña vaha tsa cahnu jaha yo tsi yo*

<sup>7</sup> Nyehe ra Jesús tyin tandihí ra nyecú vico ican nacatsí ra naha tyayu vaha ca cunyecu ra naha. Tacan tan tsaha cuenda ra tyehen tsi ra naha:

<sup>8</sup> —Ndáa quiví cuhun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuví tan ñavin ca maa ndo,

<sup>9</sup> tan coto quitsi ra tsa caná tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyoocho tsihin tsa cahan nuu ndo, tan cua cuhva ndo tyayu can. Tacan tan cua cunyecu ndo nu ndihí ña.

<sup>10</sup> Maa tyin catyí yu tsihin ndo, tyin ndáa quiví cana ra tsi ndo, cuaahan ndo, tan ñavin nu vaha cunyecu ndo. Tyin tacan tan cua quitsi maa ra tsa caná tsi ndo tan cua cahan ra tsihin ndo: “Amigos, naha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyívi nyecú yuhu mesa tsihin ndo.

<sup>11</sup> Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuví ra —catyí ra Jesús.

<sup>12</sup> Tacan tan catyí tucu ra tsihin ra caná tsi ra nu iyó vico can:

—Ndáa quiví coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyívi un, ndi tsi nyívi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un.

<sup>13</sup> Maa tyin catyí yu tsihin un tyin ndáa quiví coo vico vehe un, cana tsi nyívi ndaahvi, nyívi cuuhví, nyívi coxo, tan tsihin nyívi cuaa.

<sup>14</sup> Tacan tan sii cua cuñí un, tyin ñi ican ña cua cuví natyahvi ñi tsi un. Maa tyin cua natyahvi Nyoo tsi un quiví cua nandoto un tsihin nyívi vaha.

*Nu tsaha cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo*

(Mt. 22.1-10)

<sup>15</sup> Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyívi tsa cua catsi nu ndacá ñaha Nyoo —catyí ra.

<sup>16</sup> Tacan tan catyí ra Jesús tsihin ra:

—Iin ra ican jacoq ra iin vico cahnu xaan vehe ra. Tan caná ra cuaha xaan nyívi.

<sup>17</sup> Tacan tan tsaq cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahan tsi cuhva cuxiñi ñi.

<sup>18</sup> Maa tyin tandihí ñi ican quitsaha caahán ñi tyin ña cua cuhun ñi. Tan iin ra ican catyí ra: “Ndi jatá yu iin

ñuhu. Tan cuñí tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.”

19 Tacan tan inga ra ican catyí ra: “Ndi jata ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuvi cuhun yu.”

20 Tacan tan inga tucu ra ican catyí ra: “Ndi tindaha cuui ñi yu, tan ña cua cuvi cuhun yu”, catyí ra.

21 Tacan tan musu ra ican cuanuhu ra. Tan catyí tuhun ra tandihí tsa cuvi ican tsihin ra tsitoho ra. Tsa tsiñi tsitoho ra tsa tacan, tan cuxaan xaan ra. Tan catyí ra tsihin musu ra: “Cuaahan vityin tandihí maa ityi. Tan quítsi ndaca un tsi nyivi ndaahvi, nyivi cuuhví, nyivi coxo, tan tsihin nyivi cuaa”, catyí ra.

22 Tan tsa yaha tsa nyico musu ican tan catyí ra tsihin ra tsitoho ra: “Tsa javaha yu tandihí maa tsa cahan un tsihin yu. Tan nuña ca tsitsi vehe”, catyí ra.

23 Tacan tan tsitoho ra catyí ra tsihin ra: “Cuaahan cua nducu ca nyivi tandihí maa ityi. Tan jañiñi un tsi ñi na quítsi ñi, tyin na cutu tsitsi vehe yu.

24 Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

*Cuaha xaan tundoho nyehé yo tatun cuenda ra Jesús yihí yo*  
(Mt. 10.37-38)

25 Cuaha xaan nyivi nyicún tsi ra Jesús. Tacan tan nanyehe ra tsi ñi, tan catyí ra tsihin ñi:

26 —Tandihí nyooho tsa nyicún tsi yu, tatun cuñí ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñí ca ndo tsi maa ndo tsa nuu yuhu, ñavin cuenda yu yihí ndo.

27 Tyin nyooho tsa ña cuñí nyehe tundoho tsa cunycun ndo tsi yu, ña taahán tsi cuvi ndo nyivi cuenda yu,

tyin tsa nyehé ndo tundoho, yacan cuví cruu tsa taahán tsi cuiso ndo.

28 Tyin tun cua javaha ndo iin vehe, nacañi nuu jihna ndo jiñi ndo tan tyihí tuñi iñi ndo tun quita vehe cahnu can tsihin xuhun tsa nyii tsi ndo.

29 Tyin tatun quítsaha jandaá ndo vehe ican, tan ña cuvi jandihí ndo tyin nduve ca xuhun ndo, cua vacu nducu nyivi tsi ndo.

30 Tan cua catyí ñi: “Ra ican quítsaha javahá ra vehe ra, tan ndi ña cuví jandihí ra can”, cua catyí ñi.

31 A tatun iin rey tan cuñí ra cañi tahan ra tsihin inga rey ¿a ña cunyaa jihna ra tan nyehe ra tatun ñihí tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican?

32 Tan tatun tsitó ra tyin ña cua cuvi jaha canaa ra tsi inga rey ican, tacan tan cañi ca vatsí inga rey ican, tan cua jacuhun ra tsi musu ra tyin na catyí tuhun ra naha tsihin inga rey ican na jandihí taxin ra itsi.

33 Tan tacan cuví nyooho. Tatun ña cahnya iñi ndo tandihí maa tsa cuñí ndo tan tandihí tsa cumí ndo, ña cua cuvi cunycun ndo tsi yu.

*Nu jacuaha ra Jesús tyin tumaa ñi tsa ndihí tsa uhva, tacan cuví yo tatun ndu uvi iñi yo tsa tsinú iñi yo tsi ra*  
(Mt. 5.13; Mr. 9.50)

34 Vaha ñi tyin jacu uhvá tsi tsa catsi yo. Maa tyin tatun ndihí tsa uhva tsi, ña vaha ca tsi.

35 Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyaa soho ndo tuhun caahán yu —catyí ra Jesús.

## 15

*Nu jacuaha ra Jesús tyin tumaa mbee tsa cuanaá tacan cuví yo*  
(Mt. 18.10-14)

1 Tandihí ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhva ra naha nu nyii ra Jesús, tan tyaá soho ra naha tsa caahán ra.



<sup>2</sup> Tacan tan ra fariseo naha ra tsihin ra maestro cuenda ley vehe ñuhu naha ra quitsahā caahán nyaa ra naha tsi ra Jesús, tan catyí ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyí ra naha.

<sup>3</sup> Tacan tan ra Jesús tsahā cuenda ra cuhva ihya, tan catyí ra:

<sup>4</sup> —Nyooho tsa iyó iin cientu mbee jana, tun cunaa intuhun ti, ¿a ña cua nacoo ndo tsi tandihí ca ti, tan cunanducu ndo tsi mbee tsa cunaa can nda cuanda tsa nañihi ndo tsi ti?

<sup>5</sup> Tan tsa yaha nañihi ndo tsi ti, tyiso soco ndo tsi ti. Tan sñi xaan cua cuñi ndo.

<sup>6</sup> Tan tsa tsa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyí ndo tsihin ñi tyin na cusñi ndihí iñi ñi tsihin ndo tyin nañihi ndo mbee jana ndo tsa tsinaa.

<sup>7</sup> Tan catyí yu tsihin ndo, tyin tacan tucu sñi xaan ca cuñi ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñi ca tsi tsa nasama ñi cuhva iyó ñi.

*Ñaha tsa tsinaa xuhun tan nañihí ña*

<sup>8</sup> Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaa iin xuhun ña, cua tyaa ña iin candili. Tan cua tihvi ña tanñi tsitsi vehe ña. Tan cua nanducu ña xuhun can nda cuanda tsa nañihi ña can.

<sup>9</sup> Tan tsa yaha nañihi ña, cua cuhun ña cunanducu ña tsi ñi vaha iñi tsi ña, tsihin nyivi tsa iyó yatyin yuvehe ña, tan cua cahan ña tsihin ñi: “Cusñi ndihí iñi ndo tsihin yu tyin tsa nañihí yu xuhun yu tsa tsinaa”, cua catyí ña.

<sup>10</sup> Tan catyí yu tsihin ndo tyin tacan tucu sñi cuñi ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

*Nu jacuahā ra Jesús nácaa cuñi Nyoo tsi iin ra ndu uvi iñi cuatyí*

<sup>11</sup> Tacan tan tsahá cuenda ra Jesús inga cuhva ihya tan catyí ra:

—Iin ra, iyó uvi taahan sehe ra.

<sup>12</sup> Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvi sava ra tsa tsii ra tan tsahā ra tsi nduvi taahan sehe ra.

<sup>13</sup> Tan ña cuaha ñi quivi tan ra luhlu ican xico ra tandihí maa tsa tsahā jutu ra tsi ra. Tan jandu iin ra xuhun ra, tan quihin ra ityi, cuahán ra iin ñuu cañi xaan. Tan ndacan tsicoo ra tan janaa ra tandihí maa xuhun ra tsihin tusñi iñi. Tan quiñi xaan icá ra tsicá nuu ra.

<sup>14</sup> Tacan tan tsaá tama ityi nu iyó ra. Tan quitsahā tsisocó ra tyin tandihí xuhun ra janaa ra.

<sup>15</sup> Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti.

<sup>16</sup> Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsí quini ican naha ti. Tan yoñi maa tsahā tsa catsi ra.

<sup>17</sup> Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco.

<sup>18</sup> Vityin cua cunuhu yo nu nyaá jutu yo. Tan cua catyí yo tsihin ra tyin tsicoo cuatyí yo nuu Nyoo tan tacan tucu nuu maa ra.

<sup>19</sup> Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuvi tsi yo” cuñi ra tsicá iñi ra.

<sup>20</sup> Tacan tan quihin ra ityi cuanuhu ra nda vehe jutu ra. Tan cañi ca vatsí ra tan nyehe jutu ra tsi ra, tan cundaahvi iñi ra nyehé ra tsi sehe ra. Tan tsinu xaan ra tsijatahan ra tsi ra. Tan tsinumí nyaa ra tsi ra.

<sup>21</sup> Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yu sehe un”, catyí ra tsihin jutu ra.

<sup>22</sup> Maa tyin jutu ra tava tyiñu ra, tan catyí ra tsihin musu ra: “Tava ndo jahma vaha tan jacunditsi ndo tsi ra

ihya. Tan tyihí ndo iin xehe nundaha ra. Tan tyihí ndihí ndo zapatu tsaha ra.

<sup>23</sup> Tan cahñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico.

<sup>24</sup> Tyin ra sehe yu ihya tsa tsihi ra cuñi maa yu, tsicá iñi yu. Cuñi maa yu tyin ña cua nyehe ca yu tsi ra, tan tsa nyico ra”, catyí jutu ra can. Tacan tan quitsaha tsicoo ñi vico. Tan sii xaan cuñi ñi tyin tsa nuhu nyico ra.

<sup>25</sup> Tacan tan inga sehe ra, ra tsa tsitsa, nyii ra tsicuhu. Tan tsa cua tsa nuhu ra nda yuvehe ra, tan tsiñi ra tyin iyó yaa. Tan tuví iñi ra tyin tsañi ñi yaa.

<sup>26</sup> Tacan tan tsa cuyatyin ra nda yuvehe ra tan cana ra tsi iin musu ra. Tan tsicá tuhun ra tsi ra can náa cuví xaan can.

<sup>27</sup> Tacan tan musu can catyí ra: “Ra yañi un tsa nuhu ra. Tan yacan tava jutu un tyiñu tyin na cahñi ra naha iin becerru xaahan. Tyin vaha tsa ra yañi un, tan nduve náa tahañ ra”, catyí musu can tsihin ra.

<sup>28</sup> Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsañan ra tsicahñan ndaahvi ra tsihin ra, tyin na quihvi ra tsitsi vehe.

<sup>29</sup> Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu.

<sup>30</sup> Maa tyin vityin tsa nuhu nu sehe un ihya, nu tsa janaa xuhun tsihin ñaha sii iñi. Tan tsañan un iin becerru quití xaahan tsi nu”, catyí ra tsihin jutu ra.

<sup>31</sup> Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihí quivi. Tan tandihí tsa cumí yu, tsii un cuví can.

<sup>32</sup> Tan vityin taahán tsi tyin javaha yo vico ihya, tan cusii iñi yo. Tyin tsa nuhu ra yañi un, ra tsa tsihi, cuñi maa yu. Tumaa tsa nandoto nyico ra cuví

can, tyin tsinaa ra, tan nañihí yo tsi ra inga tsaha”, catyí ra tsihin sehe ra —catyí ra Jesús.

## 16

*Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo*

<sup>1</sup> Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihí tyiñu jahá ra cuca can. Tan tsañan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaa ra tandihí tsa iyó tsi ra.

<sup>2</sup> Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca nacuhva cuenda un tandihí tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra.

<sup>3</sup> Tacan tan ra yihí ndaha tyiñu can tsicá iñi ra: “¿Nácaa cua javaha yu vityin? Tsi toho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cañan xaan nuu yu caya yu tsitsi ñuu.

<sup>4</sup> Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsa yu vehe ñi”, tsicá iñi ra can.

<sup>5</sup> Tacan tan cana ra tsi intuhun intuhun ra tsa nyaá cuenda tsi tsitoho ra. Tan catyí ra tsihin iin ra ican: “¿Náa nyaá cuenda un tsi tsitoho yu?” catyí ra.

<sup>6</sup> Tacan tan nacahan ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaá un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahán ra.

<sup>7</sup> Tacan tan tsa inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacahan ra ican: “Nyaá cuenda yu iin

mil arroba trigo”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra.

<sup>8</sup> Tacan tan tsito tsitoho ra tsa ña vaha tsa javaha ra. Tan iyo xaan cuñi ra cuca can, tyin yatyí xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaa yahvi tsi Nyoo yatyí xaan ca jahá ñi tsi ñi tan ñavin ca nyivi tsa iyó ñuhu nditsin Nyoo aña.

<sup>9</sup> Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatinyee ndo tsi nyivi. Tan quivi tsa cua ndihí tsa cuca, cua ñihí ndo coo ndo nu ña cua naa maa.

<sup>10</sup> Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo.

<sup>11</sup> Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo.

<sup>12</sup> Tyin tandihí tsa iyó tsi ndo, maa Nyoo tsaha nuu itsi tsi ndo. Tan tatun ña javahá ndo tumañi iñi tsihin tsi, ña cua cuhva ra tsa cuví tsii ndo.

<sup>13</sup> Iin musu ña cuví coo uvi taahan tsitoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuví cuñi ndo tsi Nyoo tatun cuñi tucu ndo tsa cuca —catyí ra Jesús.

<sup>14</sup> Tan tsa tsiñi ra fariseo naha ra tandihí tsa cahan ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuñi xaan ra naha xuhun.

<sup>15</sup> Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo

tyin ña vaha aña ndo. Tandihí tsa cahnu cuñi maa nyivi, Nyoo ña cuñi ra nyehe ra yacan.

*Ley Nyoo tsa tyaa ra Moisés, tan tsihin tsa ndacá ñaha Nyoo tsi yo*

<sup>16</sup> Ley tsa tsaha Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahañ tsanaha, yacan cuví tsa janaha ityi tsi nyivi nda cuando quivi tsa quitsi ra Juan. Tan ra Juan quitsaha caahán ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihí nyivi nducú xaan ñi cuhva tsa quihvi ñi nu ndacá ñaha ra.

<sup>17</sup> Tan catyí yu tsihin ndo, tyin vasu cunaa andivi tan nu ñuhu ñayivi ihya, maa tyin tsa cuví ley Nyoo tsa tyaa ra Moisés, ña cua cunaa tsi tyin cua cundaa tandihí tsi.

*Nu jacuaha ra Jesús tyin ña vaha tsa nacoo ihñi rayi ñasihí ra (Mt. 19.1-12; Mr. 10.1-12)*

<sup>18</sup> Tatun iin rayi tan iyó ñasihí ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayi tsihin ñaha tsa nacoo yi, coo tucu cuatyí ra can nuu Nyoo.

*Nu jacuaha ra Jesús tsi nyivi cuenda ra cuca tsihin ra Lázaro*

<sup>19</sup> Tsicoo iin ra cuca. Tan vaha xaan jahma tsinditsi ra. Tan tandihí quivi iyó vico jahá ra tan tsatsí vaha ra.

<sup>20</sup> Tan tsicoo tucu iin ra ndaahvi tsa tsinañi Lázaro. Tan ra ihya cuaha xaan ndihyi iñi tsi ra. Tan nyaá ra yuvehe ra cuca ican.

<sup>21</sup> Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuando ina tan tsaá ti naha ti nu nyaá ra, tan tsacayaá ti nu uhvi ra.

<sup>22</sup> Tan iin quivi tsihi ra ndaahvi can. Tan ángel maa Nyoo na quihin tsi ra tan tsindaca ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra.

<sup>23</sup> Tacan tan ra cuca ican nyehé xaan ra tundoho nu nyií ra anyaya.

Tan nanyehé ra nu cañi xaan nu nyaá ra Abraham tsihin ra Lázaro.

<sup>24</sup> Tacan tan cana tsaa ra cuca can tan catyí ra: “Tyatya Abraham, cundaahvi iñi tsi yu. Jaquitsi tsi ra Lázaro tan na jatyii ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya”, catyí ra.

<sup>25</sup> Tan ra Abraham catyí ra tsihin ra: “Nducuhun iñi tyin vaha xaan tsi-coo un nu ñuhu ñayivi. Tan ra Lázaro, tuhun ndaahvi tsicoo ra. Tan vityin vaha iyó ra ihya, tan yooho nyehé un tundoho.

<sup>26</sup> Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehe ña cuví cahun ra naha nu nyii un. Tan ndi ra yucú nu nyii un, ña cuví quitsi ra naha nyehe”, catyí ra Abraham tsihin ra cuca can.

<sup>27</sup> Tacan tan catyí ra cuca ican: “Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu.

<sup>28</sup> Tyin iyó uhun taahan ca ra yañi yu naha ra. Tan cuñi yu tyin catyí tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihi ra naha ihya”, catyí ra.

<sup>29</sup> Tacan tan catyí ra Abraham: “Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo taħan tsanaha. Na tyaa yahvi ra yañi un naha ra, tun cuñi ra naha”, catyí ra Abraham.

<sup>30</sup> Tacan tan catyí ra cuca ican: “Tyatya Abraham. Ña cua tyaa yahvi ra naha. Maa tyin tatun yoo tsa nandoto, tan cahun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyí ra cuca ican.

<sup>31</sup> Tan ra Abraham catyí ra: “Tatun ña cuñi ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo taħan tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

## 17

*Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha*

(Mt. 18.6-7, 21-22; Mr. 9.42)

<sup>1</sup> Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jativi tsi nyivi. Maa tyin ndahvi ra ndaahvi tsa jativi tsi nyivi.

<sup>2</sup> Vaha taxin ca na cunuhñi iin yuu jucun ra, tan jacuhun nyivi tsi ra nu ndutya ñuhu. Coto jativi ca ra tsi nyivi ndi nasama cuhva iyó.

<sup>3</sup> Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javaha ra. Tun nasama ra cuhva iyó ra, jaha ndo tucahnu iñi tsi ra.

<sup>4</sup> Tan ndi maa javaha ra tsa ña vaha tsihin ndo utsa tsaha tsa iin quivi, tatun tandihi tsa utsa tsaha tan catyí ra tsihin ndo tyin ndu uvi iñi ra tsa javaha ra; tandihi tsa utsa taahan tsaha can, jaha ndo tucahnu iñi tsi ra.

*Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha*

<sup>5</sup> Tacan tan catyí ra tava tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

<sup>6</sup> Tan catyí ra Jesús tsihin ra naha:

—Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yu-tun cahun tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

*Nacaa taahán tsi tyaa yahvi yo tsi Nyoo*

<sup>7</sup> Tan catyí ra Jesús:

—Tatun iin nyoocho tan iyó iin musu ndo, tan tsaa ra tsa tsahan ra tsicuhu tsijaha tyiñu ra, a tsijaha cuenda ra quiti jana ndo, ¿a catyí ndo tsihin ra: “Cunyaa tan catsi un”? Ña tuhvá ndo cahan tacan tsihin ra.



8 Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyihi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra.

9 Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tava ndo tsi ra.

10 Tacan tucu maa ndo tsihin Nyoo. Quivi ndihi javaha ndo tandihi tsa cahán ra tsihin ndo, taahán tsi catyi ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

*Nu janduvahá ra Jesús tsi utsi taahan ra ndohó cuehe tyaahyú*

11 Cuahán ra Jesús ityi ñuu Jerusalén tan yahá ra nu cuví xahñu Samaria tsihin Galilea.

12 Tan nu tsaá ra iin ñuu, quita utsi taahan ra cuuhví tsihin cuehe tyaahyú. Tan tsicuiñi ra naha ndasava.

13 Tan caná tsaá ra naha tan catyi ra naha:

—Yooho, Maestro Jesús, cundaahvi iñi tsi ndi —catyi ra naha.

14 Tan tsa nyehe ra Jesús tsi ra naha tan catyi ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahá ndo.

Tacan tan cuahán ra naha. Tan ityi cuahán ra naha tan nduvahá ra naha.

15 Tacan tan tsa nyehe iin ra ican tyin tsa nduvahá ra, vatsí tsihin tsata nyico ra nu nyii ra Jesús. Tan quit-sahá caná tsaá ra, jacahnú ra tsi Nyoo.

16 Tan tsa tsaá ra nu nyii ra Jesús, tsicuiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhvá ra tyahvi nyoo tsi ra. Ra tsa nduvahá ihya, ra Samaria cuví ra.

17 Tacan tan catyi ra Jesús:

—¿A ñavin utsi taahan ndo nduvahá? ¿Náa inga ñin taahan ca ra naha?

18 ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyi ra Jesús.

19 Tacan tan catyi ra tsihin ra tsa nduvahá ican:

—Nduvita, cuaahan. Nduvahá un tyin tsinú iñi un tsi Nyoo —catyi ra Jesús tsihin ra.

*Cuhva cua quitsi Nyoo cua cundaca ñaha ra nu iyó yo ihya (Mt. 24.23-28, 36-41)*

20 Tsicá tuhun ra fariseo naha ra tsi ra Jesús, tan catyi ra naha:

—¿Ama cua quitsi Nyoo cua cundaca ñaha ra?

Tacan tan catyi ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi.

21 Ña cua cuvi catyi nyivi: “Juvín ra nyii ihya, juvín ra nyii ityi ican.” Tyin Nyoo tsa tsaá ra mahñu ndo, tan ndacá ñaha ra tsi nyivi yihí cuenda ra —catyi ra tsihin ra naha.

22 Yahá yacan tan catyi ra tsihin ra tsicá tsihin ra:

—Cua tsaá quiivi tsa cua cuñi ndo nyehe ndo tsi yuhu Rayii quee nda gloria. Maa tyin ña cua nyehe ndo tsi yu.

23 Yihí ñi cua catyi ñi tsihin ndo: “Ihya nyii ra.” Inga ñi cua catyi ñi: “Ndacan nyii ra.” Maa tyin coto cuhun ndo cunyehe ndo. Tan ña cun-yicun ndo tsi ra can tyin ñavin yu cuvi can.

24 Tyin tandihi nyivi cua nyehe tsi yuhu, Rayii tsa quee nda gloria, quiivi cua quitsi nyico yu inga tsaha. Tumaa tsa nyehé tandihi nyivi nu cañi tatsa savi tan quituvi ñuhu tatsa can ñi canduvi andivi, tacan cua cuvi quiivi cua quitsi yu inga tsaha.

25 Maa tyin cua nyehe jihna yu tundo cahnú xaan. Tyin nyivi tsa iyó vityin, ndasi cua cuñi ñi nyehe ñi tsi yu.

26 Tumaa quiivi tsa tsicoo ra Noé, tacan cua cuvi quiivi cua quitsi nyico yuhu Rayii quee nda gloria.

27 Quiivi tsicoo ra Noé, tsatsí nyivi. Tsihí ñi. Tindahá ñi. Tan tsahá ñi sehe sihi ñi tindaha, nda cuando quiivi quihvi ra Noé tsitsi yutun ndoo tan cuun savi xaan. Tan tandihi ñi can tsihi ñi jahá ndutya.

28 Tacan tucu cuv̄i quiv̄i tsicoo ra Lot. Tsatsí ñi. Tsihí ñi. Jatá ñi. Xicó ñi. Tatsí ñi itu. Tan javahá ñi vehe ñi.

29 Tan quiv̄i tsa quit̄a ra Lot ñuu Sodoma ican, cuun ñuhu tsihin azufre tsa quee nda andiv̄i. Tan tsahñi ñuhu can tandih̄i nyiv̄i Sodoma.

30 Tacan cua cuv̄i quiv̄i quitsi nyico yu tsa cuv̄i yu Raȳi quee nda gloria.

31 "Tatun nyecú ndo nuquehe quiv̄i quitsi yu, ña quih̄v̄i ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo.

32 Ndūcuhun iñi ndo tsa tahañ ñasih̄i ra Lot.

33 Tandih̄i nyoocho tsa cuñí tsa iyó nu ñuhu ñayiv̄i ihya, cua cunaa ndo. Tan tandih̄i nyoocho tsa ña tyaá yahvi tsa iyó nu ñuhu ñayiv̄i ihya, cua cacu ndo.

34 "Tan catyí yu tsihin ndo tyin tsacuaa can, uvi taahan nyiv̄i cua cava iin nu tsito. Iin ñi cua naquihin yu. Tan inga ñi cua ndoo ñi.

35 Tan uvi taahan ñiñaha, iin caa ñi cua nyico ñi quiv̄i can. Intuhun ña cua naquihin yu. Tan inga ña cua ndoo ña.

36 Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

37 Tsa tsiñi ra naha tsa cahan ra Jesús tacan, tsicā tuhun ra naha tsi ra:

—¿Numaa tahan cua cuv̄i yacan, Jutu Mañi yu? —catyí ra naha.

Tacan tan nacañan ra Jesús, tan catyí ra:

—Nu canyíi ndiyi, ican cua nataca nditsii.

## 18

*Nu jacuahā ra Jesús tyin tumaa tsa cahan yuhu iin ñaha tsih̄i ȳi tsihin juez, tacan taahán tsi ndacan yo tsi Nyoo*

1 Tсахá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundih̄i iñi ra naha.

2 Tan catyí ra:

—Iyó iin ñuu tsa nyaá iin ra cuv̄i juez. Tan juez ican ña tyaá yahvi maa

ra tsi Nyoo. Tan ndi nyiv̄i tan ña tyaá yahvi ra.

3 Tan juvin ñuu ican iyó iin ñaha ndaahvi tsa tsih̄i ȳi. Tan tsaahán ña tsicahán ña tsihin ra can, tyin tsicán ña cuatyí tsaha iin nu xaan iñi tsi ña.

4 Tan juez ican ña tyaá yahvi nu tsa caahán ña. Ña jandaā maa nu tyiñu tsicán ña. Tan tsanaha xaan tsicán ña. Tacan tan quitsahā tsicá iñi nu juez can: "Vasu ndi maa ña tsinú iñi yu tsi Nyoo, tan nduve náa cuenda yu tsi nyiv̄i,

5 maa tyin ñaha ihya tsahá xaan ña tsih̄i tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsih̄i tsi yu", cuñí ra tsicá iñi ra.

6 Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuv̄i ra maa tyin jatyinyee ra tsi ñaha ndaahvi ican.

7 Tan vihi ca cuv̄i Nyoo tsihin yo, ¿a ña cua jatyinyee ra tsi nyiv̄i tsa nacatsi ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi?

8 Catyí yu tsihin ndo, tyin numi ca cua jatyinyee ra tsi ñi. Maa tyin quiv̄i tsa cua quitsi nyico yu tsa cuv̄i yu Raȳi tsa quee nda gloria, tsitó Nyoo tun nañihi ca yu tsi nyiv̄i tsa tsinú tsa cuii iñi tsi yu —catyí ra Jesús.

*Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra*

9 Tacan tan tsahā cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñí ra naha nyehé ra tsi inga nyiv̄i. Tan catyí ra:

10 —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuv̄i ra. Tan inga ra can ra tavá xuhun cuenda ra ndacá ñaha nda ñuu Roma cuv̄i ra.

11 Tan ra fariseo ican nduvit̄a nyityi ra, tan quitsahā caahán ra tsihin Nyoo. Tan catyí ra: "Jutu Mañi yu, nacuhvá yu tyahvi nyoo tsi un tyin

yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihí ra tan iyó inga ñaha ra naha. Tan ña cuví yu tumaa ra tavá xuhun ihya.

<sup>12</sup> Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can.

<sup>13</sup> Tan ra tsa tavá xuhun can tsa cañi luxu nyaá ra. Tan ña cana ñi ra nanyehe ndaa ra. Tan cañi ndaha ra yiqui nyica ra tyin ndu uvi ñi ra cuatyí ra. Tan catyí ra: “Jutu Mañi yu, cundaahvi ñi tsi yu tyin cuaha xaan cuatyí yu iyó”, catyí ra —catyí ra Jesús.

<sup>14</sup> Tan catyí nyico ra Jesús tyehen:

—Catyí yu tsihin ndo tyin Nyoo jahá ra tucahnu ñi tsi ra tavá xuhun ican. Janaa Nyoo cuatyí ra tan cuanuhu ra nda yuvehe ra. Maa tyin ra fariseo ican, nduve tucahnu ñi tsicoó tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

*Nu nasocó ra Jesús tsi tsa nyihi  
(Mt. 19.13-15; Mr. 10.13-16)*

<sup>15</sup> Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehe ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsahá ra naha cuhun tsa nyihi can.

<sup>16</sup> Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya.

<sup>17</sup> Tan catyí yu tsihin ndo tyin tatun ña nyitá ñi ndo tsi Nyoo, tumaa nyitá ñi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

*Nu tsaha ra Jesús cuhva tyin yí  
xaan nacuhva cuenda iin ra cuca tsi ra  
tsi Nyoo*

*(Mt. 19.16-30; Mr. 10.17-31)*

<sup>18</sup> Tacan tan iin ra tsa cuví ityi nuu cuenda vehe ñuhu tsica tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

<sup>19</sup> Tacan tan catyí ra Jesús tsihin ra: —¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha.

<sup>20</sup> Yooho tsitó un tandihí tuhun tsa tsahá Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

<sup>21</sup> Tacan tan ra ican catyí ra:

—Tandihí maa yacan tan tyaá yahvi yu nda taahan luhlu yu tan nda cuanda vityin —catyí ra.

<sup>22</sup> Tsa tsiñi ra Jesús tsa cahan ra can, tacan tan catyí ra tsihin ra:

—Maa tyin cumañi javaha un inga tsa taahan tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

<sup>23</sup> Maa tyin tsa tsiñi ra tsa cahan ra Jesús, nducuihya xaan cuñi ra, tyin cuca xaan ra.

<sup>24</sup> Tan tsa nyehe ra Jesús tyin nducuihya cuñi ra, tan catyí ra:

—Yíi xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

<sup>25</sup> Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

<sup>26</sup> Tan nyivi tsa tsiñi tsa cahan ra catyí ñi:

—Tatun tacan, ¿yóo cua cuví cacu? —catyí ñi.

<sup>27</sup> Tacan tan ra Jesús catyí ra:

—Tandihí tsa ña cuví javahá nyivi, Nyoo cuví javahá ra tandihí —catyí ra.

<sup>28</sup> Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoó ndi, tan nyicún ndi tsi un —catyí ra.

<sup>29</sup> Tacan tan catyí ra Jesús tsihin ra:  
—Tsa nditsa catyí yu tsihin ndo, tyin tandihí nyooho tsa nacoq vehe, a ñasihi ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo,

<sup>30</sup> cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

*Inga tsaha jacoto ra Jesús cuhva cua cahñi nyivi tsi ra*

(Mt. 20.17-19; Mr. 10.32-34)

<sup>31</sup> Tan cana sñin ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cuhun yo nda ñuu Jerusalén. Tyin ndacan cua cundaa tyiñu Rayi tsa quee nda gloria: tandihí tyiñu tsa tyaa ra cuvi ndusu yuhu Nyoo tahañ tsanaha.

<sup>32</sup> Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tivi sñi ra naha nuu yu.

<sup>33</sup> Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

<sup>34</sup> Maa tyin ña cutuñi iñi ra tsicá tsihin ra tsa cahan ra, tan ndi ña tsitó ra naha náa tuhun cahan ra tsihin ra naha. Tyin ña cuví cutuñi iñi ra naha.

*Nu janduvaha ra Jesús iin ra cuaa ñuu Jericó*

(Mt. 20.29-34; Mr. 10.46-52)

<sup>35</sup> Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra.

<sup>36</sup> Tacan tan tsiñi ra cuvaa tsa yahá cuaha nyivi. Tan tsicá tuhun ra náa cuenda ñihi xaan cuvaa.

<sup>37</sup> Tan catyí tuhun nyivi tsihin ra tyin ra Jesús, ra ñuu Nazaret, vatsí.

<sup>38</sup> Tacan tan quitsaha caná tsaa ra tan catyí ra:

—¡Yooho Jesús, tata ra rey David! ¡Cundaahvi iñi tsi yu! —catyí ra.

<sup>39</sup> Tan ra tsa cuahán ityi nuu ican naha ra, catyí ra naha tsihin ra,

nacasi ra yuhu ra. Maa tyin tsaa ca cana tsaa ra, tan catyí ra:

—¡Yooho, tata ra rey David! ¡Cundaahvi iñi tsi yu! —catyí ra.

<sup>40</sup> Tacan tan tsicuiñi ra Jesús. Tan tava tyiñu ra na cuhun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

<sup>41</sup> —¿Náa cuñi un javaha yu tsihin un?

Tacan tan ra cuaa ican nacahan ra, tan catyí ra:

—Jutu Mañi yu, cuñi yu nanyehe yu —catyí ra.

<sup>42</sup> Tacan tan catyí ra Jesús tsihin ra:  
—Nanyehe. Tsa nduvaha tinuu un tyin tsinú iñi un tsi yu —catyí ra.

<sup>43</sup> Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihí nyivi tsa nyehe tsa cuvi can, jacahnú ndihí tucu maa ñi tsi Nyoo.

## 19

*Nu cuahán ra Jesús vehe ra Zaqueo*

<sup>1</sup> Tacan tan quihvi ra Jesús ñuu Jericó. Tan cua yaha ra tsitsi ñuu.

<sup>2</sup> Tan ñuu can iyó iin ra cuca xaan, nañi ra Zaqueo. Tan cuví ra ityi nuu tsihin ra tava xuhun cuenda ra ndacá ñaha nda ñuu Roma.

<sup>3</sup> Ra ihya cuñi xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra.

<sup>4</sup> Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañi sicómoro tsa nyaá yuhu ityi nu cua yaha ra Jesús, tan cuví nyehe ra tsi ra Jesús.

<sup>5</sup> Tan cuhva tsa quita ra Jesús nu nyaá yutun can, nanyehe ndaa ra ityi siqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nuu un nu yutun juvin. Tyin vityin cuñi tsi tsa cuhun yu yuvehe un —catyí ra tsihin ra.

<sup>6</sup> Tacan tan numi xaan nuu ra Zaqueo. Tan sñi xaan cuñi ra. Tan quihin ra tsi ra Jesús cuahán tsihin ra yuvehe ra.



<sup>7</sup> Tan tsa nyehe nyivi tsa tacan cuvi, tandihi ñi quitsaha caahán nyaa ñi tsi ra Jesús. Tan catyí ñi tyin ndoó ra vehe iin ra iyó cuatyí.

<sup>8</sup> Tan nu nyecú ra naha tsitsi vehe, ra Zaqueo tsinyaa nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhu yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

<sup>9</sup> Tacan tan catyí ra Jesús:

—Vityin cacu un, tan nyivi ra Abraham cuví tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.]

<sup>10</sup> Tyin yuhu, Rayi tsa quee nda gloria, vatsí yu vatsí nanducu yu tan vatsí jacacu yu tsi nyivi tsa cuanaa maa —catyí ra Jesús.

*Nu jacuahá ra Jesús tsi yo na jaha tyiñu yo tsihin tsa tsahá Nyoo tsi yo (Mt. 25.14-30)*

<sup>11</sup> Tan tsitsi tsa tsiñí nyivi tsa caahán ra Jesús, tan quitsaha tsahá cuenda ra inga cuhva ihya tsi ñi. Tyin tsa cuñí tsaa ra ñuu Jerusalén. Tan nyivi cuñí maa ñi tyin tsa cua quitsaha cundaca ñaha ra ndacan.

<sup>12</sup> Tacan tan catyí ra:

—Tsicoo iin ra cuca tan tsa cuñí cahun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu nyico ra ñuu ra.

<sup>13</sup> Tsa ndi cumañi ca cahun ra, cana ra utsi taahan musu ra. Tan tsahá cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra.

<sup>14</sup> Maa tyin nyivi ñuu ra, ndasi cuñí ñi nyehé ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cahun cunyicun tsi ra, tyin cahan ra naha tyin ña cuñí ñi tsa cundaca ñaha ra tsi ñi.

<sup>15</sup> Maa tyin ra ican cuvi maa ra rey. Tacan tan tsaá nyico ra nda ñuu

ra. Tan quivi tsa tsaá ra, cana ra tsi musu ra, ra tsa nacoó ra xuhun tsihin. Tyin cuñí ra coto ra nácaa xuhun jaha canaa xuhun ra tsa nacoó ra.

<sup>16</sup> Tan tsaá iin ra ican. Tan catyí ra: “Yooho taa, jaha canaa yu utsi taahan ca siqui xuhun tsa nacoó un tsi yu”, catyí ra.

<sup>17</sup> Tacan tan catyí ra rey can tsihin ra: “Vaha xaan. Yooho cuví musu vaha. Tyin javaha un ndihi tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra.

<sup>18</sup> Tacan tan tsaá tucu inga ra tsa tsahá ra xuhun. Tan catyí ra: “Juhun xuhun ihya. Jaha canaa yu uhun taahan ca siqui xuhun tsa nacoó un tsi yu”, catyí ra.

<sup>19</sup> Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra.

<sup>20</sup> Tacan tan tsaá tucu inga ra can. Tan catyí ra: “Juhun xuhun tsa tsahá un tsi yu. Yuhu naquihin vaha yu itsi tsitsi pañitu.

<sup>21</sup> Tyin yuuhvi xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsi un. Tan naquihín un ndaha tyiñu quita nu jaha tyiñu inga nyivi”, catyí ra can.

<sup>22</sup> Tacan tan ra rey ican catyí ra tsihin ra: “Yooho musu ña vaha cuví un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihín yu tsa ña tatsi yu, tan naquihín yu ndaha tyiñu inga nyivi,

<sup>23</sup> ¿nacuvi tyin ña tsityihí un xuhun yu banco tyin tsaa yu maa tyin tsa nandaa xuhun yu?” catyí ra rey can.

<sup>24</sup> Tan catyí ra tsihin ra nyecú ican: “Quinyaa ndo xuhun tsa tsahá yu tsi ra ihya, tan cuhva ndo tsi ra tsa jaha canaa utsi taahan ca siqui tsa tsahá yu tsi ra”, catyí ra.

<sup>25</sup> Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha.

<sup>26</sup> Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jaha tyiñu tsihin tsa tsahá

yu tsi ra, cuaha ca cua cuhva yu tsi ra. Tan ra tsa tsaha yu luxu ñi, tan ña cuñi ra jahá tyiñu ra tsihin tsi, cua quinyaa yu tandihí can tsi ra.

<sup>27</sup> Tan tandihí nyívi xaan iñi tsi yu, ñi tsa ña cuñi tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

*Nu tsaq ra Jesús ñuu Jerusalén*  
(Mt. 21.1-11; Mr. 11.1-11; Jn. 12.12-19)

<sup>28</sup> Tsa yaha cahan ra Jesús yacan, tan jañihí ra cuahán ra ñuu Jerusalén.

<sup>29</sup> Tacan tan tsa cuñi tsa ra ñuu Betfagé tsihin ñuu Betania, yatyin ñi iin yucu tsa nañi Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra.

<sup>30</sup> Tan catyí ra tsihin ra naha:  
—Cuaahan ndo ñuu tsa canyíi yatyin ñi ihya. Ican cua nañihi ndo iin burru luhlu, quiñi tsa ñaha ca quiñi tyayu. Nuuhñi ti. Ndatsi ndo tsi ti. Tan quitsi ndaca ndo tsi ti tsi yu.

<sup>31</sup> Tatun yóo tsicá tuhun tsi ndo: “¿Nacuenda ndatsí ndo tsi ti?” catyí ndo tsihin ñi: “Ndatsí ndi tsi ti tyin tsiñi ñuhu ti tsi ra ndacá ñaha.”

<sup>32</sup> Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa cahan maa ra tsihin ra naha.

<sup>33</sup> Tan cuhva tsa ndatsí ra naha tsi ti, tsa tsitoho ti. Tan nducu tuhun ra can naha ra tsi ra naha tan catyí ra:

—¿Nacuenda ndatsí ndo burru ihya?  
—catyí ra naha.

<sup>34</sup> Tacan tan nacahan ra can naha ra:

—Ndatsí ndi tsi ti tyin tsiñi ñuhu ti tsi ra ndacá ñaha —catyí ra naha.

<sup>35</sup> Tacan tan quiñin ra naha tsi ti. Tan tsindaca ra naha tsi ti nu nyii ra Jesús. Tan tyiso ra naha jahma ra naha tsata ti. Tacan tan jandaa ra naha tsi ra Jesús tsata ti.

<sup>36</sup> Tacan tan cuahán ra Jesús. Tan cuaha xaan nyívi cuahán tsihin ra tsaquin ñi jahma ñi nu ñuhu ityi nu cua yaha ra, yosó ra burru ican.

<sup>37</sup> Tsa tsa cua cuyatyin tandihí nyívi tan ra Jesús nu iñi nuu yucu Olivo,

quitsaha caná tsa tandihí ñi tsinú iñi tsi ra tsihin tsa sñi cuñi ñi. Tan jacahnú ñi tsi Nyoo tyin cuaha xaan tsa iyo javaha ra nyehe ñi.

<sup>38</sup> Tan catyí ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

<sup>39</sup> Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyívi ihya —catyí ra naha.

<sup>40</sup> Tan nacahan ra Jesús tan catyí ra:  
—Tatun nyívi ihya tan cutaxin ñi, yuu cua cana tsa, tan cua jacahnu tsi tsi yu —catyí ra Jesús.

<sup>41</sup> Tacan tan tsa tsaq ra Jesús yatyin ñi yuhu ñuu Jerusalén, nanyehe ra ñuu can tan quitsaha tsacú ra tsa cui-ihya cuñi ra.

<sup>42</sup> Tan catyí ra:

—Vaha xaan tun tsatyin cuvi coto ndo tan cutuñi iñi ndo nácaa ñihi ndo tsa taxin coo aña ndo vityin ihya. Maa tyin xeehe xaan yihí tsa vaha can, tan ña cuví nañihi ndo can.

<sup>43</sup> Coo quiñi cua nyehe ndo tundoho jaha nu xaan iñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo.

<sup>44</sup> Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñi ndo nacoto ndo tyin tsa vatsí Nyoo, vatsí jacacu ra tsi ndo.

*Nu tavaq ra Jesús tsi nu xicó tsitsi vehe ñuhu cahnu nahnu*  
(Mt. 21.12-17; Mr. 11.15-19; Jn. 2.13-22)

<sup>45</sup> Tacan tan quiñvi ra Jesús tsitsi cora vehe ñuhu cahnu. Tan quitsaha tava ra tandihí nyívi xicó tan nyívi jatá tsa yucú nu quehe.

<sup>46</sup> Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyooho jananduví ndo itsi vehe ñasuhu —catyí ra Jesús.

<sup>47</sup> Tan tandihí quiví tsaahán ra Jesús tsijacuahá ra tsi nyívi tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra.

<sup>48</sup> Maa tyin ña ñihí maa ra naha nácaa javaha ra naha tyin tandihí nyívi tan vaha tyaá soho ñi tsa caahán ra Jesús.

## 20

*Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyívi*

*(Mt. 21.23-27; Mr. 11.27-33)*

<sup>1</sup> Iin quiví jacuahá ra Jesús tsi nyívi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaá ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra.

<sup>2</sup> Tan catyí ra naha tsihin ra Jesús:  
—Catyi tuhun tsihin ndi ¿yóo tava tyiñu tsi un javaha un tyiñu ihya? —catyí ra naha.

<sup>3</sup> Tacan tan ra Jesús catyí ra tsihin ra naha:

—Yuhu cuñí tucu yu nducu tuhun yu tsi ndo.

<sup>4</sup> ¿Yóo jaquitsi tsi ra Juan tyin jacoondutya ra tsi nyívi? ¿A Nyoo jaquitsi tsi ra, a nyívi?

<sup>5</sup> Tacan tan ra ican naha ra quit-sahá caahán yuhu tahan ra naha tan catyí ra naha:

—Tun catyí yo tyin Nyoo jaquitsi tsi ra Juan, cua catyi ra tsihin yo nacuenda ña tsinu ñi yo tsa cahan ra Juan.

<sup>6</sup> Tun catyí tucu yo tyin nyívi jaquitsi tsi ra, tandihí nyívi cua cahñi ñi tsi yo tsihin yuu. Tyin tandihí ñi, tan cuñí ñi tyin ndusu yuhu Nyoo cuví ra Juan —catyí ra naha.

<sup>7</sup> Tacan tan nacahan ra naha tsihin ra Jesús tyin ña tsitó ra naha yóo tava tyiñu tsi ra Juan jacoondutya ra tsi nyívi.

<sup>8</sup> Tacan tan ra Jesús catyí ra tsihin ra naha:

—Ndi yuhu, tan ña cua catyi tuhun yu tsihin ndo yóo tava tyiñu tsi yu tsa javaha yu tyiñu ihya.

*Nu jacuahá ra Jesús tyin tumaa cuví juhva ra caquiñi naha ra, tacan cuví ra tsa cua cahñi tsi ra*

*(Mt. 21.33-44; Mr. 12.1-11)*

<sup>9</sup> Tacan tan tsaá cuenda ra Jesús iin cuhva ihya tsi nyívi:

—Iin ra, tatsi cuaha ra nu ñuhu ra yoho tsiti yucu tsa cua cuví vinu. Yahá can tan tsaá nuu ra ñuhu can tsi juhva ra jahá tyiñu. Tacan tan naha cuahán ra inga ñuu.

<sup>10</sup> Tan quiví tsa ñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundi ra jacunuhu ra naha tsi ra.

<sup>11</sup> Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahan nyaa ra naha tsi ra. Tan jacunuhu ra naha tsi ra. Tan juvín ñi nduve tsa tsaá ra naha cuiso ra cunuhu ra.

<sup>12</sup> Tacan tan ra cuví tsitoho yoho can jacuhun nyico ra inga ra. Maa tyin juvín ñi tacan javahá nyico ra naha tsihin ra can. Tan jañicuehe ra naha tsi ra. Tan tava ra naha tsi ra.

<sup>13</sup> Yahá can tan catyí tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñí xaan yu. Vasiqui cua tyaa yahvi ra naha tsi ra, tyin sehe yu cuví tsi ra”, catyí ra.

<sup>14</sup> Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha.

<sup>15</sup> Tacan tan tava ra naha tsi sehe tsitoho ñuhu ican ityi tsata cora, tan tsañi ra naha tsi ra —catyí ra Jesús.

Tacan tan catyí ra Jesús tsihin nyívi nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi ra naha sehe ra?

<sup>16</sup> Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuvi. Tan catyí ñi:

—¿Ña cuñi Nyoo tahan yo tacan! —catyí ñi.

<sup>17</sup> Maa tyin ra Jesús nanyehé ra nuu ñi tan catyí ra:

—Tun tacan tsicá iñi ndo ¿náa cuñi tsi catyí tsa nyaá nu tutu Nyoo? Tyin catyí tsi tyehen:

Yuu tsa ña cuñi ra javaha vehe cu-  
atyíñu ra,

yacan cuvi yuu tsa tsiñi ñuhu ca.

<sup>18</sup> Yoo nyivi cua canacava tsata yuu can, cua tahnu cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

<sup>19</sup> Tan ra jutu tsa cuvi ityi nuu naha ra tan ra maestro cuenda ley vehe ñuhu naha ra, tuví iñi ra naha tyin tsa cahán ra Jesús tacan, tsi maa ra naha nañi can. Tan cuñi ra naha tiin ra naha tsi ra tyin cahñi ra naha tsi ra. Maa tyin ña tsitó maa ra naha nácaa javaha ra naha, tyin nayuhvi ra naha tsi nyivi.

*Nu jacuahá ra Jesús tsa cuenda tsa tyahvi nyivi xuhun tsi ra ndacá ñaha ñuu Roma*

(Mt. 22.15-22; Mr. 12.13-17)

<sup>20</sup> Tacan tan jacuhun ra naha tsi juhva ra nducu cuhva tsi ra Jesús. Tan jahá ra naha tyin ra vaha cuvi ra naha. Tyin tacan tan coto ra naha náa tsa ña vaha cua cahan ra Jesús tan cuvi tiin ra naha tsi ra. Tan cuhva cuenda ra naha tsi ra tsi ra ndacá ñaha.

<sup>21</sup> Yacan tsicá tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó aña ñi. Tan maa ñi maa tsa nditsa tyin ityi Nyoo janahá un.

<sup>22</sup> Catyí tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

<sup>23</sup> Tan ra Jesús tuví iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñi ndo nducu cuhva ndo tsi yu?

<sup>24</sup> Janaha jihna ndo iin xuhun tsi yu, na nyehe yu. ¿Yoo nuu nyaá xuhun can tan yoo sivi nyaá can? —catyí ra.

Tacan tan nacahan ra naha:

—Nuu ra ndacá ñaha, ra cuvi rey cahnu, nyaá can tan juvin ñi sivi ra nyaá can —catyí ra naha.

<sup>25</sup> Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsi maa ra cuvi tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

<sup>26</sup> Tan ña cuvi maa jandavi ñaha ra naha tsi ra Jesús tsihin tsa caahán ra tacan tsihin nyivi. Tan iyo xaan cuñi ra naha tsa nacahan ra. Tan taxin ña cuvi ra naha.

*Nu cuñi ra cuvi saduceo naha ra jandavi ñaha ra naha tsi ra Jesús*

(Mt. 22.23-33; Mr. 12.18-27)

<sup>27</sup> Tsa yahá can tan tsaá juhva ra cuvi saduceo nu nyii ra Jesús. Maa ra naha cuvi ra tsa catyí tyin ña nandoto nyivi tun tsa tsihi ñi.

<sup>28</sup> Tacan tan catyí ra naha tsihin ra Jesús:

—Maestro, jandoo ra Moisés tyiñu ihya tyin tatun iin ra tsihi tan nandoo ñasiihi ra, tatun nduve sehe ra tsicoo tsihin ña, taahán tsi tsa tindaha ra cuvi yañi ra tsihin ña, tan coo sehe ra tsihin ña tsa cuenda ra yañi ra.

<sup>29</sup> Maa tyin cuñi ndi coto ndi nácaa, tyin tsicoo iin ra tan tsicoo utsa sehe ra. Tan ra tsa ñihi ca tsicoo ñasiihi ra, maa tyin nduve sehe ñi tsicoo, tan tsihi ra.

<sup>30</sup> Tacan tan naquihin ra tsa tsinu uvi tsi ña can. Tan nduve tucu sehe ñi tsicoo. Tan tsihi tucu ra can.

<sup>31</sup> Tan juvin ñi tacan javaha ra tsinu uñi. Tandihí tsa utsa ra naha javaha



tacan. Ndi intuhun ra tan ña tsicoo sehe ra tsihin ña.

<sup>32</sup> Tan nu ndihí tuhun tsihi ndihí maa ña.

<sup>33</sup> Tan cuñí ndi coto ndi yóo ra cua cuvi yí ña tsitsi tsa tandihí tsa utsa taahan ra naha quivi cua nandoto nyivi —catyí ra saduceo naha ra.

<sup>34</sup> Tacan tan nacahan ra Jesús, tan catyí ra:

—Ihya nu ñuhu ñayivi, rayí tan ñaha tindahá ñi.

<sup>35</sup> Maa tyin nyivi tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha.

<sup>36</sup> Tan nduve tuhun tsihi iyó ndacan tyin cua cuvi ñi tumaa ángel. Tan cua cuvi ñi sehe Nyoo tyin nandoto ñi.

<sup>37</sup> Tan tsa cuenda tuhun tsa nandoto ndiyi. Tsa nditsa cuvi tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyivi tsihi cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés.

<sup>38</sup> Tacan catyí ra tyin Nyoo, ñavin Nyoo cuenda nyivi tsihi cuvi ra. Nyoo cuenda nyivi nyito cuvi ra. Tyin tsa cuenda Nyoo tandihí yo tan nyito añima yo vasu tsa tsihi cuñu ñuhu yo —catyí ra Jesús.

<sup>39</sup> Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

<sup>40</sup> Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

*Ra Cristo cuvi ra tata ra David, tan juvin ñi cuvi tucu ra Sehe Nyoo*  
(Mt. 22.41-46; Mr. 12.35-37)

<sup>41</sup> Tacan tan tsicá tuhun ra Jesús tsi ra naha:

—¿Nacuenda catyí yo tyin ra Cristo tata ra David cuvi tsi ra?

<sup>42-43</sup> Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunya xaan cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyíñu ra yuhu ra David tahañ tsanaha.

<sup>44</sup> ¿Nacaa tsa tata ra David cuvi tucu ra Cristo, tan juvin ñi maa ra David catyí tyin Jutu Mañi ra cuvi tsi ra Cristo? —catyí ra Jesús.

*Nu cahan ra Jesús tyin cuaha xaan cuatyí ra maestro cuenda ley vehe ñuhu iyó*

(Mt. 23.1-36; Mr. 12.38-40, Lc. 11.37-54)

<sup>45</sup> Tandihí nyivi tsihi ñi tsa cahan ra Jesús tsihin ra tsicá tsihin ra nu cahan ra tyehen:

<sup>46</sup> —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyivi yucú nuyahvi nacumi tsi ra naha tsihin tsa jaha ñi tsa ñayivi tsi ra naha. Tan nanducú ra naha tyayu vaha cunyecu ra naha tsitsi vehe ñuhu, tan nu cuahán ra naha vico.

<sup>47</sup> Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyivi tan catyí ñi tyin vaha xaan nyivi cuvi ra naha. Maa tyin juvin ñi maa ra naha cuvi ra quinyaá vehe ñi ndaahvi tsa tsihi yí tyin ña cuvi tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

## 21

*Tsa jamañi iin ñaha ndaahvi tsa tsihi yí*

(Mr. 12.41-44)

<sup>1</sup> Tan nyehe ra Jesús tyin cuaha xaan nyivi cuca tyihí ñi xuhun tsitsi caja tsa nyí tsitsi vehe ñuhu cahnu.

<sup>2</sup> Tan nyehe tucu ra tsi iin ñaha ndaahvi tsa tsihi yí. Tan tyihí ña uvi taahan ñi xuhun nyihi.

<sup>3</sup> Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can.

<sup>4</sup> Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

*Nu cahan ra Jesús tyin cua tani vehe ñuhu cahnu*

(Mt. 24.1-2; Mr. 13.1-2)

<sup>5</sup> Tacan tan juhva nyivi natuhún ñi tuhun cuenda vehe ñuhu cahnu ican. Tan catyí ñi tyin sii xaan caá yuu. Tan sii xaan caá tsa jamañi nyivi. Tacan tan catyí ra Jesús:

<sup>6</sup> —Coo quivi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

*Tsa cua cuvi tsa ndi cumañi ca naa ñuhu ñayivi*

(Mt. 24.3-28; Mr. 13.3-23)

<sup>7</sup> Tacan tan nducú tuhun nyivi tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Naca tan coto ndi tatun tsa cuyatyn tsa naa ñuhu ñayivi? —catyí ñi.

<sup>8</sup> Tacan tan catyí ra Jesús:

—Jaha vaha ndo cuenda, coto jan-davi ñaha nyivi tsi ndo. Tyin cuaha xaan ra cua quitsi, tan cua cuatyinu ra naha sivi yu, tan cua catyi ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayivi”, cua catyí ra. Maa tyin ña cunycun ndo tsi ra naha.

<sup>9</sup> Tan quivi cua ñihi tuhun ndo tyin tsa iyó cuatyí tan ñihi cañi tahan nyivi, ña nayuhvi ndo. Tyin tandihí can taahán tsi cuvi tsa jihna ñi. Maa tyin cumañi ca tsa quivi tsa cua naa ñuhu ñayivi.

<sup>10</sup> Tan catyí tucu ra:

—Nyivi iyó iin ñuu cua cañi tahan ñi tsihin nyivi inga ñuu. Tan cua coo cuatyí.

<sup>11</sup> Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyivi tsa yuhvi ityi andivi. Tan cuaha xaan tsa iyo

nahnu tsa ña tuhvá nyivi nyehe tan cua nyehe ñi.

<sup>12</sup> Maa tyin tsa ndi cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihí ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu.

<sup>13</sup> Tacan tan cuví cahan ndo tuhun yu tsihin ñi.

<sup>14</sup> Maa tyin jaha ndo cuenda tan ña cua caca iñi ndo náa tuhun cua naca-han ndo tsihin ra ndacá ñaha ican.

<sup>15</sup> Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan ndo. Ndi intuhun nu xaan iñi tsi ndo tan ña cuvi jaha nahnu tsi ndo.

<sup>16</sup> Maa tyin nyivi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyooho cua cañi nyivi tsi ndo.

<sup>17</sup> Tandihí nyivi tan ndasi cua cuñi ñi nyehe ñi tsi ndo tsacatyí yuhu.

<sup>18</sup> Maa tyin ndi intuhun ixi jiñi ndo tan ña cua cunaa.

<sup>19</sup> Tatun ña ndu uvi iñi ndo tsa nyi-cun ndo tsi yu, cua cacu ndo.

<sup>20</sup> Quivi cua nyehe ndo tyin ñi canduvi yuhu ñuu Jerusalén ihya nyecú andaru, coto ndo tyin tsa cuñi naa ñuu ihya.

<sup>21</sup> Tan nyivi iyó ñuu tsa cayucú Judea, cua cunu ñi tan cahun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya.

<sup>22</sup> Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihí cuhva catyí nu tutu Nyoo.

<sup>23</sup> Tan ndahvi ñiñaha tsa ñuhú sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihí nyivi. Tyin cahnu xaan tsa uhvi cua

nyehe nyivi ñuu Jerusalén ihya cua jaha Nyoo.

<sup>24</sup> Andaru cua cahñi ra naha tsi juhva nyivi tsihin mityi. Tan cua tñn ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

*Nacaa cua quitsi Rayi tsa quee nda gloria inga tsaha*

(Mt. 24.29-35, 42-44; Mr. 13.24-37)

<sup>25</sup> Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu.

<sup>26</sup> Tan cua cúu naaha ñi tsihin tsa yuuhví ñi tsa tsicá ñi ñi náa ndihi tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan.

<sup>27</sup> Tacan tan cua nyehe ñi tsi yuhu, Rayi tsa quee nda gloria, vatsí nuu yu tsitsi vico tsihin tunyee ñi Nyoo, tan tsihin tsa cahnu cuví ra.

<sup>28</sup> Tan cuhva tsa cua quitsaha yacan tan jandu iin ndo ñi ndo tan cusii ñi ndo tyin numi xaan cua cacu ndo —catyí ra.

<sup>29</sup> Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihi ca yutun.

<sup>30</sup> Tatun tsa nduyutyá numa tun tsa cuyatyin cuun savi.

<sup>31</sup> Tan tacan tucu nyoocho, tatun tsa nyehe ndo tyin tsa quitsaha cuví tandihi tsa cahñan yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

<sup>32</sup> Maa tyin tsa nditsa catyí yu tsihin ndo tyin yacan cua cuvi jihna tsa ndi cumañi ca cúu nyivi tsa iyó nu ñuhu ñayivi.

<sup>33</sup> Coo quivi cua naa andivi tan ñuhu ñayivi, maa tyin tuhun caahán yu, ña cua cundihí tsi.

<sup>34</sup> Tan jaha ndo cuenda tsi ndo coto ndundava ñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan ñi ndo tundoho

ñayivi ihya. Jaha ndo cuenda coto ndundava ñi ndo tsihin yacan. Tan coto sana ñi ndo tan quita quivi cua quitsi yu tan cua quitsi tundoho cua nyehe ndo.

<sup>35</sup> Tyin tacan cua cuvi, tandihi nyivi iyó nu ñuhu ñayivi, sana ñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi.

<sup>36</sup> Maa tyin nyoocho cūatu ndo. Ndacan tahvi ndo tsi Nyoo tandihi quivi, na jacacu ra tsi ndo. Tan ña nyehe ndo tandihi tundoho tsa cua coo. Ndacan tahvi ndo, tacan tan cua cuvi tsaá ndo nu nyaá yuhu, Rayi tsa quee nda gloria —catyí ra Jesús.

<sup>37</sup> Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo.

<sup>38</sup> Tan tandihi nyivi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

## 22

*Nu cua xico ra Judas Iscariote tsi ra Jesús*

(Mt. 26.1-5, 14-16; Mr. 14.1-2, 10-11; Jn. 11.45-53)

<sup>1</sup> Tan tsa nyanaá yatyin quivi tsa cua coo vico pascua, vico nu tuhvá nyivi tsatsí paan tsa nduve yutsan iya yihí.

<sup>2</sup> Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyivi.

<sup>3</sup> Tacan tan quihvi nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsi ra Jesús.

<sup>4</sup> Tan nu ihya, tsahñan nu tsicahñan nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha.

<sup>5</sup> Tan ra ican naha ra sii xaan cuñí ra naha. Tan tyihí ra naha cuhva tyin cuhva ra naha xuhun tsi ra Judas.

<sup>6</sup> Tan ra Judas ndoo ra vaha. Tan quitsaha nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

*Nu cuxiñi ra Jesús tsihin ra tsicá tsihin ra*

(Mt. 26.17-29; Mr. 14.12-25; Jn. 13.21-30; I Co. 11.23-26)

<sup>7</sup> Tan tsaá quivi tsa cuvi vico tsa tsatsi nyivi paan tsa nduve yutsan iya yihí. Tan juvin ñi quivi ican tuhvá ñi tsahñi iin mbee luhlu tsa vico pascua can. Tyin catsi ñi tsi ti.

<sup>8</sup> Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

<sup>9</sup> Tacan tan nducú tuhun ra naha tsi ra:

—¿Numaa cuñi un javaha ndi tsa cuxiñi yo? —catyí ra naha.

<sup>10</sup> Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. Cuaahan ndo tsata ra tan quihvi ndo vehe nu quihvi ra.

<sup>11</sup> Tan catyi ndo tsihin tsitoho vehe can: “Ra cuvi Maestro, cuñi ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyi ndo tsihin ra.

<sup>12</sup> Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvaha maa tsi. Tan ndacan cua javaha ndo tsa cuxiñi yo —catyí ra tsihin ra naha.

<sup>13</sup> Tacan tan cuahan ra naha. Tan nañihi ra naha tandihi tumaa tsa cahan ra Jesús. Tacan tan na ica vaha ra naha tsa cuxiñi ra naha cuenda vico pascua.

<sup>14</sup> Tacan tan tsa tahan tsi cuhva tsa cuxiñi ra Jesús tsihin tandihi ra tava tyiñu ra, tsinyecu ra naha yuhu mesa.

<sup>15</sup> Tacan tan catyí ra Jesús:

—Cuñi xaan yu cuxiñi yu tsihin ndo cuenda vico pascua ihya tsa ndi

cumañi ca nyehe yu tundoho tan cúu yu.

<sup>16</sup> Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

<sup>17</sup> Tacan tan quihin ra iin vasu vinu. Nacuhva ra tyahvi nyoo tsi Nyoo. Yaha can tan catyí ra tsihin ra nyecu tsihin ra:

—Quihin ndo tsehe. Tan coho ndo luxu luxu.

<sup>18</sup> Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

<sup>19</sup> Yaha can tan quihin ra paan, tan tsaha ra tyahvi nyoo tsi Nyoo, tan tsahnya sava ra can. Tsahan tsaha ra can tsi ra naha. Tan catyí ra tsihin ra naha:

—Paan ihya cuvi tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñi tsi nducuhun iñi ndo tsi yu tan cuxiñi ndo tyehen —catyí ra.

<sup>20</sup> Tan tsa yaha cuxiñi ra naha, tacan tan quihin ra vasu vinu, tan catyí ra:

—Tsihin vinu ihya ndoó Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuvi tsi. Tan tsa vaha tsi nyooho tan cua cati niñi yu. Tan cua cúu yu.

<sup>21</sup> Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya.

<sup>22</sup> Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin jndahvi ra tsa cua nacuhva cuenda tsi yu! —catyí ra Jesús.

<sup>23</sup> Tacan tan ra tsicá tsihin ra Jesús quitsaha nducú tuhun tahan ra naha, ndaa ra cua nacuhva cuenda tsi ra Jesús tsi ra xaan iñi tsi ra.

*Nu cahan yuhu tahan ra tsicá tsihin ra Jesús, yoo ra cahnu ca cuvi*



<sup>24</sup> Yaha can tan quitsaha caahán yuhu tahan ra tsicá tsihin ra Jesús, ndáa ra cahnu ca cuví.

<sup>25</sup> Tan ra Jesús catyí ra:

—Tsitó nyooho tyin ra ndacá ñaha tsi nyívi iyó nu ñuhu ñayívi, ñihi xaan ndacá ñaha ra naha tsi ñi. Tan cuñí ra naha tyin catyí nyívi tyin jatyinyee ra naha tsi ñi.

<sup>26</sup> Maa tyin nyooho ña taahán tsi javaha ndo tumaa javahá ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandíhi ndo.

<sup>27</sup> Tyin nu ñuhu ñayívi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

<sup>28</sup> "Tan nyooho cuví ndo tsa nyecú tsihin yu tandíhi nu nyehe yu tundoho.

<sup>29</sup> Yacan cuenda, yuhu tsaha yu iin nu cua cundaca ñaha ndo tumaa tsa tsaha Jutu yu tsa cundaca ñaha yu.

<sup>30</sup> Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyívi cuví tata tsa utsi uvi sehe ra Israel.

*Nu caahán ra Jesús tyin cua catyí ra Pedro tyin ña nacoto ra tsi ra*

*(Mt. 26.31-35; Mr. 14.27-31; Jn. 13.36-38)*

<sup>31</sup> Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsican ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi ñi ndo tsa tsinú ñi ndo tsi Nyoo.

<sup>32</sup> Maa tyin tsican tahvi xaan yu tsi ra tsa cuenda un, na ña jandíhi un tsa tsinú ñi un tsi yu. Tan tsa ndu uvi ñi un cuatyí un, tan natsinu vaha nyico ñi un tsi yu, cua jatyinyee un tsi ra yañi un naha ra tsa ña cua jandíhi ra naha tsa tsinú ñi ra naha tsi yu —catyí ra Jesús tsihin ra Simón.

<sup>33</sup> Tan ra Simón catyí ra tsihin ra:

—Jutu Mañi yu, tsa ndu iin vaha ñi yu tsa cuhun yu tsihin un vasu vehe caa, vasu cúu yu tsihin un —catyí ra.

<sup>34</sup> Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyí un uñi tsaha tyin ña nacoto un tsi yu —catyí ra Jesús tsihin ra.

*Nu tsa cuñí tsa cuhva tsa cua nacuhva cuenda ra Judas tsi ra Jesús*

<sup>35</sup> Tacan tan tsicá tuhun ra Jesús tsi ra tsicá tsihin ra tan catyí ra tsihin ra naha:

—Nducuhun ñi ndo quívi tsa jacuhun yu tsi ndo tsa cahan ndo tsihin nyívi, tan nduve tsa tsindahá ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quívi can? —catyí ra Jesús.

—Nduve —catyí ra naha.

<sup>36</sup> Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo.

<sup>37</sup> Tyin catyí yu tsihin ndo, tyin tandíhi tuhun yu tsa nyaá nu tutu Nyoo cua cundaa tsi, tyehen catyí tsi: "Cua tatsi tuñi nyívi tsi ra tumaa tsa cuví ra iin ra caquiñi." Tacan catyí tuhun yu nu tutu Nyoo. Tan tandíhi tsa catyí tsi tsa cuenda yu cua cundaa tsi —catyí ra.

<sup>38</sup> Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

*Nu tsican tahvi ra Jesús tsi Nyoo nda Getsemaní*

*(Mt. 26.36-46; Mr. 14.32-42)*

<sup>39</sup> Tacan tan quita ra Jesús vehe nu nyíi ra. Tan cuahán ra yucu Olivo, cuhva tuhva maa ra tsicá. Tan ra tsicá tsihin ra cuahán ra naha nyicún ra naha tsi ra.

<sup>40</sup> Tan tsa tsaá ra naha ndacan, catyí ra tsihin ra naha:

—Ndacan tahvi ndo tsi Nyoo tyin tacan tan ña cuvi jaha canaa nu ña vaha tsi ndo.

<sup>41</sup> Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuiñi tsiti ra. Tan quitsaha caahán ra tsihin Nyoo,

<sup>42</sup> tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuvi cuhva cuñi maa yu. Na cuvi cuhva cuñi maa un —catyí ra Jesús.

<sup>43</sup> Tacan tan quituvi iin ángel Nyoo, tyin cuhva ra tunyee iñi tsi ra Jesús.

<sup>44</sup> Tan tsitsi tsa nyehé xaan ra Jesús tundoho tsa cuihya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá ñiñi.

<sup>45</sup> Tacan tan nduvita ra tsa ndihi cahan ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuihya xaan cuñi ra naha, ña cunyeë iñi ra naha ñumaahna tan quixi ra naha.

<sup>46</sup> Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndacan tahvi ndo tsi Nyoo, tyin tacan tan ña cuvi jaha canaa nu ña vaha tsi ndo.

*Nu tsaqa cuenda ra Judas tsi ra Jesús tsi nu xaan iñi tsi ra*

(Mt. 26.47-56; Mr. 14.43-50; Jn. 18.2-11)

<sup>47</sup> Ndi caahán ca ra Jesús yacan, tan tsaqa cuaha ra catsaqa. Tan ityi nuu, vatsí nu Judas, iin ra tsicá tsihin ra Jesús. Tan natuhva nu nu nyaá ra Jesús tyin tyayuhu nu tsi ra.

<sup>48</sup> Tacan tan cahan ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayi tsa queë nda gloria tsi nu xaan iñi tsi yu nahnu? —catyí ra Jesús.

<sup>49</sup> Tan ra nyecú tsihin ra Jesús quitsaha nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

<sup>50</sup> Tacan tan iin ra can, tsahnya ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

<sup>51</sup> Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvaha ra itsi.

<sup>52</sup> Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahan tsitiin tsi ra Jesús. Tan catyí ra Jesús tsihin ra naha:

—¿A vatsí tñin ndo tsi yu tumaa tñin ndo iin ñasuhu? tyin ndaha ndo mityi tan yutun.

<sup>53</sup> Ndihi quivi tsinyij yu tsitsi vehe ñuhu cahnu, tan ña tñin ndo tsi yu ndacan. Maa tyin vityin tsaqa cuhva tsa ndunaa tyin nu ña vaha ndacá ñaha. Yacan cuenda vatsí tñin ndo tsi yu.

*Nu cahan ra Pedro tyin ña nacotó ra tsi ra Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Tacan tan tñin ra naha tsi ra Jesús. Tan tsindaca ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahán ra nyicún ra.

<sup>55</sup> Tan tsa tsaqa ra naha vehe ra jutu tsaahnu tsa cuví ityi nuu, jatahan ra tsa cuví musu naha ra ñuhu nuquehe. Tan tsinyecu ra naha tani canduvi nu cayú ñuhu can. Tan tsinyaa ndihi ra Pedro tyañu ra naha.

<sup>56</sup> Tan tsa ndunditsín tsa cayú ñuhu ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

<sup>57</sup> Maa tyin ra Pedro catyí ra:

—Yuhu ña nacotó yu tsi ra can.

<sup>58</sup> Tañi ñi tan nyehe tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

<sup>59</sup> Tan tsa yaha iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

<sup>60</sup> Tacan tan catyí ra Pedro:

—Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navacu ñi iin tsitooho.

<sup>61</sup> Tacan tan ra Jesús nanyehe ra nuu ra Pedro. Tan ra Pedro nducuhun iñi ra tsa cahan ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsaha tyin ña nacotó un tsi yu.”

<sup>62</sup> Tacan tan quita ra Pedro ityi tsata vehe. Tan tsacu xaan ra tsa cuihya cuñi ra.

*Nu tsacu nducu nyaa ra naha tsi ra Jesús tan cañi ra naha tsi ra (Mt. 26.67-68; Mr. 14.65)*

<sup>63</sup> Tacan tan ra jahá cuenda tsi ra Jesús, quitsaha tsacú nducu ra naha tsi ra. Tan cañi ra naha tsi ra.

<sup>64</sup> Tsahñi ra naha jahma nuu ra, tan quitsaha cañi ra naha nuu ra. Tan catyí ra naha tsihin ra:

—Nacoto yóo ra cañi tsi un —catyí ra naha tsihin ra.

<sup>65</sup> Tan cuaha xaan ca maa tsa cahan nyaa ra naha tsi ra.

*Nu tsicq tuhun mandoñi naha ra tsi ra Jesús tatun Sehe Nyoo cuví tsi ra (Mt. 26.59-66; Mr. 14.55-64; Jn. 18.19-24)*

<sup>66</sup> Tan tsa cunditsin inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

<sup>67</sup> —Catyí tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyí yu tsihin ndo tyin juvin yu cuví, ña cua tsinu iñi ndo tsa cahan yu.

<sup>68</sup> Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu.

<sup>69</sup> Maa tyin vityin tan ityi nuu ca, Rayi tsa quee nda gloria cua cunyaa ra xiin cuaha Nyoo, ra tsa iyó tandihi tunyee iñi —catyí ra Jesús.

<sup>70</sup> Tacan tan tandihi ra naha tsicq tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Jevin, sehe Nyoo tsi yu tumaa catyí maa ndo.

<sup>71</sup> Tacan tan natuhun tahan ra naha:

—Tsiñi ndo tsa caahán ra. Ña cuñi ca tsi tsandaa. Tyin tsa tsiñi maa yo tsa cahan ra —catyí ra naha.

## 23

*Nu nyehe ra Pilato tyin nduve cutyí ra Jesús*

*(Mt. 27.1-2, 11-14; Mr. 15.1-5; Jn. 18.28-38)*

<sup>1</sup> Tacan tan nduvita tandihi ra naha. Tan tsindaca ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma].

<sup>2</sup> Tacan tan quitsaha tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví ra Cristo, ra tsa jaquitsi Nyoo tyin cuvi ra rey —catyí ra naha tsihin ra Pilato.

<sup>3</sup> Tacan tan ra Pilato tsicq tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

<sup>4</sup> Tacan tan catyí ra Pilato tsihin ra jutu tsa cuví ityi nuu naha ra, tan tsihin nyívi:

—Nduve cuatyí ra ihya —catyí ra tsihin ñi.

<sup>5</sup> Maa tyin jañihí ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihi tsahá ra, tyin jacuahá ra tsi nyívi. Tsa jihna ñi quitsahá caahán ra tsihin nyívi iyó ñuu tsa cayucú Galilea. Tan naní ityi vatsí ra, jacuahá ra tsi nyívi. Tan vityin tsa tsaá ra Judea ihya tan juvín ñi yacan javahá ra —catyí ñi.

*Nu jacuhun ra Pilato tsi ra Jesús nu nyaá ra Herodes, ra cuví rey nyívi iyó Galilea*

<sup>6</sup> Cuhva tsa tsiñi ra Pilato yacan, tan nducú tuhun ra tatun ra Galilea cuví ra Jesús.

<sup>7</sup> Tan catyí nyívi tsihin ra tyin juvín. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quívi can nyí ra ñuu Jerusalén.

<sup>8</sup> Tan cuhva tsa nyehe ra Herodes tsi ra Jesús, sí xaan cuñí ra. Tyin tsanaha xaan cuñí ra nyehe ra tsi ra. Tyin ñihí tuhun ra tyin cuaha xaan tsa iyo javahá ra. Tan cuñí xaan ra nyehe ra iin tsa iyo tsa cua javaha ra Jesús.

<sup>9</sup> Tan cuaha xaan tsa nducú tuhun ra Herodes tsi ra Jesús. Maa tyin ra Jesús ña nacahan maa ra.

<sup>10</sup> Ican nyecú ndihí tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaa xaan ra naha cuatyí tsi ra Jesús.

<sup>11</sup> Tacan tan ra Herodes tsihin andaru cuenda ra, tsacú nducu ra naha tsi ra. Tan jacunditsi nuu ra naha iin jahma yahvi tan sí caá tsi ra Jesús, tumaa caá tsa tuhvá rey tsinditsí. Tacan tan jacuhun nyico ra Herodes tsi ra nda nu nyaá ra Pilato.

<sup>12</sup> Tan quívi can ra Pilato tsihin ra Herodes nduvahá iyó ra naha. Tyin nu quitsi quívi, ña cuví nyehé tahan ra naha tsi ra naha.

*Nu cutuñi ra Jesús tyin cua cúu ra (Mt. 27.15-26; Mr. 15.6-15; Jn. 18.39-19.16)*

<sup>13</sup> Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tsihin tandihí nyívi.

<sup>14</sup> Tan catyí ra tsihin ñi:

—Nyooho quitsi ndaca ndo tsi ra ihya nu nyaá yu. Tan catyí ndo tyin jatívi ra tsi nyívi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahan ndo can nañihí yu.

<sup>15</sup> Tan ndi ra Herodes tan ña nañihí ra ndi intuhun cuatyí ra. Yacan jaquitsi nyico ra tsi ra inga tsaha nu nyaá yu. Nyehé ndo tyin nduve cuatyí ra. Tan yacan ña taahán tsi tsa cúu ra.

<sup>16</sup> Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

<sup>17</sup> Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá.

<sup>18</sup> Maa tyin tandihí nyívi iin caa ñi caná tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

<sup>19</sup> Tan ra Barrabás can nyí ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyívi.

<sup>20</sup> Tan ra Pilato cuñí ra jaña ra tsi ra Jesús. Tan quitsahá caahán ra tsihin nyívi can inga tsaha tyin cua jaña ra tsi ra.

<sup>21</sup> Maa tyin nyívi tsaa ca caná tsaa ñi:

—¡Tyaa tsi ra nu cruu. Na cúu ra nu cruu!

<sup>22</sup> —¿Náa tsa ña vaha javahá ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

<sup>23</sup> Maa tyin nyívi caná tsaa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñí ñi tyin caná tsaa xaan ñi.



24 Tacan tan javahā ra Pilato cuhva cahan ñi.

25 Tan jaña ra tsi ra Barrabás, ra tsa nyii vehe caa tsa cuenda tsa cañi tahan ra tsihin ra cumi tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

*Nu tyaā ra naha tsi ra Jesús nu cruu (Mt. 27.32-44; Mr. 15.21-32; Jn. 19.17-27)*

26 Tacan tan quihin andaru tsi ra Jesús. Tan cuahán ra tsihin ra naha. Tan tiin tucu ra naha tsi iin ra ñuu Cirene nañi Simón. Ra ican ndi vatsi nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

27 Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú xaan ñi tsa cuihya cuñi ñi tsacatyí tundoho tahan ra.

28 Maa tyin ra Jesús nanyehē ra nuu ñi. Tan catyí ra tsihin ñi:

—Tandihí nyooho, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo.

29 Tyin cua quitsi quivi cua nyehe xaan ndo tundoho. Tan cua cahan nyivi tsi tandihí ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundoho nyehé yo vityin”, cua catyí ñi tsihin ndo.

30 Tyin quivi can cua cuñi ñi nduva yucu tsata ñi tan quihvi xeehe ñi.

31 Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

32 Tan quihin tucu andaru can naha ra tsi uvi taahan ra iyó cuatyí, tyin cahñi ndihí ra naha tsi ra naha iin caa ñi tsihin ra Jesús.

33 Tacan tan tsaā ra naha iin nu nañi Yiqui Jiñi Ndiyí. Tan ican tyaā ra naha tsi ra Jesús nu cruu. Tan tacan tyaā ndihí tucu ra naha tsi nduvi taahan ra iyó cuatyí can naha ra. Iin ra tyaā ra naha nuu cruu xiin cuaha ra

Jesús. Tan inga ra can tyaā ra naha nuu cruu xiin satyin ra.

34 Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tava ra naha suerte tsihin jahma ra Jesús, tyin nyehe ra naha ndáa ra cua jaha cana jahma can.

35 Tan nyivi nyecú ñi nyehé ñi. Tan ra cumi tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihí tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

36 Tan juvin ñi cahan nyaá ra andaru can naha ra tsi ra. Tan natuhva ra naha nu ticaá ra. Tan tsahā ra naha vinu iya tsihi ra.

37 Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

38 Tan jiñi cruu nu nyaá ra Jesús nyaá iin tsa tyaā ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

39 Tan iin ra tsa iyó cuatyí tsa nyaá nu cruu xiin ra Jesús, quitsahā caahán nyaa ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihí tsi nyuhu —catyí ra can.

40 Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin.

41 Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

42 Tacan tan catyí ra can tsihin ra Jesús:

—Yooho Jesús, nducuhun iñi tsi yu quivi cundaca ñaha un —catyí ra.

43 Tacan tan ra Jesús nacahan ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso [nu yucú añaima nyivi tsinú iñi tsi Nyoo] —catyí ra Jesús tsihin ra.

#### *Nu tsihi ra Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Tacan tan cuhva ora quitsaha ndunaá nu ñuhu ñayivi, nda cuanda caa uñi tsa tseñi.

<sup>45</sup> Tyin ndunaá ñicanyii. Tan jahma tsa ticaá tsitsi vehe ñuhu cahnu, ndata sava tsi.

<sup>46</sup> Tacan tan cana tsa ra Jesús tan catyí ra:

—Tyatya, Jutu yu, tyaa cuenda yu añaima yu ndaha un —catyí ra.

Tan cuhva tsa cahan ra tacan, tan tsihi ra.

<sup>47</sup> Tan ra cuví capitán cuenda andar can naha ra, nyehe ra tandihi tsa cuvi. Tan jacahnu ra tsi Nyoo, tan catyí ra:

—Nduve tsa cuii cuatyí ra ihya tsi-coo —catyí ra.

<sup>48</sup> Tan tandihi nyivi tsa nyecú ican, nyehe ñi tsa cuvi. Tan cuahán ñi tan quitsaha cañi ndaha ñi yiqui nyica ñi. Tyin tsitó ñi tyin ña vaha tsa javaha ñi tsihin ra Jesús.

<sup>49</sup> Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihi tsa cuvi can.

#### *Nu cua cutsi ra naha tsi ra Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Tan iyó iin ra vaha, nañi ra José. ra ñuu Arimatea tsa canyií Judea. Tan cuví ra iin ra cuví ityi nuu cuenda Junta Cahnu nyivi Israel.

<sup>51</sup> Tan ra José can ndatú ra quivi tsa cua cundaca ñaha Nyoo. Tan ña ndoo ra vaha tsihin tsa javaha ra cutahan tsihin ra, ra cuví jutu tsa cuví ityi nuu naha ra.

<sup>52</sup> Tacan tan tsahan ra José can tsindacan ra cuñu ñuhu ra Jesús tsi ra Pilato.

<sup>53</sup> Tan yaha tsa januu ra José can cuñu ñuhu ra Jesús nu cruu, cava nuu

ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cuví yavi yuu tsa javaha nyivi tan ñaha ca quihvi ndiyi tsitsi can.

<sup>54</sup> Tan viernes cuví can, quivi tsa janduvahá nyivi tsa catsi ñi tsa sabaru, quivi quitatú ñi. Tan tsa cua tahan tsi quivi can.

<sup>55</sup> Tan tandihi ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyií cuñu ñuhu ra.

<sup>56</sup> Tan cuanuhu ñi nda yuvehe ñi. Tan janduvaha ñi ndutya tami tyin cua tyihi ñi cuñu ñuhu ra Jesús. Tacan tan quitatú ñi inga quivi can tumaa catyí maa tuhun tsa tsaha cuenda Nyoo tsi yo.

## 24

#### *Nu nandoto ra Jesús*

(Mt. 28.1-10; Mr. 16.1-8; Jn. 20.1-10)

<sup>1</sup> Tsa tuví tumbingu quivi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvaha ñi.

<sup>2</sup> Tan cuhva tsa tsa ñi, nyehe ñi tyin tsa cuatsiyó yuu tsa ndasí yuhu ñaña can.

<sup>3</sup> Tan quihvi ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús.

<sup>4</sup> Tan yucú ñi tsihin tsa yuuhví ñi. Tan ña tsitó ñi náa cua javaha ñi. Tan sana iñi ñi quituvi uvi taahan rayi nuu ñi. Tan xiñu xaan jahma nditsí ra naha.

<sup>5</sup> Tan tsihin tsa yuuhví ñi, tan tsaquin ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi?

<sup>6</sup> Nduve ca ra nyii ihya, tyin tsa nandoto ra. Nducuhun iñi ndo tsa cahan ra tsihin ndo quivi tsicá ra Galilea.

<sup>7</sup> Catyi ra tyin taahan tsi nacuhva cuenda nyivi tsi ra ndaha ra iyó cuatyí naha ra. Tyin cuví ra Rayi tsa quee nda gloria. Tan taahan tsi tyin cahñi ra can naha ra tsi ra nu cruu.

Maa tyin tsa tsinu uñi quivi cua nan-doto ra. Tacan catyi ra tsihin ndo —catyi ángel can naha ra tsihin ñi.

<sup>8</sup> Tacan tan nducuhun iñi ñi tsa cahan ra Jesús quivi can.

<sup>9</sup> Tan cuanuhu ñi. Tan nacatyí tuhun ñi tsihin tsa utsi iin ra tsa tava tyiñu ra Jesús tan tsihin tandihi ca nyivi tsa tsinyicun tsi ra.

<sup>10</sup> Tan ñiñaha tsa tsicatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha.

<sup>11</sup> Maa tyin ra tava tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

<sup>12</sup> Maa tyin ra Pedro nduvita ra tan tsinú xaan ra cuahán ra cua nyehe ra tsitsi ñaña nu tinyii ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasi ña ra canyií nda sava. Tacan tan cuanuhu ra yuvehe nu yucú tandihi ca ra naha. Tan iyo xaan cuñi ra tsa cuvi.

*Tsa cuvi ityi cuahán ñuu Emaús  
(Mr. 16.12-13)*

<sup>13</sup> Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén.

<sup>14</sup> Tan cuahán ra naha tan natuhún tahan ra naha náa ndihi tsa cuvi.

<sup>15</sup> Tan tsitsi tsa natuhún ra naha, tan ra Jesús tahan ra tsi ra naha ityi cuahán ra naha.

<sup>16</sup> Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús.

<sup>17</sup> Tacan tan nducu tuhun ra Jesús tsi ra naha:

—¿Náa natuhún xaan ndo? ¿Nacuenta cuihya xaan cuñi ndo? —catyi ra tsihin ra naha.

<sup>18</sup> Tan iin ra tsa nañi Cleofas nahan ra tan catyi ra:

—Tandihi nyivi tsitó tsa cuvi ñuu Jerusalén. ¿A ra inga ñuu cuví yooho tyin ña tsitó un tsa cuvi? —catyi ra.

<sup>19</sup> Tacan tan catyi ra Jesús tsihin ra naha:

—¿Náa cuvi?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuvi ra iin ra cuvi ndusu yuhu Nyoo. Tan tsihin tunyee iñi cahnu Nyoo javaha ra tsa cahnu tan cahan ra tsa vaha nuu Nyoo tan nuu tandihi nyivi.

<sup>20</sup> Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsaha cuenda ra naha tsi ra tsi ra ndacá ñaha cuenda ñuu Roma. Tan tsahñi ra naha tsi ra. Tan tsihi ra nu cruu.

<sup>21</sup> Tan vityin tsa quita uñi quivi tsa cuvi yacan. Tan nyuhu cuñi maa ndi tyin juvin ra cua jacacu tsi yo tsa cuvi yo nyivi Israel.

<sup>22</sup> Maa tyin vityin iyo xaan cuñi ndi tsa nacatyí juhva ñiñaha tsihin ndi. Tyin maa ñi tsahan ñi nu ñaña ra tsa tuvi.

<sup>23</sup> Tan nduve ca cuñu ñuhu ra canyií. Tan nacatyí tuhun ndihi ñi tyin nyehe ñi uvi taahan ángel. Tan catyi ángel can naha ra tsihin ñi tyin ra Jesús nyito ra.

<sup>24</sup> Yaha yacan tan tsahan tucu juhva ra cutahán tsihin ndi tsinyehe ra naha nu ñaña. Tan nyehe ra naha tyin tsa nditsa cuví tsa cahan ñiñaha can. Maa tyin ña nyehe ra naha tsi ra Jesús —catyi ra naha tsihin ra Jesús.

<sup>25</sup> Tacan tan catyi ra Jesús tsihin ra naha:

—Luxu xaan cutuñi iñi ndo. Tan cuee xaan tan tsinu iñi ndo tuhun tsa cahan ra cuvi ndusu yuhu Nyoo tahan tsanaha.

<sup>26</sup> ¿A ña tsitó ndo tyin taahán tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —catyi ra Jesús tsihin ra naha.

<sup>27</sup> Tacan tan quitsaha tsahá cuenda ra nácaa cuahán tuhun maa ra nu tutu Nyoo. Tan quitsaha caahán ra tuhun tsa tyaa ra Moisés tahan tsanaha. Tan yaha can tan cahan ra tuhun tandihi libru tsa tyaa ra cuvi ndusu yuhu Nyoo.

28 Tan cuhva tsa tsaꝯ ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra.

29 Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoꝯ tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha.

30 Tan cuhva tsa tsinyaa ra yuhu mesa tsihin ra naha, quihín ra paan. Tan tsaha ra tyahvi nyoo tsi Nyoo. Tan tsahnu sava ra, tan tsaha ra tsi ra naha.

31 Tan iin yaha ñi nuña nuu ra naha tan nacoto ra naha tsi ra Jesús. Maa tyin ra Jesús naꝯ ihñi ñi ra.

32 Tacan tan quitsaha natuhún tahan ra naha tan catyí ra naha:

—Yacan cuenda vaha xaan cuñi añaima yo tsa vatsí ra tsihin yo, tan tsahá cuenda ra tuhun Nyoo tsa nyaá nu tutu Nyoo tsi yo —catyí ra naha.

33 Ña ndatu ca ra naha, tan cuanuhu ra naha nda ñuu Jerusalén. Tan ñihí tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha.

34 Tacan tan tsa utsi iin ra can naha ra nacatyí tuhun ra naha tsihin ra tsa ndi tsaꝯ can naha ra:

—Nditsa tyin Jutu Mañi yo nandoto ra. Tyin ra Simón nyehé ra tsi ra —catyí ra naha.

35 Tacan tan ra tsa ndi tsaꝯ can nacatyí tuhun ndihí ra naha nácaa natuhun ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnu sava ra paan.

*Nu quituvi ra Jesús nu yucú ra tsica tsihin ra*

(Mt. 28.16-20; Mr. 16.14-18; Jn. 20.19-23)

36 Ndi natuhún ca ra naha yacan tan quituvi ra Jesús tyañu ra naha. Tan tsaha ra nacumi tsi ra naha, tan catyí ra:

—Na coo tsa vaha añaima ndo.

37 Tacan tan nayuhvi xaan ra naha. Tan cuñi ra naha tyin tatyí ndiyi cuví can.

38 Tacan tan catyí ra Jesús tsihin ra naha:

—¿Nacuenda yuuhvi xaan ndo? ¿Tan nacuenda tsicá xaan iñi ndo?

39 Nyehé ndo ndaha yu. Tan nyehé ndo tsaha yu. Tyin juvin ñi maa yu cuví. Tñin ndo tsi yu tan coto ndo. Tyin tatyí ndiyi nduve cuñu ñuhu can iyó. Tan nduve yiqui can tumaa tsa nyehé ndo tsi yuhu —catyí ra Jesús.

40 Tan cuhva tsa cahan ra yacan, tan janaha ra ndaha ra tsihin tsaha ra tsi ra naha.

41 Maa tyin maa ra naha, tsa cuenda tsa iyo cuñi ra naha tan sii cuñi ra naha, nda cuanda ña cuví ca tsinú vaha iñi ra naha. Yacan nacahan ra Jesús tsihin ra naha:

—¿A iyó tsa catsi yo? —catyí ra.

42 Tacan tan tsaha ra naha luxu tyaca tyihyo tsihin ndutya ñuñu tsi ra.

43 Tan quihín ra. Tan quitsaha tsatsí ra nu nyecú ra naha.

44 Tan catyí ra tsihin ra naha:

—Tandihí tsa tahan yu, yacan cuví tsa catyí yu tsihin ndo quivi can. Tan catyí yu tsihin ndo tyin tacan cua cuví, tumaa cuhva nyaá tuhun tsa tyaa ra Moisés tan ra cuví ndusu yuhu Nyoo tan tsihin tsa nyaá nu libru salmo —catyí ra tsihin ra naha.

45 Tacan tan tsaha cuenda ra Jesús cuhva catyí nu tutu Nyoo. Tan cutuñi iñi tandihí ra naha jahá ra.

46 Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quivi cua nandoto ra.

47 Tan taahán tsi coto nyivi tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahan ra naha tsihin sivi ra Cristo ñuu Jerusalén, yaha can tan tandihí ca ñuu tanií cahnu nu ñuhu ñayivi.

48 Tan catyí tucu ra Jesús tsihin ra naha:

—Tan nyoocho cuví tsandaa tsa cuenda tandihí tsehe.



<sup>49</sup> Tan cua jaquitsi maa yu Tatyí li Nyoo síqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

*Nu cuanuhu ra Jesús gloria*

*(Mr. 16.19-20)*

<sup>50</sup> Tacan tan ra Jesús cuahán ra tsihin tandihí ra tsica tsihin ra nda ñuu Betania. Tan cañihí ra ndaha ra. Tan nasocó ra tsi ra naha.

<sup>51</sup> Tan tsitsi tsa nasocó ra tsi ra naha, nandaá ra andiví.

<sup>52</sup> Tacan tan tandihí ra naha quit-saha jacahnú ra naha tsi ra. Tan sii xaan cuñí ra naha, cuanuhu ra naha nda ñuu Jerusalén.

<sup>53</sup> Tan tandihí quiví tsiyucú ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuví tsi tacan ñi.

## Tuhun Nyoo tsa Tyaa Ra Juan

*Tuhun tsa Caahán Nyoo nanduvi tsi iin rayi, tan rayi can cuví ra Cristo*

<sup>1</sup> Nda quivi jihna ñi, nda ndi cumañi ca coo tandihi tsa iyó, tan tsa iyó maa ra cuví Tuhun tsa Caahán Nyoo. Nyí ra tsihin Nyoo. Tan Nyoo cuví ra.

<sup>2</sup> Tan iyó ra tsihin Nyoo nda quivi jihna ñi.

<sup>3</sup> Tan tsihin ra, javaha Nyoo tandihi cuii maa tsa iyó. Tan nduve tsa javaha Nyoo tsa intuhun ñi maa ra.

<sup>4</sup> Ra tsa cuví Tuhun tsa Caahán Nyoo iyó ñayivi nyito tsa ña cua naa maa tsi ra. Tan juvin ñayivi can, cuví ñuhu tsa jandunditsín aña nyivi.

<sup>5</sup> Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

<sup>6</sup> Tsicoo iin ra tsa jaquitsi Nyoo, nañi ra Juan.

<sup>7</sup> Quitsi ra cuví ra tsa ndaa. Tyin cahan ra tumañi iñi cuenda ra cuví ñuhu can, tyin tacan tan tsinu iñi tandihi nyivi tsi ra.

<sup>8</sup> Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra.

<sup>9</sup> Tyin ñuhu nditsa can, ndi cua quitsi tsi nu ñuhu ñayivi, tan cua jandunditsín tsi aña tandihi nyivi tsa iyó nu ñuhu ñayivi ihya.

<sup>10</sup> Ra cuví Tuhun tsa Caahán Nyoo quitsi ra nu ñuhu ñayivi. Tan juvin ñi maa ra tsihin Jutu ra javaha ra naha ñuhu ñayivi. Maa tyin nyivi iyó nu ñuhu ñayivi ihya, ña nacoto ñi tsi ra tsa ra Cristo cuví ra.

<sup>11</sup> Quitsi ra nu iyó nyivi ñuu ra, nyivi Israel, tan ña naquihin vaha ñi tsi ra.

<sup>12</sup> Maa tyin tandihi nyivi tsa naquihin vaha tsi ra, tan tsinú iñi ñi tyin ra Cristo cuví ra, tsaha ra ndatu tsi ñi tsa cuví ñi sehe Nyoo.

<sup>13</sup> Juvin ñi nacacu tsa. Maa tyin ñavin tumaa tsa cacu ñi tsa culee ñi cuenda cuña ñuhu ñi. Tan ndi ñavin

tsa cuenda tsa cuñi iin rayi coo ra tsihin iin ñaha. Ñavin tsa cuenda tsa cuñi nyivi coo sehe ñi. Maa tyin nacacu tsa ñi jahá maa Nyoo.

<sup>14</sup> Tan ra cuví Tuhun tsa Caahán Nyoo nanduvi ra iin rayi. Tan tsicoo ra tsihin yo. Tan nyehe ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsi tu ra tsihin tsa nditsa tan tsa vaha.

<sup>15</sup> Tan ra Juan can cahan ra tumañi iñi tsa cuenda ra, tan catyí ra:

—Juvín ra ihya cuví ra tsa cahan yu tuhun quivi can, tyin ra tsa vatsi ityi tsata yu, cahnu ca cuví ra tan ñavin ca maa yu. Tyin nda quivi cacu yu tan tsa iyó maa ra —catyí ra Juan.

<sup>16</sup> Tandihí yo naquihín yo tumañi iñi cahnu tsa tsahá ra tsi yo, tyin nasocó xaan ra tsi yo.

<sup>17</sup> Ra Moisés tsaha cuenda ra ley Nyoo tsi yo. Maa tyin ra Jesucristo tsahá ra tsa naquihin yo tsa vaha Nyoo. Tan caahán ra tsa nditsa tsihin yo.

<sup>18</sup> Tan nduve maa yoo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

*Nu caahán ra Juan, ra jacoondutyá, tumañi iñi cuenda ra Jesucristo*

*(Mt. 3.11-12; Mr. 1.7-8; Lc. 3.15-17)*

<sup>19</sup> Ra cuví ityi nuu tsihin nyivi Israel tsa iyó ñuu Jerusalén, tava tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cahun ra naha nu nyí ra Juan tan ndaca tuhun ra naha tsi ra yoo ra cuví ra.

<sup>20</sup> Tan tsica tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihí xeehe ra.

<sup>21</sup> Tacan tan tsica tuhun nyico ra naha tsi ra Juan:

—¿Yoo ra cuví un? ¿A ra Elías, ra cuví ndusu yuhu Nyoo tahañ tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicá tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

<sup>22</sup> Tan tsicá tuhun nyico ra naha tsi ra Juan inga tsaha:

—¿Yóo ra cuví un? Tyin cuñí tsi catyí tuhun ndi tsihin ra tsa tava tyiñu tsi ndi yóo ra cuví un —catyí ra naha tsihin ra.

<sup>23</sup> Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tumaa cahan ra Isaías ra cuví ndusu yuhu Nyoo tuhun yu tahañ tsanaha —catyí ra Juan tsihin ra naha.

<sup>24</sup> Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan.

<sup>25</sup> Tan tsicá tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuvi tyin jacoondutyá un tsi nyivi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

<sup>26</sup> Tan nacahan ra Juan tan catyí ra: —Yuhu jacoondutyá yu tsi nyivi tsihin ndutya. Maa tyin mahñu ndo nyii iin ra tsa ña nacotó ndo.

<sup>27</sup> Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuvi ndatsi yu ñi nditsan ra —catyí ra Juan.

<sup>28</sup> Tandihí yacan cuví nu nañí Betábara tsa canyí inga tsiyo yutya cahnu Jordán nu tsinyí ra Juan jacoondutyá ra.

*Ra Jesucristo, Mbee Ticyi Luhlu jana Nyoo*

<sup>29</sup> Tsa inga quivi nyehe ra Juan tsi ra Jesús cuahán ra nu nyii ra, tacan tan catyí ra Juan:

—Nyehe jihna ndo, ra ihya cuví Mbee Ticyi Luhlu jana Nyoo ra tsa

quihín nyaá cuatyí nyivi iyó nu ñuhu ñayivi ihya.

<sup>30</sup> Tuhun ra cahan yu quivi catyí yu tsihin ndo tyin ityi tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu.

<sup>31</sup> Ndi yuhu tan ña nacoto yu tsi ra quivi can. Maa tyin vityin vatsí yu jacoondutyá yu tsihin ndutya tyin tacan tan nacoto nyivi Israel ñuu yu tsi ra —catyí ra Juan.

<sup>32</sup> Tan catyí nyico ra Juan:

—Yuhu nyehe yu Tatyí Ii Nyoo tsa quitsi ityi andivi tan quitsi tsi tumaa iin paloma, tan ndoo tsi tsihin ra.

<sup>33</sup> Yuhu ñaha ca nacoto yu yóo ra cuví ra quivi can. Maa tyin Nyoo, ra tsa tava tyiñu tsi yu jacoondutyá yu tsi nyivi tsihin ndutya, catyí ra tsihin yu: “Quivi nyehe un Tatyí Ii, vatsí nuú tsi siqui iin rayi, tan ndoo tsi tsihin ra, juvin ra can cuví ra tsa cua jacoondutyá tsi nyivi tsihin Tatyí Ii yu”, catyí Nyoo tsihin yu.

<sup>34</sup> Yuhu tsa yaha nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

*Ra tsa quitsaha nyicún jihna tsi ra Jesús*

<sup>35</sup> Tsa inga quivi nyii nyico ra Juan nu nyii ra tan yucú ndihí uvi taahan ra tsicá tsihin ra.

<sup>36</sup> Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticyi Luhlu jana Nyoo —catyí ra.

<sup>37</sup> Tsa tsiñi nduvi taahan ra nyicún tsi ra Juan tsa cahan ra, tacan tan cuahan ra naha cuanyicun ra naha tsi ra Jesús.

<sup>38</sup> Tacan tan nanyehe ra Jesús ityi tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahan ra naha tan catyí ra naha:

—Maestro, ¿numaa iyó un?

<sup>39</sup> Tan catyí ra Jesús tsihin ra naha: —Cohon ndo tsihin yu, tan nyehe ndo —catyí ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaá ra naha ndacan tumaa caa cumi tsa tseñi.

<sup>40</sup> Iin ra tsa tsiñi tsa cahan ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro.

<sup>41</sup> Tan ra Andrés numi xaan tsinanducu ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñí tsi catyí, ra Cristo, o cuñí tucu tsi catyí, ra tsa nacatsi vaha Nyoo tyin quitsi ra cuvi ra rey tsa cuenda yo.

<sup>42</sup> Tacan tan quihin ra Andrés tsi ra Simón yañi ra cuahán tsihin ra nu nyí ra Jesús. Tsa nyehe ra Jesús tsi ra Simón, tan catyí ra tsihin ra:

—Yoohe Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñí tsi catyí tsi “Pedro”, tan tsa nduvi sivi can, cuñí tsi catyí tsi “cava”, [tuma iin yuu cahnu].

### *Nu cana ra Jesús tsi ra Felipe tan ra Natanael*

<sup>43</sup> Tsa inga quivi tyaa ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quitsi nyicun un tsi yu —catyí ra.

<sup>44</sup> Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro.

<sup>45</sup> Tacan tan tsahan ra Felipe tsinanducu ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahan tucu ra cuvi ndusu yuhu Nyoo tuhun tahañ tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

<sup>46</sup> Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahan ra Felipe tan catyí ra: —Naha tan nyehe un —catyí ra.

<sup>47</sup> Tacan tan tsa cua cuyatyin ra Natanael nu nyí ra Jesús. Tan nanyehe ra Jesús tyin vatsí ra, tan quitsaha catyí ra:

—¡Jihna ndo! Ihya vatsí iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

<sup>48</sup> Tacan tan tsica tuhun ra Natanael tsi ra:

—¿Nacaa tsa tsitó un tsi yuhu?

Tan nacahan ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyí un tsaha yutun higo can —catyí ra Jesús tsihin ra.

<sup>49</sup> Tacan tan quitsaha catyí ra Natanael:

—Jutu Mañi yu, yoohe cuví Sehe Nyoo. Tan juvin un cuví rey cuenda nyuhu tsa cuví yo nyivi Israel.

<sup>50</sup> Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaha yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

<sup>51</sup> Tan catyí ra Jesús tsihin ra naha:

—Tsa nditsa catyí yu tsihin ndo tyin nyoohe cua nyehe ndo cua nuña andivi tan cuaha xaan ángel Nyoo cua ndaa, tan cua nuu ra naha siqui yuhu Rayi tsa quee nda gloria —catyí ra Jesús tsihin ra naha.

## 2

### *Nu iyó vico tindaha ñuu Caná iin ñuu tsa canyí Galilea*

<sup>1</sup> Tsa yaha uñi quivi tan tsicoo iin vico tindaha ñuu Caná tsa canyí Galilea. Tan ican nyí sihi ra Jesús.

<sup>2</sup> Tan nyivi javaha vico can cana ndihi ñi tsi ra Jesús tan tsihin tandihi ra tsicá tsihin ra tyin cuhun ra naha.

<sup>3</sup> Tacan tan cuahán ra naha. Tan tsitsi tsa yucú ra naha nu iyó vico can, tan ndihí vinu ñi javaha vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.



<sup>4</sup> Tan catyí ra Jesús tsihin ña:  
—¿Náa tsa ndihi iñi yo yacan, Miyan? Tyin ñaha ca tsaa hora yu —catyí ra tsihin ña.

<sup>5</sup> Maa tyin sihi ra cahān ña tsihin ra tsa tyihí mesa nu iyó vico can naha ra:

—Javaha nyooho tandihi tsa cua cahān ra tsihin ndo —catyí ña tsihin ra naha.

<sup>6</sup> Tan nyecú iñu quisi yuu nahnu tsa yihí ndutya tsa tuhvá ra Israel naha ra tsatyíñú nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can.

<sup>7</sup> Tacan tan catyí ra Jesús tsihin ra tsa tyihí mesa can naha ra:

—Jacutu ndo quisi ihya tsihin ndutya —catyí ra tsihin ra naha.

Tacan tan tsitū cuii quisi can jahā ra naha.

<sup>8</sup> Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan iča ra naha.

<sup>9</sup> Ra cuví ityi nuu cuenda vico can tsihi ra naha ndutya tsa nanduvi vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can canā ra tsi ra tsa tandaha can.

<sup>10</sup> Tan catyí ra tsihin ra:

—Tandihí nyivi, jihna ca vinu vaha tuhvá ñi tava. Yaha can tan tatun tsa tsihi xaan nyivi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tsihin ra.

<sup>11</sup> Tsa javahā ra Jesús ñuu Caná tsa canyii Galilea, yacan cuví tsa iyo tsa jihna ñi javahā ra tan janahā ra tsa cahnu cuví ra tsi nyivi. Tan ra tsicá tsihin ra tsinu iñi ra naha tsi ra tyin ra ican cuví ra tsa jaquitsi Nyoo.

<sup>12</sup> Tsa yahā yacan tan cuahān ra ñuu Capernaum tsihin sihi ra tan tsihin

yañi ra. Tan cuahan ndihi ra tsicá tsihin ra. Tan ican tsiyucu ñi juhva quivi.

*Nu jacunu ra Jesús tsi nyivi xicó nuquehe yuvehe ñuhu cahnu*

(Mt. 21.12-13; Mr. 11.15-18; Lc. 19.45-46)

<sup>13</sup> Tsa cua tahan tsi quivi vico pascua tsa jacahnú nyivi Israel. Yacan cuenda cuahān ra Jesús ñuu Jerusalén.

<sup>14</sup> Tsa tsaā ra ñuu can, quihvi ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiqui, mbee ticatyí, tan paloma. Tan yucú ndihi tucu nyivi nasamá xuhun.

<sup>15</sup> Tsa nyehe ra Jesús tandihi yacan, tacan tan javahā ra iin yoho. Tan tsihin yoho can jacunu ra tsi tandihi nyivi nuquehe vehe ñuhu iin cahnu ñi tsihin mbee tan tsihin indiqui jana ñi. Tan ñi nasamá xuhun can, jatucuatyi ra xuhun ñi nu ñuhu tan janduvā ra mesa ñi.

<sup>16</sup> Tan catyí ra tsihin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tsihin ñi.

<sup>17</sup> Tacan tan ra tsicá tsihin ra, nducuhun iñi ra naha tsa catyí nu tutu Nyoo tyehen: “Cuiñu xaan yu vehe un”, catyí tsi, nducuhun iñi ra naha.

<sup>18</sup> Tacan tan ra cuví ityi nuu tsihin nyivi Israel quitsahā tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsahā Nyoo ndatu tsi un tsa javaha un yacan? —catyí ra naha tsihin ra.

<sup>19</sup> Tan nacahān ra Jesús tan catyí ra:

—Caní ndo vehe ñuhu ihya, tan tsitsi tsa uñi quivi ñi tan cua janduvita nyico yu itsi inga tsaha —catyí ra tsihin ra naha.

<sup>20</sup> Tacan tan quitsahā catyí ra nyecú ican naha ra tsihin ra:

—Uvi xico iñu cuiya jahā tyiñu ra naha tan tsinu vehe ñuhu ihya. ¡Tan yooho catyí un tyin tsitsi tsa uñi

quíví ñi tan cua janduvita un itsi inga tsaha! —catyí ra naha tsihin ra.

<sup>21</sup> Maa tyin ñavin tuhun vehe ñuhu can cahan ra Jesús, tyin cahan ra tuhun cuñu ñuhu ra.

<sup>22</sup> Yacan cuenda tandihí ra tsicá tsihin ra nducuhun iñi ra naha yacan quíví nandoto ra. Tan cutuñi iñi ra naha tyin tuhun tsa nyaá nuu tutu Nyoo caahan tsi cuenda ra Jesús. Tan tsinu iñi ra naha tsa cahan ra Jesús tan tsa nyaá nu tutu Nyoo.

*Ra Jesús tsitó ra tsa iyó aña nyivi*

<sup>23</sup> Tsitsi tsa ndi nyí ra Jesús ñuu Jerusalén, quíví iyó vico pascua, cuaha xaan nyivi quitsaha tsinú iñi tsa caahan ra tsa cuenda tsa cuaha tsa iyo javaha ra.

<sup>24</sup> Maa tyin ra Jesús ña ñi cuñi ra nyehé ra tsi tandihí ñi tyin tsitó ra cuhva tsicá iñi ñi.

<sup>25</sup> Ña tsiñiñuhú tsa nacatyí tuhun yo tsihin ra nácaa iyó nyivi, tyin tsa tsitó maa ra náa iyó tsitsi aña yo.

### 3

*Nu jacuaha ra Jesús tsi ra Nicodemo*

<sup>1</sup> Tsicoo iin ra cuví fariseo tsa nañi Nicodemo. Tan cuví ra iin ra cuví ityi nuu tsihin ra Israel naha ra.

<sup>2</sup> Ra Nicodemo ihya, tsahan ra nu nyí ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tava tyiñu tsi un tsa quitsi un jacuaha un tsi ndi. Tyin yoñi nyivi tan cuví javaha ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

<sup>3</sup> Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsa nyivi inga tsaha, ña cua cuví nyehe ñi nu ndacá ñaha Nyoo —catyí ra.

<sup>4</sup> Tacan tan tsicá tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsa ra inga tsaha? —catyí ra.

<sup>5</sup> Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñi tsi nacacu tsa ñi tsihin Tatyí Ii Nyoo.

<sup>6</sup> Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsa tsihin Tatyí Ii Nyoo, Tatyí Ii Nyoo iyó aña ñi.

<sup>7</sup> Ña cu iyo iñi un tsa caahan yu tsehe tsihin un tyin tandihí nyivi cuñi tsi nacacu tsa ñi.

<sup>8</sup> Tuma tsa yihí tatyí tandihí ñi ityi tan tsiñi un cucayú vatsí tsi, maa tyin ña tsitó un numaa ityi quee tsi, tan ndáa ityi cuahan tsi; tacan cuví tandihí nyivi nacacu tsa tsihin Tatyí Ii Nyoo —catyí ra Jesús tsihin ra.

<sup>9</sup> Tacan tan nducu tuhun nyico ra Nicodemo tsi ra inga tsaha tan catyí ra:

—¿Nacuenda caahan un tacan? —catyí ra tsihin ra.

<sup>10</sup> Nacahan ra Jesús tan catyí ra:

—Yooho tsa cuví un maestro cuenda nyivi Israel, taahan tsi coto un tsehe.

<sup>11</sup> Tsa nditsa catyí yu tsihin un tyin caahan ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú iñi ndo tsa caahan ndi tsihin ndo.

<sup>12</sup> Tatun ña tsinú iñi ndo tsa caahan yu tuhun nu ñuhu ñayivi ihya tsihin ndo, ¿nácaa cua tsinu iñi ndo tatun cua cahan yu tuhun gloria tsihin ndo?

<sup>13</sup> Yoñi tsahan gloria tsinyehe nácaa iyó. Intuhun ñi maa yuhu Rayi tsa quee nda gloria nyehe yu nácaa iyó gloria, tyin ndacan quee yu.

<sup>14</sup> Tuma tsa ticaa ra Moisés iin coo tsa tsinu tsihin caa nu yutun iin nu tsiqui, tacan cua ticaa nyivi tsi yuhu Rayi tsa quee nda gloria nuu cruu.

<sup>15</sup> Tacan tan tandihí nyivi tsa tsinú iñi tsi yu, ña cua cunaa ñi. Tan cua coo ñi ñayivi nyito tsa ña cua naa maa.

*Nyoo cuñi xaan ra tsi tandihí nyivi*

<sup>16</sup> Nyoo cuñi xaan ra tsi tandihí nyivi iyó nu ñuhu ñayivi. Yacan

cuenda tsaha ra tsa cúu Sehe mañi ra nu cruu tsa cuenda ñi. Tyin tacan tan tandihí ñi tsa tsinú iñi tsi Sehe ra, ña cunaa ñi, tan coo ñi ñayivi nyito tsa ña cua naa maa.

<sup>17</sup> Tyin Nyoo jaquitsi ra tsi Sehe ra nu ñuhu ñayivi tyin jacacu ra tsi nyivi, tan ña jaquitsi ra tsi ra tsa jacunaa ra tsi ñi.

<sup>18</sup> Yacan cuenda nyivi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyivi tsa ña tsinú iñi tsi yu, tsa cunaa ñi tyin ña tsinú iñi ñi tsi yu tsa cuví yu Sehe mañi Nyoo.

<sup>19</sup> Nyivi ña tsinú iñi, tsa cunaa ñi. Tyin quivi quitsi yu jandunditsin yu nu ñuhu ñayivi, ña naquihin cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi.

<sup>20</sup> Tandihí nyivi javahá tsa ña vaha, ña taahán iñi ñi coo ñi nu nditsin, tyin ña cuñi ñi tsa quituvi tsa ña vaha javahá ñi.

<sup>21</sup> Maa tyin nyivi taahán iñi tsa nditsa, naquitá ñi nu nditsin tyin tacan tan nyehe nyivi tyin javahá ñi cuhva cuñi Nyoo tyin nyaá ra tsihin ñi —catyí ra Jesús.

### *Nu caahán ra Juan, ra jacoondutyá tsi nyivi, tuhun ra Jesús inga tsaha*

<sup>22</sup> Tsa yaha yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quivi, tyin jacoondutyá ra naha tsi nyivi.

<sup>23</sup> Tacan tucu ra Juan nyii ra jacoondutyá ra tsi nyivi nu cuví Enón yatyin ñi nu cuví Salim, tyin ican ñuhú cuaha ndutya. Tan tsaá nyivi tan tsicoondutyá ñi.

<sup>24</sup> Yacan javaha ra Juan tsa ndi cumañi ca quihvi ra vehe caa.

<sup>25</sup> Tacan tan quitsaha caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyivi tsi ñi nuu Nyoo.

<sup>26</sup> Tacan tan cuahán ra naha nu nyii ra Juan. Tan catyí ra naha tsihin ra:

—Maestro, ra tsa tsinyij tsihin un inga tsiyo yutya cahnu Jordán, ra

tsa cahan un tuhun tsihin ndi, vi-tyin jacoondutyá ndihí ra tsi nyivi tan tandihí nyivi nyicún tsi ra —catyí ra naha tsihin ra.

<sup>27</sup> Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tunyee iñi ra tsi yo.

<sup>28</sup> Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahan yu quivi catyí catsi yu tyin ra jaquitsi Nyoo ityi nuu ra Cristo cuví yu.

<sup>29</sup> Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyii ra ican. Tan cusii iñi ra tsiñi ra tsa caahán ra tsa cua tindaha. Tan tacan tucu yuhu, sii cuñi yu tyin naquihín nyivi tuhun caahán ra Jesús tan nyicún ñi tsi ra.

<sup>30</sup> Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

### *Ra quee nda gloria tan quitsi ra nu ñuhu ñayivi*

<sup>31</sup> Ra tsa quee nda gloria, cahnu ca cuví ra tan ñavin ca tandihí nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví ra.

<sup>32</sup> Tan caahán ra tsa nyehé ra tan tsa tsiñi ra, maa tyin yoñi tsinú iñi tsa caahán ra.

<sup>33</sup> Tatun yoo tan tsinú iñi yo tsa caahán ra, cua cuví yo tsa ndaa tyin Nyoo ña vatya ra.

<sup>34</sup> Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí Ii ra tan tsaha ra itsi tsi ra. Tsaha ra nani Tatyí Ii ra tsi ra.

<sup>35</sup> Nyoo Jutu yo cuñi ra tsi Sehe ra. Tan nacuhva cuenda ra tandihí maa tsi ra.

<sup>36</sup> Nyivi tsa tsinú iñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñi tsinu iñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

## 4

*Nu natuhun ra Jesús tsihin iin ñaha Samaria*

<sup>1</sup> Tsa tsitō ra cuví fariseo naha ra tyin cuaha xaan ca nyivi nyicún tsi ra Jesús tan ñavin ca ra Juan. Tan cuaha xaan ñi tsicoondutya.

<sup>2</sup> Maa tyin ñavin maa ra Jesús jacoondutyá tsi ñi, tyin ra tsicá tsihin ra jacoondutyá tsi ñi.

<sup>3</sup> Tan quivi tsa tsitō ra Jesús tyin tsitō ra naha yacan, quee ra Judea can tan cuanuhu ra nda nu cuví Galilea.

<sup>4</sup> Tsa cuahán ra, yaha ra nu cuví Samaria tyin cuñí tsi yaha ra ican.

<sup>5</sup> Tacan tan tsaá ra iin ñuu tsa canyí Samaria tsa nañí Sicar yatyin ñi nu cuví ñuhu ra Jacob nu tsaá ra tsi ra José sehe ra.

<sup>6</sup> Ican nyaá iin soco pila tsa catyí nyivi tyin tsii ra Jacob cuví. Tsa quita ra Jesús nu nyaá soco can tan tsinyaa ra yuhu soco can tyin tatu xaan ra tyin cañi xaan ityi tsicá ra tan maa hora cuví.

<sup>7-8</sup> Ra tsicá tsihin ra, yofni ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaá iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

<sup>9</sup> Tacan tan ñaha Samaria can catyí ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tsihin nyivi Samaria.)

<sup>10</sup> Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

<sup>11</sup> Tacan tan catyí ña tsihin ra:

—Tatta, cunu xaan soco ihya. ¿Naca tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu?

<sup>12</sup> Ra Jacob tsii tsahnu yo, nacoo ra soco ihya tsi ndi. Juvín ihya tsihi maa ra ndutya tan tsihin tandihi sehe ra. Tan juvín ñi ihya tsihi tucu quiti jana ra naha. ¿A cahnu ca ra cuví yooho tan ñavin ca ra can? —catyí ña tsihin ra.

<sup>13</sup> Tacan tan nacahan ra Jesús tan catyí ra tsihin ña:

—Tandihí nyivi tsihi ndutya ihya, cua na ityi nyico iñi ñi.

<sup>14</sup> Maa tyin nyivi tsihi ndutya tsa tsahá yuhu, ña cua na ityi ca iñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tsihin ña.

<sup>15</sup> Tacan tan quitsaha caahán ña tsihin ra:

—Yooho tatta, cuhva ndutya can coho yu na ña na ityi ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

<sup>16</sup> Tacan tan catyí ra Jesús tsihin ña: —Cuahan cua quihin yí un tan quitsi ndo —catyí ra tsihin ña.

<sup>17</sup> Tan nacahan ña tan catyí ña: —Nduve yí yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve yí un iyó.

<sup>18</sup> Tyin tsa uhun yí un tsicoo, tan ra cumí tsi un vityin ñavin yí un tsi ra. —catyí ra tsihin ña.

<sup>19</sup> Tsa tsiñi ña tsa cahan ra tacan, quitsaha catyí ña tsihin ra:

—Yooho tatta, tuvé iñi yu tyin ra cuví ndusu yuhu Nyoo cuví un.

<sup>20</sup> Tsii tsahnu ndi, ra ñuu ihya naha ra, jacahnu ra naha tsi Nyoo yucu ihya. Maa tyin nyooho tsa cuví nyivi Israel catyí ndo tyin nda Jerusalén taahán tsi jacahnu yo tsi Nyoo —catyí ña tsihin ra.

<sup>21</sup> Tacan tan nacahan ra Jesús tan catyí ra tsihin ña:



—Tsinu iñi tsa caahán yu tsihin un. Tyin vatsí hora tsa cua jacahnu ndo tsi Jutu yo Nyoo. Maa tyin ña tsiñiñuhú ca tsa quitsi ndo yucu ihya, a cuhun ndo nda Jerusalén.

<sup>22</sup> Nyooho nyivi Samaria, ña tsitó ndo yóo jacahnú ndo. Maa tyin nyuhu tsitó ndi yóo jacahnú ndi. Tan tsitó ndi tyin cua jacacu iin ra Israel tsi nyivi jaha Nyoo.

<sup>23</sup> Maa tyin cua tsaa hora, tan hora can iyó yo vityin tyin nyivi tsa nditsa jacahnú tsi Nyoo Jutu yo, cua jacahnu ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí li Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra.

<sup>24</sup> Tyin Nyoo Tatyí li cuví ra. Tan nyivi jacahnú tsi ra cuñi tsi jacahnú ñi tsi ra tsihin tsa nditsa tumaa jaquihín ityi maa Tatyí li tsi ñi —catyí ra tsihin ña.

<sup>25</sup> Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quivi quitsi ra, maa ra cua nacatyí tuhun tandihi tsihin yo —catyí ña tsihin ra.

<sup>26</sup> Tacan tan nacahan ra Jesús tan catyí ra tsihin ña:

—Ra tsa caahán un tuhun can, juvin ra caahán tsihin un —catyí ra tsihin ña.

<sup>27</sup> Tacan tan tsaá nyico ra tsicá tsihin ra, tan iyo xaan cuñi ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñi ra, o ndaca tuhun ra naha tsi ra nacuenda natuhún ra tsihin ñaha can.

<sup>28</sup> Tacan tan nacoó ña quivi ña tan cuanuhu ña nda ñuu. Tan catyí ña tsihin nyivi:

<sup>29</sup> —Cohon ndo cunyehe ndo tsi iin ra tsa cahan tandihi cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tsihin ñi.

<sup>30</sup> Tacan tan quita nyivi ñuu can tan cuahán ñi cua nyehe ñi nu nyí ra Jesús.

<sup>31</sup> Tan tsa ndi cumañi ca tsaa ñi nu nyí ra, ra tsicá tsihin ra, jañiñi ra

naha tsi ra na catsi ra luxu. Tan catyí ra naha tsihin ra:

—Maestro, çatsi luxu —catyí ra naha.

<sup>32</sup> Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tsihin ra naha.

<sup>33</sup> Tacan tan ra tsicá tsihin ra, quitsaha natuhún tahan ra naha, tan catyí ra naha:

—¿A iyó yóo quitsi quitsi ndaca tsa catsi ra? —catyí ra naha.

<sup>34</sup> Maa tyin ra Jesús catyí ra tsihin ra naha:

—Tsa tsatsí yuhu juvin tsi cuví tsa javahá yu cuhva cuñi ra tsa jaquitsi tsi yu, tan javahá yu tyiñu tsaha ra tsi yu.

<sup>35</sup> Nyooho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tsihin ndo: Nyehe ndo tyin tsa ndihi tsa tatsi ndo cuaan tan tsa nyecú vaha tsi tsa cua naquihin vaha yo itsi.

<sup>36</sup> Ra tsa naquihín vaha can ñihí ra yahvi ra. Tan tsa naquihín vaha ra, cuví tsi nyivi tsa cua coo ñayivi nyito tsa ña cua naa maa. Tacan tan ra tsa tatsi tan ra tsa naquihín cusii iñi ra naha.

<sup>37</sup> Tan iyó iin cuhva tuhvá nyivi caahán tan catyí ñi tyin siin nyivi tatsi tan siin nyivi naquihín vaha. Tan nditsa yacan.

<sup>38</sup> Yuhu jacuhun yu tsi ndo tyin cua cahnu ndo niñi tsa iyó nu ña jaha tyiñu ndo, nu jaha tyiñu inga ra. Tan nyooho cucahnu ndo tan cua naquihin vaha ndo niñi can —catyí ra Jesús tsihin ra naha.

<sup>39</sup> Tan cuaha xaan nyivi ñuu Samaria can quitsaha tsinú iñi ñi tsi ra Jesús tsa cuenda tsa cahan ñaha can, tyin catyí ña: “Cahan ra tsihin yu tandihi cuhva iyó yu”, catyí ña.

<sup>40</sup> Cuhva tsa tsaá ñi nu nyí ra Jesús, tan cahan ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quivi.

<sup>41</sup> Tan cuaha ca nyiví quitsaha tsinú iñi ñi tsa tsiñi ñi tsa caahán ra.

<sup>42</sup> Tacan tan quitsaha catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahan un tsihin ndi, tyin tsiñi maa ndi tsihin soho ndi tsa caahán ra, tan tsitó vaha ndi tyin juvin ra cuví ra Cristo ra jacacú tsi nyiví iyó nu ñuhu ñayiví ihya —catyí ñi.

*Nu janduvaha ra Jesús sehe iin ra cumí tyiñu*

<sup>43</sup> Tsa yaha uvi quiví tan quee ra Jesús nu cuví Samaria tan cuahán ra ityi nu cuví Galilea, nu cacu ra.

<sup>44</sup> Vasu ndi maa juvin ñi maa ra cahan tyin iin ra cuví ndusu yuhu Nyoo, nyiví ñuu ra ña jahá ñi tsa ñayiví tsi ra.

<sup>45</sup> Tacan tan tsa tsaá ra Galilea, nyiví iyó ican, vaha caahán ñi tsihin ra, tyin tsahan ñi vico Jerusalén, tan nyehe ñi tsa vaha tsa javaha ra.

<sup>46</sup> Tacan tan cuanuhu nyico ra Jesús nda ñuu Caná tsa canyí Galilea nu nanduví ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum.

<sup>47</sup> Quiví tsa tsito ra can tyin tsa tsaá nyico ra Jesús nda Galilea tsa tsahan ra nda Judea, tsahan ra tsinyehe ra tsi ra Jesús. Tan tsican ra tumañi iñi tsi ra na cahun ra vehe ra tan janduvaha ra tsi sehe ra, tyin tsa cuñí cúu cuii ña sehe ra.

<sup>48</sup> Tacan tan catyí ra Jesús tsihin ra: —Nyooho ña cua tsinu iñi ndo tatun ña nyehe jihna ndo tsa iyo —catyí ra tsihin ra.

<sup>49</sup> Maa tyin ra can catyí ra tsihin ra Jesús:

—Yooho taa, cohon ñi tsihin yu tsa ndi cumañi ca cúu sehe yu —catyí ra tsihin ra Jesús.

<sup>50</sup> Tacan tan catyí ra Jesús tsihin ra: —Cuanuhu yuvehe un. Sehe un nyito ra, tsa nduvaha ra —catyí ra tsihin ra.

Tacan tan ra can tsinu iñi ra tsa cahan ra Jesús tan cuanuhu ra.

<sup>51</sup> Tsa tsa cuyatyin ra yuvehe ra, quita musu ra tan caahán ra naha tsihin ra:

—¡Taa, sehe un nyito ra; tsa nduvaha ra!

<sup>52</sup> Tacan tan quitsaha tsica tuhun ra tsi ra naha náa hora quitsaha vaha cuñí ra. Tan catyí ra naha tsihin ra:

—Icu cuhva caa iin tsa yaha hora quita cahñi tsi ra —catyí ra naha.

<sup>53</sup> Tacan tan tsito ra can, tyin hora can cahan ra Jesús tsihin ra, “Cuanuhu tyin sehe un nyito ra, tsa nduvaha ra.” Tan maa ra can tsihin tandihí nyiví ra quitsaha tsinú iñi ñi tsi ra Jesús.

<sup>54</sup> Yacan cuví tsa iyo tsa tsinu uvi javaha ra Jesús tsa tsaá nyico ra Galilea tsa yaha tsahan ra Judea.

## 5

*Nu janduvaha ra Jesús iin ra cuuhví*

<sup>1</sup> Tsa yaha can tan cuahán ra Jesús ñuu Jerusalén inga tsaha tyin nyiví ñuu Israel jacahnú ñi iin vico.

<sup>2</sup> Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyi. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor.

<sup>3</sup> Tan ican yucú cuaha nyiví cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can.

<sup>4</sup> Tyin nda naha nda naha ñi tan nuú iin ángel tan jacandá ra ndutya can. Tan nyiví tsa quihví jihna tsa yaha ñi nacandá ndutya can, nduvahá ñi vasu ndi maa cuehe cahnu ndohó ñi.

<sup>5</sup> Tan ican canyí iin ra cuuhví tan tsa iyó oco tsahun uñi cuiya cuuhví ra.

<sup>6</sup> Tsa nyehe ra Jesús tsi ra ican canyí ra, tuví iñi ra tyin tsa cuaha xaan cuiya cuuhví ra. Tan tsica tuhun ra tsi ra ndaahvi can, tan catyí ra:

—¿A cuñí un nduvaha un?

<sup>7</sup> Tan ra cuuhví can nacahan ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahán ñi tsaha tsa cuñi yu quihvi yu, inga nyivi quihvi jihna —catyí ra cuuhvi can tsihin ra Jesús.

<sup>8</sup> Tacan tan catyí ra Jesús tsihin ra:

—Nduvita, naquihin yuvi un tan caça un —catyí ra tsihin ra.

<sup>9</sup> Juvín ñi hora can tan nduvaha ra, naquihin ra yuvi ra, tan nacaca ra. Maa tyin quivi quitatú nyivi cuvi quivi can.

<sup>10</sup> Yacan ra cuvi ityi nuu tsihin nyivi Israel catyí ra naha tsihin ra tsa nduvaha can:

—Quivi quitatú yo cuvi vityin, yacan cuenda ña taahán tsi cuiso un yuvi un —catyí ra naha tsihin ra.

<sup>11</sup> Tan ra tsa nduvaha can nacahan ra tan catyí ra:

—Ra tsa janduvaha tsi yu, catyi ra tsihin yu: “Naquihin yuvi un tan caça un”, catyí ra tsihin ra.

<sup>12</sup> Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cahan tsihin un tyin naquihin un yuvi un tan caca un? —catyí ra naha.

<sup>13</sup> Maa tyin ra tsa nduvaha can ña tsitó ra yóo janduvaha tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra.

<sup>14</sup> Yaha can tan nañihi ra Jesús tsi ra tsa nduvaha can tsitsi vehe ñuhu cahnu, tan catyí ra tsihin ra:

—Jihna, vityin tsa nduvaha un, ña javaha ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

<sup>15</sup> Tacan tan tsahan ra tsicahan ra tsihin ra Israel naha ra tyin ra Jesús cuvi ra janduvaha tsi ra.

<sup>16</sup> Tsa cuenda tsa janduvaha ra Jesús tsi ra can quivi quitatú nyivi, xaan xaan cuñi ra Israel naha ra nyehe ra naha tsi ra. Tan cuñi ra naha cahni ra naha tsi ra.

<sup>17</sup> Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

<sup>18</sup> Tan tsa cuenda tsa cahan ra yacan, xaan ca cuñi ra Israel can naha ra. Tan ñihi ca cuñi ra naha cahni ra naha tsi ra tyin cuñi maa ra naha tyin ña jahá ra Jesús tsa cahnu cuvi quivi quitatú nyivi, tan inga tucu tuhun, iin ñi cuvi ra tsihin Nyoo jahá ra tsi ra tyin catyí ra tyin jutu ra cuvi tsi Nyoo.

*Sehe Nyoo iyó xaan ndatu tsi ra cundaca ñaha ra*

<sup>19</sup> Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuvi tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá Jutu yu tan javahá tucu maa yu.

<sup>20</sup> Tyin cuñi xaan ra tsi yu, tyin Sehe ra cuvi tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can.

<sup>21</sup> Tumaa janandotó Nyoo Jutu yu ndiyi, tan tsahá ra ñayivi coo ñi, tacan tucu yuhu tsa cuvi yu Sehe ra, tsahá yu ñayivi coo nyivi cuñi maa yu cuhva yu.

<sup>22</sup> Tacan Nyoo Jutu yu, ña jandaa ca ra cuatyí ndi intuhun nyivi tyin tsa tsaha ra ndatu tsi yuhu tsa cuvi yu Sehe ra tyin jandaa yu cuatyí nyivi.

<sup>23</sup> Tacan icá Nyoo Jutu yu tsa cuñi ra jacahnu nyivi tsi Sehe ra tumaa tsa jacahnú maa ñi tsi maa ra. Nyivi tsa ña jacahnú tsi yuhu tsa cuvi yu Sehe Nyoo, ndi Jutu yu tan ña jacahnú ñi. Tyin maa ra jaquitsi tsi yu.

<sup>24</sup> Tan tsa nditsa caahán yu tyin nyivi tyaá soho tsa caahán yu tan tsinú iñi ñi tsi ra tsa jaquitsi tsi yu, iyó ñi ñayivi nyito tsa ña cua naa maa. Tan ña cua cuhun ca ñi anyaya tsa catyi cuatyí ñi tyin tsa jacacu Nyoo tsi ñi tan ña yihi ndaha ca tuhun tsihi tsi ñi, tan tsaha ra ñayivi nyito iyó ñi.

<sup>25</sup> Nyivi; tumaa ndiyi cuvi ñi. Tan tsa nditsa caahán yu tsihin ndo tyin vatsi quivi cua cuñi ñi ndusu Sehe Nyoo. Tan nyivi tsa cua tyaa yahvi tsa caahán ra, cua coo ñi ñayivi nyito tsa

ña cua naa maa. Tan vityin cuví quiví tsa caahán yu tuhun.

<sup>26</sup> Tyin Nyoo Jutu yu iyó ra ñayiví nyito tsa ña cua naa maa. Tan tsaha ra ndatu can tsi yuhu tsa cuví yu Sehe ra tyin cuhva yu ñayiví can coo nyiví.

<sup>27</sup> Tan tsaha tucu Nyoo ndatu tsi yu tsa jandaa yu cuatyí nyiví, tyin Rayii quee nda gloria cuví yu.

<sup>28</sup> Ña iyo cuñi ndo tsa caahán yu tye-hen, tyin cua tsa quiví tsa cuñi ndiyí yucú tsitsi ñaña ndusu Sehe Nyoo.

<sup>29</sup> Tan cua quita ñi tsitsi ñaña ñi. Tacan tan nyiví tsa javaha tsa vaha cua nandoto ñi tyin coo ñi ñayiví nyitó. Maa tyin nyiví tsa javaha tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

*Nu janahá tsi tyin ra Jesús iyó ndatu tsi ra tsa cuhva ra ñayiví nyito coo nyiví*

<sup>30</sup> Yuhu ña cuví javaha yu tsa javahá yu tsa intuhun ñi maa yu. Yuhu jandaa yu cuatyí nyiví tumaa cuhva tava tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñí maa yu, tyin javahá yu cuhva caahán maa Jutu yu, ra tsa jaquitsi tsi yu.

<sup>31</sup> Tan tatun juvin ñi maa yu cuví tsa ndaa tsa cuenda yu, nduve yahvi nyaá tsa ndaa can.

<sup>32</sup> Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa.

<sup>33</sup> Nyooho tava tyiñu ndo na ndaca tuhun ra naha tsi ra Juan. Tan tuhun tsa cahan ra, tsa nditsa cuví tsi.

<sup>34</sup> Maa tyin yuhu ña tsiñiñuhú tsa cuví rayii tsa ndaa tsa cuenda yu. Maa tyin caahán yu tuhun tsa cahan ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo.

<sup>35</sup> Ra Juan cuví ra tumaa iin lámpara tsa cayú tan jandunditsín tsi. Tan nyooho juhva ñi quiví cusii iñi ndo tsihin ñuhú nditsin can.

<sup>36</sup> Maa tyin yuhu iyó iin tsa ndaa vaha ca tsi yu tan ñavin ca tsa caahan

ra Juan. Tyin tandihí tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsi tsi yu.

<sup>37</sup> Tacan tucu Jutu yu, ra tsa jaquitsi tsi yu, cuví ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehe ndo tsi ra.

<sup>38</sup> Tan ña ndoó tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsi tsi yu.

<sup>39</sup> Nyooho tsihin cuenda xaan cahví ndo nu tutu Nyoo, tyin cuñí maa ndo tyin nuu tsi cua ñihi ndo ñayiví nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi.

<sup>40</sup> Tan nyooho ña cuñí ndo quitsi ndo nu nyaá yu tan cuhva yu ñayiví nyito coo ndo.

<sup>41</sup> Yuhu ña nducú yu tsa jacahnu nyiví tsi yu.

<sup>42</sup> Tyin yuhu tsitó yu tsi ndo tan tsitó yu tyin ña cuñí ndo tsi Nyoo.

<sup>43</sup> Yuhu vatsí yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsi tsa cuenda maa ra, ra ican cua tsinu iñi ndo.

<sup>44</sup> Nyooho ña cuví tsinu iñi ndo tsi yu tyin cuñí ndo nduvaha ndo nuu nyiví tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó.

<sup>45</sup> Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñí maa ndo tyin ley tsa tyaa ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaa ra.

<sup>46</sup> Tyin tun tsatyin nditsa tsa tsinú iñi ndo tsa cahan ra Moisés, tacan cua tsinu ndihí iñi ndo tsa caahán yuhu. Tyin tuhun yuhu cuví tsa tyaa ra.

<sup>47</sup> Maa tyin tatun ña tsinú iñi ndo tuhun tsa tyaa ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityi nuu tsihin ra Israel naha ra.



## 6

*Nu jacatsi ra Jesús uhun mil rayi*  
(Mt. 14.13-21; Mr. 6.30-44; Lc. 9.10-17)

<sup>1</sup> Tsa yaha yacan, tan cuahán ra Jesús inga tsiyo miñi cahnu tsa nañi Ndutya Ñuhu Galilea. Tan juvin ñi nañi tucu tsi Miñi Tiberias.

<sup>2</sup> Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhvi.

<sup>3</sup> Tacan tan ra Jesús ndaa ra iin yucu tan tsinyaá ra ican tsihin ra tsicá tsihin ra.

<sup>4</sup> Tan tsa cuyatyn cuii tahan tsi quivi vico pascua tsa jacahnú nyivi Israel.

<sup>5</sup> Tan nyehe ra Jesús tyin cuaha xaan nyivi nyicún tsi ra, tacan tan quitsaha caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

<sup>6</sup> Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra.

<sup>7</sup> Tacan tan nacahan ra Felipe tan catyi ra:

—Xuhun tsa quihin yo tsa jaha tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

<sup>8</sup> Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

<sup>9</sup> —Ihya nyii iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

<sup>10</sup> Tacan tan catyí ra Jesús tsihin ra naha:

—Cahan ndo tsihin tandihi nyivi na cunyecu ñi —catyí ra.

Tan cuaha xaan itya ican tan tsinyecu ñi, uhun mil rayii, [tan sin maa ñi ñaha tsihin tsa nyihi].

<sup>11</sup> Tacan tan quihin ra Jesús paan can tan tsa yaha tsaha ra tyahvi nyoo tsi Nyoo, tan tsaha ra can tsi ra tsicá tsihin ra. Tan ra can naha ra, tsaha ra naha can tsi tandihi nyivi tsa nyecú

can. Juvín ñi tacan ica nyico ra tsihin tyaca can. Tan tsatsi ndaha iñi ñi.

<sup>12</sup> Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

<sup>13</sup> Naquihin vaha ra naha can, tan jacutu ra naha utsi uvi tyica tsihin tsa ñahñu tsa ndoo tsa uhun taahan paan can.

<sup>14</sup> Tacan tan tsa yaha nyehe nyivi can tsa iyo tsa javahá ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvin ra nyaá tsa quitsi maa nu ñuhu ñayivi ihya —catyí ñi.

<sup>15</sup> Maa tyin tsa tuví iñi ra Jesús tyin cuñi ñi tsa quihin ñi tsi ra tsihin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyi intuhun ñi maa ra.

*Nu tsicá ra Jesús nu ndutya*

(Mt. 14.22-27; Mr. 6.45-52)

<sup>16</sup> Tsa cunaaha, nuu ra tsicá tsihin ra Jesús yuhu miñi can.

<sup>17</sup> Tan quihvi ra naha tsitsi yutun ndoo tyin cua yaha sava ra naha mahñu miñi can tan cua tsa ra naha ñuu Capernaum. Tsa cunaaha tan ra Jesús ñaha ca maa tsa ra.

<sup>18</sup> Tacan tan tsaá tatyí ñihi. Tan iyo nduvita ndutya miñi can.

<sup>19</sup> Tsa tsa yaha ra naha uhun a iñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyn ra nu cuahán yutun ndoo can, nayuhvi xaan ra naha.

<sup>20</sup> Maa tyin catyí ra Jesús tsihin ra naha:

—¡Maa yu cuví, ña nayuhvi ndo!

<sup>21</sup> Tacan tan tsaha ra naha quihvi ra Jesús tsitsi yutun ndoo can. Tan iin yaha ñi tsaá ra naha yuhu miñi nu cuahán ra naha.

*Nu nanducú nyivi tsi ra Jesús*

<sup>22</sup> Tsa tuví inga quivi tan tsitó nyivi tsa ndoo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó

ican. Intuhun ñi maa can iyó. Tan tsito ñi tyin ña cuahán ra Jesús tsihin ra naha.

<sup>23</sup> Maa tyin tsaá taahan ca yutun ndoo tsa quee ñuu Tiberias yatyin ñi nu nacuhva Jutu Mañi yo tyahvi nyoo tsi Nyoo tan tsatsi nyivi paan.

<sup>24</sup> Tacan tan tsa nyehe nyivi tyin nduve ra Jesús tan ndi ra tsicá tsihin ra, quihvi ñi tsitsi yutun ndoo tsa tsaá tan cuahán ñi nda ñuu Capernaum cua nanducu ñi tsi ra.

*Ra Jesús cuví paan tsa tsahá ñayivi nyito coo yo*

<sup>25</sup> Tsa tsaá ñi inga tsiyo miñi can, nañihi ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaá un ihya? —catyí ñi tsihin ra.

<sup>26</sup> Maa tyin catyí ra Jesús tsihin ñi: —Tsa nditsa catyí yu tsihin ndo tyin nyoocho nanducú ndo tsi yu maa tyin ñavin cuenda tsa nyehe ndo tsa iyo tsa javaha yu. Nanducú ndo tsi yu tyin tsatsi ndo tan ndaha iñi ndo.

<sup>27</sup> Ña jaha tyiñu ndo cuenda tunyee iñi tsa tsatsi ndo tsa cua ndihi ñi maa, jaha tyiñu ndo cuenda tunyee iñi tsa catsi ndo tsa ña cua ndihi tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tava tyiñu ra tsi yu tyin yuhu cuví Rayi tsa quee nda gloria —catyí ra Jesús.

<sup>28</sup> Tacan tan quitsaha tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñi Nyoo? —catyí ñi.

<sup>29</sup> Tacan tan catyí ra Jesús tsihin ñi: —Tsa cuñi Nyoo javaha ndo, cuví tsa tsinu iñi ndo tsa caahán yuhu, ra tsa jaquitsi ra —catyí ra Jesús tsihin ñi.

<sup>30</sup> Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un?

<sup>31</sup> Tsii tsahnu ndi tsatsi ñi maná nu tsiqui, tumaa tsa caahán tuhun Nyoo tyehen: “Andivi quee paan tsatsi

nyivi jaha Nyoo” —catyí ñi tsihin ra Jesús.

<sup>32</sup> Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsaha paan tsa quee andivi tsatsi ñi, tyin maa Nyoo Jutu yu cuví ra tsahá paan nditsa tsa quee andivi.

<sup>33</sup> Tyin paan tsa tsahá Nyoo, yacan cuví ra tsa quee andivi. Tan juvin ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

<sup>34</sup> Tacan tan quitsaha catyí ñi tsihin ra:

—Taa, cuhva paan can catsi ndi tandihi ñi quivi —catyí ñi.

<sup>35</sup> Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito aña ndo. Nyivi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ityi iñi ñi.

<sup>36</sup> Maa tyin tumaa tsa caahán yu tsihin ndo, nyehé vaha ndo tsi yu, maa tyin ña cuñi ndo tsinu iñi ndo tyin juvin yu cuví ra tsa cuví jatyinyee tsi ndo

<sup>37</sup> Tandihi nyivi tsa tsaha Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi.

<sup>38</sup> Tyin yuhu tsa quee andivi; vatsí yu vatsí javahá yu cuhva cuñi ra tsa jaquitsi tsi yu. Ña vatsí yu vatsí javaha yu cuhva cuñi ñi maa yu.

<sup>39</sup> Tan cuhva cuñi ra tsa jaquitsi tsi yu, yacan cuví tsehe: tsa ña cunaa ndi intuhun nyivi tsa tsahá ra tsi yu, tan janandoto yu tsi ñi nu cua cundihí quivi.

<sup>40</sup> Jutu yu, ra tsa jaquitsi tsi yu, cuñi ra tyin tandihi nyivi tsa cutuñi iñi tyin Sehe Nyoo cuví tsi yu, tan tsinu iñi ñi tsa caahán yu, cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihí quivi —catyí ra Jesús tsihin ñi.

<sup>41</sup> Tsa cuenda tsa cahan ra Jesús yacan, tan quitsaha caahán nyaa nyivi Israel tsi ra tyin catyí ra: “Yuhu cuví paan tsa quee andivi”, catyí ra.

<sup>42</sup> Tacan tan quitsaha catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andiví quee ra? —catyí ñi.

<sup>43</sup> Tacan tan catyí ra Jesús tsihin ñi:

—Jandihí ndo tsa caahán nyaa ndo.

<sup>44</sup> Yoñi maa nyívi cuví quitsi quitsi nyicún tsi yu tatun ñavin Jutu yu, ra tsa jaquitsí tsi yu, caná tsi ñi. Tan cua janandoto yu tsi ñi nu cua cundihí quívi.

<sup>45</sup> Nu libru tsa tyaá ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihí nyívi” catyí tsi. Yacan cuenda nyívi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

<sup>46</sup> Ñavin tsa tyin nyehe ñi tsi Nyoo Jutu yu, tyin yoñi nyehe tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra.

<sup>47</sup> Tsa nditsa catyí yu tsihin ndo tyin nyívi tsa tsinú iñi tsa caahán yu tsa iyó ñi ñayívi nyito tsa ña cua naa maa.

<sup>48</sup> Yuhu cuví paan tsa tsahá tsa coo nyito añima ñi.

<sup>49</sup> Tsii tsaahnu ndo tsatsí ñi maná nu tsiqui, maa tyin juvin ñi tsihi ñi.

<sup>50</sup> Maa tyin yuhu, tuhun paan tsa quee andiví caahán yu tsihin ndo, tyin nyívi tsa cua catsi paan can, ña cua cúu ñi.

<sup>51</sup> Juvin ñi maa yu cuví paan nyito tsa quee andiví. Nyívi tsa cua catsi paan ihya ña cua cundihí tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayívi tsa iyó yu tsa cuenda tandihí nyívi iyó nu ñuhu ñayívi —catyí ra Jesús tsihin ñi.

<sup>52</sup> Tacan tan nyívi Israel can quitsahá natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

<sup>53</sup> Tan catyí ra Jesús:

—Tsa nditsa catyí yu tsihin ndo, tyin yuhu cuví Rayí tsa quee nda gloria, tan tatun nyooho tan ña cua catsi ndo cuñu ñuhu yu, tan ña coho ndo ñiñi yu, ña cuví coo ndo ñayívi nyitó.

<sup>54</sup> Nyívi tsatsí cuñu ñuhu yu tan tsihi ñi ñiñi yu, iyó ñi ñayívi nyito tsa ña cua naa maa. Tan yuhu cua janandoto yu tsi ñi nu cua cundihí quívi.

<sup>55</sup> Tyin cuñu ñuhu yu yacan cuví paan tsa nditsa tsa taahán tsi catsi ñi, tan ñiñi yu cuví vinu tsa nditsa tsa taahán tsi coho ñi.

<sup>56</sup> Nyívi tsatsí cuñu ñuhu yu tan tsihi ñi ñiñi yu, iin ñi cuví ñi tsihin yu. Tan iin ñi cuví yu tsihin ñi.

<sup>57</sup> Jutu yu, ra tsa jaquitsí tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyívi tsatsí cuñu ñuhu yu, cua coo ñi tsihin tunyee iñi tsa iyó tsi yu.

<sup>58</sup> Tuhun paan tsa quee andiví caahán yu. Paan ihya ñavin tumaa maná tsa tsatsí tsii tsaahnu yo cuví tsi, tyin juvin ñi tsihi ñi. Nyívi tsatsí paan tsa cuví cuñu ñuhu yu, ña cua cundihí maa tsa coo ñi —catyí ra Jesús.

<sup>59</sup> Juvin yacan jacuaha ra Jesús nu ndu iin nyívi tsitsi vehe ñuhu ñuu Capernaüm.

<sup>60</sup> Cuaha xaan nyívi nyicún tsi ra Jesús. Tan cuhva tsa tsíñi ñi yacan catyí ñi:

—Tuhun tsa caahán ra ihya, yíi xaan naquihin vaha yo itsi. Yoñi maa cua tsinu iñi tsa caahán ra —catyí ñi.

<sup>61</sup> Tacan tan tuví iñi ra Jesús tyin ña cuñí ñi naquihin ñi tsa caahán ra. Tan tsicá tuhun ra tsi ñi:

—¿A ndasi cuñí ndo tsa caahán yu ihya?

<sup>62</sup> Tan ¿náa cua javaha ndo tatun nyehe ndo tsi yuhu Rayí tsa quee nda gloria nandaa nyico yu inga tsaha ityi nu quee yu?

<sup>63</sup> Tatyí li Nyoo tsahá ñayívi nyito. Tan cuñu ñuhu, ña jatyinyeé tsi tsa coo yo ñayívi can. Tan tsa caahán yuhu tsihin ndo, Tatyí li Nyoo cuví tsi tan tsahá tsi tsa coo nyitó añima ndo.

<sup>64</sup> Maa tyin yíhi ndo ña tsinú iñi ndo tsi yu —catyí ra Jesús.

Tyin nda quívi jihna tan tsa tsitó maa ra yóo ña cua tsinú iñi tsi ra tan yóo cua xico tsi ra.

<sup>65</sup> Tan catyí ra:

—Yacan cuenda catyí yu tsihin ndo tyin yoñi nyívi cuví quitsi nyicun tsi yu tatun ñavin maa Nyoo Jutu yu caná tsi ñi —catyí ra Jesús.

<sup>66</sup> Nda quívi can, tan cuaha xaan nyívi nyicún tsi ra Jesús nacoó ñi tsi ra. Tan ña tsicá ca ñi tsihin ra.

<sup>67</sup> Tacan tan tsicá tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndihi tucu nyoocho cuhun ndo? —catyí ra tsihin ra naha.

<sup>68</sup> Maa tyin nacahan ra Simón Pedro tan catyí ra:

—Jutu Mañi yu, ¿yóo cunyicun ndi? Tan intuhun ñi maa un caahan tuhun ñayívi nyito tsa ña cua naa maa.

<sup>69</sup> Nyuhu tsinú ñi ndi, tan tsitó ndi tyin yoocho cuví ra Cristo Sehe Nyoo nyito.

<sup>70</sup> Tan nacahan ra Jesús tan catyí ra:

—¿A ñavin yuhu nacatsi tsi tandihi tsa utsi uvi ndo? Tan intuhun ndo yíhi nu ña vaha —catyí ra.

<sup>71</sup> Tuhun tsa caahan ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan ñi tsi ra, vasu iin ra tsa utsi uvi can cuví ra.

## 7

### *Nu ña tsinú ñi yañi ra Jesús tsi ra*

<sup>1</sup> Tsa yaha yacan, tan nyí ra Jesús tsicá nuu ra nu cuví Galilea. Ña cuñi ra cuhun ra nu cuví Judea tyin ra cuví ityi nuu tsihin nyívi Israel can naha ra cuñi ra naha cahñi ra naha tsi ra.

<sup>2</sup> Tan tsa cuyatyin quívi vico tsa jacahnú nyívi Israel ndihi ñi cuiya. Tan nañi tsi Vico Tyahva.

<sup>3</sup> Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyívi nyicún tsi un tsa iyó ndacan nyehe ñi tyiñu javahá un.

<sup>4</sup> Tyin tatun cuñi yo tsa coto nyívi tsi yo, ña javahá xeehe yo tsa javahá yo. Tan yoocho tatun nditsa tsa javahá un, javaha can nuu tandihi nyívi —catyí tandihi yañi ra.

<sup>5</sup> Tacan catyí ra naha tyin ndi tsa cuví ra naha yañi ra tan ña tsinú ñi ra naha tsi ra.

<sup>6</sup> Tacan tan catyí ra Jesús tsihin ra naha:

—Ñaha ca tsa hora tsa cuhun yuhu. Maa tyin nyoocho ndaa quívi ñi cuví cuhun ndo.

<sup>7</sup> Tyin vaha cuñi nyívi nyehé ñi tsi ndo, maa tyin yuhu ndasi cuñi ñi nyehé ñi tsi yu tsa cuenda tyin caahan catsi yu tsihin ñi tyin ña vaha tsa javahá ñi.

<sup>8</sup> Cuaahan nyoocho vico can. Yuhu ña cuhun yu tyin ñaha ca tsa hora tsa taahan tsi cuhun yu —catyí ra.

<sup>9</sup> Yaha can tan ndoo ra nu cuví Galilea.

### *Nu nyí ra Jesús nu iyó vico Tyahva*

<sup>10</sup> Tsa yaha cuahan yañi ra Jesús vico can, tsahan cuahan ndihi ra, maa tyin cuahan xeehe ñi ra.

<sup>11</sup> Tan ra cuví ityi nuu tsihin nyívi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyí ra can? —catyí ra naha.

<sup>12</sup> Tan caahan nyívi yucú vico can tuhun ra. Yíhi ñi catyí ñi: “Iin ra vaha cuví ra.” Tan inga ñi catyí ñi: “Ña vaha ra, jandavi ñaha ra tsi nyívi”, catyí ñi.

<sup>13</sup> Maa tyin yoñi caahan nditsin tuhun ra tsa cuenda tsa yuuhví ñi tsi ra cuví ityi nuu can naha ra.

<sup>14</sup> Tsa cusava iyó vico tan tsa ra Jesús tsitsi vehe ñuhu cahnu tan quitsaha jacuaha ra tsi nyívi.

<sup>15</sup> Tan ra cuví ityi nuu can iyó cuñi ra naha tan quitsaha natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

<sup>16</sup> Tan nacahan ra Jesús tan catyí ra: —Tuhun tsa jacuaha yu, ñavin tsa cuenda maa yu cuví tsi, maa tyin cuenda ra tsa jaquitsi tsi yu cuví tsi.

<sup>17</sup> Tatun yíhi nyoocho tsa cuñi javaha cuhva cuñi Nyoo, cua coto ndo tyin cuenda Nyoo jacuaha yu tan ñavin tsa cuenda maa yu.



18 Nyivi tsa caahán cuenda maa ñi, caahán ñi tyin cuñi ñi tsa jacahnu nyivi tsi ñi. Maa tyin ra nducú tsa jacahnu nyivi tsi Nyoo, ra tsa jaquitsi tsi ra, ra ícan caahán tsa nditsa. Tan ña jandaví ñaha ra.

19 '¿A ña nditsa tyin ra Moisés tsaha ra ley tsi ndo? Maa tyin ndi intuhun nyoocho tan ña tyaá yahvi ndo ley can. ¿Nacuenda cuñi ndo cahñi ndo tsi yu? —catyí ra.

20 Tan nacahan nyivi tan catyí ñi tsihin ra:

—Tatyí ña vaha yihí tsi yoocho. Yoñi cuñi cahñi tsi un —catyí ñi tsihin ra.

21 Tan catyí ra Jesús:

—Tsacatyí tsa javaha yu tsa iyo quivi quitatu yo, yacan ndasi cuñi ndo nyehé ndo tsi yu.

22 Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yii ndo. Vasu ñavin ra quitsaha tsihin tuhun can, maa tyin nyivi cuví nyivi ra ityi tsata, jihna ca ñi javaha tacan. Yacan cuenda javahá ndo can vasu taahán tsi quivi quitatu yo.

23 Tan vityin, vaha tatun tsa cuenda tsa ña cuñi ndo cumañi ndo ley ra Moisés tan javahá ndo tuhun can vasu quivi quitatú yo cuví. Maa tyin tatun tacan javahá ndo, ¿nacuenda tyin cuxaan ndo tsi yu tsa janduvaha yu tsi ra can quivi quitatú yo?

24 Ña tyaa ndo cuatyí siqui nyivi tatun ña tsitó vaha ndo náa javahá ñi. Cúatu ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

#### *Nu cahan ra Jesús tuhun maa ra*

25 Tacan tan juhva nyivi iyó Jerusalén, quitsaha tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra?

26 Caahán nditsin ra tsihin nyivi. Tan yoñi caahán náa caahán tsihin ra. Vasiqui tsinú ndihi maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsi Nyoo.

27 Yoo tsitó vaha yo nu quee ra ihya, tan quivi quitsi ra Cristo yoñi maa cua

coto numaa ityi cua quee ra —catyí ñi.

28 Ra Jesús nyii ra tsitsi vehe ñuhu jacuahá ra, tan tsitó ra tsa natuhún nyivi, yacan cuenda ñihi cahan ra tan catyí ra:

—¿Nyoocho cuñi maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsi tsi yu, ra tsa cuví tsa nditsa. Nyoocho ña nacotó ndo tsi ra.

29 Yuhu nacotó yu tsi ra tyin cuenda ra vatsí yu, tan maa ra jaquitsi tsi yu —catyí ra Jesús.

30 Tacan tan cuñi ra naha tyihi ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tñin ra naha tsi ra tsa cuenda tyin ñaha ca tahan tsi quivi tsa taahán maa tsi tñin ra naha tsi ra.

31 Maa tyin cuaha xaan nyivi tsinu iñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

#### *Nu jacuhun ra cuví fariseo naha ra tsi ra vitya tyin tñin ra naha tsi ra Jesús*

32 Tsa tsiñi ra fariseo naha ra tsa caahán nyivi tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na tñin ra naha tsi ra Jesús.

33 Tacan tan catyí ra Jesús:

—Juhva cuii ña quivi cua cunyaa yu tsihin ndo. Yahá can tan cuacunuhu yu nu nyaá ra tsa jaquitsi tsi yu.

34 Nyoocho cua nanducu ndo tsi yu. Maa tyin ña cua nañihi ndo tsi yu. Tyin ña cua cuví cuhun ndo nu cua cunyaa yu —catyí ra Jesús.

35 Tacan tan quitsaha natuhún tahan ra cuví ityi nuu tsihin nyivi Israel naha ra:

—¿Numaa cua cuhun ra ihya tsa ña cua nañihi yo tsi ra? ¿A cuhun ra nu iyó ra Israel ñuu Grecia naha ra tyin jacuaha ra tsi nyivi iyó Grecia can?

36 ¿Náa cuñi tsi catyí tsa caahán ra tsihin yo? Tyin catyí ra: “Cua

nanducu ndo tsi yu maa tyin ña cua nañihi ca ndo tsi yu tyin ña cua cuvi cahun ndo nu cua cunyaa yu” —tacan caahán yuhu tahan ra naha tuhun ra Jesús.

*Nyivi tsinú iñi tsi Nyoo cua coo Tatyí li ra ñima ñi*

<sup>37</sup> Quivi ndihi tsicoo vico, yacan cuvi quiivi tsa ñiñi ca. Tan quiivi can nduvita ra Jesús tan ñihi caahán ra tan catyí ra:

—Tatun ndáa nyooho na ityi iñi ndo, ñaha ndo tan tsinu iñi ndo tsa caahán yu.

<sup>38</sup> Tyin nyivi tsa tsinú iñi tsa caahán yu, cua cunu ndutya nyito tsitsi ñima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

<sup>39</sup> Maa tyin tsihin yacan cuñi ra catyí ra tyin ñi tsinú iñi tsi ra cua ñihi ñi Tatyí li Nyoo, tyin quiivi can ñaha ca quitsi Tatyí li Nyoo tyin ra Jesús, ñaha ca cunuhu ra nda gloria nu cua jacahnu Jutu ra tsi ra.

*Nu natahvi sava nyivi tsa cuenda ra Jesús*

<sup>40</sup> Juhva nyivi tsa tsiñi yacan, catyí ñi:

—Nditsa tsa cuii tyin ra ihya cuvi ndusu yuhu Nyoo tsa nyaá tsa cua quitsi —catyí ñi.

<sup>41</sup> Tan inga ñi catyí ñi:

—Ra ican cuvi ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuvi ra Cristo?

<sup>42</sup> Tyin nu tutu Nyoo catyí tsi tyin ra Cristo cua cuvi ra nyivi tata ra rey David, tan ra ñuu Belén tsa canyí nu cuvi Galilea cua cuvi ra, tumaa ra David —catyí ñi.

<sup>43</sup> Tacan tan nyivi can natahvi sava ñi tsa cuenda ra Jesús.

<sup>44</sup> Yihí ñi cuñi ñi quihin ñi tsi ra tan tyihi ñi tsi ra tsitsi vehe caa. Maa tyin yoñi tñin tsi ra.

*Ra cuvi ityi nuu vehe ñuhu naha ra ña tsinú iñi ra naha tsi ra Jesús*

<sup>45</sup> Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuvi ityi nuu tsihin ra jutu naha ra. Tan tsica tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

<sup>46</sup> Tan catyí ra vitya can naha ra:

—¿Ndi intuhun tsaha tan yoñi tuhva caahán tumaa caahán ra can! —catyí ra naha.

<sup>47</sup> Tacan tan catyí ra fariseo naha ra tsihin ra vitya can naha ra:

—¿A jandavi ñaha ndihi ra can tsi nyooho?

<sup>48</sup> Nyehhe ndo tyin ndi intuhun ra cuvi ityi nuu tsihin ndi, tan ra cuvi fariseo naha ra, tan ña tsinú iñi ra naha tsi ra can.

<sup>49</sup> Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

<sup>50</sup> Tacan tan ra Nicodemo, ra tsa tsahan nu nyii ra Jesús tsa tsacuaa, cuvi ndihi tucu ra fariseo, tan catyí ra tsihin ra naha:

<sup>51</sup> —Catyí ley tyin ña cuvi tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javaha ra —catyí ra tsihin ra naha.

<sup>52</sup> Tacan tan nacahan ra naha tan catyí ra naha tsihin ra:

—¿A juvin ñi ra Galilea cuvi ndihi tucu yooho? Cahvi nu tutu Nyoo tan nyehhe un, tyin ndi intuhun ra cuvi ndusu yuhu Nyoo tan ña nyaá tsi tsa quitsi ra nda Galilea —catyí ra naha.

*Ñaha tsa quituvi tsihin rayi tsa ñavin yñi ña cuvi*

<sup>53</sup> Tacan tan cuanuhu intuhun intuhun ra naha nda yuvehe ra naha.

## 8

<sup>1</sup> Maa tyin ra Jesús cuahán ra yucu Olivo.

<sup>2</sup> Tsa cunditsin inga quiivi, cuahán nyico ra Jesús inga tsaha vehe ñuhu cahnu. Tan tandihi nyivi natuhva ñi nu nyii ra. Tan tsinyaa ra tan quitsaha caahán ra tsihin ñi.

<sup>3</sup> Tacan tan ra jacuahá ley vehe ñuhu tan ra cuvi fariseo naha ra tsaa

ra naha tsihin iin ñaha iyó yíi tyin tñin ra naha tsi ña nu tsicoo cuatyí ña tsihin inga rayíi. Tan tyaá ra naha tsi ña mahñu nyívi tsa nyecú can.

<sup>4</sup> Tan quitsaha catyí ra naha tsihin ra Jesús:

—Maestro, tñin ndi tsi ñaha ihya nu tsicoo cuatyí ña tsihin inga rayíi.

<sup>5</sup> Tyin ley tsa tyaá ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nácaa catyí un? —catyí ra naha tsihin ra.

<sup>6</sup> Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaá ra naha cuatyí síqui ra. Tacan tan tsinyaá tyayíi ra Jesús nu ñuhu tan quitsaha tyaá ra letra nu ñuhú tsihin nundaha ra.

<sup>7</sup> Maa tyin nducú tuhun ca ra naha tsi ra, tacan tan nduvita nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

<sup>8</sup> Tan tsinyaá tyayíi nyico ra tan quitsaha jañihí ca ra tyaá ra letra nu ñuhu.

<sup>9</sup> Tsa tsiñi ra naha tsa caahán ra tacan, tuví ñi ra naha tyin iyó tucu cuatyí maa ra naha. Tan quitsaha quitá intuhun intuhun ra naha, jihna ca ra tsahnu naha ra quitá. Cuhva tsa ndihí ra naha quitá cuahán tan ndoo intuhun ña maa ra Jesús tsihin ñaha can mahñu nu nyecú nyívi can.

<sup>10</sup> Tacan tan nduvita nyityi ra Jesús tan nyehé ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaá cuatyí síqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

<sup>11</sup> Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

*Ra Jesús cuví tsa nditsin tsa jandunditsin aña nyívi*

<sup>12</sup> Tacan tan cahan nyico ra Jesús tsihin nyívi inga tsaha, tan catyí ra tsihin ñi:

—Yuhu cuví ra tsa jandunditsin aña nyívi iyó nu ñuhu ñayívi. Yóo nyívi tsa nyicún tsi yu, cua coo ñi iin ñayívi nyito nu nditsin. Tan ña cua caca nuu ñi nu naa —catyí ra Jesús tsihin ñi.

<sup>13</sup> Tacan tan ra cuví fariseo naha ra catyí ra naha tsihin ra:

—Yooho, caahán un tumañi ñi tsa cuenda maa un. Yacan cuenda nduve yahvi nyaá can —catyí ra naha tsihin ra.

<sup>14</sup> Nacahan ra Jesús tan catyí ra:

—Vasu juvin ñi maa yu caahán tumañi ñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyooho ña tsitó ndo numaa ityi quee yu tan numaa ityi cua cuhun yu.

<sup>15</sup> Nyooho yatyi xaan caahán ndo tsa caa nyívi. Maa tyin yuhu, ña caahán yu tsa caa ñi.

<sup>16</sup> Tyin tatun cahan yu tsa caa nyívi, tsa nditsa cua cahan yu. Tyin ñavin intuhun ñi maa yu nyehé tsa iyó aña ñi, tyin Jutu yu ra tsa jaquitsí tsi yu, ra ican nyehé iin caa ñi tsihin yu.

<sup>17</sup> Nu ley nyooho nyaá tyin tatun uvi ra tsahá tsa ndaa, cuñí tsi tsinú ñi yo tsa caahán ra naha.

<sup>18</sup> Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsí tsi yu, cuví inga tsa ndaa —catyí ra Jesús tsihin ra naha.

<sup>19</sup> Tacan tan tsica tuhun ra naha tsi ra:

—¿Numaa nyíi jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihí ndo tsi Jutu yu —catyí ra.

<sup>20</sup> Tuhun ihya cahan ra Jesús tsitsi tsa jacuahá ra tsitsi vehe ñuhu cahnu, nu nyíi caja nu tyihí nyívi xuhun. Maa tyin yoñi tyihí tsi ra vehe caa,

tyin ñaha ca tahan tsi quiví tsa taahán tsi cuhun ra.

*“Nu cuhun yuhu ña cua cuvi cuhun ndo”, catyí ra Cristo*

<sup>21</sup> Tacan tan quitsaha caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siquí ndo. Tyin nu cua cuhun yuhu, nyooho ña cua cuvi cuhun ndo —catyí ra Jesús tsihin ra naha.

<sup>22</sup> Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuvi cuhun yo nu cuahán ra —catyí ra naha.

<sup>23</sup> Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siquí quee yu. Nyooho cuenda ñuhu ñayiví ihya cuví ndo. Maa tyin yuhu ñavin cuenda nu ñuhu ñayiví ihya cuví yu.

<sup>24</sup> Yacan cuenda catyí yu tsihin ndo tyin cua cúu ndo tan cua ndoo cuatyí ndo siquí ndo. Tyin tatun ña tsinú ñi ndo tsa yuhu cuví ra jatsiyó cuatyí ndo, cua ndoo cuatyí ndo siquí ndo quiví cúu ndo —catyí ra Jesús tsihin ra naha.

<sup>25</sup> Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahan ra Jesús tan catyí ra:

—Tsa yaha cahan yu tsihin ndo nda quiví jihna.

<sup>26</sup> Cuaha xaan ca tsa ndi cumañi cahan yu tsihin ndo, tan ndi cumañi cahan yu cuhva iyó ndo. Maa tyin tsa caahán yu tsihin nyiví iyó nu ñuhu ñayiví, cuví tsi tsa tsiñi yu tsa caahán ra tsa jaquitsi tsi yu. Tan maa ra caahán tsa nditsa —catyí ra Jesús.

<sup>27</sup> Maa tyin ra Israel naha ra ña cutuñi ñi ra naha tatun tuhun Nyoo Jutu yo cahan ra tsihin ra naha.

<sup>28</sup> Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayi tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu,

tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu.

<sup>29</sup> Tyin Jutu yu, ra tsa jaquitsi tsi yu, nyii ra tsihin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñi ra —catyí ra Jesús.

<sup>30</sup> Tsa cahan ra Jesús yacan, cuaha xaan ra naha quitsaha tsinú ñi tsi ra.

*Nyiví cuví sehe Nyoo tan nyiví javahá tsa caquiñi*

<sup>31</sup> Tacan tan catyí ra Jesús tsihin nyiví Israel, tsa quitsaha tsinú ñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyiví tsa nditsa yihí cuenda yu.

<sup>32</sup> Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

<sup>33</sup> Tan nacahan ra naha tan catyí ra naha:

—Nyuhu nyiví tata ra Abraham cuví ndi. Ndi iin tsaha tan ñaha ca cuví ndi musu nyiví. ¿Nacaa tsa catyí yooho tyin quita nuña ndi? —catyí ra naha tsihin ra.

<sup>34</sup> Tan catyí ra Jesús:

—Tsa nditsa catyí yu tsihin ndo tyin tandihí nyiví javahá tsa caquiñi, musu cuenda tsa caquiñi cuví ñi.

<sup>35</sup> Iin musu ña ndoo cuui ra vehe tsitoho ra. Maa tyin ra cuví sehe tsitoho vehe can, ndoo cuui ra vehe jutu ra.

<sup>36</sup> Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuui tyin ña cua cundaca ñaha ca tsa ña vaha tsi ndo.

<sup>37</sup> Tsa tsitó yu tyin tata ra Abraham cuví ndo. Maa tyin yihí ndo cuñi ndo cahñi ndo tsi yu, tyin ña naquihín vaha ndo tsa caahán yu.

<sup>38</sup> Yuhu caahán yu tsa janaha Jutu yu tsi yu. Tan nyooho javahá ndo tsa caahán ra cuví jutu ndo tsihin ndo —catyí ra tsihin ra naha.

<sup>39</sup> Tan nacahan ra naha tan catyí ra naha:



—Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra.

<sup>40</sup> Maa tyin nyooho, vasu caahán yu tsihin ndo tsa nditsa tsa janahá Nyoo tsi yu, nyooho cuñí ndo cahñi ndo tsi yu. ¡Ra Abraham ña javahá ra tacan!

<sup>41</sup> Nyooho javahá ndo tumaa javahá jutu ndo —catyí ra tsihin ra naha.

Tacan tan nacahan ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

<sup>42</sup> Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaá yu ihya. Ña vatsí yu cuenda maa yu, tyin maa Nyoo jaquitsi tsi yu.

<sup>43</sup> ¿Nacuenda ña cutuñi ñi ndo tsa caahán yu tsihin ndo? Tsa cuenda tyin ña cuñi ndo tyaa soho ndo tsa caahán yu.

<sup>44</sup> Cuihna cuví jutu ndo. Tan sehe nu tsi ndo. Tan cuñi ndo javaha ndo cuhva cuñi nu. Tan nu ña vaha can cuví nu tsahñi nyivi nda quivi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyivi tyin cuñi nu tsa coo ñi cuhva iyó nu tyin vatya xaan nu. Tan jutu nyivi vatya cuví nu.

<sup>45</sup> Tan yuhu caahán yu tsa nditsa, maa tyin nyooho ña tsinú ñi ndo tsa caahán yu.

<sup>46</sup> ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú ñi ndo tsi yu?

<sup>47</sup> Nyivi cuenda Nyoo tyaá soho ñi tuhun caahán ra. Maa tyin nyooho ñavin nyivi cuenda Nyoo cuví ndo, yacan cuenda ña cuñi ndo tyaa soho ndo tsa caahán yu —catyí ra Jesús.

*Ra Cristo, tsa iyó maa ra nda ndi cumañi ca coo ra Abraham,*

<sup>48</sup> Tacan tan catyí ra Israel naha ra tsihin ra:

—¿A ña nditsa tyin yooho ra ñuu Samaria cuví un, tan yihí tatyí ña vaha tsi un? —catyí ra naha tsihin ra.

<sup>49</sup> Tan nacahan ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu.

<sup>50</sup> Yuhu ña nducú yu tsa jacahnu nyivi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu.

<sup>51</sup> Tsa nditsa catyí yu tyin nyivi tsa tyaá yahvi tsa caahán yu ña cua tsa tuhun tsiihi añima ñi —catyí ra Jesús tsihin ra naha.

<sup>52</sup> Tacan tan nacahan ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandihi ca ra cuví ndusu yuhu Nyoo tsihi ra naha. Tan yooho catyí un tyin nyivi tyaá yahvi tsa caahán un ña cua cúu ñi.

<sup>53</sup> ¿A cahnu ca ra cuví yooho tan ñavin ca ra Abraham jutu yo? Maa ra tsihi ra tan tacan tucu ra cuví ndusu yuhu Nyoo. ¿Yóo ra cuví yooho cuñi maa un? —catyí ra naha tsihin ra.

<sup>54</sup> Tan nacahan ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyooho tuhun tyin Nyoo ndo cuví tsi ra.

<sup>55</sup> Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra.

<sup>56</sup> Ra Abraham tsii tsaahnu yo sii xaan cuñi ra tyin cua nyehe ra quivi cua quitsi yuhu nu ñuhu ñayivi. Nyehe ra quitsi yu tan sii xaan cuñi ra —catyí ra Jesús tsihin ra naha.

<sup>57</sup> Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ðtan catyí un tyin nyehe un tsi ra Abraham!

<sup>58</sup> Tan nacañan ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

<sup>59</sup> Tacan tan quihin ra naha yuu tyin cua cañi ra naha tsi ra Jesús. Maa tyin iin yaha ñi quihvi xeehe ra tan yaha ra mahñu ra naha tan quitã ra tsitsi vehe ñuhu can cuahán ra.

## 9

*Nu janduvaha ra Jesús tsi iin ra cuaa nda cacu ra*

<sup>1</sup> Cuhva tsa yaha ra Jesús iin nu yaha ra, nyehe ra tsi iin ra cuaa nda cacu ra.

<sup>2</sup> Tan quitsaha tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cacu ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tsihin ra.

<sup>3</sup> Tan nacañan ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee ñni ra tsi nyivi tsa cuenda ra can.

<sup>4</sup> Tsa tsinu cahñi, cuñi tsi tsa javaha yu tyiñu ra tsa jaquitsi tsi yu. Tyin tsa yatyin cuui cua cuaa tan ña cua cuvi ca jaha tyiñu yo.

<sup>5</sup> Tsa ndi nyii yu nu ñuhu ñayivi ihya, ñuhu jandunditsin [cuenda nyivi iyó] nu ñuhu ñayivi ihya cuví yu.

<sup>6</sup> Tsa yaha tsa cañan ra Jesús tacan, tan tiví sii ra nu ñuhu. Tan jatyi ra luxu nyahyu tsihin sii ra tan tyaã ra tinuu ra cuaa can.

<sup>7</sup> Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñi tsi catyí: “Jacuhun Yu Tsi Un.”

Tacan tan ra cuaa can tsahan ra tsinacatya ra nuu ra. Tan cuhva tsa tsaã nyico ra, tsa nyehé ra.

<sup>8</sup> Tacan tan nyivi iyó yatyin yuvehe ra, tan nyivi tsa nyehe tsi ra tsa ndi cuaá ra catyí ñi:

—¿A ñavin ra ihya cuví ra tuhvã tsinyaá tsicán xuhun? —catyí ñi.

<sup>9</sup> Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

<sup>10</sup> Tacan tan quitsaha tsicá tuhun ñi tsi ra:

—¿Tan nácaa tyin cuví nyehé un vityin? —catyí ñi.

<sup>11</sup> Tan catyí ra:

—Ra tsa nañi Jesús, ra ican jatyi nyahyu tan tyaã ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yaha nacatya yu nuu yu tan nanyehe yu —catyí ra tsihin ñi.

<sup>12</sup> Tacan tan quitsaha tsicá tuhun ñi tsi ra:

—¿Tan numaa nyii ra can vityin?

Tan catyí ra tsihin ñi:

—Ña tsitó yu —catyí ra.

*Nujanahma ra cuví fariseo nahara tsi ra cuaã tsa nduvaha*

<sup>13</sup> Tacan tan tsindaca ñi tsi ra tsa nduvaha can nuu ra cuví fariseo nahara.

<sup>14</sup> Tyin quivi tsa jatyi ra Jesús nyahyu tan janduvaha ra tsi ra can, cuví tsi quivi quitatú nyivi.

<sup>15</sup> Yacan cuenda ra cuví fariseo nahara tsicã tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaã ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

<sup>16</sup> Tacan tan catyí juhva ra fariseo nahara:

—Ra tsa javaha yacan ñavin cuenda Nyoo cuví ra, tyin ña tyaá yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javahā ra tsa iyo ihya tatun ra iyó cuatyí cuví ra? —catyí ra naha.

Tan siin siin tsa caahán ra naha. Tan natahví sava ra naha.

<sup>17</sup> Tan tsicā tuhun nyico ra naha tsi ra nduvahā can inga tsaha, tan catyí ra naha tsihin ra:

—¿Tan yooho, náa catyí un tuhun ra tsa janduvahā tinuu un? —catyí ra naha.

Tan nacahān ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

<sup>18</sup> Maa tyin ra cuví ityi nuu tsihin nyiví Israel ña cuñí ra naha tsinu ñi ra naha tsa cuaa ra can tan nanyehe ra. Nda cuanda canā ra naha tsi jutu ra tan tsi sihi ra.

<sup>19</sup> Tan tsicā tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaa ra cacū ra? ¿Nacaa tsa cuví nyehé ra vityin? —catyí ra naha.

<sup>20</sup> Nacahān jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quiví cacū ra.

<sup>21</sup> Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvahā tinuu ra. Ndaça tuhun maa ndo tsi ra. Tsa iyó tucu maa cuiya ra. Tan cuví nacatyí tuhun maa ra tsihin ndo —catyí ñi tsihin ra naha.

<sup>22</sup> Jutu ra tan sihi ra caahán ñi tacan tsa cuenda tyin yuuhví ñi tsi ra cuví ityi nuu tsihin nyiví Israel naha ra, tyin tsa natuhun tahan ra naha tyin cua tava cuii ra naha tsi nyiví vehe ñuhu, tun cahan ñi tyin ra Jesús cuví ra Cristo, ra tsa jaquitsi Nyoo.

<sup>23</sup> Yacan cuenda catyí ñi: “Ndaça tuhun ndo tsi maa ra. Ra tsa ñihi cuví ra.”

<sup>24</sup> Tacan tan canā nyico ra naha tsi ra tsa nduvahā can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

<sup>25</sup> Tacan tan nacahān ra tsa nduvahā can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vityin nditsin nyehé yu —catyí ra.

<sup>26</sup> Tan tsicā tuhun nyico ra naha tsi ra inga tsaha tan catyí ra naha:

—¿Náa icā ra tsihin un? ¿Nacaa icā ra tan nanyehe un? —catyí ra naha tsihin ra.

<sup>27</sup> Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñí ndo tsa cahan yu inga tsaha? ¿A cuñí ndihi ndo cunyicun ndo tsi ra can?

<sup>28</sup> Tacan tan nduxaān ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoo tsa naha yihí ndi.

<sup>29</sup> Nyuhu tsitó ndi tyin Nyoo cahan tsihin ra Moisés tahan tsa naha. Maa tyin ra can, ndi ña tsitó ndi numaa quee ra —catyí ra naha.

<sup>30</sup> Tacan tan nacahān ra tsa nduvahā can tan catyí ra:

—¡Naa tsa iyo cahnu cuví tsehe! Nyoo ña tsitó ndo numaa quee ra, tan jananyehe ra tsi yu.

<sup>31</sup> Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icā ra cuhva cuñí ra, tyaá soho Nyoo tsa caahán ra.

<sup>32</sup> Ndi iin tsaha tan ñaha ca cuñi yo tatun iyó iin ra jananyehe tsi iin ra cuaa nda cacū ra.

<sup>33</sup> Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

<sup>34</sup> Tacan tan catyí ra naha tsihin ra:

—Yooho ra iyó cuatyí cuví un nda cacū un. ¿Tan cuñí un jacuaha un tsi nyuhu? —catyí ra naha.

Tan tava cuii ra naha tsi ra vehe ñuhu.

*Nyiví tsa nduve tuhun Nyoo iyó añima tuma tsa cuaa ñi*

<sup>35</sup> Tsitó ra Jesús tyin tava ra naha tsi ra tsa janduvahā ra vehe ñuhu. Tan

tsa ñihí tahan ra tsihin ra tan catyí ra tsihin ra:

—¿A tsinú ñi yooho tsa caahán Rayi tsa quee nda gloria? —catyí ra tsihin ra.

<sup>36</sup> Tan nacahan ra tan catyí ra:

—Catyí tuhun tsihin yu, taa, yóo ra cuví ra tyin tsinú ñi yu tsi ra —catyí ra tsihin ra.

<sup>37</sup> Tan catyí ra Jesús:

—Tsa nyehé un tsi ra. Tan juvin ra natuhún tsihin un —catyí ra tsihin ra.

<sup>38</sup> Tacan tan tsicuiñi tsi ra tsaha ra Jesús tan catyí ra tsihin ra:

—Tsinú ñi yu tsi un, Jutu Mañi yu —catyí ra tsihin ra Jesús.

<sup>39</sup> Tan catyí ra Jesús:

—Yuhu vatsí yu tyin catyí tuhun yu tsa iyó aña nyivi iyó nu ñuhu ñayivi ihya. Tyin nyivi cuaa, ñi ña tsitó tuhun Nyoo cua nanyehe ñi tyin coo tuhun Nyoo aña ñi. Tan nyivi cuñi tyin nditsin nyehé ñi, catyí ñi tyin tsitó ñi tuhun Nyoo, coto ñi tyin cuaa ñi tyin ña tsinú ñi ñi tsi yu —catyí ra Jesús.

<sup>40</sup> Tacan tan juhva ra fariseo tsa nyecú tsihin ra Jesús tsiñi ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

<sup>41</sup> Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsitó ndo, yacan cuenda ndoó cuatyí ndo siqui ndo —catyí ra tsihin ra naha.

## 10

*Mbee ticatyí jana Nyoo cuví nyivi yihí cuenda ra, tan tsitó ñi tsi ra tsa jaquitsi Nyoo tyin jahá cuenda ra tsi ñi*

<sup>1</sup> Caahán nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihví ra, ra ican cuví ñasuhu.

<sup>2</sup> Maa tyin ra tsa quihví ityi yuhu cora, ra jahá cuenda mbee can cuví ra.

<sup>3</sup> Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tava ra tsi ti ityi tsata cora.

<sup>4</sup> Tsa yahá tava ra tsi ti, tan cuahán ra ityi nuu tan nyicún ti naha ti tsi ra, tyin nacotó ti ndusu ra.

<sup>5</sup> Maa tyin tatun nyivi tsa ña nacotó ti ndusu, tsinú ti nuu ñi tan ña cuahán ti cuanyicún ti tsi ñi.

<sup>6</sup> Tyehen cahan ra Jesús tsihin nyivi. Maa tyin maa ñi ña cutuñi ñi ña naa tuhun caahán ra tsa caahán ra tacan.

*Ra Jesús cuví ra jahá cuenda vaha mbee ticatyí*

<sup>7</sup> Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihvi nyivi yihí cuenda yu tan cuví ñi tumaa mbee ticatyí jana yu.

<sup>8</sup> Tandihí ra tsa quitsi tsa ndi cumañi quitsi yu, ra suhu cuví ra naha. Maa tyin mbee jana yu ña tyaa yahvi ti naha ti tsa cahan ra naha.

<sup>9</sup> Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cahun ca ñi anyaya. Tan cuví ñi tumaa mbee tsa quihvi tan quitá tsitsi cora can. Tan ñihí ti cuhu tsatsí ti.

<sup>10</sup> Tin ra ñasuhu, vatsí ra, vatsí suhu ra, vatsí cahñi ra, vatsí jativi ra. Maa tyin yuhu vatsí yu tyin coo vaha ndo ñayivi nyitó tsa ña cua naa maa.

<sup>11</sup> Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can.

<sup>12</sup> Maa tyin ra cuví musu, tatun nyehé ra vatsí lobo tsa cuví quití xaan, nacoó ra mbee jana tsitoho ra. Tan tsinú ra. Tyin ñavin jana maa ra cuví tsi ti naha ti. Tacan tan cua tin quití xaan can tsi mbee can. Tan jacunu ti tsi mbee can ityi can tan ityi ihya.

<sup>13</sup> Musu can tsinú ra tyin jahá tyiñu ra tsa cuenda xuhun ñi. Tan ña jahá



cuenda vaha ra tsi mbee can, tyin ñavin jana ra cuví tsi ti naha ti.

14 Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu,

15 tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu.

16 Iyó tucu inga mbee jana yu tsa ña yihí tsitsi cora ihya. Cuñí tsi tsa cuhun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

17 Jutu yu cuñí ra tsi yu tyin tsahá yu ñayivi yu tsacatyí nyivi. Maa tyin yaha can, tan cua nacuhva nyico ra ñayivi yu.

18 Yoñi cuvi quihin nyaá ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

19 Tsa tsiñi nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahví sava nyico ra naha inga tsaha.

20 Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

21 Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

*Nu ña cuñí ra cuví ityi nuu tsihin nyivi Israel tyaa yahvi ra naha tsi ra Jesús*

22 Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnu.

23 Tan ra Jesús tsicá nuu ra vehe ñuhu can ityi nu nañi corredor ra Salomón.

24 Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quitsaha tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsi Nyoo? Cahán catsi tsihin ndi vityin ihya —catyí ra naha.

25 Tan catyí ra Jesús:

—Tsa yaha cahan yu tsihin ndo, tan ña tsinu iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu.

26 Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo.

27 Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu.

28 Yuhu tsahá yu ñayivi nyito tsa ña cua naa maa coo ti. Tan ña cua cunaa ti. Tan ndi yoñi cuví quihin nyaá tsi ti naha ti tsitsi ndaha yu.

29 Maa Jutu yu tsaha tsi ti naha ti tsi yu. Tan cahnu ca cuví maa ra tan ñavin ca tandihí nyivi. Tan yoñi cuví quihin nyaá tsi ti tsitsi ndaha ra.

30 Yuhu tan Nyoo Jutu yu, iin ñi cuví ndi —catyí ra Jesús.

31 Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra.

32 Tan catyí ra Jesús tsihin ra naha:

—Cuaha xaan tsa vaha javaha yu nuu ndo tsihin tunyee iñi Jutu yu. ¿Tan ndaa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

33 Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javaha un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

34 Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo.

<sup>35</sup> Tsitó yo tyin tsa caahán tuhun Nyoo, ña cua cuvi catyí yo tyin ña nditsa. Tan Nyoo jacunañi ra nyoo tsi nyivi naquihín tsa caahán ra.

<sup>36</sup> Tatun maa Nyoo nacatsi tsi yuhu tan jaquitsi ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu?

<sup>37</sup> Tatun ña javahá yu tsa javahá Jutu yu, ña tsinu iñi ndo tsi yu.

<sup>38</sup> Maa tyin tatun javahá yu, vasu ña cua tsinu iñi ndo tsi yu, maa tyin tsinu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

<sup>39</sup> Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

<sup>40</sup> Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutyá ra Juan tsa jihna, tan ndoo ra ican.

<sup>41</sup> Cuaha nyivi tsahan tsinyehe tsi ra, tan catyí ñi:

—Nditsa, vasu ndi intuhun tsa iyo ña javahá ra Juan, maa tyin tandihi tsa cahan ra cuenda ra ihya tan nditsa —catyí ñi.

<sup>42</sup> Tan cuaha xaan nyivi tsa iyó ityi can tsinu iñi tsa caahán ra Jesús.

## 11

### *Nu tsihi ra Lázaro*

<sup>1</sup> Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña.

<sup>2</sup> Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra tsihin ixi jiñi ña.

<sup>3</sup> Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhvi xaan ra.

<sup>4</sup> Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhvi ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

<sup>5</sup> Cuñi xaan ra Jesús tsi ña Marta tan ña tahan ña, tan ra Lázaro cuhva ñi.

<sup>6</sup> Maa tyin quivi tsa tsiñi ra tyin cuuhvi ra Lázaro, ndoo ra uvi quivi ca nu nyii ra.

<sup>7</sup> Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

<sup>8</sup> Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vityin, cuñi nyico un cuhun un inga tsaha ¿Nacuenda?

<sup>9</sup> Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhu tsa jandunditsín nu ñuhu ñayivi ihya.

<sup>10</sup> Maa tyin tatun tsacuaa tsicá nuu ra, cuvi nduva ihñi ra tyin nduve ñuhu Nyoo jandunditsín nu cuahan ra.

<sup>11</sup> Tacan tan quitsaha catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

<sup>12</sup> Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

<sup>13</sup> Maa tyin ra Jesús cuñi ra catyí ra tyin ra Lázaro tsa tsihi ra. Tan ra tsicá tsihin ra, cuñi maa ra naha tyin nditsa tsa quixí ra.

<sup>14</sup> Tacan tan cahan catsi ra Jesús tsihin ra naha:

—Ra Lázaro tsa tsihi ra.

<sup>15</sup> Tan cusí iñi yu tyin yoñi yu nyii ndacan. Tyin tacan vaha ca tsa cuenda nyooho na tsinu iñi ndo tsa caahán yu. Cohon ndo cunyehe yo tsi ra —catyí ra Jesús tsihin ra naha.

<sup>16</sup> Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cohon ndihi yo tyin cúu yo iin caa ñi tsihin ra —catyí ra.

*Ra Jesús cuví ra janandotó tsi yo tan tsahá ra ñayivi nyito coo yo*

<sup>17</sup> Tsa tsaá ra Jesús Betania, ñihi tuhun ra tyin tsa cumi quivi nyii ra Lázaro tsitsi ñuhú.

<sup>18</sup> Ñuu Betania can canyíi tsi yatyin ñi nu canyíi ñuu Jerusalén, tumaa iin cuhva tsa uvi kilómetro sasava.

<sup>19</sup> Tan cuaha ra cuví ityi nuu tsihin nyivi Israel cuahan cua nyehe nu nyii ña Marta tan ña María cua jatyinyee ra naha tsi ñi tyin tsihi cuhva ñi.

<sup>20</sup> Tan ñihi tuhun ña Marta tyin tsa cua tsaá ra Jesús. Tan cuahán ña cua jatahan ña tsi ra. Maa tyin ña María ndoo ña yuvehe.

<sup>21</sup> Tan catyí ña Marta tsihin ra Jesús: —Jutu Mañi yu, tun tsatyin ihya nyii maa un, ña cua cúu cuhva yu.

<sup>22</sup> Maa tyin yuhu tsitó yu tyin Nyoo cua javaha ra tandihi tsa ndacan un tsi ra —catyí ña tsihin ra.

<sup>23</sup> Tan catyí ra Jesús tsihin ña:

—Cuhva un cua nandoto ra.

<sup>24</sup> Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihí quivi —catyí ña.

<sup>25</sup> Tacan tan catyí ra Jesús tsihin ña: —Yuhu cuví ra janandotó ndiyi. Tan tsahá yu tsa coo nyitó nyivi. Nyivi tsinú iñi tsa caahán yu, vasu tsa tsihi ñi maa tyin coo nyico ñi.

<sup>26</sup> Tan tandihi ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahán yu ihya? —catyí ra tsihin ña.

<sup>27</sup> Tan catyí ña:

—Tsinú iñi yu, Jutu Mañi yu, tyin yooho cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

*Nu tsacú ra Jesús nu ñaña ra Lázaro*

<sup>28</sup> Tsa yaha tsa cahan ña Marta tacan, tan tsahan ña tsiquihin ña tsi

ña María tahan ña, tan xeehe ñi cahan ña tsihin ña:

—Tsa tsaá Ra Maestro ihya. Tan caná ra tsi un —catyí ña.

<sup>29</sup> Tsa tsiñi ña María tsa caahán ña, numi xaan ña nduvita ña, tan cuahán ña nu nyii ra Jesús.

<sup>30</sup> Tan ñaha ca quihvi ra Jesús tsitsi ñuu hora can, ndi nyii ra nu ñanihi ña Marta tsi ra.

<sup>31</sup> Tan nda yuvehe ña María, yucú ra cuví ityi nuu tsihin nyivi Israel jatyinyee ra naha tsi ñi. Tan nyehe ra naha tyin numi quita ña. Tan cuñi maa ra naha tyin cuahán ña nu ñaña cua vacu ña. Tan cuahán ndihi ra naha tsata ña.

<sup>32</sup> Tan cuhva tsa tsaá ña María nu nyii ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyin nyii un ihya, ña tsihi ra cuhva yu —catyí ña.

<sup>33</sup> Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuiihya xaan cuñi ra.

<sup>34</sup> Tan tsica tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, cohon tan nyehe un —catyí ñi tsihin ra.

<sup>35</sup> Tan tsacú ra Jesús.

<sup>36</sup> Tacan tan catyí ra Israel can naha ra:

—Nyehe ndo tyin yaha xaan cuñi ra tsi ra —catyí ra naha.

<sup>37</sup> Maa tyin catyí juhva ra naha:

—Ra ihya jananyehe ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

*Nu janandoto ra Jesús tsi ra Lázaro*

<sup>38</sup> Nducuiihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuví can. Tan ndasí iin yuu yuhu can.

<sup>39</sup> Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyí ña.

<sup>40</sup> Maa tyin catyí ra Jesús tsihin ña:  
—¿A ña caahán yu tsihin un tyin tatun tsinú iñi un, cua nyehe un tsa cahnu cuví Nyoo? —catyí ra tsihin ña.

<sup>41</sup> Tacan tan jatsiyō ra naha yuu can. Tan nanyehe ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu.

<sup>42</sup> Yuhu tsitó yu tyin maa ñi maa tsiñi un tsa caahán yu. Maa tyin tye-hen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsi tsi yu —catyí ra Jesús tsihin Nyoo.

<sup>43</sup> Tsa yaha tsa cahan ra tacan, cana tsa ra, tan catyí ra:

—¡Lázaro, quita nu nyii un juvin!

<sup>44</sup> Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyivi Israel tsihin ndiyi. Tan catyí ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

*Nu nducú cahñi ra naha tsi ra Jesús (Mt. 26.1-5; Mr. 14.1-2; Lc. 22.1-2)*

<sup>45</sup> Tan cuaha xaan ra cuví ityi nuu tsihin nyivi Israel tsa tsahan tsihin ña María quitsaha tsinú iñi ra naha tsa nyehe ra naha tsa javaha ra Jesús.

<sup>46</sup> Maa tyin juhva ra naha tsahan ra naha tsijacoto ra naha tsi ra fariseo naha ra tsa javaha ra Jesús.

<sup>47</sup> Tacan tan ra fariseo can naha ra tan ra cuví ityi nuu tsihin ra jutu naha ra jatitahan ra naha tsi ra tuhvá ndu iin naha ra tan catyí ra naha:

—¿Nacaa cua javaha yo? Tyin cuaha xaan tsa iyo javahá ra can.

<sup>48</sup> Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumí tyiñu nda ñuu Roma cua quitsi ra naha tan cua cani ra naha vehe ñuhu yo tan ñuu yo —catyí ra naha.

<sup>49</sup> Maa tyin ra Caifás ra tsahnu tsa cuví ityi nuu tsihin ra jutu naha ra

cuiya can, cahan ra tan catyí ra tsihin ra naha:

—Nyooho nduve maa náa tsitó ndo.

<sup>50</sup> Ndi ña cutuñi iñi ndo tyin vaha ca tsa cúu intuhun ñi rayi tsa cuenda tandihi nyivi ñuu, tan ñavin ca tsa cúu tandihi yo —catyí ra Caifás.

<sup>51</sup> Ra Caifás can ñavin tsa cuñi maa ra tan caahán ra, tyin ra cuví ityi nuu tsihin tandihi jutu cuví ra cuiya can, yacan cuenda maa Nyoo jacahan tsi ra nu catyí ra tyin ra Jesús cua cúu ra tsa cuenda tandihi nyivi ñuu Israel.

<sup>52</sup> Tan ñavin tsa cuenda maa ñi maa nyivi can, maa tyin cua jandu iin ra tsi tandihi nyivi cuví sehe Nyoo tsa iyó tandihi ca ñuu.

<sup>53</sup> Tacan tan nda quivi can tan ra cuví ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

<sup>54</sup> Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahán ra iin ñuu tsa nañi Efraín tsa canyii yatyin ñi nu tsiqui, nu cuví ñuhu ityi. Tan ndoó ra ican tsihin ra tsicá tsihin ra.

<sup>55</sup> Ña cuaha ca quivi tan tahan tsi vico cuenda nyivi Israel, vico tsa nañi pascua. Tan cuaha xaan nyivi quee ñi ñuu ñi tan cuahán ñi nda ñuu Jerusalén cua javaha ñi tsa tuhvá maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quivi vico can.

<sup>56</sup> Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñi nyooho? ¿A cua quitsi ra can vico ihya, o ña cua quitsi ra? —catyí ñi.

<sup>57</sup> Tan ra cuví fariseo tan ra cuví ityi nuu tsihin jutu, catyí ra naha tyin tatun ndaa nyivi tsitó nu nyii ra Jesús, na catyí tuhun ñi. Tyin cuquihin ra naha tsi ra tyin cunyi ra vehe caa.

## 12

*Nu tyosó ña María ndutya tami tsaha ra Jesús*

*(Mt. 26.6-13; Mr. 14.3-9)*



<sup>1</sup> Cumañi iñu quiví ca tsa tahan tsi vico pascua, tan tsaá ra Jesús ñuu Betania nu iyó ra Lázaro, ra tsa janandoto ra.

<sup>2</sup> İcan javaha ñi tsa cuxiñi ra Jesús. Ña Marta tyihí ña coho nu mesa. Tan tsinyaa ra Jesús nu mesa. Tan nyaá ndihí tucu ra Lázaro tsihin ra.

<sup>3</sup> Tacan tan quihín ña María tumaa sava litru ndutya tami tsa tsinu tsihin maa ñi maa yucu tsa nañi nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yaha can tan jana ityi ña tsaha ra tsihin ixí jiñi ña. Nanñi cahnu maa tsitsi vehe can tsitu xico ndutya tami can.

<sup>4</sup> Tan İcan nyii tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsaha catyí ra Judas can tsihin ñi can:

<sup>5</sup> —¿Nacuenda ña xico ndo ndutya tami ihya tsi nyiví, tan cuhva ñi cuenda mil tsi ndo tsa cuenda can, (uñi cientu denario) tan jatinyee ndo tsi nyiví ndaahvi? —catyí ra.

<sup>6</sup> Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyiví ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can.

<sup>7</sup> Tacan tan catyí ra Jesús tsihin ra: —Jaña tsi ña, tyin ñaha ihya javaha ña tyehen tsa cuenda tsa cua quihvi cuñu ñuhu yu tsitsi ñuhu.

<sup>8</sup> Nyiví ndaahvi tacan ñi nyecú maa ñi tsihin ndo, maa tyin yuhu ña cua cunyaa ca yu tsihin ndo tacan —catyí ra Jesús tsihin ra Judas.

*Nu nducú cahñi ndihí ra Israel naha ra tsi ra Lázaro*

<sup>9</sup> Cuaha xaan nyiví Israel ñihí tuhun ñi tyin ra Jesús nyii ra Betania, tan tsahan ñi İcan. Ñavin intuhun ñi ra Jesús cuñi ñi nyehe ñi tyin cuñi ndihí tucu ñi nyehe ñi tsi ra Lázaro, ra tsa janandoto ra Jesús.

<sup>10</sup> Tacan tan ra cuví ityi nuu tsihin jutu natuhun tahan ra naha tyin cua cahñi ndihí ra naha tsi ra Lázaro.

<sup>11</sup> Tyin tsa cuenda ra tan cuaha xaan nyiví Israel quitá tsiyo ñi tan quitsaha tsinú iñi ñi tsi ra Jesús.

*Nu quihvi ra Jesús ñuu Jerusalén (Mt. 21.1-11; Mr. 11.1-11; Lc. 19.28-40)*

<sup>12</sup> Cuaha xaan nyiví tsaá ñi ñuu Jerusalén tsa cuví vico pascua. Tan tsa inga quiví tsito ñi tyin ra Jesús cua tsaá ra ñuu can.

<sup>13</sup> Tacan tan tsahnya ñi ndaha ndicaha tan cuahán ñi cua jatahan ñi tsi ra Jesús. Tan caná tsaá ñi, tan catyí ñi:

—¿Cahnu xaan cuví Nyoo! ¡Nasoco xaan Nyoo tsi ra vatsí ihya tsihin tunyee iñi Nyoo! ¡Nasoco xaan Nyoo tsi Rey cuenda yo nyiví Israel! —catyí ñi, caná tsaá ñi.

<sup>14</sup> Tan ñihí ra Jesús iin burru tan tsicoso ra tsi ti tumaa catyí maa nu tutu Nyoo tyehen:

<sup>15</sup> Ña nayuhvi ndo nyiví ñuu Sión Nyehé ndo, vatsí Rey ndo. Yosó ra iin burru —catyí tsi nu tutu Nyoo.

<sup>16</sup> Quiví can ra tsicá tsihin ra Jesús, ña cutuñi iñi ra naha tsa nyaá nu tutu Nyoo. Maa tyin tsa yaha cuanuhu ra Jesús nda gloria, nducuhun iñi ra naha tyin tandihí yacan nyaá can nu tutu Nyoo tyin tacan cua tahan ra. Tan tacan tsa cuui tahan ra.

<sup>17</sup> Nyiví tsa nyehe quiví tsa cana ra Jesús tsi ra Lázaro tsitsi ñaña, quiví janandoto ra tsi ra, nacatyí tuhun ñi tsa nyehe ñi.

<sup>18</sup> Yacan cuenda cuaha xaan nyiví tsijatahan tsi ra Jesús, tyin tsito ñi tsa iyo tsa javaha ra.

<sup>19</sup> Tacan tan ra cuví fariseo catyí ra naha natuhun tahan ra naha:

—Tsa nyehe maa ndo tyin nduve maa náa cuví javahá yo, tyin tandihí nyiví tan cuahán ñi cuanyicún ñi tsi ra —catyí ra naha.

*Nu nanducú juhva ra tsa quee Grecia tsi ra Jesús*

<sup>20</sup> Yucú tucu juhva ra Grecia mahñu nyiví tsa tsahan tsijacahnu vico ñuu Jerusalén.

<sup>21</sup> Tacan tan natuhva ra Grecia can naha ra nu nyaá ra Felipe, ra quee ñuu Betsaida tsa canyií Galilea, tan cahan ndaahvi ra naha tsihin ra tan catyí ra naha:

—Taa, cuñí ndi cahan ndi tsihin ra Jesús —catyí ra naha.

<sup>22</sup> Tan tsahan ra Felipe tsicahan ra tsihin ra Andrés. Tan tsahan nduvi ra naha tsicatyí tuhun ra naha tsihin ra Jesús tyin ra Grecia can cuñí ra naha cahan ra naha tsihin ra.

<sup>23</sup> Tan nacahan ra Jesús, tan catyí ra:

—Vityin tsa tsaá hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayí tsa quee nda gloria.

<sup>24</sup> Tsa nditsa catyí yu tsihin ndo tyin tatun iin tsiti tan ña cua quihvi tsi ñuhu tan ña tyahyu tsi, intuhun ñi tsiti cua cuví tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi.

<sup>25</sup> Nyivi tsa cuñí xaan ñayivi iyó ñi, cua cunaa ñi. Maa tyin nyivi ña cuñí ñayivi iyó ñi nu ñuhu ñayivi ihya, cua ñihi ñi ñayivi nyitó tsa ña cua naa maa coo ñi.

<sup>26</sup> Ndáa nyooho nyivi cuñí javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihi nyooho tsa jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

*Nu caahán ra Jesús nácaa cua cúu ra*

<sup>27</sup> Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundo ho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya.

<sup>28</sup> Vaha ca cahan yu tsihin Jutu yu tan catyí yu: “Jutu Mañi yu, jacahnu sivi un” —catyí ra Jesús.

Tacan tan cahan iin ndusu ityi andivi tan catyí tsi tyehen:

—Tsa yaha jacahnu yu sivi yu, tan cua jacahnu nyico yu inga tsaha —catyí ndusu can.

<sup>29</sup> Tan nyivi nyecú ican, tsiñi ñi ndusu can, tan catyí ñi tyin savi

cahan. Tan inga ñi catyí tyin iin ángel cahan tsihin ra.

<sup>30</sup> Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahan ndusu can, tyin tsa cuenda tsa vaha tsi maa ndo cuví can.

<sup>31</sup> Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuii Nyoo tsi nu ndacá ñaha nu ñuhu ñayivi ihya.

<sup>32</sup> Tan cuhva tsa cua ticaa nyivi tsi yu nu cruu, yacan cuví cuhva cua ixta yu tandihi nyivi cahun ñi tsihin yu —catyí ra Jesús.

<sup>33</sup> Caahán ra tacan tsa cuenda tsa cuñí ra cutuñi iñi ñi tyin tacan cua cúu ra.

<sup>34</sup> Tan nacahan nyivi tan catyí ñi tsihin ra:

—Tuhvá ndi tsiñi cahví ra naha nu libru ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yoo ho tyin cua ticaa nyivi tsi Rayí quee nda gloria nu cruu? Tan ¿yoo ra cuví Rayí tsa quee nda gloria tsa caahán un tuhun? —catyí ñi, tsicá tuhun ñi tsi ra.

<sup>35</sup> Tacan tan catyí ra Jesús tsihin ñi:

—Ñuhu tsa jandunditsín nu nyecú ndo, juhva ña quivi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi.

<sup>36</sup> Tsinu iñi ndo tsi yuhu ra cuví ñuhu nditsin, tsitsi tsa ndi nyivi yu tsihin ndo. Tacan tan cuví ndo nyivi iyó nu nditsin.

Tsa yaha cahan ra Jesús tacan tan jatsiyo ñi ra tsi ra nuu ñi.

*Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús*

<sup>37</sup> Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra.

<sup>38</sup> Tyin taahán tsi tsa cuví tumaa tsa cahan ra Isaías ra cuví ndusu yuhu Nyoo, nu cahan ra tyehen:

Jutu Mañi yu, yoñi cuñí tsinu iñi tsa caahán ndi.

Yoñi cutuñi iñi tunyee iñi tsa iyó tsi un, Jutu Mañi yu, catyí ra Isaías tahan tsanaha.

<sup>39</sup> Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaa nyico tucu ra Isaías tyehen:

<sup>40</sup> Nyoo jacuaa ra tsi ñi. Tan jandundava ra aña ñi,

tan ña cua nyehe ñi tsihin tinuu ñi, tan ña cua cutuñi iñi ñi tsihin aña ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

<sup>41</sup> Ra Isaías cahan ra tyehen tyin nyehe ra tsa cahnú cuví Jutu Mañi yo Jesús, tan cahan ra tuhun ra.

<sup>42</sup> Cuaha xaan nyivi Israel tsinú iñi tsi ra Jesús. Tan nda cuanda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyivi tyin yuuhví ra naha tsi ra cuví fariseo naha ra. Coto tava cuí ra can naha ra tsi ra naha vehe ñuhu.

<sup>43</sup> Tyin cuñi ra naha nduvaha ra naha nuu nyivi tan ñavin nuu Nyoo.

*Tuhun cahan ra Jesús cua tatsi tuñi tsi nyivi*

<sup>44</sup> Ñihi caahán ra Jesús, tan catyí ra: —Nyivi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihi iñi ñi tsi ra tsa jaquitsi tsi yu.

<sup>45</sup> Tan nyivi tsa nyehé tsi yu, nyehé ndihi ñi tsi ra tsa jaquitsi tsi yu.

<sup>46</sup> Yuhu cuví tumaa ñuhu nditsin tan vatsí yu jandunditsin yu nu ñuhu ñayivi ihya, tyin nyivi tsinú iñi tsi yu ña cua ndoo ñi nu naa.

<sup>47</sup> Maa tyin tatun yihí ndo tsiñi ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayivi ihya tyin tatsi tuñi yu tsi nyivi. Vatsí yu tyin vatsí jacacú yu tsi ñi.

<sup>48</sup> Nyivi tsa ña cuñi naquihin vaha tsa caahán yu tan ña cuñi ñi javaha ñi tumaa cuhva cuñi yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihí quivi.

<sup>49</sup> Tyin ñavin cuenda maa yu caahán yu. Jutu yu, ra tsa jaquitsi tsi

yu, tsaha ra tyiñu tsi yu caahán ra náa cua cahan yu tan náa cua jacuaha yu.

<sup>50</sup> Tan tsitó yu tyin tyiñu tsa tsaha ra, tsahá tsi ñayivi nyitó tsa ña cua naa maa coo nyivi. Yacan cuenda, tandihí tsa caahán yu, caahán yu cuhva catyí maa Jutu yu tsa cahan yu.

## 13

*Nu nacatya ra Jesús tsaha ra tsicá tsihin ra*

<sup>1</sup> Tsa ndi cumañi ca iin quivi tan tahan tsi vico pascua, tsa tsitó maa ra Jesús tyin tsa cua tsa hora tsa cua quita ra nu ñuhu ñayivi ihya tan cunuhu ra nu nyaá Jutu ra. Tacan ñi maa cuñi xaan ra tsi nyivi cuenda ra tsa iyó nu ñuhu ñayivi ihya. Tan vityin cua janaha ra tsi ñi tyin cuñi xaan ra tsi ñi tyin cua cúu ra tsa cuenda ñi.

<sup>2</sup> Tan cuxiñi ra Jesús tsihin ra tsicá tsihin ra. Tan quihví nu ña vaha aña ra Judas Iscariote sehe ra Simón tan natyuhu nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra.

<sup>3</sup> Maa tyin ra Jesús tsitó ra tyin tsaha Jutu ra tandihí tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñi ra.

<sup>4</sup> Tacan tan nduvita ra tan tava ra jahma tsa nditsi ra ityi tsata, tan tsahñi ra iin toalla tsitsi ra.

<sup>5</sup> Tacan tan tyihí ra ndutya tsitsi iin tsicoho tan quitsaha nacatya ra tsaha ra tsicá tsihin ra. Tan jana ityi ra tsaha ra naha tsihin toalla can.

<sup>6</sup> Tan tsa cua nacatya ra tsaha ra Simón Pedro tan catyí ra Simón tsihin ra:

—Jutu Mañi yu, ¿a yooho cua nacatya tsaha yu?

<sup>7</sup> Tacan tan catyí ra Jesús:

—Vityin ña cutuñi iñi un tsa javahá yu, maa tyin cutuñi iñi maa un nu cuahán ca tsi quivi.

<sup>8</sup> Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuvi un.

<sup>9</sup> Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

<sup>10</sup> Maa tyin catyí ra Jesús tsihin ra:

—Nyivi tsa ndi tsityi, ña cuñi tsi tsa ndoo nanii cahnu cuñu ñuhu ñi. Tsaha ña ñi cuñi tsi ndoo, tyin tsa ndoo maa nanii ñi. Nyooho tsa ndoo maa ndo, vasu ña tandihi ndo ndoo —catyí ra Jesús.

<sup>11</sup> Cahán ra tsa ña tandihi ra naha ndoo tyin tsitó ra yoo cua xico tsi ra tsi nu xaan iñi tsi ra nahnu.

<sup>12</sup> Tsa yahá nacatya ra Jesús tsaha ra tsicá tsihin ra, tan tsinditsi nyico ra jahma ra, tan tsinyaá nyico ra inga tsaha nu mesa tan catyí ra tsihin ra naha:

—¿A cutuñi iñi nyooho tsa javaha yu tsihin ndo?

<sup>13</sup> Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuvi yu.

<sup>14</sup> Yuhu tsa cuvi yu Ra Jacuahá tan Jutu Mañi ndo, nacatya yu tsaha ndo, tan tacan cuñi tsi tsa nacatya tahan maa ndo tsaha ndo.

<sup>15</sup> Yuhu tsaha yu iin cuhva tsi ndo tyin javaha ndo tumaa cuhva javaha maa yu.

<sup>16</sup> Tsa nditsa catyí yu tsihin ndo tyin ndi iin musu tan ña cahnu ca cuvi ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuvi ra tan ñavin ca ra tsa tavá tyiñu tsi ra.

<sup>17</sup> Tatun cutuñi iñi ndo yacan, tan javahá ndo can, sii xaan cua coo ndo.

<sup>18</sup> Ñavin tsa cuenda tandihi ndo caahán yu. Yuhu tsitó maa yu yoo nacatsi yu. Maa tyin cuñi tsi tsa cuvi tumaa caahán tuhun Nyoo tyehen: “Ra tsa tsatsi paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo.

<sup>19</sup> Caahán yu tyehen tsihin ndo tsa ndi cumañi ca cuvi can tyin quivi cua

cuvi yacan, cua tsinu iñi ndo tyin yuhu cuvi ra tsa iyó nda ndi cumañi ca coo tandihi tsa iyó.

<sup>20</sup> Tsa nditsa catyí yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuvi can. Tan nyivi tsa naquihin vaha tsi yuhu, naquihin vaha ndihi ñi tsi ra tsa jaquitsi tsi yu —catyí ra Jesús.

*Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu (Mt. 26.20-25; Mr. 14.17-21; Lc. 22.21-23)*

<sup>21</sup> Tsa yahá tsa cahan ra Jesús yacan, tan quitsaha nducuihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

<sup>22</sup> Tacan tan ra tsicá tsihin ra, quitsaha nyehé nuu tahan ra naha, tan ña tsitó ra naha yoo tuhun caahán ra Jesús.

<sup>23</sup> Iin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuvi ra tsa cuñi xaan ra Jesús.

<sup>24</sup> Tan ra Simón Pedro javaha ra seña tsi ra can, na ndaca tuhun ra yoo tuhun caahán ra Jesús.

<sup>25</sup> Tacan tan ra ican tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoo ra cuvi ra tsa caahán un tuhun?

<sup>26</sup> Tan nacaahan ra Jesús tan catyí ra:

—Cua jatyii yu luxu paan, tan ra tsa cua cuhva yu itsi, ra ican cuvi ra —catyí ra.

Tacan tan quihin ra luxu paan tan jatyii ra, tan tsaha ra tsi ra Judas Iscariote, sehe ra Simón.

<sup>27</sup> Tsa quihin ra Judas paan can tan quihvi nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

<sup>28</sup> Maa tyin ndi intuhun ra tsa nyecú nu mesa can, ña cutuñi iñi ra naha nacuenta cahan ra tacan tsihin ra can.



<sup>29</sup> Ra Judas cuví ra yihí ndaha yitín nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa cujata ra tsa tsiñi ñuhu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñi maa ra naha.

<sup>30</sup> Tsa yaha quihín ra Judas paan can, tacan tan quitá ra. Tan tsacuaa cuví can.

*Tyiñu tsaa tsa tava ra Jesús tsi yo: tsa cuñi tahan yo tsi yo*

<sup>31</sup> Tsa yaha tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuví yuhu Rayi tsa quee nda gloria. Tan cua nyehe ñi tsa cahnu cuví Nyoo tsa cuenda yu.

<sup>32</sup> Tatun Rayi tsa quee nda gloria jacahnú ra tsi Nyoo, tacan tucu Nyoo cua jacahnu ra tsi ra. Tsa tsa quivi cua jacahnu ra tsi ra.

<sup>33</sup> Sehe yu, ña naha ca cua cunyii yu tsihin ndo. Nyooho cua nanducu ndo tsi yu, maa tyin tumaa tsa cahan yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuví cuhun ndo nu cua cuhun yu.

<sup>34</sup> Tshá yu iin tyiñu tsaa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo.

<sup>35</sup> Tatun cuñi tahan ndo tsi ndo, tandihi nyivi tan cua coto ñi tyin nyivi nyicún tsi yu cuví ndo.

*Nu caahán ra Jesús tyin ra Pedro cua cahan ra tyin ña nacotó ra tsi ra*

*(Mt. 26.31-35; Mr. 14.27-31; Lc. 22.31-34)*

<sup>36</sup> Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacahan ra Jesús tan catyí ra:

—Nu cuhun yuhu, ña cua cuví cunycún un tsi yu vityin. Maa tyin nu cuahán ca tsi quivi, tan cunycún un tsi yu —catyí ra Jesús.

<sup>37</sup> Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuví cunycún yu tsi un vityin? Tan tsa iyó vaha ñi yu tsa cuhva yu ñayivi yu tsa cuenda un —catyí ra.

<sup>38</sup> Tan nacahan ra Jesús tan catyí ra:

—¿A nditsa tsa cuhva un ñayivi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsa tsitoocho, yoocho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

## 14

*Ra Jesús cuví ityi cuhun yo nu nyaá Nyoo Jutu yo*

<sup>1</sup> Tan catyí ra Jesús:

—Ña caca xaan ñi ndo. Tsinu ñi ndo tsi Nyoo, tan tsinu ndihi ñi ndo tsi yu.

<sup>2</sup> Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cuhun yu cua janduvaha yu iin nu coo ndo.

<sup>3</sup> Tsa yaha tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyaa yu.

<sup>4</sup> Nyooho tsa tsitó maa ndo nu maa cuhun yu, tan tsa tsitó ndo ityi.

<sup>5</sup> Tan catyí ra Tomás tsihin ra:

—Jutu Mañi yu, ña tsitó ndi nu maa cua cuhun un. Tan ¿nácaa coto ndi ityi? —catyí ra.

<sup>6</sup> Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juvin ñi yuhu cuví ra tshá ñayivi coo ndo. Tan tsa cuenda yuhu ñi, tan cuví tsa ndo nu nyaá Jutu yu.

<sup>7</sup> Tan tsa nacotó ndo tsi yu, tan tsa cuenda yacan nacotó ndihi ndo tsi Jutu yu. Nda vityin tan nu cuahán ca tsi ityi nuu, cua nacoto ndihi ndo tsi ra, tyin tsa nyehé ndo tsi ra —catyí ra Jesús.

<sup>8</sup> Tacan tan catyí ra Felipe tsihin ra:

—Jutu Mañi yu, cuhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

<sup>9</sup> Tan nacahan ra Jesús, tan catyí ra:

—Yooho Felipe, tsa naha xaan nyií yu tsihin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tsihin yu: “Cuhva jihna nyehe ndi tsi Nyoo Jutu yo”?

<sup>10</sup> ¿A ña tsinú iñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu.

<sup>11</sup> Tsinu iñi ndo tsi yu tyin iin ñi ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsinú iñi ndo yacan, cuví tsinu iñi ndo tsi yu tsa cuenda tyiñu Nyoo Jutu yu tsa javahá yu.

<sup>12</sup> Tsa nditsa caahán yu tsihin ndo tyin nyivi tsinú iñi tsi yu, cua javaha ndihi ñi tsa javahá yu. Tan cahnu ca tsa cua javaha ñi, tyin yuhu cuhun yu nu nyaá Nyoo Jutu yu.

<sup>13</sup> Tan tandihi tsa cua ndacan ndo tsi jutu yu tsihin sivi yu, cua ñihi ndo can tyin tacan tan jacahnu cuaha ca nyivi tsi Nyoo Jutu yu tsa cuenda yuhu tsa cuví yu Sehe ra.

<sup>14</sup> Yuhu cua javaha yu náa ndihi tsa ndacan ndo tsa cuenda yu.

### *Nu caahán ra Jesús tyin cuhva ra Tatyí li ra tsi yo*

<sup>15</sup> Tatun cuñí ndo tsi yu, tyaa yahvi ndo tsa caahán yu.

<sup>16-17</sup> Tan ndacan tahvi maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyí li Nyoo, ra tsa caahán tsa nditsa. Tan iin nyita ñi maa cua cunyaa ra tsihin ndo. Maa tyin nyivi tsa taahán ca iñi tsa iyó nu ñuhu ñayivi ihya, ña cua cuvi naquihin ñi Tatyí li Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo.

<sup>18</sup> Ña cua naco cuui yu tsi ndo. Cua quitsi nyico yu nu yucú ndo.

<sup>19</sup> Juhva cuui ña quivi, tan nyivi cuenda nu ñuhu ñayivi ña cua nyehe

ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihi ndo.

<sup>20</sup> Quivi can cua coto ndo tyin yuhu iin ñi cuví yu tsihin Jutu yu. Tan nyooho iin ñi cuví ndo tsihin yu. Tan yuhu iin ñi cuví yu tsihin ndo.

<sup>21</sup> Nyivi tsa tyaá yahvi tsa caahán yu, tan javahá ñi cuhva caahán yu, ñi ican cuví ñi tsa cuñí tsi yu. Tan ñi tsa cuñí tsi yu, Jutu yu cua cuñi ra tsi ñi. Tan cuñi ndihi tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

<sup>22</sup> Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihi nyivi iyó nu ñuhu ñayivi?

<sup>23</sup> Nacahan ra Jesús tan catyí ra:

—Nyivi cuñí tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi.

<sup>24</sup> Nyivi ña cuñí tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

<sup>25</sup> 'Caahán yu tandihi tuhun ihya tsihin ndo tsitsi tsa ndi nyií yu tsihin ndo.

<sup>26</sup> Maa tyin nu cuahán ca tsi ityi nuu cua jaquitsi Jutu yu Tatyí li ra tsihin sivi yu. Tan cua jatyinyee ra ican tsi ndo, tan cua cuhva ra tunyee iñi tsi ndo, tan cua janaha ra tandihi tsi ndo. Tan cua janducuhun iñi ra tsi ndo tsa tsa yahā cahan yu tsihin ndo.

<sup>27</sup> Jandoó yu iin tsa taxin coo añima ndo, tumaa tsa taxin cuñí añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña caca xaan iñi ndo tan ña nayuhvi ndo.

<sup>28</sup> Tsiñi ndo tsa cahan yu nu catyí yu tyin cua cuhun yu tan cua quitsi nyico yu nu yucú ndo. Tatun cuñí ndo tsi yu, cua cusii iñi ndo tyin catyí yu tyin cuahan yu nu nyaá Jutu yu.

Tyin cahnu ca cuví Jutu yu tan ñavin ca maa yu.

<sup>29</sup> Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

<sup>30</sup> Ña cuaha ca cua cahan yu tsihin ndo. Tyin vatsí nu ndacá ñaha nu ñuhu ñayivi ihya. Maa tyin ña ndacá ñaha nu tsi yu.

<sup>31</sup> Tyin tacan tan coto nyivi iyó nu ñuhu ñayivi, tyin yuhu cuñi yu tsi Nyoo Jutu yu, tan javahá yu tyiñu tava ra tsi yu.

'Nduvita ndo, tan cohon ndo, na cua tsiyo yo ihya.

## 15

*Nu cahan ra Jesucristo tyin cuví ra tumaa yoho tsa cuví uvas*

<sup>1</sup> 'Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho nditsaahan ndivi maa tyin yucu vixi cuví tsi.] Tan Jutu yu cuví ra jahá cuenda yoho can.

<sup>2</sup> Tsaahnyá ra soco tsa ña tsahá tsiti. Tan nacahnya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti.

<sup>3</sup> Tsa yaha janduvaha Jutu yu tsi nyooho tsihin tsa jacuahá yu tsi ndo.

<sup>4</sup> Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuví cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyooho, ña cua cuví javaha ndo tsa vaha tatun ña iin ñi cuví ndo tsihin yu.

<sup>5</sup> 'Yuhu cuví yoho cahnu. Tan nyooho cuví soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuví javaha ñi tatun ña nyanaá ñi tsi yu.

<sup>6</sup> Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

<sup>7</sup> 'Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuví ndacan ndo

náa cuñi maa ndo tsi yu, tan yuhu cua cuhva yu tsa cua ndacan ndo.

<sup>8</sup> Tatun cuaha tsa vaha javahá ndo, jacahnú xaan ndo tsi Jutu yu cuví can. Tan tsihin yacan janahá ndo tyin cuví ndo nyivi tsa nditsa nyicún tsi yu.

<sup>9</sup> Yuhu cuñi yu tsi ndo, tumaa tsa cuñi Jutu yu tsi yu. Ña naa iñi ndo cuhva cuñi yu tsi ndo.

<sup>10</sup> Tatun tyaá yahvi ndo tsa caahán yu, ña cua naa iñi ndo tyin cuñi yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñi xaan ra tsi yu.

<sup>11</sup> 'Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo.

<sup>12</sup> Tuhun tsa caahán yu tsihin ndo, yacan cuví tsehe: cuñi tahan ndo tsi ndo, tumaa tsa cuñi maa yu tsi ndo.

<sup>13</sup> Tatun yaha xaan cuñi tahan yo tsi yo, cana maa iñi yo cuhva yo ñayivi iyó yo tsa cuenda inga yo.

<sup>14</sup> Nyooho cuví ra vaha iñi tsi yu tatun javahá ndo tsa caahán yu tsihin ndo.

<sup>15</sup> Ña caahán ca yu tyin musu yu cuví tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuví ndo, tyin tandihi tsa caahán Jutu yu tsihin yu tan jacotó yu itsi tsi ndo.

<sup>16</sup> Ñavin nyooho nacatsj tsi yuhu tyin maa yu nacatsj tsi ndo. Tan tava tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan niñi cua coo, tan ña cua tivi maa tsi. Tacan tan cua cuhva Jutu yu tandihi tsa ndacan ndo tsi ra tsihin sivi yu.

<sup>17</sup> Tyehen caahán yu tsihin ndo: Cuñi tahan ndo tsi ndo.

*Nyivi taahán iñi tsa iyó nu ñuhu ñayivi, ndasi cuñi ñi nyehé ñi tsi ra Jesús tan tsi nyivi nyicún tsi ra*

<sup>18</sup> 'Tatun ndasi cuñi nyivi taahán iñi tsa iyó nu ñuhu ñayivi ihya nyehe ñi tsi ndo, coto ndo tyin jihna ca maa yu ndasi cuñi ñi nyehe ñi.

<sup>19</sup> Tun tsatyin nyivi cuenda nu ñuhu ñayivi ihya cuví ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyoooho tsa nacatsi yu tsi ndo mahñu ñi. Yacan cuenda ndasi cuñi ñi nyehe ñi tsi ndo, tyin ñavin ca nyivi cuenda nu ñuhu ñayivi ihya cuví ndo.

<sup>20</sup> Nducuhun iñi ndo tsa cahan yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatun tyaá yahvi nyivi tsa caahan yu tsihin ñi, tacan cua tyaa yahvi ndihi ñi tsa jacuahá ndo tsi ñi. Tan tatun ndasi ícá ñi tsihin yu, ndasi cua íca ndihi ñi tsihin ndo.

<sup>21</sup> Tandihí yacan cua íca ñi tsihin ndo tsa catyi yuhu, tyin ña nacotó ñi tsi ra tsa jaquitsi tsi yu.

<sup>22</sup> 'Tun tsatyin ña quitsi yu cahan yu tsihin ñi, nduve cuatyí ñi. Maa tyin vityin nduve náa siqui cua tyaa ñi cuatyí ñi, tyin tsa yaha cahan yu tsihin ñi.

<sup>23</sup> Nyivi tsa ndasi cuñi nyehé tsi yu, ndasi cuñi ndihi ñi nyehé ñi tsi Jutu yu.

<sup>24</sup> Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehe ñi tandihí yacan. Vasu ndi maa tsa nyehe ñi can maa tyin ndasi cuñi ñi nyehé ñi tsi yu, tan tsi Jutu yu.

<sup>25</sup> Maa tyin tandihí yacan cuví, tyin cuñi tsi cundaa tumaa cuhva caahan nu tutu ley tsa jacuahá ñi tsa caahan tyehen: "Nduve vihi náa tsaha, tan ndasi cuñi ñi nyehe ñi tsi yu", catyí tsi.

<sup>26</sup> 'Maa tyin cua quitsi Tatyí Ii, ra tsa caahan tsa nditsa. Ra ícan cuví ra tsa cua cuhva tunyee iñi tsi ndo. Quivi cua tsaa yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahan ra tumañi iñi tsa cuenda yu.

<sup>27</sup> Tan nyoooho tucu cua cahan ndo tumañi iñi tsa cuenda yu, tyin yucú ndo tsihin yu nda quivi quitsaha jahá tyiñu yu.

## 16

<sup>1</sup> 'Caahan yu tyehen tsihin ndo tyin tacan tan ña jandihí ndo tsa tsinú iñi

ndo tsi yu.

<sup>2</sup> Cua tava cuii nyivi tsi ndo vehe ñuhu. Tan coo quivi cua cahñi ñi tsi ndo, tan cua cuñi ñi tyin tyiñu Nyoo javahá ñi.

<sup>3</sup> Tacan cua íca ñi tyin ña nacoto ñi tsi Jutu yu tan ndi tsi maa yu.

<sup>4</sup> Caahan yu tsehe tsihin ndo tyin quivi tsa cua cuví tumaa cuhva caahan yu tsihin ndo, cua nducuhun iñi ndo tyin tsa yaha cahan yu tuhun ihya tsihin ndo.

'Ña cahan yu tyehen tsihin ndo nda jihna tyin ndi nyii maa yu tsihin ndo.

### *Tyiñu jahá Tatyí Ii Nyoo*

<sup>5</sup> Maa tyin vityin cua cuhun yu tyin cunyaa yu tsihin ra tsa jaquitsi tsi yu. Ndi intuhun ndo tan ña tsicá tuhun ndo tsi yu nu maa cua cuhun yu.

<sup>6</sup> Tyin tsa nducuihya cuñi ndo tsa caahan yu tyehen tsihin ndo.

<sup>7</sup> Caahan yu tsa nditsa tsihin ndo tyin vaha ca tsa cuhun yu cuenda tsa vaha tsi maa ndo. Tyin tatun ña cuhun yu, ña cua quitsi Tatyí Ii tsa cua cuhva tunyee iñi tsi ndo. Maa tyin tatun cuhun yu, cua jaquitsi yu tsi ra.

<sup>8</sup> Tan quivi quitsi ra, cua jacoto ra tsi nyivi iyó nu ñuhu ñayivi ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo.

<sup>9</sup> Cua jacoto ra tsi ñi tyin iyó cuatyí ñi tyin ña tsinú iñi ñi tsi yu.

<sup>10</sup> Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu.

<sup>11</sup> Tan cua coto ñi tyin cua jandaa Nyoo cuatyí ñi tyin tsa yaha cundaa cuatyí nu cuví cuhna, nu ndacá ñaha nu ñuhu ñayivi ihya.

<sup>12</sup> 'Tan cuaha ca tsa nyaá cahan yu tsihin ndo, maa tyin ña cua cutuñi iñi ndo can vityin.

<sup>13</sup> Quivi quitsi Tatyí Ii tsa caahan tsa nditsa, maa ra cua janaha tandihí tsa nditsa tsi ndo. Tyin ñavin cuenda maa ra cua cahan ra, tyin cua cahan ra



tandihí tsa tsiñí ra. Tan cua jacoto ra náa cua cuví nu cuahán ca tsi ityi nuu.

<sup>14</sup> Cua jacahnu ra tsi yu, tyin cua naquihin ra tuhun yu tan cua janaha ra can tsi ndo.

<sup>15</sup> Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyí li cua naquihin ra tuhun yu, tan cua janaha ra tsi nyooho.

*Ra tsicá tsihin ra Jesús cuiihyá xaan cuñí ra naha, maa tyin nu cuahán ca tsi quívi cua cusii iñi ra naha, catyí ra Jesús*

<sup>16</sup> Ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

<sup>17</sup> Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuii ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra.

<sup>18</sup> ¿Náa cuñi tsi catyí tsa “ña naha cuii ca” can? Ña cutuñi iñi yo náa tuhun caahán ra —catyí ra naha.

<sup>19</sup> Tan tuví iñi ra Jesús tyin cuñi ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo?

<sup>20</sup> Tsa nditsa caahán yu tsihin ndo tyin nyooho cua nducuiihya iñi ndo tan cua vacu ndo, maa tyin nyívi cuenda nu ñuhu ñayívi cua cusii iñi ñi. Vasu cuiihya cuñi ndo vityin, tucuiihya iñi can cua nanduvi tsi tsa sii.

<sup>21</sup> Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa sii cuñi ña tyin cacu iin lee sehe ña.

<sup>22</sup> Tacan tucu nyooho vityin, cuiihya xaan cuñi ndo. Maa tyin cua

nyehe nyico yu tsi ndo inga tsaha. Tacan tan cua cusii nyico iñi aña nado. Tan yoñi cuví quihin nyaa tsa sii can tsi ndo.

<sup>23</sup> Quívi can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihí tsa ndacan ndo tsi ra tsihin sívi yu.

<sup>24</sup> Nda vityin tan ñaha ca ndacan ndo tsa ndacan ndo tsihin sívi yu. Ndacan ndo tan cua ñihi ndo tan cusii xaan iñi ndo.

*Ra Jesucristo cuví jaha canaa ra tsa ña vaha iyó nu ñuhu ñayívi*

<sup>25</sup> Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuaha yu tsi ndo, maa tyin cua catyí tuhun catsi yu tuhun Jutu yu tsihin ndo.

<sup>26</sup> Quívi can tsihin sívi yu cua ndacan ndo tsa ndacan ndo tsi ra. Tan ña tsiñi ñuhu ca tsa cahan ndaahvi yu tsihin Jutu yu tsa cuenda ndo.

<sup>27</sup> Tyin maa Nyoo Jutu yu cuñi ra tsi ndo. Cuñi ra tsi ndo tyin nyooho cuñi ndo tsi yu, tan tsinú iñi ndo tyin nu nyaá Nyoo quee yu.

<sup>28</sup> Nu nyaá Jutu yu quee yu tyin quítsi yu nu ñuhu ñayívi ihya. Maa tyin vityin cua naco yu ñuhu ñayívi ihya tyin cua cunuhu nyico yu nu nyaá ra —catyí ra Jesús.

<sup>29</sup> Tacan tan catyí ra tsicá tsihin ra: —Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi.

<sup>30</sup> Vityin nyehé ndi tyin tsitó un tandihí cuii maa, tan ña tsiñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

<sup>31</sup> Tan catyí ra Jesús:

—Tan vityin ¿a tsinú iñi ndo tsi yu?

<sup>32</sup> Maa tyin caahán yu tsihin ndo tyin tsa vatsí hora. Tan vityin cuví hora tsa cua cuhun ndo sijn sijn ityi. Tan cua naco ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu.

<sup>33</sup> Caahán yu tandihí tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehe ndo tundoho, maa tyin janyee ndo iñi ndo, tyin yuhu tsa jahá canaa yu tsa ña vaha tsa iyó nu ñuhu ñayivi ihya.

## 17

*Nu tsicán tahvi ra Jesús tsi Nyoo tsa cuenda ra tsicá tsihin ra*

<sup>1</sup> Tsa yahá cahan ra Jesús yacan, nanyehé ndaa ra ityi andivi tan catyí ra:

—Jutu Mañi yu, tsa tsaá hora vityin. Jacahnu tsi yu tsa cuví yu sehe un, tyin tacan tan jacahnu tucu maa yu tsi un.

<sup>2</sup> Tyin tava tyiñu un tsi yu tsa quihí ndaha yu tandihí nyivi, tan cuhva yu ñayivi nyitó tsa ña cua naa maa tsi tandihí nyivi tsa tsahá un tsi yu.

<sup>3</sup> Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsi un, tacan tan cuví coo ñi ñayivi nyitó tsa ña cua naa maa.

<sup>4</sup> Tsa jacahnu yu tsi un nu ñuhu ñayivi ihya tan tyiñu tsa tava tyiñu un tsi yu tsa ndihí tsi javahá yu.

<sup>5</sup> Tan vityin, Jutu Mañi yu, cua quitsi nuhu nyico yu nu nyaá un, tan cuñí yu tyin nacuhva un tsa cahnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayivi.

<sup>6</sup> Tandihí ra tsa tsahá un tsi yu naha ra, ra tsa natava vaha un mahñu nyivi iyó nu ñuhu ñayivi ihya, jacoto yu tsi ra naha yoo ra cuví yooho. Tsii maa un cuví tsi ra naha tan tsahá un tsi ra naha tsi yu. Tan tyaá yahvi ra naha tsa caahán un.

<sup>7</sup> Vityin tsitó ra naha tyin tandihí tsa tsahá un tsi yu, nu nyaá un quee tsi.

<sup>8</sup> Tyin catyi tuhun yu tsihin ra naha tsa cahan un tsihin yu, tan naquihin vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquitsi tsi yu.

<sup>9</sup> Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihí nyivi, maa tyin tsicán tahvi yu tsa cuenda ra tsa tsahá un tsi yu naha ra, tyin tsi maa un cuví ra naha.

<sup>10</sup> Tandihí nyivi tsa cuví tsii un, tsahá tucu un tsi ñi tsi yu. Tan maa ñi janahá tsa cahnu cuví yu.

<sup>11</sup> Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunyaa nyico yu tsihin un. Jahá cuenda tsi ra tsa tsahá un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yo.

<sup>12</sup> Quiivi tsinyii yu nu ñuhu ñayivi ihya tsihin ra naha, jahá cuenda yu tsi ra tsa tsahá un tsi yu naha ra tsihin tunyee iñi tsa iyó tsi un. Tan jahá cuenda yu tsi ra naha. Tan ndi intuhun ra naha tan ña tsinaa ra naha. Maa tyin ra tsa tsa nyaá maa tsa cunaan, ra ican ñi cuví ra cuanaa tan quita cuhva tumaa tsa catyí nu tutu maa un.

<sup>13</sup> Vityin tsa cua quitsí yu nu nyaá un, maa tyin tsitsi tsa ndi nyii yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii cuñí maa yu.

<sup>14</sup> Yuhu cahan yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñí ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu.

<sup>15</sup> Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jahá cuenda tsi ra naha coto náa jahá nu ña vaha tsi ra naha.

<sup>16</sup> Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha.

<sup>17</sup> Jacu ii tsi ra naha tsihin tsa nditsa, na javaha ra naha maa ñi maa cuhva cuñí maa un. Tyin tsa caahán un, yacan cuví tsa nditsa.

<sup>18</sup> Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nacahan ra naha tuhun yo tsihin nyivi tsa ñaha ca coto tuhun yo.

<sup>19</sup> Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

<sup>20</sup> Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu ñi tsi yu, tsa cuenda tsa cua cahan ra ihya naha ra ityi nuu ca.

<sup>21</sup> Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihi nyivi iyó nu ñuhu ñayivi cua tsinu ñi tsi tyin maa un jaquitsi tsi yu.

<sup>22</sup> Yuhu tsaha yu tsa cahnu cuví un tsi ñi nyicún tsi yo. Juvín ñi maa tsa cahnu cuví un tsa tsaha un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo.

<sup>23</sup> Yuhu nyii yu tsihin ñi. Tan yooho nyaá un tsihin yu tyin tacan tan iin ña nyivi cua cuví ñi. Tan coto tandihi nyivi iyó nu ñuhu ñayivi tyin maa un jaquitsi tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

<sup>24</sup> Jutu Mañi yu, maa un tsaha tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsaha un tsi yu, tyin cuñi un tsi yu nda ndi cumañi ca tsinu ñuhu ñayivi.

<sup>25</sup> Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu.

<sup>26</sup> Tsa cahan yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñi un tsi yu, tacan cua cuñi tahan ra naha tsi ra naha. Tan yuhu cunyaa yu aña ra naha.

## 18

*Nu cua tyihi ra Israel naha ra tsi ra Jesús vehe caa*

(Mt. 26.47-56; Mr. 14.43-50; Lc. 22.47-53)

<sup>1</sup> Tsa yaha tsa cahan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra.

<sup>2</sup> Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra.

<sup>3</sup> Tan ican tsaá ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaá ra naha ican, nyisó ra naha mityi, tan nyisó ra naha lámpara tan ñuhu yiti.

<sup>4</sup> Tan ra Jesús tsa tsitó maa ra tandihi tsa cua tahan ra. Quita ra tan tsicá tuhun ra tsi ra naha:

—¿Yóo nanducú ndo? —catyí ra.

<sup>5</sup> Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan ñi tsi ra nahnu, nyii ndihi ra tsihin ra naha.

<sup>6</sup> Cuhva tsa cahan ra Jesús: “Yuhu cuví”, tandihi ra naha nacaca tsata ra naha tan nduva ra naha nu ñuhu.

<sup>7</sup> Tacan tan tsicá tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

<sup>8</sup> Tan catyí ra Jesús:

—Tsa cahan yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicá tsihin yu naha ra na cunahun ra naha —catyí ra Jesús tsihin ra naha.

<sup>9</sup> Yacan cahan ra Jesús tyin na cun-daa tsa cahan ra nda ityi tsata ca nu catyí ra: “Ra tsa tsaha Jutu yu tsi yu, ndi intuhun ra naha tan ña tsinaá ra naha.”

10 Tacan tan tava ra Simón Pedro mityi tsa ndahá ra tan tsahnya ra soho cuaha iin ra tsa nañí Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra.

11 Maa tyin ra Jesús catyí ra tsihin ra Pedro:

—Natyihí mityi un tsitsi vena un. Tatun Nyoo Jutu yu tan cuñí ra tsa nyehe yu tundoho, taahán tsi tsa nyehe yu can —catyí ra Jesús tsihin ra.

*Nu tsindaca ra naha tsi ra Jesús nuu ra cuví ityi nuu tsihin jutu naha ra (Mt. 26.57-58; Mr. 14.53-54; Lc. 22.54)*

12 Tacan tan andaru can tsihin capitán ra naha, tan vitya cuenda vehe ñuhu naha ra, tñin ra naha tsi ra Jesús, tan tsahñi ra naha tsi ra,

13 tacan tan tsindaca ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu.

14 Ra Caifás can cuví ra tsa cahan tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayi tsa cuenda tandihí nyivi ñuu.

*Nu caahán ra Pedro tyin ña nacotó ra tsi ra Jesús*

*(Mt. 26.69-70; Mr. 14.66-68; Lc. 22.55-57)*

15 Ra Simón Pedro tan inga ra tsa tsicá tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvi ra can tsihin ra Jesús nuquehe ra jutu can.

16 Maa tyin ra Pedro ndoo ra ityi tsata vehe. Yacan cuenda quita ra tsa nacotó ra jutu can, tan cahan ra tsihin ñaha tsa nyaá yuvehe can. Tan jayahá ra tsi ra Pedro ityi tsitsi nuquehe can.

17 Tacan tan ñaha tsa nyaá yuvehe can tsicá tuhun ña tsi ra Pedro, tan catyí ña:

—¿A ñavin yooho cuví iin ra tsicá tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

18 Tacan tan ra cuví musu tan ra vitya naha ra tsa yucú ican, jatahan ra naha ñuhu tyin vitsin xaan. Tan nyecú nyityi ra naha tuñu ra naha ñuhu. Tan nyií ndihí tucu ra Pedro tuñu ra ñuhu tsihin ra naha ican.

*Nu janahma ra jutu tsaahnu tsi ra Jesús*

*(Mt. 26.59-66; Mr. 14.55-64; Lc. 22.66-71)*

19 Tacan tan ra jutu tsaahnu can quitsaha tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyivi.

20 Tan catyí ra Jesús tsihin ra:

—Yuhu nuu tandihí nyivi cahan yu. Tan jacuahá yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá tandihí nyivi Israel ndu iin. Tan nduve nu cahan xeehe yu.

21 ¿Nacuenda tsicá tuhun un tsi yuhu? Vaha ca ndaca tuhun un tsi nyivi tsa tsiñi tsa cahan yu, tan maa ñi cua catyi tuhun náa cahan yu tsihin ñi tyin maa ñi tsitó náa cahan yu —catyí ra Jesús tsihin ra.

22 Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

23 Tan catyí ra Jesús:

—Tatun cahan yu iin tsa ña vaha, cahan tsihin yu nda tsa ña vaha cahan yu. Maa tyin tatun cahan yu tsa vaha, ¿nacuvi tyin cañi un tsi yu? —catyí ra Jesús tsihin ra can.

24 Yahá can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].



*Nu caahán nyico ra Pedro inga tsaha tyin ña nacotó ra tsi ra Jesús*

(Mt. 26.71-75; Mr. 14.66-72; Lc. 22.58-62)

<sup>25</sup> Tan nyaá nyityi ra Pedro tuñu ra ñuhu. Tan catyí ra naha tsihin ra:

—¿A ñavin yooho cuví iin ra tsicá tsihin ra can? —catyí ra naha tsihin ra.

Tan ra Pedro tyihí xeehe ra, tan catyí ra:

—Ñavin. Ñavin yu cuví —catyí ra.

<sup>26</sup> Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyivi ra tsa tsahnyá ra Pedro soho, quitsahá tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

<sup>27</sup> Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitooho.

*Nu cutuñi ra Jesús nuu ra Pilato*

(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Yahá can tan quita ra naha tsihin ra Jesús yuvehe ra Caifás tan tsindaca ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihvi ra naha tsitsi vehe tyiñu can tyin ñavin vehe nyivi Israel cuví can. Tyin ica tsa quihvi ñi Israel vehe ndavaha ñi tyin coto ña cua cuví cuxiñi ñi quivi vico pascua.

<sup>29</sup> Yacan cuenda quita ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo síqui ra ihya? —catyí ra Pilato tsihin ra cuví ityi nuu tsihin nyivi Israel naha ra.

<sup>30</sup> Tan nacahan ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

<sup>31</sup> Tacan tan catyí ra Pilato tsihin ra naha:

—Quihin ndo tsi ra, tan tatsi tuñi ndo tsi ra tumaa catyí maa ley ndo.

Tan nacahan ra Israel can naha ra tan catyí ra naha:

—Maa tyin nyuhu nyivi Israel nduve ndatu iyó tsi ndi tsa cahñi ndi tsi nyivi —catyí ra naha.

<sup>32</sup> Tacan cundaa tsa cahan ra Jesús nácaa cua cúu ra.

<sup>33</sup> Yahá can tan quihvi nyico ra Pilato tsitsi vehe tyiñu can inga tsaha. Tan cana ra tsi ra Jesús tan tsica tuhun ra tsi ra:

—¿A yooho cuví rey cuenda nyivi Israel? —catyí ra tsihin ra.

<sup>34</sup> Tan catyí ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyivi natyuhu tsi un cuhva cahan un tsihin yu? —catyí ra Jesús tsihin ra Pilato.

<sup>35</sup> Tan catyí ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsaha cuenda tsi un tsi yu. ¿Náa javaha un? —catyí ra tsihin ra Jesús.

<sup>36</sup> Tacan tan nacahan ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyí ra Jesús tsihin ra Pilato.

<sup>37</sup> Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahan ra Jesús tan catyí ra:

—Rey cuví yu tumaa tsa caahán maa un. Yacan cuenda cacu yu tan vatsí yu nu ñuhu ñayivi ihya, tyin cahan yu tsa nditsa. Tandihí nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

<sup>38</sup> Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yahá tsa tsica tuhun ra Pilato yacan, quita ra tsicahan nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi in-tuhun cuatyí ra ihya.

*Nu cua cahñi ra naha tsi ra Jesús*  
(Mt. 27.15-31; Mr. 15.6-20; Lc. 23.13-25)

<sup>39</sup> Maa tyin nyooho iyó ndo tuhun tsa tsicán ndo na tava yu tsi iin ra nyíí vehe caa tsa iyó vico pascua ihya. ¿A cuñí ndo tava yu tsi ra tsa cuví rey cuenda ndo tsa cuví ndo nyíívi Israel? —catyí ra Pilato tsihin ra naha.

<sup>40</sup> Tacan tan quitsaha caná tsaa tandihi ra naha tan catyí ra naha:

—¡Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuví ra iin ñasuhu.

## 19

<sup>1</sup> Tacan tan quihñin ra Pilato tsi ra Jesús tan tava tyiñu ra na cañi andaru tsi ra.

<sup>2</sup> Tan andaru can javaha ra naha iin corona iñu tan tyihí ra naha jiñi ra Jesús. Tan jacunditsi ra naha iin jahma tunduuhva tsi ra, tahan tsa tuhvá ra cuví rey tsinditsí.

<sup>3</sup> Tacan tan natuhvā ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyíívi Israel! —catyí ra naha, tan cañi ra naha nuu ra.

<sup>4</sup> Tacan tan quitā nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

<sup>5</sup> Tan quitā ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

<sup>6</sup> Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsaha caná tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cahñi maa ndo tsi ra nu cruu tyin yuhu ndi in-tuhun cuatyí ra tan ña nañihí yu.

<sup>7</sup> Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñí tsi tsa cúu ra tyin jahá ra tsa Sehe Nyoo cuví tsi ra —catyí ra naha.

<sup>8</sup> Tsa tsiñi ra Pilato yacan, tan nayuhvi xaan ca ra.

<sup>9</sup> Tan quihvi nyico ra inga tsaha tsitsi vehe tyiñu, tan tsica tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

<sup>10</sup> Tacan tan catyí ra Pilato tsihin ra:

—¿Nacuenda ña caahán un tsa caahán yu? ¿A ña tsitó un tyin ra cumí tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

<sup>11</sup> Tan nacahan ra Jesús tan catyí ra:

—Tun tsatyin ña tsaha Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

<sup>12</sup> Tsa ndihi cahan ra Jesús yacan, tan quitsaha nducú ra Pilato cuhva jaña ra tsi ra, maa tyin ra Israel caná tsaa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihi ra tsa caahán tyin rey cuví ra naha, ra xaan iñi tsi rey cahnu cuví ra naha —catyí ra naha.

<sup>13</sup> Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaa ra Pilato nu nañi Gabata nu tuhvá ra jandaá cuatyí nyíí. Tan tsihin yuhu hebreo cuñí tsi catyí: “Nu canyíi yuu”.

<sup>14</sup> Tan cuví tsi iin quívi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

<sup>15</sup> Maa tyin cana tsaa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yoñi ca rey iyó. Intuhun ñi maa ra César, ra cuví rey cahnu —catyí ra naha.

<sup>16</sup> Tacan tan tsaha cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihin andaru tsi ra, cuahán ra tsihin ra naha.

*Nu tsihi ra Jesucristo nu cruu*

(Mt. 27.32-44; Mr. 15.21-32; Lc. 23.26-43)

<sup>17</sup> Tan nyisó ra Jesús cruu ra, cuahán ra iin nu nañi: “Yiqui Jiñi Ndiyí”. Tan tsihin yuhu hebreo nañi tsi Gólgota.

<sup>18</sup> Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaa ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaa ra naha tsi ra Jesús mahñu.

<sup>19</sup> Tan tava tyiñu ra Pilato na cun- yaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.”

<sup>20</sup> Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín.

<sup>21</sup> Yacan cuenda ra cuví ityi nuu tsihin jutu cahan ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

<sup>22</sup> Maa tyin catyí ra Pilato:

—Tsa tsa yaha tyaa yu, nandoo maa tsi tacan —catyí ra tsihin ra naha.

<sup>23</sup> Tsa yaha tyaa ra andaru can naha ra tsi ra Jesús nu cruu, naquihin ra naha jahma ra. Tsa cumi taahan ra naha quihin luxu luxu jahma ra. Tan ndoo jahma ra tsa quicu cañi ñi tsa tsindasi ra.

<sup>24</sup> Tan andaru can natuhún tahan ra naha:

—Ña cua cahnya yo itsi. Jasiqui suuhva jihna yo na nyehe yo yoo cua jaha canaa jahma can —catyí ra naha.

Tacan cuvi tumaa caahán nu tutu Nyoo nu catyí tsi tyehen: “Tsatsa tahan ra naha luxu luxu jahma yu tan jasiqui suuhva ra naha tsihin tsi, nyehe ra naha yoo ra jaha canaa itsi.” Tan yacan cuvi tsa javaha ra andaru can naha ra.

<sup>25</sup> Tan nyaá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasihi ra Cleofas, tan ña María quee ñuu Magdala.

<sup>26</sup> Tan nanyehe ra Jesús tsi sihi ra, nyaá ña yatyin ñi. Tan nanyehe tucu ra tsi ra tsa tsica tsihin ra, ra tsa cuñi xaan ra. Tan catyí ra tsihin sihi ra:

—Miya, va ra sehe un nyaá tsihin un juvin —catyí ra.

<sup>27</sup> Tacan tan catyí ra tsihin ra tsa cuñi xaan ra:

—Tsaa, va sihi un nyaá tsihin un juvin —catyí ra tsihin ra.

Nda quivi can tan quihin ra tsi ña, cuahan tsihin ra yuvehe ra. Tan jaha cuenda ra tsi ña.

*Nu tsihi ra Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Tsa yaha yacan, tsa nyehe ra Jesús tyin tsa ndihi tyiñu jaha ra. Tacan tan catyí ra:

—Na ityi ñi yu —catyí ra.

Tan tsihin yacan cunda tsa nyaá nu tutu Nyoo nu caahán tsi nácaa cua cúu ra.

<sup>29</sup> Tan ican nyaá iin quiyi nu yihí vinu iya. Tacan tan jatyi ra naha tsa cuví yahma tumaa caa catyi tsihin vinu iya can. Tan tyaa ra naha yacan nu iin yutun hisopo. Tan jandaa ra naha tan tyanaa ra naha can yuhu ra.

<sup>30</sup> Tsihi ra Jesús vinu can tan catyí ra:

—Tsa iyó vaha tandihi vityin —catyí ra.

Tacan tan nacañi nuu ra jiñi ra tan tsihi ra.

*Nu tutsi ra andaru yoco xaan yiqui naha ra Jesús*

<sup>31</sup> Tsa ndi cumañi intuhun ña quivi tan tahan tsi quivi vico cahnu pascua, tan ra cuví ityi nuu tsihin nyivi Israel ña cuñi ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuví tsi tsa cuenda ra naha. Yacan cuenda tsican ra naha tumañi iñi tsi ra Pilato na tava tyiñu ra na cahnu andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha.

<sup>32</sup> Tacan tan cuahán andaru nu nyecú cruu can. Tan tsahnú ra naha sihin iin ra ticaá iin tsiyo xiin ra Jesús. Tan tsahnú nyico ra naha sihin inga ra tsa ticaa inga tsiyo xiin ra.

<sup>33</sup> Maa tyin cuhva tsa natuhva ra naha nu ticaá ra Jesús, nyehe ra naha tyin tsa tsihi maa ra. Yacan cuenda ña tsahnú ca ra naha sihin ra.

<sup>34</sup> Maa tyin iin andaru can tutsi ra yoco xaan yiqui naha ra Jesús. Tan quitá ñiñi tan ndutya.

<sup>35</sup> Ra tsa nacatyí tuhun yacan, ra tsa nyehe vaha cuví ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho.

<sup>36</sup> Tacan cuvi tyin tacan tan cundaa tsa catyí tuhun Nyoo nu catyí tsi: “Ndi intuhun yiqui ra tan ña tahnú.”

<sup>37</sup> Tan iyó inga nyico nu catyí tsi nu tutu Nyoo tyehen: “Cua nyehe nyivi tsi ra tsa tutsi ra naha yoco xaan.”

*Nu quihvi ñuhu ra Jesús*  
(Mt. 27.57-61; Mr. 15.42-47; Lc. 23.50-56)

<sup>38</sup> Tsa yaha yacan, ra José ra ñuu Arimatea tsican ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuví ra iin ra yihí cuenda ra Jesús vasu

tsa xeehe ñi tsa cuenda tsa yuuhví ra tsi ra cuví ityi nuu tsihin nyivi Israel. Tacan tan tsaha ra Pilato ndatu tsi ra, tan tsahan ra José tsinaquihin ra cuñu ñuhu ra Jesús.

<sup>39</sup> Tsahan ndihi tucu ra Nicodemo, ra tsa tsahan tsicahan tsihin ra Jesús tsa tsa cuaa. Tsa ra tsihin ndutya tami. Tan iin ndutya tami tsa nañi mirra nasaca nuu tsihin inga tsa nañi áloe. Tan quitá tsi tumaa oco utsi kilu tsa tandihi tsi.

<sup>40</sup> Tacan tan ra José tsihin ra Nicodemo quihin ra naha cuñu ñuhu ra Jesús tan cava nuu ra naha tsi ra tsihin jahma cuiñi tsa tyihí ra naha ndutya tami can, tumaa iyó maa nyivi Israel tun cua cutsi ñi ndiyi tsitsi ñuhu.

<sup>41</sup> Yatyin nu tsahñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsa nu ñaha ca cuyucu ndi intuhun ndiyi.

<sup>42</sup> Ican ñi tinyi ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivi quitatú nyivi Israel.

## 20

*Nu nandoto ra Jesús*  
(Mt. 28.1-10; Mr. 16.1-8; Lc. 24.1-12)

<sup>1</sup> Tsa naa ca tsa cuvi tumingu, ña María quee ñuu Magdala tsahan ña nu ñaña ra Jesús. Tan nyehe ña tyin nduve ca yuu ndasí yuhu ñaña can.

<sup>2</sup> Tacan tan tsinú xaan ña cuahán ña nu nyi ra Simón Pedro tan inga ra tsica tsihin ra Jesús, ra tsa cuñi xaan ra Jesús. Tan catyí ña tsihin ra naha:

—Quihin nyivi cuñu ñuhu Jutu Mañi yo tsitsi ñaña, tan ña tsitó yo nu maa tsindaca ñi itsi —catyí ña María tsihin ra Pedro tan tsihin inga ra can.

<sup>3</sup> Tacan tan ra Pedro tan inga ra can cuahán ra naha nu ñaña.

<sup>4</sup> Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsa nu ñaña.

<sup>5</sup> Quitsaha nyehé ihñi ra tsitsi ñaña, tan nyehe ra jahma cuiñi tsa cava nuu



cuñu ñuhu ra Jesús, canyíi can. Maa tyin ña quihví ra tsitsi ñaña.

<sup>6</sup> Yaha can tan tsaá ndihi ra Simón Pedro tsata ra, tan ra ican quihví ra tsitsi ñaña can. Juvín ñi nyehe ndihi ra can jahma can canyíi tsi.

<sup>7</sup> Tan juvín ñi nyehe ndihi ra tyin jahma tsa tsindasi jiñi ra Jesús, ña iin ñi nu canyíi can tsihin inga jahma can, yihí tahnu can tan cayucú siin can.

<sup>8</sup> Tacan tan quihví ndihi inga ra tsicá tsihin ra Jesús can, ra tsa tsaá tsa jihna nu ñaña can. Tan nyehe ra tsa cuví can, tan tsinú iñi ra.

<sup>9</sup> Tyin tsa jihna, ña cutuñí iñi ra naha tsa caahán nu tutu Nyoo, tyin ra Jesús cuñí tsi tsa nandoto ra tsa yaha cúu ra.

<sup>10</sup> Tacan tan cuanuhu ra tsicá tsihin ra Jesús nda yuvehe ra naha.

*Nu quituvi ra Jesús nuu ña María quee ñuu Magdala  
(Mr. 16.9-11)*

<sup>11</sup> Maa tyin tsa tsaá nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehé ihñi ña tsitsi ñaña can.

<sup>12</sup> Tan nyehe ña uvi taahan ángel nditsí ra naha jahma cuitsin, nyecú ra naha nu tsicavá cuñu ñuhu ra Jesús. Iin ra nyaá ityi nu tsicavá jiñi ra, tan inga ra nyaá ityi nu tsicavá tsaha ra.

<sup>13</sup> Tan tsicá tuhun ra ángel can naha ra tsi ña tan catyí ra naha:

—¿Nacuvi tsacú xaan un?

Tan catyí ña:

—Tsacú maa yu tyin quihín nyivi tsi Jutu Mañi yu, tan ña tsitó yu nu maa tinyíi ñi tsi ra —catyí ña tsihin ángel can.

<sup>14</sup> Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin ña tsitó ña tatun ra Jesús cuví ra.

<sup>15</sup> Tacan tan tsicá tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñí maa ña tyin ra jahá cuenda cora yutun tata can cuví ra. Tan catyí ña:

—Tatta, tatun yooho quihín tsi ra Jesús, cahan tsihin yu nu maa tsindaca un tsi ra, tyin cunaquihin yu tsi ra —catyí ña tsihin ra.

<sup>16</sup> Tacan tan catyí ra Jesús tsihin ña:

—¿María! —catyí ra tsihin ña.

Tan nanyehe ña tan cahan ña tsihin ra tsihin yuhu hebreo, tan catyí ña:

—¿Raboni! —Tan cuñí tsi catyí can: “Maestro”.

<sup>17</sup> Tan catyí ra Jesús tsihin ña:

—Ña tñin un tsi yu, tyin ñaha ca cahun yu nu nyaá Jutu yu. Maa tyin cuaahan tan cahan un tsihin tandihi yañi yu tyin cuahan yu nu nyaá Jutu yu, tan juvín ñi Jutu ndihi ndo cuví tsi ra. Cuahan yu nu nyaá Nyoo yu, tan juvín ñi Nyoo ndo cuví tsi ra —catyí ra Jesús tsihin ña.

<sup>18</sup> Tacan tan tsahan ña María ñuu Magdala can tsijacoto ña tsi ra tsicá tsihin ra Jesús tyin nyehe ña tsi ra tan cahan ra yacan tsihin ña.

*Nu quituvi ra Jesús nuu ra tsicá tsihin ra  
(Mt. 28.16-20; Mr. 16.14-18; Lc. 24.36-49)*

<sup>19</sup> Juvín ñi maa quivi can nu quit-saha vitya, tsa cua cuaa tan ndu iin ra tsicá tsihin ra Jesús. Tan ndasi vaha yuvehe nu yucú ra naha tsa cuenda tsa yuuhví ra naha tsi ra cuví ityi nuu tsihin nyivi Israel. Tan ra Jesús quituvi ra tan tsinyaa nyityi ra mahñu ra naha. Tan tsaha ra nacumi tsi ra naha, tan catyí ra:

—Na coo tsa taxin aña ndo —catyí ra.

<sup>20</sup> Tsa yaha tsa cahan ra yacan tan janaha ra ndaha ra tan xiin ra tsi ra naha. Tan ra ican naha ra sii xaan cuñí ra naha tsa nyehe ra naha tsi Jutu Mañi yo.

<sup>21</sup> Tan catyí nyico ra Jesús inga tsaha tsihin ra naha:

—Na coo tsa taxin aña ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyooho —catyí ra tsihin ra naha.

<sup>22</sup> Tacan tan tiví ra tsi ra naha tan catyí ra tsihin ra naha:

—Naquihin ndo Tatyí Ii Nyoo.

<sup>23</sup> Nyiví tsa jahá ndo tucahnu iñi, iyó tucahnu iñi tsi ñi. Tan nyiví tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tshin ra naha.

*Nu nyehe ra Tomás tsi Jutu Mañi yo tsa yaha nandoto ra*

<sup>24</sup> Maa tyin ra Tomás, iin rq tsica tshin ra Jesús, ra tsa catyí ñi: “ra tñihí”, yoñi ra nyí tshin ra naha tsa tsahan ra Jesús.

<sup>25</sup> Yaha can tan nacatyí tuhun ra tsica tshin ra Jesús tshin ra:

—Nyehe ndi tsi Jutu Mañi yo —catyí ra naha tshin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihví nduyu, tan ña cuaxin yu nundaha yu nu yihí nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

<sup>26</sup> Tsa yaha una quiví yucú nyico ra tsica tshin ra Jesús tsitsi iin vehe. Tan nyí ra Tomás tshin ra naha. Tacan tan vasu ndi maa ndasi vaha yuvehe, maa tyin ra Jesús quihví ra tan tsinyaá nyityi ra mahñu ra naha. Tan tsahá ra nacumi tsi ra naha tan catyí ra:

—Na coo tsa taxin añima ndo.

<sup>27</sup> Tacan tan quitsahá catyí ra tshin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuvi un ra ndava iñi. Tsinu iñi —catyí ra Jesús tshin ra Tomás.

<sup>28</sup> Tacan tan nacahan ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

<sup>29</sup> Tan catyí ra Jesús tshin ra:

—Yooho Tomás, vityin tsinú iñi un tyin nyehé un tsi yu. Si ca cuñí nyiví tsa nduve tsa nyehe tan tsinú iñi ñi —catyí ra Jesús tshin ra Tomás.

*Nu jacoto ra Juan nacuenta tsinu libru ihya*

<sup>30</sup> Cuaha ca tsa iyo javaha ra Jesús nuu ra tsica tshin ra, maa tyin ña tandihí tsi nyaá nu libru ihya.

<sup>31</sup> Tsinyaá tsa nyaá tyin tacan tan tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayiví nyitó tsa ña cua naa maa.

## 21

*Nu quituvi ra Jesús nuu utsa taahan ra tsica tshin ra*

<sup>1</sup> Tsa yaha can tan quituvi ra Jesús nuu ra tsica tshin ra inga tsaha. Tye-hen quituvi ra yatyin ñi yuhu miñi Tiberias:

<sup>2</sup> Iin ñi nu yucú ra Simón Pedro tan ra Tomás tsa nañi: “ra tñihí”, tan ra Natanael, ra ñuu Caná nu cuví Galilea. Tan yucú ndihí sehe ra Zebedeo naha ra tan uvi taahan ca ra tsica tshin ra Jesús.

<sup>3</sup> Tan catyí ra Simón Pedro tshin ra naha:

—Cuahan yu cua tñin yu tyaca —catyí ra.

Tan catyí ra naha tshin ra:

—Cuhun ndihí ndi tshin un —catyí ra naha.

Cuahán ra naha tan quihví ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha.

<sup>4</sup> Tsa cuñi cunditsin tan quituvi ra Jesús nu nyiti yuhu miñi can. Maa tyin ra tsica tshin ra, ña nacoto ra naha tsi ra.

<sup>5</sup> Tacan tan catyí ra tshin ra naha:

—Nyooho ra cuatyí, ¿a ñaha ca ñihí ndo tyaca?

Tan nacahan ra naha tan catyí ra naha:

—Ñaha ca ñihí ndi.

<sup>6</sup> Tacan tan nacahan ra Jesús tan catyí ra:

—Cuaxin ndo traya ndo tsiyo cuaha yutun ndoo juven, tan cua ñihí ndo tyaca —catyí ra Jesús tshin ra naha.

Tacan ica ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihí tsitsi can.

<sup>7</sup> Tan ra tsa cuñi xaan ra Jesús catyí ra tshin ra Pedro:

—¡Jutu Mañi yo cuví ra! —catyí ra tshin ra Pedro.

Tsa tsiñi ra Simón Pedro tyin Jutu Mañi yo cuví ra, tsinditsi ra jahma ra, tyin tava ra can tsa cua tñin ra tyaca, tan quihvi ra cuahán ra tsitsi ndutya can.

<sup>8</sup>Tan inga ra tsa tsica tsihin ra Jesús tsaá ra naha nda yuhu miñi can tsihin yutun ndoo, ixtá ra naha traya can tyin tsitu cuii can tsihin tyaca, tyin yatyin ñi yuhu miñi can yucu ra naha tumaa iin cientu metru ñi.

<sup>9</sup>Tsa nuu ra naha nu ñuhu, nyehe ra naha iin nu cayú tuun ñuhu. Tan canyí iin tyaca tsihin paan nuu tuun ñuhu can.

<sup>10</sup>Tan catyí ra Jesús tsihin ra naha:

—Ndaca ndo taahan tyaca tsa ndi tñin ndo —catyí ra Jesús tsihin ra naha.

<sup>11</sup>Tan ndaa ra Simón Pedro nu yutun ndoo tan quitsaha ixtá caa ra traya tyin tsitu cuii can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can.

<sup>12</sup>Tacan tan catyí ra Jesús tsihin ra naha:

—Ñaha ndo tyin curumusa ndo —catyí ra Jesús tsihin ra naha.

Tan ndi intuhun ra tsica tsihin ra, ña cana iñi ra naha ndaca tuhun ra naha yoo ra cuví ra tyin tsitó ra naha tyin Jutu Mañi yo cuví ra.

<sup>13</sup>Tacan tan natuhva ra Jesús tan quihin ra paan can, tan tsaha ra tsi ra naha. Tan juvin ñi tacan ica ra tsihin tyaca.

<sup>14</sup>Yacan cuví nu tsinu uñi tsaha quituvi ra Jesús nuu ra tsica tsihin ra tsa yaha nandoto ra.

### *Nu caahán ra Jesús tsihin ra Simón Pedro*

<sup>15</sup>Tsa yaha tsa curumusa ra Jesús, tan tsica tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahan ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihi jana yu —catyí ra Jesús tsihin ra Pedro.

<sup>16</sup>Tsica tuhun nyico ra Jesús tsi ra inga tsaha:

—Simón sehe ra Jonás, ¿a cuñi un tsi yu? —catyí ra Jesús tsihin ra.

Nacahan ra Pedro tan catyí ra:

—Jutu Mañi yu, maa un tsitó tyin cuñi yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

<sup>17</sup>Tan tsinu uñi tsaha tsica tuhun nyico ra tsi ra:

—Simón, sehe ra Jonás, ¿a cuñi un tsi yu? —catyí ra Jesús tsihin ra.

Cuhva tsa tsica tuhun ra tsi ra tsa tsinu uñi tsaha tatun cuñi ra tsi ra, ra Pedro nducuihya xaan cuñi ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñi yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu.

<sup>18</sup>Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñi un cuhun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñi un cuhun un —catyí ra Jesús tsihin ra Pedro.

<sup>19</sup>Tsa cahan ra Jesús yacan, cuñi ra cahan ra nácaa cua cúu ra Pedro tan cua jacahnu ra tsi Nyoo tacan. Yaha can tan catyí ra Jesús tsihin ra Pedro:

—Ñaha quitsi nyicun un tsi yu! —catyí ra tsihin ra.

### *Nu caahán ra Juan tuhun maa ra*

<sup>20</sup>Tacan tan natsico coo ra Pedro tan nyehe ra tyin nyicún inga ra tsa tsica tsihin ra Jesús tsi ra naha, ra tsa cuñi xaan ra Jesús. Juvin ra tsinyanaa tsi ra Jesús tsa cuxiñi ra quivi can. Tan tsica tuhun ra tsi ra tan catyí ra: “Jutu Mañi yu, ¿yoo ra cua xico tsi un?” catyí ra, tsica tuhun ra quivi tsa ndi cumañi ca cúu ra Jesús.

<sup>21</sup>Cuhva tsa nyehe ra Pedro tsi ra, tsica tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

<sup>22</sup> Nacahan ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, ¿náa cuenda yoocho? Cõhon yoocho tsihin yu —catyi ra Jesús tsihin ra Pedro.

<sup>23</sup> Tacan tan iin yaha ñi tsinu̇ tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñí yuhu tsa coo ra nda cuanda quitsi yu inga tsaha, ¿náa cuenda yoocho?”

<sup>24</sup> Yuhu cuví ra can, ra tsa cahan ra Jesús tuhun. Tan nyehẽ yu tandihí cuii maa tsa cuví tan tyaȧ yu nu libru ihya. Yuhu tsitó yu tyin tandihí tsa tyaȧ yu, tsa nditsa caahán tsi.

<sup>25</sup> Iyó cuaha ca tsa javahã ra Jesús. Tun tsatyin tsicunyaã tandihí can nu libru, tsicá iñi yu tyin ndi ña cua cutahan can nani̇ cahnu nu ñuhu ñayivi.

Tan na cuví tsi tacan ñi.



## Tyiñu Tsa Javaha Ra Apóstol: Ra Tsa Tava Tyiñu Ra Jesucristo

*Nu catyí ra Jesús tyin cua quitsi Tatyí Ii Nyoo*

<sup>1</sup> Yooho Teófilo, quivi tsa jacuhun yu tutu tsa jihna ñi can tsi un, tyaa yu tandihi tsa quitsaha javahá ra Jesús tan tandihi tsa jacuahá ra nda quivi jihna ñi,

<sup>2</sup> tan nda quivi nandaá ra andivi. Tan tsa ndi cumañi ca nandaá ra andivi, nacatsi ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra.

<sup>3</sup> Tan cuaha xaan tundoho nyehe ra Jesús tan tsihi ra. Tan tsa yaha tsa tsihi ra, nandoto ra tan quituvi ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvi ra nu yucú ra naha, tyin na coto ra naha tyin nditsa tsa nyito ra. Tan cahan ra Jesús tsihin ra naha nácaa ndacá ñaha Nyoo tsi yo.

<sup>4</sup> Tsa ndi nyii ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahan yu tsihin ndo quivi can.

<sup>5</sup> Nditsa tyin tsihin ndutya jacoondutya ra Juan tsi nyivi. Maa tyin nyooho ña cuaha ca quivi tan coondutya ndo tsihin Tatyí Ii Nyoo —catyí ra Jesús tsihin ra naha.

*Nu nandaá ra Jesús andivi*

<sup>6</sup> Tsa ndu iin ra tava tyiñu ra Jesús, tan tsica tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

<sup>7</sup> Tan nacañan ra Jesús tan catyí ra tsihin ra naha:

—Ña taahán tsi coto nyooho ndaa quivi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi.

<sup>8</sup> Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihi ñuu tsa cayucú Judea tan Samaria, tan nda cuanda nanii cahnu ñuhu ñayivi —catyí ra Jesús tsihin ra naha.

<sup>9</sup> Tan tsa yaha tsa cahan ra Jesús tuhun ihya, tan tsitsi tsa nyehé ra naha tsi ra, nandaá ra andivi, tan quihvi ra tsitsi vico. Tacan tan ña nyehé ca ra naha tsi ra.

<sup>10</sup> Tan cuhva tsa nyehé ndaa ra naha andivi, quituvi uvi taahan ángel Nyoo tsa nditsi jahma cuitsin yatyin ñi nu nyecú ra naha.

<sup>11</sup> Tan catyí ángel can naha ra tsihin ra tava tyiñu ra Jesús:

—Nyooho ra Galilea, ¿nacuenda nyehé ndaa xaan ndo andivi? Ra Jesús tsa nyehé ndo nandaá ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

*Nu nacatsi ra tava tyiñu ra Jesús tsi ra Matías tyin jaha tyiñu ra tyiñu tsa javaha ra Judas*

<sup>12</sup> Tacan tan quita ra tava tyiñu ra Jesús nu tsiyucu ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyii ñuu can, tumaa sava hora ñi tan tsaa yo. Tyin sava hora ñi cuvi caca nyivi quivi quitatú ñi, tyin tacan catyí maa ley tsa tyaa ra Moisés.

<sup>13</sup> Tsa tsaa ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuvi ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñi tsa nasama ra ndacá ñaha, tan tsihin ra Judas yañi ra Jacobo.

<sup>14</sup> Tan tandihi ra ican naha ra ndu iin ra naha tandihi quivi tan tsicán tahvi ra naha tsi Nyoo. Tan yucú

ndihí tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

<sup>15</sup> Tan tsa tandihí nyivi tsa ndu iin quivi can quitá maa cientu oco ñi. Tacan tan nduvita ra Pedro. Tan catyí ra tsihin ñi:

<sup>16</sup> —Nyooho yañi, tsa nyaá tucu maa tsa tahan ra Jesús cuhva ihya tan vityin tsa cundaá tsa cahan ra David jaha Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra.

<sup>17</sup> Tan ra Judas cuví ra iin ra tsa tsinyij tsihin yo. Tan iin caa ñi jaha tyiñu ra tsihin yo.

<sup>18</sup> Maa tyin tsahan ra, tan jata ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jiñi ra, tan ndata tsitsi ra tan quita tandihí tsiti ra.

<sup>19</sup> Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñí tsi catyí Ñuhu cuenda tsa Tsati Niñi Nyivi.

<sup>20</sup> Tyin nu libru Salmo catyí tsi cuenda ra Judas tyehen:

Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javaha ra.

<sup>21-22</sup> Tan vityin yucú ra tsa cutahan tsihin yo quivi tsinyij Jutu Mañi yo Jesucristo tsihin yo; nda quivi jacoondutyá ra Juan tsi ra, tan nda quivi nandaá ra cuahán ra andivi. Tan vityin ñiñi cuñí tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

<sup>23</sup> Tacan tan cana ra naha tsi uvi taahan ra naha. Cana ra naha tsi ra José tsa nañi Barsabás, tan juvin ñi nañi tucu ra Justo; tan cana tucu ra naha tsi ra Matías.

<sup>24</sup> Tan tsican tahvi ra naha tsi Nyoo tan catyí ra naha tyehen:

—Jutu Mañi yu, yooho tsitó un tsa tsicá iñi ndi tsihin aña ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsi maa un,

<sup>25</sup> tyin cuiso ra tyiñu tsa jacunaá ra Judas tsa cuenda cuatyí ra, tan cuahán ra nu taahán maa tsi cuhun ra —catyí ra naha, tsican tahvi ra naha tsi Nyoo.

<sup>26</sup> Tacan tan tava cuenda ra naha ndáa ra cua tahan tsi cuiso tyiñu can. Tan tahan tsi tsi ra Matías. Ra ican cuví ra tahan tsi cutahan tsihin tsa utsi iin ra tsa tava tyiñu ra Jesús.

## 2

### *Nu nuu Tatyí Ii Nyoo*

<sup>1</sup> Tsaá quivi vico Pentecostés, tan ndu iin tandihí nyivi tsa tsinú iñi tsi ra Jesús.

<sup>2</sup> Tan sana iñi ñi tan tsiñi ñi cucayu ityi andivi. Tumaa cucayu tsa vatsi tatyí xaan. Tan iyo xaan cuví tsitsi vehe nu yucú ñi.

<sup>3</sup> Tacan tan quituvi tumaa iin ñuhu tan tsaá tsi siqui intuhun intuhun ñi.

<sup>4</sup> Tan tandihí ñi tsitu ñi tsihin Tatyí Ii Nyoo. Tan quitsaha caahán ñi inga yuhu cuhva tsa jacahan maa Tatyí Ii Nyoo tsi ñi.

<sup>5</sup> Tan quivi can cuaha xaan ra ñuu Israel tsaá ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihí ñuu tsa cayucú nu ñuhu ñayivi.

<sup>6</sup> Tan tsa tsiñi ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa caahán ñi jaha Tatyí Ii Nyoo.

<sup>7</sup> Iyo xaan cuñi ra naha tan quitsaha natuhún tahan ra naha tan catyí ra naha:

—¿A ñavin nyivi ñuhu Galilea cuví tandihí ñi tsa caahán ihya?

<sup>8</sup> ¿Nacuenda tyin tsiñi yo caahán ñi cuhva caahán intuhun intuhun yo?

<sup>9</sup> Ihya yucú yo tsa cuví yo nyivi quee Partia, Media, Elam, Mesopotamia, Judea, Capadocia, Ponto, Asia,

<sup>10</sup> Frigia, Panfilia, Egipto, tan nyivi quee ityi nuu ca Cirene ityi Africa. Tan yucú tucu yo tsa cuví yo nyivi ñuu Roma tan iyó yo ñuu ihya. Tan juhva

yo cuví yo nyívi Israel nda quívi cacu yo. Tan inga yo cuví yo nyívi nanduví cuenda nyívi Israel tan nyicún yo ley tsa tyaa ra Moisés.

11 Iyó tucu yo tsa cuví yo nyívi quee Creta tan Arabia. Maa tyin tandihí yo tan tsiñí yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

12 Tandihí ra naha, iyo xaan cuñí ra naha, tan tsicá tuhun tahan ra naha tan catyí ra naha:

—¿Náa cuñí tsi catyi tandihí tsa cuví ihya? —catyí ra naha.

13 Maa tyin inga ra jacuñí nyaa ra naha tsi ñi, tan catyí ra naha tyin tsiñí ñi.

#### *Nu caahán ra Pedro tsihin nyívi*

14 Tacan tan nduvita ra Pedro tsihin tsa utsi iin ca ra tava tyiñu ra Jesús. Tan ñihi cahán ra tan catyí ra:

—Nyooho yañi, tsa cuví ndo ra ñuu Israel, tan tandihí nyooho tsa iyó ñuu Jerusalén ihya. Cuñí tsi tsa coto ndo tuhun ihya. Tan tyaa soho vaha ndo tsa cua cahan yu tsihin ndo.

15 Tyin cuñí maa ndo tyin tsiñí ndi. Maa tyin ñavin nyixi tsihi ndi, tyin ña tuhvá nyívi coho nyixi hora ihya, tyin ndi jatyaan.

16 Maa tyin tsa cuví ihya cuví tsa cahán ra Joel, ra cuví ndusu yuhu Nyoo tahan tsanaha. Tyin catyí ra:

17 Nu cua ndihí quívi, catyí Nyoo, cua jaquitsi yu Tatyí Ii yu siqui tandihí nyívi.

Tan cua cahan sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyívi tsahnu cua nyehe ñi ñumaahna jaha yu.

18 Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahan ñi tsa cuenda yu, catyí Nyoo.

19 Tan catyí ra tyin cua janaha ra tsa iyo cua nyehe nyívi ityi andívi.

Tan ityi nu ñuhu ñayívi cua javaha ra tsa iyo, seña niñi, seña ñuhu, tan vico yuhma.

20 Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandihí tuhun caahán ra ihya cua cuví tsi tsa ndi cumañi ca tahan tsi quívi quitsi Jutu Mañi yo.

Tan quívi cua quitsi ra, iyo xaan cua cuví.

21 Tan tandihí nyívi tsa tsicán tahvi tsi ra cua cacu ñi, catyí ra Joel jaha Nyoo.

22 Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaa soho ndo tsa cua cahan yu ihya. Ra Jesús, ra ñuu Nazaret, maa Nyoo nacatsi tsi ra, tan tsa janaha Nyoo tsi yo tyin nditsa tsa nacatsi ra tsi ra, tsaha ra tunyee iñi tsi ra tan cuaha xaan tsa iyo tan tsa nyityi tan seña javaha ra. Tan tsa tsitó maa ndo tandihí tsa caahán yu ihya.

23 Maa tyin quívi nacuhva cuenda ndo tsi ra, javaha ndo tumaa cuhva tyaa maa Nyoo cuhva nda quívi jihna ñi. Tyin tsaha cuenda ndo tsi ra tsi ra caquiñi. Tan ticaa ra naha tsi ra nu cruu. Tsahñi ra naha tsi ra jaha ndo.

24 Maa tyin Nyoo janandoto ra tsi ra. Jacacu ra tsi ra tyin ña cuví cundaca ñaha tuhun tsihi tsi ra.

25 Tyin ra David cahán ra tuhun cahan ra Cristo tahan tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

26 Yacan cuenda sii xaan cuñí yu. Tan jacahnú yu tsi Nyoo tsihin tsa sii cuñí yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

27 Tyin yooho, Nyoo Jutu yu, ña cua nacoo ihñi un aña yu nu yucú aña nyívi tsa tsihi, tan ndi ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

28 Tan janaha un tsi yu ityi nu coo yu ñayívi ña cua naa maa.

Tan cua jacutu un tsi yu tsihin tusii iñi tyin maa un nyaá tsihin yu, catyí ra David cahan ra tsa cahan ra Cristo tahañ tsanaha.

<sup>29</sup> Nyooho yañi, tsitó vaha yo tyin ra David tsii tsaahnu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin.

<sup>30</sup> Maa tyin ra David cuvi ra iin ndusu yuhu Nyoo. Tan tsitó ra tyin Nyoo catyí ra tyin juvin ñi tata maa ra cua cuvi ra Cristo. Tan ra Cristo, cuvi ra cua cundaca ñaha tumaa tsa tsindaca ñaha ra David.

<sup>31</sup> Tan ra David tumaa tsa tyin nyehe ra tsa cua cuvi nu cuahán ca tsi ityi nuu. Tan cahan ra tuhun tsa cahan ra Cristo. Tan catyí ra tyin ña cua ndoo añima ra nu yucú añima nyivi tsa tsihi. Tan ndi ña cua tyahyu cuñu ñuhu ra, catyí ra.

<sup>32</sup> Tan ra Jesús can janandoto Nyoo tsi ra. Tan tandihi maa ndi cuvi ndi tsandaa tsa cuenda tsa nandoto ra.

<sup>33</sup> Jutu Nyoo jacahnu ra tsi ra Jesús, tan tsihin ndaha cuaha ra cañihi ra tsi ra nda gloria. Tan ra Jesús naquihin cuenda ra Tatyí li tsa catyí Jutu yo Nyoo tahañ tsanaha tyin cuhva ra tsi yo. Tan yacan cuvi tsa tsaha ra tsi ndi vityin. Juvin tsi cuvi tsa nyehé ndo tan tsiñi ndo.

<sup>34</sup> Tyin ñavin ra David nandaa ityi andivi. Maa tyin maa ra David cahan ra tuhun ra Jesús, tan catyí ra:

Jutu Mañi yo Nyoo catyí ra tsihin Jutu Mañi yu ra Cristo: “Cunyaa xiin cuaha yu

<sup>35</sup> tsitsi tsa cua caquin yu tsi ra xaan iñi tsi un tsaha un”, catyí ra David jahā Nyoo.

<sup>36</sup> Tacan cahan ra Pedro tsihin ra naha, tan catyí tucu ra:

—Nyooho tan tandihi ca nyivi Israel, coto vaha ndo tyin tuhun ra Jesús, yacan cuvi tsa caahán yu tsihin ndo ihya. Ticaa ndo tsi ra nu cruu. Maa tyin cuvi ra Jutu Mañi yo, tan cuvi tucu ra Cristo ra ndacá ñaha tsi yo jahā Nyoo —catyí ra Pedro.

<sup>37</sup> Cuhva tsa tsiñi ra naha tsa cahan ra Pedro tuhun ihya, cuiihya xaan cuñi ra naha cuvi. Tan tsica tuhun ra

naha tsi ra Pedro tan tsi tandihi ca ra tava tyiñu ra Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

<sup>38</sup> Tacan tan catyí ra Pedro tsihin ra naha:

—Intuhun intuhun ndo ndu uvi iñi ndo cuatyí ndo tan nasama ndo cuhva iyó ndo. Tan coondutya ndo tsihin sivi ra Jesucristo. Tan cua jaha ra tucahnu iñi cuatyí ndo. Tacan tan cua cuhva Nyoo Tatyí li ra tsi ndo.

<sup>39</sup> Tyin tahañ tsanaha catyí Nyoo tyin cuhva ra Tatyí li ra tsi yo, tan tsi sehe yo, tan tsi nyivi tsa cañi iyó. Tyin tandihi nyivi tsa cua nacana Jutu Nyoo cua cuhva ra Tatyí li ra tsi ñi —catyí ra Pedro.

<sup>40</sup> Tsihin tuhun ihya tan tsihin inga ca tuhun, ra Pedro tsaha cuenda ra tsi ra naha tan catyí ra tsihin ra naha:

—Nducu ndo cuhva na jacacu Nyoo tsi ndo, coto cunaa ndo tsihin nyivi caquiñi iyó nu ñuhu ñayivi ihya —catyí ra tsihin ra naha.

<sup>41</sup> Tacan tan tandihi ra tsa tyaa yahvi tuhun cahan ra Pedro tsicoondutya ra naha. Tan quitá tumaa uñi mil nyivi tsa tandihi ñi, tan ndu iin ñi tsihin nyivi yihí cuenda ra Jesucristo.

<sup>42</sup> Tan tandihi quivi ndu iin tandihi ñi, tan ñi iñi ñi tyaá soho ñi tsa jacuahá tandihi ra tava tyiñu ra Jesucristo tsi ñi. Tan iin ñi cuvi ñi tsihin tahan ñi, tan tsicán tahvi ñi tan tsatsí ñi paan tan tsihi ñi vinu tyin tacan tan ña cua naa iñi ñi tyin tsihi ra Cristo tsa cuenda cuatyí ñi.

*Cuhva iyó nyivi yihí cuenda Jutu Mañi yo Jesucristo quivi can*

<sup>43</sup> Tan cuaha tsa iyo javaha tandihi ra tsa tava tyiñu ra Jesucristo jahā Nyoo. Tan tandihi ñi iyo cuñi ñi.

<sup>44</sup> Tandihi ñi yihí cuenda ra Cristo iin caa ñi iyó ñi tsihin tsa iyó tsi ñi.

<sup>45</sup> Xicó ñi tsa iyó tsi ñi. Tan tsatsá ñi xuhun ñi tsi nyivi tahan ñi cuhva tsa tsiñi ñuhu tsi intuhun intuhun ñi.

<sup>46</sup> Tandihi quivi tan ndu iin ñi nda vehe ñuhu cahnu. Tan nda yuvehe ñi



iin caa ñi tsatsí ñi paan tan tsihi ñi vinu. Tan sii cuñí ñi tsatsí ñi tyin iin ñi cuví ñi.

<sup>47</sup> Tan jacahnú ñi tsi Nyoo. Tan vaha caahán tandihí nyívi tuhun ñi. Tan iin tan iin quívi tan nducuahá ca nyívi quihví cuenda Jutu Mañi yo Jesús tyin jacacú ra tsi ñi.

### 3

#### *Nu nduvahá iin ra coxo*

<sup>1</sup> Iin quívi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyívi Israel cuahán cuandacán tahvi tsi Nyoo.

<sup>2</sup> Tan iin ra ndaahvi, coxo ra nda quívi cacú ra, nyaá ra yuhu cora vehe ñuhu cahnu can tandihí maa quívi. Tyin tsindacá ñi tsi ra na ndacan ra xuhun tsi nyívi quihví yuhu cora can, tan nañi tsi Yuhu Cora Sii Caá.

<sup>3</sup> Tacan tan nyehe ra coxo can tsi ra Pedro tsihin ra Juan tsa cua quihví ra naha yuhu cora can. Tan tsicán ra xuhun tsi ra naha.

<sup>4</sup> Tan nyehe ra Pedro tan ra Juan tsi ra. Tan ra Pedro catyí ra tsihin ra:

—Nyehe tsi ndi —catyí ra.

<sup>5</sup> Tacan tan quitsahá nyehé ra coxo can tsi ra naha. Cuñí maa ra tyin iyó tsa cua cuhva ra naha tsi ra.

<sup>6</sup> Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sívi ra Jesucristo ra ñuu Nazaret, ndúvita tan caca —catyí ra Pedro tsihin ra.

<sup>7</sup> Tacan tan tñin ra Pedro ndaha cuaha ra tan cañihí ra tsi ra. Tan juvin ñi cuhva can nacoó tunyee iñi nduvi taahan tsaha ra tan jucun tsaha ra.

<sup>8</sup> Tacan tan ra coxo can ndava ra, tan nduvita ra tsinyaa nyityi ra. Tan quitsahá tsicá ra. Tan quihví ra tsihin ra naha tsitsi cora vehe ñuhu can, tsicá ra, tan ndavá ra, jacahnú ra tsi Nyoo.

<sup>9</sup> Tandihí nyívi nyehe ñi tsi ra tyin tsicá ra tan jacahnú ra tsi Nyoo.

<sup>10</sup> Tan iyo xaan cuñí ñi tan yuuhví ñi tsa cuenda tsa nduvahá ra can. Tyin nacotó ñi tsi ra. Tyin juvin ra cuví ra tsa tuhvá tsinyaa Yuhu Cora Sii Caá can tsicán ra xuhun tsi nyívi.

#### *Nu caahán ra Pedro tuhun ra Cristo tsihin nyívi nu cuví corredor cuenda ra Salomón*

<sup>11</sup> Ra coxo tsa nduvahá can, ña jaña maa ra tsi ra Pedro tan ra Juan. Tan tandihí nyívi iyo cuñí ñi, tan tsinú xaan ñi tsaá ñi nu cuví corredor cuenda ra Salomón tyin cua nyehe ñi tsi ra coxo can tyin tsa nduvahá ra.

<sup>12</sup> Tsa nyehe ra Pedro yacan, tan catyí ra tsihin nyívi can:

—Nyooho ra Israel, ¿nacuenda iyo xaan cuñí ndo? Tan ¿nacuenda nyehé xaan ndo tsi nyuhu? ¿A cuñí maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuví janduvahá ndi tsi ra coxo ihya?

<sup>13</sup> Ñavin maa nyuhu janduvahá tsi ra. Nyoo ra cuví Nyoo tsii tsaahnu yo, ra Abraham, ra Isaac tan ra Jacob, ra ican jacahnú tsi Sehe ra tan tsahá ra tunyee iñi tsi ra, ra tsa tsahá cuenda ndo tsi ra Pilato, ra cumí tyiñu. Tan ra Pilato cuñi ra jaña ra tsi ra. Maa tyin nyooho ña tsahá ndo.

<sup>14</sup> Tahán tsi tsa ndacan ndo tsa jaña ra tsi ra vaha, tan ra ii can, maa tyin nyooho tsicán ndo tsa jaña ra tsi iin ra tsahñi ndiyi.

<sup>15</sup> Tan nyooho tsahñi ndo tsi ra tsa tsahá ñayívi nyito coo yo tsihin Nyoo. Maa tyin Nyoo Jutu yo janandoto ra tsi ra. Tan ña ndoo ra nu yucú aña nyívi tsa tsihi. Tan nyuhu cuví ndi tsandaa tsa cuenda tsa nandoto ra.

<sup>16</sup> Tan juvin ra Jesús cuví ra tsa tsahá tunyee iñi tsi ra coxo ihya tan nduvahá tsaha ra, tyin tsinú iñi ndi tyin iyó tunyee iñi tsi ra Jesús. Yacan cuenda nduvahá tsaha ra ihya, tan nacotó vaha ndo tsi ra. Tan tandihí nyooho nyehe ndo tyin nduvahá ra tsa cuenda tsa tsinú iñi ndi.

<sup>17</sup> Tsitó yu, —catyí ra Pedro— tyin quívi tsa tsahñi ndo tsi ra Jesús, ña tsitó ndo tyin ña vaha tsa javahá ndo.

Tan tacan tucu ra cuví ityi nuu tsihin ndo, ña tsitó ra naha.

<sup>18</sup> Maa tyin tacan jacuvi ndo tan cundaã tsa cahan ra cuví ndusu yuhu Nyoo tahañ tsanaha, tyin catyí ra naha tyin ra Cristo cua nyehe ra tundo.

<sup>19</sup> Yacan cuenda ndu uvi ñi ndo cuatyí ndo, tan naçuhva cuenda ndo aña ndo tsi Nyoo, na ndatsi cuatyí ndo. Tacan tan sii xaan cua cuña aña ndo jaha tunyee ñi Jutu Mañiyo.

<sup>20</sup> Tacan tan cua jaquitsi ra tsi ra Jesús ra cuví Cristo, na quitsi ra inga tsaha. Tyin nda quivi jihna ñi tyaa Nyoo cuhva tyin quitsi ra tsa cuenda yo.

<sup>21</sup> Taahán tsi tsa ndoó ra Jesucristo gloria tsa vityin nda cuanda quivi cua jandutsaa Nyoo tandihi maa tsa iyó. Tumaa cuhva catyi ra cuví ndusu yuhu Nyoo tahañ tsanaha.

<sup>22</sup> Tyin tacan catyi ra Moisés tsihin tsii tsaahnu yo: “Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyivi yo cua cuvi ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihi tsa cua cahan ra tsihin ndo.

<sup>23</sup> Tyin tandihi nyivi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo”, catyi ra Moisés.

<sup>24</sup> Tan tacan tucu tandihi ra cuví ndusu yuhu Nyoo nda quivi tsicoo ra Samuel tan nda cuanda vityin, jacoto ra naha tsa cuví vityin.

<sup>25</sup> Tandihi tsa catyí Nyoo tyin cuhva ra tsi yo, cahan ra cuví ndusu yuhu Nyoo tahañ tsanaha. Tandihi can tsii maa ndo cuví can. Tan tyiñu tsa ndoo Nyoo tsihin ra Abraham tsii tsaahnu yo, juvin ñi tsa cuenda maa ndo cuví yacan. Tyin catyi Nyoo tsihin ra Abraham: “Tandihi nyivi tsa iyó nu ñuhu ñayivi cua nasoco yu tsi ñi tsa cuenda nyivi tata un.”

<sup>26</sup> Tan yacan cuenda quivi janandoto Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo nacoo ndo tsa caquiñi iyó

ndo —catyí ra Pedro tsihin ñi.

## 4

*Nu tñn ra cuví ityi nuu vehe ñuhu cahnu naha ra tsi ra Pedro tan ra Juan*

<sup>1</sup> Ndi caahán ca ra Pedro tan ra Juan tsihin nyivi, tan tsaã ra cuví jutu naha ra tsihin ra cuví ityi nuu tsihin ra jahá cuenda vehe ñuhu, tan tsihin ra cuví saduceo naha ra.

<sup>2</sup> Nduxaan xaan ra naha tyin ra Pedro tan ra Juan jacuahá ra naha tsi nyivi tan catyí ra naha tyin nditsa tsa cua nandoto nyivi tsa tsa tsihi, tyin ra Jesús nandoto ra.

<sup>3</sup> Tacan tan tñn ra naha tsi nduvi taahan ra tava tyiñu ra Jesús can naha ra. Tan tyihí ra naha tsi ra naha vehe caa. Tan ndoo ra naha nda cuanda inga quivi tyin tsa cueñi cuví cuhva can.

<sup>4</sup> Maa tyin cuaha ñi tsa tsiñi tuhun caahán ra Pedro quitsaha tsinú ñi ñi. Tan ndu iin ñi tsihin nyivi yihí cuenda ra Jesús. Tan tsa tandihi ñi quitá maa uhun mil cuví tsa maa ñi maa rayi naha ra.

<sup>5</sup> Tsa tuvi inga quivi, nda ñuu Jerusalén ndu iin tandihi ra cumi tyiñu cuenda nyivi Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés.

<sup>6</sup> Tan nyii tucu ra Anás ra jutu tsaahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucú ndihi tucu tandihi rayi tsa cuví nyivi ra jutu tsaahnu cuví ityi nuu.

<sup>7</sup> Tacan tan tava tyiñu ra naha na cuquihin ra naha tsi ra Pedro tan ra Juan. Tan tsindaca ra naha tsi ra naha nda mahñu nu yucú ra naha. Tan tsica tuhun ra naha tsi ra naha, tan catyí ra naha:

—¿Yóo tsaha ndatu tsi ndo tsa janduvaha ndo tsi ra can? ¿Yóo tsaha tunyee ñi tsi ndo tsa javaha ndo tye-hen? —catyí ra naha tsihin ra Pedro tan ra Juan.

<sup>8</sup> Tan ra Pedro tsitú ra tsihin Tatyí li Nyoo. Tan nacahan ra tsihin ra naha: —Nyooho ra ndacá ñaha Israel ñuu yo ihya, tan nyooho ra tsahnu.

<sup>9</sup> Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñí ndo coto ndo nácaa nduvahá ra.

<sup>10</sup> Yacan cuenda cua catyi tuhun ndi tsihin ndo na coto tandihí nyívi Israel. Tyin ra ihya nyaá ra nuu tandihí ndo, tyin nduvahá ra tsihin tunyee iñi tsi ra Jesucristo, ra ñuu Nazaret, ra tsa tsahá cuenda ndo na cúu ra nu cruu. Maa tyin Nyoo janandotó ra tsi ra.

<sup>11</sup> Tan juvin ra Jesús cuví yuu tsa tsiñí ñuhu ca tsa ña cuñí ra javahá vehe cuatyíñu ra, tumaa cuhva catyi nuu tutu Nyoo. Tan nyooho cuví ra javahá vehe tan ña cuñí ndo yuu tsa tsiñí ñuhu ca can.

<sup>12</sup> Yoñi inga ra cuví jacacú tsi yo. Tyin intuhun ñi maa ra tsahá Nyoo tyin jacacu ra tsi yo —catyi ra Pedro tsihin ra can naha ra.

<sup>13</sup> Tan ra cumí tyiñu can naha ra iyo xaan cuñí ra naha tsiñí ra naha tsa caahán ra Pedro tan ra Juan tyin ñi xaan iñi ra naha caahán ra naha, tan ñavin ra cahví escuela cuví ra naha. Tacan tan nacotó ra naha tsi ra naha tyin ra ican naha ra cuví ra tsa tsicá tsihin ra Jesús quívi can.

<sup>14</sup> Tan ra tsa nduvahá can, nyaá nyityi ra tsihin ra naha. Yacan cuenda ña cuví cahan ra cumi tyiñu can naha ra tsa ndavaha ñi siqui ra Pedro tan ra Juan.

<sup>15</sup> Tacan tan catyi ra cumi tyiñu naha ra tsihin ra naha:

—Quita nduñi taahan nyooho tsata vehe.

Tan quita ra naha. Tan ndoo ra cumi tyiñu can naha ra natuhún tahan ra naha.

<sup>16</sup> Tan catyi ra naha:

—¿Náa javaha yo tsihin ra ihya naha ra? Tyin tandihí maa nyívi Jerusalén tsitó ñi tsa iyo tsa javahá ra naha. Tan ña cua cuví catyi yo tyin ña nditsa.

<sup>17</sup> Maa tyin ña cuñí yo tsa cuaha ca nyívi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan

ca ra naha tuhun ra Jesús tsihin nyívi —catyi ra cumi tyiñu naha ra.

<sup>18</sup> Tacan tan caná ra cumí tyiñu tsi ra Pedro tan ra Juan. Tan catyi ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyívi.

<sup>19</sup> Maa tyin ra Pedro tan ra Juan nacahan ra naha tan catyi ra naha:

—Tyíhi tuñi ndo iñi ndo tan nyehe ndo tatun vaha ca tsa tyaa yahví ndi tsi maa ndo o vaha ca tsa tyaa yahví ndi tsi Nyoo.

<sup>20</sup> Tyin nyuhu ña cuví tsa jandihí ndi tsa nacatyí tuhun ndi tsa nyehe ndi tan tsa tsiñi ndi —catyi ra naha.

<sup>21</sup> Tacan tan tyasi nyico ra cumi tyiñu naha ra tsi ra Pedro tan ra Juan. Tan jaña ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihí nyívi tan jacahnú ñi tsi Nyoo tsa cuenda tsa cuví can.

<sup>22</sup> Tyin rayi tsa nduvahá can, tsa yahá uvi xico cuiya ra, tan tacan cuiya tahan ra tundoho tan nduvahá ra jahá Nyoo.

### *Nu tsican nyívi yihí cuenda ra Cristo tunyee iñi Nyoo*

<sup>23</sup> Tan tsa quita ra Pedro tan ra Juan, cuahán ra naha nu yucú nyívi yihí cuenda ra Jesús. Tan nacatyí tuhun ra naha tandihí tsa cahan ra tsahnu naha ra tan ra jutú tsa cuví ityi nuu naha ra tsihin ra naha.

<sup>24</sup> Cuhva tsa tsiñi tandihí ñi, tan iin caa ñi quitsahá tsicán tahví ñi tsi Nyoo. Tan catyi ñi:

—Jutu Mañi yu, yooho javahá un andívi tan ñuhu ñayívi. Javahá un ndutya ñuhu. Tan tandihí ca tsa iyó, maa un javahá.

<sup>25</sup> Tan yooho tsihin Tatyí li un jacahan un tsi ra David tahan tsanaha. Tan catyi ra:

¿Nacuenda tsa nduxaán nyívi ña tsitó tsi Nyoo?

¿Nacuenda tsicá iñi ñi tuhun tsa nduve yahví nyaá?

26 Rey naha ra tan tsihin ra tsa ndacá ñaha nu ñuhu ñayivi ihya nduvita ra naha siqui un, Jutu Mañi yu, tan siqui ra Cristo, ra nyisó tyiñu maa un, catyi ra David.

27 Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsi vaha maa un.

28 Tan tacan javaha ra naha, tumaa cuhva tsa catyi maa un tahañ tsanaha tyin cua cuvi.

29 Tan vityin, Jutu Mañi yu, nyehe tyin cuñi ra naha casi ra naha tsi ndi. Tan cuhva tsa ñi coo iñi ndi tyin tyiñu maa un javahá ndi, Jutu Mañi yu. Tan na ña nayuhvi ndi cahan ndi tuhun maa un.

30 Tan tsihin tunyee iñi maa un tan cua nduvaha nyivi cuuhvi, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyi ñi, tsicán tahvi ñi tsi Nyoo.

31 Tan cuhva tsa ndihí tsican tahvi ñi tsi Nyoo tan tañ nu yucú ñi. Tan tandihí ñi tsitu ñi tsihin Tatyí Ii Nyoo tan cahan ñi tuhun Nyoo tsihin tsa ña yuhvi ñi.

### *Nduve tsa cumañi tsi nyivi yihí cuenda ra Cristo*

32 Tandihí ñi tsa tsinú iñi, iin ñi cuvi ñi, tan iin ñi cuhva tsicá iñi ñi. Ndi intuhun ñi tan ña catyi ñi tyin tsa tsii maa ñi cuvi tsa iyó tsi ñi, tyin tsii tandihí ñi cuvi can.

33 Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihí ra naha.

34 Tan ndi intuhun ñi tan nduve tsa cumañi tsi ñi tyin tandihí ñi tsa iyó vehe o ñuhu ñi, xicó ñi can. Tan cua ndaca ñi xuhun can.

35 tsi ra tava tyiñu ra Jesús. Tan maa ra naha natsatsá xuhun can tsi intuhun intuhun nyivi cuhva tsa tsiñi ñuhu tsi ñi.

36 Tacan javaha iin ra tsa nañi José. Ra ican cuvi ra tata ra Leví. Tan

cacu ra ñuhu Chipre tsa canyií mahñu ndutya ñuhu. Tan ra tava tyiñu ra Jesús jacunañi ra naha tsi ra Bernabé. Tan sivi can cuñi tsi catyi: ra jandu iin iñi nyivi.

37 Tan ra Bernabé can xico ra ñuhu ra. Tan tsaha ra xuhun can tsi ra tava tyiñu ra Jesús.

## 5

### *Cuatyí ra Ananías tsihin ña Safira*

1 Maa tyin iin ra tsa nañi Ananías tsihin ña Safira, ñasihi ra, xico ñi iin ñuhu.

2 Tan tyihí xeehe ñi juhva xuhun. Tacan tan ra Ananías tsindaca ra xuhun tsa ndoo ña tsi ra tava tyiñu ra Jesús. Tan catyi ra tyin tandihí xuhun tsa cuyahvi ñuhu cuvi can.

3 Tacan tan catyi ra Pedro tsihin ra: —Yooho Ananías, ¿nacuenda tsa tsaha un tsa quihvi nu ña vaha aña un? Tyin cuñi un jandavi ñaha un tsi Tatyí Ii Nyoo, tan catyi un tyin tandihí xuhun tsa cuyahvi ñuhu can cuvi tsehe, tan ña nditsa un tyin ndoo juhva xuhun can tsi un.

4 Tsii un cuvi ñuhu can, tan tsii un cuvi xuhun tsa ñihí un cuenda ñuhu can. ¿Nacuenda tsa cuñi un jandavi ñaha un tsi Nyoo tan catyi un tyin tandihí xuhun can tsaha un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyi ra Pedro tsihin ra Ananías.

5 Tsa tsiñi ra Ananías tuhun tsa cahan ra Pedro, nduva ra tan tsihi ra. Tan tsa tsito nyivi tuhun ihya tan nayuhvi xaan ñi.

6 Tacan tan tsaa ra cuatyí naha ra tan cava nuu ra naha jahma cuñu ñuhu ra Ananías. Tan tsahan ra naha tsindaca ra naha tsi ra nu ndaa cumi santu.

7 Yaha uñi hora tan tsaa ñasihi ra Ananías tan quihvi ña nu yucú ra tava tyiñu ra Jesús, tyin ña tsitó ña tsa cuvi.

8 Tan quitsaha tsicá tuhun ra Pedro tsi ña tan catyi ra tsihin ña:

—¿A tyehen ñi cuvi xuhun tsa cuyahvi ñuhu ndo? —catyi ra Pedro tsihin ña.



Tacan tan nacahan ña tan catyí ña tsihin ra:

—Tacan ñi cuví xuhun tsa cuyahví tsi —catyí ña tsihin ra.

<sup>9</sup> Tacan tan catyí ra Pedro tsihin ña:

—¿Nacuenda tsa natuhun tahan ndo tan cuñí ndo jandavi ñaha ndo tsi Tatyí Ii Jutu Mañi yo Nyoo? Ican vatsí ra tsa tsahan tsindaca tsi yí un nu ndaa cumi santu. Tan vityin cua cundaca ndihí ra naha tsi un —catyí ra Pedro tsihin ña Safira.

<sup>10</sup> Tan juvin ñi cuhva can tan nduva ña tsaha ra Pedro, tan cueta tsihi ña. Tan quihví ra cuatyí can naha ra, tan nyehe ra naha tyin canyí ña tsihi ña. Tan cañihí ra naha tsi ña, tan tsindaca ra naha tsi ña nu ndaa cumi sandu. Tan tinyí ra naha tsi ña xiin yí ña.

<sup>11</sup> Tan tandihí nyívi yihí cuenda ra Cristo, tan tandihí nyívi tsa tsito tuhun can, nayuhví xaan ñi.

*Cuaha xaan tsa iyo tan seña javaha ra tava tyiñu ra Jesús*

<sup>12</sup> Cuaha seña tan tsa iyo javaha ra tava tyiñu ra Jesús nu yucú nyívi. Tan tandihí ñi yihí cuenda ra Cristo ndu iín ñi nu cuví corredor cuenda ra Salomón.

<sup>13</sup> Tan nyívi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyívi can vaha caahán ñi síqui ñi yihí cuenda ra Cristo.

<sup>14</sup> Tan cuaha xaan nyívi quitsaha tsinú iñi tsi Jutu Mañi yo Jesús, tahan ñi rayí tan ñaha.

<sup>15</sup> Tan nda cuanda tava ñi tsi nyívi cuuhví ityi cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixahñu ra síqui ñi cua nduvaha ñi.

<sup>16</sup> Tacan tucu nyívi iyó yatyin ñi ñuu Jerusalén can, cuandacá ñi tsi nyívi cuuhví tan nyívi tsa yihí tatyí ña vaha. Tan nduvaha tandihí ñi.

*Nu nyehé ra Pedro tan ra Juan tundo*

<sup>17</sup> Tacan tan ra jutu tsaahnu tsa cuví ityi nuu, tan ra yihí cuenda ra cuví saduceo naha ra, ndasi cuñí

ra naha nyehé ra naha tsi ra tava tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsaha Nyoo tsi ra naha.

<sup>18</sup> Tacan tan tñin ra naha tsi ra naha. Tan tyihí ra naha tsi ra naha vehe caa.

<sup>19</sup> Maa tyin tsa cuaa can quitsí iin ángel tsa jaquitsí Jutu Mañi yo, tan nuña ra yuvehe caa can. Tan tava ra tsi ra naha. Tan catyí ra tsihin ra naha:

<sup>20</sup> —Cuaahan ndo tan cunyacu nyityi ndo vehe ñuhu cahnu. Tan nacatyí tuhun ndo tsihin nyívi nácaa coo ñi ñayívi nyito tsa iyó ndo —catyí ángel can tsihin ra naha.

<sup>21</sup> Tsa tsiñi ra naha tsa cahan ra ángel can, tan cuahán ra naha. Tan tsa tuvi inga quívi can nañihí nyívi tsi ra naha vehe ñuhu cahnu. Tan quitsaha jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iin ra jutu tsaahnu tsa cuví ityi nuu tan ra tsa yucú tsihin ra. Tan cana ra naha tsi ra cumi tyiñu cuenda nyívi Israel tyin coo ra naha junta. Tacan tan tava tyiñu ra naha na cuquihin ra naha tsi ra tava tyiñu ra Jesús nu yucú ra naha vehe caa can.

<sup>22</sup> Maa tyin cuhva tsa tsaá ra vitya naha ra tsitsi vehe caa can, ña nañihí ra naha tsi ra naha. Tan cuanuhú ra naha cua nacatyí tuhun ra naha tsihin ra jutu tsaahnu tsa cuví ityi nuu.

<sup>23</sup> Tan catyí ra naha tsihin ra:

—Ndasí yuvehe caa can tan tsaá ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuña ndi yuvehe can, yoñi maa nañihí ndi —catyí ra naha tsihin ra jutu tsaahnu tsa cuví ityi nuu.

<sup>24</sup> Tacan tan ra jutu tsaahnu tsa cuví ityi nuu can tsihin ra yihí ndaha tsi tandihí ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi ra naha tsa cahan ra vitya naha ra tsihin ra naha tan iyo xaan cuñí ra naha. Tan natuhun tahan ra naha nácaa javaha ra naha tan cundihí tuhun can.

<sup>25</sup> Tacan tan tsaá iin ra tan catyí ra:

—Ra tsa tyihí ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

<sup>26</sup> Tacan tan ra yihí ndaha tsi ra jahá cuenda vehe ñuhu can, tsahan ra tsihin ra vitya naha ra, tan tsiquihin ra naha tsi ra tava tyiñu ra Jesús tsihin tsa vii ñi tan ña cañi ra naha tsi ra naha, tyin yuuhví ra naha tsi nyivi coto cañi ñi yuu tsi ra naha.

<sup>27</sup> Tsindaca ra naha tsi ra tava tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tava tyiñu ra Jesús:

<sup>28</sup> —Nyuhu tsa cahan vaha xaan ndi tsihin ndo tyin ña cahan ca ndo tuhun ra Jesús. Maa tyin nyooho ña tyaa soho ndo tsa cahan ndi. Tan tsa ndihí maa tsitsi ñuu Jerusalén jacotó ndo tuhun ra. Tan cuñí ndo tyaa ndo cuatyí can siqui ndi tyin tsihi ra —catyí ra jutu tsaahnu tsa cuví ityi nuu tsihin ra naha.

<sup>29</sup> Tacan tan nacahan ra Pedro tan inga ra tava tyiñu ra Jesús, tan catyí ra naha:

—Taahán tsi tyaa yahvi jihna ndi tsi Nyoo tan ñavin ca tsi nyooho.

<sup>30</sup> Nyoo cuenda tsii tsaahnu yo juvin ra janandoto tsi ra Jesús, ra tsa ticaa ndo nu cruu tan tsahñi ndo.

<sup>31</sup> Tan ra Jesús cuví ra tsa jacahnu xaan Nyoo, tan tyaa ra tsi ra xiin cuaha ra, tyin cua cundaca ñaha ra tandihí maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnu iñi cuatyí yo.

<sup>32</sup> Tan nyuhu cuví ndi tsandaa tsa cuenda tandihí yacan. Tan tacan cuví tucu Tatyí Ii Nyoo tsa tsaha Nyoo cunyaa anima nyivi tyaa yahvi tsi ra —catyí ra Pedro tsihin ra naha.

<sup>33</sup> Tan tsa tsiñi ra naha tsa cahan ra Pedro, nduxaan xaan ra naha. Tan cuñi ra naha cahñi ra naha tsi ra naha.

<sup>34</sup> Maa tyin tsihin ra cumi tyiñu can naha ra nyii iin ra cuví fariseo tsa nañi Gamaliel. Tan cuví ra maestro cuenda ley Nyoo tsa tyaa ra Moisés.

Tan nyivi tyaa yahvi xaan ñi tsi ra. Tan ra Gamaliel can, nduvita nyityi ra. Tan caahán ra na quita ra tava tyiñu ra Jesús tañi ñi. Tacan tan quita ra naha.

<sup>35</sup> Tan quitsaha caahán ra Gamaliel can tsihin tandihí ca ra cumi tyiñu naha ra, tan catyí ra:

—Yoo, ra tsa ndacá ñaha tsi nyivi Israel, jaha yo cuenda tsi yo tsihin tsa cua javaha yo tsi ra ican naha ra.

<sup>36</sup> Ndūcuhun iñi ndo tyin tsa iyó juhva quivi nduvita iin ra tsa tsinañi Teudas. Tan catyí ra tyin cuví ra iin ra vaha. Tan quita maa tumaa cumi cientu rayi tsinyicun tsi ra. Maa tyin yaha can tsahñi nyivi tsi ra. Tan tandihí ra tsa tsinyicun tsi ra cuanuhu ra naha ñuu ra naha. Tan tsindihí tuhun can.

<sup>37</sup> Yaha can tan nu cuahán ca tsi ityi nuu, quivi nacahvi ra gobiernu tsi nyivi, tan nduvita ra Judas ra ityi Galilea. Tan cuaha xaan nyivi tsinyicun tucu tsi ra can. Maa tyin juvin ñi tsahñi nyivi tsi ra. Tan tandihí ñi tsa tsinyicun tsi ra cuanuhu ñi ñuu ñi.

<sup>38</sup> Yacan cuenda jaña yo tsi ra ihya naha ra. Tan ña cua tyihi yo tsi yo tsihin ra naha tyin tatun tuhun iin rayi ñi cuví tsa jacuahá ra naha, cua cundihí tuhun can.

<sup>39</sup> Maa tyin tatun nditsa tyin tuhun Nyoo cuví tsa jacuahá ra naha, ña cua cuví casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

<sup>40</sup> Tandihí ra naha ndoo ra naha vaha tsa ña cua cahñi ra naha tsi ra naha. Tacan tan cana ra naha tsi ra tava tyiñu ra Jesús. Tan catyí ra cumi tyiñu naha ra tsihin ra vitya naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jaña ra naha tsi ra naha.

<sup>41</sup> Tan quita ra naha nuu ra cumi tyiñu. Tan si xaan cuñi ra naha tyin tsaha Nyoo ndatu tyin nyehé ra naha tundoho tsa cuenda ra Jesús.

<sup>42</sup> Tan ña jandihí ra naha tsa caahán ra naha. Tan tandihí quivi jacuahá ra

naha tuhun ra Jesucristo vehe ñuhu tan vehe nyivi.

## 6

*Nu nacatsí nyivi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi*

<sup>1</sup> Tan nu cuahán ca tsi quivi cuaha xaan nyivi yihí cuenda ra Cristo cuvi. Tacan tan nyivi tsa caahán yuhu griego quitsaha caahán ñi siqui nyivi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihi quivi ña jahá vaha ra naha cuenda tsi ñi ndaahvi grecia tsa tsihi yí.

<sup>2</sup> Tacan tan tandihi tsa utsi uvi taahan ra tava tyiñu ra Jesús jandu iin ra naha tsi tandihi nyivi yihí cuenda ra Cristo. Tan catyí ra naha tsihin nyivican:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo.

<sup>3</sup> Yacan cuenda, nyooho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyí Ii Nyoo. Tan cuhva yo tyiñu ihya tsi ra naha.

<sup>4</sup> Tan nyuhu cua jañihi ndi ndacan tahvi ndi tsi Nyoo, tan cua jacuaha ca ndi tuhun Nyoo —catyí ra naha.

<sup>5</sup> Tandihí ñi tan ndoo ñi vaha. Tan nacatsí ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí Ii Nyoo. Tan nacatsí tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduví ra iin ra Israel.

<sup>6</sup> Tacan tan tsindaca ñi tsi ra naha nu nyecú ra tava tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

<sup>7</sup> Tan tsityá ca tuhun Nyoo. Tan nducuaha ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinu ndihí iñi ra naha tuhun ra Cristo.

*Nu tyihí ra naha tsi ra Esteban vehe caa*

<sup>8</sup> Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú aña ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi.

<sup>9</sup> Tacan tan juhva ra tsa tsicá vehe ñuhu ñuu Israel tsa nañi Vehe Ñuhu Cuenda Nyivi Ndoó Nuña cutahan ra naha tsihin juhva ra ñuu Cirene naha ra, tan cutahan ndihí juhva ra ñuu Alejandría naha ra, tan ra ityi Cilicia naha ra, tan ra ityi Asia naha ra. Tan quitsaha caahán yuhu tahan ra naha tsihin ra Esteban.

<sup>10</sup> Maa tyin ña cuví jaha canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsaha Tatyí Ii Nyoo tsi ra.

<sup>11</sup> Tacan tan tyahví ra can naha ra tsi juhva ra na cahan ra naha cuendu siqui ra Esteban tan catyí ra naha tyin ra Esteban caahán ra ndavaha ñi siqui ra Moisés, tan siqui Nyoo.

<sup>12</sup> Yacan cuenda tandihí nyivican quitsaha cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tñin ra naha tsi ra Esteban. Tan tsahan ra naha tsindaca ra naha tsi ra nu ndu iin ra cumí tyiñu cuenda vehe ñuhu nyivi Israel.

<sup>13</sup> Tan nducu ra naha tsi ra cahan cuendu siqui ra Esteban. Tan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaa ra Moisés.

<sup>14</sup> Tan tsiñi ndi tsa caahán ra tyin ra Jesús, ra Nazaret can, cua cani ra vehe ñuhu cahnu ihya. Tan cua nasama ra cuhva iyó yo tsa jacuaha ra Moisés tsi yo —catyí ra tsa caahán cuendu siqui ra Esteban.

<sup>15</sup> Tacan tan ra cumí tyiñu naha ra tan ra nyecú ican nyehe ra naha tsi ra Esteban tyin tumaa caá nuu iin ángel, tacan caá nuu ra.

## 7

*Nu caahán ra Esteban tuhun Nyoo tsihin nyivi nducú cahñi tsi ra*

<sup>1</sup> Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyí ra:

—¿A nditsa tsa caahán ra ihya naha ra siqui un?

<sup>2</sup> Tacan tan nacahan ra Esteban tan catyí ra:

—Nyooho yañi, tan nyooho ra tsaahnu, tyaa soho ndo tuhun tsa cua cahan yu. Jutu yo Nyoo, ra cahnu ca, quituvi ra nuu tsii tsaahnu yo, ra Abraham, quivi nyii ra ityi Mesopotamia tsa ndi cumañi ca cahun ra coo ra nda ñuu Harán.

<sup>3</sup> Tan catyi ra tsihin ra: “Nacoo ñuu un, tan tsi tandihi nyivi un. Tan cahun cun inga ñuu tsa cua janaha yu tsi un” catyi Nyoo tsihin ra Abraham.

<sup>4</sup> Tacan tan ra Abraham quita ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuví nu tsihi jutu ra. Yaha can jaquitsi Nyoo tsi ra ñuhu nu iyó yo ihya vityin.

<sup>5</sup> Maa tyin nduve ñuhu tsaha Nyoo tsi ra quivi can. Ndi luxu maa nu cuañi ra tan ña tsaha Nyoo. Maa tyin catyi ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan cahan Nyoo tsihin ra Abraham, vasu tsa ñaha ca coo sehe ra quivi can.

<sup>6</sup> Tan inga tucu tuhun cahan Nyoo tsihin ra tyin nyivi tata ra cua coo ñi inga ñuu. Tan cua cuví ñi musu nyivi ñuu can. Tan maa nyivi ñuu can cua quihí ndaha ñi tsi ñi. Tan cua nyehe ñi tundoho cumi cientu cuiya.

<sup>7</sup> Maa tyin cahan tucu Nyoo tsihin ra tyehen: “Nyivi tata un cua nyehe ñi tundoho jaha nyivi ñuu can. Yacan cuenda yuhu cua tatsi tuñi yu tsi nyivi ñuu can. Tan tsa cua yaha yacan tan cua quita nyivi cuví tata un ñuu can tan cua quitsi ñi ihya. Tan cua jacahnu ñi tsi yu” catyi Nyoo tsihin ra Abraham.

<sup>8</sup> Tacan natuhun Nyoo tsihin ra. Tan ndoo ra tuhun tsihin ra. Tan

Nyoo tsaha ra iin cuhva tsa cua javaha ñi coto naa ñi ñi tsa cahan ra. Tsaha cuenda ra tyin tandihi ñi sehe yí ñi tsa cua coo tan cuñi tsi cunyaa tuñi ra itsi naha tsi. Tan tsa yaha una quivi tsa cacu ra Isaac, sehe ra Abraham, tacan javaha ra tsi ra. Tan juvin ñi tacan javaha ndihi tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaa ra tuñi can tsi intuhun intuhun sehe yí ra. Tan ra ican naha ra cuví tsii tsaahnu yo.

<sup>9</sup> Tacan tsa utsi iin taahan ca sehe ra Jacob ndasi cuñi ra naha nyehe ra naha tsi ra José yañi ra naha, tsa cuenda tyin cuñi ca jutu ra naha tsi ra can. Yacan cuenda xico ra naha tsi ra José na cuví ra iin musu nda Egipto. Maa tyin ra José, ña nacoo Nyoo tsi ra.

<sup>10</sup> Tan jacacu ra tsi ra nu nyehé ra tundoho. Tan tsaha ra tsa nyityi jiñi ra tsi ra José. Tan tsaha ra tsa vaha coo ra nuu ra Faraón, ra cuví rey Egipto. Tan rey can tsaha ra tsa cuví ra José ra cumi tyiñu ñuu tsa cayucú Egipto can. Tan tsindaca ñaha ndihi tucu ra vehe maa rey.

<sup>11</sup> Tacan tan tsicoo tama nanii cahnu ityi Egipto tan ityi Canaán. Tan nyehe xaan nyivi tundoho. Tan tandihi tsii tsaahnu yo ña ñihí ra naha tsa catsi ra naha.

<sup>12</sup> Maa tyin quivi tsito ra Jacob tyin iyó tsa catsi ra naha nda Egipto, tan jacahun ra tsi sehe ra na cunducu ra naha tsa catsi ra naha. Tan tsahan ra naha iin tsaha.

<sup>13</sup> Tan tsa tsinu uvi tsaha tsa tsahan ra naha, ra José jacoto ra tsi ra naha tyin yañi ra naha cuví tsi ra. Tacan tan tsito ra Faraón yoo tata cuví ra José.

<sup>14</sup> Tacan tan tava tyiñu ra José na quitsi ra Jacob jutu ra, tsihin tandihi nyivi ra. Tan cuví ñi uñi xico tsahun taahan nyivi.

<sup>15</sup> Tan tacan cuví tsa cuahán ra Jacob cua coo ra ñuhu Egipto can. Yaha can tan tsihi ra ndacan. Tan tsihi ndihi tucu tandihi sehe ra, ra cuví tsii tsaahnu yo naha ra.



16 Tacan tan tsaá quiví tsa tsindaca ñi yiqui ra Jacob tan yiqui sehe ra nda Siquem. Tan ican quihvi yiqui tandihí ra naha tsitsi ñuhu nu jatá ra Abraham iin ñaña tsi sehe ra Hamor tahan tsanaha.

17 'Maa tyin tsa ndi cumañi ca quita nyiví Egipto, nyiví ra Abraham tsa iyó Egipto can cuaha xaan ñi cuvi. Tan tsa nyanaa yatyin quiví tsa cua cuhva Nyoo ñuhu tsi ñi tumaa tsa cahān catsi ra tsihin ra Abraham.

18 Tacan tan quitsahā ndacá ñaha iin rey tsa ña nacoto tsi ra José.

19 Rey can jandavi ñaha ra nyiví yo. Tan janyehe xaan ra tundoho tsi ñi, tan jañiñi ra tsi ñi na nacoo ñi tsi sehe ñi tsa ndi cacú tyin na cúu tsi.

20 Tan juvin ñi quiví can cacú ra Moisés. Tan tahan xaan iñi Nyoo tsi ra. Tan uñi yoo jacuahnu síhi ra tsi ra nda yuvehe ña.

21 Yaha can ña cuví ca tyihi xeehe síhi ra tsi ra. Tan nacoo ña tsi ra tsitsi iin tyica yuhu yutya. Tacan tan sehe síhi ra rey Egipto can nañihí ña tsi ra. Tan naquihin ña tsi ra. Tan jacuahnu ña tsi ra, tumaa tsa sehe maa ña cuví tsi ra.

22 Yacan cutuhva ra Moisés tandihí tsa tsitó ñi Egipto. Tan vaha xaan cahān ra tan vaha javahā ra jahā tun-yeé iñi tsa tsahā Nyoo tsi ra.

23 'Tan tsa quita uvi xico cuiya ra Moisés cuñi ra cahun ra cunyehe ra nu iyó nyiví Israel, nyiví ra.

24 Tacan tan iin quiví nyehe ra nu cañi iin ra Egipto can tsi iin ra Israel. Tacan tan tsahñi ra Moisés tsi ra Egipto can tyin cañi xaan ra tsi ra Israel, ra ñuu ra.

25 Cuñi maa ra Moisés can tyin nyiví Israel can cutuñi iñi ñi tyin Nyoo jaquitsi tsi ra tyin jacacu ra tsi ñi. Maa tyin ña tuví iñi ñi tsa tacan cua cuvi.

26 Tacan tan tsa inga quiví can nyehe ra Moisés tsi uvi taahan ra Israel, cañi tahan ra naha. Tan ra Moisés, cuñi ra tsa ña cañi tahan ca ra naha, tan quitsahā catyí ra: "Ña vaha tsa cañi un tsi ra yañi un" catyí ra tsihin ra naha.

27 Tacan tan ra tsa cañi tsi inga ra can tindahñi ra tsi ra Moisés, tan catyí ra tsihin ra: "¿Yóo tava tyiñu tsi un tyin cundaca ñaha un tan cuvi un juez tsa cuenda ndi?"

28 ¿A cuñi un cahñi un tsi yu tumaa tsa tsahñi un tsi ra Egipto icu?" catyí ra tsihin ra Moisés.

29 Cuhva tsa tsiñi ra Moisés tsa cahān ra can, tsinu ra. Tan cuahān ra nda ñuu Madián. Ndacan ñihí ra ñasihi ra. Tan ndacan tsicoo uvi taahan sehe ra.

30 'Yahā uvi xico cuiya. Tacan tan iin quiví tsicá nuu ra Moisés nu tsiqui yatyin yucu tsa nañi Sinaí. Tan nyehe ra cayú iin yutun iñu. Tacan tan quituví iin ángel tsitsi ñuhu tsa cayú can.

31 Iyo xaan cuñi ra Moisés tsa nyehé ra yacan. Tan natuhva ra nu cayú iñu can tyin nyehe vaha ra, tan tsiñi ra ndusu Jutu Mañi yo. Tan catyí ndusu can tyehen:

32 "Yuhu cuví Nyoo cuenda tsii tsaahnu un, Nyoo cuenda ra Abraham, tan ra Isaac, tan ra Jacob" catyí ndusu can tsihin ra. Tacan tan ra Moisés quitsahā nihí ra tsihin tsa yuhví ra. Tan ña canā iñi ra nanyehe ra.

33 Tan quitsahā catyí tucu Jutu Mañi yo tsihin ra: "Tava nditsan tsaha un tyin ñuhu nu tsañi un, ñuhu ii cuví tsi.

34 Yuhu nyehé yu tandihí tundoho tsa nyehé nyiví cuenda yu ñuhu Egipto can. Tan tsiñi yu ndusu ñi tsa tsacú tsa ñi. Yacan vatsí nuú yu tyin jacacu yu tsi ñi. Naha, tyin jacahun yu tsi un nda Egipto" catyí Nyoo tsihin ra Moisés.

35 'Quiví can ña cuñi nyiví Israel tsi ra Moisés tsa cundaca ñaha ra tsi ñi, tan catyí ñi tsihin ra: "¿Yóo tava tyiñu tsi un tyin cundaca ñaha un tan cuvi un juez tsa cuenda ndi?", catyí ñi tsihin ra. Vasu ña cuñi ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyí ángel tsa quituví nuu ra nu iñu tsa cayú can.

<sup>36</sup> Tan ra Moisés can tava tsi nyivi Israel ñuhu Egipto can tsihin tsa javaha ra tsa iyo tan seña ñuu can, tan nu yaha ñi nda nu Nduya Ñuhu Cuaaha, tan nu tsica nuu ñi nu tsiqui tsitsi tsa uvi xico cuiya.

<sup>37</sup> Tan juvin ñi maa ra Moisés can cuvi ra tsa cahan tsihin nyivi Israel tan catyi ra tyehen: “Nyoo cua jaquitsi ra tsi iin ra cuvi ndusu yuhu ra tumaa jaquitsi ra tsi maa yu. Tan cua cuvi ra iin ra Israel tumaa maa yo. Tan taahan tsi tyaa yahvi yo tsi ra” catyi ra Moisés.

<sup>38</sup> Tan maa ra Moisés can cuahan ra tsihin nyivi tsii tsaahnu yo nu tsica nuu ñi nu tsiqui can. Tan ra ican cuvi ra tsa cahan ángel tsihin nda yucu Sinaí. Tan ra ican naquihin cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

<sup>39</sup> Maa tyin nyivi tsii tsaahnu yo ña tyaa yahvi ñi tsi ra. Tava tsiyo ñi tsi ra. Tan cuñi ñi cunuhu ñi nda Egipto.

<sup>40</sup> Yacan cuenda cuhva tsa nyii ra Moisés yucu Sinaí, tan cahan nyivi tsihin ra Aarón tan catyi ñi: “Javaha taahan nyoo cuhun ityi nuu ndi. Tyin ña tsitó yo náa taahan ra Moisés, ra tsa tava tsi yo Egipto” catyi ñi.

<sup>41</sup> Tacan tan javaha ñi iin indiqui xuhun cuaan. Tan tsahñi ñi quití tyin cuhva cuenda ñi tsi tsitoho can. Tan sii xaan cuñi ñi tsicoo ñi vico cuenda tsitoho tsa javaha ñi tsihin ndaha ñi.

<sup>42</sup> Tacan tan Nyoo jatsiyo ra tsi ñi. Tan jaña ndaha ra tsi ñi tyin cua jacahnu ñi ñicanyii, tan yoo, tan tandihi tiñuu tsa iyó ityi andivi. Tyin tyehen tyaa ra cuvi ndusu yuhu Nyoo nu libru taahan tsanaha:

Nyooho nyivi Israel, ¿A tsahñi ndo quití tyin cuhva cuenda ndo tsi maa yu tsitsi tsa uvi xico cuiya tsa tsica nuu ndo nu tsiqui? Ñavin.

<sup>43</sup> Tyin jacahnu ndo tsi nyoo tsa nañi Moloc,

tan jacahnu ndihi tucu ndo tsi nyoo tsa nañi Renfán tsa caá tumaa caá iin tiñuu tsa iyó andivi.

Juvin ñi maa ndo javaha tsitoho can, tan jacahnu tucu ndo.

Yacan cuenda yuhu cua tava yu tsi ndo ñuu ndo, tan cua jacahun yu tsi ndo iin nu cañi ca ityi nuu ñuu Babilonia, catyi Nyoo tsihin ñi.

<sup>44</sup> Nu tsica nuu tsii tsaahnu yo nu tsiqui can, tsicumí ra naha iin vehe ñuhu tsa tsinu tsihin ñi quití. Tan tsitsi vehe can tsicumí ra naha tabla yuu tsa nyaá ley Nyoo nuu. Tan ra Moisés tava tyiñu ra na javaha ñi vehe ñuhu can ityi tsata, tumaa cuhva janaha maa Nyoo tsi ra.

<sup>45</sup> Yaha can tan ra Josué cuvi ra ityi nuu tsihin ñi. Tacan tan quihin ñi vehe ñuhu can tan vatsí ñi tsihin tsi nu iyó yo ihya vityin. Tyin Nyoo tava ra tsi nyivi tsicoo ñuhu ihya tan nacuhva cuenda ra ñuhu ihya tsi ñi Israel, nyivi yo. Tan tsatyíñu ñi vehe ñuhu can nda cuanda quivi tsicoo ra rey David.

<sup>46</sup> Tan ra rey David ñihí ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvin ñi Nyoo jacahnu ra Jacob taahan tsanaha.

<sup>47</sup> Maa tyin ra Salomón javaha ra vehe Nyoo.

<sup>48</sup> Vasu ña iyó Nyoo tsitsi vehe ñuhu tsa javaha nyivi. Tumaa cahan ra cuvi ndusu yuhu Nyoo taahan tsanaha tyehen:

<sup>49</sup> Andivi cuvi tyayu nu nyaá yu ndacá ñaha yu.

Tan ñuhu ñayivi, yacan cuvi nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

<sup>50</sup> ¿A ña tsitó ndo tyin maa yu javaha andivi tan ñuhu ñayivi? catyi ra cuvi ndusu yuhu Nyoo jahá Nyoo.

<sup>51</sup> Maa tyin nyooho —catyi ra Esteban— tacan ñi tuhva maa ndo jandava ndo iñi ndo. Tan ña cuñi ndo naquihin ndo tuhun caahan Nyoo. Tacan ñi ña tyaa yahvi ndo tsi Tatyí

Ii Nyoo. Inducu ñi caá ndo tsihin tsii tsaahnu yo.

<sup>52</sup> Tsii tsaahnu yo cuxaan ra naha tan tsahñi ra naha tsi tandihí ra cuvi ndusu yuhu Nyoo tahan tsanaha. Tan ra ican naha ra catyi tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsahñi ndo tsi ra.

<sup>53</sup> Nyooho naquihin cuenda ndo ley Nyoo tsa tsaha ángel tsi ndo, maa tyin ña cuñi ndo tyaa yahvi ndo tsa caahan ley can —catyi ra Esteban.

### *Nu tsihi ra Esteban*

<sup>54</sup> Tsa tsiñi ra cumi tyiñu vehe ñuhu cahnu naha ra tuhun ihya, xaan xaan cuñi ra naha, ndacua jacahyu nuhu ra naha nyehé ra naha tsi ra Esteban.

<sup>55</sup> Maa tyin ra Esteban tsitú ra tsihin Tatyí Ii Nyoo tan nanyehé ra ityi andivi. Tan nyehé ra tsa cahnu cuvi Nyoo. Tan nyehé tucu ra tsi ra Jesús nyaá nyityi ra xiin cuaha Nyoo.

<sup>56</sup> Tacan tan catyi ra Esteban:

—jijhna ndo! Nyehé yu andivi tan tichó tsi. Tan nyehé yu tsi ra Jesús, Rayi tsa quee nda gloria, nyaá nyityi ra xiin cuaha Nyoo —catyi ra Esteban.

<sup>57</sup> Maa tyin ra can naha ra tyasi ra naha soho ra naha, tsa ña cua tyaa soho ra naha tsa caahan ra Esteban. Tacan tan iin vaa ñi cana tsa ra naha. Tan tandihí ra naha cuahan ra naha siqui ra Esteban.

<sup>58</sup> Tacan tan tava ra naha tsi ra yuhu ñuu. Tan tsahñi ranaha tsi ra tsihin yuu. Tan ra tsa javahá tsa ña vaha can naha ra, nacoq ra naha jahma tsa nyaá tsata ra naha tyin jaha cuenda iin ra tyuvaa tsa nañi Saulo.

<sup>59</sup> Tan tsitsi tsa cañi ra naha yuu tsi ra Esteban, quitsaha tsican tahvi ra Esteban tsi Nyoo, tyin tuvi iñi ra tyin tsa cua cúu ra. Tan catyi ra tyehen:

—Jutu Mañi yu Jesús, naquihin aña yu —catyi ra.

<sup>60</sup> Yahá can, tan tsicuiñi tsiti ra, tan tsa cana tsa ra tan catyi ra:

—Jutu Mañi yu, ña tñin cuenda un cuatyí tsa javahá ra naha —catyi ra.

Tsa yahá cahán ra tacan, tan tsihi ra.

## 8

### *Nu tsinyaa ndaha ra Saulo tsi nyivi yihí cuenda ra Cristo*

<sup>1</sup> Tan ra Saulo ña tsinú iñi ra tsi ra Jesús, tan ndoo ra vaha tsa tsahñi ra naha tsi ra Esteban.

Tan juvin ñi quivi can quitsaha nducú xaan nyivi tsi ñi yihí cuenda ra Cristo ñuu Jerusalén tyin cahñi ñi tsi ñi. Tan tandihí ñi yihí cuenda ra Cristo tsinu ñi, cuahan ñi cua coo ñi tandihí ñuu tsa cayucú Samaria, tan tandihí ñuu tsa cayucú Judea. Maa tyin ra tava tyiñu ra Jesús ña quita ra naha. Ndoq ra naha Jerusalén.

<sup>2</sup> Tan juhva ra tsa nyicún vaha tsi Nyoo ñuu Jerusalén can, tsahan ra naha tsicutsi ra naha cuñu ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsihi ra.

<sup>3</sup> Tan ra Saulo can quitsaha nyaá ndaha ra tsi nyivi yihí cuenda ra Cristo. Tan tsahan ra tan iin tan iin vehe ñi. Tan ixta caa ra tsi ñi, tan tsaha cuenda ra tsi ñi tyin cuhun ñi vehe caa, tahan ñi rayi tan ñaha.

### *Nu caahan ra Felipe tuhun ra Cristo nu cuvi Samaria*

<sup>4</sup> Tan tandihí ñi tsa quita ñuu Jerusalén can, caahan ñi tuhun Nyoo nácaa jacacú ra Cristo tsi yo, tandihí ñi ityi nu cuahan ñi.

<sup>5</sup> Iin ra tsa nañi Felipe tsaq ra iin ñuu canyí Samaria. Tan quitsaha caahan ra tuhun ra Cristo tsihin nyivi iyó ican.

<sup>6</sup> Tan tandihí ñi ñi cuñi ñi tan tyaá soho ñi tsa caahan ra. Tyin nyehé ñi tsa iyo tsa javahá ra.

<sup>7</sup> Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quita nahnu tan cana tsa nahnu cuahan nahnu. Tan cuaha xaan nyivi coxo tan nyivi tsa ña cuvi canda tan ña cuvi caca, nduvahá ñi.

<sup>8</sup> Yacan cuenda nyivi ñuu can, sii xaan cuñi ñi.

9 Tan Samaria can iyó iin ra tasi nañí Simón. Tuhvá ra jandaví ñaha tsi nyivi. Catyí ra tyin cahnu xaan cuví ra.

10 Tandihí maa nyivi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Ndítsa ndítsa, tyin tunyee iñi Nyoo iyó tsihin ra ihya —catyí ñi.

11 Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi.

12 Tacan tan quítsi ra Felipe. Tan jacoto ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quítsaha tsinú iñi ñi tsi ra Cristo, rayi tan ñaha. Tan tsicoondutyá ñi.

13 Nda cuanda ra Simón can, tan natsinu iñi ra tsi ra Cristo, tan tsicoondutyá ra. Tan quítsaha tsicá nuu ra tsihin ra Felipe. Tan iyo xaan cuñí ra nyehé ra tsa iyo tan seña tsa javahá ra Felipe.

14 Tacan tan ra tava tyiñu ra Jesús tsa iyó ñuu Jerusalén can ñihí tuhun ra naha tyin tsinú iñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria.

15 Tan tsa tsaá ra naha, quítsaha tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí Ii Nyoo.

16 Tyin ñi can, ñaha ca nuu Tatyí Ii Nyoo síqui ñi. Maa tsa tsicoondutyá ñi ñi tsihin sívi Jutu Mañi yo Jesús.

17 Tacan tan ra Pedro tan ra Juan tyiso ndaha ra naha jiñi ñi, tan naquihin ñi Tatyí Ii Nyoo.

18 Tan ra Simón can nyehé ra nu tyisó ndaha ra tava tyiñu ra Jesús jiñi ñi, tan naquihin ñi Tatyí Ii Nyoo.

19 Tan quítsaha caahán ra Simón tan catyí ra:

—¿Najava xuhun cuñí ndo tan cuhva ndo tunyee iñi tsi yu, cuvi tyiso ndaha yu jiñi nyivi, tan naquihin ñi Tatyí Ii Nyoo? —catyí ra Simón tsihin ra naha.

20 Tacan tan nacahan ra Pedro tan catyí ra:

—Jaha cuenda coto cunaa un tsihin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví.

21 Yooho, ña taahán tsi tyihi un tsi un tsihin tyiñu ihya. Tyin añima un ña vaha nuu Nyoo.

22 Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un.

23 Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahá coto un tsa vaha —catyí ra Pedro tsihin ra Simón.

24 Tacan tan nacahan ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quítsi tandihí tsa caahán un tsihin yu síqui yu —catyí ra Simón tsihin ra Pedro.

25 Tsa yaha can tan ra tava tyiñu ra Jesús tsahá cuenda ra naha tandihí tsa nyehe ra naha tsa javaha ra Cristo nu tsicá ra nu ñuhu ñayivi. Tan cahan ra naha tuhun Nyoo. Tacan tan cuanuhu ra naha nda ñuu Jerusalén. Tan tandihí ñuu tsa cayucú Samaria nu yaha ra naha jacoto ra naha nácaa javahá yo tan cacu yo.

### *Nu caahán ra Felipe tuhun Nyoo tsihin iin ra ñuu Etiopía*

26 Tsa yaha yacan tan cahan iin ángel Nyoo tsihin ra Felipe, tan catyí ra:

—Nduvita tan cuhun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yaha nu tsiquí.

27 Tacan tan ra Felipe nduvita ra tan cuahán ra. Tan ityi cuahán ra ñihí tahan ra tsihin iin ra ñuu Etiopía. Tan cuví ra can eunuco [tyin ña cuví coo ñasihi ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén.



28 Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaá ra Isaías, ra cuví ndusu yuhu Nyoo taħan tsanaha.

29 Tacan tan Tatyí Ii Nyoo caħan tsihin ra Felipe:

—Natumva nu carreta can.

30 Tan cuhva tsa natuhva ra Felipe nu carreta can, tsiñi ra tyin cahví ra Etiopía can nu libru tsa tyaá ra Isaías. Tan tsica tuhun ra Felipe tsi ra tan catyí ra:

—¿A cutuñi iñi un tsa caahán tsi? —catyí ra.

31 Tacan tan nacahan ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu? —catyí ra tsihin ra Felipe.

Tan tsican ra tsi ra Felipe na ndaa ra tan cunyaa ra tsihin ra.

32 Tan nu cuahán cahví ra, catyí tsi tyehen:

Tsahñi ra naha tsi ra tumaa tuhvá ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehe ra tundoho tan nduve náa caħan ra.

33 Janduluhlu ra tsi ra nuu ra naha tan yoñi cuñi javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoo sehe ra tan tsihi ra.

Tacan catyí tsi nu tutu tsa cahví ra can.

34 Tacan tan ra Etiopía quitsaha tsicá tuhun ra tsi ra Felipe, tan catyí ra:

—Jaha tumañi iñi tsi yu, tan catyí tuhun un luxu tsihin yu, ¿yóo tuhun caahán ra ndusu yuhu Nyoo ihya? ¿A tuhun maa ra, o yóo tuhun caahán ra? —catyí ra tsihin ra Felipe.

35 Tacan tan ra Felipe quitsaha caahán ra siqui tuhun tsa tsa yaha cahvi ra can, tan tsaha cuenda ra tsi ra tyin tuhun ra Jesús caahán ra ndusu yuhu Nyoo can. Tan tsaha

cuenda ra tyin ra Jesús cuví ra jacacú tsi yo.

36 Tacan tan tsa cua yaha ra naha nu yihí ndutya. Tan ra Etiopía can quitsaha caahán ra tsihin ra Felipe tan catyí ra:

—Ihya yihí ndutya. ¿A ña cuvi coondu tyu ihya? —catyí ra.

37 Tacan tan nacahan ra Felipe tsihin ra Etiopía, tan catyí ra:

—Tatun tsinú iñi un tsihin tsa ñi aña un, cuví coondu tyu un —catyí ra tsihin ra.

Tacan tan nacahan ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

38 Tacan tan ra can caahán ra tsihin musu ra na jacuiñi ra carreta can. Tan nduvi taahan ra naha nuu ra naha. Tan quihvi ra naha tsitsi ndutya. Tacan tan jacoondutya ra Felipe tsi ra Etiopía.

39 Tan cuhva tsa quita ra naha tsitsi ndutya can, tan Tatyí Ii Jutu Mañi yo naquihin ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin si xaan cuñi ra, cuanuhú ra.

40 Tan ra Felipe tsaá ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tsihin nyivi nda cuanda tsa tsaá ra ñuu Cesarea.

## 9

### *Nu natsinu iñi ra Saulo tsi ra Cristo (Hechos 22.6-16; 26.12-18)*

1 Tan tsicá ra Felipe caahán ra tuhun ra Cristo tsihin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tsahan ra nu nyaá ra jutu tsahnu cuví ityi nuu,

2 tsindacan ra iin tutu tsi ra jutu, tyin nacuhva ra ndatu tsa cuhun ra vehe ñuhu ñuu Damasco, tan tin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayi tan ñaha. Nihí ra Saulo tutu can tan cuahán ra.

3 Tan tsa cua tsaá ra ñuu Damasco, sana iñi ra, tan quitsi ñuhu ityi andivi,

jandunditsin tsi tanii cahnu maa nu cuahán ra.

<sup>4</sup> Tacan tan ra Saulo nduva ra nu ñuhu. Tan tsiñi ra iin ndusu tsa catyí tyehen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tsihin ra.

<sup>5</sup> Tacan tan nacahan ra Saulo:

—¿Yóo cuví yooho, taa? —catyí ra, tsicá tuhun ra.

Tacan tan nacahan ndusu can tsihin ra, tan catyí tsi:

—Yuhu cuví ra Jesús, ra tsa nyaá ndaha un. Juvín ñi tsi maa un jañicueehé un, tumaa jañicueehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tsihin ra.

<sup>6</sup> Tacan tan quitsaha ñihí ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñi un tyin javaha yu? —catyí ra.

Tacan tan Jutu Mañi yo nacahan ra tsihin ra tan catyí ra:

—Nduvita tan cuhun un tsitsi ñuu Damasco. Tan ican cua cahan iin ra tsa cua cahan tsihin un náa taahán tsi javaha un —catyí ra Jesús tsihin ra Saulo.

<sup>7</sup> Tan ra tsa cuahán tsihin ra Saulo, nayuhvi xaan ra naha. Tan ña ñihí ra naha náa tuhun cahan ra naha tyin tsiñi ra naha ndusu can maa tyin yoñi nyehe ra naha.

<sup>8</sup> Tacan tan ra Saulo nduvita ra. Tan tsa nuña ra tinuu ra, ña cuví maa nanyehé ra tyin cuaa ra jaha Nyoo. Yacan cuenda, ra tsa cuahán tsihin ra tñin ra naha ndaha ra tan tsindaca ra naha tsi ra ñuu Damasco.

<sup>9</sup> Ican tsinyij ra uñi quivi. Tan ña cuví maa nanyehé ra. Tan ña tsatsi ra, tan nduve maa náa tsihi ra.

<sup>10</sup> Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cahan Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahan ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

<sup>11</sup> Tacan tan Jutu Mañi yo catyí ra:

—Nduvita, tan cuhun cun ityi cahnu tsa nañi Ndoó ñi. Tan nanducu un vehe ra tsa nañi Judas. Tan ndaca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu.

<sup>12</sup> Tan nyehe ra iin tsa nyehe ra, tan nyehe ra tsi yooho, Ananías, tyin tsaá un nu nyaá ra, tan tyiso ndaha un jiñi ra tyin tacan tan nanyehé ra inga tsaha —catyí Jutu Mañi yo tsihin ra Ananías.

<sup>13</sup> Tacan tan nacahan ra Ananías tan catyí ra:

—Jutu Mañi yu, cuaha xaan nyivi caahán ñi tsihin yu tyin nyivi yihí cuenda un ñuu Jerusalén cuaha xaan tsa ña vaha javaha ra Saulo can tsihin ñi.

<sup>14</sup> Tan vityin vatsi ra ihya tyin tsaha ra jutu tsaahnu tsa cuví ityi nuu ndatu tsi ra tsa tyihi ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

<sup>15</sup> Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsi vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juvin ñi cahan ndihí ra tuhun yu tsihin nyivi Israel.

<sup>16</sup> Yuhu cua jacuaha yu tsi ra nácaa tsa cuaha tundocho cua nyehe ra tsa cuenda yu —catyí Jutu Mañi yo tsihin ra Ananías.

<sup>17</sup> Tacan tan cuahán ra Ananías vehe nu nyii ra Saulo. Tsaá ra yuvehe can tan quihvi ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituvi nuu un ityi vatsi un, ra ican jaquitsi tsi yu tyin nanyehé un inga tsaha. Tan cua jacutu ra tsi un tsihin Tatyí Ii ra —catyí ra Ananías tsihin ra Saulo.

<sup>18</sup> Tan juvin ñi cuhva can tan coyo tsa caá tumaa caa yaa tyaca tsa tyasi tinuu ra Saulo. Tacan tan cuví nanyehé ra. Yaha can tan tsicon-dutyá ra.

19 Yaha can tan nacatsj ra, tan ndunyeē cuñu ñuhu ra inga tsaha. Tan ndoo ra juhva quivi tsihin nyivi tsa yihí cuenda ra Cristo ñuu Damasco.

*Nu quitsaha caahán ra Saulo tuhun ra Cristo tsihin nyivi ñuu Damasco*

20 Tacan tan numi ñi quitsaha caahán ra Saulo tuhun ra Cristo tsihin nyivi tandihi vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuví tsi ra.

21 Tandihí maa nyivi tsa tsiñí tsa caahán ra, iyo xaan cuñí ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaa ndaha tsi nyivi tsicán tahvi sivi ra Jesús ityi ñuu Jerusalén? ¿A ñavin juvin ra cuví ra tsa vatsí tñin tsi nyivi iyó ihya tyin kuhva cuenda ra tsi ñi tsi ra jutu tsa cuví ityi nuu naha ra? —catyí ñi.

22 Maa tyin ra Saulo ñihi ca caahán ra tuhun ra Cristo tsihin tsa ñi ñi ra. Tan janahá ra tsi nyivi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

*Nu tsinu xeehe ra Saulo nuu ra Israel naha ra*

23 Tsa yaha juhva quivi, tan ra Israel tsa ña tsinú ñi tsi ra Cristo natuhún tahan ra naha tyin cua cahñi ra naha tsi ra Saulo.

24 Ñiñu tan nduyi ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can.

25 Tacan tan nyivi tsa tsinú ñi tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januu ñi tsi ra ityi ventana iin vehe tsa nyaá yuhu cora ñuu can. Tacan tan tsinu ra cuahán ra.

*Nu nyii ra Saulo ñuu Jerusalén*

26 Quivi tsa tsaá ra Saulo ñuu Jerusalén, cuñí ra ndu iin ra tsihin nyivi tsa yihí cuenda ra Cristo. Maa tyin tandihí maa ñi tan yuuhví ñi nyehé ñi tsi ra. Tyin ña tsinú ñi ñi tsa yihí ra cuenda ra Jesús.

27 Maa tyin iin ra tsa nañí Bernabé, quihín ra tsi ra. Tan tsaha cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha nácaa nyehe ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa cahán Jutu Mañi yo tsihin ra. Tan nácaa cahán ra tuhun ra Cristo tsihin tsa ña yuuhví ra nda ñuu Damasco.

28 Tacan tan ndoo ra Saulo ñuu Jerusalén tsihin nyivi tsa yihí cuenda ra Cristo.

29 Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra.

30 Maa tyin tsito ra hermano can naha ra tyin tacan tsicá ñi ra can naha ra. Yacan cuenda tsindaca ra hermano naha ra tsi ra Saulo nda ñuu Cesarea. Tacan tan jacuhún ra naha tsi ra nda Tarso, ñuu ra.

31 Tacan tan nyivi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, si xaan cuñí ñi tyin ña cuxaán ca nyivi tsi ñi. Tan ndunyeē ca ñi ñi tsihin tunyee ñi tsi Nyoo tyin tyaá yahvi vaha ñi kuhva cahán ra, tyin yuuhví ñi coto ña cua javaha ñi kuhva cuñí ra. Iyó ñi tsihin tsa jatyinyeé Tatyí Ii Nyoo tsi ñi. Tan nducuahá ca ñi tan iin tan iin quivi.

*Nu nduvaha ra Eneas*

32 Tacan cuví tan ra Pedro tuhvá ra cuahán cua nyehe nácaa yucú ra hermano naha ra tan iin tan iin ñuu. Tan tsahan tucu ra tsinyehe ra nu iyó nyivi yihí cuenda ra Jesucristo ñuu Lida.

33 Ican nañihí ra tsi iin ra cuuhví, nañi ra Eneas. Tan tsa una cuiya canyí ra tan ña cuví maa nacandá ra tyin naxij cuñu ñuhu ra.

34 Tan ra Pedro catyí ra tsihin ra:

—Yoohe Eneas, ra Jesucristo janduvaha ra tsi un. Nduvita tan natuvi yuvi un —catyí ra tsihin ra.

Tan juvin ñi kuhva can tan nduvita ra Eneas.

<sup>35</sup> Tan nyehe tandihí nyívi ñuu Lida can tyin tsa nduvahá ra. Tan nyehe tucu nyívi ñuu Sarón. Tacan tan ñi can, natsinu iñi ñi tsi Jutu Mañi yo. Tan nacoó ñi tuhun tsahnu tsa tsinu iñi ñi nda ndi cumañi ca coto ñi tuhun ra Cristo.

### *Nu nandoto ña Dorcas*

<sup>36</sup> Quívi can tsicoó iin ñaha tsinu iñi tsi ra Cristo ñuu Jope. Tan nañi ña Tabita, tan tsihin yuhu griego, nañi ña Dorcas. Tan tuhvá ña javahá tsa vaha tsihin nyívi, jatyinyeé ña tsi nyívi ndaahvi.

<sup>37</sup> Tan quívi can ña Dorcas quihín cuehe tsi ña tan tsihí ña. Tan tsa yaha jacutyí ñi tsi ña, tsicaquín ñi tsi ña tsitsi cuarto nu tsinu uvi pisu.

<sup>38</sup> Yatyin ñi canyíi ñuu Jope tsihin ñuu Lida, nu nyíi ra Pedro. Tan nyívi tsa yihí cuenda ra Cristo ñuu Jope can tsito ñi tyin nyíi ra Pedro ñuu Lida. Tacan tan jacuhun ñi tsi uvi taahan ra na cucana ra naha tsi ra Pedro tyin na cahun ra ñuu Jope tsa numi ñi. Tan tsaá ra naha nu nyíi ra tan catyí ra naha tsihin ra:

—Janumi ñi tan cahun un tsihin ndi nda ñuu Jope —catyí ra naha tsihin ra.

<sup>39</sup> Tacan tan ra Pedro nduvita ra tan cuahán ra tsihin ra naha. Tan cuhva tsa tsaá ra naha, tsindaca ra naha tsi ra nda cuarto nu canyíi ndiyi can. Tan tandihí maa ñiñaha tsa tsihí yí natuhvá ñi tsata ra, tan tsacú tsaá ñi. Tan janahá ñi jahma tsa quicu ña Dorcas tsa tsicoó ña.

<sup>40</sup> Tacan tan ra Pedro tava ra tsi tandihí nyívi cuarto can. Tan tsicuiñi tsiti ra tan quitsaha tsicán tahvi ra tsi Nyoo. Tacan tan nanyehe ra tsi ñaha tsa tsihí can canyíi ña. Tan quitsaha catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehe ña. Tan tsa nyehe ña tsi ra Pedro, tsinyaa ña.

<sup>41</sup> Tacan tan ra Pedro tñn ra ndaha ña tan janduvita ra tsi ña. Tacan tan cana ra tsi ra hermano naha ra, tan tsihin ñiñaha tsa tsihí yí. Tan

nacuhva cuenda ra tsi ña tsi ñi tyin tsa nandoto ña.

<sup>42</sup> Yaha can tan tandihí maa nyívi ñuu Jope tsito ñi tyin nandoto ña can. Tan cuaha xaan ñi natsinu iñi tsi Jutu Mañi yo.

<sup>43</sup> Tan ra Pedro ndoo ra juhva quívi ñuu can, nyíi ra yuvehe iin ra tsa janduvita ñi quiti, nañi ra Simón.

## 10

### *Ra Pedro tsihin ra Cornelio*

<sup>1</sup> Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andarú. Tan tsa tandihí andarú tsa yihí ndaha ra can nañi tsi Italiano.

<sup>2</sup> Tan ra Cornelio can yuuhví ra tsi Nyoo. Maa ra tan tsihin tandihí nyívi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyívi ndaahvi ñuu Israel, tan tandihí quívi tsicán tahvi ra tsi Nyoo.

<sup>3</sup> Tan iin quívi cuhva caa uñi tsa tseñi, nyehe ra iin tsa nyehe ra. Tan ican cuví nu catsi xaan nyehe ra iin ángel tsa jacuhun Nyoo nu nyíi ra, tan catyí tsi tsihin ra:

—¡Yooho Cornelio! —catyí ángel can tsihin ra.

<sup>4</sup> Tacan tan nanyehe ra Cornelio tsi ángel can. Tan nayuhví xaan ra. Tan quitsaha tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsaha caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán iñi ra tyin jatyinyeé xaan un tsi nyívi ndaahvi.

<sup>5</sup> Tan vityin cuñi tsi tsa tava tyiñu un na cuquihin tyiñu tsi iin ra tsa nañi Simón Pedro nda ñuu Jope.

<sup>6</sup> Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvita ñi quiti. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.



<sup>7</sup> Tsa yaha cuahán ángel can, ra Cornelio cana ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo.

<sup>8</sup> Tandihí maa tsa cahan ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

<sup>9</sup> Tuví inga quivi tan cuahán ra can naha ra. Tan tsa ndi cumañi ca tsa ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can.

<sup>10</sup> Tan tsaá soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsaha nyehé ra iin tsa janahá Nyoo tsi ra.

<sup>11</sup> Tan nyehe ra tyin ticohó andivi. Tan nyehe ra andivi tyin vatsí nuú iin jahma cahnu xaan ityi nu ñuhu. Tan tandihí tsa cumí tutun tsi nuuhñi nuuhñi ñi.

<sup>12</sup> Tan tsitsi jahma can yihí tandihí maa nuu quití tsa cumi taahan tsaha, tan tandihí nuu coo, tan saa.

<sup>13</sup> Tacan tan tsiñi ra iin ndusu tsa caahan tsihin ra:

—Pedro, nduvita tan cahñi quití ihya, tan catsi un —catyí ndusu can tsihin ra.

<sup>14</sup> Maa tyin ra Pedro nacahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quití tsa catyí ley tyin ña vaha catsi ndi —catyí ra Pedro.

<sup>15</sup> Tacan tan quitsaha caahan nyico ndusu can tsihin ra inga tsaha:

—Ña catyí un tyin ña catsi un tsa tsa janduvaha yu —catyí ndusu can tsihin ra.

<sup>16</sup> Uñi taahan tsaha nyehe ra yacan jahá Nyoo. Tacan tan jahma cahnu can nandaá nyico can ityi andivi.

<sup>17</sup> Tan tsitsi tsa tsicá iñi ra Pedro náa cuñí tsi catyí tsa nyehe ra can, tsaá musu tsa jacuhun ra Cornelio naha ra. Tan tsica tuhun ra naha numaa tahan iyó vehe ra nañi Simón.

<sup>18</sup> Tan tsa tsaá ra naha ityi yuvehe tsica tuhun ra naha tatun ican iyó iin ra tsa nañi Simón Pedro.

<sup>19</sup> Tan ra Pedro tsicá xaan iñi ra náa cuñí tsi catyí tsa nyehe ra. Tacan tan Tatyí Ii Nyoo quitsaha caahan tsihin ra, tan catyí tsi:

—Nyehe Pedro, uñi taahan ra vatsí nanducú tsi un.

<sup>20</sup> Nduvita tan cuhun cun tsihin ra naha, tan ña cacá iñi un tyin maa yu jaquitsi tsi ra ihya naha ra —catyí Tatyí Ii Nyoo tsihin ra Pedro.

<sup>21</sup> Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

<sup>22</sup> Tacan tan nacahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsi tsi ndi. Vaha xaan nyivi cuví ra. Tan tyaá yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñí ra naha tsi ra tsa cuenda tsa vaha nyivi cuví ra. Tan iin ángel Nyoo cahan tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra tuhun tsa cua cahan un tsihin ra —catyí musu ra Cornelio tsihin ra Pedro.

<sup>23</sup> Tacan tan tsaha ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quivi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

<sup>24</sup> Tsa inga quivi tsaá ra naha nda ñuu Cesarea nu ndatú ra Cornelio tsi ra naha tsihin tandihí nyivi ra, tan tsihin tandihí ra vaha iñi tsi ra.

<sup>25</sup> Cuhva tsa tsaá ra Pedro yuvehe ra Cornelio, quita ra Cornelio tan caahan ra tsihin ra. Tan tsicuiñi tsiti ra nuu ra Pedro tan quitsaha jacahnú ra tsi ra.

<sup>26</sup> Maa tyin ra Pedro cañihí ra tsi ra, tan catyí ra tsihin ra:

—Nduvita tyin tahan ñi cuví yooho cuví tucu yuhu; ñavin Nyoo cuví yu —catyí ra tsihin ra.

<sup>27</sup> Tan tsitsi tsa caahán ra Pedro tsihin ra, tan quihví ra tsitsi vehe tan nanyehe ra tyin cuaha xaan nyívi ndu iín tsitsi vehe can.

<sup>28</sup> Tacan tan catyí ra Pedro tsihin ñi:

—Nyooho tsitó ndo tyin ley nyuhu tsa cuví ndi nyívi Israel, catyí tsi tyin ña taahán tsi tsa ndu iin ndi tsihin nyívi tsa ñavin nyívi Israel cuví. Tan ndi tsitsi vehe ñi ña cuví quihví ndi. Maa tyin Nyoo janaha ra tsi yu, tan catyí ra: “Yooho, ña catyi un tsihin nyívi tyin ndi intuhun ñi tan ña vaha ñi” catyí Nyoo tsihin yu.

<sup>29</sup> Yacan cuenda quívi tsa cana ndo tsi yu, numi ñi vatsí yu. Tan vityin cuñí yu coto yu nacuenda cana ndo tsi yu —catyí ra Pedro.

<sup>30</sup> Tacan tan nacahan ra Cornelio, tan catyí ra:

—Tsa iyó cumi quívi vityin, tumaa cuhva ihya tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituví iin rayi nuu yu. Nditsí ra jahma xiñu.

<sup>31</sup> Tan catyí ra tsihin yu: “Yooho Cornelio, Nyoo tsiñí ra tsa tsicán tahvi un tsi ra. Tan nducuhun iñi ra tsa javahá un tyin jatyiñyeé xaan un tsi nyívi ndaahvi.

<sup>32</sup> Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyí ra yuvehe ra tsa nañí Simón, iin ra tsa janduvitá ñi quiti. Tan vehe ra can nyaá tsi yatyiñ ñi yuhu ndutya ñuhu. Tan na quitsi ra Simón Pedro tan cahan ra tsihin un” catyí ángel can tsihin yu.

<sup>33</sup> Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsí un. Tan vityin tandihí yo ndu iín yo nuu Nyoo. Tan cuñí ndi tyaa soho ndi tandihí tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

*Nu caahán ra Pedro tuhun ra Cristo yuvehe ra Cornelio*

<sup>34</sup> Tacan tan quitsaha caahán ra Pedro tan catyí ra:

—Vityin cutuñí iñi yu tyin Nyoo cuñí ra tsi tandihí nyívi, tahañ ñi nyívi Israel, tan nyívi tsa ñavin nyívi Israel cuví. Ña tava tsiyo ra tsi ndi intuhun maa yo.

<sup>35</sup> Tyin naquihín ra tsi yo tatun tyaá yahvi yo tsi ra, tan javahá yo tsa vaha.

<sup>36</sup> Nyoo cahan ra tsihin nyuhu tsa cuví ndi tata ra Israel, tan jacoto ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihí maa yo.

<sup>37</sup> Nyooho tsitó vaha ndo tandihí tsa cuví ñuu nyívi Israel ñuu yu, nácaa quitsaha tsi nu cuví Galilea tsa yaha tsa cahan ra Juan tuhun Nyoo tsihin nyívi, tan jacoondutya ra tsi ñi.

<sup>38</sup> Tsitó ndo nácaa tsaha Nyoo tunyee iñi Tatyí Ii ra tsi ra Jesús, ra ñuu Nazaret. Tan tsica ra javaha ra tsa vaha, janduvaha ra tsi tandihí nyívi tsa nyehé tundoho jahá nu ña vaha. Tyehen javaha ra Jesús tyin Nyoo nyaá ra tsihin ra.

<sup>39</sup> Nyuhu cuví ndi tsandaa tsa cuenda tandihí tsa javaha ra Jesús ñuu Jerusalén tsihin tandihí ca ñuu tsa cayucú Judea. Yaha can tan ticaa ra naha tsi ra nu cruu tan tsahñi ra naha tsi ra.

<sup>40</sup> Maa tyin tsa tsinu uñi quívi janandoto Nyoo tsi ra. Tan quituví ra nuu ndi.

<sup>41</sup> Ña quituví ra nuu tandihí nyívi. Maa tyin quituví ra nuu nyuhu tyin nacatsi ra tsi ndi nda tsanaha tyin cuvi ndi tsandaa cuenda ra. Nyuhu tsatsi ndi tan tsihi ndi tsihin ra tsa yaha tsa nandoto ra.

<sup>42</sup> Tan tava tyiñu ra tsi ndi tyin cahan ndi tuhun ra tsihin nyívi. Tan cuví ndi tsandaa tyin Nyoo tava tyiñu ra tsi ra Jesús tyin cuvi ra juez tsi nyívi tsa nyito tan nyívi tsa tsihi.

<sup>43</sup> Tan tacan tucu nda tsanaha, cahan tandihí ra cuví ndusu yuhu Nyoo tuhun ra Jesús. Tan catyí ra naha tyin tandihí nyívi tsa tsinú iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

*Nu naquihín nyívi Tatyí Ii Nyoo tan ñavin nyívi Israel cuví ñi*

<sup>44</sup> Ndi caahán ca ra Pedro tan nuu Tatyí li Nyoo síqui tandíhi ñi tsa tyaá soho tsa caahán ra.

<sup>45</sup> Tan ra Israel tsa yíhí cuenda ra Jesús tsa tsaá tsihin ra Pedro iyo xaan cuñí ra naha tyin tsaha ndíhi tucu Nyoo Tatyí li ra tsi nyívi tsa ñavin nyívi Israel cuví.

<sup>46</sup> Tyin tsiñí ra naha caahán ñi inga yuhu tan jacahnú ñi tsi Nyoo.

<sup>47</sup> Tacan tan quitsaha caahán ra Pedro tsihin ra tsa tsaá tsihin ra:

—Ña cuvi casi yo nu coodutya nyívi ihya. Tyin tsa naquihín ñi Tatyí li Nyoo tumaa tsa naquihín tucu maa yo —catyí ra tsihin ra naha.

<sup>48</sup> Tacan tan tava tyiñu ra Pedro tsi ñi tsa ndi ñihí Tatyí li Nyoo na coodutya ñi tsihin sívi ra Jesucristo. Tacan tan caahán ndaahvi ñi tsihin ra Pedro na ndoo ra taahan quívi tsihin ñi.

## 11

*Nu nacatyí tuhun ra Pedro tsihin ra yíhí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu*

<sup>1</sup> Ra tava tyiñu ra Jesús tan inga ra yíhí cuenda ra Jesús tsa iyó Judea, ñihí tuhun ra naha tyin nda cuanda nyívi tsa ñavin nyívi Israel cuví tan naquihín ñi tuhun Nyoo.

<sup>2</sup> Tacan tan tsaá nyico ra Pedro ñuu Jerusalén. Tan ra tsa catyí tyin tsiñí ñuhu tsa cunyaa tuñi Nyoo tsi tandíhi rayí, xaan xaan cuñí ra naha nyehé ra naha tsi ra Pedro.

<sup>3</sup> Tan catyí ra naha tsihin ra:

—¿Nacuenda tsahan un yuvehe nyívi tsa ñavin nyívi Israel cuví tan tsatsj un tsihin ñi? —catyí ra naha.

<sup>4</sup> Tacan tan ra Pedro nacatyí tuhun ra nda nu quitsaha tandíhi tsa cuví tsi ra, tan catyí ra:

<sup>5</sup> —Yuhu nyívi yu ñuu Jope. Tan tsa tsicán tahvi yu tsi Nyoo tan nyehe yu iin tsa janaha Nyoo tsi yu tyin iin jahma cahnu quee ityi andívi. Tan tandíhi tsa cumi tutun tsi nuuhñi nuuhñi ñi tan vatsí nuú tsi ityi nu ñuhu nu nyívi yu.

<sup>6</sup> Tan nyehe vaha yu tsa yíhí tsitsi jahma can. Tan nyehe yu quiti tsa cumi tsaha, quiti cuuhu, coo, tan saa.

<sup>7</sup> Tan tsiñi yu iin ndusu tsa caahán tsihin yu: “Nduvita Pedro. Cahñi quiti ihya tan catsi un” catyí ndusu can tsihin yu.

<sup>8</sup> Tan nacahan yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha catsi ndi.”

<sup>9</sup> Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yaha janduvaha yu” catyí ndusu can tsihin yu.

<sup>10</sup> Uñi tsaha cuvi yacan. Yaha can tan nandaá nyico tandíhi quiti can tsihin jahma can ityi andívi.

<sup>11</sup> Tan juvin ñi cuhva can tsaá uñi taahan ra naha yuvehe nu nyívi yu, quee ra naha ñuu Cesarea tan nanducú ra naha tsi yu.

<sup>12</sup> Tan Tatyí li Nyoo cahan tsihin yu na cahun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndíhi iñu taahan ra yañi yo ihya naha ra tsihin yu. Tan tsa tsaá ndi nda ñuu Cesarea, quihvi ndi tsitsi vehe iin ra tsa nañi Cornelio.

<sup>13</sup> Tan nacatyí tuhun ra can tsihin ndi nácaa nyehe ra tsi iin ángel tsitsi vehe ra. Nyaá nyityi ángel can tan catyí ra tsihin ra tyin na jacuhun ra musu ra ñuu Jope na cucana ra naha tsi yu.

<sup>14</sup> Tyin yuhu cua cuhva cuenda yu tsi ra nácaa cuvi cacu ra tsihin tandíhi nyívi ra, catyí ángel can tsihin ra, catyí ra tsihin ndi.

<sup>15</sup> Tan javaha ra can tumaa cuhva catyí ángel can tsihin ra. Tan tsa tsaá yu yuvehe ra quitsaha caahán yu tsihin nyívi tsa ndu iin yuvehe ra. Tan quitsj Tatyí li Nyoo síqui ñi tumaa tsa nuu tsi síqui yo tsa jihna ñi.

<sup>16</sup> Tacan tan nducuhun iñi yu tsa catyí Jutu Mañi yo quívi can. Tan catyí ra tyehen: “Nditsa tyin ra Juan jacoondutya ra tsi nyívi

tsihin ndutya. Maa tyin nyooho cua coondutya ndo tsihin Tatyí li Nyoo”, catyí ra.

<sup>17</sup> Nyoo tsahá ndihí tucu ra Tatyí li ra tsi ñi can tumaa tsa tsahá ra Tatyí li ra tsi yo quívi tsa natsinú iñi yo tsi Jutu Mañi yo Jesucristo. Tan tsa tacan ¿yóo ra cuví yuhu tan casi yu tsa javahá Nyoo? —catyí ra Pedro tsihin ra hermano can naha ra.

<sup>18</sup> Tacan tan tsa tsiñi ra ñuu Jerusalén tuhun can, ña cahán ca ra naha. Tan jacahnú ra naha tsi Nyoo, tan catyí ra naha:

—Tun tacan cuví, cuñí tsi catyí tyin Nyoo tsahá ndihí tucu ra ndatu tsi nyívi tsa ñavin nyívi Israel cuví tyin na ndu uvi iñi ñi cuatyí ñi, tan coo ñi ñayívi nyito tsa ña cua naa maa —catyí ra naha.

#### *Nyívi yihí cuenda ra Cristo ñuu Antioquía*

<sup>19</sup> Quívi tsa tsahñi ra naha tsi ra Es-teban, quítsahá nyaá ndaha ra naha tsi inga ca nyívi yihí cuenda ra Cristo. Tan yihí ñi tsinú ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mahñu ndutya ñuhu. Tan yihí ñi tsaá ñi ñuu Antioquía. Tan tandihí ñi caahán ñi tuhun ra Cristo tsihin nyívi, maa tyin iin ñi maa tsihin nyívi Israel.

<sup>20</sup> Tan tsihin ñi tsa cuahán can, yihí nyívi ñuhu Chipre, tan yihí tucu juhva nyívi ñuu Cirene. Tan tsa tsaá ñi ñuu Antioquía, tan quítsahá caahán ñi can tuhun ra Cristo tsihin nyívi tsa ñavin nyívi Israel cuví. Tan jacoto ñi tuhun vaha Jutu Mañi yo ra Jesús.

<sup>21</sup> Tan tunyee iñi Jutu Mañi yo iyó tsihin ñi. Tan yacan cuenda cuaha nyívi nacoq ñi tuhun tsahnu. Tan quítsahá tsinú iñi ñi tsi Jutu Mañi yo.

<sup>22</sup> Tacan tan tsaá tuhun can nda ñuu Jerusalén. Tan nyívi yihí cuenda ra Cristo jacuhun ñi tsi ra Bernabé na cahun ra nda ñuu Antioquía.

<sup>23</sup> Tan tsa tsaá ra Bernabé Antioquía can, nyehe ra nácaa nasocó Nyoo tsi ñi. Tan siñ xaan cuñí ra. Tan catyí

ra tsihin ñi na cunyicun ñi tsi Jutu Mañi yo tsihin tsa ñi iñi ñi.

<sup>24</sup> Tacan javahá ra Bernabé tyin cuví ra iin ra vaha. Tsitú ra tsihin Tatyí li Nyoo, tan tsinú xaan iñi ra tsi Nyoo. Yacan cuenda cuaha xaan nyívi quíhví cuenda Jutu Mañi yo.

<sup>25</sup> Tsa yahá can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihí ra tsi ra, tsindacá ra tsi ra nda ñuu Antioquía.

<sup>26</sup> Tan tsiyucu ra naha tsihin nyívi yihí cuenda ra Cristo ñuu can iin cuiya tan cuaha xaan nyívi jacuahá ra naha tuhun Nyoo. Tan juvin ñi ñuu Antioquía can cuví nu quítsahá catyí nyívi tyin nyívi Cristiano cuví ñi, o ñi yihí cuenda ra Cristo.

<sup>27</sup> Tan quívi can tsaá taahan ra cuví ndusu yuhu Nyoo. Quee ra naha ñuu Jerusalén tan tsaá ra naha ñuu Antioquía.

<sup>28</sup> Tan iin ra can nañi ra Agabo tsicunyaá nyityi ra tyañu nyívi yihí cuenda ra Cristo tan cahán ra tsa tsahá Tatyí li Nyoo tsi ra. Tan catyí ra tyin cua quítsi iin tama ñi cahnú nu ñuhu ñayívi. Tan tacan cuví quívi tsa cuví ra Claudio rey cahnú.

<sup>29</sup> Tacan tan nyívi yihí cuenda ra Cristo nda ñuu Antioquía natuhun tahan ñi tyin cua kuhva ñi nácaa iyó iñi intuhun intuhun ñi, tyin cua jatyinyee ñi tsi nyívi yihí cuenda ra Cristo tsa iyó ñuu tsa cayucú Judea.

<sup>30</sup> Tacan javahá ñi tan jacuhun ñi juhva xuhun tsi ra tsa cuví ityi nuu tsihin nyívi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindacá ra naha xuhun can.

## 12

#### *Nu tsihi ra Jacobo tan nu quíhví ra Pedro vehe caa*

<sup>1</sup> Tan quívi can quítsahá nyaá ndaha ra cuví rey Herodes tsi juhva nyívi yihí cuenda ra Cristo.

<sup>2</sup> Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi.



<sup>3</sup> Tan nyehe ra Herodes tyin tahan xaan iñi nyivi Israel tsa javaha ra tacan, tan tava tyiñu ra tyin tñin ndihi ra naha tsi ra Pedro. Tan cuví tsi quivi vico pascua nu tuhvá nyivi tsatsí paan tsa nduve yutsan iya yihí.

<sup>4</sup> Tsa yaha tsa tñin ra naha tsi ra Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihví tucu inga cumi taahan andaru. Tan tyaa ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua.

<sup>5</sup> Tan tacan nyíi ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyíi ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa ñi iñi ñi.

#### *Nu jacacu Nyoo tsi ra Pedro vehe caa*

<sup>6</sup> Tan tyaa ra Herodes cuhva tyin inga quivi can cua tava ra tsi ra Pedro nuu nyivi. Tan juvin ñi tsacuaa can, tan ra Pedro quixí xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe.

<sup>7</sup> Tan sana iñi ra tan quituvi iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tñin ra xiin ra Pedro, jandoto ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsi cadena tsa nuuhñi ndaha ra.

<sup>8</sup> Tan ángel can catyí ra tsihin ra:

—Nacuhñi vaha tsitsi un tan tyihi nditsan un tsaha un —catyí ángel can tsihin ra.

Tacan javaha ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

<sup>9</sup> Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuví

can, tan cuñí maa ra tyin iyó iin tsa janaha Nyoo tsi ra.

<sup>10</sup> Maa tyin cuahán ra tsata ángel can tan yaha ra naha iin nu jahá cuenda ra andaru. Tacan tan yaha tucu ra naha inga nu jahá cuenda ra naha. Yaha can tacan tan tsa ra naha yuvehe caa cahnu nu quitá nyivi. Tan yuvehe can nuña maa tsi. Tan quitá ra naha. Tan tsa yaha yaha ra naha iin ityi, tan nacoó ángel can tsi ra.

<sup>11</sup> Tacan tan nacoto ra Pedro tyin nditsa, tan quitsaha tsicá iñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacu ra tsi yu ndaha ra Herodes tan ndaha ra ñuu Israel naha ra —cuñí ra Pedro.

<sup>12</sup> Tsicá iñi ra yacan ityi cuahán ra, tan tsa ra yuvehe ña María sihi ra Juan Marcos. Tan cuaha xaan nyivi yucú ican tsicán tahvi ñi tsi Nyoo.

<sup>13</sup> Tan tsa cañi ndaha ra Pedro yuvehe nuquehe, tan quitá iin ñaha tyuvaa tsa nañí Rode, tsinyehe ña yóo cañi ndaha yuvehe can.

<sup>14</sup> Maa tyin cuhva tsa tsiñi ña ndusu ra Pedro, sihi xaan cuñí ña, tan naa iñi ña nuña ña yuvehe can, tyin tsinú ña cuahán ña cua cahan ña tsihin nyivi tsa yucú tsitsi vehe can. Tan catyí ña tyin ra Pedro nyaá ra yuvehe.

<sup>15</sup> Tacan tan quitsaha catyí ñi tsihin ña:

—Iñi yooho ña vaha cuñí —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

<sup>16</sup> Tan ra Pedro jañihí ca ra cañi ndaha ra yuvehe. Tan cuhva tsa nuña ñi yuvehe tan nyehe ñi tsi ra, iyo xaan cuñi ñi tan nayuhvi ñi.

<sup>17</sup> Maa tyin javaha ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tava Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyí ra Pedro.

Tan quitã ra tan cuahán ra.

<sup>18</sup> Cuhva tsa cunditsin, iyo xaan cuñí ra andaru tsa jahá cuenda tsitsi vehe caa can naha ra, tyin ña tsitó ra naha nácaa quitã ra Pedro.

<sup>19</sup> Tacan tan tava tyiñu ra Herodes na cunanducu ra naha tsi ra, tan ña nañihí ra naha tsi ra. Tacan tan tava tyiñu ra tsi ra naha na cahñi ra naha tsi ra jahá cuenda vehe caa can naha ra. Yaha can tan quitã ra Herodes Judea can tan cuahán ra cua coo ra ñuu Cesarea.

### *Nu tsihi ra Herodes*

<sup>20</sup> Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñí ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsatsí ñi. Tacan tan ndu iin ñi tan cuahán ñi cua cutahan ñi tsihin iin ra tsa nañí Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes.

<sup>21</sup> Tacan tan catyí ra Herodes tyin cahun ñi nu nyaá ra iin quivi. Tan tsaá quivi can tan tsicunditsi ra jahma si caá ra tsa jahá tyiñu ra. Tan tsicunyaá ra nu tyayu ra. Tan cahan ra tsihin ñi.

<sup>22</sup> Tacan tan quitsaha caná tsa ñi, tan catyí ñi:

—Ra tsa caahán ihya ñavin rayií cuví ra, tyin Nyoo cuví ra —catyí ñi.

<sup>23</sup> Tan juvin ñi cuhva can tan tiiñ cuehe tsi ra Herodes jaha ángel Jutu Mañi yo tyin tsaaha ra tsa catyí nyivi tyin Nyoo cuví ra. Tan quihvi tindacu tsi ra, tan tsihi ra.

<sup>24</sup> Maa tyin tuhun Nyoo nducuaaha ca tsi. Tan jañihí ca nyivi caahán ñi tuhun Nyoo tandihí ñi ityi.

<sup>25</sup> Quivi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhu ra naha ñuu Antioquía. Tan cuahán ndihí tucu ra Juan Marcos tsihin ra naha.

## 13

### *Nu quitsaha tsicá ra Saulo tan ra Bernabé tyiñu Nyoo*

<sup>1</sup> Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa tsahnu iin nducu ñi tsihin ra Herodes tsa cuví rey ityi Galilea, tan ra Saulo.

<sup>2</sup> Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahan Tatyí Ii Nyoo tsihin ra naha:

—Tava siin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii Nyoo can tsihin ra naha.

<sup>3</sup> Tacan tan tsa ndihí tsicoo nyitya ra naha, tan tyiso ndaha ra naha jiñi ra Bernabé tsihin ra Saulo, tan tsican tahvi ra naha tsi Nyoo tsa cuenda ra naha. Tan cahan tsihin tahan ra naha, tsahan cuahán ra naha.

### *Nu caahán ra tava tyiñu ra Jesús tuhun Nyoo ñuhu Chipre*

<sup>4</sup> Yaha can tan jacuhun Tatyí Ii Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyií mahñu ndutyá ñuhu.

<sup>5</sup> Tacan tan tsaá ra naha ñuu Salamina tsa canyií yuhu ndutyá ñuhu. Tan quitsaha caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha.

<sup>6</sup> Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaá ra naha ñuu tsa nañí Pafos. Tan ican nañihí ra naha tsi iin ra ñuu Israel tsa nañí Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra.

<sup>7</sup> Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra.

<sup>8</sup> Tan ra tasi can nañi tucu ra Elimas, tan tyasi xaan ra nu tsinu iñi ra cumi tyiñu can tsi ra Cristo.

<sup>9</sup> Tacan tan ra Saulo tsa nañi tucu Pablo, tsitu ra tsihin Tatyí Ii Nyoo. Tan ñihi xaan nanyehę ra tsi ra Elimas can.

<sup>10</sup> Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñi un jativi un tandihi tsa vaha. Tan tacan ñi tyasi un ityi vaha Jutu Mañi yo.

<sup>11</sup> Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehe un ñuhu ñicanyii juhva quivi —catyí ra Pablo tsihin ra Elimas.

Tacan tan juvin ñi kuhva can cuaa ra. Tan ndoo ra nu naa. Tan nducu ra iin ra tin ndaha ra tyin ña nditsin nyehé ra.

<sup>12</sup> Tsa nyehe ra cumi tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñi ra nyehé ra tsa javahá Jutu Mañi yo.

*Nu cuahán ra Pablo tan ra Bernabé nda ñuu Antioquía tsa canyí Pisidia*

<sup>13</sup> Ra Pablo tan ra vaha iñi tsi ra quihvi ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyí Panfilia. Maa tyin ra Juan Marcos nacoo ihñi ra tsi ra naha tan cuanuhu ra nda ñuu Jerusalén.

<sup>14</sup> Yahá can tan queę ra naha Perge can, tan cuahán ra naha ñuu Antioquía tsa canyí Pisidia. Ican quihvi ra naha tsitsi vehe ñuhu nyivi Israel tan cuví tsi iin quivi quitatú ñi. Tan tsinyecu ra naha.

<sup>15</sup> Tacan tan quitsahá cahví nyivi nu libru ley Nyoo tsa tyaa ra Moisés. Tan cahví tucu ñi libru tsa tyaa ra cuví ndusu yuhu Nyoo tahan tsanaha. Yahá can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatun cuñi ra naha cahan ra naha tsihin nyivi, cuví cahan ra naha.

<sup>16</sup> Tacan tan nduvitá ra Pablo tan javahá ra iin seña tsihin ndaha ra tyin na cutaxin ñi. Tan catyí ra:

—Tyaa soho nyooho, ra ñuu Israel, tan nyooho nyivi tsa tyaa yahvi tsi Nyoo.

<sup>17</sup> Nyoo cuenda yo, tsa cuví yo nyivi Israel, nacatsi vaha ra tsi tsii tsaahnu yo. Tan quivi tsa iyó ca ra naha Egipto, javahá ra iin ñuu cahnu tsi ra naha. Vasu ñavin nyivi ñuu can cuví ra naha, maa tyin janducuahá ra tsi ra naha. Yahá can tan tava ra tsi ra naha ityi can tsihin tunyee iñi tsa iyó tsi ra.

<sup>18</sup> Tan cunyeę iñi Nyoo tandihi kuhva tsicoo ra naha nu tsicá nuu ra naha nu tsiqui tsitsi tsa uvi xico cuiya.

<sup>19</sup> Tan janaa ra utsa taahan ñuu nahnu tsa cayucú ñi cahnu Canaán, tyin tsahá ra ñuhu can tsi tsii tsaahnu yo.

<sup>20</sup> Yahá can tan quitsahá ndacá ñaha juez tsi nyivi can jahá Nyoo. Tumaa cumi cientu sasava cuiya tsindacá ñaha juez tsi ñi, nda cuando quivi tsindacá ñaha ra Samuel ra cuví ndusu yuhu Nyoo tsi ñi.

<sup>21</sup> Tacan tan maa ñi tsican ñi iin rey tsa cundaca ñaha tsi ñi. Tan Nyoo tsahá ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacá ñaha ra tsi ñi.

<sup>22</sup> Yahá can tan Nyoo tava ra tsi ra Saúl tsa cuví ra rey. Tan tsahá ra tyiñu can tsi ra David. Tan catyí ra: “Nyhé yu tyin ra David, sehe ra Isaí, cuví ra iin rayi tsa taahán iñi yu kuhva iyó. Tan cua javaha ra tandihi tsa cuñi yu” catyí Nyoo tuhun ra David.

<sup>23</sup> Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsi tsi ra tyin jacacu ra tsi yo tsa cuví yo nyivi Israel, tumaa catyí ra tsihin tsii tsaahnu yo tahan tsanaha.

<sup>24</sup> Tan ndi cumañi ca quitsi ra Jesús, ra Juan, ra jacoondutyá tsi nyivi, cahan ra tsihin tandihi nyivi Israel. Tan catyí ra tsihin ñi tyin cuñi tsi tsa ndu uvi iñi ñi cuatyi ñi, tan coondutyá ñi.

<sup>25</sup> Tan tsa cua ndihi tyiñu jahá ra Juan tan catyí ra: “¿A cuñi maa ndo tyin yuhu cuví ra cahnu xaan tsa

ndatú ndo? Ñavin yuhu cuví ra cahnu can. Tyin tsata tsa yaha yuhu tan vatsí inga ra. Tan ndi ndítsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyí ra Juan.

<sup>26</sup> Tan caahán ca ra Pablo tan catyí ra:

—Yañi, nyooho nyívi tata ra Abraham tan tandihí inga ndo tsa tyaá yahvi tsi Nyoo. Tsa cuenda nyooho cuví tuhun ihya tyin jacuahá Nyoo tsi yo nácaa cacu yo.

<sup>27</sup> Nyívi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñí iñi ñi tuhun tsa tyaá ra cuví ndusu yuhu Nyoo tahañ tsanaha, vasu jacuahá xaan ñi tuhun can tandihí quívi tsa quitatu ñi, maa tyin ña cutuñí iñi ñi. Tan quívi tsahñi ñi tsi ra Jesús cuví tsi tumaa cuhva catyí ra cuví ndusu yuhu Nyoo.

<sup>28</sup> Tyin vasu nduve cuatyí ra Jesús nañihí ñi, maa tyin tsican ñi tsi ra Pilato na tyihi ra tyiñu tyin cahñi ra naha tsi ra Jesús.

<sup>29</sup> Tan tsa yaha janyehe ñi tundoho tsi ra tumaa catyí maa tuhun ra nu libru, tan tsihi ra. Tacan tan januu ñi tsi ra nu cruu. Tan tsicutsi ñi tsi ra.

<sup>30</sup> Maa tyin Nyoo janandoto ra tsi ra inga tsaha.

<sup>31</sup> Tan tsitsi tsa cuaha quívi tan quituvi ra nuu ra tsa cuahán tsihin ra quívi quita ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyívi vityin.

<sup>32</sup> Tan yacan cuenda nyuhu caahán ndi tuhun vaha tsa catyí Nyoo tsihin tsii tsaahnu yo tyin cuhva ra tsi yo.

<sup>33</sup> Tyin tsa cuenda tsa vaha tsi maa yo tsa cuví yo nyívi tata ñi, javaha maa Nyoo tsa catyí ra. Tyin janandoto ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayívi coo un vityin” catyí Nyoo tsihin ra.

<sup>34</sup> Nyoo tyaá ra cuhva tyin janandoto ra tsi ra, tyin tacan tan ña cua

tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahan yu tsihin ra David tyin cua cuhva yu tsi ndo.”

<sup>35</sup> Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi.

<sup>36</sup> Ra David jahá tyiñu ra tsa cuenda nyívi tsa tsicoo quívi tsicoo ra, tandihí tsa catyí Nyoo tsihin ra tyin javaha ra, javaha ra. Yaha can tan tsihi ra tan tsicutsi ñi tsi ra tumaa tsicutsi ñi tsi jutu ra. Tan tyahyu cuñu ñuhu ra.

<sup>37</sup> Maa tyin ra tsa janandoto Nyoo, ña tyahyu cuñu ñuhu ra.

<sup>38</sup> Yañi, cuñí tsi tsa coto ndo tyin tsa cuenda cuatyí yo tan quitsi ra Jesús tan tsihi ra tyin jahá ra tucahnu iñi cuatyí yo.

<sup>39</sup> Tan tsa cuenda ra Jesús jahá Nyoo tucahnu iñi tsi tandihí ñi tsa tsinú iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo.

<sup>40</sup> Jaha ndo cuenda coto ndoo tsa tyaá ra cuví ndusu yuhu Nyoo síqui ndo. Tyin catyí ra naha tyehen:

<sup>41</sup> Nyehe nyooho, ra tsa tsacú nducu, taahán tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan javahá yu iin tsa cahnu quívi tsa iyó ndo vityin.

Maa tyin ña cua tsinu iñi ndo tandihí tsa javahá yuhu vasu nacatyí tuhun nyívi tsihin ndo, catyí Nyoo.

<sup>42</sup> Ndihi cahan ra Pablo tan quita ra tsata vehe ñuhu can tsihin ra vaha iñi tsi ra. Tacan tan nyívi tsa ñavin nyívi Israel cuví quitsaha catyí ñi tsihin ra, tyin na cahan nyico ra tuhun can tsihin ñi inga vitya quívi tsa quitatu ñi.

<sup>43</sup> Cuhva tsa ndihí ndu iin ñi, cuaha xaan nyívi Israel tan nyívi tsa yíhi cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cahun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.



<sup>44</sup> Tsa inga vitya quiví quitatú ñi, ndu iin nyico ñi. Tan tsa yatyin tandihi ña maa nyiví ñuu can ndu iin tsihin ñi tan tyaá soho ñi tuhun Nyoo.

<sup>45</sup> Maa tyin cuhva tsa nyehe ra Israel naha ra, cuxaán ra naha tyin nyehé ra naha tyin cuaha nyiví nyicún tsi ra hermano can naha ra. Tan quitsahá caahán ra naha tsi ra Pablo, tan cahán ra naha ndavaha ñi siqui ra.

<sup>46</sup> Maa tyin ra Pablo tan tsihin ra Bernabé ña yuuhví maa ra naha tan quitsahá caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyooho tsa cuví ndo nyiví Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayiví nyito tsa ña cua naa maa tsi ndo. Yacan cuenda cua cuhun ndi cucahan ndi tsihin nyiví tsa ñavin nyiví Israel cuví.

<sup>47</sup> Tyin tacan catyí Jutu Mañi yo tsihin ndi tan catyí ra tyehen:

Tyaá yu tsi un tumaa iin ñuhu tsa jandunditsín nu iyó nyiví naní cahnu nu ñuhu ñayiví.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

<sup>48</sup> Tsa tsiñi ra tsa ñavin ra Israel cuví naha ra, sií xaan cuñí ra naha. Tan quitsahá catyí ra naha tyin tuhun Nyoo vaha xaan tsi. Tan natsinu ñi tandihi nyiví tsa nacatsi maa Nyoo, tyin coo ñi ñayiví nyito tsa ña cua naa maa.

<sup>49</sup> Tacan tan nducuahá ca tuhun Nyoo tandihi ityi ñuu can.

<sup>50</sup> Maa tyin ra Israel cahán ra naha tsihin juhva ñaha cuca tsa nyicún ley Nyoo tsa tyaá ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsahá nyaá ndaha nyiví tsi ra Pablo tan ra Bernabé, nda cuanda tsa tava ñi tsi ra naha ñuu can.

<sup>51</sup> Tacan tan naquisi ra naha nyaca tsaha ra naha tumaa iin seña tyin

ndo cuatyí nyiví can siqui maa ñi. Tan cuahán ra naha ñuu Iconio.

<sup>52</sup> Maa tyin ñi yihí cuenda ra Cristo ñuu Antioquía can sií xaan cuñí ñi. Tan tsitú ñi tsihin Tatyí Ii Nyoo.

## 14

*Nu nyii ra Pablo tan ra Bernabé ñuu Iconio*

<sup>1</sup> Ra Pablo tan ra Bernabé yucú ra naha ñuu Iconio. Tan quihví ra naha tsitsi vehe ñuhu nyiví Israel. Tan vaha xaan cahán ra naha tuhun Nyoo tsihin nyiví can. Tan cuaha xaan ñi natsinu ñi ñi tsi ra Cristo, nyiví Israel tan nyiví tsa ñavin nyiví Israel cuví.

<sup>2</sup> Maa tyin ra Israel tsa ña tsinú ñi tsi ra Cristo natyuhu ra naha tsi nyiví tsa ñavin nyiví Israel cuví tyin na caca ña vaha ñi ñi nyehe ñi tsi ra yihí cuenda ra Cristo.

<sup>3</sup> Yacan cuenda ra Pablo tan ra Bernabé ndoo ra naha ican cuaha quiví. Tan tsihin tsa ñi ñi ra naha caahán ra naha tuhun ra Cristo, tyin tsinú xaan ñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsahá Jutu Mañi yo tunyee ñi tsi ra naha tyin javaha ra naha seña tan tsa iyo na coto nyiví tyin nditsa tsa caahán ra naha.

<sup>4</sup> Maa tyin nyiví ñuu ña iin tsicá ñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tava tyiñu ra Jesús.

<sup>5</sup> Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tava tyiñu ra Jesús, tan cua cañi ra naha yuu tsi ra naha.

<sup>6</sup> Maa tyin ra Pablo tan ra Bernabé ñihi tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Listra, tan nda ñuu Derbe ityi Licaonia. Tan tsicá nuu ra naha ityi ñuu can.

<sup>7</sup> Tan cahán nyico tucu ra naha tuhun Nyoo nácaa jacacú ra tsi yo.

*Nu cañi nyivi yuu tsi ra Pablo nda ñuu Listra*

<sup>8</sup> Nda Listra iyó iin rayi tsa coxo tyin nda quivi cacu ra tan ña cuví caca ra, tyin pehe nduvi taahan tsaha ra.

<sup>9</sup> Tan ra pehe tsaha can tyaá soho ra tsa caahán ra Pablo. Tan ra Pablo, tuví iñi ra tyin tsinú iñi ra can tyin cuví nduvaha ra.

<sup>10</sup> Tacan tan ra Pablo caahán ra tsihin tsa ñihi ndusu ra, tan catyí ra:

—Nduvita tan cunyaa nyityi un —catyí ra Pablo tsihin ra.

Tan ra ican, intuhun ñi ndava ra, tan tsinyaa nyityi ra. Tan quitsaha tsicá ra.

<sup>11</sup> Tsa nyehé nyivi tyin javaha ra Pablo tacan, quitsaha caná tsa ñi tsihin yuhu Licaonia, tan catyí ñi:

—Ra tsa tsaá nu yucú yo ihya, nyoo cuví ra naha, maa tyin tumaa caá rayi, caá ra naha —catyí ñi.

<sup>12</sup> Tan catyí ñi tyin ra Bernabé cuví ra nyoo tsa nañi Júpiter, tan ra Pablo cuví nyoo tsa nañi Mercurio, tyin ra ican cuví ra tsa caahán.

<sup>13</sup> Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsitoho Júpiter. Tan quitsi ndaca ra indiqui tan ita tyin maa ra tan nyivi cuñi ñi jacahnu ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñi ñi tyin nyoo cuví ra naha.

<sup>14</sup> Maa tyin cuhva tsa tuví iñi ra naha tsa tsicá iñi ñi, quitsaha tsaahnyá ra naha jahma ra naha. Tan javaha ra naha tacan tumaa iin seña tyin ña ndoó ra naha vaha. Tan quihvi ra naha tyañu nu tuví nyivi, tan cana tsa ra naha,

<sup>15</sup> Tan catyí ra naha:

—Nyooho tata, ¿nácaa tsa javahá ndo tyehen? Nyuhu juvin ñi rayi ñuu ñayivi ihya cuví ndi. Tumaa cuví nyooho cuví tucu nyuhu. Tan vatsi cahan ndi tsihin ndo tyin na jaña ndo tsa javahá ndo tyehen tyin ña tsiñi ñuhu yacan tsi ndo, tan na cunycun ndo tsi Nyoo nyito. Juvin ra tsa javaha andivi tan ñuhu ñayivi. Tan

javaha ra ndutya ñuhu tan tandihi maa tsa iyó tsitsi ndutya ñuhu can.

<sup>16</sup> Tan tahañ tsanaha nda cuando vityin, Nyoo jaña ndaha ra tsi nyivi na javaha maa ñi cuhva cuñi ñi,

<sup>17</sup> vasu tandihi quivi jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsahá ra tsa coo vaha tsa tatsí yo quivi taahán tsi. Tan tsahá ra tsa catsi yo. Tan tsahá ra tsa cusii cuñi yo —catyí ra naha tsihin nyivi can.

<sup>18</sup> Maa tyin vasu catyí ra naha tacan, yi xaan tan tyasi ra naha tsa cahñi ñi indiqui can, tyin cuñi ñi jacahnu ñi tsi ra naha tsihin can.

<sup>19</sup> Tacan tan tsaá juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhu ra naha tsi nyivi, na cañi ñi yuu tsi ra Pablo. Tan tacan javaha ñi, tan cuñi maa ñi tyin tsa tsihi ra. Tacan tan ixta caa ñi tsi ra tan tsindaca ñi tsi ra nda yuhu ñuu.

<sup>20</sup> Maa tyin ndu iin ra yihí cuenda ra Cristo nu canyí ra Pablo. Tan nduvita nyico ra. Tan quihvi nyico ra inga tsaha tsitsi ñuu can. Tan tsa inga quivi can cuahán ra ñuu tsa nañi Derbe tan cuahán ra Bernabé tsihin ra.

<sup>21</sup> Tan cahan tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyivi nacuhva ñi tsi ñi tsi Nyoo. Yaha can tan cuanuhu ra naha ityi quitsi ra naha. Tan yaha nyico ra naha ñuu Listra tan ñuu Iconio inga tsaha, tan tsaá nyico ra naha nda ñuu Antioquía.

<sup>22</sup> Tan tandihi ñuu can jandu iin ra naha iñi nyivi tsa yihí cuenda ra Cristo. Tan catyí ra naha tsihin ñi na cahun ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñi yo tsa cundaca ñaha Nyoo tsi yo, cuñi tsi tsa nyehe yo tundoho.

<sup>23</sup> Tan natyiso ra naha tsi ra cua cuví ityi nuu tsihin nyivi tsa yihí cuenda ra Cristo tan iin tan iin vehe ñuhu. Tan tsicoo nyitya ra naha tan tsican tahvi ra naha tsi Nyoo tsa

cuenda ra tsa cua cuvi ityi nuu tsihin nyivi vehe ñuhu can naha ra. Yaha can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsinu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

### *Nu cuanuhu nyico ra Pablo tan ra Bernabé ñuu Antioquía ityi Siria*

<sup>24</sup>Yaha can tan yaha ra Pablo tsihin ra Bernabé ñuu tsa cayucú Pisidia, tan tsaá ra naha nda cuanda Panfilia.

<sup>25</sup>Cahan ra naha tuhun Nyoo ñuu Perge. Yaha can tan tsahan ra naha ñuu Atalia.

<sup>26</sup>Ican quihvi ra naha tsitsi iin yutun ndoo tan cuanuhu ra naha nda ñuu Antioquía. Ican cuví ñuu nu natyiso ñi tsi ra naha tyin cua javaha ra naha tyiñu Nyoo, tan vityin tsa tsaá nuhu ra naha.

<sup>27</sup>Tsa tsaá nyico ra naha ñuu Antioquía jandu iin ra naha tsi nyivi yihí cuenda ra Cristo. Tan nacatyí tuhun ra naha tsihin ñi tandihi tsa javaha Nyoo tsihin ra naha, tan nácaa nuña Jutu Mañi yo ityi tyin tsinú tucu iñi ñi tsa ñavin nyivi Israel cuví.

<sup>28</sup>Tan naha xaan ndoo ra Pablo tan ra Bernabé tsihin ñi yihí cuenda ra Cristo ñuu can.

## 15

### *Nu jandaá ra tava tyiñu ra Jesús tyiñu nda ñuu Jerusalén*

<sup>1</sup>Ndi nyii ca ra Pablo tan ra Bernabé ñuu Antioquía, tan tsaá taahan ra naha quee ra naha nda Judea. Tan quitsaha jacuahá ra naha tsi ra yihí cuenda ra Cristo. Tan catyí ra naha tyin cuñí tsi tsa cunyaa tuñi Nyoo tsi ra naha, tumaa cuhva catyí ra Moisés, tyin tacan tan cua cacu ra naha.

<sup>2-3</sup>Tan ñihi xaan cahan yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin

cuhun ra naha ñuu Jerusalén, cujandaa ra tyiñu can tsihin ra tava tyiñu ra Jesús tan tsihin ra cuví ityi nuu tsihin nyivi vehe ñuhu ñuu Jerusalén can naha ra. Tacan tan cuahán ra naha. Tan ityi cuahán ra naha, yaha ra naha ityi Fenicia tan Samaria. Tan nacatyí tuhun ra naha tsihin nyivi yihí cuenda ra Cristo nácaa jañá nyivi tsa ñavin nyivi Israel cuví tuhun tsahnu tsa tsinu iñi ñi, tyin nacuhvá cuenda ñi tsi ñi tsi Nyoo. Tan tandihi ra hermano sii xaan cuñí ra naha tsa tsito ra naha yacan.

<sup>4</sup>Quivi tsaá ra Pablo tan ra Bernabé ñuu Jerusalén, cuahán ra naha nu ndu iin nyivi yihí cuenda ra Cristo. Tan tandihi ñi tan ra cuví ityi nuu tsihin ñi, tan tsihin ra tava tyiñu ra Jesús, tsaha ñi yaha ra naha tyin nacatyí tuhun ra naha tsa javaha Nyoo tsihin ra naha.

<sup>5</sup>Maa tyin juhva ra fariseo tsa tsinú iñi tsi ra Cristo, nduvita ra naha tan catyí ra naha:

—Tandihi ra tsa ñavin ra Israel cuví tan tsinú iñi ra naha tsi ra Jesús, cuñí tsi tsa cunyaa tuñi Nyoo tsi ra naha. Tan cuñí tucu tsi tsa javaha ra naha cuhva catyí ley Nyoo tsa tyaá ra Moisés —catyí ra naha.

<sup>6</sup>Tacan tan ndu iin ra cuví ityi nuu tsihin ñi yihí cuenda ra Cristo tan ra tava tyiñu ra Jesús tyin natuhun tahan ra naha tuhun can.

<sup>7</sup>Tsa yaha tsa cahan yuhu xaan ra naha, tan nduvita ra Pedro, tan catyí ra:

—Yañi, tsitó ndo tyin tsitsi tsa tandihi yo, nacatsi Nyoo tsi yuhu ra ndaahvi quivi can, tyin cahan yu tuhun ra tsa jacacú tsi yo tsihin nyivi tsa ñavin nyivi Israel cuví, tan na tsinu iñi ñi tsi Jutu Mañi yo.

<sup>8</sup>Tan Nyoo, ra tsitó añima tandihi nyivi, janaha ra tsi yo tyin cuñí ra tsi ñi ican. Yacan cuenda tsaha ra Tatyí Ii ra tsi ñi, tumaa tsa naquihñ tucu maa yo Tatyí Ii ra tahan tsana.

<sup>9</sup>Nyoo inducu ñi cuñí ra tsi nyivi. Yacan cuenda ña tyaá tsiyo ra tsi ñi ican tan ndi tsi yoo. Janduvahá ra

tsi ñi tsa cuenda tsa tsinú iñi ñi tsi ra tumaa maa yo.

<sup>10</sup> Vityin ¿nacuenda ña tsinú iñi ndo tsa javaha Nyoo tsihin ñi can? Tyin ña vaha tsa tyisó yo ley Nyoo tsa tyaa ra Moisés siqui ñi. Tyin ndi maa tsii tsaahnu yo tan ndi maa yo tan ña cuví naquihin vaha yo ley can.

<sup>11</sup> Ñavin tacan cacú yo. Yoo tsitó yo tyin cacú yo tsihin tumañi iñi tsa javahá Jutu Mañi yo ra Jesús tsihin yo. Tan tacan tucu ñi can —catyí ra Pedro tsihin tandihí ra can naha ra.

<sup>12</sup> Tacan tan taxin ñi cuví tandihí ra naha. Tan tyaa soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javaha Nyoo nu cahan ra naha tuhun ra nu yucú nyívi tsa ñavin nyívi Israel cuví.

<sup>13</sup> Tsa ndihí cahan ra naha, quit-saha caahán ra Jacobo, tan catyí ra:

—Nyooho yañi, tyaa soho ndo tsa cua cahan yo tsihin ndo.

<sup>14</sup> Tsa catyí tuhun ra Simón Pedro tsihin yo nácaa quitsaha tsahá Nyoo tumañi iñi tsi ñi tsa ñavin nyívi Israel cuví. Tyin nacatsí tucu ra tsi juhva ñi tyin cuví ñi nyívi cuenda ra.

<sup>15</sup> Tan ndu iin tuhun ihya tsihin tuhun tsa cahan ra cuví ndusu yuhu Nyoo tahañ tsanaha, tumaa cuhva nyaá maa nu tutu Nyoo nu catyí ra:

<sup>16</sup> Yaha tandihí tuhun ihya tan cua quitsi nyico yu nu yucú ndo.

Quívi tsa tsicoo ra David, vaha xaan jacahnú nyívi tsi yu.

Maa tyin yaha can jandihí nyívi tsa jacahnú ñi tsi yu.

Maa tyin cua quitsi nyico yu inga tsaha tan cua cañihi yu vehe ñuhu ra David.

Tyin cua jacahnu nyico nyívi tsi yu.

<sup>17</sup> Tyin tacan tan cuví nanducu tandihí inga ca nyívi tsi yu,

tandihí ñi tsa ñavin nyívi Israel cuví tan tsinú iñi tsi yu.

<sup>18</sup> Tacan catyí Jutu Mañi yo, tan jacuahá ra tuhun ihya tsi nyívi tsicoo tahañ tsanaha tan tsihin nyívi tsa iyó vityin.

<sup>19</sup> Yacan cuenda catyí yu tyin ña vaha tsa jatyañu yo tsi nyívi tsa ñavin nyívi Israel cuví, ñi tsa nacoo tuhun tsahnu ñi tan quihví ñi cuenda ra Cristo. Ña vaha catyí yo tyin cuñí tsi tsa tyaa yahvi ñi ley tsahnu yo.

<sup>20</sup> Vaha ñi maa tsihin tsa jacuhun yo carta tsi ñi. Tan catyí yo tsihin ñi tyin ña cua catsi ñi cuñu tsa tsaha cuenda nyívi tsi tsitoho. Tan ña cuví coo rayí tsihin ñaha tun ña tindaha ra. Tan ndi ñiñaha ña cuví coo ñi tsihin rayí tun ña tindaha ñi. Rayí tsa iyó ñasíhi ña cuví coo ra tsihin inga ñaha, tacan tucu ñiñaha tsa iyó yí, ña cuví coo ñi tsihin inga rayí. Tan catyí tucu yo tsihin ñi quihví cuenda ra Cristo tan ñavin nyívi Israel cuví ñi tyin ña cua catsi ñi cuñu quití tsa tsihi tsa cava ñi jucun tatun ña tsatí niñi ti. Tan ña cua catsi ñi niñi quití.

<sup>21</sup> Tyin nda tyembu tsahnu tan nda cuanda vityin iyó maa ra jacuahá ley Nyoo tsa tyaa ra Moisés vehe ñuhu nyívi Israel. Tan jacuahá ra naha tuhun can tan iin tan iin ñuu, tan tahan tahan una quívi, quívi tsa quitatú ñi —catyí ra Jacobo tsihin ra naha.

<sup>22</sup> Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandihí ñi yihí cuenda ra Cristo, nacatsí ñi tsi taahan ra naha. Tan yaha can tan jacuhun ñi tsi ra naha tyin cahun ra naha ñuu Antioquía tsihin ra Pablo tan ra Bernabé. Tan ra tsa natyiso ñi cuví ra: Judas tsa nañi Barsabás, tan ra Silas. Ra ican cuví iin ra tsa nyisó tyiñu vehe ñuhu nda ñuu Jerusalén.

<sup>23</sup> Tan tsihin ra naha jacuhun ñi iin carta. Tan catyí carta can tyehen:

“Nyuhu ra tava tyiñu ra Jesús, tan tsihin ra cuví ityi nuu tsihin ñi vehe ñuhu tan tsihin ra yañi ndo cuenda ra Cristo, tandihí ndi tsahá ndi nacumi tsi nyooho tsa ñavin ra Israel cuví ndo. Tyin yañi ndi cuví tsi ndo vasu ñavin nyívi Israel cuví ndo. Tandihí nyooho tsa iyó ndo ñuu Antioquía, tan nyooho nyívi Siria, tan tsihin nyooho nyívi Cilicia, jaquitsí ndi carta ihya tsi



tandihí ñi ndo.

<sup>24</sup> Tsitó ndi tyin quita taahan ra ityi nu yucú ndi ihya. Tan vatsí ra naha nu yucú ndo. Maa tyin ña catyi nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyi ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaá ra Moisés. Maa tyin ñavin nyuhu cahan tsihin ra naha tyin quitsi cahan ra naha yacan tsihin ndo.

<sup>25</sup> Yacan cuenda ndu iin ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo.

<sup>26</sup> Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñi nyivi cahñi ñi tsi ra naha, maa tyin ña jandihí ra naha tsa jacotó ra naha tuhun Jutu Mañi yo ra Jesucristo.

<sup>27</sup> Yacan cuenda jaquitsí ndi tsi ra Judas tan ra Silas. Tan maa ra naha cua cahan ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaá ndi nu tutu ihya.

<sup>28</sup> Tyin ndi Tatyí Ii Nyoo tan ndi nyuhu ña cuñi ndi tyiso ndi tundoho siqui ndo. Maa tyin ñiñi ca cuñi tsi tsa naquihin vaha ndo tuhun ihya:

<sup>29</sup> Ña cua catsi ndo cuñu tsa tsaha cuenda nyivi tsi tsitoho. Tan ña cua catsi ndo ñiñi quiti, ndi cuñu quiti tsa tsihi tsa cavá ñi jucun tan ña tsati ñiñi ti. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayi. Tatun na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyi ra naha nu carta can.

<sup>30</sup> Tan cuahán ra tsa jacuhun ra naha, tan tsaá ra naha ñuu Antioquía. Tan jandu iin ra naha tsi tandihí nyivi yihí cuenda ra Cristo tan nacuhva cuenda ra naha carta can.

<sup>31</sup> Tsa cahvi ñi carta can, si xaan cuñi ñi tyin vaha xaan caahán tsi.

<sup>32</sup> Tan ra Judas tsihin ra Silas cuví tucu ra naha ndusu yuhu Nyoo. Tan

jandu iin ra naha iñi nyivi can tsihin tsa cahan ra naha.

<sup>33</sup> Tan tsa yaha tsiyucu ra naha juhva quivi tan cuanuhu nyico ra naha nda nu yucú nyivi tsa jacuhun tsi ra naha. Tan tandihí nyivi yihí cuenda ra Cristo ñuu Antioquía can catyi ñi tyin na cuhun vaha ra naha.

<sup>34</sup> Maa tyin ra Silas catyi ra tyin cua ndoo ra.

<sup>35</sup> Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha cahan ra naha tuhun Jutu Mañi yo tsihin nyivi can tan jacuahá ra naha tsi ñi.

*Nu tsinu uvi tsaha cuahán ra Pablo tuhun Nyoo, tan nu quita tsiyo ra nuu ra Bernabé*

<sup>36</sup> Tan tsa yaha juhva quivi, tan cahan ra Pablo tsihin ra Bernabé:

—Cohon inga tsaha cunyehe yo nu yucú nyivi yihí cuenda Jutu Mañi yo ra Cristo tandihí ñuu nu cahan yo tuhun ra, tyin nyehe yo nácaa yucú ñi —catyi ra Pablo tsihin ra.

<sup>37</sup> Tan ra Bernabé cuñi ra tsa cuhun nyico ra Juan Marcos tsihin ra naha.

<sup>38</sup> Maa tyin ra Pablo ña taahán iñi ra tsa cuhun ra Juan tsihin ra naha, tyin nacoó ihñi ra tsi ra naha nda Panfilia quivi tsa tsahan ra tsihin ra naha. Tan ña tsahan ca ra tsijaha tyiñu ra tsihin ra naha.

<sup>39</sup> Tan cahan yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihvi ra naha tsitsi iin yutun ndoo tan cuahán ra naha ñuhu Chipre.

<sup>40</sup> Tan ra Pablo nacatsi ra tsi ra Silas. Tan tsa yaha tsican tahvi ra hermano naha ra tsi Nyoo tsa cuenda ra naha tyin na jatinyee Nyoo tsi ra naha, tacan tan cuahán ra naha.

<sup>41</sup> Tan yaha ra naha ñuu tsa cayucú Siria tan Cilicia, tan jandu iin ra naha iñi nyivi tsa yihí cuenda ra Cristo tan iin tan iin ñuu.

## 16

*Nu cuahán ra Timoteo tsihin ra Pablo tan ra Silas*

<sup>1</sup> Ra Pablo tsihin ra Silas tsaꝯ ra naha ñuu Derbe, tan ñuu Listra. Tan ican nañihi ra naha tsi iin ra yihí cuenda ra Cristo. Nañí ra Timoteo. Tan sihi ra cuví ña iin ñaha Israel. Tan yihí ndihi ña cuenda ra Cristo. Maa tyin jutu ra, ra Grecia cuví ra.

<sup>2</sup> Tan ra Timoteo vaha xaan tsicá ra tuhun Nyoo, catyí nyivi yihí cuenda ra Cristo ñuu Listra tan ñuu Iconio.

<sup>3</sup> Tan ra Pablo cuñí ra tsa cuhun ra Timoteo tsihin ra. Tan tyaa ra naha tuñi Nyoo tsi ra Timoteo jahá ra Pablo. Tyin coto ndasi cuñi nyivi Israel nyehe ñi tsi ra. Tyin tandihi ñi tsitó ñi tyin jutu ra cuví ra ra Grecia.

<sup>4</sup> Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsahá ra tava tyiñu ra Jesús tan tsihin ra cuví ityi nuu tsihin nyivi vehe ñuhu Jerusalén tsi ra naha.

<sup>5</sup> Tacan tan ndu iin iñi nyivi yihí cuenda ra Cristo tan ñihi ca tsinú iñi ñi tsi ra Cristo. Tan iin tan iin quivi tan cuahán nducuahá ca ñi.

*Nu janaha Nyoo iin tsa janaha ra tsi ra Pablo cuenda iin ra Macedonia*

<sup>6</sup> Ña tsahá Tatyí Ii Nyoo tsa cahan ra naha tuhun Nyoo ñuu tsa cayucú Asia. Yacan cuenda yahá sava ra naha ñuhu cuenda Frigia tan Galacia.

<sup>7</sup> Tan tsaꝯ ra naha Misia. Tan cuñí ra naha cuhun ra naha Bitinia, maa tyin Tatyí Ii ra Jesucristo ña tsahá cuhun ra naha.

<sup>8</sup> Tacan tan nda sava ñi yahá ra naha ñuu tsa cayucú Misia tan cuahán ra naha ñuu Troas tsa canyií yuhu ndutya ñuhu.

<sup>9</sup> Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayii tsa iyó iin ñuu tsa canyií Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Ñaha ihya, tyin jatyinyee un tsi ndi” catyí ra.

<sup>10</sup> Tan tsa nyehe ra Pablo can, yuhu ra Lucas tsihin ra Pablo tan inga ra janduvahá ndi tsi ndi tan cuahán ndi nda Macedonia can. Tyin tsitó vaha ndi tyin Nyoo caná ra tsi ndi, tyin

cahan ndi tuhun ra nácaa jacacú ra tsi yo tsihin nyivi ityi can.

*Nu nyii ra Pablo tsihin ra Silas ñuu Filipos*

<sup>11</sup> Quihvi ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyií mahñu ndutya ñuhu. Tan tsa inga quivi tsaꝯ ndi ñuu Neápolis.

<sup>12</sup> Tan ican quee ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa nuu tandihi ñuu tsa cayucú Macedonia. Tan ican tsiyucú ndi taahan quivi.

<sup>13</sup> Iin quivi tsa quitatú nyivi, tan quita ndi ityi tsata ñuu, yatyin iin yutya nu tuhvá nyivi tsicán tahvi tsi Nyoo. Tsinyecú ndi, tacan tan cahan ndi tuhun Nyoo tsihin ñiñaha tsa ndu iin ican.

<sup>14</sup> Iin ñaha nañí ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduuhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñí ña tsa caahán ra Pablo. Tan Nyoo nuña ra añima ña na tyaa yahvi ña tsa caahán ra.

<sup>15</sup> Tan tsicoondutya ña tsihin nyivi ña. Tan yahá can tan cahan ndaahvi ña tsihin ndi, tan catyí ña:

—Tatun nyehe ndo tyin nditsa tsa tsinú iñi yu tsi Jutu Mañi yo, cohon ndo, ndo ndo yuvehe yu —catyí ña tsihin ndi.

Tan jañiñi xaan ña tsi ndi na ndoo ndi yuvehe ña.

<sup>16</sup> Tan cuví iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahan ndi tsi iin ñaha tyuvaa tsa yihí tatyí ña vaha tsi. Yacan cuenda cuví nacoto ña náa ndihi tsa cua cuvi ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña.

<sup>17</sup> Tan ñaha tyuvaa can quitsahá nyicún ña tsi ndi, nyuhu tsihin ra Pablo. Tan caná tsa ña tan catyí ña:

—Rayii ihya ra jahá tyiñu tyiñu Nyoo cahnu, cuví ra naha. Tan

caahán ra naha tuhun nácaa cuví cacu yo —catyí ña.

<sup>18</sup> Cuaha quiví javahá ñaha tyuvaa can tacan. Tacan tan ra Pablo ña cunyeē ca iñi ra, tan nanyico coo ra tan catyí ra tsihin tatyí ña vaha tsa yihí tsi ña:

—Tsihin siví ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyí ña vaha can quita nu tsi ña juvin ñi cuhva can.

<sup>19</sup> Maa tyin tsa nyehe ra cuví tsi-toho ña tyin ña cua cuví ca jaha canaa ra naha xuhun tsihin ña, tiñ ra naha tsi ra Pablo tsihin ra Silas tan tsindaca ra naha tsi ra naha nda vehe tyiñu.

<sup>20</sup> Tan tsican ra naha cuatyí tsaha ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyiví ñuu yo tan jativí ra naha ñuu yo.

<sup>21</sup> Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyiví cuenda ñuu Roma cuví yo —catyí ra naha.

<sup>22</sup> Tacan tan nduxaan nyiví tsi ra Pablo tan ra Silas. Tan ra cumí tyiñu can tsahnyá ra naha jahma ra Pablo naha ra tan tava tyiñu ra cumí tyiñu na cañi ra vitya tsi ra Pablo naha ra tsihin yutun.

<sup>23</sup> Tsa yahá tsa cañi xaan ra naha tsi ra Pablo tan ra Silas, tan tsindaca ra vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha na jaha vaha ra cuenda tsi ra naha.

<sup>24</sup> Quihin ra cua jaha cuenda can tyiñu tan tyihí ra tsi ra naha nda tsitsi cuii vehe caa. Tan tyihí vaha ra tsaha ra naha tyañu vitu.

<sup>25</sup> Yahá can tan maa ñuu ra Pablo tan ra Silas quitsahá tsicán tahví ra naha tsi Nyoo. Tan quitsahá tsitá xaan ra naha cantu Nyoo. Tan ra yucú vehe caa can naha ra tyaá soho ra naha.

<sup>26</sup> Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can

tan nuñá tandihí yuvehe, tan ndatsi cadena tsa yihí tsi tandihí ra tsa yucú vehe caa can naha ra.

<sup>27</sup> Tan tsa ndoto ra tsa jahá cuenda vehe caa can, nyehe ra tyin ticohó tandihí maa yuvehe can. Tacan tan tava ra mityi ra tyin cua cahñi ra tsi ra. Tyin tsica iñi maa ra tyin tandihí ra tsa yucú vehe caa can quita.

<sup>28</sup> Maa tyin ra Pablo caná tsaa ra tsi ra, tan catyí ra:

—Ña cahñi un tsi un, tyin tandihí ndi tan yucú ndi ihya —catyí ra tsihin ra.

<sup>29</sup> Tacan tan ra jahá cuenda vehe caa can tsican ra ñuhu. Tan tsinu ra quihví ra nu yucú ra naha. Tan nihí ra tsihin tsa yuuhví ra. Tan tsicuñi tsi ra nuu ra Pablo tan ra Silas.

<sup>30</sup> Numi xaan tava ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

<sup>31</sup> Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihí nyiví un —catyí ra naha tsihin ra jahá cuenda vehe caa can.

<sup>32</sup> Tan cahan ra naha tuhun Jutu Mañi yo tsihin ra tan tsihin tandihí nyiví tsa yucú yuvehe ra.

<sup>33</sup> Tan juvin ñi maa tsacuaa can ra jahá cuenda vehe caa can nacatya ra nu uhvi nu cañi ra vitya tsi ra naha. Yahá can tan juvin ñi tsacuaa can tsicoondutyá ra tsihin tandihí nyiví ra.

<sup>34</sup> Tacan tan tsindaca ra tsi ra naha nda vehe ra. Tan tsahá ra tsa catsi ra naha. Tan maa ra tsihin nyiví ra sii xaan cuñi ñi tyin tsinú iñi ñi tsi Nyoo. Tacan tan cuanuhu ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

<sup>35</sup> Tsa tuví inga quiví tan tava tyiñu ra cumí tyiñu tsi ra vitya na cunyehe ra naha nu nyii ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas.

<sup>36</sup> Tacan tan ra jahá cuenda vehe caa can catyí ra tsihin ra Pablo:

—Tsaá tyiñu tsi yu jahá ra cumí tyiñu, tsa jaña yu tsi ndo. Yacan cuenda vityin tsa cuví quita ndo —catyí ra tsihin ra naha.

<sup>37</sup> Maa tyin ra Pablo catyí ra:

—Nyuhu tsa cuví ndi ra cuenda ñuu Roma cañi ra naha tsi ndi nu tuvi nyivi. Tan ndi ña tatsi tuñi ra naha tsi ndi tumaa cuhva taahán tsi. Tan tyihí ra naha tsi ndi vehe caa. Tan vityin cuñí ra naha tava xeehe ra naha tsi ndi. Maa tyin ña cuñí ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

<sup>38</sup> Tan ra vitya nacatyí tuhun ra tsihin ra cumí tyiñu naha ra. Tan ra ican naha ra nayuhvi xaan ra naha tsa tsito ra naha tyin ra cuenda ñuu Roma cuví ra Pablo.

<sup>39</sup> Tan tsahan ra cumí tyiñu naha ra tsindacan ra naha tucahnu iñi nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can.

<sup>40</sup> Tan tsa quita ra naha vehe caa can, tsahan ra naha vehe ña Lidia. Tan yaha can tan tsinyehé ra naha tsi ra hermano naha ra tan jandu iin ra naha iñi ra naha tan cuahán ra naha.

## 17

*Nu quitsaha caahán yuhu tahan nyivi ñuu Tesalónica*

<sup>1</sup> Nu cuahán ra Pablo tsihin ra Silas, yaha ra naha ñuu Anfípolis, tan ñuu Apolonia. Yaha can tan tsaá ra naha ñuu Tesalónica nu nyaá iin vehe ñuhu nyivi Israel.

<sup>2</sup> Tan tsahan ra Pablo vehe ñuhu can, tumaa cuhva tuhvá maa ra tsaahán tan iin tan iin ñuu. Tan cahan ra tuhun Nyoo tsihin nyivi tsicá vehe ñuhu can uñi taahan quivi quitatú ñi.

<sup>3</sup> Tan cahvi ra nu libru Nyoo tan tsaha cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cúu ra. Yaha can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuví ra Cristo.

<sup>4</sup> Tan juhva nyivi Israel can tsinu iñi ñi tsa caahán ra. Tan ndu iin ñi tsihin ra naha. Tan cuaha xaan nyivi Grecia tsa tuhvá jacahnú tsi Nyoo tan natsinu ndihi iñi ñi. Tan cuaha ñiñaha cuca tsa iyó ñuu can natsinu ndihi iñi ñi tsa caahán ra tuhun ra Cristo.

<sup>5</sup> Maa tyin ra ñuu Israel tsa ña tsinu iñi, ndasi cuñí ra naha nyehé ra naha tyin cuaha xaan nyivi nyicún tsi ra Pablo. Tan jandu iin ra naha tsi taahan ra caquiñi tsa tsicá nuu jutsan ñi maa. Tan quitsaha caahán yuhu tahan nyivi ñuu can jahá ra naha. Tan quihvi ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñí ra naha tsa quita ra Pablo naha ra. Tyin ra caquiñi can cuñí ra naha nacuhva cuenda ra naha tsi ra Pablo naha ra tsi nyivi.

<sup>6</sup> Maa tyin tsa ña nañihí ra naha tsi ra Pablo tan ra Silas ican, quihin ra naha tsi ra Jasón. Tan ixta caa ra naha tsi ra. Tan quihin ndihi ra naha tsi taahan ca ra hermano tan cuahán ra naha nuu ra cumí tyiñu ñuu can. Tan cana tsa ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandihi nyivi nani cahnu ñuhu ñayivi. Tan vityin tsaá ndihi tucu ra naha ihya.

<sup>7</sup> Tan ra Jasón can tsaha ra yuvehe ra na cuyucu ra naha. Tan tandihi maa ra naha tan ña tyaá yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañí Jesús —catyí ra naha.

<sup>8</sup> Tsa tsiñi nyivi tan ra cumí tyiñu tsa caahán ra caquiñi can naha ra quitsaha caahán yuhu tahan ñi.

<sup>9</sup> Maa tyin ra Jasón tan inga ra naha tsaha ra naha xuhun tan jaña ra cumí tyiñu tsi ra naha.

*Nu cuahán ra Pablo tsihin ra Silas ñuu Berea*

<sup>10</sup> Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaá ra



naha, tsahan ra naha vehe ñuhu nyivi Israel.

<sup>11</sup> Tan nyivi Israel tsa iyó ñuu Berea can vaha ca nyivi cuví ñi tan ñavin ca nyivi ñuu Tesalónica tyin tsihin tsa ñi ñi ñi tan naquihin ñi tuhun Nyoo. Tan tandihí quivi nanducú ñi nuu tutu Nyoo, nyehé ñi tatun nditsa tsa caahán ra Pablo.

<sup>12</sup> Yacan cuenda cuaha xaan ñi natsinu ñi ñi tsi ra Cristo tsihin tucu nyivi Grecia tahan ñi ñiñaha cuca tan rayi naha ra.

<sup>13</sup> Maa tyin tsa tsito ra Israel tsa iyó ñuu Tesalónica tyin ra Pablo nyii ra Berea caahán ra tuhun Nyoo, tan cuahán ra naha tan natyuhu ra naha tsi nyivi Berea can.

<sup>14</sup> Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoo ra naha ñuu Berea.

<sup>15</sup> Tan ra tsa cuahán tsihin ra Pablo tsindaca ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahan ra Pablo tsihin ra naha, tyin na janumi ra naha tan cahun ra naha nu nyii ra.

#### *Nu nyii ra Pablo ñuu Atenas*

<sup>16</sup> Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima ra tsa nyehé ra tyin cuaha xaan tsitoho iyó ñuu can.

<sup>17</sup> Yacan cuenda cahan ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihí quivi caahán ra tsihin nyivi tsa cuahán nuyahvi.

<sup>18</sup> Tan ñihí tahan ra tsihin nyivi tsa cahví tuhun tsa jacuahá nyivi tsa nañi epicúreo. Tan ñihí tahan tucu ra tsihin nyivi tsa cahví tuhun tsa jacuahá nyivi tsa nañi estoico. Tan cahan ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahan ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi tatun cua cúu ñi.

<sup>19</sup> Tacan tan tsindaca ra naha tsi ra Pablo iin nu nañi Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñi ndi coto ndi tuhun tsa tsa jacuahá un.

<sup>20</sup> Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihí tuhun ihya —catyí ra naha tsihin ra.

<sup>21</sup> Tyin tandihí nyivi Atenas tan nyivi inga ñuu tsa iyó ican taahán xaan ñi ñi tyaa soho ñi tan nacatyí tuhun ñi náa ndihí tuhun tsa.

<sup>22</sup> Tacan tan ra Pablo nduvita nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo.

<sup>23</sup> Tyin tsahan yu tsinyehe yu nu tuhvá ndo ndu iin. Tan nyehe yu iin altar nu nyaá letra tsa catyí tye-hen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvín Nyoo can cuví tsa caahán yu tuhun tsihin ndo.

<sup>24</sup> Nyoo tsa javaha ñuhu ñayivi tan tandihí tsa iyó nu ñuhu ñayivi ihya, tsii maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi.

<sup>25</sup> Tan ña nyitá ñi ra tsa jatyinyeé nyivi tsi ra. Tyin maa ra tsaha ñayivi coo tandihí yo. Tan tsahá ra tatyí tsa ixtá tatyí yo. Tan maa ra tsahá tandihí tsa tsiñi ñuhu tsi yo.

<sup>26</sup> Javaha Nyoo tsi intuhun rayi. Tan tsa yaha can tsicoo cuaha nyivi tata ra. Tan maa ra naha cuví tsii tsahnu tandihí yo. Yacan cuenda intuhun ñi ñiñi nyisó tandihí yo. Tan tsaha Nyoo tsa coo yo nani cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan

catyí tucu ra maa nda cua coo intuhun intuhun yo.

<sup>27</sup> Tacan javahá ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihi yo tsi ra tyaa ra cuhva. Vasu ndi maa ña cañi nyaá ra tsihin intuhun intuhun yo.

<sup>28</sup> Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra.

<sup>29</sup> Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinu tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsinu tsihin tsa tsiñituñi iñi nyivi cuví ra.

<sup>30</sup> Tahán tsanaha Nyoo ña cuxaan ra tsi nyivi tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyivi tandihí ñi ityi tyin na ndu uvi iñi ñi cuatyí ñi tan na nasama ñi cuhva iyó ñi.

<sup>31</sup> Tyin tsa tyaa ra cuhva tyin cua coo iin quivi tsa cua tatsi tuñi ra tsi nyivi iyó nu ñuhu ñayivi. Tan tsa cua tsaa quivi can, ra tsa nacatsi vaha maa ra cua tatsi tuñi tsi ñi jaha ra. Tan tsa janahá ra tsi yo tyin nditsa tsa ra ihya cua tatsi tuñi tsi nyivi, tyin janandoto ra tsi ra can nu tsihi ra —catyí ra Pablo.

<sup>32</sup> Tsa tsiñi nyivi tuhun tsa nandoto nyivi tsa tsihi, yihí ñi tsacú nducu ñi, tan yihí tucu nyivi catyí ñi:

—Quitsi un inga tsaha tan cahan un tuhun ihya tsihin ndi —catyí ñi.

<sup>33</sup> Tacan tan cuahán ra Pablo.

<sup>34</sup> Maa tyin yihí ñi ndu iin ñi tsihin ra, tan natsinu iñi ñi tsi ra Cristo. Tan iin ra tsa natsinu iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinu ndihí tucu iñi ña, tan tsihin inga ca ñi.

## 18

*Nu nyii ra Pablo ñuu Corinto*

<sup>1</sup> Yaha can tan quitá ra Pablo ñuu Atenas tan cuahán ra ñuu Corinto.

<sup>2</sup> Tan ican nañihi ra tsi iin ra Israel tsa nañi Aquila. Tan ñuu Ponto cacu ra. Tan maa ra tsihin ñasihi ra, ña Priscila, quitá ñi Italia nu tsicoo ñi, tyin ra Claudio, ra cuví rey cahnu ñuhu can, tava ra tsi tandihí nyivi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto.

<sup>3</sup> Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi.

<sup>4</sup> Tan quivi quitatú nyivi Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyivi Israel tan tsihin nyivi tsa ñavin nyivi Israel cuví. Tyin nducú ra cuhva tsa tsinu iñi ñi tsi ra Jesucristo.

<sup>5</sup> Tan quivi tsaa ra Silas tan ra Timoteo tsa quee ra naha Macedonia, ra Pablo nacoo ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyivi Israel tyin ra Cristo, tsa ndatú xaan ñi, juvin ra cuví ra Jesús.

<sup>6</sup> Maa tyin ñi ican xaan cuñi ñi. Tan quitsaha caahán ñi ndavaha ñi siqui Jutu Mañi yo. Tacan tan ra Pablo naquisi ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsiñu iñi. Vityin tan ityi nuu ca cua cuhun yu cahan yu tuhun ihya tsihin nyivi tsa ñavin nyivi Israel cuví —catyí ra tsihin ñi.

<sup>7</sup> Tan quitá ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra.

<sup>8</sup> Tan iin ra tsa nañi Crispo, ra cuví ityi nu vehe ñuhu can, natsinu iñi ra tsi Jutu Mañi yo tan tacan tucu tandihí nyivi ra. Tan cuaha ca nyivi iyó ñuu Corinto can, tsa yaha tsa tsiñi ñi tsa caahán ra Pablo, natsinu iñi ñi tsi ra Jesús, tan tsicoondutyá ñi.

<sup>9</sup> Tacan tan iin tsacuaa nyehe ra Pablo iin tsa janaha Nyoo tsi ra. Tan cahan Jutu Mañi yo tsihin ra, tan catyí ra:

—Ña nayuhvi un. Jañihi ca cahan un tuhun yu tan ña jandihí un tsa cahan un.

<sup>10</sup> Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

<sup>11</sup> Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyivi.

<sup>12</sup> Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsican ra naha cuatyí tsaha ra nuu ra Galión.

<sup>13</sup> Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

<sup>14</sup> Tacan tan cuhva tsa cua nacahan ra Pablo, tan nacahan ñi ra Galión, tan catyí ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnu o cuatyí ndiyí cuví.

<sup>15</sup> Maa tyin maa ñi maa tuhun caahan cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñi yu cuví yu juez tsa cuenda tuhun ihya —catyí ra Galión can tsihin ra naha.

<sup>16</sup> Tan tava ra tsi ra Israel naha ra nu cuví vehe tyiñu ra.

<sup>17</sup> Tacan tan tandihí ra Grecia tijn ra naha tsi ra Sóstenes, ra cuví ityi nu vehe ñuhu nyivi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ña cahan maa ra.

*Nu cuanuhú ra Pablo ñuu Antioquía tan cuahán ra tsa tsinu uñi tsaha cuahan ra tuhun Nyoo*

<sup>18</sup> Tan ra Pablo ndoo ra ñuu Corinto can cuaha quivi. Yahá can tan catyí

ra tsihin ra hermano naha ra tyin tsa cua cuhun ra. Tan cuahán ra Aquila tan ña Priscila tsihin ra. Tacan tan tsaá ñi ñuu Cencrea. Tan ra Pablo xatya ndi ra jiñi ra tumaa iin seña tyin tsa yahá javaha ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria.

<sup>19</sup> Tan tsa tsaá yutun ndoo can nda ñuu Éfeso, quita ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahan ra tsihin nyivi tsa ndu iin ican.

<sup>20</sup> Tan cahan ndaahvi ñi tsihin ra tyin na ndoo ra taahan ca quivi tsihin ñi. Maa tyin ña cuñi ra.

<sup>21</sup> Tan catyí ra tsihin ñi tyin tsa cuahán ra, tan catyí tucu ra tyehen:

—Cuñi tsi tsa cuhun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñi, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihvi ra tsitsi iin yutun ndoo tsa cuahán nda Siria.

<sup>22</sup> Quivi tsa tsaá nyico ra ñuu Cesarea cuenda Siria, tsahan ra ñuu Jerusalén tsicuhva ra nacumi tsi nyivi yihí cuenda ra Cristo tsa iyó ican. Yahá can tan cuahán nyico ra ñuu Antioquía.

<sup>23</sup> Tan tsa yahá tsinyij ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihí nyivi yihí cuenda ra Cristo.

*Nu caahán ra Apolos tuhun Nyoo ñuu Éfeso*

<sup>24</sup> Quivi can tsaá iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahan ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru.

<sup>25</sup> Tan vaha xaan cutuhva ra tuhun Jutu Mañi yo. Tan caahan ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyá ra Juan ñi tsitó ra.

26 Tan quitsaha caahán ra tsitsi vehe ñuhu tsihin tsa ñi ñi ra. Tan cuhva tsa tsiñi ra Aquila tan ña Priscila, tava sñin ñi tsi ra tan tsaha cuenda vaha ca ñi tuhun Nyoo tsi ra.

27 Tacan tan quitsaha cuñi ra Apolos cuhun ra ityi Acaya. Tan ra hermano jatinyee ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsa ra. Tacan tan cuahán ra. Tan cuhva tsa tsaá ra Acaya can, jatinyee xaan ra tsi nyivi yihí cuenda ra Cristo, ñi tsa natsinu ñi tsa cuenda tumañi ñi tsa javaha Nyoo tsi ñi.

28 Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinú ñi nyivi Israel, ña nditsa. Tan jacuaha ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

## 19

### *Nu cuahán nyico ra Pablo ñuu Éfeso*

1 Tsitsi tsa nyii ra Apolos ñuu Corinto, ra Pablo yaha ra ityi yucu tan tsaá ra nda ñuu Éfeso. Tan ican nañihí ra tsi taahan ra yihí cuenda ra Cristo.

2 Tan tsica tuhun ra tsi ra naha:

—¿A naquihin ndo Tatyí li Nyoo quivi tsa natsinu ñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí li Nyoo.

3 Tacan tan ra Pablo tsica tuhun ra tsi ra naha:

—¿Nacaa tsicoondutyá ndo? —catyí ra.

Tan nacahan ra naha tan catyí ra naha:

—Cuhva tsa jacoondutyá ra Juan, tacan tsicoondutyá ndi —catyí ra naha.

4 Tacan tan catyí ra Pablo tsihin ra naha:

—Ra Juan jacoondutyá ra tsi nyivi tsa ndu uvi ñi cuatyí. Maa tyin catyí

tucu ra tsihin ñi tyin cuñi tsi tsa tsinu ñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

5 Tsa tsiñi ra naha tsa cahan ra Pablo tuhun ihya, tacan tan tsicoondutyá ra naha inga tsaha tsihin sivi Jutu Mañi yo Jesús.

6 Tan tsa tyiso ndaha ra Pablo jiñi ra naha, tacan tan naquihin ra naha Tatyí li Nyoo. Tan quitsaha caahán ra naha inga yuhu. Tan tsahá cuenda ra naha tuhun tsa tsaha Tatyí li Nyoo tsi ra naha tsi nyivi.

7 Tan tsa tandihí ra naha quita maa utsi uvi taahan ra naha.

8 Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi ñi ra. Tan jacuaha ra tsi ñi na nacuhva ñi tsi ñi tsi Nyoo na cundaca ñaha ra tsi ñi.

9 Maa tyin yihí ñi jandava ñi aña ñi, tan ña cuñi ñi tsinu ñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyó nyaha ra nu yucú ñi. Tan tsindaca ra tsi ñi tsinú ñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyivi tandihí quivi.

10 Tan tacan ñi tsicá ra tsitsi tsa uvi cuiya. Tan tandihí nyivi tsa iyó ñuu tsa cayucú Asia, tsiñi ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví.

11 Tan nahnu tsa iyo javaha ra Pablo jaha Nyoo.

12 Tyin nda cuanda jahma tsa tñn ra Pablo tan tsindacá ñi tsi nyivi tan quitá cuehe tsi ñi, tan quitá ndihí tucu tatyí ña vaha tsi ñi.

13 Tan iyó juhva ra Israel tsa tsicá nuu tan iin tan iin ñuu tava ra naha tatyí ña vaha tsi nyivi. Tan cuñi ra naha cuatyí ñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.



14 Tacan javahā tsa utsa taahan sehe iin ra Israel tsa nañi Esceva. Tan ra Esceva can cuví ra iin ra cuví ityi nuu tsihin ra jutu.

15 Tan tsa cahān ra can naha ra tsihin nu tatyí ña vaha, nacahān nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan ¿yóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

16 Tacan tan ra tsa yihí tatyí ña vaha can ndava ra siqui ra can naha ra. Tan tsihin tsa cuaha tunyee iñi nu tatyí ña vaha can tan cuví cunyeē ra tñn tahan ra tsihin tandihí ra can naha ra. Tan tsahnya cuatyí ra jahma ra naha. Tan jañicueehe ra tsi ra naha. Tan jacuhun tandi ra tsi ra naha jaha nu tatyí can.

17 Tacan tan tandihí nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsito ñi tuhun can. Tan yuuhví xaan ñi cuví. Tan jacahnú ñi sivi Jutu Mañi yo Jesús.

18 Tan cuaha xaan nyivi tsa natsinu iñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihí maa tsa ña vaha tsa icā ñi tahan tsanaha.

19 Tan cuaha ñi tsa cahví tuhun tasi, tsindaca ñi libru ñi. Tan tsahmí ñi libru can nuu tandihí nyivi. Tan tava cuenda ñi nácaa yahvi libru can. Tan yahvi tsa tandihí libru can quita tsi uvi xico utsi mil xuhun cuitsin.

20 Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee iñi iyó tsi ra.

21 Tan tsa yahā tuhun ihya, ra Pablo tyaa ra cuhva tsa cuhun ra ñuu tsa cayucú Macedonia tan Acaya. Yahā can tan cua cunuhu ra nda ñuu Jerusalén, tyaá ra cuhva. Tan catyí ra tyin yahā can tan cuñi tsi tsa cuhun ra nda ñuu Roma.

22 Tacan tan jacuhun ra tsi uvi taahan ra jatyinyeé tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quivi Asia can.

### *Nu quitsahā cuvaá nyivi Éfeso*

23 Tan juvin ñi quivi can quitsahā cuvaá nyivi ñuu Éfeso tsa cuenda tuhun Nyoo,

24 tyin iin ra tsa nañi Demetrio natyuhū ra tsi ñi. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsi-toho Diana tsihin xuhun cuitsin can. Tan cuaha xuhun jahá canaa ra tan tsihin ra jatyinyeé tsi ra.

25 Tan canā ra Demetrio can tsi ra tsa jahá tyiñu tsihin ra. Tan canā tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo.

26 Maa tyin nyooho nyehé ndo tan tsiñi ndo nácaa javahá nu Pablo can ñuu yo ihya, tan tandihí ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu.

27 Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihí nyivi ñi cahnu Asia tsihin nyivi naní cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

28 Tan cuhva tsa tsiñi ra naha tsa cahān ra, xaan xaan cuñi ra naha. Tan quitsahā caná tsaa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

29 Tan cuvaā tandihí nyivi ñuu can. Tan tñn ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihí ñi can ixtā caa ñi tsi ra naha nda cuanda nu tuhvá ñi ndu iin.

30 Tan ra Pablo cuñi ra quihvi ra nu yucú ñi tyin cahan ra tsihin ñi. Maa

tyin ra hermano ña tsaha ra naha tsa cuhun ra.

<sup>31</sup> Tan tacan tucu taahan ra cumi tyiñu cuenda Asia. Ra vaha iñi tsi ra Pablo cuvi ra naha, tan tava tyiñu ra naha tsi ra tyin ña taahan tsi tyihi ra tsi ra ican.

<sup>32</sup> Tan nu ndu iin nyivi ican, juhva ñi cana tsa iin tuhun, tan inga ñi cana tsa inga tuhun, tyin cuva ñi. Tan cuaha xaan ñi ndi ña tsito ñi nacuenta yucu ñi ican.

<sup>33</sup> Tacan tan nyivi Israel tava tyiñu ñi tsi iin ra tsa nañi Alejandro na yaha ra ityi nuu. Tan juhva ñi tsa yucu ican, tsaha cuenda ñi tsi ra naca cua cahan ra. Tacan tan javaha ra seña tsihin ndaha ra tyin na cutaxin ñi tyin cuñi ra cahan ra tyin nduve cuaty nyivi Israel.

<sup>34</sup> Maa tyin cuhva tsa tsito nyivi tyin ra Israel cuvi ra, tandihi maa ñi cana tsa ñi. Tan tsitsi tsa uvi hora cana tsa ñi, tan catyi ñi:

—Cahnu xaan cuvi ña Diana, tsa cuvi ña nyoo cuenda yo tsa cuvi yo nyivi Éfeso —catyi ñi, cana tsa ñi.

<sup>35</sup> Tacan tan ra secretario ñuu can cuvi jacutaxin ra nyivi, tan caahan ra tsihin ñi, tan catyi ra:

—Nyooho nyivi ñuu Éfeso ihya, tandihi nyivi tsito ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuvi ña. Tan jahá cuenda yo tsitoho ña tsa quee andivi tan nacava nu ñuhu ihya.

<sup>36</sup> Tan yoñi cuvi catyi tyin ña nditsa. Taxin ñi ndo, tan ña ica ndo tatun ña tsito ndo na tsa cua javaha ndo.

<sup>37</sup> Tyin ra tsa tsindaca ndo ihya nduve na tsa suhu ra naha vehe ñuhu yo. Tan ndi ña caahan ra naha ndavaha ñi siqui nyoo yo.

<sup>38</sup> Tatun ra Demetrio tan ra tsa jahá tyiñu tsihin ra, tsican ra naha cuaty tsaha iin ra, na cuhun ra naha nu nyaá ra juez. Cuví ndacan ra naha cuaty nuu ra can, tan maa ra cuvi jandaa ra cuaty can.

<sup>39</sup> Tan tatun inga tuhun tsican ndo, cuñi tsi tsa ndaca ndo can tsi ra cumi tyiñu, tumaa cuhva catyi ley.

<sup>40</sup> Tyin tatun coto ra ndaca ñaha tan cana ra tsi yo tsa cuenda tsa cuvi ihya, tan ña cua ñihi yo tuhun cahan yo tatun ndaca tuhun ra tsi yo nacuenta cuvaá yo —catyi ra cuvi secretario can.

<sup>41</sup> Tan tsa yaha cahan ra, tacan tan catyi ra tyin na cunuhu ñi nda yuvehe ñi.

## 20

*Nu yaha ra Pablo Macedonia tan cuahan nyico ra nda Grecia*

<sup>1</sup> Tsa yaha tsa cuva nyivi ñuu Éfeso can, cana ra Pablo tsi tandihi nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee iñi tsi ñi, tyin tsa tsa qui vi tsa cua cuhun ra inga ñuu. Tan cahan ra tsihin ñi. Tacan tan cuahan ra Macedonia.

<sup>2</sup> Tan tsahan ra tandihi ityi can tan tsihin tuhun caahan ra jandu iin ra iñi tandihi nyivi yihí cuenda ra Cristo tsa iyó ityi can. Tacan tan tsa ra ityi Grecia.

<sup>3</sup> Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducu nyivi Israel tsi ra tyin cua cahñi ñi tsi ra. Yacan cuenda tyaá iñi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia.

<sup>4</sup> Tan cuahan ra Sópater, ra ñuu Berea tsihin ra. Tan cuahan ndihi ra Aristarco tan ra Segundo. Tan uvi taahan ra ihya, Tesalónica cuvi ñuu ra. Tan cuahan ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo.

<sup>5</sup> Ra hermano ihya yaha ra naha ityi nuu tan ndatú ra naha tsi ndi nda ñuu Troas.

<sup>6</sup> Tan nyuhu ndatu ndi nda tsa yaha vico pascua nu tuhva nyivi Israel tsatsi paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun qui vi tan titahan ndi tsihin ra tsa cuahan ityi nuu nda ñuu Troas naha ra. Tan ican ndoo ndi utsa qui vi.

*Nu caahán ra Pablo tuhun Nyoo ñuu Troas*

<sup>7</sup> Tan tsa cuví tumingu can ndu iin ndi tsihin nyívi yíhí cuenda ra Cristo ñuu Troas can. Tan quívi can cua catsi ndi paan tan coho ndi vinu tyin nducuhun iñi ndi tyin tsihi ra Cristo tsa cuenda cuatyí yo. Tan ra Pablo caahán ra tsihin ñi, tan tahan ñuu, tyin tsa nyaá tsa cuhun ndi inga quívi can.

<sup>8</sup> Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú.

<sup>9</sup> Tan iin ra tyuvaa tsa nañi Eutico nyaá ra ventana tyaá soho ra, maa tyin ña cunyeé iñi ra ñumaahna, tyin ra Pablo, naha xaan caahán ra. Quixí ra Eutico, tan ña tsito ra canacava ra. Queé ra nda nu tsinu uñi pisu tan canacava ra nda nu ñuhu. Tan cañihi ra hermano naha ra tsi ra, maa tyin tsa tsihi ra.

<sup>10</sup> Tacan tan ra Pablo nuu ra tan tsaá ra nu canyii ra tyuvaa can. Tan tyihí jucun ndaha ra tsi ra tyuvaa can, tan catyí ra tsihin tandihi ra hermano naha ra:

—Ña nayuhvi ndo, tyin ra ihya nyito ra —catyí ra.

<sup>11</sup> Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahán ca maa ra tuhun Nyoo nda cuanda cunditsin. Tsahan cuahán ra.

<sup>12</sup> Tan ra tyuvaa can nandoto ra tan cuanuhu ra nda yuvehe ra. Tan sii xaan cuñi ñi cuví.

*Nu quitá ra Pablo ñuu Troas tan cuahán ra nda ñuu Mileto*

<sup>13</sup> Nyuhu yaha ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihi tahan ndi tsihin ra Pablo, tyin tacan jandaa maa ndi tyiñu tsihin ra, tyin maa ra cuñi ra cuhun ra ityi nu ñuhu tsihin tsaha ra.

<sup>14</sup> Tan tsa ñihi tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene.

<sup>15</sup> Tsa quitá ndi ñuu can tacan tan yaha ndi ityi nuu iin ñuhu luhlu tsa nañi Quío, canyii tsi mahñu ndutya ñuhu. Tan tsa inga quívi can tsaá ndi inga ñuhu luhlu tsa nañi Samos. Yaha ndi ican tan tsaá ndi ñuu Trogilio nu quitatu ndi. Tan tsa inga quívi tsaá ndi nda ñuu Mileto.

<sup>16</sup> Tacan cuví tyin ra Pablo ña cuñi ra tsa cunyii naha ra ityi Asia. Tan ña cuñi ra cuhun ra ñuu Éfeso tyin numi ñi cuñi ra tsaá ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

*Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra*

<sup>17</sup> Tan tsa yucú ndi ñuu Mileto, cana ra Pablo tsi ra cuví ityi nuu tsihin nyívi yíhí cuenda Nyoo ñuu Éfeso.

<sup>18</sup> Tan tsa tsaá ra naha, tan caahán ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quívi jihna ñi tsa tsaá nuu yu Asia ihya.

<sup>19</sup> Tandihí quívi tsa tsinyii yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundoho tan tucuihaya iñi nyehe yu. Tan cuaha tundoho quitsi siqui yu jaha nyívi Israel.

<sup>20</sup> Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiñi ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iin ndo tan nda yuvehe ndo.

<sup>21</sup> Tan jacuahá yu tuhun ihya tsi nyívi Israel tan tsi nyívi tsa ñavin nyívi Israel cuví, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo.

<sup>22</sup> Tan vityin cua cuhun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu ndacan.

<sup>23</sup> Maa tyin intuhun ñi tsa tsitó yu tyin tandihí ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu.

24 Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa sii cuñi yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuaha yu tuhun vaha nácaa cuñi maa Nyoo tsi yo.

25 Tan vityin tsitó vaha yu tyin tandihi nyooho tsa cahan yu tuhun Nyoo tsihin ndo, ña cua nyehe ca ndo tsi yu.

26 Yacan cuenda cuñi yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo.

27 Tyin ñiñi cuñi yu tan cahan yu tandihi tuhun Nyoo tsihin ndo tan nduve náa tsa tyihí xeehe yu.

28 Yacan cuenda jaha cuenda ndo tsi ndo. Tan jaha cuenda ndihi ndo tsi tandihi nyivi yihí cuenda Nyoo. Tyin maa Tatyí Ii Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jata ra tsi ñi tsihin ñiñi ra.

29 Tan tsitó yu tyin quivi cuhun yu, cua quitsi inga ra naha. Tan cua cuñi ra naha jativi ra naha tsi nyivi yihí cuenda Jutu Mañi yo. Tumaa lobo xaan tsa tsahñi tsi mbee, tacan cua quitsi ra can naha ra.

30 Tan juvin ñi nu yucú ndo, cua nduvita taahan ra. Tan cua jacuaha ra naha tsi ndo tuhun tsa ña nditsa tyin cunyicun ndo tsi ra naha.

31 Yacan cuenda jaha vaha ndo cuenda. Nducuhun iñi ndo tyin tsitsi tsa uñi cuiya ña jandihí yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñi yu, coto nacoo ihñi ndo tuhun Nyoo.

32 Tan vityin nyooho yañi, tyaá yu tsi ndo ndaha Nyoo. Naquihin vaha ndo tandihi tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivi vaha tsihin tandihi inga nyivi tsa nacuhva cuenda tsi ñi tsi ra.

33 Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo.

34 Nyooho tsitó vaha ndo tyin jaha tyiñu xaan yu tsihin ndaha yu tan ñihí yu tsa tsiñi ñuhu tsi yu tsihin ra tsicá tsihin yu naha ra.

35 Tacan ñi janahá yu tsi ndo tyin cuñi tsi tsa jaha tyiñu ndo tan jatyinyee ndo tsi nyivi iyó náa tsa tsiñi ñuhu tsi ñi. Tan nducuhun iñi ndo tsa caahán Jutu Mañi yo Jesús, nu catyí ra tyehen: “Sii ca cuñi nyivi tsa tsahá, tan ñavin ca nyivi tsa ñihí ndaahvi” catyí Jutu Mañi yo.

36 Tsa yaha tsa cahan ra Pablo tuhun ihya, tsicuiñi tsiti ra. Tan tsican tahvi ra tsihin tandihi ra naha.

37 Tan tandihi ra naha nducuihya xaan iñi ra naha tan tsacu xaan ra naha. Tan tsinumí nyaa ra naha tsi ra.

38 Tyin ra Pablo catyí ra tyin cua cuhun ra inga ñuu tan ña cua cuhun ca ra nu yucú ra naha. Tacan tan tsindaca ra naha tsi ra nda nu quihvi ra tsitsi yutun ndoo.

## 21

### *Nu cuahán ra Pablo ñuu Jerusalén*

1 Tacan tan nacoo ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyií mahñu ndutya ñuhu. Tan tsa inga quivi tsaá ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara.

2 Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi.

3 Tan ityi nu cuahán ndi, nyehe ndi nu canyií ñuhu Chipre ityi ndaha satyin yo. Tan yaha ñi ndi cuahán ndi ityi nu ca, nda ityi Siria. Tan tsaá ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can.

4 Tan tsa nañihí ndi tsi nyivi yihí cuenda Nyoo ñuu can, ndoo ndi tsihin ñi utsa quivi. Tan catyí ñi tsihin ra Pablo tyin ña taahán tsi tsa cuhun ra



ñuu Jerusalén tyin tacan cahan Tatyí li Nyoo tsihin ñi.

<sup>5</sup> Maa tyin tsa quita utsa quivi can, quita ndi ñuu can. Tan nu cua quita ndi tandihi ra hermano naha ra tsihin ñasihi ra naha tan tsihin sehe ra naha tsindaca ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñi tsiti ndi, tan tsican tahvi ndi tsi Nyoo.

<sup>6</sup> Tacan tan tsinumí nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhu ra naha yuvehe ra naha.

<sup>7</sup> Tan tsa quee ndi ñuu Tiro, cuahan ndi nda ñuu Tolemaida. Tan ican tsaha ndi nacumi tsi nyivi yihí cuenda ra Cristo. Tan ndoo ndi tsihin ñi iin quivi.

<sup>8</sup> Tan tsa inga quivi quita ndi cuahan ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyivi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra.

<sup>9</sup> Ra Felipe, iyó cumi taahan ñi cunyi sehe ra tsa ñaha ca tandaha. Tan ndusu yuhu Nyoo cuví ñi.

<sup>10</sup> Tan tsa cuaha ñi quivi tsa yucú ndi ican, tan tsa iin ndusu yuhu nyoo tsa quee nda Judea. Nañi ra Agabo.

<sup>11</sup> Quitsi nyehe ra nu yucú ndi. Tan quihin ra cinturón ra Pablo, tsahñi ra tsaha ra tan ndaha ra, tan catyí ra:

—Tatyí li Nyoo catyí tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyivi Israel tsi ra tsi ra inga ñuu naha ra —catyí ra Agabo.

<sup>12</sup> Tsa tsiñi ndi tsa caahan ra, nyuhu tan ra ñuu Cesarea naha ra caahan ndaahvi ndi tsihin ra Pablo na ña cun ra ñuu Jerusalén.

<sup>13</sup> Maa tyin ra Pablo catyí ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cun yu tyiñu tsa cuenda Jutu Mañi yo Jesús —catyí ra tsihin ndi.

<sup>14</sup> Tan tsa nyehe ndi tyin ña cuvi tsa jaha ndi tsi ra, jaña ndi. Tan catyí ndi: —Na cuvi maa cuhva cuñi Jutu Mañi yo.

<sup>15</sup> Tsa yaha yacan na ica vaha ndi tsi ndi tan cuahan ndi nda ñuu Jerusalén.

<sup>16</sup> Tan cuahan taahan ra ñuu Cesarea ra yihí cuenda ra Cristo, tsihin ndi. Tan cuahan tucu iin ra ñuhu Chipre. Nañi ra Mnasón. Cuaha xaan cuiya tsinú iñi ra tsi ra Cristo. Tan tsindaca ra tsi ndi yuvehe ra tsa iyó ñuu Jerusalén tyin cuyucu ndi.

*Nu cua nyehe ra Pablo nu nyií ra Jacobo*

<sup>17</sup> Tsa tsa ndi ñuu Jerusalén, nyivi yihí cuenda ra Cristo sñi xaan cuñi ñi caahan ñi tsihin ndi.

<sup>18</sup> Tan inga quivi can cuahan ndi tsihin ra Pablo cua nyehe ndi nu nyií ra Jacobo. Tan ican yucú tucu tandihi ra cuví ityi nu tsihin nyivi vehe ñuhu.

<sup>19</sup> Tsaha ra Pablo nacumi tsi ra naha. Yaha can tan nacunyi tuhun ra tandihi nácaa tsatyñu Nyoo tsi ra nu cahan ra tuhun Nyoo tsihin nyivi tsa ñavin nyivi Israel cuví.

<sup>20</sup> Tsa tsiñi ra naha tuhun ihya, jachnu ra naha tsi Nyoo, tan catyí ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihi ñi catyí ñi tyin taahan tsi tsa javaha yo cuhva catyí ley tsa tyaa ra Moisés.

<sup>21</sup> Tan ñihí tuhun ñi tyin yooho jacuahá un tsi tandihi nyivi Israel tsa iyó inga ñuu tyin na ña cuita ca iñi ñi ley tsa jacuaha ra Moisés, tan catyí tucu un tsihin ñi tyin ña cuñi ca tsi tsa cunyaa tuñi Nyoo tsi sehe yñi, tan ndi ña cua javaha ca ñi tuhun tsahnu cuhva tsa iyó maa yo taahan tsanaha.

<sup>22</sup> ¿Nacaa javaha yo vityin? Tyin nyivi cua ñihi tuhun ñi tyin tsa un ihya.

<sup>23</sup> Vaha taxin ca tsa javaha un tsa cua cahan ndi tsihin un. Ihya iyó cumi taahan rayñi tsa nyaá javaha tsa catyí ra tsihin Nyoo tyin cua javaha ra naha.

<sup>24</sup> Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndi ra naha jiñi ra naha cuhva catyí ley. Tan tsa javaha un tacan, tan coto tandihí nyívi tyin ña nditsa tsa caahán ñi siquí un, tyin cua nyehe ñi tyin ña nacoó un ley tsa tyaa ra Moisés.

<sup>25</sup> Tan tsa cuenda nyívi tsa ñavin nyívi Israel cuví, tan tsinú iñi ñi tsi ra Cristo, tsa jacuhun ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañi nyívi tsi tsitoho. Ndi ña cua catsi ñi niñi quití, tan ndi cuñu quití tsa cava ñi jucun tan ña tsatí niñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayi —catyí ra tsahnu vehe ñuhu can naha ra tsihin ra Pablo.

*Nu quitsaha caahán yuhu tahan nyívi Israel siquí ra Pablo*

<sup>26</sup> Tacan tan tsa tuví inga quívi tan cuahán ra Pablo tsihin tandihí tsa cumi taahan ra can naha ra. Tan janduvaha ra tsi ra nuu Nyoo iin caa ñi tsihin ra can naha ra. Tacan tan quihví ra tsitsi vehe ñuhu cahnu tyin jacoto ra cuví jutu ama cundihí tsa utsa quívi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo.

<sup>27</sup> Tacan tan tsa cuñí ndihí tsa utsa quívi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaa xaan tandihí nyívi jahá ra naha, tan tñin ra naha tsi ra Pablo.

<sup>28</sup> Tan caná tsaa ra naha tan catyí ra naha:

—Nyooho nyívi Israel, jatyinyee ndo tsi ndi. Juvín ra ihya cuví ra tsa tsicá nuu tandihí ñi ityi. Tan jacuahá ra tsi tandihí nyívi. Catyí ra tyin ña vaha cuhva iyó yo. Tan catyí ra tyin ña vaha ley tsa tyaa ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya

nu ii cuví tsi tan vatsí jatívi ra naha —catyí ra naha caná tsaa ra naha.

<sup>29</sup> Tacan catyí ra naha tyin nda nu quítsi tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañi Trófimo. Tan cuñí maa ra naha tyin ra Pablo tsindaca tsi ra tsitsi vehe ñuhu.

<sup>30</sup> Tan tandihí nyívi ñuu quitsaha cuvaa ñi. Tan tsinú xaan ñi tsa ñi. Tacan tan tñin ñi tsi ra Pablo. Tan ixtá caa ñi tsi ra cua ndaca ñi ityi tsata vehe ñuhu, tan numi ñi nacasi ñi yuvehe ñuhu can.

<sup>31</sup> Tsa cuñí cahñi ñi tsi ra, tan ñihí tuhun ra comandante cuenda andaru tyin tandihí nyívi ñuu Jerusalén iyo xaan caahán yuhu tahan ñi.

<sup>32</sup> Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyívi. Cuhva tsa nyehe ñi tsi ra comandante can tsihin andaru can naha ra, jaña ñi tsa cañi ñi tsi ra Pablo.

<sup>33</sup> Tacan tan natuhva ra comandante can nu nyíi ra Pablo. Tan tava tyiñu ra tsi andaru naha ra tyin na tñin ra naha tsi ra, tan na cuhñi ra naha tsi ra tsihin uvi taahan cadena. Yaha can tan tsicá tuhun ra comandante can tsi ra yóo ra cuví ra, tan náa javaha ra.

<sup>34</sup> Maa tyin nyívi sñin sñin tuhun caná tsaa ñi. Tan ra comandante can ña cutuñi maa iñi ra tsa cuenda tsatyin ñihi xaan cuvaa jahá ñi. Tan tava tyiñu ra tsi andaru tyin cundaca ra naha tsi ra Pablo nda vehe nu yucú andaru.

<sup>35</sup> Cuhva tsa tsaá ra naha nu cuayi vehe can, tan quitsaha nducaña nyívi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra.

<sup>36</sup> Tyin tandihí ñi nyicún ñi tsi ra naha, tan caná tsaa ñi tan catyí ñi:

—¡Na cúu ra! —catyí ñi.

*Nu juvín ñi maa ra Pablo jacacú tsi ra nuu nyívi*

<sup>37</sup> Cuhva tsa cua tyihi ra naha tsi ra Pablo tsitsi vehe can, tan quitsaha caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego?

<sup>38</sup> Tun tacan caa, ñavin yooho cuví ra ñuu Egipto tsa quitsi quivi can tan jacañi tahan ra tsi nyivi siqui ra ndaca ñaha tan tava ra cumi mil ra tsahñi ndiyi tsindaca ra tsi ra naha ityi ñuhu ityi —catyí ra comandante can tsihin ra Pablo.

<sup>39</sup> Tacan tan ra Pablo catyí ra tsihin ra:

—Yuhu ra Israel cuví yu tan cacu yu ñuu Tarso tsa cuví iin ñuu cahnu ityi Cilicia. Maa tyin jaha tumañi ñi cuhva un ndatu cahan yu luxu tsihin nyivi —catyí ra Pablo tsihin ra comandante.

<sup>40</sup> Tacan tan tsa tsaha ra comandante can ndatu tsi ra, nduvita nyityi ra nu cuayi can tan javaha ra iin seña tyin na cutaxin ñi. Tan tsa cutaxin nyivi quitsaha caahán ra tsihin yuhu hebreo, tan catyí ra:

## 22

<sup>1</sup> —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyivi can.

<sup>2</sup> Tsa tsiñi ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

<sup>3</sup> —Yuhu ra Israel cuví yu tumaa maa ndo. Tan cacu yu ñuu Tarso tsa canyií Cilicia. Maa tyin Jerusalén ihya tsahnu yu. Tan ra Gamaliel jacuaha ra tsi yu nácaa tyaa yahvi yu ley tsii tsaahnu yo. Tan tacan ñi nducú yu cuhva javahá yu tyiñu nuu Nyoo tsihin tsa ñi ñi yu, tumaa tsa javahá ndo vityin ihya.

<sup>4</sup> Yuhu, nu quitsi tsi tsinya ndaha yu tsi nyivi yihí cuenda ra Cristo. Tan tsindaca yu tsi ñi tsa cúu ñi. Tan cuaha ñi rayi tan ñaha tin yu tsa cahun ñi tsitsi vehe caa.

<sup>5</sup> Ra jutu tsaahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsaha tutu tsi yu tyin cuví tin yu tsi ra yañi yo, ra yihí cuenda ra Cristo

ñuu Damasco. Tsahan yu ican tsinanducu yu tsi nyivi tsinú ñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnu naha ra tsi ñi.

*Nu nacatyí tuhun ra Pablo nácaa natsinu ñi ra tsi ra Cristo*

*(Hechos 9.1-19; 26.12-18)*

<sup>6</sup> Maa tyin cuhva tsa cuahán yu ityi tsa cua tsaa yu ñuu Damasco, maa ora cuví tsi. Tan sana ñi yu tan ndunditsin tani cahnu nu cuahán yu jaha iin ñuhu tsa quitsi ityi andivi.

<sup>7</sup> Tacan tan nduva yu nu ñuhu. Yaha can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenda nyaá ndaha un tsi yu?” catyí ndusu can tsihin yu.

<sup>8</sup> Tacan tan tsica tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra.

<sup>9</sup> Tandihí ra tsa cuahán tsihin yu nyehe ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa cahan tsihin yu.

<sup>10</sup> Tacan tan quitsaha caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cahun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu.

<sup>11</sup> Tan cuaa yu jaha ñuhu can, yacan cuenda ra tsa cuahán tsihin yu tin ra naha ndaha yu tan cuahán ndi nda ñuu Damasco.

<sup>12</sup> Tan ican iyó iin ra tsa nañi Ananías. Tan jacahnú xaan ra tsi Nyoo cuhva catyí ley tsa tyaa ra Moisés. Tan tandihí nyivi Israel tsa iyó ñuu Damasco catyí ñi tyin vaha xaan ñi ra.

<sup>13</sup> Tsahan ra can tsinyehe ra tsi yu. Tan cuhva tsa tsaa ra, catyí ra tsihin yu: “Yañi Saulo, nanyehe inga tsaha” catyí ra tsihin yu. Tan juvin ñi cuhva can tan nanyehe yu. Tan cuví nyehe yu tsi ra.

14 Tan catyí ra tsihin yu: “Nyoo cuenda jutu yo nacatsj ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra.

15 Tyin yooho cua cahan un tuhun ra nuu tandihí nyívi. Cua nacatyí tuhun un tsa nyehe un tan tsa tsiñi un.

16 Tan vityin, ña cuatu ca un. Nduvita tan coondutya un. Tan ndacan tahvi un tsi Jutu Mañi yo tyin na jaha ra tucahnu iñi cuatyí un” catyí ra Ananías tsihin yu —catyí ra Pablo tsihin ñi.

*Nu nacatyí tuhun ra Pablo nácaa tsahá Nyoo tyiñu tsi ra tyin cuhun ra inga ñuu cucahan ra tuhun ra Cristo*

17 Yahá can tan vatsí nuhu yu ñuu Jerusalén ihya tan cuhva tsa tsaá yu, tsahan yu vehe ñuhu cahnu tsindacan tahvi yu tsi Jutu Mañi yo. Tan janaha ra iin tsa nyehe yu.

18 Nyehe yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyívi tuhun yu tsa cahan un” catyí ra tsihin yu.

19 Tacan tan quitsahá caahán yu tsihin ra tan catyí yu: “Jutu Mañi yu, maa ñi tsitó ñi tyin yuhu tsahan yu tandihí vehe ñuhu. Tan tñin yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi.

20 Tan quívi tsa tsihí ra Esteban ra tsa cahan cuenda un, yuhu nyíi ndihí yu ican. Tan ndoo yu vaha tsa tsahñi ra naha tsi ra. Tan jahá cuenda yu jahma ra can naha ra” catyí yu tsihin Jutu Mañi yo.

21 Tacan tan catyí ra tsihin yu: “Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyívi tsa ñavin nyívi Israel cuví” catyí Jutu Mañi yo tsihin yu.

*Nu nyaá ra Pablo ndaha ra comandante cuenda ñuu Roma*

22 Tyaá soho ñi yacan ña tan quitsahá caná tsa ñi tan catyí ñi:

—¿Cahñi ndo tsi ra! Tyin ña taahán ca tsi tsa coo ra ñayívi —catyí ñi.

23 Tan caná tsa ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñi ñi.

24 Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsa nyívi tsata ra.

25 Maa tyin tsa yaha tsahñi ra naha tsi ra tan cua cañi ra naha tsi ra, tacan tan ra Pablo cahan ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñi ndo cañi ndo tsi yu —catyí ra Pablo tsihin ra.

26 Tsa tsiñi ra capitán tsa caahán ra Pablo, tsahan ra tsijacoto ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

27 Tacan tan ra comandante can cuahán ra nu nyíi ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

28 Tacan tan catyí ra comandante can tsihin ra:

—Yuhu cuaha xaan xuhun tyahví yu tan cuví cu yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

29 Tacan tan andaru tsa cua cañi tsi ra jatsiyó nyaha ra naha tsi ra naha nu nyíi ra Pablo. Tan nda cuenda ra comandante tan nayuhví ra tsa cuenda tsa tsahñi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

*Nu tsahan ra Pablo nu ndu iin ra ñuu Israel naha ra*



<sup>30</sup> Tan tsa tuv̄i inga quiv̄i can tan ra comandante can cuñí ra coto ra náa cuatyí tyaá nyiv̄i Israel tsi ra Pablo. Tan jaña ra tsi ra Pablo. Tan tava tyiñu ra na ndu iin tandih̄i ra jutu tsa cuv̄i ityi nuu naha ra, tan tsihin tandih̄i ra cumí tyiñu cuenda nyiv̄i Israel. Tacan tan tava tyiñu ra na quita ra Pablo vehe caa tan cahun ra nu iyó junta can.

## 23

<sup>1</sup> Tan ra Pablo nyehe ra tsi tandih̄i ra tsa ndu iin can naha ra, tan catyí ra tsihin ra naha:

—Nyooho yañi, tandih̄i quiv̄i nda cuanda vityin nducú yu kuhva javaha yu kuhva cuñí Nyoo. Yacan cuenda vaha cuñí yu —catyí ra Pablo.

<sup>2</sup> Tacan tan ra Ananías, ra jutu tsaahnu tsa yih̄i ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra.

<sup>3</sup> Tan ra Pablo nacahan ra tan catyí ra:

—jihna ca tsi maa un cua cañi Nyoo, tyin jahá xaan un tyin ra vaha cuv̄i un nyaá un juvin! ¿A cutuñí yu nuu un tumaa kuhva catyí ley? ¿Nacuenda tsa tava tyiñu un na cañi ra naha tsi yu? Tan ñavin tacan catyí ley —catyí ra Pablo.

<sup>4</sup> Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnu cuv̄i ra nuu Nyoo —catyí ra naha tsihin ra Pablo.

<sup>5</sup> Tacan tan ra Pablo catyí ra:

—Yañi, ña tsitó yu tatun ra ihya cuv̄i ra jutu tsaahnu. Tyin catyí tuhun Nyoo tyin ña cahan nyaa yo tsi ra yih̄i ndaha ñuu yo —catyí ra.

<sup>6</sup> Tacan tan tuv̄i iñi ra Pablo tyin juhva ra cuenda junta can naha ra, yih̄i ra cuenda ityi ra cuv̄i saduceo naha ra. Tan juhva ra naha yih̄i cuenda ra cuv̄i fariseo naha ra. Tacan tan cahan ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuv̄i yu tumaa jutu yu. Tan tatsí tuñí ndo tsi yu tsatyin tsinú iñi yu tyin nyiv̄i tsa tsih̄i nandoto ñi —catyí ra Pablo.

<sup>7</sup> Kuhva tsa cahan ra tuhun ihya, ra tsa cuv̄i fariseo naha ra tan ra saduceo naha ra, quitsaha caahán yuhu tahan ra naha tan natahv̄i sava ra naha.

<sup>8</sup> Tyin ra saduceo catyí ra naha tyin ña cua nandoto nyiv̄i tsa tsih̄i. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandih̄i tuhun ihya.

<sup>9</sup> Tandih̄i ra naha quitsaha caná tsa ra naha. Tan nduvitá juhva ra cuv̄i maestro cuenda ley tsa tyaá ra Moisés tsa cutahán tsihin ra fariseo naha ra, tan catyí ra naha:

—Nyehe ndo, nduve tsa ña vaha javahá ra ihya, tyin tatun ángel cahan tsihin ra, jaha yo cuenda tyin ña vaha cahan yo siqui Nyoo —catyí ra naha.

<sup>10</sup> Tsa tsiñi tandih̄i ra naha yacan, quitsaha nduvaá nyico ra naha. Nda cua nayuhv̄i ra comandante can coto cahnya cuatyí ra naha tsi ra Pablo. Yacan cuenda tava tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru.

<sup>11</sup> Tan tsacuaa can quituv̄i Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

*Nundoq ra Israel naha ra tyiñu tyin cua cañi ra naha tsi ra Pablo*

<sup>12</sup> Tsa inga quiv̄i, juhva ra Israel natuhun tahan ra naha tan ndoo ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cañi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha.

<sup>13</sup> Yaha uvi xico ra naha ndoo ra naha tyiñu ihya.

<sup>14</sup> Tsahan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi.

<sup>15</sup> Tan vityin nyooho jacoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsaa ra ihya, cua cahñi ndi tsi ra —catyí ra naha tsihin ra jutu naha ra.

<sup>16</sup> Maa tyin sehe cuhva ra Pablo tsiñi ra tsa natuhun tahan ra naha. Tan tsahan ra vehe andaru nu nyii ra Pablo tsicatyí tuhun ra tsihin ra.

<sup>17</sup> Tacan tan ra Pablo cana ra tsi iin ra capitán. Tan catyí ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

<sup>18</sup> Tacan tan tsindaca ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyii vehe caa cana ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

<sup>19</sup> Tacan tan ra comandante tiiin ra ndaha ra luhlu can tan tava sin ra tsi ra tan catyí ra tsihin ra:

—¿Náa cuñi un cahan un tsihin yu?

<sup>20</sup> Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo.

<sup>21</sup> Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra

naha tsi ra Pablo, ña cua catsi ra naha tan ña cua coho ra naha. Tan tatun ña cuví cahñi ra naha tsi ra, vaha taxín ca na cúu tandihi maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

<sup>22</sup> Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuhu ra tsi ra luhlu can.

*Nu cacu ra Pablo ndaha ra Israel naha ra tan cuahán ra nuu ra ndacá ñaha tsa nañi Félix*

<sup>23</sup> Tacan tan ra comandante cana ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cuhun ndo ñuu Cesarea cuhva caa iin tsa tsacuaa. Cua cuhun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza.

<sup>24</sup> Janduvaha ndo cuayu coso ra Pablo. Tan jaha cuenda vaha ndo tsi ra ityi cuhun ndo na tsaa vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

<sup>25-26</sup> Tacan tan javaha ra iin carta cundaha ra naha nacuhva ra naha tsi ra Félix. Tan tuhun tsa tyaa ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuví un. Ihya vatsí nacumi tsi un.

<sup>27</sup> Ra Pablo ihya, tiiin ra Israel naha ra tsi ra. Tan cuñi ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsahan yu tsihin andaru tan jacacu yu tsi ra.

<sup>28</sup> Tan cuñi yu coto yu náa cuatyí tyaá nyivi tsi ra, tsindaca yu tsi ra nu iyó junta tandihi ra cuví mandoñi nyivi Israel.

<sup>29</sup> Tan nyehe yu tyin xaan xaan cuñi nyivi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa.

<sup>30</sup> Maa tyin ñihi tuhun yu tyin ra Israel nducú cahñi ra naha tsi ra, yacan

cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihí ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javahā ra.

<sup>31</sup> Tacan tan quihín ra naha tsi ra Pablo tumaa cuhva catyí ra Claudio tsihin ra naha, tan juvin ñi tsacuaa can tsindacā ra naha tsi ra nda ñuu Antípatris.

<sup>32-33</sup> Tsa inga quivi, ra tsa cuahán tsihin tsaha, sava ityi ñi tsahan ra naha, tan tsaā nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaā ra naha, nacuhvā ra naha carta can tsi ra Félix, tan tsahā cuenda ndihí ra naha tsi ra Pablo tsi ra.

<sup>34</sup> Tsa yahā tsa cahvi ra Félix carta can, quitsahā tsicá tuhun ra tsi ra Pablo nu maa cuví ñuu ra. Tan tsa tsitó ra tyin ra Cilicia cuví ra.

<sup>35</sup> Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahā ra Herodes tahan tsanaha.

## 24

### *Nu cutuñi ra Pablo nuu ra Félix*

<sup>1</sup> Yahā uhun quivi tan ra Ananías, ra jutu tsaahnu tsa yihí ndaha inga ca ra jutu, tsaā ra ñuu Cesarea can tsihin taahan ra cuví mandoñi naha ra, tan tsihin iin ra tsa nañi Tértulo. Ra tsa caahán ndaahvi tsaha nyivi cuví ra. Tsaā ra can naha ra nuu ra Félix tyin cua ndacan ra naha cuatyí tsaha ra Pablo.

<sup>2</sup> Tacan tan tava tyiñu ra Félix na quitsi ndaca andaru tsi ra Pablo. Tacan tan quitsahā tsicán ra Tértulo cuatyí tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyivi ñuu ndi.

<sup>3</sup> Nacuhvá xaan ndi tyahvi nyoo tsi yooho tata Félix, tyin vaha xaan iñi un.

<sup>4</sup> Tan ña cuñi yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu.

<sup>5</sup> Tyin tsitó ndi tyin rayi ihya ñavin ra vaha cuví ra. Tandihí ñi ityi jacuvaá ra tsi nyivi Israel. Tan juvin ra cuví ityi nuu tsihin nyivi tsa nyicún tsi ra Jesús ra ñuu Nazaret.

<sup>6</sup> Tan cuñi ra javaha ra tsa ndavaha ñi tsitsi vehe ñuhu cahnu. Tan yacan cuenda tñn ndi tsi ra, tyin tatsi tuñi ndi tsi ra tumaa cuhva catyí ley maa ndi.

<sup>7</sup> Maa tyin ra Licias, ra cuví comandante ñihi xaan tyasi ra tan quihín nyaa ra tsi ra tsi ndi.

<sup>8</sup> Tan catyí ra tyin tun cuñi ndi ndacan ndi cuatyí tsaha ra, cuñi tsi tsa cahan jihna ndi tsihin un. Yacan nyehe maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

<sup>9</sup> Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa.

<sup>10</sup> Tacan tan ra Félix janahā ndaha ra nu nyaá ra Pablo tyin nacahan ra. Tan ra Pablo quitsahā caahán ra tan catyí ra:

—Si xaan cuñi yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyivi iyó ñuu ihya.

<sup>11</sup> Tatun cua nducu tuhun un, cua coto un tyin tsa iyó ñi utsi uvi quivi tsa tsahan yu ñuu Jerusalén tsijacahnu yu tsi Nyoo.

<sup>12</sup> Tan ña cahan yuhu tahan yu tsihin ndi intuhun nyivi. Tan ndi ña jacuvaā yu tsi ñi tsitsi vehe ñuhu cahnu. Nduve maa náa javahā yu tandihí ca vehe ñuhu, tan ndi inga ca ityi tsitsi ñuu.

<sup>13</sup> Tan cuatyí tsa tyaá ra ihya naha ra siqui yu, ña nditsa. Tyin tandihí maa tsa caahán ra tan ñavin tsa nditsa cuví tsi.

14 Maa tyin tsa cua catyi yu tsihin un cuví tsehe: tyin yuhu jacahnú yu tsi Nyoo. Juvín ra tsa jacahnú tsi tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyaa ra Moisés, tan tsinú iñi yu. Tan tandihí tsa tyaa ra cuví ndusu yuhu Nyoo tan tsinú iñi yu.

15 Tan tsinú iñi yu tumaa tsa tsinú iñi ra ihya naha ra tyin nyivi tsa tsihi cua nandoto ñi inga tsaha, tahan ñi nyivi vaha tan nyivi caquiñi.

16 Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyivi.

17 Tan tsa yaha juhva cuiya tsa tsicá yu tandihí ñi ityi, tsahan tsa nuhu yu nda Israel ñuu yu tyin nacuhva cuenda yu xuhun tsa tsaha nyivi tsi yu tsi nyivi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo.

18 Yacan javahá yu tsitsi vehe ñuhu cahnu. Tan tsa yaha tsa janduvaha yu tsi yu tumaa catyí ley ndi, tan juhva ra Israel ra tsa quee ityi Asia, nyehe ra naha tsi yu ndacan. Maa tyin nduve nyivi cuaha yucú, tan nduve náa javahá ñi.

19 Tan ra tsa nyehe tsi yu ndacan naha ra, taahán tsi tsa quitsi maa ra naha cahan ra naha náa cuví tsa javahá yu o náa cuatyí tyaa ra naha siqui yu.

20 Tatun ña tacan, na catyi tuhun ra tsa nyecú ihya naha ra tatun náa iin cuatyí yu nañihí ra naha quivi janahma ra cuví ityi nuu tsihin nyivi Israel naha ra tsi yu.

21 ¿A ñavin cuenda tsatyin cahan yu iin tuhun tsihin ra tsa yucú junta can? Tan catyí yu: “¿A tatsí tuñi ndo tsi yu tsa cuenda tyin tsinú iñi yu tsa nandoto nyivi tsa tsihi?” —catyí ra Pablo.

22 Tan tsa tsiñi ra Félix tsa cahan ra tacan, tan catyí ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyí ra.

Cahan ra tacan tyin tsitó ra nácaa cuahán tuhun nyivi nyicún tsi ra Cristo.

23 Tacan tan tava tyiñu ra Félix tsi ra capitán na tinyi nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyií ra, tan cahan ra naha tsihin ra.

24 Tsa yaha juhva quivi tan tsa nyico ra Félix inga tsaha tsihin ña Drusila ñasihi ra. Tan ñaha Israel cuví ña. Tan tava tyiñu ra na quitsi ra Pablo tyin cuñi ñi tyaa soho ñi nácaa tuhun tsa tsinú iñi ra tsi ra Jesucristo.

25 Tan ra Pablo quitsaha caahán ra tuhun nácaa taahán tsi javaha yo tsa vaha cuhva cuñi Nyoo, tan ña cuví javaha yo tsa ña vaha tsa cuñi cuñu ñuhu yo. Tan coo quivi cua tatsi tuñi Nyoo tsi tandihí nyivi. Tan ra Félix nayuhvi xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

26 Tan ra Félix cuñi maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra.

27 Tan tsa yaha uvi cuiya, tacan tan nacosó tyiñu tsi ra Porcio Festo tyin cundaca ñaha ra. Tyin tsa quita ra Félix. Tan ra Félix ña cuñi ra tsa cahan nyivi Israel tsi ra, yacan cuenda nacoó ra tsi ra Pablo vehe caa.

## 25

### *Nu jandaá ra Festo cuatyí ra Pablo*

1 Tan tsa quihvi ra Festo tsa cua jaha tyiñu ra, tacan tan tsa tsinu uñi quivi quita ra ñuu Cesarea can tan cuahán ra nda ñuu Jerusalén.

2 Tan tsa tsaá ra ñuu Jerusalén, tacan tan tsaá ra jutu tsa cuví ityi nuu, tan ra cumí tyiñu tsa yihí ndaha



tsi nyivi Israel. Tan tsican ra naha cuatyí tsaha ra Pablo.

<sup>3</sup> Tan tsican ra naha tumañi iñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra.

<sup>4</sup> Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaá yu kuhva tsa yatyi ñi cua cunuhu nyico yu.

<sup>5</sup> Yacan cuenda, nyoocho tsa cuví ndo ra cumí tyiñu ñuu ihya, cuví cahun ndo tsihin yu, tan ndacan ndo cuatyí tsaha ra tatun iyó tsa ña vaha javaha ra —catyí ra Festo tsihin ra naha.

<sup>6</sup> Tacan tan ra Festo ndoo ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaá ra tsitsi vehe tyiñu ra tan tsinyaá ra tsa cua tatsi tuñi ra tsi ra iyó cuatyí naha ra. Tacan tan tava tyiñu ra na quitsi ra Pablo.

<sup>7</sup> Kuhva tsa quihvi ra Pablo, nu yucú ra naha natuhva ra Israel tsa quee nda ñuu Jerusalén, tan quitsaha tyaá ra naha cuatyí cahnu siqui ra. Maa tyin nduve tsandaa tava ra naha.

<sup>8</sup> Tacan tan cahan ra Pablo tan catyí ra:

—Yuhu ndi intuhun cuatyí ñaha ca javaha yu, ndi siqui ley nyivi Israel, ndi siqui vehe ñuhu cahnu ñuu Jerusalén, ndi siqui ra cuví rey cahnu tsa nyaá ñuu Roma —catyí ra.

<sup>9</sup> Maa tyin ra Festo cuñi ra coo vaha ra tsihin ra Israel naha ra, yacan cuenda tsica tuhun ra tsi ra Pablo:

—¿A cuñi un cahun un ñuu Jerusalén tyin jandaa yu tyiñu un ndacan? —catyí ra tsihin ra.

<sup>10</sup> Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javaha yu tsi nyivi Israel.

<sup>11</sup> Tun tsatyin javaha yu iin cuatyí cahnu tsa taahán tsi cúu yu, ña cua nducu yu kuhva cacu yu. Maa tyin ña nditsa maa tuhun tsa caahán ra ihya naha ra. Ndi nyoocho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

<sup>12</sup> Tacan tan ra Festo, tsa yaha tsa natuhun tahan ra tsihin ra jatyinyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cahun un nuu maa ra —catyí ra tsihin ra.

### *Nu nacatyí tuhun ra Festo tuhun ra Pablo tsihin ra Agripa*

<sup>13</sup> Tsa yaha juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyii ra Festo tyin cua kuhva ñi nacumi tsi ra.

<sup>14</sup> Tan ndoo ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoó ra tsi iin ra vehe caa ihya.

<sup>15</sup> Tan tsa tsahan yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsican ra naha cuatyí tsaha ra can nuu yu tyin na kuhva yu ndatu tsa cúu ra.

<sup>16</sup> Tan yuhu catyi yu tsihin tandihi ra naha tyin ña tuhvá ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi kuhva jacacu ñi tsi ñi.

<sup>17</sup> Yacan cuenda, tsa quitsi ra cuví ityi nuu tsihin nyivi Israel can naha ra ihya, ña ndatu yu. Tan juvin ñi inga quivi can tan tsahan yu vehe tyiñu. Tan tsa yaha tsicunyaá yu tan cana yu tsi ra can.

<sup>18</sup> Maa tyin ra tyaá cuatyí siqui ra, nduve náa tuhun ñiñi cahan ra naha. Tsa cuñi maa yu tyin cahnu cuatyí cua tyaa ra naha siqui ra.

<sup>19</sup> Maa tyin tuhun tsa cahan ra naha cuví tsa cuenda cuhva iyó maa ra naha cuhva tsinú ñni ra naha. Tan cahan ra naha tuhun ra tsa nañi Jesús. Tan catyí ra naha tyin tsa tsihi ra. Maa tyin ra Pablo catyí ra tyin nyito ra.

<sup>20</sup> Tan tsa ña ñihí yu nácaa tatsi tuñi yu tsi ra tsa cuenda tuhun can, tsica tuhun yu tsi ra tan catyí yu tsihin ra tatun cuñi ra cahun ra cutuñi ra nda ñuu Jerusalén.

<sup>21</sup> Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quivi tsitsi vehe caa, nda cuenda cuví jacuhun yu tsi ra nuu ra Augusto —catyí ra Festo tsihin ra Agripa.

<sup>22</sup> Tacan tan ra Agripa catyí ra tsihin ra Festo:

—Cuñi tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

<sup>23</sup> Tsa inga quivi can tan tsaá ra Agripa tsihin ña Berenice. Iyo xaan caá ñi quihvi ñi tsitsi vehe, tyin rey cuví ñi. Tan quihvi ndihi tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo.

<sup>24</sup> Tacan tan quitsaha catyí ra Festo:

—Yooho Rey Agripa, tan nyooho tata, tsa yucú ndo ihya. Nyehe ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cúu ra.

<sup>25</sup> Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan.

<sup>26</sup> Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan

tan ndaca tuhun un tsi ra tan coto yu náa taahán tsi jacoto yu tsi ra rey cahnú.

<sup>27</sup> Tyin ña vaha tsa jacuhún yu tsi ra tatun nduve náa tuhun caahán yu náa cuatyí javaha ra.

## 26

### *Nu quitsaha caahán ra Pablo nuu ra rey Agripa*

<sup>1</sup> Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaa ra ndaha ra tan catyí ra tyehen:

<sup>2</sup> —Si xaan cuñi yu tyin cuví cahan yu nuu yooho, rey Agripa, tan cuví catyí yu tsihin un nácaa tandihí cuatyí tsa tyaá ra Israel naha ra siqui yu.

<sup>3</sup> Tyin yooho tsitó un tandihí tuhun tsa iyó yo tsa cuví yo nyivi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

### *Nu catyí tuhun ra Pablo tsihin ra Agripa nácaa ñayivi tsicoo ra tsa ndi cumañi ca quihvi ra cuenda ra Cristo*

<sup>4</sup> Tandihí nyivi Israel tsitó ñi nácaa tsicoo yu nda ñuu yu quivi tsa ndi luhlu yu. Tan tsitó tucu ñi nácaa tsicoo yu nda ñuu Jerusalén.

<sup>5</sup> Cuaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandihí nyivi.

<sup>6</sup> Tan vityin cuñi nyivi Israel tatsi tuñi ñi tsi yu tsa cuenda tyin tsinú ñni yu tsa cua janandoto Nyoo tsi nyivi tsa tsihi, tumaa catyí ra tsihin tsi tsaahnu yo naha ra tañan tsanaha.

<sup>7</sup> Tandihí nyivi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyivi tsa tsihi. Tan yacan cuenda ña jandihí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaa

ra Israel naha ra cuatyí síqui yu vityin, yoocho rey Agripa.

<sup>8</sup> ¿A ña tsinú iñi nyoocho tyin Nyoo cua janandoto ra tsi nyivi tsa tsa tsihi?

*Nu tsaha cuenda ra Pablo tsi ra Agripa cuhva tsinyaq ndaha ra tsi nyivi yihí cuenda ra Cristo*

<sup>9</sup> Tahān tsanaha juvin ñi maa yu tsica iñi yu tyin vaha tsa tatsi tuñi yu tsi nyivi tsinú iñi tsi ra Jesús, ra ñuu Nazaret.

<sup>10</sup> Tan tacan javaha yu nda ñuu Jerusalén tsihin ndatu tsa tsaha ra jutu tsa cuví ityi nuu naha ra. Tan cuaha nyivi tsa tsinú iñi tsi ra Cristo tyihí yu vehe caa. Tan tatun tsahñi ra naha tsi ñi, vaha xaan cuñi yu.

<sup>11</sup> Tan cuaha xaan tundoho nyehe ñi jahā yu. Tan nducu yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javaha yu tandihí maa vehe ñuhu nyivi Israel. Javaha yu tacan tsa cuenda tsa xaan cuñi yu nyehé yu tsi ñi. Tan tandihí inga ñuu tsahan yu tsinyaq ndaha yu tsi ñi.

*Nu nacatyí tuhun nyico ra Pablo nácaa nanduví ra, ra yihí cuenda ra Cristo*

*(Hechos 9.1-19; 22.6-16)*

<sup>12</sup> Tan tsa cuenda yacan cuahán yu nda ñuu Damasco quivi can tyin tsaha ra jutu tsa cuví ityi nuu naha ra ndatu tsi yu.

<sup>13</sup> Maa tyin ityi cuahán yu cuhva ora cuví tsi, yoocho Rey. Tan quitsi ñuhu ityi síqui. Tan jandunditsin tsi nu cuahán yu tsihin tandihí ra tsa cuahán tsihin yu. Maa tyin yaha ca nditsin tsi tan ñavin ca ñuhu ñicanyii.

<sup>14</sup> Tacan tan tandihí ndi nduva ndi nu ñuhu. Tan tsiñi yu iin ndusu tsa caahán tsihin yu, tsihin yuhu yo, tan catyí tsi tsihin yu: “Saulo, Saulo, ¿nacuenda nyaá ndaha un tsi yu? Tumaa iin quiti tsañi nyaa ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicuehé un”, catyí ndusu can tsihin yu.

<sup>15</sup> Tacan tan catyí yu: “¿Yoocho yoocho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un.

<sup>16</sup> Nduvita nyityi. Tyin quituví yu nuu un ihya tyin tacan tan cua jaha tyiñu un nuu yu, tan cua cuví un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca.

<sup>17</sup> Yacan cuenda vityin jacuhún yu tsi un nu iyó nyivi tsa ñavin nyivi Israel cuví tan juvin ñi maa yu cua jacacu yu tsi un ndaha ra Israel naha ra, tan ndaha nyivi tsa ñavin nyivi Israel cuví.

<sup>18</sup> Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndihí tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu”, catyí Jutu Mañi yo tsihin yu.

<sup>19</sup> Yacan cuenda yoocho rey Agripa, javahá yu tsa catyí Jutu Mañi yo ra Jesucristo tsihin yu nu janahā ra tsi ra tsi yu.

<sup>20</sup> Tacan tan tsa jihna ñi quitsaha caahán yu tuhun ra nda ñuu Damasco. Yahā can tan cahān yu tsihin nyivi ñuu Jerusalén tan tandihí ca ñuu tsa cayucú Judea. Tan caahán ndihí yu tsihin nyivi tsa ñavin nyivi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyivi tsa tsinú iñi tsi ra Cristo.

<sup>21</sup> Tan tsa cuenda tuhun ihya tñin ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu.

<sup>22</sup> Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihí nyivi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu

cuahán ca tsi, yacan caahán yu.

<sup>23</sup> Tyin catyí ra naha tyin taahán tsi tsa cua nyehe ra Cristo tundoho. Tan tsa yaha tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyívi tyin cua jacoto ra nácaa cua cacu ñi, tahan ñi nyívi Israel tan nyívi tsa ñavin nyívi Israel cuví —catyí ra Pablo.

*Nu nducú ra Pablo cuhva tsa tsinu iñi ra rey Agripa tsi ra Cristo*

<sup>24</sup> Cuhva tsa catyí ra Pablo tuhun ihya, ra Festo cana tsaa ra, tan catyí ra:

—¡Jiñi yooho ña vaha cuñí, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

<sup>25</sup> Maa tyin ra Pablo catyí ra tsihin ra:

—Ñavin iñi yu ña vaha cuñí, yooho tata Festo. Tyin tsa caahán yu, maa ñi tsa nditsa tan tsa vaha cuví tsi.

<sup>26</sup> Ihya nyaá ra rey Agripa. Tan tsitó vaha ra tuhun ihya. Yacan cuenda ña yí caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi.

<sup>27</sup> Yooho rey Agripa, ¿a tsinú iñi un tuhun tsa tyaá ra cuví ndusu yuhu Nyoo tahan tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

<sup>28</sup> Tacan tan ra Agripa catyí ra tsihin ra:

—¿A cuñí yooho tsa natsinu iñi yu tsa caahán un tan quihví yu cuenda ra Jesús? —catyí ra rey Agripa tsihin ra Pablo.

<sup>29</sup> Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yooho ñi, tyin na tsinu ndihi tucu iñi tandihi nyívi tsa yucú tyaá soho tsa caahán yu ihya. Intuhun ñi tsa ña cuñí yu, tsa quihí cadena ndaha ndo tumaa maa yu vityin —catyí ra Pablo.

<sup>30</sup> Tsa yaha tsa cahan ra Pablo tuhun ihya, nduvita rey tan ra ndacá ñaha tan ña Berenice, tan tandihi ra yucú ican naha ra.

<sup>31</sup> Tan tsa yaha quita ñi, tan quit-saha natuhún tahan ñi:

—Nduve cuatyí ra ihya tsa ñihi xaan. Ña taahán tsi cúu ra. Tan ndi ña taahán tsi cunyi ca ra vehe caa —catyí ñi.

<sup>32</sup> Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsican ra tsa cutuñi ra nuu ra cuví rey cahnu —catyí ra.

## 27

*Nu jacuhun ra Festo tsi ra Pablo nda ñuu Roma*

<sup>1</sup> Quívi tsa tyaá ra Festo tan ra Agripa cuhva tyin jacuhun ra naha tsi ndi nda ñuu Roma tsa canyí Italia, nacuhva cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañí Julio. Yihí ra batallón andaru, tsa nañí Cuenda Ra Augusto.

<sup>2</sup> Tan cuahán ndihi tucu ra Aristarco tsihin ndi. Ra tsa quee ñuu Tesalónica tsa canyí ityi Macedonia cuví ra. Tacan tan quihví ndi tsitsi iin yutun ndoo tsa quee ñuu Adramitio tyin tsa yatyin cuíi cuhun nyico tsi ñuu tsa cayucú Asia yatyin ñi yuhu ndutya ñuhu.

<sup>3</sup> Tsa inga quívi tsaá ndi puerto Sidón. Tan ra Julio vaha nyívi cuví ra tsihin ra Pablo. Tan tsaá ra tsa cuhun ra Pablo nu iyó ra vaha iñi tsi ra ñuu can tan jatyinyee ra naha tsi ra.

<sup>4</sup> Yaha can tan quita ndi ñuu Sidón tan jandaá ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yaha tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can.

<sup>5</sup> Tacan tan yaha sava ndi nu ndutya ñuhu ityi nuu Cilicia tan Panfilia, tan tsaá ndi iin ñuu tsa nañí Mira tsa canyí Licia. Tan quita ndi tsitsi yutun ndoo can.

<sup>6</sup> Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda



Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi.

<sup>7</sup> Cuaha quivi tsica ndi tyin cuee ñi cuahán ndi. Tsihin tundoho tan tsaá ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsaḥa tsi tsa cuhun ca ndi ityi nuu, tan yaha ndi yatyin ñi ñuu Salmón tsa canyíi ñuhu Creta. Tan navico ndi ityi yuhu ñuhu Creta.

<sup>8</sup> Nducu ndi cuhva tsa cuhun ndi yuhu ndutya ñuhu, maa tyin tsihin tundoho tan tsaá ndi nu nañi Buenos Puertos yatyin ñi ñuu Lasea.

<sup>9</sup> Tsa cuaha xaan quivi yaha tyin cuee xaan tsicá ndi tsa cuenda tatyí tan ica xaan nanduvi tsa yaha ndi nu ndutya ñuhu. Tyin tsa yaha quivi vico nu iyó nyitya nyivi Israel. Tan tsa cua cuyatyin yoo vitsin. Yacan cuenda ra Pablo tsaḥa cuenda ra tsi ra jacacá yutun ndoo can naha ra,

<sup>10</sup> tan catyí ra:

—Tandihí nyooho ra yucú ihya, tyaa soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví iñi yu tyin cua cunaa yutun ndoo tsihin tandihí tsa nyisó tsi, tan nda cuenda maa yo cuví cunaa yo. Vaha ca tatun ndoo yo ihya —catyí ra tsihin ra naha.

<sup>11</sup> Maa tyin ra capitán cuenda andarú can tyaa yahvi ca ra tsi ra jacacá yutun ndoo tan ra cuví tsiho yutun ndoo tan ñavin ca tsi ra Pablo.

<sup>12</sup> Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyíi juvin ñi ñuhu Creta ihya. Yacan cuví iin nu vaha cun-  
yaa yutun ndoo tyin ña ñihi xaan yihí tatyí tyin ñuu can canyíi tsi tsiyo cana ñicanyii —catyí ra naha.

*Nu ñihi xaan yihí tatyí nu ndutya ñuhu*

<sup>13</sup> Tacan tan quitsaha yihí luxu tatyí tsa quitsi ityi sur. Tan cuñi maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can.

<sup>14</sup> Ña cuaha ñi tsica ndi tan quitsaha yihí tatyí xaan tsa quitsi ityi norte. Tan tandahá tsi yutun ndoo inga ityi.

<sup>15</sup> Tan ña cuví ca cuhun ndi ityi nuu ca tsa cuenda tatyí can. Tan jaña ndaha ndi na cuhun maa yutun ndoo tsihin tatyí ndaa ityi cuñi maa tsi.

<sup>16</sup> Tan yaha ndi ityi tsata iin ñuhu luhlu tsa nañi Clauda tyin ña ñihi xaan yihí tatyí ityi can. Tan tsihin tundoho naquihin ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya.

<sup>17</sup> Tan tsa yaha natyihí ra naha yutun ndoo luhlu can, tacan tan sutya ra naha xuu yutun ndoo cahnu tan tsañi ra naha yutun ndoo can tsihin taahan yoho tyin coo tunyee iñi itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañi tsi Sirte. Yacan cuenda januu ra naha jahma yutun ndoo can tan tsaḥa ra naha tsa cuhun tsi cuhva tandahá tatyí.

<sup>18</sup> Tan tsa inga quivi juvin ñi ñihi xaan yihí tatyí. Yacan cuenda quitsaha tyihí ra naha carga tsa yihí tsitsi yutun ndoo can nuu ndutya ñuhu.

<sup>19</sup> Tan tsa tsinu uñi quivi quihin ndi ndaha tyiñu yutun ndoo can tan tyihí ndi nu ndutya ñuhu.

<sup>20</sup> Tan cuaha quivi ña nyehe ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaa ca ndi cuhva tsa cua cacu ndi.

<sup>21</sup> Cuaha quivi yaha tan ña tsatsí ndi. Tacan tan catyí ra Pablo tsihin tandihí ra naha:

—Nyehe ndo, vaha ca tun tsatyin tyaa yahvi ndo tuhun tsa cahan yu quivi can, tan ndoo yo ñuhu Creta. Tan vityin cuaha xaan tundoho

nyehé yo tan cuaha xaan ndaha tyiñu jacunaá yo.

<sup>22</sup> Tan cua cunaa ndihí yutun ndoo ihya, maa tyin ña caca iñi ndo tyin ndi intuhun yo tan ña cua cúu yo.

<sup>23</sup> Tyin Nyoo cuví ra yihí ndaha tsi yu, tan jahatyíñu yu tyiñu ra, juvin ra janahá ra iin tsa janahá tsi yu cuñi. Tan quituvi iin ángel nuu yu.

<sup>24</sup> Tan catyí ángel can tsihin yu: “Ña nayuhvi un, Pablo. Tyin cuñi tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandihí ra yucú tsihin un tsitsi yutun ndoo”, catyí ángel can tsihin yu.

<sup>25</sup> Yacan cuenda nyooho tsa yucú tsitsi yutun ndoo ihya jandu iin ndo iñi ndo. Tyin yuhu tsinú iñi yu tsi Nyoo. Tan tsitó vaha yu tyin cua cuvi tumaa cuhva catyí ángel can tsihin yu.

<sup>26</sup> Vasu cua nyee yutun ndoo ihya, maa tyin cua tsaá yo iin ñuhu luhlu —catyí ra Pablo tsihin tandihí ndi.

<sup>27</sup> Tan tsa ndihí tsahun quivi tsa tsicá ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuví iñi ra jacacá yutun ndoo can naha ra tyin cua tsaá ndi iin ñuhu.

<sup>28</sup> Tacan tan tyihí cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihí cuhva ra naha inga tsaha. Tan iyó oco utsa metru.

<sup>29</sup> Tan yuuhví ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cahun ca tsi ityi nuu. Tan tsa cuñi ra naha tsa cunditsin.

<sup>30</sup> Tan ra jacacá yutun ndoo can naha ra tyaá ra naha cuhva cunu xeehe ra naha. Tan yacan cuenda quitsahá januu ra naha yutun ndoo luhlu can nu ndutya ityi nuu yutun

ndoo can. Tan jahá ñi maa ra naha tyin inga caa cua januu ra naha.

<sup>31</sup> Maa tyin ra Pablo jacotó ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyooho ña cua cuvi cacu ndo —catyí ra tsihin ra naha.

<sup>32</sup> Tacan tan andaru tsahnyá ra naha yoho yutun ndoo luhlu can. Tan jacanacavá ra naha can nu ndutya.

<sup>33</sup> Tan tsa naa ca ra Pablo catyí ra tsihin tandihí ra naha:

—Tsa iyó utsi cumi quivi tsa ña tsatsí ndo tan ña quixí ndo.

<sup>34</sup> Catyí yu tsihin ndo, catsi ndo vityin. Ñiñi xaan cuñi tsi tsa catsi yo tyin tacan tan ndunyee cuñu ñuhu yo. Tyin cua cacu yo tan ndi intuhun ixi jiñi yo tan ña cua cunaa.

<sup>35</sup> Tan tsa catyí ra Pablo tuhun ihya, quihin ra iin paan tan nacuhvá ra tyahvi nyoo tsi Nyoo nuu tandihí ra naha. Tacan tan tahví ra tan quitsahá tsatsí ra.

<sup>36</sup> Tacan tan tandihí ra naha ndu iin ca iñi ra naha tan tsatsí ndihí ra naha.

<sup>37</sup> Tan tsa tandihí ndi tsa yucú ndi tsitsi yutun ndoo can, quitá uvi cientu uñi xico tsahun iin ndi.

<sup>38</sup> Cuhva tsa ndihí tsatsí ra naha cuhva cuñi ra naha tan jacuhun ra naha yitín tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaá tsi yatyin ñi yuhu ndutya.

#### *Nu nyee yutun ndoo*

<sup>39</sup> Yahá can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaá ra naha cuhva nyehe ra naha tatun cuví jacuhun ra naha yutun ndoo ican.

<sup>40</sup> Tsahnyá ra naha yoho tsa nuuhí caa vee can. Tan nacoó ra naha can tsitsi ndutya ñuhu. Tan jandutayá ra naha vitu tsa janavicó yutun ndoo. Tacan tan jandaá ra naha jahma tsa tuhvá ticaá ityi nuu tsi. Tan quitsahá quihín tatyí jahma can, tan jacuhún tsi yutun ndoo nda nu iyó nyiti can.

<sup>41</sup> Tan tsaá tsi nu tatahán ndutya. Tan nyeé jiñi tsi tsitsi nyiti. Tan ña cuví ca tava ra naha itsi. Tan ityi xuu tsi quitsaha tahví cuatyí can tsa cuenda tsa ñihi xaan cañí ndutya ñuhu can.

<sup>42</sup> Tacan tan andaru cuñí ra naha cahñi ra naha tsi ra cuahán cua cuñi naha ra tyin coto cunu ra naha.

<sup>43</sup> Maa tyin capitán andaru cuñí ra jacacu ra tsi ra Pablo. Yacan cuenda ña tsaḥa ra tsa cahñi ra naha tsi ra can naha ra. Tan catyí ra tyin ndáa ra tsitó sutya, na cuhun cuee ñi ra naha nu ndutya tan quita ra naha nda ñuhu ityi.

<sup>44</sup> Tan tandihí ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahví cuatyí jahá ndutya ñuhu. Tan tacan cacú tandihí ndi tan quita ndi ñuhu ityi.

## 28

### *Nu nyii ra Pablo ñuhu Malta*

<sup>1</sup> Cuhva tsa tsa yaha cacú ndi tan catyí nyivi iyó ñuhu can tyin nu yucú ndi can nañi tsi Malta, o Melita.

<sup>2</sup> Tan vaha xaan natuhún ñi tsihin ndi. Tan jatahan ñi ñuhu tyin cuún savi tan vitsin xaan. Tan catyí ñi tsihin tandihí ndi, na natuhva ndi yuhu ñuhu can tyin quita tsa vitsin tsi ndi.

<sup>3</sup> Tacan tan ra Pablo naquihin ra juhva nducu ityi. Tan tsitsi tsa tyihí ra can nu ñuhu, quita iin coo tsitsi nducu can, tsa cuenda tsa ihñi. Tan tsatsi yihí ti ndaha ra, tan ticaá tsico ti ndaha ra.

<sup>4</sup> Cuhva tsa nyehe nyivi ñuhu can tyin ticaá coo can ndaha ra, quitsaha natuhún tahan ñi tan catyí ñi:

—Ra ihya nyivi tsahñi ra, tun cuvi, tyin vasu cacú ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyí ñi.

<sup>5</sup> Maa tyin ra Pablo naquisi ra tsi coo can, tan canacava ti nu ñuhu, tan nduve náa tahan ra.

<sup>6</sup> Tandihí ñi ndatú ñi náa cuhva ndaa nu tyaa ti, a náa cuhva cua cúu ra. Maa tyin tsa yaha ndatu xaan

ñi, tan nyehe ñi tyin nduve maa náa tahan ra. Tacan tan nasama ñi cuhva tsicá iñi ñi, tan quitsaha catyí ñi:

—Ra ihya cuví iin nyoo —catyí ñi.

<sup>7</sup> Yatyin ñi can canyíi ñuhu ra yihí ndaha ñuhu can. Tan nañi ra Publio. Tan vaha xaan caahan ra tsihin ndi. Tan vaha xaan tyanuú ra tsi ndi, tsa uñi quivi tsa yucú ndi vehe ra.

<sup>8</sup> Tan jutu ra ñihi xaan cuuhví ra tsihin cahñi tan tsa tsiyó ra. Tan tsahan ra Pablo tsinyehe ra nu canyíi ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvaha ra.

<sup>9</sup> Yaha can tan quitsaha tsaá cuaha nyivi cuuhví tsa iyó ñuu can. Tan nduvaha ndihí ñi.

<sup>10</sup> Tan tandihí ñi vaha xaan tyanuu ñi tsi ndi. Tan quivi quihvi ndi tsitsi iin yutun ndoo tsa cua cuhun ndi, tsaḥa ñi tandihí tsa cua cutyiñu ndi ityi cuhun ndi.

### *Nu tsaq ra Pablo ñuu Roma*

<sup>11</sup> Uñi yoo tsiyucú ndi ñuhu Malta can. Tacan tan quihvi ndi tsitsi iin yutun ndoo tsa quee nda ñuu Alejandría tsa canyíi nu cuví Egipto. Tan ndoo tsi Malta nda yaha yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux.

<sup>12</sup> Tan tsaá ndi ñuu Siracusa. Tan ican ndoo ndi uñi quivi.

<sup>13</sup> Tacan tan quita ndi tan cuahán ndi ityi yuhu ndutya ñuhu nda cuanda tsaá ndi ñuu Regio. Tan tsa inga quivi can ñihi xaan yihí tatyí tsa quitsi ityi sur tan tsicá ndi uvi quivi tan tsaá ndi ñuu Puteoli.

<sup>14</sup> Ican ñihí tahan ndi tsihin juhva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yaha can tan cuahán ndi nda ñuu Roma.

<sup>15</sup> Tan nyivi yihí cuenda ra Cristo ñuu Roma can ñihí tuhun ñi tyin cua tsaá ndi. Tan tsahan ñi tsijatahan ñi tsi ndi ityi. Juhva ñi ndatu tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyehe ra Pablo tsi ñi,

nacuhv̄a ra tyahvi nyoo tsi Nyoo. Tan ndu iin ca iñi ra.

<sup>16</sup> Cuhva tsa tsāa ndi ñuu Roma can, ra capitán can nacuhv̄a cuenda ra tsi ra iyó cuatyí can naha ra tsi ra yihí ndaha vehe caa. Tan tsahā ra can tsa coo s̄in ra Pablo. Tan jahá cuenda intuhun ñi andaru tsi ra.

*Nu caahán ra Pablo tuhun Nyoo ñuu Roma*

<sup>17</sup> Tsa yahā uñi quiv̄i tsa tsāa ndi ican, tacan tan tavā ra Pablo tyiñu na quitsi ra cuví ityi nuu tsihin nyiv̄i Israel tsa iyó ñuu Roma can naha ra. Tan cuhva tsa ndu iin ra naha, quitsahā catyí ra tsihin ra naha:

—Nyooho yañi, vasu nduve náa javahā yu tsi nyiv̄i Israel tahan yo, tan ndi nduve náa javahā yu siqui tuhun tsahnu cuhva iyó yo, maa tyin tsahā cuenda ra Israel naha ra tsi yu tsi ra ñuu Roma naha ra. Tan tsinyij̄ yu vehe caa ñuu Jerusalén ndaha ra ñuu Roma naha ra.

<sup>18</sup> Tan tsa jaqueē yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javahā yu.

<sup>19</sup> Maa tyin ra Israel tsa iyó nda ñuu Jerusalén naha ra nduxān xaan ra naha tan yacan cuenda tsican yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siqui ra naha.

<sup>20</sup> Yacan cuenda caná yu tsi nyooho tyin nacoto yu tsi ndo, tan catyí tuhun yu tsihin ndo tyin nuuhñi yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyiv̄i Israel —catyí ra Pablo.

<sup>21</sup> Tacan tan catyí ra Israel naha ra tsihin ra Pablo:

—Ña tsitó ndi tuhun yooho. Tan yoñi jacotō tsi ndi, ndi tsihin carta, tan ndi ra ñuu yo tsa queē nda Judea ña cahan ra naha tuhun yooho, tan nduve náa cahan ra naha siqui un.

<sup>22</sup> Maa tyin cuñi ndi tyaa soho ndi tuhun tsicá iñi un. Tyin tsitó ndi tyin tandih̄i ñi ityi tan caahán nyiv̄i siqui tuhun tsāa ihya —catyí ra Israel naha ra tsihin ra Pablo.

<sup>23</sup> Tacan tan natuhun tahan ra naha ndaa quiv̄i cua cuhun ra naha inga tsaha. Tsa tsāa quiv̄i can, tsāa cuaha nyiv̄i nu iyó ra Pablo. Tan quitsahā caahán ra nda tsa tuvi tan nda cuanda tsacuaa nácaa ndacá ñaha Nyoo. Tan tsihin ley Nyoo tsa tyaā ra Moisés tan tuhun tsa tyaā ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javahā ra Pablo tyin cuñi ra tsa tsinu iñi ñi tsi ra Jesús.

<sup>24</sup> Yihí ñi tsinú iñi ñi tsa caahán ra. Tan inga ñi ña tsinú iñi ñi.

<sup>25</sup> Tan ña iin tsicá iñi ñi, s̄in s̄in tuhun caahán ñi. Tan quitsahā tsinuhú ñi. Tan ra Pablo catyí ra tsihin ñi:

—Nditsa tsa cahan Tatyí Ii Nyoo tsihin ra Isaías ra cuví ndusu yuhu ra tahan tsanaha, tyin na cahan ra tsihin tsii tsaahnu yo. Tan catyí ra:

<sup>26</sup> Cuaahan tan cahan un tyehen tsihin nyiv̄i ihya:

Nyooho cua cuñi ndo tuhun Nyoo, maa tyin ña cua cutuñi iñi ndo. Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

<sup>27</sup> Tyin añima ñi tsa ndundavā xaan tsi.

Tsiñi ñi, maa tyin ña tyaá yahvi ñi.

Tan ndasí tinuu ñi, tyin tacan tan ña cua cuví nyehe ñi.

Tan ña cua cuñi ñi tsihin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñi ñi quihvi ñi tsitsi ndaha yu na janduvaha yu tsi ñi.

Tacan catyí ra Isaías jahá Tatyí Ii Nyoo tahan tsanaha.

<sup>28</sup> Coto vaha nyooho tyin vityin tan ityi nuu ca cuhun yu cua jacoto yu tsi nyiv̄i tsa ñavin nyiv̄i Israel cuví tyin jacacú Nyoo tsi ñi. Tan maa ñi cua tyaa soho ñi —catyí ra Pablo tsihin ñi.

<sup>29</sup> Cuhva tsa catyí ra Pablo tyehen, ra Israel cuahán ra naha juvin ñi caahán yuhu tahan ra naha tsa cuenda tuhun tsa cahan ra Pablo tsihin ra naha.



<sup>30</sup> Uvi cuiya ndoo ra Pablo vehe nu nyii ra cuenda yoo ñuu Roma can. Tan vaha caahán ra tsihin tandihi nyivi cuahán vehe ra.

<sup>31</sup> Tan tsihin tsa nii iñi ra tan caahán ra tuhun nácaa ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yoñi tyasí nu caahán ra.

## Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

### *Nu quitsaha tyaá ra Pablo carta*

<sup>1</sup> Yuhu ra Pablo cuví yu iin ra jahá tyiñu tyiñu ra Jesucristo. Cana Nyoo tsi yu, tan nacatsi ra tsi yu tyin caca yu jacoto yu tuhun tsa jacacú ra tsi yo tsi nyivi.

<sup>2</sup> Tan tuhun ihya cuví tsa cahan Nyoo tsihin ra cuví ndusu yuhu ra tahañ tsanaha tyin tyaa ra naha nu tutu ra.

<sup>3</sup> Juvín tuhun ihya caahán tyin Jutu Mañi yo Jesucristo, Sehe Nyoo, quitsi ra nu ñuhu ñayivi tan nanduví ra tumaa maa yo. Tan cuví ra tata ra rey David.

<sup>4</sup> Tan Nyoo jacoto ra tsi yo tsihin Tatyí lí ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra.

<sup>5</sup> Tan tsa cuenda ra Jesucristo tsaha Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nanñi cahnu nu ñuhu ñayivi tsi ra tan na tyaa yahvi ñi tsi ra.

<sup>6</sup> Tan juhva ñi ican cuví tucu nyooho tyin tsa nacatsi ra Jesucristo tsi ndo tyin cuví ndo nyivi cuenda ra.

<sup>7</sup> Jaquitsí yu carta ihya tsi tandihí nyooho tsa iyó ñuu Roma. Nyoo cuñi xaan ra tsi ndo tan cana ra tsi ndo tyin cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

### *Nu catyí ra Pablo tyin cuñi ra cuhun ra ñuu Roma*

<sup>8</sup> Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyooho tyin tandihí ñi ityi caahán nyivi tyin tsinú xaan iñi ndo tsi ra Jesucristo.

<sup>9</sup> Jahá tyiñu yu tyiñu Nyoo tsihin tsa ñi iñi añima yu. Tan caahán yu

tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo.

<sup>10</sup> Tan tsicán yu tsi ra na cuví cuhva cuñi ra, tan quitsi yu nu yucú ndo, tyin tsanaha xaan cuñi yu quitsi yu.

<sup>11</sup> Tyin cuñi yu jatyinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihi ca ndo tsi ra.

<sup>12</sup> Tsa cuñi yu cahan yu tsihin ndo cuví tuhun ihya: tsa jandu iin tahañ yo iñi yo tsihin tsa tsinú iñi yo tsi ra.

<sup>13</sup> Yañi, cuñi yu tsa coto ndo tyin cuaha xaan tsaha cuñi yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñi yu quitsi yu ñuu ndo tyin cuñi yu cahan ca yu tuhun Nyoo tsihin nyivi tyin tacan tan nducuaha ca ñi tsinu iñi tsi ra, tumaa javaha yu tsihin nyivi inga ca ñuu.

<sup>14</sup> Tyin tsa ñiñi cuñi tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahañ ñi nyivi tsa tsitó xaan tan nyivi soho.

<sup>15</sup> Yacan cuenda, cuñi yu cahan yu tuhun ra Cristo tsihin nyooho tsa iyó ndo Roma ihya.

### *Tuhun Nyoo iyó xaan tunyee iñi itsi*

<sup>16</sup> Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihí nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahan ndi tuhun ra Cristo, maa tyin vityin caahán ndihí tucu ndi tsihin nyivi tsa ñavin nyivi Israel cuví.

<sup>17</sup> Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvín ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyivi tsa janduvahá Nyoo añima, iyó ñi ñayivi tsa tsihin tsa tsinú iñi ñi tsi ra.”

### *Tandihí nyivi tan iyó cuatyí ñi*

<sup>18</sup> Nyehé yo tyin Nyoo, ra nyaá gloria, tatsí tuñi ra tsi nyivi ña vaha tsa

javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyivi tsa nditsa.

<sup>19</sup> Tsitó ñi tsa iyó Nyoo tyin juvin ñi maa ra janahá can tsi ñi.

<sup>20</sup> Ña cuví catyi yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihi tsa javaha ra. Tsanaha javaha ra ñuhu ñayivi tan yacan janahá tsi yo tyin iyó Nyoo tan iyó tunyee iñi tsi ra. Nyivi tsa ña cuñi coto tsi Nyoo ña cua coo tucahnu iñi tsi ñi.

<sup>21</sup> Vasu ndi maa tsitó ñi tsa iyó Nyoo tsihin tsa nyehé ñi tandihi tsa javaha ra, ña cuñi ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayivi tyaá jiñi ñi. Tan tsa cuenda yacan ndusoho ñi.

<sup>22</sup> Vasu ndi maa catyi ñi tyin tsitó xaan ñi, maa tyin ña nditsa tyin nduve náa tsitó ñi.

<sup>23</sup> Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyivi tuhvá tsihi, tan nda cuanda tsitoho tsa caá tumaa caá saa, tan coo, tan quití iyó cumi tsaha.

<sup>24</sup> Yacan cuenda nacoq Nyoo tsi ñi nu tsa caquiñi tsa javahá ñi. Tan javahá ndihi tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu.

<sup>25</sup> Ña cuñi ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa javaha Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñi tsi jacahnu yo tacan ñi maa. Na cuví tsi tacan.

<sup>26</sup> Yacan cuenda jaña ndaha Nyoo tsi ñi na javaha ñi tsa tsahá ticanuu tsi ñi. Tyin nda cuanda ñiñaha tan tsicoó ñi tsihin ñi nduyi, tan ña vaha tacan.

<sup>27</sup> Tan juvin ñi tacan javahá tucu rayi, nacoó ra naha tsa iyó ra naha tsihin ñasihi ra naha, tan iyó ra naha tsihin ra ndusihi naha ra tan tsahá ra naha ticanuu tsi yañi ra naha. Tan tsa

cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

<sup>28</sup> Tan tsa cuenda tsa ña cuñi ca ra can naha ra tan ñi ican naha ñi nacoto ñi tsi Nyoo, nacoq ra tsi ñi naha ñi na caca iñi ñi tsa cuñi maa ñi.

<sup>29</sup> Tyin tandihi nuu tsa ña vaha javahá ñi. Ñiñaha tsicoq ñi tsihin rayi tan ña tindaha ñi. Rayi tsicoq ra naha tsihin ñaha tan ña tindaha ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñi ñi nyivi. Cañi tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu.

<sup>30</sup> Caahán ñi ndavaha ñi siqui inga nyivi. Ndasí cuñi ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi sihi ñi.

<sup>31</sup> Ña cuñi ñi cutuñi iñi ñi. Ña javahá ñi tsa catyi ñi tyin cua javaha ñi. Ña cuñi maa ñi tsi ndi intuhun nyivi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyivi.

<sup>32</sup> Tsitó vaha ñi tyin Nyoo ña cuñi ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyivi javahá tacan, si xaan cuñi ñi.

## 2

### *Tatsí tuñi Nyoo tsi nyivi maa tyin tsihin tsa nditsa*

<sup>1</sup> Nyooho tsa nyehé cuatyí tsa javahá inga nyivi, iyó cuatyí ndo tyin jacutuñi ndo tsi ñi tsa cuenda cuatyí javahá ñi. Yoñi jaha ndaa nyooho cuví ndo. Tyin tsa jacutuñi ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihi ndo cuatyí tsa javahá ñi.

<sup>2</sup> Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra.

<sup>3</sup> Nyooho tsa jacutuñi tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo.

<sup>4</sup> ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñi ra tsa nasama ndo cuhva iyó ndo.

<sup>5</sup> Maa tyin nyooho jandavá xaan ndo aña ndo. Tan ña cuñi ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa.

<sup>6</sup> Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo.

<sup>7</sup> Nyoo cua cuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñi ñi coo cuii ñi tsihin ra. Cua ñihi ñi tandihi yacan tyin nanducú ñi can.

<sup>8</sup> Maa tyin cuaha ca tsa uhvi cua janyehe ra tsi nyivi tsa javahá tsa cuñi maa ñi, ñi tsa ña tyaá yahvi tuhun nditsa, tan javahá ñi tsa ña vaha.

<sup>9</sup> Cuaha xaan tundoho tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví.

<sup>10</sup> Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo aña ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

<sup>11</sup> Tyin Nyoo inducu ñi cuñi ra nyehé ra tsi iin yo tan tsi inga yo. Ña tavá tsiyo ra ndi intuhun yo.

<sup>12</sup> Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can.

<sup>13</sup> Tyin nyivi tsa javahá cuhva catyí

ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi.

<sup>14</sup> Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi.

<sup>15</sup> Tyin tsihin cuhva iyó ñi, janahá ñi tyin iyó ley Nyoo tsitsi aña ñi. Tsa tsiñi tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi.

<sup>16</sup> Tacan cua cuvi quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

### *Nyivi Israel nyicún ñi ley Nyoo tsa tyaá ra Moisés*

<sup>17</sup> Maa tyin nyooho nyivi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaa ñi maa ndo tyin catyí ndo tyin nyivi Nyoo cuví ndo.

<sup>18</sup> Tan tsitó ndo cuhva cuñi Nyoo tan ley can janahá tsi tsi ndo tsa nacatsí ndo tsa vaha.

<sup>19</sup> Tan cuñi tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsín ndo nu yucú nyivi nu naa, cuñi maa ndo.

<sup>20</sup> Tan cuñi tucu ndo tyin tsitó ndo tandihi ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo.

<sup>21</sup> Tatun tsitó ndo jacuahá ndo tsi inga nyivi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhu ndo?

<sup>22</sup> Juvin ñi catyí ndo tyin ña vaha coo inga ñaha tsi iin rayii, o inga rayii tsi iin ñaha, ¿nacuenda tyin maa ndo javahá ndo tacan? Ndasí cuñi ndo nyehe ndo tsitoho, ¿nacuenda tyin suhu ndo ndaha tyiñu tsa iyó tsitsi vehe ñuhu can?

<sup>23</sup> Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra.



24 Yacan cuenda catyí tuhun Nyoo tyehen: “Nyivi tsa ñavin nyivi Israel cuví, caahán ñi ndavaha ñi siqui Nyoo tsacatyí nyooho.”

25 Nditsa tyin circuncición tsa cuví tuñi Nyoo, tsa janahá tyin cuví yo nyivi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can.

26 Maa tyin rayii tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can.

27 Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo.

28 Vasu ndi maa cuví ndo nyivi Israel tan nyisó ndo tuñi ra, ña cuví cuví ndo nyivi Nyoo tun nduve ley ra iyó añima ndo.

29 Tyin nyivi iyó ley Nyoo añima, ñi ican cuví nyivi Nyoo. Tyin maa Tatyí li Nyoo tyaá tuñi ra añima ñi, tan ñavin cuñu ñuhu ñi. Tatyí li Nyoo javaha can, ñavin ley tsa tyaá ra Moisés. Nyivi ihya cua cuví nyivi vaha nuu Nyoo, tan ñavin nuu nyivi.

### 3

1 ¿Nacaa jatyinyee tsa cuví yo nyivi Israel tsi yo? ¿O nacaa jatyinyee tuñi Nyoo tsi yo?

2 Cuaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tsaha ra ley maa ra tsi yo tsa cuví yo nyivi Israel.

3 ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsinú iñi yo tsi ra?

4 ¡Ña cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyivi vatya ñi, ra ican javahá ra tandihí tsa caahán ra. Tyin catyí nu tutu ra tyehen:

Jutu Mañi yu, cua nyehe nyivi tyin ña vatya un.

Tan cua coto ñi tyin nditsa tsa caahán un.

5 Tsa caquiñi tsa javahá tandihí yoo, tsa iyó nu ñuhu ñayivi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyivi tyin ña vaha tsa tatsi tuñi Nyoo tsi yo tyin janahá yo tyin vaha ra?

6 Nyivi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

7 Tatun javahá nyivi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa.

8 Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyivi tyin Nyoo vaha ra. Yihí ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siqui ndi.

#### *Tandihí yo tan iyó cuatyí yo*

9 Tan nácaa ¿a vaha ca yoo tsa cuví yo nyivi Israel tan ñavin ca inga nyivi? Ña vaha ca yo. Tyin tsa yahá janahá yu tsi ndo tyin tandihí yo tan iyó cuatyí yo. An cuví yo nyivi Israel, o ña cuví yo nyivi Israel, maa tyin ndacá ñaha cuatyí tsi yo.

10 Tacan catyí nu tutu Nyoo, nu catyí tsi tyehen:

Ndi intuhun nyivi vaha nduve iyó.

11 Nduve nyivi cuñí cutuñi iñi tuhun Nyoo.

Yoñi cuñí nanducu tsi ra.

12 Tandihí ñi nacoq ñi tsi Nyoo, tan tandihí ñi tan cuanaq ñi.

Ndi intuhun ñi tan ña javahá ñi tsa vaha.

13 Jucun ñi cuví tsi tumaa iin ñaña ndiyi tsa ticohó.

Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

14 Maa ñi tsa ndvaha ñi caahán ñi.

- 15 Yatyi xaan tsahñi ñi tsi tahan ñi.  
 16 Janyehé ñi tundoho tan tucuihya iñi tsi nyivi tsihin cuhva iyó ñi.  
 17 Tan ña tsitó ñi nácaa coo taxin ñi tsihin Nyoo, tan ndi tsihin nyivi.  
 18 Ndi ña tsicá iñi ñi tatun coo iin quivi cua tatsi tuñi Nyoo tsi ñi, catyi tuhun Nyoo nu tutu ra.

19 Tsitó yo tyin tandihi tsa caahán ley Nyoo tsa tyaa ra Moisés, cuvi tsi tsa cuenda nyivi tsa yihí ndaha ley can, tyin tacan tan ña cuvi catyi ñi tyin nduve cuatyí ñi iyó. Maa tyin coto tandihi nyivi iyó nu ñuhu ñayivi tyin cua tatsi tuñi Nyoo tsi ñi tsa cuenda cuatyí ñi.

20 Ley can ña cuvi janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

#### *Tsa cuenda tsa tsinú iñi yo tsi Nyoo tan nduvaha yo nuu ra*

21 Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuvi ndusu yuhu Nyoo janahá nácaa coo vaha yo tsihin Nyoo.

22 Tyin tsa cuenda tsa tsinú iñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuvi yo nyivi Israel o ñavin.

23 Tandihí yo tan iyó cuatyí yo, tan tsa cuenda yacan ña cuvi quihvi yo nu ndacá ñaha Nyoo.

24 Maa tyin tsahá maa ra tsa vaha ra tsi yo, tan yacan jahá tsa naquihín cuenda ra tsi yo tumaa tsatyin vaha yo, tyin tsa yahá tyahvi ra Cristo Jesús tsa cuenda cuatyí yo. Tan yacan cuenda ña tsicán ca ra yahvi tsi yo.

25 Nyoo jaquitsi ra tsi ra Cristo tyin cúu ra nu cruu tan cati ra ñiñi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuvi, tyin nyehe nyivi tyin Nyoo javahá ra tsa vaha. Tahan tsanaha, Nyoo ña tñin cuenda ra cuatyí nyivi tsa cuenda tyin cua quitsi ra Cristo tan janaa ra cuatyí ñi.

26 Tan tacan cuvi tyin vityin nyehé nyivi tyin Nyoo tacan ñi maa vaha ra, tan naquihín ra tsi tandihí yo tsa tsinú iñi tsi ra Jesús tumaa tsatyin vaha yo.

27 ¿A cuvi nduyaa yo vityin? Ña cuvi. ¿Nacuenda? Tsa cuenda tyin ña cuvi catyi yo tyin javahá yo tandihí tsa catyi ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra.

28 Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyi ley o ña javahá yo itsi.

29 ¿A Nyoo cuenda nyivi Israel ñi cuvi Nyoo? ¿A ñavin juvin ñi cuvi tucu ra Nyoo nyivi tsa ñavin ñi Israel cuvi? Juvín ñi cuvi tucu ra Nyoo ñi can.

30 Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyivi Israel, o nduve.

31 Tatun tacan, ¿a cuñi tsi catyi tyin nduve ca yahvi nyaá ley tsahnu can? ¡Ñavin tsa nduve yahvi nyaá tsi! Cahnu cuvi tsi, tan vityin tsihin tunyee iñi maa ra Cristo janahá yo tyin nditsa tsa cahnu cuvi tsi.

## 4

### *Cuhva tsicoo ra Abraham janahá tsi tsi yo nácaa nduvahá yo nuu Nyoo*

1 ¿Náa catyi yo tsa cuenda ra Abraham, tsii tsahnu yo? ¿Nacuenda naquihín cuenda Nyoo tsi ra tumaa tsatyin vaha ra?

2 Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuvi nduyaa ra tsihin can, maa tyin ñavin nuu Nyoo.

3 ¿Náa catyi nu tutu Nyoo? Catyi tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra.

4 Vaha, vityin cua cuhva yu iin cuhva tsi ndo: Ra jahá tyiñu, quihín

ra yahvi tsa cuenda tyiñu jahá ra tan ña tuhvá nyívi cuhva maa xuhun tsi ra tun ña jahá tyiñu ra.

<sup>5</sup> Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyívi iyó cuatyí tsa ña nducú cacu tsihin tsa javahá ñi cuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra.

<sup>6</sup> Ra David cahān ra siqui tsa sií cuví tsi nyívi tsa naquihín cuenda Nyoo tumaa tsatyin vaha ñi tan ña tñin cuenda ra cuatyí tsa javahā ñi.

<sup>7</sup> Tyehen catyí ra David:

Sií xaan cuví tsi nyívi tsa jahā Nyoo tucahnu iñi tsi tan ña jahā ra cuenda cuatyí ñi.

<sup>8</sup> Sií xaan cuví tsi ñi tsa ña tñin cuenda Nyoo cuatyí.

<sup>9</sup> ¿A cuñí maa ndo tyin tsa cuenda nyívi nyisó tuñi Nyoo ñi cuví tusi iñi ihya, o cuví tucu tsi tsa cuenda nyívi ña nyisó tuñi can? Tsa yaha catyí yo tyin Nyoo jahā ra tyin vaha ra Abraham tsa cuenda tsa tsinú iñi ra tsi ra.

<sup>10</sup> ¿Ama javahā Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yaha? Ñavin tsa tsa yaha, tyin tsa ndi cumañi ca.

<sup>11</sup> Yaha tsa naquihín Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yaha nduvahā ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihí yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo.

<sup>12</sup> Nditsa tyin ra Abraham cuví tucu ra jutu nyívi Israel, tandihí ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnu yo, quívi tsa ñaha ca cunyaa tuñi can tsi ra.

*Tsihin tsa tsinú iñi yo ñihí yo tsa tsahá Nyoo tsi yo*

<sup>13</sup> Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayívi tsihin ra. Maa tyin tsa cahān Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihín ra tsi ra tumaa tsatyin vaha ra.

<sup>14</sup> Tun tsatyin maa ñi maa nyívi tsa javahá cuhva catyí ley, cua ñihi tsa cua cuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra.

<sup>15</sup> Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

<sup>16</sup> Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihí yoo tsa cuví tata ra Abraham. Ñavin maa ñi nyívi tsinú iñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihí tucu nyívi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra Abraham. Ra ihya cuví jutu tandihí nyívi tsa tsinú iñi tsi Nyoo.

<sup>17</sup> Tyin catyí ra nu tutu ra tyehen: “Yooho cua cuví tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú iñi ra tsi Nyoo, tyin Nyoo janandotó ra ndiyí tan caahán ra tuhun tsa ñaha ca coo tumaa tsatyin tsa iyó tsi.

<sup>18</sup> Ra Abraham tsa tsahnu xaan ra quívi tsa catyí Nyoo tyin cua coo sehe ñasihi ra, tan tsitó ra tyin ña cuví ca coo sehe ñi. Maa tyin tsinú iñi ra tan ñihí ra tsa cahān Nyoo tsihin ra. Tan cuví ra jutu nyívi cuaha, tumaa cahān maa Nyoo tsihin ra: “Tyehen cua nducuaha nyívi tata un”.

<sup>19</sup> Vasu ndi maa tsa yatyin ña iin cientu cuiya ra Abraham, ña jandihí

ra tsa tsinú iñi ra. Tahan ñi maa ra tan ña Sara ñasihí ra, ña cuvi ca coo sehe ñi, tyin tsa cuyatyin cuii cúu ñi tyin tsahnu xaan ñi.

<sup>20</sup> Maa tyin ña ndu uví iñi ra tsa cua ñihi ra tsa catyí Nyoo tyin cuhva ra tsi ra. Tsinú iñi ra tsihin tsa ñi iñi añima ra. Tan ña jandihí ra tsa nyitá iñi ra tsi Nyoo. Tan jacahnú ra tsi Nyoo,

<sup>21</sup> tsa cuenda tyin tsitó vaha ra tyin Nyoo iyó tunyee iñi tsi ra tsa javaha ra tsa catyí ra tsihin ra.

<sup>22</sup> Yacan cuenda Nyoo naquihín ra tsi ra tsa cuenda tsa tsinú iñi ra tsi ra.

<sup>23</sup> Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú iñi ra tsi ra, ñavin tsa cuenda ra Abraham ñi cuvi tsi,

<sup>24</sup> tyin tsinyaa tucu tsi tsa cuenda yoo. Tyin naquihín Nyoo tsi yo tsa cuenda tsa tsinú iñi yo tsi ra, tyin juvin ra janandoto tsi ra Jesús, Jutu Mañi yo.

<sup>25</sup> Ra Jesús quitsí ra quitsí cúu ra tsa cuenda cuatyí yo, tan nandoto ra tyin tacan tan cuvi nduvaha yo nuu Nyoo.

## 5

### *Tsa cua ñihi yo tsa cuenda tsa nacoq vaha yo tsihin Nyoo*

<sup>1</sup> Tsa yahá nduvahá yo nuu Nyoo tsa cuenda tsa tsinú iñi yo tsi ra. Tan vityin iyó vaha yo tsihin ra jahá Jutu Mañi yo Jesucristo.

<sup>2</sup> Tyin tsa cuenda ra Cristo ñihí yo tsa vaha Nyoo tyin tsinú iñi yo tsi ra. Tan iin cuñí yo tyin tsa naquihín yo can. Tan sii cuñí yo tyin cua cuhva ra tsa cahnu cuvi yo tan javaha yo tsa cuñí maa ra tyin javaha yo.

<sup>3</sup> Tan ñavin tsa cuenda yacan ñi taahán tsi cusí iñi yo, tyin taahán tucu tsi cusí iñi yo tun nyehé yo tundoho. Tyin tsitó yo tyin tun cunyeé iñi yo nyehé yo tundoho, tacan cua cunyeé iñi yo cuatu yo nda cuanda ñihi yo tsa cua cuhva Nyoo tsi yo.

<sup>4</sup> Tatun cunyeé iñi yo yahá yo tandihí tundoho, sii cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra.

<sup>5</sup> Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí li ra tsa tsahá ra coo añima yo janahá tsi tsi yo tyin cuñí xaan ra tsi yo.

<sup>6</sup> Tsanaha yoo ña ñihí yo cuhva jacacu maa yo tsi yo. Tacan tan quivi tahán maa tsi quitsí ra Cristo, quitsí cúu ra tsa cuenda cuatyí yo.

<sup>7</sup> Tsitó yo tyin ndi intuhun yo tan ña cana iñi yo cúu yo tsa cuenda inga nyivi, vasu ndi maa vaha ñi. Maa tyin tun vaha xaan iñi nyivi can vasiqú cahnya iñi iin yo cúu yo tsa cuenda ñi.

<sup>8</sup> Maa tyin Nyoo jaquitsí ra tsi ra Cristo, tan yacan janahá tsi yo tyin cuñí xaan ra tsi yo. Quitsí ra quitsí cúu ra tsa cuenda yo vasu ndi maa iyó xaan cuatyí yo.

<sup>9</sup> Tan tsa cuenda tsa tsihí ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quivi cua tatsi tuñi Nyoo tsi nyivi ña tsinú iñi tsi ra.

<sup>10</sup> Tahán tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsihí ra Cristo, Sehe ra. Yacan cuenda tsa nyitá vaha iñi yo tyin cua jacacu ra tsi yo tsa cuenda tsa iyó yo ñayivi Sehe ra, tyin tsa iyó vaha yo tsihin ra.

<sup>11</sup> Tan ñavin yacan ñi, taahán tucu tsi cusí iñi yo tsihin Nyoo tyin tsa cuenda Jutu Mañi yo Jesucristo tan nduvahá iyó yo tsihin ra.

### *Ra Adán tan ra Cristo*

<sup>12</sup> Tsanaha intuhun ñi rayí tsicoq cuatyí, tan tsa cuenda intuhun ñi ra can tsaq cuatyí naní ñuhu ñayivi tan tsicoq tuhun tsiihí. Tan tuhun tsiihí can nacuñá can tyin tandihí nyivi tan tsicoq cuatyí ñi.

<sup>13</sup> Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña tñ cuenda Nyoo cuatyí ñi tsa cuenda tyin nduve ley iyó.

<sup>14</sup> Maa tyin nda cuanda quivi tsicoq ra Adán tan nda cuanda quivi tsicoq ra Moisés, tsindaca ñaha tuhun tsiihí tsi tandihí nyivi tyin iyó cuatyí tandihí



ñi, vasu ndi maa ña javahá ñi tumaa javahá ra Adán tsa ña tyaa yahvi ra tsa cahán Nyoo tsihin ra. Ra Adán quitsj ra tsihin cuatyí, maa tyin ra Cristo quitsj ra jacacú ra tsi yo.

<sup>15</sup> Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihi cuaha nyivi. Tacan tucu vityin, Nyoo jacacú ra tsi yo tsa cuenda intuhun rayi, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihi nyivi cuví tsi.

<sup>16</sup> Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihi nyivi. Maa tyin vityin Nyoo ña cuñí ra yahvi tan jacacú ra tsi yo. Naquihin ra tsi yo tumaa tsatyin vaha yo, vasu ndi maa cuaha cuatyí yo tsicoo.

<sup>17</sup> Nditsa tyin quitsaha ndacá ñaha tuhun tsiihí tsi tandihi nyivi jahá cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayivi tsa tan yihí ndaha ñi tsi ñi tan tsi nu ña vaha jahá intuhun rayi, ra Jesucristo.

<sup>18</sup> Nyoo tatsí tuñi ra tsi tandihi nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo.

<sup>19</sup> Cuñí tsi catyí tyehen: Tsa cuenda tsa ña tyaa yahvi iin rayi tsa cahán Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cua nduvaha nuu Nyoo tsa cuenda tsa tyaa yahvi inga ra tsa cahán Nyoo. Tan ra ican cuví ra Cristo.

<sup>20</sup> Nyoo tsahá ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo.

<sup>21</sup> Tahán tsanaha, cuatyí yo quitsj ndaca tuhun tsiihí, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

## 6

*Ña cua javaha ca yo tsa caquiñi tyin cua javaha yo cuhva catyí ra Cristo*

<sup>1</sup> ¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo?

<sup>2</sup> Ña vaha. Tyin yoo tsa tsa ndu uvi iñi cuatyí tumaa tsa tsihi cuatyí yo cuví can. Tan yacan cuenda, ña cuví ca javaha yo tsa caquiñi vityin.

<sup>3</sup> ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñí tsi catyí tyin tsa yaha tsihi yo tsihin ra.

<sup>4</sup> Tsa quihví yo tsitsi ndutya tsa tsicoo ndutya yo cuví tsi tumaa tsa tsihi yo tan quihví ñuhu yo tsihin ra Cristo tsa tsihi ra. Tan tumaa tsa nandoto ra Cristo jahá Nyoo tsihin tunyee iñi ra, tacan nandoto tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayivi tsa tsihin ra.

<sup>5</sup> Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan cua nandoto tucu yo tumaa nandoto ra.

<sup>6</sup> Tan tsitó yo tyin tandihi cuhva tsicoo yo tahán tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí.

<sup>7</sup> Tyin nyivi tsa tsa yaha tsihi, ña cuví ca javaha ñi tsa caquiñi.

<sup>8</sup> Tan yoo tsa tsa tsihi tsihin ra Cristo, nyitá iñi yo tyin cua coo yo tsihin ra.

<sup>9</sup> Tsitó yo tyin ra Cristo nandoto ra tsa yaha tsihi ra, tan vityin ña cúu

ca ra tyin nduve ca tunyee iñi iyó tsi tuhun tsihi tsa cahñi can tsi ra.

<sup>10</sup> Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo.

<sup>11</sup> Tan tacan tucu nyooho, ña javaha ca ndo tsa caquiñi. Ña naa iñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñí Nyoo tsihin tsa iin ñi cuví ndo tsihin ra Cristo Jesús Jutu Mañi yo.

<sup>12</sup> Yacan cuenda ña cuhva ca ndo tsa jaha canaa cuñu ñuhu cuatyí ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi.

<sup>13</sup> Ña cuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yaha tsihi yo tan nandoto yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha.

<sup>14</sup> Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

### *Musu tsa javahá tsa vaha*

<sup>15</sup> ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin.

<sup>16</sup> Nyooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahvi yo tsi can. Maa tyin tun tyaá yahvi yo tsi Nyoo, cua cuví yo nyivi vaha nuu ra.

<sup>17</sup> Tyahvi nyoo tsi Nyoo, tyin vasu ndi maa nu quitsi tsi cuví ndo musu tsa caquiñi maa tyin vityin tyaá yahvi ndo tuhun Nyoo tsa cutuhva ndo tsihin tsa ñi iñi aña ndo.

<sup>18</sup> Tsa yaha ndatsi cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo.

<sup>19</sup> (Caahán yu tsihin ndo cuhva tsa ña yii ñi cutuñi iñi ndo tyin nyooho ñaha ca cutuñi vaha iñi ndo tuhun Nyoo.) Tumaa tsa tsaha cuenda ndo cuñu ñuhu ndo tsi tsa caquiñi tahañ tsanaha tan javaha ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayivi cuiti, tan javaha ndo maa ñi maa tsa vaha nuu ra.

<sup>20</sup> Quiivi tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo.

<sup>21</sup> Maa tyin nduve náa ñihí ndo tsihin can, tan vityin cahán nuu ndo tsa cuenda tsa javaha ndo tsanaha, tyin maa ñi tuhun tsihi tsahá can.

<sup>22</sup> Maa tyin vityin ña ndacá ñaha ca cuatyí tsi ndo tyin tsa tsaha cuenda ndo tsi ndo tsi Nyoo. Tan vaha xaan tyin maa ñi tsa cuñí Nyoo javahá ndo. Tan nu cua ndihí tuhun cua coo cuivi ndo tsihin Nyoo.

<sup>23</sup> Nyivi tsa javahá tsa caquiñi, cua cúu ñi. Maa tyin Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

## 7

### *Ley tsahnu ña ndacá ñaha ca tsi tsi nyivi yihí cuenda ra Cristo*

<sup>1</sup> Yañi, nyooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi.

<sup>2-3</sup> Tumaa iin ñaha tsa iyó yii, catyí ley tyin coo ña tsihin yii ña nda cuanda cúu ra. Maa tyin juvin ñi catyí tucu ley tun cúu yii ña tan nandoo ndaahvi ña, ña cua quihí ndaha ca ley can tsi ña. Tan cuví tindaha ña tsihin inga rayii tan ña cua coo cuatyí ña. Maa tyin tsitsi tsa ndi iyó yii ña, ña cuví coo ña tsihin inga rayii, tyin tun cua javaha ña tacan, cua coo cuatyí ña nuu Nyoo.

4 Tan tacan tucu nyooho yañi. Tسانaha ley Nyoo tsa tyaa ra Moisés yihí ndaha tsi tsi ndo tumaa yihí ndaha iin rayii tsi ñasihí ra. Maa tyin vityin tsa yahá tsihí ndo tan ña ndacá ñaha ca ley can tsi ndo. Tyin vityin ndacá ñaha inga rayii tsi ndo tan juvin ra cuví ra Cristo, ra tsa nandoto jahá Nyoo. Tyehen cuví tsehe tyin tacan tan cuatyíñu Nyoo tsi yo.

5 Tahán tsanaha tsicoo yo cuhva cuñi cuñu ñuhu yo tan ley tsahnu tsa tyaa ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsahá cuñi ca yo javaha yo tsa caquiñi tsa cuñi cuñu ñuhu yo. Tan yacan tsahá tuhun tsihi tsi yo.

6 Maa tyin vityin ña ndacá ñaha ca ley tsahnu can tsi yo, tyin tsa yahá tsihí cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí Ii Nyoo tsi yo, na jaha tyiñu yo tyiñu Nyoo tan ña javaha ca yo tumaa javahá yo quivi yihí ndaha ley tsahnu tsi yo.

#### *Ley Nyoo janahá tyin iyó cuatyí yo*

7 ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yu náa cuví cuatyí. Tan ndi ña cua coto yu tyin ña vaha nyiyo iñi yu tsa tsi inga nyivi, tun tsatyin ña catyí ley can tyin ña vaha nyiyo iñi yo.

8 Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsito yu ley Nyoo, quivi can quitsahá tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha.

9 Quivi tsa ña tsitó yu náa cuñi tsi catyí ley Nyoo tsa tyaa ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tsihí yu jahá cuatyí yu.

10 Catyí ley can tyin tatun tyaa yahvi nyivi itsi, cua coo cuñi ñi ñayivi nyito. Maa tyin yuhu tsihí yu nuu Nyoo jahá ley can tyin ña tyaa yahvi

yu itsi. Tyin catyí tsi tyin nyivi tsa ña tyaa yahvi itsi, taahán tsi cunaa ñi nuu Nyoo.

11 Cuatyí yu tsatyíñu can ley can, tan jandaví ñaha can tsi yu, tyin catyí ley tyin tatun ña tyaa yahvi yo itsi, taahán tsi cunaa yo nuu Nyoo.

12 Ley can ii xaan tsi tyin tuhun tsahá maa Nyoo cuví tsi, tan tandihí tsa catyí ra tyin javaha yo, vaha tsi, tan cuiti xaan tsi.

13 Tan ñavin ley vaha ihya jacunaa tsi yu. Tyin tsa ña vaha tsa javahá yu, yacan jacunaa tsi yu. Yacan cuenda cunaa yu nuu Nyoo tyin ley vaha can janahá tsi yu tyin cuatyí cuví tsa javahá yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuvi cuatyí javahá yo.

#### *Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo*

14 Tan tsitó yo tyin maa Tatyí Ii Nyoo tsahá ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu.

15 Ña cutuñi iñi yu náa taahán yu, tyin tsa vaha tsa cuñi yu javaha yu, ña javahá yu can. Maa tyin javahá yu tsa ña vaha tsa ña cuñi yu javaha yu.

16 Tan tsa javahá yu tsa ña cuñi yu javaha yu, tsihin yacan nacotó yu tyin ley Nyoo vaha tsi.

17 Yacan cuñi tsi catyí tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha.

18 Yuhu tsitó yu tyin cuñu ñuhu yu nduve tsa vaha iyó. Vasu ndi maa cuñi yu javaha yu tsa vaha, ña cuví javaha yu can.

19 Ña javahá yu tsa vaha tsa cuñi yu javaha yu, jañihí ca yu javaha yu tsa ña vaha tsa ña cuñi yu javaha yu.

20 Tan tatun javahá yu tsa ña cuñi yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

<sup>21</sup> Nacotó yu tsa taahán yu: tun cuñí yu javaha yu tsa vaha, yatyí xaan ca javahá yu tsa ña vaha.

<sup>22</sup> Tsitsi añima yu taahán xaan iñi yu ley Nyoo.

<sup>23</sup> Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihí ndaha can tsi yu tumaa yihí ndaha ra vitya tsi iin ra nyíí vehe caa.

<sup>24</sup> ¡Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñí cuñu ñuhu yu tan ña cuhun yu anyaya?

<sup>25</sup> Tsahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñí iñi yu tyin cuñí tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñí cuñu ñuhu yu javaha yu, yacan cua quihí ndaha tsi yu.

## 8

*Tatyí Ii Nyoo jatyinyeé tsi tsi yo tan cuví coo yo ñayivi tsa*

<sup>1</sup> Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi cuhva cuñí Tatyí Ii ra.

<sup>2</sup> Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí Ii Nyoo tsi yo. Tan juvin tsi tsahá ñayivi tsa coo yo tsa cuenda tsa iin ñi cuví yo tsihin ra Cristo Jesús.

<sup>3</sup> Nyoo javahá ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsi ra tsi Sehe ra. Cuví ra tumaa rayí ñuu ñayivi tan tyahvi ra tsa cuenda cuatyí yo tyin tacan tan cundihí tsa javahá yo cuhva cuñí cuñu ñuhu yo.

<sup>4</sup> Javahá ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyí Ii Nyoo.

<sup>5</sup> Nyivi tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa tyin nyivi tsa iyó cuhva cuñí Tatyí Ii Nyoo tsicá iñi ñi cuhva cuñí Tatyí Ii Nyoo.

<sup>6</sup> Nyivi tsa tsicá iñi maa ñi maa tsa cuñí cuñu ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyí Ii ra, cua coo yo ñayivi tsa, tan cua coo tsa taxin añima yo.

<sup>7</sup> Nyivi tsa tsicá iñi cuhva cuñí cuñu ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley ra tan ndi ña cuví javaha ñi can.

<sup>8</sup> Yacan cuenda nyivi tsa nducú tsa cuñí cuñu ñuhu ñi, ña cuví javaha ñi cuhva taahán iñi Nyoo.

<sup>9</sup> Maa tyin nyooho ña iyó ca ndo cuhva cuñí cuñu ñuhu ndo, tyin iin ñi cuví ndo tsihin Tatyí Ii Nyoo, tun nditsa tsa iyó Tatyí Ii Nyoo añima ndo. Nyivi tsa nduve Tatyí Ii ra Cristo iyó añima, ñavin nyivi cuenda ra Cristo cuví ñi.

<sup>10</sup> Maa tyin tun iyó ra Cristo añima ndo, nyitó añima ndo tyin janduvahá Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jahá cuatyí.

<sup>11</sup> Nyoo janandoto ra tsi ra Jesús tsa yaha tsihi ra. Tan tacan tucu nyooho, tatun iyó Tatyí Ii ra añima ndo, cua janandoto ra cuñu ñuhu ndo tsihin Tatyí Ii ra tsa iyó añima ndo.

<sup>12</sup> Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñí cuñu ñuhu yo.

<sup>13</sup> Tyin tatun maa ñi maa cuhva cuñí cuñu ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí Ii Nyoo tan cuahán jandihí ndo tsa javahá ndo tsa caquiñi tsa cuñí cuñu ñuhu ndo, cua coo nyito ndo.

<sup>14</sup> Tyin tandihí yoo tsa javahá cuhva jaquihín ityi Tatyí Ii Nyoo, sehe Nyoo cuví tsi yo.

<sup>15</sup> Nyooho ña naquihín cuenda ndo Tatyí Ii Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí Ii Nyoo tsa tsahá



tsa cuvi ndo sehe Nyoo. Tan juvin ñi Tatyí li Nyoo tsahá tsa cahan yo tyeheh tsihin Nyoo: “Tyatya”. Yacan cuenda ña taahán tsi nayuhvi ndo.

<sup>16</sup> Tan Tatyí li ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo.

<sup>17</sup> Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehe ra Cristo tundoho, quívi cua tahan tsi, Nyoo cua jacahnu ra tsi yo iin caa ñi tsihin ra Cristo.

<sup>18</sup> Tsitó yu tyin tundoho tsa nyehé yo vityin, luhlu cuii ñi cuví tsi tan ña cuví jandu inducu yo itsi tsihin tsa sii caá tsa cua nyehe yo quívi tahan tsi.

<sup>19</sup> Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñí tsi naha tsi nyehe tsi naha tsi tsi nyívi cuví sehe ra.

<sup>20</sup> Tandihí tsa javahá ra, tsa iyó nu ñuhu ñayívi tan andívi, tsa tiví tsi. Vasu ña cuñí tsi tiví tsi, maa tyin Nyoo tsahá ra tsa tiví tsi tsa cuenda cuatyí tsa javahá nyívi. Maa tyin catyí ra tyin coo quívi cua ndutsaa nyico tsi.

<sup>21</sup> Tandihí tsa javahá Nyoo tan cua ndutsaa tsi inga tsaha, cua quita nuña tsi tan ña cua tiví ca tsi, tyin cua nasama Nyoo cuhva caá tsi vityin. Tan sii xaan cua cuñí tsi iin caa ñi tsihin tandihí sehe Nyoo tyin ña cua tiví ca tsi.

<sup>22</sup> Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña.

<sup>23</sup> Tacan tucu yoó tsa naquihín cuenda Tatyí li tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñí yo tsa tahan ñi tsi quívi tsa nasama Nyoo cuhva iyó cuñu ñuhu yo tan nyehe tandihí tsa javahá ra tyin cuví yo sehe ra.

<sup>24</sup> Vasu ndi maa ñaha ca ñihi yo tandihí can maa tyin tsitó yo tyin cua ñihi yo can tyin tsinú iñi yo. Tyin juvin ñi tsihin tsa tsinú iñi yo tan cacú

yo. Tatun tsa nyehé yo tsa ndatú yo, nduve yahvi nyaá cuatu ca yo can tyin tsa iyó maa can tsi yo.

<sup>25</sup> Maa tyin ndita iñi yo tsa cua ñihi yo tsa ña nyehe yo, cuñí tsi tsa cunyeé iñi yo cuatu yo can.

<sup>26</sup> Tan juvin ñi tacan jatyinyeé Tatyí li Nyoo tsi yo tun nduve tunyeé iñi iyó tsi yo tan ña tsitó yo nácaa ndacan tahvi yo tsi Nyoo cuhva taahán maa tsi. Tatyí li tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñí iñi yo.

<sup>27</sup> Tsitó maa Nyoo náa iyó añima yo, tan tsitó ra náa tsicán Tatyí li ra, tsa cuenda yoo tsa cuví yo nyívi ra tyin tsicán tsi cuhva cuñí maa ra ndacan yo tsi ra.

*Tsa cuenda ra Cristo tan cuví jaha canaa yo síqui tundoho*

<sup>28</sup> Tsitó yo tyin tandihí tundoho tsa nyehé nyívi tsa cuñí tsi Nyoo jatyinyeé can tsi ñi, tyin maa Nyoo cuví ra nacatsí tsi ñi, tumaa cuhva tyaa maa ra cuhva.

<sup>29</sup> Tyin nda quívi jihna ñi, tan tsa tsitó Nyoo yoo nyívi cua cunyicun tsi ra. Tan tyaa ra cuhva tyin cuví ñi sehe ra tan coo ñi cuhva cuñí ra. Maa tyin ra Jesucristo cuví ra cua cuví ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo.

<sup>30</sup> Tan ñi tsa tyaa Nyoo cuhva tyin cuví ñi sehe ra, cana ra tsi ñi. Tan ñi tsa cana ra, naquihín cuenda ra tsi ñi tumaa tsatyin vaha ñi. Tan ñi tsa naquihín cuenda ra tsahá ra tsa cahnu cuví ñi tsihin ra.

<sup>31</sup> Yacan cuenda, ¿náa cua catyí yo? Tatun Nyoo tan nyaá ra tumañi iñi tsihin yo, ¿yoo cuví jaha canaa tsi yo? Yoñi.

<sup>32</sup> Nyoo ña catyí ra tsa ña cua cuhva cuenda ra Sehe ra, tyin tsahá cuenda ra tsi ra tyin cúu ra tsa cuenda tandihí yo. Tun tacan tsahá ra Sehe ra tsa cuenda yo, ¿a ña cua cuhva ra tandihí ca tsa tsiñí ñuhu tsi yo? Cuhva ra.

<sup>33</sup> ¿Yoo cuví xico ñaha tsi yo tsa cuví yo nyívi nacatsí Nyoo? Yoñi. Tyin Nyoo tsa naquihín cuenda ra tsi yo tumaa tsatyin vaha yo.

<sup>34</sup> ¿Yóo cuví catyi tyin cuhun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo.

<sup>35</sup> Nduve náa cuví quihin nyaa tsa cuñí xaan ra Cristo tsi yo. ¿A cuví quihin nyaa tundoho itsi, a tsihi, a tsa caahán nyivi tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsihi? Ndi intuhun tsehe tan ña cuví quihin nyaa can tsa cuñí ra Cristo tsi yo.

<sup>36</sup> Tumaa catyí nu tutu Nyoo tyehen:

Jutu Mañi yu, tandihi ñi quivi tan cuñí nyivi cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyí tsi.

<sup>37</sup> Vasu ndi maa cuaha tundoho yahá yo, maa tyin tandihi ñi tsaha tsa nyehé yo tundoho tan jahá canaa yo, tyin ra tsa cuñí xaan tsi yo jatyinyeé tsi yo.

<sup>38</sup> Yacan cuenda tsitó vaha yo tyin nduve maa náa cuví quihin nyaa tsa cuñí xaan Nyoo tsi yo. Ndi tuhun tsihi, ndi ñayivi iyó yo, ndi ángel, ndi tatyí ña vaha, ndi tsa cuví vityin, ndi tsa cua cuví ityi nuu ca, ndi intuhun can tan ña cuví jandusin can tsi yo tsihin Nyoo.

<sup>39</sup> Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuví jandusin can tsi yo tsihin Nyoo, ra tsa cuñí xaan tsi yo tsa cuenda ra Cristo Jesús Jutu Mañi yo.

## 9

### *Nyoo nacatsi ra tsi nyivi Israel*

<sup>1</sup> Yuhu tsinú iñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí Ii Nyoo jaquihín ityi tsa tsicá iñi yu. Yacan cuenda tsitó vaha yu tyin tsa nditsa caahán yu tun catyí yu

<sup>2</sup> cuihya xaan cuñí yu tan uhvi xaan cuñí aña yu

<sup>3</sup> tsa cuenda nyivi ñuu yu, ñi Israel. Cuñí xaan yu tsi ñi. Tan nda cuanda cuhva yu tsa cunaa aña yu tan cuhun tsi nu uhvi nu nduve ra Cristo tun tsatyin cuví cacu ñi tsihin can.

<sup>4</sup> Tata ra Israel cuví ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janahá ra tsa cahnu cuví ra tsi ñi, tyin tsinyaa ra tsihin ñi. Tan ndoo ra tuhun tsihin ñi, tan tsahá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñí ra tsa jacahnu ñi tsi ra. Tan catyí ra tsihin ñi nácaa cua javaha ra tsa vaha tsihin ñi nu cuahán ca tsi.

<sup>5</sup> Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihi tsa iyó. ¡Na jacahnu yo tsi ra tacan ñi maa! ¡Tan na cuví tsi tacan ñi!

<sup>6</sup> ¿A catyí yu tyin ña javahá Nyoo tumaa cuhva catyí ra tsihin nyivi Israel tahanan tsanaha? Ñavin. Cuñí tsi coto yo tyin ña tandihi nyivi Israel tan cuví ñi nyivi Israel tsa nditsa.

<sup>7</sup> Tan tacan tucu ña tandihi tata ra Abraham tan cuví ñi tata ra tsa nditsa. Tyin tsa cahan Nyoo tsihin ra, cahan tsi tuhun intuhun ñi sehe ra. Tyin catyí Nyoo tsihin ra tyehen: “Tsa cuenda ra Isaac sehe un tan cua coo nyivi tata un.”

<sup>8</sup> Tsehe janahá tsi yo tyin ñavin tsa cuenda tsa cuví ñi nyivi tata ra Israel tan cuví ñi nyivi Nyoo. Tyin nyivi tsa tsinú iñi tsa cahan Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú iñi ra tsa cahan Nyoo tsihin ra

<sup>9</sup> Tan tyehen cahan Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyí Nyoo tsihin ra.

<sup>10</sup> Tan ñavin yacan ñi. Tyin cahan ndihi tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsii tsaahnu yo, ra Isaac.

<sup>11-12</sup> Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyí Nyoo tsihin ña Rebeca

tyin ra Esaú, sehe nuu ña, cua cuvi ra musu ra tsa tsinu uvi. Javaha Nyoo tacan tyin nacatsí ra tsi nyivi tsa cuñí maa ra nacatsi ra, tan ñavin tsa cuenda tsa javahá ñi.

<sup>13</sup> Tumaa catyí ra nu tutu ra tyehen: “Cuñí ca yu tsi ra Jacob, tan ñavin ca ra Esaú.”

<sup>14</sup> ¿Tun tacan náa cua catyi yo? ¿A catyi yo tyin ña vaha tsa javahá Nyoo? ¡Ña cuvi!

<sup>15</sup> Tyin catyi ra tsihin ra Moisés: “Cua cundaahvi ñi yu yóo nyivi cuñí maa yu cundaahvi ñi yu.”

<sup>16</sup> Tacan javahá ra; cundaahvi ñi ra tsi nyivi tsa cuñí maa ra cundaahvi ñi ra. Tan ña cundaahvi ñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuvi ra cundaahvi ñi yóo cuñí maa ra.

<sup>17</sup> Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaha yu tsa cuvi un rey tyin tacan tan coto un tyin iyó tunyee ñi tsi yu. Tan nacoto tucu tandihi nyivi yóo ra cuvi yuhu”, catyí Nyoo.

<sup>18</sup> Tan tsihin tsehe tsitó yo tyin Nyoo cundaahvi ñi ra tsi nyivi cuñí maa ra. Tan jandundavá tucu ra añima nyivi cuñí maa ra jandundavá ra añima.

<sup>19</sup> Tan vasiqui yooho cua catyi un: “Yoñi cuvi javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaa Nyoo cuatyí siqui ñi?

<sup>20</sup> Maa tyin ña vaha tun tsicá ñi un tacan. Tyin yoñi cuvi catyi tyin ña vaha tsa javahá Nyoo. ¿Yóo ra cuvi yooho tan nacahan un nu caahán Nyoo? ¿A cuvi catyi iin quisi tsihin ra javahá itsi: “Ña taahán ñi yu cuhva javahá un tsi yu”? Ña cuvi.

<sup>21</sup> Tyin nyivi tsa javahá ndaha tyiñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñú ñi juvin ñi tsihin can javaha ñi quisi vaha tan quisi peehe.

<sup>22</sup> Ña cuvi catyi yo tyin ña vaha Nyoo tsa cuenda tsa tsatyíñú ra tsi

nyivi tsa cua cuhun anyaya tan cunyeé ñi ra nyehé ra tsi ñi, tyin tsihin ñi can janahá ra tunyee ñi tsa iyó tsi ra tan janahá ra tyin cua tatsi tuñi ra tsi nyivi caquiñi.

<sup>23</sup> Javahá ra tacan tyin tacan tan coto yoo tsa cuvi yo nyivi tsa cundaahvi ñi ra tyin nda tsanaha tan tsa nacatsí maa ra tsi yo tyin cuhva ra tsa cahnu cuvi ra tsi yo.

<sup>24</sup> Yacan cuenda nacatsí ra tsi yo. Tan yihí yo cuvi yo nyivi Israel, tan nyivi tsa ñavin ñi Israel cuvi.

<sup>25</sup> Tumaa catyí Nyoo nu tutu tsa tyaa ra Oseas:

Nyivi tsa ñavin nyivi ñuu yu cuvi cua catyi yo tyin nyivi yu cuvi ñi.

Ñi tsa ña cuñi yu, cua cuñi yu tsi ñi, catyí Nyoo.

<sup>26</sup> Tan nu catyi Nyoo: “Nyooho ñavin nyivi yu cuvi ndo.” Juvin ñi ican cua catyi ra tsihin ñi: “Yuhu cuvi Nyoo nyito, tan nyooho cuvi sehe yu.”

<sup>27</sup> Maa tyin ra Isaías catyí ra tyehen tsa cuenda nyivi Israel: “Vasu ndi maa cuaha xaan nyivi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu.

<sup>28</sup> Tan tsa yatyin cuii cua jandaa Jutu Mañi yo tandihi tsa cahan ra tan cua tatsi tuñi ra tsi tandihi nyivi iyó nu ñuhu ñayivi.”

<sup>29</sup> Tumaa catyi tucu ra Isaías tahañ tsanaha:

Tun tsatyin Jutu Mañi yo, ra ndacá ñaha tandihi tsa iyó andivi, tan ña jacacu ra tsi juhva yo, tsa naa tandihi yo,

Tumaa naa nyivi ñuu Sodoma tan ñuu Gomorra tahañ tsanaha.

*Nyivi Israel ña ñihí ñi cuhva nduvaha ñi nuu Nyoo,*

<sup>30</sup> ¿Náa cua catyi yo? Nyivi tsa ñavin ñi Israel cuvi, ña nducu ñi cuhva coo vaha ñi tsihin Nyoo, maa tyin Nyoo naquihin cuenda ra tsi ñi tumaa tsatyin vaha ñi tsa cuenda tsa tsinú ñi ñi tsi ra.

<sup>31</sup> Tan nyivi Israel tsa nducú coo vaha tsihin Nyoo tsihin tsa javahá ñi

cuhva catyí ley, ña cuví coo vaha ñi tsihin ra.

<sup>32</sup> ¿Nacuenda? Tsa cuenda tyin cuñi ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihí tsaha ñi yuu tan nduvá ñi cuví can.

<sup>33</sup> Yuu can caahán Nyoo tuhun nu tutu ra tan catyí ra:

Tsaquín nyaa yu iin yuu nda ñuu Sión,  
tan janduvá tsi tsi nyívi.

Tan yuu can cuví ra Jesucristo.

Tan nyívi tsa tsinú iñi tsi ra tsa cuví yuu can, ña cua nduva ñi, catyí Nyoo nu tutu ra.

## 10

<sup>1</sup> Yañi, tsihin tsa ñi iñi aña yu tan tsicán tahvi yu tsa cuenda nyívi Israel tyin cuñi yu tsa cacu ñi.

<sup>2</sup> Tsandaa cuví yu tyin cuñi ñi jacahnú ñi tsi Nyoo, maa tyin ña ñihí ñi cuhva javahá ñi can.

<sup>3</sup> Tyin ña tsitó ñi tyin juven ñi maa Nyoo cuví ra janduvahá tsi nyívi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi.

<sup>4</sup> Tyin ra Cristo tsa quítsi ra tan javahá ra tandihí tsa catyí ley, tyin tacan tan tandihí nyívi tsa cua tsinu iñi tsi ra, naquihin cuenda Nyoo tsi ñi tumaa tsatyin vaha ñi.

<sup>5</sup> Catyí ra Moisés tyin cuví nduvaha nyívi nuu Nyoo, tatun tyaá yahvi ñi tandihí tsa catyí ley, tyin tyaá ra tyehen: “Nyívi tsa tyaá yahvi tandihí tsa catyí ley, cua coo ñi ñayívi tsa ña cua naa maa.”

<sup>6</sup> Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyí tutu ra tyehen: “Ña catyí un: ¿Yóo cundaa andívi? tyin tun cahan un tacan cuñi tsi catyí tyin januu un tsi ra Cristo nda nu ñuhu ñayívi tan jacacu ra tsi yo.” Ña cahan un tacan tyin ra Cristo tsa yahá quítsi ra.

<sup>7</sup> Tan ndi ña catyí un: “Cuñi tsi tsa nuu iin ra nda nu yucú ndiyí tsitsi ñuhú tan janandoto ra tsi ra Cristo”.

Ña cahan un tacan, tyin ra Cristo tsa yahá nandoto ra.

<sup>8</sup> Ña catyí un tacan tyin tyehen catyí nu tutu Nyoo: “Tuhun Nyoo yatyin iyó tsi tsihin ndo, iyó tsi yuhu ndo tan tsitsi aña ndo.” Tuhun ihya taahán tsi tsinu iñi ndo tyin juven ñi tsi jacuahá tucu nyuhu.

<sup>9</sup> Tatun catyí un tsihin yuhu un tyin ra Jesús cuví Jutu Mañi yo, tan tsinu iñi un tsihin aña un tyin Nyoo janandoto tsi ra tsa yahá tsihi ra, cua cacu un.

<sup>10</sup> Tyin tsihin aña yo cuñi tsi tsinu iñi yo tsi ra Cristo tan cuví nduvaha yo nuu Nyoo, tan tsihin yuhu yo cuñi tsi catyí yo tyin tsinú iñi yo, tyin tacan tan cacu yo.

<sup>11</sup> Tuhun Nyoo catyí tsi tyehen: “Ndi intuhun nyívi tsa tsinú iñi tsi ra tan ña cua tahan ñi ticanuu.”

<sup>12</sup> Tyin Nyoo inducu ñi cuñi ra nyehé ra tsi nyívi Israel tan nyívi inga ñuu. Tyin intuhun ñi maa ra ndacá ñaha tsi tandihí yo. Tan nasocó ra tsi tandihí nyívi tsa tsicán tahvi tsi ra.

<sup>13</sup> Tyin tyehen catyí tuhun Nyoo: “Tandihí nyívi tsa tsicán tahvi tsi Jutu Mañi yo cua cacu ñi.”

<sup>14</sup> Maa tyin ¿nácaa cua ndacan tahvi ñi tsi ra tatun ñaha ca tsinu iñi ñi tsi ra? Tan ¿nácaa cua tsinu iñi ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yoñi cahan tuhun ra tsihin ñi?

<sup>15</sup> Tan ¿nácaa cahun nyívi cahan ñi nácaa coo taxin nyívi, tatun yoñi jacuhun tsi ñi? Tumaa catyí nu tutu Nyoo: “Sií xaan cuví nu tsa ñi caahán tuhun vaha.”

<sup>16</sup> Maa tyin ña tandihí nyívi tan tyaá yahvi ñi tuhun tsa jacacú Nyoo tsi yo. Tumaa catyí ra Isaías: “Jutu Mañi yu, yoñi cuñi tsinu iñi tuhun caahán ndi”, catyí ra.

<sup>17</sup> Yacan cuenda cuñi tsi tsa tyaá soho jihna yo tuhun ra Cristo, tacan tan tsinu iñi yo tsi ra.

<sup>18</sup> Maa tyin tsicá tucu iñi yu: ¿A ña tsiñi nyívi Israel tuhun Nyoo? ¡Tsiñi ñi! Tumaa catyí nu tutu Nyoo:

Jutu Mañi yu, nyívi tsa jacotó tuhun un tsa jacotó ñi tuhun un naní



cahnu nu ñuhu ñayivi,  
tan ña nacoo ihñi ñi ndi intuhun ñuu  
luhlu, catyí tsi nu tutu Nyoo.

19 Tan tsicá nyico tucu iñi yu: ¿A ña  
cutuñí iñi nyivi Israel tyin cua cacu  
nyivi tsa ñavin ñi Israel cuví? ¡Cutuñí  
iñi ñi! Tyin tsa jihna ñi ra Moisés tyaa  
ra tuhun cahñan Nyoo tsihin ñi Israel  
nu tutu tyehen:

Nyooho, ndasi cua cuñi ndo tyin cua  
cuhva yu tsa vaha tsi nyivi tsa  
ñavin nyivi ñuu yu cuví.

Tan cua cúu ndo tsihi nyehé ndo tsi  
ñi, catyí Nyoo.

20 Tan ra Isaías cana iñi ra cahñan ra:  
“Nyivi tsa ña nanducu tsi Nyoo, nañihi  
ñi tsi ra.

Tan janaha ra tsi ra tsi ñi tsa ña tsica  
tuhun tuhun ra.”

21 Tan tyaa tucu ra Isaías tuhun cahñan  
Nyoo tsihin ñi Israel tyehen: “Tandihí  
ñi quivi cana yu tsi nyivi yu, na  
nacuhva cuenda ñi tsi ñi tsi yu, maa  
tyin ña tyaa yahvi ñi. Tan jandava  
xaan ñi iñi ñi”, catyí Nyoo.

## 11

### *Nyivi Israel tsa ñihí cuhva cacu*

1 ¿A ña cuñí ca Nyoo tsi nyivi Israel?  
Ñavin tsa ña cuñí ca ra tsi ñi, tyin juvin  
ñi ra Israel cuví tucu yuhu. Tyin tata  
ra Abraham tan tata ra Benjamín cuví  
yu.

2 Tahañ tsanaha nacatsi Nyoo tsi  
ñi Israel tyin cuví ñi nyivi ra. Tan  
vityin ñavin tsa jatsiyó cuii ra tsi ñi.  
¿A ña ñuhú iñi ndo tyin catyí nu tutu  
Nyoo tyin ra Elías, ra cuví ndusu yuhu  
Nyoo, catyí ra tyin ña vaha nyivi Is-  
rael tan tsicán tahvi ra tsi Nyoo tyeh-  
hen?

3 “Jutu Mañi yu, nyivi Israel tsahñi  
ñi tsi ra cuví ndusu yuhu maa un  
naha ra, tan tsani ñi nu jacahnú nyivi  
tsi un. Tan intuhun ña maa yu ndoo,  
tan cuñí ndihí ñi cahñi ñi tsi yu”, catyí  
ra.

4 Maa tyin nacahan Nyoo tan catyí  
ra tsihin ra Elías: “Ñavin maa ñi maa  
un ndoo. Tyin utsa mil ca nyivi  
naquihin vaha yu, ñi tsa ña jacahnú  
maa tsitoho Baal”, catyí Nyoo tsihin  
ra.

5 Tan juvin ñi tacan vityin, ndoo  
juhva nyivi jacahnú tsi Nyoo. Tan tsa  
cuenda tsa vaha Nyoo nacatsi ra tsi ñi  
tyin jaha ra tucahnu iñi tsi ñi.

6 Tan ña jahá ra tucahnu iñi tsi yo  
tsa cuenda tsa javahá yo tsa vaha.  
Tyin tun tsatyin jahá Nyoo tucahnu  
iñi tsi yo tsa cuenda tsa javahá yo tsa  
vaha, cuñí tsi catyí tyin ña jacacú ra  
tsi yo tsihin tsa vaha ra.

7 Tan ¿nácaa? Nyivi Israel nducu  
ñi cuhva nduvaha ñi nuu Nyoo, maa  
tyin ña ñihí ñi cuhva. Juhva ñi ñihí ñi  
cuhva. Tan ñi tsa ñihí cuhva can cuví  
ñi tsa nacatsi maa Nyoo. Tan ñi tsa ña  
ñihí cuhva cacu, ndundava aña ñi.

8 Tumaa catyí nu tutu Nyoo tyehen:  
“Nyoo tsaha ra tsa ña cutuñi iñi ñi.  
Tan vasu ndi maa iyó tinuu ñi, ña  
tsahá ra tsa nyehé ñi. Iyó soho ñi, maa  
tyin ña cutuñi iñi ñi tsa tsiñi ñi. Tacan  
iyó ñi nda cuenda vityin.”

9 Tan juvin ñi catyí tucu ra David  
tyehen:

Javahá ñi vico tan cusii iñi ñi, maa  
tyin yacan cua jativi tsi ñi.

Tan cua tatsi tuñi Nyoo tsi ñi tyin  
cuví can tumaa iin trampa tsa  
cuenda ñi.

10 Tan cua cuaa ñi na ña nyehe ca ñi  
tsa nditsa.

Tan nacosó tsa vee siqui ñi, catyí ra  
David tuhun nyivi Israel tsa ña  
tsinú iñi tsi Nyoo.

### *Nacaa nduvahá nyivi tsa ñavin ñi Israel cuví nuu Nyoo*

11 Tan vityin tsicá tuhun yu: ¿A tsa  
cuenda tsa ña tyaa yahvi nyivi Israel  
tsa cahñan Nyoo, tan ndoo cuii ñi tsa  
ñi cua cacu ñi? Ñavin tsa ndoo cuii ñi.  
Ndoó nuu ñi maa ñi, tyin jacacú jihna  
Nyoo tsi nyivi tsa ñavin ñi Israel cuví.  
Tyin tacan tan tsa cua nyehe ñi yacan,  
ndasi cuñi ñi tan natsinu ndihí iñi ñi  
tsi Nyoo.

12 Tatun cuaha nyivi tsa ñavin ñi  
Israel cuví tan natsinu iñi ñi tsi Nyoo  
tsa cuenda cuatyí tsa javaha ñi Israel,  
cuaha ca ñi cua natsinu iñi quivi tsa  
cua cuví nyico tandihí nyivi Israel  
nyivi Nyoo.

13 Cuñí yu cahan yu juhva tsihin nyooho tsa ñavin ñi Israel cuví. Ra Jesús tava tyiñu ra tsi yu tsa quitsi yu nu iyó ndo. Tan tsitó yu tyin cuñí tsi tsa javaha yu tyiñu ihya tyin cahnu xaan cuví tsi. Cahnu jahá yu itsi

14 tan caahán yu tuhun Nyoo tsihin ndo tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiqui tacan tan natsinu ndihi iñi ñi tan cacu ñi.

15 Tyin tun tsa cuenda tsa ña natin cuenda Nyoo tsi nyivi Israel tan nduvaha iyó nyivi inga ñuu tsihin Nyoo, quivi cua naquihin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi.

16 Iin cuhva tatun vaha quitá paan tsa javaha yo tsa jihna ñi tsihin yutsan paan, vaha tandihi ca yutsan can. Tan tatun iin yoho yutun tan vaha tun, vaha tandihi ca soco tun. Tacan tucu nyivi Israel nyaá yahvi ñi nuu Nyoo tyin tsii tsaahnu ñi yihí ra naha cuenda ra.

17 Tan nyivi Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyivi tsaahnya iin soco yutun tan natyaa ñi inga soco yutun, tacan javaha Nyoo tyin jatsiyó ra tsi nyivi Israel tan tyaa ra tsi nyooho tsa cuví ndo nyivi inga ñuu. Tacan cuví tan tsaá ndo cuví ndo nyivi cuenda Nyoo tan naquihin ndo tandihi tsa vaha tsa iyó tsi ra.

18 Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

19 Vasiqui cua catyí ndo: “Juvín, maa tyin Nyoo tsahnya ra soco yutun can tan natyaa ra tsi nyuhu.”

20 Nditisa. Maa tyin jatsiyó nuu ñi ra tsi nyivi Israel tsa cuenda tsa ña tsinu iñi ñi tsi ra. Tan tyacu ra tsi nyooho tsa cuenda tsa tsinú iñi ndo tsi ra. Yacan jaha ndo cuenda tsa ña

nduyaa ndo tsihin can.

21 Tyin tatun ña jaha Nyoo tucahnu iñi tsi ñi tsa cuví soco vaha can, ndi nyooho tan ña cua jaha ra tucahnu iñi tatun ña tsinú vaha iñi ndo tsi ra.

22 Nyehe ndo tyin vaha xaan iñi Nyoo, maa tyin xaan tucu ra tsihin nyivi tsa ña naquihin cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaa yahvi ndo tsa vaha tsa tsahá ra tsi yo. Tyin tatun ña tyaa yahvi ndo itsi, cua jatsiyó nyico ra tsi ndo tsaha yutun olivo ra.

23 Tyin tatun natsinu nyico iñi nyivi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha.

24 Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihin ra tsi ndo tan tyaa tahan ra tsi ndo tsihin yutun olivo vaha tsa cumí ra. Tacan cua javaha ra quivi cua cuñi ra iin yaha ñi cua tyaa tahan nyico ra soco yutun vaha nu tsinyaa jihna maa tsi.

#### *Nyivi Israel cua cacu nda nu ndihi*

25 Yañi, cuñí yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyivi Israel ndundava añima ñi, nda cuanda cacu tandihi nyivi inga ñuu tsa nyaa tyin cacu.

26 Tsa yaha cua cacu ñi, tacan tan cua cacu tandihi nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra.

Tan cua quihin nyaa ra cuatyí nyivi ra Jacob.

27 Tuhun ihya cuví tsa cua ndoo yu tsihin ñi

quivi cua quihin nyaa yu cuatyí ñi, catyí Nyoo nu tutu ra.

28 Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahan tsanaha nacatsi Nyoo tsi ra Abraham, tan ra Isaac, tan ra Jacob tyin tsinu iñi ra naha tsi ra. Tan cuñí ndihi ra tsi nyivi Israel tyin tata ra naha cuví tsi ñi.

<sup>29</sup> Tyin tsa tsa tsaha Nyoo, ña quihin nyaa nyico ra can. Tyin yoo tsa cuví nyívi Nyoo, ña tuhvá ra cahan tyin ñavin nyívi ra cuví yo.

<sup>30</sup> Tsanaha nyooho ña tyaá yahvi ndo tsi Nyoo. Maa tyin vityin tyaá yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaá yahvi nyívi Israel tsi ra.

<sup>31</sup> Nyívi Israel ña tyaá yahvi ñi tsi Nyoo vityin tumaa tsa ña tyaá yahvi nyooho tsi ra tahan tsanaha. Maa tyin cua cundaahví iñi ra nyehe ra tsi ñi tumaa tsa cundaahví iñi ra nyehé ra tsi nyooho.

<sup>32</sup> Yíhi tsaha tandíhi nyívi tan nacoó ñi tsa tyaá yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahví iñi ra tsi tandíhi yo.

<sup>33</sup> ¡Cahnu xaan cuví tsa cuca tan tsa tsitó Nyoo tan tsa tsiñí tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quívi ña cua cutuñi iñi yo tandíhi cuhva javahá ra.

<sup>34</sup> ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi.

<sup>35</sup> Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihin ñi yahvi cuenda can.

<sup>36</sup> Tyin tandíhi maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

## 12

### *Na javaha yo cuhva cuñi Nyoo tsihin ñayívi iyó yo*

<sup>1</sup> Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra.

<sup>2</sup> Ña cõo ca ndo cuhva iyó nyívi ñuu ñayívi ihya. Cuhva ndo tsa nasama

Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndíhi tsa vaha tan tsa cuíti.

<sup>3</sup> Nyoo, tsa cuenda tsa vaha iñi ra, tan tava tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandíhi nyooho tyin ndi intuhun ndo tan ña caca iñi ndo tyin vaha xaan ndo. Maa tyin caca iñi ndo nácaa iyó ndo tan náa cuví tsa vaha tsa tsaha Nyoo tsi ndo iin caa ñi tsihin tsa tsinú iñi ndo tsi ra.

<sup>4</sup> Tumaa soho yo tan tinuu yo iin ñi cuví tsi tsihin tandíhi ca tahan tsi tsa iyó iin cuñu ñuhu. Tan tsa intuhun intuhun tsi sñn sñn tyiñu javahá tsi.

<sup>5</sup> Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

<sup>6</sup> Sñn sñn ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñi maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsaha ra tsi yo, tan na javaha yo itsi.

<sup>7</sup> Tatun tsahá ra ndatu tsi iin yo tsa jatyinyee yo tsi nyívi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyívi, na jacuahá yo tsi ñi tsihin tsa ñi iñi yo.

<sup>8</sup> Tatun tsahá ra tsi inga yo tsa cuví jandu iin yo iñi nyívi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyee yo tsi nyívi tsihin xuhun, na jatyinyee yo tsi ñi, maa tyin ña cuita iñi yo tyin natyahvi ñi tsi yo. Tatun inga yo ñihí tsa jaquihín ityi yo tsi nyívi yihí cuenda Nyoo tsihin yo, na jaha yo cuenda cuhva jaquihin ityi yo tsi ñi. Tatun inga yo ñihí tsa jatyinyee yo tsi nyívi tsa iyó tsa tsiñí ñuhu, na jatyinyee yo tsi ñi tsihin tsa sñ cuñi yo.

*Náa taahán tsi javaha nyívi yihí cuenda ra Cristo*

<sup>9</sup> Cuñi tahan ndo tsi ndo tsihin tsa ñi ñi ñi aña ndo. Ndasí cuñi ndo nyehé ndo tsa ña vaha. Tan cuanyicun ndo tsa vaha.

<sup>10</sup> Cuñi tsi tsa cuñi tahan yo tsi yo tumaa tsa cuñi yo tsi nyivi yo. Tan tyaa yahvi tahan ndo tsi ndo tan jaha tahan ndo tsa ñayivi tsi ndo.

<sup>11</sup> Nducu ndo tunyee ñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi ñi ñi aña ndo.

<sup>12</sup> Coo ndo ñayivi ihya tsihin tsa si, tyin tsitó ndo tyin cua coo ndo tsihin Nyoo nu cuahán ca tsi. Janyee ndo ñi ndo nyehé ndo tundoho. Tan ndacan tahvi ndo tsi Nyoo iin nyita ñi.

<sup>13</sup> Cuhva ndo tsa tsiñi ñuhu tsi nyivi yihí cuenda Nyoo tsihin ndo. Vaha tyanu ndo tsi nyivi tsaá vehe ndo.

<sup>14</sup> Tatun caahán nyivi ndavaha ñi tsi ndo, vaha çahan ndo tsihin ñi, tan ña çahan ndasí ndo tsi ñi. Ndacan tahvi ndo tsi Nyoo tsa cuenda ñi, na nasoco ra tsi ñi.

<sup>15</sup> Si cuñi ndo tsihin nyivi si cuñi. Vacu ndo tsihin nyivi tsa tsacú jahá tucuihya ñi.

<sup>16</sup> Ña cañi tahan ndo. Iin ñi cuvi ndo tsihin tahan ndo. Ña cahnu jaha ndo tsi ndo; jandundaahvi ndo tsi ndo tumaa iyó nyivi ndaahvi; ña jaha ndo tsa tsitó xaan ndo.

<sup>17</sup> Ña javaha ndo tsa ña vaha tsihin nyivi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihi nyivi.

<sup>18</sup> Nducu ndo cuhva coo taxin ndo tsihin tandihi nyivi.

<sup>19</sup> Yañi, cuñi yu tsi ndo. Tatun javahá nyivi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyivi tan tyahvi tsi ñi”, catyí Jutu Mañi yo.

<sup>20</sup> Tan juven ñi catyí tucu ra: “Tatun nyivi xaan ñi tsi ndo tan tsihó ñi, cuhva ndo tsa catsi ñi, tan tatun na ityi ñi ñi, cuhva ndo ndutya coho ñi. Tyin tsa javaha ndo tacan, cuaaha

tacan ña nuu ñi cua cuví, tyin cua nducahan nuu ñi.”

<sup>21</sup> Ña cuhva ndo tsa cundaca ñaha tsa ña vaha tsi ndo, maa tyin jandu iin ndo ñi ñi aña ndo. Javaha ndo tsa vaha tan çasi ndo nu vatsí tsa ña vaha tsihin can.

## 13

<sup>1</sup> Tandihí nyivi cuñi tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumi tyiñu tan Nyoo tsaha tyiñu can tsi ra naha. Ra cumi tyiñu tsa iyó, maa Nyoo tsaha tsi ra naha tsa cuví ra naha tyiñu.

<sup>2</sup> Yacan cuenda, nyivi tsa ña tyaa yahvi tsi ra naha, cuñi tsi catyi tyin ña tyaa yahvi ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cutuñi ñi.

<sup>3</sup> Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyivi tsa javahá tsa vaha. Nyisó tyiñu ra naha tsa tatsi tuñi ra naha tsi nyivi tsa javahá tsa ña vaha. Tun ña cuñi un tsa jayuhvi ra cumi tyiñu naha ra tsi un, coo vaha, tyin tacan tan cua nyehe ra naha tyin vaha iyó un tan vaha nyivi cuví un.

<sup>4</sup> Tyin ra cumi tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuvi nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyivi javahá tsa ña vaha, tyin tyiñu can tyaa Nyoo tsi ra naha.

<sup>5</sup> Yacan cuenda ñiñi cuñi tsi tsa tyaa yahvi ndo tsi ra cumi tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo.

<sup>6</sup> Tan inga tuhun tsa cuenda can tyahví ndo xuhun tsa tavá ra cumi tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.



<sup>7</sup> Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyivi tsa taahán tsi tyaa yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi.

<sup>8</sup> Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihi tsa catyí ley Nyoo tsa tyaa ra Moisés tyin javaha yo.

<sup>9</sup> Catyí ley Nyoo tyehen: “Tun iyó ñasihi ndo o yii ndo ña cõo inga ñaha o rayii tsi ndo. Ña cahñi ndo. Ña sũhu ndo. Ña cahan ndo cuendu siqui ndi intuhun nyivi. Ña nyiyo iñi ndo tsa tsii inga nyivi.” Tandihí tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo.

<sup>10</sup> Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés.

<sup>11</sup> Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra.

<sup>12</sup> Tsa yahá tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsahá Nyoo tsi ndo; javaha ndo cuhva javahá nyivi iyó nu nditsin.

<sup>13</sup> Cuñi tsi cuiti coo yo tyin nu nditsin Nyoo iyó yo. Tan ña coho ndo nyixi, ña javaha ndo vico tan coho ndo nyixi. Nyooho rayii, ña caca nuu ndo tsihin ñaha. Tan nyooho ñaha ña caca nuu ndo tsihin rayii. Ña cõo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi.

<sup>14</sup> Maa tyin cõo ndo tsihin Jutu Mañi yo Jesucristo, tumaa tsinditsi yo jahma tacan na cunditsi yo tsi ra.

Tan ña caca iñi ndo javaha ndo cuhva cuñi cuñu ñuhu ndo.

## 14

### *Na ña cahan nyaa yo tsi nyivi*

<sup>1</sup> Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi.

<sup>2</sup> Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin Nyoo.

<sup>3</sup> Maa tyin ñi tsa tsatsí tandihí can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaa ñi tsi inga ñi can. Tyin Nyoo naquihín cuenda ra tsi ñi can.

<sup>4</sup> Tan çyóo nyivi cuví yooho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

<sup>5</sup> Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi cahnu cuví tan quivi ña cahnu cuví. Inducu ñi quivi cuñi ñi, yacan cuenda intuhun intuhun maa yo tan cuñi tsi tyihi tuñi vaha iñi yo.

<sup>6</sup> Ñi tsa naquihín vaha quivi, naquihín vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihín vaha can, juvin ñi jacahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandihí can, juvin ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsahá ra tsa catsi ñi. Tan ñi tsa ña tsatsí tandihí, ña tsatsí ñi tsa cuenda tsa jacahnú ñi tsi Jutu Mañi yo tan juvin ñi nacuhvá tucu ñi can tyahvi nyoo tsi ra.

<sup>7</sup> Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsihi yo.

<sup>8</sup> Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsihi yo, tsihi yo tsa cuenda Jutu Mañi yo tan naquihín ra añima yo. Yacan cuenda tsi maa Jutu Mañi yo cuví tsi yo vasu ndi maa nyito yo o tsihi yo.

<sup>9</sup> Tyin ra Cristo tsihi ra tan nandoto ra tyin cundaca ñaha ra tsi nyivi nyito tan nyivi ña nyito.

<sup>10</sup> Maa tyin yooho, ¿nacuenda nyehé nyaa un tsi ra yañi un? ¿O nacuenda ña naquihin cuenda un tsi ra?, tan tsitó vaha un tyin tandihi yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo.

<sup>11</sup> Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñi tsi cuiñi tsi tandihi nyivi nuu yu.

Tandihi ñi tan cua nacoto ñi tsi yu tsa cuví yu Nyoo.

Tan nuu tandihi nyivi cua jachanu ñi tsi yu, catyí Nyoo.

<sup>12</sup> Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

*Ña janacava ndo tsi yañi ndo nu cuatyí*

<sup>13</sup> Yacan cuenda, ña taahán tsi cahan nyaa ca ndo tsi nyivi. Maa tyin nducu ndo cuhva tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo.

<sup>14</sup> Yuhu tsitó yu tyin cuvi catsi yo tandihí tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihí, tsa cuenda maa ñi ña cuví catsi ñi can.

<sup>15</sup> Maa tyin tatun tsa cuenda tsa tsatsí ndo tan ndasi cuñi yañi yo, ña nditsa tsa cuñi ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihi ra tsa cuenda ra.

<sup>16</sup> Ña cuhva ndo tsa cahan nyivi ndavaha ñi siqui tsa tsahá Nyoo ndatu tyin catsi yo.

<sup>17</sup> Tatun ndacá ñaha Nyoo tsi yo ña ñiñi xaan náa tsatsí yo o náa tsihi yo. Tsa ñiñi ca cuví tsa vaha iyó yo nuu ra, tan tsihin tsa si cuñi yo, tan taxin iyó añima yo jahá Tatyí li ra.

<sup>18</sup> Nyivi jahá tyiñu tyiñu ra Cristo tacan, si cuñi Nyoo nyehé ra tsi ñi, tan tacan tucu nyivi si cuñi ñi nyehé ñi tsi ñi.

<sup>19</sup> Yacan cuenda cuñi tsi jañiñi yo tsi yo tan coo vaha yo tsihin nyivi. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo.

<sup>20</sup> Ndi intuhun ndo tan ña jativi ndo tyiñu jahá Nyoo tsitsi añima inga nyivi tsihin tsa tsatsí ndo. Nditsa tyin tandihí tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyivi nu cuatyí.

<sup>21</sup> Yacan cuenda, vaha tsa ña catsi yo cuñu, ndi ña coho yo vinu tatun ndasi cuñi yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo.

<sup>22</sup> Cuhva tsa tsinú iñi yo tsa cuenda tandihí yacan ña cahan yo tuhun can tsihin inga nyivi. Na coto intuhun ñi maa yo can tsihin Nyoo. Si xaan cuñi yo tatun ña uvi tsicá iñi yo javahá yo tsa tsahá Nyoo ndatu tyin javahá yo.

<sup>23</sup> Maa tyin nyivi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihí tsa javahá yo tsihin tsa ña tsinú iñi yo tyin tsahá Nyoo ndatu javaha yo can, cuatyí cuví.

## 15

*Na javaha yo tsa taahán iñi nyivi yihí tuhun Nyoo tsihin yo, tan ñavin tsa taahán iñi ñi maa yo*

<sup>1</sup> Yoo tsa vaha cuanyicún tsi Nyoo, cuñi tsi tsa jatyinyee yo tsi nyivi tsa ñaha ca tsinú vaha iñi tsi ra. Jatyinyee

yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo.

<sup>2</sup> Intuhun intuhun yo cuñí tsi tsa javaha yo cuhva taahán iñi inga nyivi tatun cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo.

<sup>3</sup> Tyin ndi ra Cristo tan ña javaha ra cuhva taahán iñi maa ra, maa tyin tahan ra tumaa catyí nu tutu Nyoo tyehen: “Tandihí tsa ndavaha ñi tsa cahan nyivi siqui Nyoo, siqui ra Cristo ndoo can”, catyí tsi.

<sup>4</sup> Tyin tandihí tsa tsinyaa nu tutu Nyoo tahan tsanaha, tsinyaa tsi tsa cuenda tsa cutuhva yo itsi. Tan juvin tsi jatyinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo.

<sup>5</sup> Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñí aña yo. Na jatyinyee ca ra tsi yo coo vaha yo tan iin ñi cuví yo tumaa taahán iñi ra Cristo Jesús.

<sup>6</sup> Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

*Nyivi tsa ñavin ñi Israel cuví, cua coto ñi tuhun Nyoo*

<sup>7</sup> Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo.

<sup>8</sup> Tan catyí yu tsihin ndo: ra Cristo quitsi ra quitsi jatyinyee ra tsi nyuhu tsa cuví nyivi Israel, tyin tacan catyi Nyoo tsihin tsii tsaahnu ndi tyin cua javaha ra. Tan tacan janaha ra Cristo tyin tandihí tsa catyi Nyoo tyin cua javaha ra, javahá ra itsi.

<sup>9</sup> Quitsi ra Cristo tyin tacan tan jacahnu tucu nyivi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehe tandihí nyivi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

<sup>10</sup> Tan inga tucu nu catyí tsi tyehen: Nyooho tsa ñavin ñi Israel cuví, sii cuñi ndo tsihin ñi Israel, nyivi Nyoo.

<sup>11</sup> Tan inga tucu nu catyí tsi tyehen: Jacahnu ndo tsi Jutu Mañi yo, nyooho nyivi tsa ñavin ñi Israel cuví.

Çata tandihí ndo yaa tan jacahnu ndo tsi ra.

<sup>12</sup> Ra Isaías tyaá tucu ra nu tutu Nyoo tyehen:

Cua cacu iin ra tsa cuví tata ra Isaí. Cua quitsi ra cua cundaca ñaha ra tsi nyivi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

<sup>13</sup> Juvin ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusii iñi ra. Tan na coo taxin aña ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí lí ra tan cuita vaha iñi ndo tyin cua ñihi ndo tsa cua cuhva ra tsi ndo.

<sup>14</sup> Yañi, tsitó vaha yu tyin nyooho vaha iñi ndo tan cutuñí vaha iñi ndo, tan tsitó vaha ndo cuhva cuhva cuenda tahan ndo tsi ndo.

<sup>15</sup> Maa tyin nu carta ihya ñihi xaan caahán yu siqui juhva tsa tyaá yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu

<sup>16</sup> tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuví ñi iin ofrenda tsa taahán iñi ra, tyin tsa nduvaha ñi nuu ra jahá Tatyí lí ra.

<sup>17</sup> Yuhu tsa tsinú iñi yu tsi ra Cristo Jesús, sii cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu.

<sup>18</sup> Yuhu ña caná iñi yu cahan yu tsa ña javaha ra Cristo tsihin yu. Maa tyin tsahá cuenda yu tsi ndo tyin nyivi tsa ñavin ñi Israel cuví, tsinú iñi ñi tsi Nyoo tyin Nyoo tsatyiñu ra tsi yu tan vityin tyaá yahvi ñi tsi ra tsa cuenda

tsa tsinú iñi ñi tuhun caḥan yu tan nyehe ñi tsa javaha yu

<sup>19</sup> Tsihin tunyee iñi seña tan tsa iyo tsa javaha yu jahā Tatyí Ii Nyoo. Tsihin tandiḥi yacan cunyeē caḥan yu tuhun ra Cristo tan nácaa jacacú ra tsi yo tsihin nyivi. Quitsaha yu nda Jerusalén tan inga ca ñuu nda cuanda tsaā yu ñuu tsa cayucú Ilírico.

<sup>20</sup> Tacan nducú yu cuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñi yu jaha tyiñu yu nu tsa yaha caḥan inga ra tuhun ra Cristo.

<sup>21</sup> Tumaā catyí nu tutu Nyoo tye-hen: Nu nduve maa tuhun Nyoo iyó, cua tsaā tuhun Nyoo tan cua cutuñi iñi nyivi iyó can itsi, catyí tsi.

*Nu tyaá ra Pablo cuhva tyin cuhun ra ñuu Roma*

<sup>22</sup> Yacan cuenda ña cuvi quitsi yu quitsi nyehe yu nu yucú ndo, vasu ndi maa cuaha xaan tsaha cuñi yu quitsi yu.

<sup>23</sup> Maa tyin vityin tsa ndiḥi jahā tyiñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo.

<sup>24</sup> Nyehe jihna yo tatun cuvi yaha yu nu yucú ndo quivi cua cuhun yu España. Tsa yaha tsa cunyi yu juhva quivi tsihin ndo, nyehe yo tatun cuvi jatyinyee ndo tsi yu tan tsaā yu nu cuhun yu.

<sup>25</sup> Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan.

<sup>26</sup> Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo.

<sup>27</sup> Tyehen cuñi ñi javaha ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsaha ñi tuhun ra Cristo tsi ñi. Yacan cuenda taahán tucu tsi tsi maa

ñi tsa jatyinyee ñi tsi ñi Israel tsihin tsa iyó tsi ñi.

<sup>28</sup> Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyivi Jerusalén, tacan tan cuhun yu nda España tan cua yaha yu nu yucú ndo.

<sup>29</sup> Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

<sup>30</sup> Yañi, Tatyí Ii Nyoo tsaha tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tyiñu jahá yu.

<sup>31</sup> Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tñin cuenda vaha ñi ofrenda tsa ndahá yu.

<sup>32</sup> Tan ndacan tahvi ndo na cuvi cuhva cuñi Nyoo tan cuvi quitsi yu quitsi nyehe yu nu yucú ndo tsihin tsa sñi cuñi yu tan cuvi quitatu vaha yu.

<sup>33</sup> Tan Nyoo, ra tsahá tsa taxin coo añima yo, na cunyaa ra tsihin tandiḥi ndo. Tan na cuvi tsi tacan.

## 16

*Nu tsaha ra Pablo nacumi tsi nyivi vaha iñi tsi ra*

<sup>1</sup> Jacotó yu tsi ndo tyin ña hermana Febe jatyinyee xaan ña tsi nyivi yihí cuenda Nyoo ñuu Cencrea.

<sup>2</sup> Naquihin vaha ndo tsi ña tumaā naquihín Jutu Mañi yo tsi yo, tumaā taahán tsi javaha ñi yihí cuenda Nyoo. Jatyinyee ndo tsi ña tsihin tandiḥi tsa tsiñi ñuhu tsi ña, tyin maa ña cuaha xaan nyivi jatyinyee ña, tan nda cuanda maa yu.

<sup>3</sup> Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús.

<sup>4</sup> Tsahnya iñi ñi ñayivi ñi quivi jacacu ñi tsi yu. Yacan cuenda tsahá



yu tyahvi nyoo tsi ñi. Tan ñavin yuhu ñi, tyin tandihí tucu nyívi tsa ñavin ñi Israel cuví, ñi tsa yihí cuenda Nyoo, tsahá ñi tyahvi nyoo tsi ñi.

<sup>5</sup> Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuví ra tsa tsinú jihna iñi tsi ra Cristo ityi Acaya.

<sup>6</sup> Cuhva ndo nacumi tsi ña María. Jahá tyiñu xaan ña nu yucú ndo.

<sup>7</sup> Cuhva ndo nacumi tsi nyívi ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tyiñu jahá tyiñú ra naha cuenda Jutu Mañi yo tsihin tandihí ca ra jahá tyiñu cuenda Nyoo. Tan jihna ca ra naha natsinú iñi tsi ra Cristo tan ñavin ca yuhu.

<sup>8</sup> Cuhva ndo nacumi tsi ra Amplias ra vaha iñi tsi yu cuenda Jutu Mañi yo.

<sup>9</sup> Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu.

<sup>10</sup> Cuhva ndo nacumi tsi ra Apeles. Nyehé yo tyin nditsa tsa tsinú iñi ra tsi ra Cristo. Tan tsahá tucu yu nacumi tsi nyívi ra Aristóbulo.

<sup>11</sup> Cuhva ndo nacumi tsi ra Herodión ñuu yu tan tsi nyívi ra Narciso, ñi tsa tsinú iñi tsi Jutu Mañi yo.

<sup>12</sup> Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo.

<sup>13</sup> Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi síhi ra, ña tsa cuví tumaa síhi yu.

<sup>14</sup> Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha.

<sup>15</sup> Cuhva tucu ndo nacumi tsi ra Filólogo tan tsi ña Julia tan tsi ra Nereo

tsihin cuhva ra, tan tsi ra Olimpás tan tsi tandihí ñi yihí cuenda Nyoo tsa yucú tsihin ñi.

<sup>16</sup> Cuhva tahan ndo nacumi tsi ndo. Tandihí nyívi yihí cuenda ra Cristo tsa iyó ityi ihya jaquitsí ñi nacumi tsi ndo.

<sup>17</sup> Yañi, caahán ndaahvi yu tsihin ndo, jahá ndo cuenda tsi ndo tsihin ñi cuñí jasín tsi ndo, tan nducú ñi cuhva tsa nduva ndo tsihin tuhún Nyoo, tyin ñavin tacan cutuhva ndo tuhún ra Cristo. Ña cutahan ndo tsihin ñi can.

<sup>18</sup> Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñí maa ñi javahá ñi. Tan jandahví ñaha ñi añima nyívi ndaahvi tsihin tsa vita caahán ñi.

<sup>19</sup> Tandihí nyívi tsitó ñi tyin tyaá yahvi ndo tsi Nyoo. Yacan cuenda síi xaan cuñí yu tsihin ndo, tan cuñí yu tsa yatyi javaha ndo tsa vaha. Maa tyin ña yatyi javaha ndo tsa ña vaha.

<sup>20</sup> Nyoo ra iyó tandihí tsa taxin añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo síqui nu. Na nasoco Jutu Mañi yo Jesucristo tsi ndo.

<sup>21</sup> Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

<sup>22</sup> Yuhu ra Tercio javahá yu tutu ihya tsa cuenda ra Pablo, juvín ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

<sup>23</sup> Jaquitsí tucu ra Gayo nacumi tsi ndo. Vehe ra iyó yu. Juvín ñi ihya ndú iin tandihí ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

<sup>24</sup> Na ndoo Jutu Mañi yo Jesucristo tsihin tandihí ndo. Tan na cuvi tsi tacan ñi.

*Nu ndihí caahán ra Pablo tan jacahnú ra tsi Nyoo*

<sup>25</sup> Tan vityin na jacahnu yo tsi Nyoo, tyin maa ra cuví ra cua cuhva

tsa ndu iin iñi añima ndo, tyin tacan tan ña jandihí ndo tsa tsinú iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhu xeehe tahán tsanaha nda ndi cumañi ca tsinu ñuhu ñayivi.

<sup>26</sup> Maa tyin vityin jacuahá Nyoo tsi yo tsa cuenda tutu tsa nacoꝝ ra cuví ndusu yuhu ra, ra tsahá cuenda tuhun ra tahán tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaa yahvi ñi tsa caahán ra.

<sup>27</sup> Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuví tsi tacan ñi.

## Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

*Nu tyaá ra Pablo iin carta tsa cuenda nyivi yihí cuenda Nyoo ñuu Corinto*

<sup>1</sup> Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo,

<sup>2</sup> jaquitsí ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihi nyivi tsa jacahnú tsi Jutu Mañi yo Jesucristo tandihi ñi ityi. Tyin cuví ra Nyoo cuenda ñi tan cuenda tucu maa yo.

<sup>3</sup> Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo aña ndo.

*Nacaa nasocó Nyoo tsi nyivi yihí cuenda ra*

<sup>4</sup> Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús.

<sup>5</sup> Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihí tucu ra tsa coto xaan ndo.

<sup>6</sup> Tan tandihí tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo.

<sup>7</sup> Tan yacan cuenda nduve tsa cumañi tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo.

<sup>8</sup> Nyoo cua jaha cuenda ra tsi ndo nda cuanda naa ñuhu ñayivi tyin tacan tan yoñi cuví tyaa cuatyí tsi ndo quivi cua quitsi Jutu Mañi yo Jesucristo.

<sup>9</sup> Nyoo tacan ñi maa javahá ra cuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

*Nyivi yihí cuenda Jutu Mañi yo, ña vaha quita sin ñi*

<sup>10</sup> Yañi, tsicán yu tsi ndo tsihin sivi Jutu Mañi yo Jesucristo, na iin ñi cuvi ndo tan ña cusin ndo. Tan iin ñi cuhva caca iñi ndo, tan iin ñi tuhun quihí iñi ndo.

<sup>11</sup> Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo.

<sup>12</sup> Tyin nyooho sin sin cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.”

<sup>13</sup> ¿A cuñi ra Cristo tsa quita sin yo? ¿A maa yu tsihi nu cruu tsa cuenda ndo? ¿A tsicoondutyá ndo tsihin sivi yu? Ñavin.

<sup>14</sup> Tyahví nyoo tsi Nyoo tyin ra Crispo tan ra Gayo ñi jacoondutyá yu tan ña jacoondutyá yu tsi ndi intuhun ca nyooho,

<sup>15</sup> yacan ña cuvi cahan ndo tyin tsicoondutyá ndo tsihin sivi yu.

<sup>16</sup> Aan, jacoondutyá tucu yu tsi nyivi ra Estéfanos, maa tyin ña nducuhún iñi yu tun jacoondutyá yu tsi inga ndo.

<sup>17</sup> Tyin ra Cristo ña tava tyiñu ra tsi yu tsa jacoondutyá yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyí nyivi tyin nduve yahvi nyaá tsa tsihi ra Cristo cuenda cuatyí yó.

*Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi*

<sup>18</sup> Nyivi tsa cua cuhun anyaya tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsihi ra. Tan tsa cuenda yoo tsa

cua cacu, tunyee iñi Nyoo cuví tsa tsihi ra.

<sup>19</sup> Tyin tacan catyí maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyí Nyoo.

<sup>20</sup> Nduve yahvi nyaá ra tsa tsitó xaan, tan ra maestro, tan ra caahán náa ndihi tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduvi can jahá Nyoo.

<sup>21</sup> Nyoo tsihin tsa tsiñi tuñi tsa iyó tsi ra tyaa ra cuhva tyin ña cuví nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaa tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

<sup>22</sup> Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi.

<sup>23</sup> Maa tyin nyuhu jacotó ndi tuhun ra Cristo, ra tsa tsihi nu cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi.

<sup>24</sup> Maa tyin tsa cuenda nyivi tsa nacatsi Nyoo, cuví ñi nyivi Israel, a nyivi Grecia, ñi ican cutuñi iñi tyin ra Cristo iyó tandihi tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo.

<sup>25</sup> Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya.

<sup>26</sup> Yañi, cuñi tsi tsa cutuñi iñi ndo tyin Nyoo nacatsi ra tsi ndo vasu ndi maa ña cuaha ndo cuví nyivi tsitó, tan nyivi cahnu cuví o nyivi ndacá ñaha nu ñuhu ñayivi ihya.

<sup>27</sup> Nacatsi ra tsi nyivi tsa catyí nyivi tyin soho xaan ñi, tyin cuhva ra ticanuu tsi nyivi tsitó xaan. Tan

nacatsi ra tsi nyivi nduve tunyee iñi iyó tsi tyin cuhva ra ticanuu tsi nyivi cuñi tyin iyó xaan tunyee iñi tsi ñi.

<sup>28</sup> Tan nacatsi ra tsi nyivi ndaahvi tsa cuñi nyivi tyin ña tsiñi ñuhu ñi, tan nyivi tsa ña cuñi nyivi nyehe ñi, tan janduluhlú ra tsi nyivi jahá tyin cahnu cuví ñi.

<sup>29</sup> Javahá ra tacan tyin tacan tan yoñi cuví nduyaa nuu ra.

<sup>30</sup> Tan juvin ñi maa ra jandu ijin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jata ra tsi yo tsihin ñiñi ra, quihin nyaa ra tsi yo ndaha nu ña vaha tan cacu yo tan nduvaha yo jahá ra tan jacu í ra tsi yo.

<sup>31</sup> Yacan cuenda na javaha yo cuhva catyí tuhun Nyoo nu catyí tsi tyehen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

## 2

### *Tuhun ra Cristo, ra tsihi nu cruu*

<sup>1</sup> Maa tyin yañi, quivi tsa quitsi yu cahan yu tuhun Nyoo tsihin ndo, ña cahan yu tuhun tsa tsiñi tuñi tsa iyó nu ñuhu ñayivi ihya tumaa caahán ra tsitó xaan naha ra.

<sup>2</sup> Tyin maa ñi maa tuhun ra Jesucristo, nácaa tsihi ra nu cruu tsa cuenda cuatyí yo tyaa iñi yu tan cahan yu tsihin ndo.

<sup>3</sup> Tan tsa tsaá yu nu yucú ndo ñihi nihí yu jahá tsa yuuhví yu.

<sup>4</sup> Tan tsa cahan yu tsihin ndo, ña cahan yu tsihin tuhun sii caa tumaa caahán ra tsitó xaan naha ra. Maa tyin tsihin tunyee iñi Tatyí Ii Nyoo cahan yu tsihin ndo.

<sup>5</sup> Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

### *Juvin ñi maa Tatyí Ii Nyoo tsahá tsa nacoto yo tsi Nyoo*

<sup>6</sup> Maa tyin nditsa caahán ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa



tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo

<sup>7</sup> tsa tsicumi xeehe ra tsa ndi cumañi ca javaha ra ñuhu ñayivi ihya. Tyaá ra cuhva tsa jacacu ra tsi yo tan cunyecu cuii yo tsihin ra nda gloria.

<sup>8</sup> Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaá ra naha tsi Jutu Mañi yo, ra ndacá ñaha gloria, nu cruu.

<sup>9</sup> Maa tyin cuvī tsi tumaa catyí maa tuhun Nyoo:

Yoñi nyehe tan yoñi tsiñi tan tsicá iñi tuhun vaha  
tsa javaha Nyoo tsa cuenda nyivi cuñi tsi ra, catyí tsi.

<sup>10</sup> Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juvin ra jacotó tandihi ca tuhun xeehe tsa tsicá iñi Nyoo tsi yo.

<sup>11</sup> Intuhun intuhun yo tsitó yo nácaa tsicá iñi yo, maa tyin inga nyivi ña tsitó ñi tsa tsicá iñi yo. Tan tacan tucu intuhun ñi Tatyí Ii Nyoo tsitó ra tsa tsicá iñi maa Nyoo.

<sup>12</sup> Yoo ñavin tsa tsiñi tuñi tsa iyó nu ñuhu ñayivi naquihin yo, tyin naquihin yo Tatyí Ii Nyoo, tan juvin ra jacotó tandihi tsa ñihí yo jahá Nyoo.

<sup>13</sup> Tan tsa caahán ndi tsihin ndo ihya, tuhun tsa jacuahá maa Tatyí Ii Nyoo tsi ndi cuvī. Ñavin tsa cutuhva maa ndi tsihin tsa tsiñi tuñi jiñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyivi tsa yihí Tatyí Ii Nyoo.

<sup>14</sup> Maa tyin nyivi tsa nduve Tatyí Ii Nyoo iyó tsihin, ña naquihin vaha ñi tan ndi ña cutuñi iñi ñi tsa jacuahá Tatyí Ii Nyoo tsi ñi. Tan cuñi maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi.

<sup>15</sup> Maa tyin nyivi yihí Tatyí Ii Nyoo cuvī cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuvī catyí inga nyivi tatun vaha a ña vaha tsa iyó añima ñi.

<sup>16</sup> Tyin tuhun Nyoo catyí tsi: “Yoñi tsitó tsa tsicá iñi Jutu Mañi yo Nyoo. Yoñi cuvī jacuahá tsi ra”, catyí tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

### 3

*Ña taahán tsi cunyicun yo tsi iin ra yihí tuhun Nyoo tsihin yo, na cunyicun yo tsi Nyoo*

<sup>1</sup> Yañi, quivi tsa quitsi yu nu yucú ndo ña cuvī cahan yu tsihin ndo tumaa caahán yu tsihin nyivi jaquihín ityi Tatyí Ii Nyoo. Cahan yu tsihin ndo tumaa caahán yu tsihin nyivi ña tsitó tsi Nyoo, tyin ndi lee xaan ndo tsihin ra Cristo.

<sup>2</sup> Cahan yu tsihin ndo tsihin tuhun tsa ña yñi ñi cutuñi iñi ndo. Tumaa tsahá yo letsí coho lee tsa ñaha ca cuvī catsi nyayu, tacan javaha yu tsihin ndo, tyin nyooho ñaha ca cuvī cutuñi vaha iñi ndo. ¡Tan ndi vityin tan ña cutuñi iñi ndo!

<sup>3</sup> Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tsihi nu yucú ndo, tan ndusiñ ndo. Ndi tsicá iñi ndo tuhun tsicá iñi nyivi cuenda nu ñuhu ñayivi ihya, tan javahá ndo tumaa cuñi cuñu ñuhu ndo.

<sup>4</sup> Tyin yihí ndo catyí ndo: “Cuenda ra Pablo yihí yu.” Tan inga ndo catyí ndo: “Cuenda ra Apolos yihí yu.” Yacan cuñi tsi catyí tyin javahá ndo tumaa javahá nyivi iyó ityi tsata.

<sup>5</sup> Tyin ¿yóo ra cuvī yuhu, ra Pablo? Tan ¿yóo ra cuvī ra Apolos? tyin cañi tahan ndo tsaha ndi. ¿A ñavin musu Nyoo ñi cuvī ndi? Juvín. Tan cahan ndi tuhun Nyoo tsihin ndo tan natsinu iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyí maa Nyoo tyin javaha ndi.

<sup>6</sup> Yuhu tatsi tuhun Nyoo añima ndo, tan ra Apolos tyosó. Maa tyin Nyoo jacuhnū ra tuhun ra añima ndo.

<sup>7</sup> Tan yacan cuenda ndi ra tsa tatsi tan ndi ra tsa tyosó, nduve ra cuvī

ra. Maa tyin Nyoo cuví ra tandihí tyin maa ra jacuahnú tuhun ra añima yo.

<sup>8</sup> Ra tsa tatsí tan ra tsa tyosó, iin ñi ra cuví ra naha. Tan Nyoo cua tyahvi tsi intuhun intuhun ra naha cuhva tyiñu jahá ra naha.

<sup>9</sup> Tan nyuhu, cuví ndi musu tan jahá tyiñu ndi tyiñu Nyoo. Tan nyoooho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo.

<sup>10</sup> Tsaḥa Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaquin yu cuhva vehe can tan tyihí yu tsaḥa tsi tsitsi ñuhu. Tan inga ra tsa cua sama ityi siqui cuví ra jacuahá, tan cuñí tsi jahá ra cuenda nácaa jacuahá ra tuhun Nyoo.

<sup>11</sup> Tan yoñi cuví caquin inga cuhva tyin tsa canyií cuhva can. Tan yacan cuví ra Jesucristo.

<sup>12</sup> Tan siqui cuhva can cuví sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama.

<sup>13</sup> Maa tyin quivi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javahá ra naha.

<sup>14</sup> Tan vehe tsa ña cua cayu, cua ndoo tsi. Tan ra tsa javahá vehe can cua naquihin ra yahvi tsa taahán tsi tsi ra.

<sup>15</sup> Maa tyin tun ndihí tyiñu javahá ra naha cayu, nduve náa cua ñihi ra naha. Vasu cua cacu maa ra naha tumaa cacu iin ra tsa cuñi cayu tan tsinu ra nu cayú ñuhu.

<sup>16</sup> ¿A ña tsitó ndo tyin vehe ñuhu Nyoo cuví ndo, tan iyó Tatyí Ii Nyoo tsitsi añima ndo?

<sup>17</sup> Tatun iin nyivi jativi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

<sup>18</sup> Ndi intuhun ndo tan ña jandavi ñaha ndo tsi ndo. Tyin tatun cuñí ndo tyin tsitó xaan ndo tsihin tsa tsiñi tuñi

tsa iyó nu ñuhu ñayivi ihya, cuñi tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo.

<sup>19</sup> Tyin tsa tsiñi tuñi tsa iyó nu ñuhu ñayivi ihya nduve yahvi nyaá can nu Nyoo. Tyin catyí tuhun Nyoo: “Janacavá ra tsi ra tsitó, juvin ñi maa nu tsa nyityi javahá ra.”

<sup>20</sup> Tan catyí tucu tsi: “Jutu Mañi yo tsitó ra tyin tsa tsicá iñi ra tsitó, nduve yahvi nyaá can.”

<sup>21</sup> Yacan cuenda ndi intuhun ndo tan ña taahán tsi cu iyo iñi ndo nyehe ndo tsi iin ra jacuahá tsi ndo tyin maa Nyoo tsaḥa tsi ra naha tsa jacuahá ra naha tuhun vaha tsi ndo tan tsaḥa ndihí ra tandihí tsa iyó tsi ndo.

<sup>22</sup> Yuhu ra Pablo, ra Apolos, ra Pedro, maa Nyoo tsaḥa tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihi, tan tsa cuví vityin, tan tsa cua cuví nu cuahán ca tsi, tandihí maa tuhun ihya tsaḥa Nyoo tsi ndo.

<sup>23</sup> Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví ra.

## 4

### *Ña jacahnu yo tsi yo tan ndi tsi yañi yo*

<sup>1</sup> Yacan cuenda ña taahán tsi nyehe ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuaha ndi tuhun xeehe ra.

<sup>2</sup> Tan ra tsa tava tyiñu Nyoo cuñí tsi tsa tyaá yahvi ra tandihí tsa caahán ra tsihin ra.

<sup>3</sup> Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu.

<sup>4</sup> Vasu ndi maa tuví iñi yu tyin nduve cuatyí yu, maa tyin ña cuñí tsi catyí tyin nduve cuatyí yu nuu Nyoo. Tyin maa Jutu Mañi yo cua catyí tun iyó cuatyí yu o nduve.

<sup>5</sup> Yacan cuenda, ña cahan ndo tsi yu. Cuatu ndo nda tañan maa tsi

quitsi ra Cristo, tyin maa ra cua tava tsa yihí xeehe nu naa nu nditsin, tan cua jaqutuvi ra tsa iyó aña intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

<sup>6</sup> Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehe ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihi nyivi.

<sup>7</sup> Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsaha can tsi ndo.

<sup>8</sup> Tan cuñi ndo tyin tsa tsitó maa ndo tandihi tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu.

<sup>9</sup> Nyuhu tsa cuví ndi ra tsicá tyiñu ra Cristo, tumaa tsa nacoq Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi.

<sup>10</sup> Nyivi tsicá iñi maa ñi tyin tsa cuenda ra Cristo tan ndusoho ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyooho iyo xaan cuñi ndo tyin iyó tunyee iñi tsi ndo. Tun ndasi cuñi nyivi nyehé ñi tsi nyuhu, jaha xaan ca ñi tsa ñayivi tsi nyooho.

<sup>11</sup> Nda cuanda vityin nyehé ndi tundoho; tsisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi.

<sup>12</sup> Tan tsitatú ndi tsa jahá tyiñu ndi tsihin ndaha ndi. Caahán nyivi tsi ndi, maa tyin nacahán ndi tsihin tsa

vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi.

<sup>13</sup> Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

<sup>14</sup> Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu.

<sup>15</sup> Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahan tuhun ra Cristo Jesús tsihin ndo nda jihna ñi tan natsinu iñi ndo tsi ra.

<sup>16</sup> Tan tsa cuenda tsehe tsicán yu tsi ndo tsa javaha ndo tumaa javahá maa yu.

<sup>17</sup> Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nii xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihi ñi vehe ñuhu nu cuahán yu.

<sup>18</sup> Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo.

<sup>19</sup> Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha.

<sup>20</sup> Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha.

<sup>21</sup> ¿Naa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

## 5

*Nu tava tyiñu ra Pablo tyin cutuñi iin ra tsicoq tsihin shi quin*

<sup>1</sup> Ñihĩ tuhun yu tyin iin ra nyíí tsihin ndo iyó ra tsihin sihi quiin ra. Tan yacan cuví cuatyí cahnu xaan, tyin ndi nyívi iyó ityi tsata tan ña javahá ñi tacan tyin tsitó ñi tyin ña vaha.

<sup>2</sup> Taahán tsi cuihyá cuñí ndo tsa cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo.

<sup>3-4</sup> Vasu nduve yu nyíí tsihin ndo, maa tyin tumaa tsa nyíí ñi yu tsihin ndo tyin ñuhú iñi yu tsi ndo, tan tsihin sihi Jutu Mañi yo Jesucristo jandaa yu tyiñu ra tsa javahá cuatyí can. Yacan cuñí tsi tsa ndu iin ndo. Tan jaha ndo tuhun tyin nyíí yu tsihin ndo. Tan cunyaa tunyee iñi Jutu Mañi yo Jesús tsihin ndo.

<sup>5</sup> Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiqui tacan tan cua jandihĩ ra tsa javahá ra can. Tacan tan quihi quitsi Jutu Mañi yo Jesucristo cacu añima ra.

<sup>6</sup> Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaa tsi tandihĩ yutsan paan? Tan tacan ñi cuñi yo cuví tucu yacan.

<sup>7</sup> Tava ndo yutsan iya tsahnu tsa jativí tsi ndo. Tacan tan cuvi ndo tumaa paan tsa tuhvá nyívi javahá vico pascua, tyin paan can nduve yutsan iya yihĩ tsihin tsi. Tsa nditsa tyin tacan taahán tsi cuvi tucu nyooho tyin maa ra Cristo cuví mbee ticatyí luhlu tsa tsihi tsa cuenda cuatyí yo.

<sup>8</sup> Yacan cuenda taahán tsi catsi coo yo tyin tsihi ra Cristo tsa cuenda yo. Tan jandoó yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa ñi iñi yo tyin cuví tsi tumaa paan tsa nduve yutsan iya yihĩ.

<sup>9</sup> Nu inga carta tsa jaquitsi yu tsi ndo, catyi yu tyin ña taahán tsi cunyanaa ndo tsi ra tsicá nuu tsihin ñaha.

<sup>10</sup> Tan tsa caahán yu tyehen tsihin ndo, ñavin tsa cunu ndo nu nyívi tsa iyó ityi tsata, ñi tsa iyó tsihin rayhi a ñaha, ñi tsa nyiyó iñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñí tsi tsa quita ndihĩ ndo nu ñuhu ñayívi ihya.

<sup>11</sup> Maa tyin tsa cuñi yu catyi yu tsihin ndo ña cunyaa naa ndo tsi nyívi tsa catyi: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayhi, o nyiyó iñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi.

<sup>12-13</sup> Tyin yoo ña taahán tsi tatsi tuñi yo tsi nyívi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñi tsi tatsi tuñi ndo tsi nyívi yihĩ cuenda Nyoo. Yacan cuenda tava ndo tsi ra iyó cuatyí nu yucú ndo.

## 6

*Ña cua ndacan yo cuatyí tsaha iin yañi yo cuenda Nyoo nuu ra cumí tyiñu*

<sup>1</sup> ¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihĩ cuenda Nyoo tsihin ndo, tan ña jacoto ndo tsi ra yihĩ cuenda Nyoo, tan nyehe maa ra naha ndaa ra iyó cuatyí?

<sup>2</sup> ¿A ña tsitó ndo tyin juvin ñi maa yo cua jandaa cuatyí tandihĩ nyívi iyó nu ñuhu ñayívi ihya nu cuahán ca tsi? Tan tatun maa yo cua jandaa cuatyí can, ¿nacuvi tyin ña cuví jandaa ndo cuatyí nyihi ihya?

<sup>3</sup> ¿A ña tsitó ndo tyin cua jandaa yo cuatyí nda cuanda ángel? Tun tacan, ¿a yhi jandaa yo cuatyí nyihi tsa iyó nu ñuhu ñayívi? ¿Ña yhi jandaa yo can!

<sup>4</sup> Yacan cuenda tatun iyó tsihi nu yucú ndo, ¿nacuenta tyin cuahán ndo nuu ra cumí tyiñu tsa ña yihĩ tuhun Nyoo?

<sup>5</sup> Caahán yu tyehen tsihin ndo na nducahan nuu ndo. ¿A nduve cuii vasu intuhun ra jandaa cuatyí yañi ndo nu yucú ndo?



<sup>6</sup> Tyin cuahán ndo cua ndacan ndo cuatyí tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

<sup>7</sup> Ña vaha tsa iyó tsihi nu yucú ndo. Vaha taxin ca cunyeey iñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo.

<sup>8</sup> ¡Maa tyin nyooho javahá ndo tsa ña vaha tan suhú ndo nda cuanda tsa tsii yañi ndo!

<sup>9-10</sup> ¿A ña tsitó ndo tyin nyivi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu tsihin rayi, ndi ñi jacahnú tsitoho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yi tan iyó inga rayi tsi ñi, ndi ra ndusihi, ndi ñi nduyi, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit; o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi.

<sup>11</sup> Tyin tacan javahá juhva nyooho. Maa tyin tsa ndatsi cuatyí ndo tan ndu iñi ndo tan nduvahá ndo nuu Nyoo jahá Jutu Mañi yo Jesucristo tan Tatyí Ii Nyoo.

### *Cuñu ñuhu yo cuví vehe ñuhu Nyoo*

<sup>12</sup> Catyí tsi tyin nuña maa javaha yo tandihí náa cuñi maa yo. Tan nditsa tucu maa, maa tyin ña tandihí tan vaha. Cuví javaha yo náa cuñi maa yo, maa tyin cuñi tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo.

<sup>13</sup> Catyí nyivi tyin Nyoo javahá ra tsa tsatsí yo tsa cuenda tsitsi yo. Tan javahá ra tsitsi yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayi, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo.

<sup>14</sup> Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

<sup>15</sup> ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jativi yu tsihin iin ñaha tsicá nuu? Ña taahán tsi javaha yo tacan.

<sup>16</sup> ¿A ña tsitó ndo tyin tun iin rayi tan iyó ra tsihin iin ñaha tsicá nuu intuhun ña cuñu ñuhu nanduvi ra tsihin ña? Tyin nu tutu Nyoo catyí tsi tyehen: “Tsa nduvi ñi, iin ña nyivi cuví ñi.”

<sup>17</sup> Maa tyin tatun iin nyivi tan nacuhva ñi aña ñi tsi Jutu Mañi yo, iin ñi cuví ñi tsihin ra tyin quihvi Tatyí Ii ra aña ñi.

<sup>18</sup> Jandihí ndo tsa iyó ndo tsihin ñaha a tsihin rayi tun ñavin ñasihi ndo a ñavin yi ndo cuví. Tyin tandihí inga nu cuatyí tsa javahá nyivi ña jativi can cuñu ñuhu ñi. Maa tyin tsa tsicá nuu ñi tsihin ñaha a tsihin rayi, jativi can cuñu ñuhu ñi.

<sup>19</sup> ¿A ña tsitó ndo tyin cuñu ñuhu yo cuví vehe ñuhu Tatyí Ii tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo.

<sup>20</sup> Tyin Nyoo yahvi xaan jata ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsi maa Nyoo cuví.

## 7

### *Nu tsahá cuenda ra Pablo nácaa taahán tsi coo nyivi tindahá*

<sup>1</sup> Tan vityin cua cahan yu tsa tsica tuhun ndo tsi yu nu carta tsa jaquitsi ndo tsi yu. Nditsa tyin vaha tsa ña tindaha yo.

<sup>2</sup> Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayi. Yacan cuenda cuñi tsi tsa coo ñasihi tsa intuhun intuhun

ra naha, tacan tucu ñiñaha taahán tsi coo yíi tsa intuhun intuhun ñi.

<sup>3</sup> Na javaha rayíi cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yíi ña.

<sup>4</sup> Ñiñaha ña cuvi cundaca ñaha ñi maa ña cuñu ñuhu ña, tyin tsii yíi ña cuví cuñu ñuhu ña. Tacan tucu maa yíi ña, ña cuvi cundaca ñaha ñi maa ra cuñu ñuhu ra tyin tsii ñasihi ra cuví cuñu ñuhu ra.

<sup>5</sup> Ña vaha tun ña cuhva iin ndo tsi ndo tsi inga ndo. Tatun cuñi ndo coo ndo oración, vaha ca natuhun tahan jihna ndo tyin ña cua coo tsihin tahan ndo quivi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayíi inga ñaha o ñaha nducu ña inga rayíi tan javaha ndo tsa ña vaha jaha nu ña vaha.

<sup>6</sup> Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuví tindaha ndo tatun cuñi ndo.

<sup>7</sup> Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yíhi yo tsahá ra tunyee iñi tsa ña coo ñasihi yo. Tan yíhi yo tsahá ra tunyee iñi tsa coo ñasihi yo.

<sup>8</sup> Tsahá cuenda yu tuhun ihya tsi tandihi nyooho tsa ñaha ca tindaha tan nyooho ñi tsihi yíi tyin vaha ca cuvi tsi ndo tun ña tindaha ndo tumaa maa yu.

<sup>9</sup> Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

<sup>10</sup> Maa tyin caahán yu tsehe tsihin nyooho ñiñaha tsa tsa tindaha: ña naco ndo yíi ndo tyin tuhun caahán yu ihya, ñavin tsa cuñi maa yu cuví, tyin maa Jutu Mañi yo tsahá itsi tyin cuhva cuenda yu tsi ndo.

<sup>11</sup> Maa tyin tatun iin ñaha tan naco ña yíi ña, cuñi tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yíi ña. Tan tacan tucu rayíi, ña taahán tsi naco ra ñasihi ra.

<sup>12</sup> Tan cuñi yu cahan yu inga tuhun ihya tsihin inga ndo, maa tyin ñavin Nyoo tsahá itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoo ña vaha tsa cunyaa ña tsihin ra, nduve ndatu tsa naco ra tsi ña.

<sup>13</sup> Tan tatun iin ña hermana, tan ña tsinú iñi yíi ña tsi Nyoo, ndoo ra vaha tsa cunyaa ra tsihin ña, nduve ndatu tsa naco ña tsi ra.

<sup>14</sup> Tyin tsa yaha nasoco Nyoo tsi rayíi tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yaha nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuví tsi naha tsi tumaa cuví sehe nyivi tsa ña tsinú iñi tsi Nyoo, tyin tsa nasoco ndihi Nyoo itsi naha tsi.

<sup>15</sup> Maa tyin tatun rayíi an ñaha tsa ña tsinú iñi tsi Nyoo, tan cuñi ñi naco ñi tsi tahan ñi tsa tsinú iñi tsi Nyoo, na naco maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yo tsihin tsa nduve tsihi.

<sup>16</sup> Tyin ña tsitó iin ñaha tatun cacu yíi ña. Tan ndi rayíi ña tsitó ra tatun cacu ñasihi ra.

<sup>17</sup> Tan catyí yu tsihin ndo coo ndo tsihin ndatu tsa tsahá Jutu Mañi yo tsi ndo tan cuhva iyó ndo quivi cana ra tsi ndo. Tan tsehe cuví tsa jacuahá yu tandihi vehe ñuhu tan iin tan iin ñuu.

<sup>18</sup> Tatun tsa yaha tsinyaa tuñi Nyoo cuñu ñuhu ndo tan cana Nyoo tsi ndo ña caça iñi ndo tsa cuenda yacan. Maa tyin tun ña tyaá ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can.

<sup>19</sup> Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaá yahvi yo tuhun caahán Nyoo.

<sup>20</sup> Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quivi tsa cana Nyoo tsi ndo.

<sup>21</sup> Tyin tatun musu cuví ndo quivi tsa cana Nyoo tsi ndo, ña caça iñi ndo. Maa tyin tatun tsahá tsi cuhva tsa ndoo nuña ndo, nducu ndo cuhva.

22 Iin ra tsa cuví musu tan quihví ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihví ra cuenda Jutu Mañi yo, vityin cuví ra musu tsa cuenda ra.

23 Nyoo yahví xaan jatá ra tsi yo, yacan cuenda ña taahán tsi cuhva yo tsa cundaca ñaha ra ñuu ñayívi naha ra tsi yo.

24 Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quívi caná Nyoo tsi ndo.

25 Tan tsa cuenda nyívi tsa ñaha ca tindaha, nduve tuhun tsaha Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsaha ra tucahnu iñi tsi yu tan maa ra yihí ndaha tsi yu.

26 Tsa cuenda yuhu, vaha ca ña tindaha ñi can, tyin vityin cuaha xaan tundoho ñayívi iyó.

27 Maa tyin tatun tsa iyó ñasihi ndo, ña nducu ndo cuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo.

28 Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyívi tsa tindaha cuaha xaan tundoho cua nyehe ñi ñayívi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñi yu tsa nyehé ndo tundoho.

29 Yañi, cuñi yu cahan yu tuhun ihya tsihin ndo: Juhva cuii ña quívi iyó yo. Yacan vityin tan ityi nuu tandihí ra tsa iyó ñasihi cuñi tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó.

30 Tan nyooho tsa iyó tucuiihya iñi, ña tyaa yahvi ndo tucuiihya iñi can. Tan nyooho tsa sii cuñi, ña tyaa yahvi ndo tusii iñi can. Tan nyooho tsa jatá ndaha tyiñu taahán tsi coo ndo tumaa tsa nduve ndaha tyiñu ndo.

31 Tan nyooho tsa iyó vaha nu ñuhu ñayívi ihya, coo ndo tumaa tsa nduve ñi tsa iyó tsi ndo, tyin tsa cua ndihi ñuhu ñayívi ihya.

32 Cuñi yu tyin nyooho ña caca xaan iñi ndo tuhun tsa iyó nu ñuhu ñayívi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñi maa Jutu Mañi yo.

33 Maa tyin tatun tsa tindaha ra, tsicá iñi ra nácaa coo vaha ra nu ñuhu ñayívi ihya cuhva taahán iñi ñasihi ra.

34 Tan tacan tucu ñiñaha, siin siin cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jacahnu ña tsi Nyoo tsihin cuñu ñuhu ña, tan tsihin tsa nii iñi añima ña. Maa tyin ñaha tsa iyó yí, maa ñi cuhva coo vaha ña tsihin yí ña nducú ña.

35 Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin ñayívi cuiti tsihin tsa nduve tsa jatyañú tsi ndo. Tan javaha ndo iin ñi tyiñu Nyoo.

36 Maa tyin ndáa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñi tsi; ñavin cuatyí cuví can.

37 Maa tyin ndáa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa.

38 Ñi tsa cuñi tindaha sehe ñi, vaha javahá ñi. Tan ñi tsa ña cuñi tindaha sehe ñi, vaha ca javahá ñi.

39 Maa tyin ley Nyoo catyí tsi na cundacá ñaha rayí tsi ñasihi ra tsitsi tsa ndi iyó ra. Tatun tsa tsihi ra, tacan tan cuví ndoo nuña ña tan tindaha ña yoo tsihin cuñi maa ña. Maa tyin tun cua tindaha ña, na tindaha ña tsihin ra yihí tuhun Nyoo.

40 Maa tyin sii xaan ca cua cuví tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñi yu tyin maa Tatyí li Nyoo, tsaha tuhun ihya tsi yu, tan tsahá cuenda yu tsi ndo.

## 8

*Nu jacuahá ra Pablo tyin ña vaha janacava yo tsi nyívi nu cuatyí*

1 Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñi yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñi yo tan nduyaá yo tsihin can. Tan ndi nduve nu jatyinyee can tsi yo. Maa tyin tsa cuñi tahan yo tsi yo jacuahnú tsi tsi yo tsihin Nyoo.

2 Ra tsa cuñi tyin tsitó xaan ra, nduve náa tsitó ra.

3 Maa tyin Nyoo tsitó ra ndáa nyivi cuñi tsi ra tsihin tsa ñi ñi ñi ñi ñi.

4 Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó.

5 Vasu ndi maa juhva nyivi catyí ñi tyin iyó cuaha nyoo tsa ndacá ñaha nu ñihu ñayivi ihya tan andivi,

6 maa tyin tsa cuenda yoo, intuhun ñi Nyoo Jutu yo iyó. Tan juvin ra javahá tandihí cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandihí maa tsa iyó, nda cuanda tsi maa yo.

7 Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá ñi ñi tyin nyito tsitoho can. Tan cuñi ñi tyin nyayu, tsa jamañi nyivi tsi tsitoho can, ica tsi. Tan cuñi ñi tyin tun catsi ñi nyayu can cua coo cuatyí ñi nu Nyoo.

8 Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo.

9 Maa tyin nyooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihvi tuhun Nyoo nu cuatyí, tyin ñi ican tsicá ñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo.

10 Tyin tatun yooho tsa tsitó un tuhun ihya, tan cunyaa un catsi un tsa iyó vehe tsitoho, tan iin ra yañi yo

tsa ndi quihvi cuenda Nyoo tan nyehe ra tyin tsatsí un tsa jamañi nyivi nu tsitoho, cua cuñi ndihí ra catsi ra.

11 Tan cua tiví ñi ñi ñi ra tyin cuñi maa ra tyin tsicoo cuatyí ra. Tan ra ican tsihi ra Cristo tsa cuenda ra. Tan yooho tsa tsitó un, siqui un cua cuhun cuatyí can.

12 Tyin tun janacava yo tsi yañi yo tsa ndi quihvi cuenda Nyoo, tsicoo cuatyí yo nuu ra Cristo.

13 Yacan cuenda tatun janacava yo tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quivi, tyin ña cuñi yu tsa janacava yu tsi yañi yo nuu cuatyí.

## 9

### *Tsa taahán tsi javahá iin ra tava tyiñu ra Jesucristo*

1 Nditsa tsa cuví yu iin ra tava tyiñu ra Jesucristo. Tan yoñi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juvin ñi maa ndo cuví tsandaa tsa cuenda tyiñu javahá yu, tyin tsinú ñi ndo tuhun ra tsa jacoto yu tsi ndo.

2 Vasu yihí nyivi ña tsinú ñi ñi tyin ra Jesucristo tava tyiñu tsi yu, maa tyin nyooho taahán tsi tsinu ñi ndo, tyin juvin yu cahan tuhun ra tsihin ndo tan natsinu ñi ndo tsi ra. Yacan cuenda juvin ndo cuví tsandaa.

3 Tyehen cuví tsa cua cahan yu tsihin nyivi tsa caahán nya tsi yu.

4 Iyó ndatu tsa quihín yu tandihí tsa tsahá ñi catsi yu tan tsa tsahá ñi coho yu.

5 Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandihí ca ra tava tyiñu ra Jesucristo.

6 ¿O tsicá ñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiñi ñihu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo?



<sup>7</sup> Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuaa tsa queé nu nducuaa ra. Tan ra tsa jahá cuenda indiqui tsihí ra letsi tí.

<sup>8</sup> Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaá ra Moisés catyí tsi tyehen:

<sup>9</sup> “Ra tsa tatsí trigu ña taahán tsi tyihí ra yoho yuhu indiqui tsa janduvahá trigu can, tyin taahán maa tsi catsi tí juhva trigu nu jahá tyiñu tí.” Nditsa tyin Nyoo ña cahan ra tyehen tsa cuenda indiqui ñi.

<sup>10</sup> Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha.

<sup>11</sup> Tan tacan cuví tucu nyuhu, quitsi cahan ndi tuhun Nyoo tsihin ndo, tumaa tsa quitsi tatsi ndi tsiti tsitsi añima ndo cuvi can. Tan taahán tsi tsa jatyinyeé ndo tsi ndi tsa cuenda tsa jacotó ndi tuhun Nyoo tsi ndo.

<sup>12</sup> Tatun jatyinyeé ndo tsi inga ra tsa ña quitsi tyihí tuhun Nyoo nu yucú ndo, taahán tsi tsa cuaha ca jatyinyeé ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihí. Ña tsicán ndi tsa tsiñi ñuhu tsi ndi tsi ndo tyin coto jandihí ndo tsa tyaá yahvi ndo tuhun ra Cristo tsa jacuahá ndi.

<sup>13</sup> Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá sin ra naha juhva cuñu quiti tyin catsi ra naha. Tan tandihí ca cuñu can cua cahmi ra naha tumaa catyí maa Nyoo tsihin ra naha.

<sup>14</sup> Tan juvin ñi tacan caahán Jutu Mañi yo, tyin taahán tsi jatyinyeé ñi yihí cuenda Nyoo tsi ra caahán tuhun Nyoo tsihin ñi.

<sup>15</sup> Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaá yu tuhun ihya tyin cuñi yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihí tsa

sii cuñi yu caahán yu tuhun ra Cristo tsihin ndo vasu ndi maa nduve náa jatyinyeé ndo tsi yu.

<sup>16</sup> Ña cuví nduyaa yu tsihin tsa caahán yu tuhun Nyoo tyin maa ra Cristo tava tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya.

<sup>17</sup> Yacan cuenda tatun cahan yu tsihin tsa ñi iñi yu, cua ñihi yu yahvi yu. Vasu ña cuñi yu cahan yu, tsa ñiñi cuñi tsi cahan yu, tyin tyiñu tsaha maa Nyoo tsi yu cuví tsi.

<sup>18</sup> Tan tsa sii cuñi yu caahán yu tuhun ra Cristo yacan cuví yahvi yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

<sup>19</sup> Vasu ñavin musu cuví yu, maa tyin nanduví yu musu tandihí nyivi tyin tacan tan cuví jaha canaa yu cuaha ca nyivi cuenda ra Cristo.

<sup>20</sup> Tatun nyii yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu.

<sup>21</sup> Maa tyin tatun cuñi yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyin ña tyaá yahvi yu ley Nyoo tyin tyaá yahvi yu ley ra Cristo.

<sup>22</sup> Tatun nyii yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyeé ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi, tyin tacan tan tyaá soho ñi tuhun Nyoo tsa caahán yu tsihin ñi tan cacu ñi.

<sup>23</sup> Javahá yu tacan tyin tacan tan cacu nyivi tan nasoco ndihí tucu maa Nyoo tsi yu.

<sup>24</sup> Tsitó ndo tyin tatun cua cunu suuhva nyivi, tandihí ñi tsinú, maa

tyin intuhun ñi ñi jaha canaa. Tacan tucu maa yo, cuñi tsi tsa ñihi cunyi-cun yo tsi Nyoo tyin tacan tan cuvi jaha canaa yo tsa vaha ca tsa tsahá ra tsi yo.

<sup>25</sup> Tandihí nyivi tsa tsinú suuhva, nacoó ñi tandihí tsa jatyañú tsi ñi tyin cuñi ñi jahá canaa ñi. Tan nyivi can cua jaha canaa ñi intuhun corona ndaha yutun tsa iin yaha ñi na ityi. Maa tyin yoo nducú yo cuhva jaha canaa yo tsa ña cua tiví maa.

<sup>26</sup> Tsa cuenda yuhu ña tsinú soho ñi yu, tan ndi ña cañi tahan soho ñi yu.

<sup>27</sup> Maa tyin ñihi ndacá ñaha yu tsi cuñu ñuhu yu. Tan jañiñi yu tyaá yahvi yu tsi Nyoo, coto juvin ñi maa yu tsa yaha jacuahá yu tsi inga nyivi, tan ndoo yu.

## 10

### *Nu jacuahá ra Pablo tyin ña vaha jacahnú yo tsitoho*

<sup>1-2</sup> Yañi, ña cuñi yu tsa naa iñi ndo tsa cuvi tsi tsii tsaahnu yo tahan tsanaha. Nyoo jacuhun ra iin vico ityi nuu ñi. Tan yaha sava ñi nu ndutya ñuhu iin caa ñi tsihin ra Moisés, ra cuvi ityi nuu tsihin ñi. Tan tsa tacan, tumaa tsa tsicoondutya ñi tsihin vico tan tsihin ndutya ñuhu tan ndu iin ñi tsihin ra Moisés.

<sup>3</sup> Tan Nyoo tsahá ra iin ñi tsa tsatsi tandihí ñi.

<sup>4</sup> Tan tsihi ñi ndutya tsa quita tsata cava tsa cuahán tsihin ñi tan cava can cuvi ra Cristo, tan tandihí ñi iin ñi ndutya can tsihi ñi.

<sup>5</sup> Maa tyin vasu cuaha tsa iyo javahá Nyoo nyehé ñi, cuaha ñi ña tyaá yahvi ñi tuhun cahan ra tsihin ñi. Tan tsihi ñi nu tsiqui can.

<sup>6</sup> Tandihí tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can.

<sup>7</sup> Yacan cuenda ña jachahnu ndo tsitoho, tumaa javahá juhva ñi can, tyin catyi nu tutu Nyoo tyehen: “Tsinyecu ñi, tsatsi ñi, tan tsihi ñi. Yaha can tan nduvita ñi, tsahan quitsahá tsañi ñi

[jacahnú ñi indiqui xuhun cuaan tsa javahá ñi].”

<sup>8</sup> Ña coo ndo tsihin iin ñaha tun ñavin ñasihi ndo cuvi. Tacan tucu ñiñaha ña taahán tsi coo ñi tsihin rayi tumaa javahá nyivi can. Tan tsihi oco uñi mil ñi tsa iin quivi.

<sup>9</sup> Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihi ñi tsa caan coo tsi ñi.

<sup>10</sup> Tan ña cahan ndo ndavaha ñi siqui Nyoo, tumaa tsa cahan juhva ñi can. Tan jaquitsi ra ángel ra tsahñi tsi ñi.

<sup>11</sup> Tandihí yacan tahan tsii tsaahnu yo tsa tsicoo tahan tsanaha. Tan tsinyaá tsi nu libru Nyoo tyin tacan tan yoo tsa iyó yo nu cua ndihí ñuu ñayivi ihya vityin coto yo tyin ña taahán tsi javaha yo tandihí tsa javahá ñi can.

<sup>12</sup> Tan nyoocho tsa cuñi tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha].

<sup>13</sup> Tundoho tsa nyehé ndo, cuñi maa ndo tyin intuhun ñi maa ndo nyehé can. Maa tyin inducu ñi nyehé tandihí ca nyivi. Cuita iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuvi cun- yee iñi ndo. Tyin tun nyehé ndo tundoho, nducú ra cuhva tsa quita ndo tsitsi tundoho can tan cunyeé iñi ndo.

<sup>14</sup> Yacan cuenda yañi, ña jachahnu ndo tsitoho.

<sup>15</sup> Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehé ndo tun nditsa a ña nditsa tsa caahán yu.

<sup>16</sup> Quivi tsa nducuhún iñi yo tyin tsihi ra Cristo nu cruu, tsihi yo vinu tan tsatsi yo paan. Tan vinu can cuñi tsi catyi tyin iin ñi cuvi yo tsihin ra Cristo tsa cuenda niñi ra. Tan paan can cuñi tsi catyi tyin iin ñi cuvi yo tsihin ra tsa cuenda cuñu ñuhu ra.

<sup>17</sup> Tyin vasu cuaha yo, maa tyin tandihí yo tan tsatsi yo intuhun ñi

paan. Tan yacan cuenda cuví yo intuhun ñi cuñu ñuhu tsa cuenda ra.

<sup>18</sup> Tyihí tuñi ñi ndo cuhva iyó nyívi Israel. Tsatsí ñi quití tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra.

<sup>19</sup> Ñavin caahán yu tyin iyó yahvi nyaá tsitoho tsa jacahnú nyívi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can.

<sup>20</sup> Tsa caahán yu cuví: Tun jamañi nyívi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha.

<sup>21</sup> Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha.

<sup>22</sup> Ña cuhva yo tsihi tsi Jutu Mañi yo tyin maa ra iyó ca tunyee ñi tsi ra tan ñavin ca maa yo.

*Tun cua javaha yo náa javaha yo, na javaha yo tsa cuenda tsa vaha tsi inga ca nyívi*

<sup>23</sup> Nditisa tsa caahán nyívi: “Cuví javaha yo náa cuñi maa yo.” maa tyin ña tandihí can tan jacuahnú can tsi yo tsihin Nyoo tan ndi ña cuví can tsa vaha tsi yo.

<sup>24</sup> Ña cuví caca ñi yo tsa cuenda maa ñi maa yo, tyin cuñi tucu tsi tsa caca ñi yo tsa cuenda inga ca nyívi tan nducu yo tsa vaha tsi ñi.

<sup>25</sup> Catsi nyoooho tandihí cuñu tsa cuyahví nu nuyahvi. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá ñi ndo tsi ndo.

<sup>26</sup> Tyin ñuhu ñayívi tan tandihí tsa iyó nuu tsi, tsii maa Nyoo cuví.

<sup>27</sup> Tan tatun iin nyívi tsa ña tsinú ñi tsi Nyoo, tan cana ñi tsi ndo tsa cucatsi ndo yuvehe ñi, tun cuñi ndo cuhun ndo, vaha maa cuhun ndo, catsi nyoooho tandihí tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho.

<sup>28-29</sup> Maa tyin tatun ndáa nyívi caahán tyehen tsihin ndo: “Nyayu

ihya, nyayu tsa jamañi nyívi nuu tsitoho cuví tsi”; ña catsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñi tsi tsa jahá yu cuenda tsi yu tsa catyi tsa tsicá ñi inga ca nyívi?

<sup>30</sup> ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsí yu”, catyi ndo.

<sup>31</sup> Vaha maa, tun tsatsí ndo, tan tsihi ndo, o javahá ndo inga ca tsa javahá ndo; javaha nyoooho maa tyin cuhva taahán ñi Nyoo.

<sup>32</sup> Tan ña javaha ndo tsa cuví janduva tsi inga ca nyívi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo.

<sup>33</sup> Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyívi tan nácaa cuví cacu añima ñi.

## 11

<sup>1</sup> Nyehe ndo tumaa javahá yu cuhva javahá ra Cristo, tacan taahán tucu tsi javaha nyoooho cuhva javahá yuhu.

*Nacaa taahán tsi javaha ñiñaha nu iyó culto*

<sup>2</sup> Yañi, sñi xaan cuñi yu tyin tacan ñi nducuhún ñi ndo tsi yu. Tan tyaá yahvi ndo tsa jacuahá yu tsi ndo.

<sup>3</sup> Maa tyin cuñi yu tsa coto ndo tyin ra Cristo cuví jiñi tsihin intuhun intuhun rayñi tyin juvin ra cuví ityi nuu tsihin ra, tan rayñi cuví jiñi tsihin ñasihi ra, tumaa cuví Nyoo jiñi tsihin ra Cristo.

<sup>4</sup> Tatun iin rayñi tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra.

<sup>5</sup> Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndiñi jiñi ña cuví can. Tan tsahá ña ticanuu tsi yñi ña tyin juvin ra cuví jiñi tsihin ña.

<sup>6</sup> Tatun iin ñaha tan ña tyasí ña jiñi ña, vaha taxin ca xatya ña tandihí ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña.

<sup>7</sup> Ña taahán tsi tsa casi rayii jiñi ra. Tyin cuhva caá Nyoo caá ra, tyin ndacá ñaha ra tsi ñasihí ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yii ña tsihin tsa tsahá ña tsa cundaca ñaha ra tsi ña.

<sup>8</sup> Tyin quivi javahá Nyoo tsi rayii, ña javahá ra tsi ra tsihin yiqui naha ñaha. Tyin tsihin yiqui naha rayii javahá ra tsi ña.

<sup>9</sup> Tan tsacatyí rayii, tan tsinu ñaha, tan ñavin tsacatyí ñaha tan tsinu rayii.

<sup>10</sup> Yacan cuenda ñiñaha cuñi tsi tsa cundasi jiñi ñi. Tyin cuñi tsi catyi tyin ndacá ñaha yii ñi tsi ñi. Tan cuví tsi tsa vaha tsi ra ángel naha ra.

<sup>11</sup> Maa tyin tyaa Nyoo cuhva tyin tsiñi ñuhu rayii tsi ñaha. Tan tsiñi ñuhu ñaha tsi rayii.

<sup>12</sup> Nditza tyin ñaha tsinu ña tsihin yiqui naha rayii jahá Nyoo. Maa tyin nda cuanda quivi can tan quitsahá tsahá Nyoo tsa coo sehe yii ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayii tan ñaha.

<sup>13</sup> Tyihi tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu?

<sup>14</sup> Tsitó yo tyin ticanuu cuví tsi tsa cuenda rayii tatun nañi jiñi ra.

<sup>15</sup> Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi.

<sup>16</sup> Maa tyin tatun yóo cuñi cañi tahan tsa catyi tuhun ihya, cuñi tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

*Nu caahán ra Pablo tsihin nyivi Corinto tyin ña vaha cuhva tsatsí ñi Santa Cena*

<sup>17</sup> Yañi, inga tuhun cua cahan yu tsihin ndo tyin ña sii cuñi yu tsihin ndo; tyin tsa javahá ndo nu ndu iin ndo, ña tsahá tsi tsa vaha tsi ndo, tan jativi tsi tsi ndo.

<sup>18</sup> Tyin catyi nyivi tsihin yu tyin cuhva tsa ndu iin ndo tsa cua coo ndo culto, tan natahvi sava ndo. Tan tsicá tucu iñi yu tyin vasiqui nditsa tsa caahán ñi.

<sup>19</sup> ¡Vasiqui cuñi maa ndo tyin tsihin tsa natahvi sava ndo tan quituvi ndaa nyooho tsinú vaha iñi tsi Nyoo!

<sup>20</sup> Maa tyin tatun tacan ñi iyó tsihi nu yucú ndo, ñavin Santa Cena cuví can.

<sup>21</sup> Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu iin tandihí nyivi. Tan yihí ndo cuaha tsatsí ndo, tan nda cuanda tsiñi ndo tsihin vinu. Tan yihí nyivi ña ñihí ñi tsa catsi ñi jahá ndo.

<sup>22</sup> ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyivi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

*Ra Pablo tsahá cuenda ra tsi ñi, nácaa taahán tsi coo ñi Santa Cena (Mt. 26.26-29; Mr. 14.22-25; Lc. 22.14-20)*

<sup>23</sup> Tyin Jutu Mañi yo jacuahá tuhun ihya tsi yu. Tan juvin yacan tsa yahá jacuahá yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihin ra iin paan.

<sup>24</sup> Tan tsa yahá nacuhva ra tyahvi nyoo tsi Nyoo tan tsahnu ra paan can. Tan catyi ra: “Catsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyi ra Jesús.

<sup>25</sup> Tan tsa yahá tsa cuxiñi ra naha tan quihin ra Jesús vasu vinu tan catyi ra: “Tsihin vinu ihya ndoó Nyoo tyiñu tsihin ndo vityin, tyin vinu tsa yihí tsitsi vasu ihya, ñiñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyi ra Jesús tsacuaa can.



<sup>26</sup> Tan tahan ñi tsa ndu iin yo tan tsatsí yo paan tan tsihí yo vinu jacotó yo tsi nyívi tyin tsacatyí cuatyí yo tsihi Jutu Mañi yo. Tan tacan jacotó yo tsi nyívi nda cuanda quívi quítsi nyico ra.

*Ra Pablo tsahá cuenda ra tsi yo nácaa taahán tsi coo yo Santa Cena*

<sup>27</sup> Tatun tsatsí yo paan tan tsihí yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihi ra Cristo nu cruu tan tsa tsatí niñi ra.

<sup>28</sup> Yacan cuenda cuñí tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu.

<sup>29</sup> Tyin Nyoo tatsí tuñi ra tsi yo tun tsatsí yo tan tsihí yo tan ña tsicá iñi yo tsa cuenda tsa tsihi ra Cristo.

<sup>30</sup> Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juhva nyívi tahan ndo tsa yaha tsihi ñi.

<sup>31</sup> Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo.

<sup>32</sup> Maa tyin tatun tatsí tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyívi iyó cuenda nu ñuhu ñayívi ihya.

<sup>33</sup> Tan tacan nyooho yañi, tatun cua ndu iin ndo tsa cua catsi ndo Santa Cena, cuatu tahan ndo tsi ndo tan catsi ndo tan coho ndo iin caa ñi.

<sup>34</sup> Maa tyin tatun ndáa nyooho tsisocó ndo, catsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quívi tsa quítsi nyehe yu nu yucú ndo tan jandaa yu inga ca tuhun.

## 12

*Ndatu tsa tsahá Tatyí Ii Nyoo tsi yo*

<sup>1</sup> Yañi, cuñí yu tsa coto ndo náa ndihí ndatu tsahá Tatyí Ii Nyoo tsi tsa intuhun intuhun yo.

<sup>2</sup> Tsitó ndo tyin quívi tsa ñaha ca nacoto ndo tsi Nyoo, tsahá ndo tsa cundaça ñaha tsitoho tsa ña cuví cahan tsi ndo.

<sup>3</sup> Yacan cuenda cuñí yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyí ra tyin ra Cristo cuví Jutu Mañi yo.

<sup>4</sup> Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo.

<sup>5</sup> Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo.

<sup>6</sup> Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyeé tsi tandihí yo tan javahá yo can.

<sup>7</sup> Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihí ca nyívi yihí cuenda ra.

<sup>8</sup> Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo.

<sup>9</sup> Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí Ii ra tsahá tunyee iñi tsi inga yo tsa janduvaha yo tsi nyívi cuuhví.

<sup>10</sup> Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyívi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyívi.

<sup>11</sup> Tan tandihí yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñí maa ra.

*Tandihí yo tan cuví yo intuhun ñi cuñu ñuhu tsihin ra Cristo*

<sup>12</sup> Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihí tsi tan cuví tsi intuhun ñi cuñu ñuhu. Tan tacan cuví tucu maa yo tsihin ra Jesucristo; vasu cuaha xaan

yo, maa tyin intuhun ña cuñu ñuhu ra cuví yo.

<sup>13</sup> Tan tacan tucu tandihí yo, a cuví yo nyívi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutyá yo tan nanduví yo intuhun ña cuñu ñuhu ra Cristo tyin tsaha ra intuhun ñi maa Tatyí Ii ra coo tsihin tandihí yo.

<sup>14</sup> Tyin cuñu ñuhu yo ña cuví cuví tsi intuhun ñi maa tinuu tyin cuñí tsi tsa cunyecu tandihí ca tsa cutahan tsihin tsi tan cuví tsi cuñu ñuhu ñi.

<sup>15</sup> Tun tsatyin cuví cahan tsaha yo tan catyí tsi: “Yuhu nduve yahví nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can.

<sup>16</sup> O tun tsatyin cuví cahan soho yo tan catyí tsi: “Yuhu nduve yahví nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can.

<sup>17</sup> Tun tsatyin naní cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin naní cuñu ñuhu yo cuví tsi soho, ¿nácaa cua tahñi yo?

<sup>18</sup> Maa tyin Nyoo tyaa ra tan iin tan iin can nu cuñí maa ra.

<sup>19</sup> Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can.

<sup>20</sup> Maa tyin tsa ndu iin soho, tinuu, jiñi, ndaha, tan tandihí ca maa, tacan tan cuví tsi intuhun cuñu ñuhu.

<sup>21</sup> Tinuu yo ña cuví catyí tsi tsihin ndaha yo: “Ña tsiñí ñuhu yooho tsi yu.” Tan ndi jiñi yo tan ña cuví catyí tsi tsihin tsaha yo: “Ña tsiñí ñuhu yooho tsi yu.”

<sup>22</sup> Ña vaha tsa cahan tsi tacan tyin vasu iin tsa lihli tsa cuñí maa yo tyin ña tsiñí ñuhu tsi yo, yacan cuví tsa tsiñí ñuhu ca.

<sup>23</sup> Tan nu cuñí yo tyin ña sii caá, tyasí yo. Tan nu ña taahán tsi nyehé nyívi, yacan tyasí vaha ca yo.

<sup>24</sup> Tan nu sii caá, ña tyasí yo. Tacan javaha Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sii caa.

<sup>25</sup> Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusin tsi.

<sup>26</sup> Tatun luxu cuñu ñuhu yo nyehé tundoho, nyehé ndihí tanií ca cuñu ñuhu yo tundoho. Tan tatun sii cuñí luxu tsi, sii cuñí tanií tsi.

<sup>27</sup> Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo.

<sup>28</sup> Tan Nyoo natyisó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyisó ra tsi ra caca tyiñu ra. Tsa tsinu uvi, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuaha. Yaha can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyívi cuuhví, tan ra tsa jatyinyee tsi nyívi, tan ra jaha cuenda vehe ñuhu, tan ra caahán inga yuhu tsa ña tsitó ra.

<sup>29</sup> Ña tandihí yo tan tsicá yo tyiñu ra Cristo. Ña tandihí yo tan cuví yo ndusu yuhu ra. Ña tandihí yo tan cuví yo ra jacuahá. Ña tandihí yo tan javahá yo tsa iyo.

<sup>30</sup> Ña tandihí yo tan tsahá Nyoo tunyee iñi tsa janduvahá yo tsi nyívi cuuhví. Ña tandihí yo tan caahán yo inga yuhu tsa ña tsitó yo. Ña tandihí yo tan cuví nacotó yo tan nacatyí tuhun yo náa cuñí tsi catyí tsa caahán inga nyívi.

<sup>31</sup> Nducu ndo cuhva naquihin ndo tsa vaha ca tsa tsahá Nyoo. Maa tyin cua janaha yo iin cuhva vaha ca tsi ndo.

## 13

*Nu janahá ra Pablo nácaa taahán tsi cuñi yo tsi nyívi*

<sup>1</sup> Tatun yuhu tan cuví cahan yu cuaha ñi yuhu tsa caahán nyívi iyó nu ñuhu ñayívi ihya, tan cuví cahan tucu yu yuhu tsa caahán ángel, maa tyin tatun ña cuñí yu tsi Nyoo tan ndi tsi nyívi, cuví yu tumaa tyombo tsa nañí ñi maa o iin caa tsa tsacú ndaxin ñi maa.

<sup>2</sup> Tatun cuví cuhva cuenda yu tuhun caahán Nyoo, tan cuví coto yu tandihí tuhun xeehe, tan tsitó yu tandihí tuhun, maa tyin tatun ña cuñí tucu yu tsi Nyoo tan ndi tsi nyívi, nduve náa catyí javaha yu tandihí yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi, tan cua cuhun tsi, maa tyin tatun ña cuñí yu tsi Nyoo tan ndi tsi nyívi, nduve náa ra cuví yu.

<sup>3</sup> O tatun cuhva yu tandihí tsa iyó tsi yu tsi nyívi ndaahvi, tan cuhva yu nda cuanda ñayívi yu tyin cucayu cuñu ñuhu yu, maa tyin tatun ña cuñí yu tsi Nyoo tan ndi tsi nyívi, nduve náa cua jatyinyee can tsi yu.

<sup>4</sup> Tatun nditsa tsa cuñí yo tsi Nyoo tan tsi nyívi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo.

<sup>5</sup> Tatun nditsa tsa cuñí yo tsi Nyoo tan tsi nyívi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tsihi tsitsi añima yo.

<sup>6</sup> Tatun nditsa tsa cuñí yo tsi Nyoo tan tsi nyívi, ña sii cuñí yo náa ndihí tsa ña vaha javahá ñi, maa tyin cusii iñi yo tsihin tsa vaha tan tsa nditsa.

<sup>7</sup> Tatun nditsa tsa cuñí yo tsi Nyoo tan tsi nyívi, cunyeé iñi yo nyehe yo tundoho jahá ñi, tan tsinú iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundihí iñi yo.

<sup>8</sup> Tsa cuñí yo tsi Nyoo tan tsi nyívi ña cua cundihí maa tsi, maa tyin coo quívi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo.

<sup>9</sup> Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyívi,

<sup>10</sup> maa tyin quívi quitsi nyico ra Cristo, cua cundihí tsa tsitó yo luxu ñi tyin cua coto yo tandihí maa.

<sup>11</sup> Quívi tsa luhlu yu caahán yu tumaa caahán ra nyihi tan tsicá iñi

yu tumaa tsicá iñi ra nyihi, maa tyin quívi tsahnu yu nacoó yu tsa yu cuhva javahá ra nyihi.

<sup>12</sup> Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihí tsi yaa. Maa tyin quívi cua quitsi ra Cristo, cua coto yo tandihí maa. Luxu ñi tsitó yo vityin, maa tyin quívi quitsi nyico ra, tandihí cuii maa tan cua coto yu, tumaa nacotó maa ra tsi yu vityin.

<sup>13</sup> Iyó uñi taahan tsa ña cua ndihí maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihí tsa cahan Nyoo tyin cuhva ra tsi yo, tan tsa cuñí yo tsi Nyoo tan tsi nyívi. Tan tsitsi tsa nduñi taahan tsehe, tsa tsiñi ñuhu ca cuví tsa cuñí yo tsi Nyoo tan tsi nyívi.

## 14

*Nu jacuahá ra Pablo nácaa cahan yo inga yuhu tsa ña tsitó yo*

<sup>1</sup> Jañihi ca ndo cuñí ndo tsi Nyoo tan tsi nyívi. Tan nducu ndo cuhva naquihin ndo ndatu tsa tsahá Tatyí li Nyoo tsi yo. Nducu jihna ndo tsa cuhva cuenda ndo tuhun Nyoo tsi nyívi.

<sup>2</sup> Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyívi. Tyin ndi intuhun ñi tan ña cutuñí iñi ñi, tyin tuhun xeehe caahán yo jahá Tatyí li Nyoo.

<sup>3</sup> Maa tyin tun tsahá cuenda yo tuhun Nyoo tsi nyívi, cutuñí iñi ñi tan ñihi ca tsahnú ñi tsihin tuhun Nyoo. Tan ndu iín ca iñi ñi jahá yo tan ndunyeé ca iñi ñi.

<sup>4</sup> Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyívi, tandihí ñi tsahnú.

<sup>5</sup> Yuhu cuñí yu tsa cahan tandihí ndo inga yuhu tsa ña tsitó ndo. Maa tyin vaha xaan ca tun cuví cuhva cuenda ndo tsa caahán Nyoo, tyin jatyinyee ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuví nacoto ndo nácaa caahán inga ndo

tsihin inga yuhu, nacatyí tuhun ndo tsihin ñi. Tacan tan cuví jatyinyee tsi tsi tandihí ñi.

<sup>6</sup> Yacan cuenda yañi, tatun yuhu tan tsaá yu nu yucú ndo, tan cahan yu inga yuhu, ña cua jatyinyee tsi tsi ndo. Maa tyin tun cahan yu tsa janahá Nyoo tsi yu, o tsa jacotó ra tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatyinyee tsi tsi tandihí ndo.

<sup>7</sup> Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo.

<sup>8</sup> Tan tatun nu iyó cuatyí tan ña vaha tiví ra cutu, yoñi cua coto náa cuhva cua cañi tahan ra naha.

<sup>9</sup> Tan tacan tucu yoo, tatun caahán yo inga yuhu tsa ña cutuñí iñi nyívi, ña cua coto ñi náa caahán yo. Tan cua catyí ñi tyin jiñi yo ña vaha cuñí, yacan caahán maa yo.

<sup>10</sup> Cuaha xaan yuhu caahán nyívi nu ñuhu ñayívi ihya. Tan intuhun intuhun nuu yuhu tan iyó iyó ñi tsa cuñí tsi catyí.

<sup>11</sup> Maa tyin tun ña cutuñí iñi yu yuhu tsa caahán inga nyívi tsihin yu, ña cuví natuhun yu tsihin ñi. Tan ndi maa ñi ña cuví natuhun ñi tsihin yu. Cuví ñi tumaa nyívi inga ñuu tsa cuenda yu.

<sup>12</sup> Yacan cuenda nyooho tsa cuñí xaan naquihin ndatu tsa tsahá Tatyí Ii Nyoo, nducu ndo cuhva naquihin ndo tunyee iñi tsa cuví jatyinyee vaha ca tsi nyívi yucú vehe ñuhu.

<sup>13</sup> Tacan tucu nyooho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyívi náa cuñí tsi catyí.

<sup>14</sup> Tyin tatun tsicán tahvi yu tsi Nyoo tsihin iin yuhu tsa ña cutuñí iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñí iñi tsi.

<sup>15</sup> Yacan cuenda cuñí tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñí iñi yu. Tan cuñí tsi tsa cata yu yaa tsihin yuhu tsa ña cutuñí

iñi yu. Tan cata ndihí tucu yu yaa tsihin yuhu tsa cutuñí iñi yu.

<sup>16</sup> Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñí iñi nyívi tsa ña tsitó náa cuví yacan. Tan ña cua cuví jacahnu ñi tsi Nyoo tsihin un.

<sup>17</sup> Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyee tsi tsi inga nyívi tyin ña cutuñí iñi ñi tsa caahán un.

<sup>18</sup> Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihí nyooho.

<sup>19</sup> Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñí iñi ndo.

<sup>20</sup> Tsahnu caca iñi ndo, yañi. Tan ña lee xaan caca iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi.

<sup>21</sup> Catyí Nyoo nu libru ley ra tye-hen: “Cua cahan yu tsihin nyívi ihya tsihin yuhu nyívi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo.

<sup>22</sup> Yacan cuenda tsa caahán yo inga yuhu cuví tsi tumaa iin seña tsa cuenda nyívi tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyívi tsa tsinú iñi tsi ra.

<sup>23</sup> Tyin tatun tandihí ndo caahán ndo inga yuhu nu ndu iin ndo, tan quihví iin nyívi tsa ña yihí cuenda Nyoo, o ñi tsa ña cutuñí iñi tuhun Nyoo, cua catyí ñi tyin jiñi ndo ña vaha cuñí.

<sup>24</sup> Maa tyin tatun tandihí ndo tsahá cuenda ndo tsa caahán Nyoo tan quihví iin nyívi tsa ña yihí cuenda Nyoo, a ñi tsa ña cutuñí iñi tuhun



Nyoo, cua coto ñi tyin iyó cuatyí ñi tsa cuenda tsa cutuñí iñi ñi tsa caahán ndo.

<sup>25</sup> Tan tandihí tsa iyó tsitsi aña ñi cua nacoto ñi, tan cua cuiñi tsiti ñi jacahnu ñi tsi Nyoo. Tan cua catyí ñi tyin nditsa nditsa cuii tsa nyaá Nyoo tsihin ndo.

### *Nacaa javahá yo culto iin cuhva vaha*

<sup>26</sup> Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuaha ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñí tsi catyí inga yuhu can. Maa tyin tandihí yacan taahán tsi cuví tsi iin tsa tsahá tunyee iñi maa Nyoo tsi tandihí ndo tsa yihí ndo cuenda ra.

<sup>27</sup> Tatun cua cahan ndo inga yuhu nu ndu iin ndo, cuñí tsi tsa cahan uvi ndo a uñi ñi ndo, maa tyin intuhun intuhun ñi ndo cahan; ña cahan tandihí ndo juvin ñi cuhva tsa caahán inga ndo. Tan inga tucu tuhun cuñí tsi tsa nacatyí tuhun inga ndo tsa caahán ndo.

<sup>28</sup> Maa tyin tun yoñi cuví nacatyí tuhun tsa caahán ndo, vaha taxin ca, ña cahan ndo tsihin inga yuhu nu ndu iin ndo. Cahán ndo tsihin Nyoo tsihin inga yuhu tun cuñí ndo, maa tyin ndihí cuhva tsiñi ñi maa ndo.

<sup>29</sup> Tacan tucu tatun tsahá cuenda yo tsa caahán Nyoo. Cahán uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo.

<sup>30</sup> Maa tyin tatun jacoto Nyoo náa inga ca tuhun tsi inga nyivi tsa yucú tsiñi tuhun caahán ndo, tacan tan ra tsa nyaá caahán can, cuñí tsi jandihí ra tsa caahán ra tan cahan inga ñi.

<sup>31</sup> Tan tacan tandihí nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cutuhva tandihí nyooho tsa ndu iin vehe ñuhu tan ndu iin ca iñi ndo.

<sup>32</sup> Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihí cahan inga nyivi,

<sup>33</sup> tyin Nyoo ña cuñí ra tsa tavi tahan ña cahan ndo, tyin maa ra catsi iyó ra.

Quihin ndo cuhva iyó inga ca vehe ñuhu nu ndu iin nyivi yihí cuenda ra Cristo,

<sup>34</sup> tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yñi ñi tumaa catyí ley Nyoo. Tan tacan taahán tucu tsi javaha nyooho.

<sup>35</sup> Tatun náa cuñí ñi coto ñi, na ndaca tuhun ñi tsi yñi ñi nda yuvehe ñi, tyin ña vaha tsa cahan ñiñaha nu ndu iin ndo.

<sup>36</sup> Tatun siin cuhva tsicá iñi ndo, cuñí tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo.

<sup>37</sup> Tatun ndáa nyooho cuñí tyin ndusu yuhu Nyoo cuví ndo, o cuñí ndo tyin Tatyí Ii Nyoo jaquihín ityi tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví.

<sup>38</sup> Maa tyin tatun ña cuñí ndo naquihín ndo tuhun ihya, ndi nyuhu tan ña cua naquihin ndi tuhun caahán nyooho.

<sup>39</sup> Tan tacan, yañi, nducu ndo cuhva cuhva cuenda ndo tuhun Nyoo tsi nyivi. Tan ña casi ndo nu cahan nyivi inga yuhu.

<sup>40</sup> Maa tyin javaha ndo tandihí tsihin tsa vii tan tsa catsi.

## 15

### *Nacaa nandoto ra Cristo*

<sup>1</sup> Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quivi can. Tan naquihín ndo itsi tan ñi iñi aña ndo tsinú iñi ndo.

<sup>2</sup> Tan juvin tsa cuenda tuhun ra Cristo cacú aña ndo tun ndi tsinú iñi ndo cuhva jacuaha yu tsi ndo. Maa tyin tun ña tsinú ca iñi ndo cuhva

jacuahá yu tsi ndo, nduve yahvi nyaá tsa natsinu iñi ndo tsi ra Cristo.

<sup>3</sup> Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyi yu tyin tsihi ra tsacaty cuaty yo, tumaa catyi nu libru Nyoo tyin cua cuvi.

<sup>4</sup> Tan quihvi cuñu ñuhu ra tsitsi ñuhu. Maa tyin tsinu uñi quivi nandoto ra tumaa catyi nu libru Nyoo.

<sup>5</sup> Tan tsa yaha tan quituvi ra nuu ra Pedro tan quituvi ndihi ra nuu tandihi ra tsicá tyiñu ra.

<sup>6</sup> Yaha can tan quituvi ra nuu yaha ca uhun cientu nyivi yihí cuenda ra. Tan juhva ñi can tsa tsihi ñi, maa tyin ndi iyó cuaha ca ñi nda cuanda vityin.

<sup>7</sup> Yaha can tan quituvi ra nuu ra Jacobo. Tacan tan quituvi ndihi ra nuu tandihi ra tsicá tyiñu ra.

<sup>8</sup> Tan nu ndihi ña quituvi ndihi ra nuu yuhu, tsa cuvi yu tumaa iin lee tsa cacu yutya.

<sup>9</sup> Tyin tsa nuu tandihi ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuvi yu ra tsicá tyiñu ra tyin tsinyaá ndaha xaan yu tsi nyivi yihí cuenda ra.

<sup>10</sup> Maa tyin Nyoo vaha iñi ra tsihin yu. Yacan cuenda tsaha ra ndatu tsa cuvi yu ra tsicá tyiñu ra tan ña cuatu tsaha ra tyiñu tsi yu, tyin cuaha ca tyiñu javahá yu tsihin tsi tan ñavin ca tandihi ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can.

<sup>11</sup> Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuvi tuhun tsa tsinú iñi ndo.

*Nu jacuahá ra Pablo tyin nditsa tsa cua nandoto ndiyi*

<sup>12</sup> Tsa caahán ndi tsihin ndo yacan cuvi tsa nandoto ra Cristo tsa yaha tsihi ra tan ¿Nacuenda yihí ndo catyi ndo tyin ña nandoto ndiyi?

<sup>13</sup> Tyin tatun ña cua nandoto ndiyi, ndi ra Cristo tan ña nandoto ra quivi can.

<sup>14</sup> Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra.

<sup>15</sup> Tan tun tsatyin ña nditsa tsa janandoto Nyoo tsi ra Cristo, cuvi ndi iin ra vatya tyin catyi ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo.

<sup>16</sup> Tyin tun ña cua nandoto ndiyi, ndi ra Cristo tan ña nandoto ra.

<sup>17</sup> Tan tatun ña nandoto ra Cristo, ndi iyó cuaty ndo, tan nduve yahvi nyaá tsinú iñi ndo tsa jaha ra tucahnu iñi cuaty ndo.

<sup>18</sup> Tan ndi nyivi tsa tsihi tsa yihí cuenda ra ña cacu ñi tun ña nditsa tsa nandoto ra.

<sup>19</sup> O tun nu ñuhu ñayivi ihya ñi jatynyeé ra tsi yo, tan ña cua quitsi ra inga tsaha, nduve yahvi nyaá tsinú iñi yo tan cuvi yo nyivi soho ca tsa nuu tandihi ca nyivi.

<sup>20</sup> Maa tyin tsitó vaha yo tyin nditsa tsa nandoto ra Cristo. Tan juvin ra cuvi ra tsa nandoto jihna ca tsitsi tsa tandihi ca ndiyi tsa cua nandoto.

<sup>21</sup> Tyin tsacaty cuaty ra Adán tan tsicoo tuhun tsihi. Tan yacan tsihi nyivi nda cuenda vityin. Maa tyin tsa cuenda tsa nandoto ra Cristo cua nandoto tandihi nyivi yihí cuenda ra.

<sup>22</sup> Tyin tumaa tsa tandihi yo tsihi tyin cuvi yo tata ra Adán, tacan tucu cua nandoto tandihi yo tan coo yo ñayivi nyito tyin cuvi yo nyivi ra Cristo.

<sup>23</sup> Maa tyin cua nandoto yo quivi taahán tsi tsi yo. Jihna ca ra Cristo nandoto. Tan quivi quitsi ra inga tsaha cua nandoto ñi yihí cuenda ra.

<sup>24</sup> Yaha can tan cua naa ñuhu ñayivi ihya tan ña cua cundaca ñaha ca ra cumi tyiñu naha ra, tan ndi nu taty ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihi nahnu, tan cua nacuhva cuenda ra can tsi Nyoo Jutu ra.

<sup>25</sup> Tyin ra Cristo cua cundaca ñaha ra nda cuanda quivi cuhva Nyoo tsa

cuví jaha canaa ra tsi tandihí nu xaan iñi tsi ra nahnu.

<sup>26</sup> Tan nu tsa cua janaa ra nu ndihí ña, nu ican cuví tuhun tsihi.

<sup>27</sup> Tyin tsa tsaha Nyoo tsa quihí ndaha ra tandihí maa tsa iyó. Maa tyin nu catyí tyin tandihí nacuhva cuenda Nyoo tsi ra Cristo, ña cuñí tsi catyí tyin quihí ndaha ndihí ra tsi maa Nyoo tyin maa Nyoo cuví ra tsaha tsa quihí ndaha ra tandihí maa tsa iyó.

<sup>28</sup> Maa tyin quivi jaha canaa ra Cristo tandihí can, tacan tan maa ra, tsa cuví ra Sehe Nyoo, cua nacuhva cuenda nyico ra tandihí tsa tsaha Nyoo tsi ra. Tyin tacan tan cundaca ñaha Nyoo tandihí maa tsa iyó.

<sup>29</sup> Tun tsatyin ña nandoto ndiyi, ¿nacuenda tyin juhva nyivi tsicoon-dutyá ñi tsa cuenda ndiyi? ¿Tan nacuenda javahá ñi tyehen tun ña tsinú iñi ñi tyin coo quivi cua nandoto ndiyi?

<sup>30</sup> Tan tacan tucu maa ndi, tun ña cua nandoto ndi, ¿nacuenda tyin ndoó ndi vaha tsa nyehé ndi tundoho ndihí quivi ñi?

<sup>31</sup> Tandihí ñi quivi nducú nyivi tsi yu cahñi ñi, tan tsa nditsa cuví tsi, yañi, tumaa tsa nditsa tsa sñi cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesucristo.

<sup>32</sup> Nduve náa catyí tsa nyehe yu tundoho tsa cuñi cahñi nyivi tsi yu ñuu Éfeso tun ña cua nandoto yo. Tatun tacan, nditsa maa tsa caahán nyivi: “Catsi yo, coho yo tyin tyaan isa cua cúu yo”, catyí ñi tsa ña tsitó.

<sup>33</sup> Tan catyí tucu ñi tyin: “Tun cuthán yo tsihin nyivi caquiñi jativí ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyivi tsi ndo.

<sup>34</sup> Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

*Nu jacuahá ra Pablo nácaa cua janandoto Nyoo tsi yo quivi quitsi nyico ra Cristo*

<sup>35</sup> Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuví?”

<sup>36</sup> ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñí tsi tsa tyahyu jihna tsi? Tacan tan cana nuu tsi.

<sup>37</sup> Tyin tsa tatsí yo nuñi, ñavin tsa cuví maa tsi itu tan tatsí yo. Tyin nuñi cuví tsi tatsí yo tan tacan ñi cuñí tucu yo tsihin náa inga ca tsiti.

<sup>38</sup> Nyoo javahá ra nácaa cuñí maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuvi nanduvi tsi inga ca tsiti.

<sup>39</sup> Tan tacan tandihí cuñu ñuhu, ña inducu caá tsi, tyin cuñu ñuhu nyivi, sñin caá tsi, tan cuñu ñuhu quiti nahnu, sñin caá tucu can, tan cuñu ñuhu saa, sñin caá tucu yacan, tan tyaca sñin caá tucu can.

<sup>40</sup> Tan tacan tucu tsa iyó andivi, sñin caá tsi. Tan sñin caá tucu tsa iyó nu ñuhu ñayivi ihya. Sñi xaan caá tsa iyó nda andivi, tan sñin tyaqui tucu tsa iyó nu ñuhu ñayivi ihya.

<sup>41</sup> Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu.

<sup>42</sup> Tan tacan tucu tuhun tsa cua nandoto ndiyi. Tuhvá yo tsicutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo.

<sup>43</sup> Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsihi can. Maa tyin cua nandoto iin tsa sñi caá tan iyó ca tunyee iñi tan ña cua cúu ca can.

<sup>44</sup> Tsa tsihi yo tsicutsí yo cuñu ñuhu tsa naquihin yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

<sup>45</sup> Catyí tutu Nyoo tyin ra Adán ra tsa tsicoo tsa jihna ñi, tsaha Nyoo ñayivi coo ra. Tan ra Cristo cuví ra

tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayivi nyito coo yo, tyin juvin ra cuví Tatyí li.

<sup>46</sup> Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí li Nyoo.

<sup>47</sup> Rayi tsa tsinu tsa jihna ñi, tsihin nyaca ñuhu tsinu ra. Tan cuví ra cuenda ñuhu ñayivi. Maa tyin ra Cristo cuví ra tumaa rayi tsa tsinu uvi tan cuví ra cuenda gloria.

<sup>48</sup> Tandihí yo iyó cuñu ñuhu yo tumaa tsicoo cuñu ñuhu ra Adán tsa tsinu tsihin nyaca ñuhu. Maa tyin tsa cua nandoto yo cuñu ñuhu yo cua nanduví tsi tumaa cuñu ñuhu ra Cristo ra iyó nda andivi.

<sup>49</sup> Tumaa ndacu yo tsi rayi, ra tsa tsinu tsihin nyaca ñuhu, tacan tucu cua ndacu yo tsi ra Cristo ra iyó nda gloria.

<sup>50</sup> Tan cuñí yu cahan yu tsihin ndo, yañi, tyin cuñu ñuhu yo ña cuví quihví tsi nu ndacá ñaha Nyoo, tyin iin tsa yatyi tiví ña cuví quihví can nu yihí tsa ña tuhvá tiví.

<sup>51</sup> Tan cuñí tucu yu tsa coto ndo iin tsa xeehe tsa yoñi maa tsitó. Ña tandihí yo cua cúu, maa tyin tandihí yo tan cua nasama cuhva caá yo.

<sup>52</sup> Tan nu cua ndihí tiví ángel trompeta, cua nandoto ndiyi iin yaha cuui ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihi tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo.

<sup>53</sup> Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa.

<sup>54</sup> Tan quivi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

“Nyoo jahá canaa ra tsi tuhun tsihi.”

<sup>55</sup> Yooho, Tuhun Tsihi, ¿náa tunyee iñi tsa tsicoo tsi un tyin cahñi un tsi ndi?

¿Náa jahá canaa un, yooho Tuhun Tsihi?

<sup>56</sup> Tyin cuatyí yo tsahá can tsa cahñi tuhun tsihi tsi yo, tyin ley tsahnu tsahá tunyee iñi tsi can.

<sup>57</sup> Maa tyin tyahví nyoo tsi Nyoo, yañi, tyin jaquitsi ra tsi Jutu Mañi yo Jesucristo tan tsahá ra tunyee iñi tsi yo tsa jaha canaa yo tsi nu tuhun tsihi can.

<sup>58</sup> Yacan cuenda yañi, cunyaa naa vaha ndo tsi Nyoo tsihin tsa ñi iñi añima ndo. Tan jañihi ca ndo jaha tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

## 16

*Nu tsahá cuenda ra Pablo tsi nyivi nácaa taahán tsi jatyinyee ñi tsi inga ñi yihí cuenda Nyoo*

<sup>1</sup> Tan tuhun tsa jatyinyeé ndo xuhun tsi nyivi ndaahvi, ñi yihí cuenda Nyoo, javaha ndo tumaa tsahá cuenda yu tsi nyivi tsicá vehe ñuhu ñuu tsa cayucú Galacia.

<sup>2</sup> Jandu iin ndo xuhun tsa taahán tsi cuhva ndo tsi ñi tahan tahan una quivi nácaa tsahá maa Nyoo tsi ndo. Tan ña cuatu ndo nda tsaa yu.

<sup>3</sup> Tan nacatsi ndo ndáa ra cuñí maa ndo tyin cundaca xuhun can. Tan tsa tsaa yu, cua javaha yu iin carta tyin cundaha ndihí ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén.

<sup>4</sup> Tan tatun tahan tucu tsi tsa cuhun yu, cuhun ra naha tsihin yu.

*Nu caahán ra Pablo ndáa ndihí nu cua cahan ra tuhun ra Cristo*

<sup>5</sup> Tsa cua quitsi yu nu yucú ndo ñuu Corinto, cua yaha yu ityi Macedonia.

<sup>6</sup> Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatyinyeé ndo luxu tsi yu tan cuhun yu inga ñuu.

<sup>7</sup> Ña iin yaha ñi cua yaha yu nu yucú ndo tyin cuñí yu ndoo yu juhva quivi tsihin ndo tatun Jutu Mañi yo tan cuñí ra.

<sup>8</sup> Maa tyin cua cunyii yu ñuu Éfeso ihya nda cuanda yaha quivi vico Pentecostés tsa jacahnú nyivi Israel. Tacan tan cua quitsi yu nu yucú ndo.



<sup>9</sup> Cua ndoo yu juhva quiví ihya tyin tsahá xaan tsi cuhva caahán yu tuhun Nyoo tsihin nyiví vasu ndi maa cuaha ñi ña taahán iñi ñi tuhun ra.

<sup>10</sup> Tatun tsaa ra Timoteo nu yucú ndo, na cunyi ra tsihin ndo. Tan vaha tyánuu ndo tsi ra tyin juvin ñi tyiñu Jutu Mañi yo jahá tyiñu ra tumaa maa yu.

<sup>11</sup> Tan vaha cuñi ndo nyehé ndo tsi ra. Tan jatyinyee ndo tsi ra na quitsi ra nu nyii yu tyin ndatú yu tsi ra tsihin inga ca ra yañi yo naha ra.

<sup>12</sup> Tan ra Apolos yañi yo, cahan ndaahvi xaan yu tsihin ra na quitsi ra nu yucú ndo tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

*Nu tsahá ra Pablo nacumi tsi tandihí nyiví yihí cuenda Nyoo ñuu Corinto*

<sup>13</sup> Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo.

<sup>14</sup> Tandihí tsa javahá ndo, javaha ndo tsa cuenda tsa cuñi ndo tsi Nyoo tan tsi nyiví yihí cuenda ra.

<sup>15</sup> Yañi, tsitó ndo tyin jihna ca nyiví ra Estéfanas natsinu iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano.

<sup>16</sup> Tan cuñi yu tsa jaha ndo tsa ñayiví tsi nyiví tsa iyó tumaa iyó nyiví ra Estéfanas, tan tsi tandihí ca ñi tsa jatyinyeé tan jahá tyiñu cuenda Nyoo.

<sup>17</sup> Tan sii xaan cuñi yu tyin quitsi ra Estéfanas, ra Fortunato, tan ra Acaico. Tan jatyinyeé ra naha tsi yu tyin nyooho ña cuví quitsi ndo tyin cañi xaan ñuu ndo.

<sup>18</sup> Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

<sup>19</sup> Tan vatsí nacumi tsi ndo jahá tandihí nyiví yihí cuenda Nyoo ñuu tsa cayucú Asia ihya. Tan vatsí tucu

nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi.

<sup>20</sup> Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

<sup>21</sup> Tan yuhu ra Pablo tsahá yu nacumi tsi ndo tan tyaa yu itsi tsihin ndaha yu.

<sup>22</sup> Tatun ndáa nyiví ña cuñi tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, naha!

<sup>23</sup> Tan na nasoco Jutu Mañi yo Jesucristo tsi tandihí ndo.

<sup>24</sup> Tan catyí yu tsihin ndo tyin yuhu cuñi yu tsi tandihí ndo tsa cuenda ra Cristo Jesús.

Tan na cuví tsi tacan ñi.

## Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

*Nu tyaá ra Pablo iin carta cuenda  
nyivi yihí cuenda Nyoo ñuu Corinto*

<sup>1</sup> Yuhu ra Pablo, cuví yu iin ra tava tyiñu ra Cristo Jesús tyin maa Nyoo nacatsi tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihi ca nyivi yihí cuenda Nyoo tsa iyó inga ñuu tsa cayucú nani cahu Acaya.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

*Nu nyehé xaan ra Pablo tundoho  
nu tsicá ra caahán ra tuhun ra Cristo*

<sup>3</sup> Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahvi xaan iñi ra nyehé ra tsi yo. Tan jandusí ra iñi yo tandihi ñi tsaha.

<sup>4</sup> Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuvi jandusí ndi iñi nyivi nyehé tundoho tumaa jandusí maa ra iñi ndi.

<sup>5</sup> Tyin nyehé ndi tundoho tsa cuenda ra Cristo, tan juvin ñi tsa cuenda ra jandusí Nyoo iñi ndi.

<sup>6</sup> Yacan cuenda tatun nyehé ndi tundoho tsa cuenda tsa jacoto ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusí Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi.

<sup>7</sup> Tyin tsitó vaha ndi tyin jandusí ra iñi ndo tyin nyehé ndo tundoho

tsa cuenda ra Cristo tumaa tsa nyehé tucu nyuhu tundoho.

<sup>8</sup> Yañi, cuñi ndi tsa coto ndo tyin cuaha xaan tundoho nyehé ndi tsa tsiyucu ndi ñuhu Asia. Ñihi xaan nducu cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican.

<sup>9</sup> Tsa nyehé ndi tyin tsa cuñi cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñi tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi.

<sup>10</sup> Nyoo jacacu tsi ndi quivi can, tan juvin ra jacacú tsi ndi nda cuenda vityin. Tan tsitó ndi tyin tacan ñi maa cua jacacu ra tsi ndi,

<sup>11</sup> tun nyooho tan ña jandhi ndo tsa jatyinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

*Nu caahán ra Pablo nacuenda ña  
tsahan ra ñuu Corinto*

<sup>12</sup> Iyó iin tuhun tsa tsahá tsa si xaan cuñi ndi tan tuhun ihya cuví tsa cuiti iyó ndi, tan ndaa iyó ndi tsihin tandihi nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi.

<sup>13-14</sup> Nu tutu tsa tsa yaha jaquitsi ndi tsi ndo, tyaá ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñi ndi tsa cutuñi vaha ca iñi ndo tandihi tuhun can tyin tacan tan si cua cuñi ndo tsihin ndi quivi quitsi Jutu Mañi yo Jesucristo. Tan si cua cuñi tucu nyuhu tsihin nyooho.

<sup>15-16</sup> Tsa cuenda tsa tsitó vaha yu tyin tacan cua cuvi: tyaá yu cuhva tyin tsa cua cuhun yu Macedonia tan cua yaha jihna yu nu yucú ndo. Tan

quitsi nyico yu nu yucú ndo tsa yaha cuhun yu Macedonia tyin tacan tan cuví cusii iñi ndo. Tan tsicá tucu iñi yu tyin yaha can tan cuvi jatyyinee ca ndo tsi yu tan cuhun yu Judea. Tyehen tyaa yu cuhva javaha yu, maa tyin ña cuvi.

<sup>17</sup> ¿A cuñi maa ndo tyin ña tyaa yu cuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyí ñi tyin vaha, maa tyin tsitsi añima ñi catyí ñi tyin ña vaha. Caahán ñi nduvi tuhun can tsa iin ñi cuhva.

<sup>18</sup> Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu.

<sup>19</sup> Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra.

<sup>20</sup> Tan tsa cuenda ra ñihí yo tandihi tsa vaha tsa catyi Nyoo tyin cuhva ra tsi yo. Yacan cuenda tsa jacahnú yo tsi Nyoo, catyí yo tyehen: “Na cuvi tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo.

<sup>21</sup> Nyoo cuví ra tsahá tunyee iñi tsi nyuhu tsa cuenda ra Cristo, tan tsahá ndihi tucu ra tunyee iñi tsi nyooho. Nacatsi ra tsi yo,

<sup>22</sup> tan tsahá ra Tatyí Ii ra coo añima yo, tan cuví tsi tumaa iin tuñi tsa tyaa ra tsi yo tan janahá tsi tsi yo tyin cua ñihi yo tsa cua cuhva ra tsi yo.

<sup>23</sup> Ñaha ca maa quitsi nyico yu nu yucú ndo, tyin ña cuñi yu janducuiihya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu.

<sup>24</sup> Caahán ndi tandihi tuhun ihya tsihin ndo tsa cuenda tsa cuñi ndi jatyyinee tahan yo tsi yo tan coo ca tusii iñi Nyoo tsi ndo. Ña cuñi ndi quihí ndaha ndi tsi ndo tyin nyooho tsa tsinú vaha maa iñi ndo tsi Nyoo.

## 2

<sup>1</sup> Yacan cuenda ña cuñi yu quitsi yu

tyin tacan tan ña cuhva ca yu tucuiihya iñi tsi ndo.

<sup>2</sup> Tyin tatun yuhu tan janducuiihya yu iñi ndo, yoñi cua jandusii iñi tsi maa yu. Tyin nyooho ña cuvi ca jandusii ndo iñi yu tun tsa yahá janducuiihya yu iñi ndo.

<sup>3</sup> Yacan cuenda carta ñi jaquitsi yu tsi ndo. Ña cuñi yu quitsi yu tyin ña cuñi yu janducuiihya ndo iñi yu tsihin cuhva iyó ndo. Tyin taahán tsi jandusii ndo iñi yu. Tyin tatun sii cuñi yuhu, tsitó yu tyin tandihi yo tan sii cuñi yo.

<sup>4</sup> Quivi tsa tyaa yu carta can tsa cuenda ndo, tsicá xaan iñi yu. Cuiihya xaan cuñi yu tan nda cuenda tsacu yu. Jaquitsi yu carta can tsi ndo maa tyin ñavin tsa cuenda tsa janducuiihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

*Nu tsahá cuenda ra Pablo tsi nyivi nácaa taahán tsi jaha ñi tucahnu iñi*

<sup>5</sup> Ra tsa tsahá tucuiihya iñi, ñavin yuhu ñi janducuiihya ra iñi. Tyin janducuiihya tucu ra luxu iñi nyooho. Caahán yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan.

<sup>6</sup> Tsa iyó vaha ñi. Ña cahan ca ndo tsi ra can. Ña tatsi tuñi ca ndo tsi ra.

<sup>7</sup> Vityin taahán tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuiihya xaan ca cuñi ra.

<sup>8</sup> Yacan cuenda cuñi yu tsa cahan ndo tsihin ra tan janaha ndo tsi ra tyin ndi cuñi ndo tsi ra.

<sup>9</sup> Jaquitsi yu carta can tsi ndo quivi can tyin cuñi yu coto yu tatun cua tyaa yahvi ndo tsa tsahá cuenda yu tsi ndo.

<sup>10</sup> Tan vityin nyivi tsa jahá nyooho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo.

11 Tyin tacan tan ña cuvi jaha canaa nu ña vaha tsi yo. Tyin tsitó vaha yo nácaa cuñí nu jandavi ñaha nu tsi yo.

*Ra Pablo ña ndoo ra ñuu Troas tyin ña nañihí ra tsi ra Tito*

12 Quivi tsaá yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo.

13 Maa tyin tuñu xaan cuñí yu, tyin ña nañihí yu tsi ra Tito, yañi yo. Yacan cuenda vatsí yu ityi Macedonia ihya tan ña ndoo yu ndacan cahan yu tsihin nyivi.

*Nu caahán ra Pablo tuhun ra Cristo tsihin tsa ñi ñi añaima ra*

14 Maa tyin tyahvi nyoo tsi Nyoo tyin tacan ñi jahá canaa yo tsihin tunyee ñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuví tsi tumaa iin xico tami tsa caná tandihí ñi ityi nu cuahán ndi.

15 Tyin nyuhu cuví ndi tumaa xico tami ra Cristo tsa cuenda Nyoo. Tan tandihí ñi ityi cuahán ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu.

16 Maa tyin tsa cuenda nyivi tsa ña cua cacu, ndasi caná tsi, tan cuñí maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú ñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin ¿yóo cuví jaha tyiñu tyiñu ihya?

17 Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñí ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi ñi añaima ndi tyin iin ñi cuví ndi tsihin ra tan maa Nyoo tava tyiñu tsi ndi tsa cahan ndi tyin cuenda ra Cristo yihí ndi.

### 3

*Tuhun tsa tsa ndoo ra Cristo tsihin yo*

1 Tsa caahán ndi tuhun ihya, ¿a cuñí maa ndo tyin caahán ndi tacan tsa cuñí ndi nduyaa ndi? Ñavin. ¿A cuñí tsi cuhva ndi iin carta tsa catyí tyin vaha nyivi cuví ndi? ¿O cuñí tsi ndacan ndi carta tsi ndo tumaa javahá juhva nyivi?

2 Ña cuñí tsi. Tyin tsa tyaa Nyoo tsi ndo añaima ndi, tan maa ndo cuví carta tsa cuenda ndi. Yacan cuenda ña tsiñi ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo.

3 Tan catsi nyehé ñi tyin cuví ndo carta tsa tyaa ra Cristo tsa cuenda ñi, tan nyuhu nacuhva cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa ra itsi tsitsi añaima ndo tsihin Tatyí Ii Nyoo nyito. Tan ñavin nu yuu tsinyaa tsi.

4 Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatyinyee ra Cristo tsi ndi.

5 Ña cana ñi ndi caca ñi ndi tyin javahá ndi náa javahá ndi tsihin tunyee ñi maa ndi. Tyin tsitó ndi tyin tandihí tsa javahá ndi tan maa Nyoo javahá can.

6 Tan tsahá ra tunyee ñi tsi ndi tsa cahan ndi tuhun ra Cristo, tan tuhun ihya cuví tuhun tsa tsa tsahá ñayivi tsa coo yo tyin iyó Tatyí Ii ra añaima yo. Ley tsa tsahá Nyoo tsi ra Moisés ña tsahá tsi ñayivi tsa coo yo tyin janahá ñi tsi tsi yo tyin iyó cuatyí yo tan taahán tsi cúu yo.

7 Ley tsahnu can tsinyaa nu yuu tsihin letra, tan cahnu xaan cuví tsi. Yacan cuenda tsa tsaá ra Moisés tsihin tsi nu yucú nyivi Israel, nayuhvi xaan ñi nyehe ñi nuu ra tyin xiñu xaan nuu ra cuví. Maa tyin tsindihí tsa xiñu can. Tatun tacan cuví quivi quitsi ley tsa tsahá tuhun tsihi,

8 iyaha ca cahnu cuví tuhun tsa ndoo Nyoo tsihin yo tsa tsahá Tatyí Ii ra tsi yo!

9 Tatun cahnu cuví ley tsahnu tsa jacuhún tsi yo anyaya, yaha ca cahnu



cuví tuhun tsaá tsa ndoo Nyoo tsihin yo tyin janduvahá tsi tsi yo nuu ra.

<sup>10</sup> Nditsa tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo.

<sup>11</sup> Tyin tatun cahnu cuví tsa tsicoo juhva ñi tyembu, yaha ca cahnu cuví tsa ña cua cundihi maa.

<sup>12</sup> Tsitó vaha ndi tyin ña cua cundihi tsi. Yacan cuenda caahán ndi tsihin tsa ñi ñi añima ndi. Na cahan nuu ndi tan ña yuhvi ndi caahán ndi.

<sup>13</sup> Tan ña javahá ndi tumaa javaha ra Moisés. Tyin ra Moisés tyasi ra nuu ra tsihin jahma, tyin tacan tan ña nyehe nyivi Israel nu cua naa tsa xiñu nuu ra.

<sup>14</sup> Quivi can ña cutuñi ñi ñi. Nda cuanda vityin tan ña cutuñi ñi ñi. Tyin tatun cahvi ñi ley tsahnu ña cutuñi ñi ñi itsi tyin ndasi tsa tsiñi tuñi jiñi ñi tumaa tsindasi nuu ra Moisés quivi can. Yoñi maa cuví jatsiyo yacan tyin intuhun ñi maa ra Cristo cuví jatsiyo can.

<sup>15</sup> Nda cuanda vityin tan ña cutuñi ñi ñi ley tsa tyaa ra Moisés tun cahvi ñi itsi. Tyin ndasi tsa tsiñi tuñi ñi ñi.

<sup>16</sup> Maa tyin tatun nacuhva cuenda ñi tsi ñi tsi Jutu Mañi yo, maa ra cua nuña tsa tsiñi tuñi ñi ñi.

<sup>17</sup> Tyin Jutu Mañi yo, Tatyí Ii cuví ra. Tan tatun iyó Tatyí Ii Jutu Mañi yo añima yo, tsitó yo tyin ña yihí ndaha ca ley tsahnu tsi yo.

<sup>18</sup> Yacan cuenda tandihi yo tan ña ndasi ca nuu yo. Tan vityin cuví yo tumaa inu, tyin cuví nyehe nyivi tsa cahnu cuví Jutu Mañi yo jahá yo. Tan cuahán nduvahá ca yo jahá Tatyí Ii ra.

#### 4

<sup>1</sup> Nyoo nyehe ndaahvi ra tsi ndi, tan tava tyiñu ra tsi ndi tsa cahan ndi tuhun ra tsihin nyivi yacan cuenda ña ndu uvi ñi ndi.

<sup>2</sup> Tandihí tsa javahá ndi, ña tuhvá ndi javahá xeehe itsi, tan ndi ña javaha ndi tsa tsahá ticanuu. Ña tsicá nuu ndi jandaví ñaha ndi tsi nyivi. Maa ñi maa tuhun Nyoo jacuahá

ndi. Ña sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ñi nyivi, na jaha vaha ñi cuenda tyin tandihí tsa caahán ndi, tan nda maa nuu Nyoo javahá ndi, tan maa ñi maa tsa nditsa cuví tsi.

<sup>3</sup> Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyivi ndasi tsa tsiñi tuñi ñi, ñi tsa cua cúnaa.

<sup>4</sup> Nu ña vaha, nu ndacá ñaha tsi nyivi iyó nu ñuhu ñayivi ihya, juvin nu tyasi tsa tsiñi tuñi ñi ñi, tyin tacan tan ña tsinu ñi ñi tsi Nyoo, tan ña nyehe ñi tsa nditsin ra, tan ña cutuñi ñi ñi nácaa jacacú ra Cristo tsi yo, ra iin ñi cuví tsihin Nyoo.

<sup>5</sup> Ñavin tuhun maa ndi caahán ndi. Tyin tuhun ra Jesucristo caahán ndi tsihin nyivi tyin juvin ra cuví Jutu Mañi yo. Tan nyuhu musu ñi ndo cuví ndi tyin cuñi ndi tsi ra.

<sup>6</sup> Nyoo catyi tyin ndunditsin nu naa quivi tsinu ñuhu ñayivi. Tan juvin ñi ra jandunditsin tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

*Iyó yo ñayivi tsaá tsihin tsa tsinú ñi yo tsi Nyoo*

<sup>7</sup> Tsa cuca Nyoo, tsa cuví tunyee ñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisi ñuhu tan naquihín yo itsi. Juvin tsi janahá tsi nyivi tyin maa Nyoo tsahá tunyee ñi ra tsi yo tan ñavin tunyee ñi maa yo cuví tsi.

<sup>8</sup> Yacan cuenda vasu ndi maa nyehé xaan ndi tundoho tandihí ñi nu cuahán ndi, ña ndu uvi ñi ndi. Yihí tsaha ña tsitó ndi nácaa quita ndi nu tundoho nyehé ndi, maa tyin nyitá ñi ndi tyin cua quita vaha ndi.

<sup>9</sup> Vasu ndi maa nyaá ndaha nyivi tsi ndi, maa tyin ña nacoó ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyivi, maa tyin ña tsihi ndi.

<sup>10</sup> Tandihí ñi nu cuahán ndi tan nyicún tuhun tsihi tsi ndi tsa cuenda tsa

caahán ndi tuhun ra Jesús. Tyin tacan tan nyehe nyívi tyin iyó ndi ñayívi ra.

<sup>11</sup> Tsitsi tsa ndi iyó ndi nu ñuhu ñayívi ihya tandihí ñi quívi tan ndatú ndi tuhun tsiihí tyin tandihí ñi quívi tan nducú nyívi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayívi ra añima ndi.

<sup>12</sup> Yacan cuenda nyuhu tandihí ñi tsaha nyicún tuhun tsiihí tsi ndi tyin caahán ndi tuhun ra Cristo tsihin nyívi. Maa tyin nyooho, iyó ndo ñayívi ra Cristo tsa cuenda tuhun ra tsa cahan ndi tsihin ndo.

<sup>13</sup> Tsinú iñi ndi tsi Nyoo tumaa tsinu iñi ra David tsi ra. Tumaa catyí ra nu libru Salmos: “Tsinú iñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra.

<sup>14</sup> Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihí ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ñi nda gloria.

<sup>15</sup> Tandihí tuhun ihya cuví tsa cuenda tsa vaha tsi nyooho tan tsa vaha tsi cuaha ca nyívi. Tyin tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnu ndo tsi ra.

<sup>16</sup> Yacan cuenda ña ndu uví maa iñi ndi, vasu ndi maa cuahán ndutsahnú cuñu ñuhu ndi, tyin ñayívi tsa tsa iyó ndi ndutsaá tsi tan iin tan iin quívi.

<sup>17</sup> Tundoho tsa nyehé ndi nu ñuhu ñayívi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria.

<sup>18</sup> Yacan cuenda ña tyaá iñi ndi tsa cuví nyehe yo. Tyin nyitá iñi ndi tsa ña cuví nyehé yo. Tyin tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihí maa tsa iyó tsi.

## 5

<sup>1</sup> Tsitó yo tyin quívi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó.

Maa tyin Nyoo cumí vaha ra inga cuñu ñuhu tsa ña cua cundihí maa tsa cuenda intuhun intuhun yo. Tan ican cua cuyucu añima yo. Iyó can nda gloria tan ñavin ra ñuhu ñayívi ihya javaha can.

<sup>2</sup> Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñi yo cuhun yo coo yo tsitsi cuñu ñuhu vaha tsa cua cuhva Nyoo tsi yo.

<sup>3</sup> Cuhun añima yo tsitsi tsa tsahá Nyoo. Tan cua cunditsi yo itsi tumaa nditsí yo jahma tyin tacan tan ña cua cutandí añima yo.

<sup>4</sup> Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñi yo. Maa tyin ña ndaahvi cuñi yo tsa cuenda tsa cuñi yo quita añima yo tsitsi cuñu ñuhu yo tan cutandí tsi. Ndaahvi cuñi yo tsa cuenda tsa cuñi yo coo añima yo tsitsi tsa ña cua cundihí maa, tyin tacan tan coo cuii yo. Tan cua cundihí tsa tañi ñi tsicoo jaha tsa ña cua cundihí maa.

<sup>5</sup> Tan Nyoo tyaá ra cuhva tyin tacan cua javaha ra tsihin yo. Tan tsahá jihna ñi ra Tatyí li ra tsi yo tyin tacan tan cuita iñi yo tyin cua cuhva ra tandihí ca tsa cua cuhva ra tsi yo.

<sup>6</sup> Yacan cuenda nyitá iñi ndi tsi Nyoo tsihin tsa ñi iñi añima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria.

<sup>7</sup> Vasu ndi maa ña cuví nyehe yo tsi ra, maa tyin iyó yo nu ñuhu ñayívi ihya tsihin tsa tsinú iñi yo tsi ra.

<sup>8</sup> Nyitá iñi ndi tsi ra tan cuñi ndi quita ndi tsitsi cuñu ñuhu ihya tan cuhun ndi coo ndi tsihin Jutu Mañi yo.

<sup>9</sup> Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria.

<sup>10</sup> Tyin tandihí yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda

intuhun intuhun yo nácaa tsa vaha a tsa ña vaha tsa javaha yo quiví tsicoo yo tsitsi cuñu ñuhu yo cuenda nu ñuhu ñayiví ihya.

*Nu tsahá cuenda ra Pablo nácaa cuví coo vaha yo tsihin Nyoo*

<sup>11</sup> Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tsihin nyiví na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñí ndi tsa coto tucu nyooho.

<sup>12</sup> Caahán ndi tyehen, maa tyin ñavin tsa cuñí ndi nduyaa ndi tyin caahán ndi tsa cuenda tsa cuñí ndi tsa nducuhun iñi ndo tyin caahán ndi tsa nditsa, tan cusii ca iñi ndo tan ñihi ndo cuhva cahan ndo tsihin inga ca ra tsa nduyaá naha ra. Catyí ra naha tyin vaha iyó ra naha tsihin Nyoo, maa tyin tsitsi añima ra naha maa ñi tsa ña nditsa iyó.

<sup>13</sup> Tatun caahán ndi tuhun Nyoo, catyí juhva nyiví tyin jiñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñí ndi, tsa cuenda nyooho vaha cuñí ndi.

<sup>14</sup> Tan tsitó ndi tyin intuhun ñi ra Cristo tsihi tsa cuenda tandihí nyiví ñuu ñayiví. Tacan tan tsihi tandihí yo. [Tsa tsihi yo cuñí tsi catyí tyin nacoó yo tsa javahá yo cuhva cuñí maa yo.] Tan tsa tyehen tsitó yo tsa tsihi ra Cristo tsa cuenda tsa cuñí xaan ra tsi yo, jañiñí tsi tsi yo tsa cahan yo tuhun ra tsihin nyiví.

<sup>15</sup> Ra Cristo tsihi ra tsa cuenda tandihí yo tyin tacan tan coo yo cuhva cuñí maa ra tan ñavin cuhva cuñí maa yo tyin tsihi ra tan nandoto ra tsa cuenda tandihí yo.

<sup>16</sup> Vityin tan ityi nuu, ña caca ca iñi yo nyehe yo cuhva iyó nyiví tumaa tsicá iñi nyiví ña tsitó tsi Nyoo. Tsicoo quiví tacan tsicá iñi yo nyehe yo tsi ra Cristo cuñi yo tyin ra ñuhu ñayiví ñi cuví ra. Maa tyin vityin ña tsicá ca iñi yo tacan.

<sup>17</sup> Tyin quiví nacuhva cuenda yo tsi yo tsi ra Cristo, jandutsaa ra añima yo. Tan nanduví yo nyiví tsa jaħa ra. Tan tandihí tuhun tsa tsicá iñi yo nu quitsi ca tsi, ña tsicá ca iñi yo can vityin ihya tyin tsaha ra tsa tsiñi tuñi tsa tsi yo.

<sup>18</sup> Maa Nyoo javaha tandihí yacan tyin vityin iyó vaha yo tsihin ra jaħa ra tsa cuenda ra Cristo Jesús. Tsaha cuenda ra tsi yo tyin cuñi tsi jacoto yo tsi nyiví nácaa javaha ñi tan cuví coo vaha ñi tsihin ra.

<sup>19</sup> Tyin maa ra tsa yaha nduvaha iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tyiñu ra tsi yo tsa jacoto yo tuhun ihya tsi ñi.

<sup>20</sup> Yacan cuenda cuví ndi ra tava tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin siví ra Cristo, na nduvaha coo ndo tsihin Nyoo.

<sup>21</sup> Ra Cristo ña javaha ra ndi intuhun cuatyí. Maa tyin Nyoo jaquitsi ra tsi ra nu ñuhu ñayiví ihya; quitsi cúu ra tsa cuenda tandihí cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvaha yo jahá tsa vaha Nyoo.

## 6

<sup>1</sup> Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandihí tsa vaha tsa tsahá ra tsi intuhun intuhun ndo.

<sup>2</sup> Tyin catyí Nyoo nu tutu ra tyehen: Quiví tahañ tsi tsa jacacu yu tsi un, tsiñi yu tsa cahan un

tan jatyinyee yu tsi un, catyí Nyoo. Jaħa ndo cuenda tyin vityin cuví quiví taahán tsi. Tan vityin cuví quiví jacacú Nyoo tsi yo.

<sup>3</sup> Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyiví tyiñu Nyoo tsa javahá ndi.

<sup>4</sup> Tan cuñí ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihí

tsa taahán ndi, náa tundoho, tan náa tsihi.

<sup>5</sup> Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihi xaan jahá tyiñu ndi nda cuanda tsicoó nyito ndi, tan tsisocó ndi.

<sup>6</sup> Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan iñi ndi nyehé ndi tandihí maa nuu tundoho tan ña tsiihí ndi tsihi. Vaha iñi ndi, tan cuñi xaan ndi tsi nyivi tyin iyó Tatyí li Nyoo aña ndi.

<sup>7</sup> Caahán ndi maa ñi maa tuhun Nyoo tsa nditsa. Iyó tunyee iñi ra tsihin ndi. Tan tsatyíñu ndi tandihí tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha.

<sup>8</sup> Yihí quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihí tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi.

<sup>9</sup> Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsiihí ndi tan ndi iyó ca ndi. Iyó quivi tatsí tuñi nyivi tsi ndi, maa tyin ña tsahí tucu ñi tsi ndi.

<sup>10</sup> Vasu ndi maa cuihya cuñi ndi iyó tsaha, maa tyin ña tsindihí tsa sii cuñi ndi. Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduve náa iyó tsi ndi, maa tyin tandihí maa tsa iyó tan tsii maa ndi cuví.

<sup>11</sup> Nyooho nyivi ñuu Corinto; caahán catsi ndi tsihin ndo tsihin tsa ñi iñi aña ndi tyin nditsa tsa cuñi xaan ndi tsi ndo.

<sup>12</sup> Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñi nyehe tsi ndi.

<sup>13</sup> Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo aña ndo, tumaa tsa javaha maa yu tsihin ndo. Tan ña

ndasi ca cuñi ndo nyehe ndo tsi ndi, tyin maa ndi ña ndasi cuñi ndi nyehé ndi tsi ndo.

*Vehe Nyoo nyito cuví yo tyin iyó ra aña yo*

<sup>14</sup> Ña ndu iin ndo tsihin nyivi ña tsinú iñi tsi Nyoo tyin ña nacatsí tahan aña ndo tsihin aña ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa.

<sup>15</sup> Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú iñi tsi ra, ña cuví ndu iin yo tsihin nyivi ña tsinú iñi tsi ra. Tyin tun ndu iin yo tsihin ñi ña cua nacatsi tahan coo yo tsihin ñi.

<sup>16</sup> Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña javahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahan tsanaha:

Cua coo yu aña ñi, tan cua cuhun yu tsihin ñi nu cuhun ñi.

Maa yu cua cuví Nyoo ñi, tan maa ñi cua cuví nyivi yu, catyí ra.

<sup>17</sup> Yacan cuenda catyí ra:

Quita ndo mahñu nyivi ña tsinú iñi tsi yu.

Ña cutahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

<sup>18</sup> Tan cuví yu jutu ndo.

Tan cuví ndo sehe yu, catyí Jutu Mañi yo, ra iyó tandihí tunyee iñi tsi.

## 7

<sup>1</sup> Yañi, yacan cuví tsa tsahá Nyoo tsi yo, yacan cuenda cuñi tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cuñi coo yo tyin tyaá yahvi yo tsi Nyoo.

*Nu nacatyí tuhun ra Pablo nácaa nasama cuhva iyó nyivi yihí cuenda Nyoo ñuu Corinto*

<sup>2</sup> Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javaha ndi tsi ndi intuhun ndo. Tan ndi ña jativi ndi tsi



ndi intuhun ndo. Tan ña jandav̄i ñaha ndi tsi ndi intuhun ndo.

<sup>3</sup> Tsa caahán yu tyehen tsihin ndo ñavin tsa caahán yu tsi ndo cuv̄i. Tyin tsa yaha catȳi yu tsihin ndo nda nu quits̄i ca tsi, tyin nditsa tsa cuñí yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuv̄i yo tsihin ra; o tatun cúu yo, iin ñi cua cuv̄i tucu yo tsihin ra.

<sup>4</sup> Tsitó vaha yu tyin cua javaha ndo tsa vaha, yacan cuenda s̄i xaan cuñí yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan s̄i xaan ca cuñí ndi.

<sup>5</sup> Nda quiv̄i tsā ndi Macedonia ihya, tan ñaha ca maa quitatu ndi. Tyin cuaha xaan tsihi tan tundoho nyehé ndi tandih̄i ñi ityi cuahán ndi. Cañi tahan nyiv̄i tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi.

<sup>6</sup> Maa tyin Nyoo, tacan ñi maa jandu iin ra iñi yo tun cuiihya cuñi yo. Tan jandu iin xaan ra iñi ndi quiv̄i tsā ra Tito nu yucú ndi ihya.

<sup>7</sup> Tan ñavin tsa cuenda tsa tsā ñi ra, maa tyin s̄i cuñí tucu ndi tsa cuenda tsa jandu iin xaan ndo iñi ra. Nacatȳi tuhun ra tsihin ndi tyin cuñí xaan ndo nyehe ndo tsi ndi. Tan catyí tucu ra tyin tsacú xaan ndo tsa cuenda tsa cuiihya cuñí ndo. Tan ñuhú xaan iñi ndo tsi yu. Tsa tsitó yu yacan, s̄i xaan ca cuñí yu cuv̄i.

<sup>8</sup> Quiv̄i can tsicá xaan iñi yu tyin tsā yu tucuiihya iñi tsi ndo tsihin carta tsa jaquits̄i yu tsi ndo. Tan ndu uv̄i iñi yu tsa jaquits̄i yu carta can tsi ndo. Maa tyin juhva ñi quiv̄i nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsā yu tsi ndo.

<sup>9</sup> Tan vityin s̄i xaan cuñí yu. Ñavin tsa cuenda tsa tsicōo ndo tucuiihya iñi, tsa cuenda tsa ndu uv̄i iñi ndo cuatyí ndo jahá tucuiihya iñi can. Tan cunyēe xaan iñi ndo nyehē ndo tucuiihya iñi cuhva taahán maa iñi Nyoo. Yacan cuenda vaha javaha ndi tsa tsā ndi tucuiihya iñi tsi ndo.

<sup>10</sup> Tyin tun cunyēe iñi yo nyehe yo tucuiihya iñi cuhva cuñí maa Nyoo, cua nasama cuhva iyó yo tacan tan cua cacu yo. Yacan cuenda na s̄i cuñi yo tun nyehé yo tucuiihya iñi cuhva cuñí maa Nyoo. Tyin tucuiihya iñi tsa iyó tsi nyiv̄i tsa ña tsitó tsi Nyoo maa ñi anyaya ñihí ñi tsihin can.

<sup>11</sup> Nyoocho cunyēe iñi ndo nyehe ndo tucuiihya iñi tumaa cuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandā vaha ndo cuatyí ra can. Cuxān ndo tsi ra. Tan nayuhv̄i tucu ndo tsi Nyoo. Tsā cuenda vaha ndo nácaa cuahán tyiñu can. Yaha can tan nda cuenda cuñi ndo nyehe ndo tsi yu. Tan tats̄i tuñi ndo tsi ra can. Tan tsa cuenda tsa javahā ndo tumaa cuñí maa Nyoo, cuñí tsi catyí tyin nduve cuatyí ndo tsa cuenda yacan.

<sup>12</sup> Yacan cuenda quiv̄i jaquits̄i yu carta can tsi ndo ña jaquits̄i yu itsi tsa cuenda tsa tsicá xaan iñi yu cuenda ra tsa javahā cuatyí can. Tan ndi ñavin tsa cuenda ra tsa tahan ticanuu can. Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñí ndo jatyinyēe ndo tsi ndi.

<sup>13</sup> Yacan cuenda nduvahā cuñí añima ndi. Tan s̄i xaan cuñí ndi tyin tsitó ndi tyin cuñí ndo tsi ndi.

Tsa nyehē ndi tyin s̄i xaan cuñí ra Tito, ndusī ca iñi ndi tyin tsā xaan ndo tunyēe iñi tsi ra. Tan vaha xaan naquih̄in cuenda ndo tsi ra.

<sup>14</sup> Catȳi yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquits̄i yu tsihin ra. Tan vityin s̄i cuñí yu tyin cundā tsa cahan yu tsihin ra. Tyin maa ñi maa tsa nditsa tuhv̄a yu caahán. Tan tacan tucu ndunditsā tsa cahan yu tsihin ra.

<sup>15</sup> Cuñí xaan ra tsi ndo tsa nducuhún iñi ra tyin javahā ndo tandih̄i cuii maa tsa cahan ra tsihin ndo. Tan tsa tsā ra nu yucú ndo, ndaahvi jahá ndo tsi ndo nuu ra. Tan vaha xaan cahan ndo tsihin ra. Tan vaha xaan

tyaa yahvi ndo tsi ra.

<sup>16</sup> Tan sii xaan cuñí yu tyin tsitó yu tyin tacan ñi javahá ndo tsa vaha.

## 8

*Na jatyinyeé yo tsi nyivi yihí cuenda Nyoo tsihin tsa ñi ñi ñi añima yo*

<sup>1</sup> Vityin yañi, cuñí ndi nacatyí tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya.

<sup>2</sup> Vasu ndi maa cuaha xaan tundoho nyehé ñi, maa tyin sii cuñí ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatyin cuca ñi.

<sup>3</sup> Tan cuví yu tsandaa tyin nyehé yu tyin tsahá ñi cuaha tsa iyó tsi ñi tsihin tsa ñi ñi ñi tan nda cuanda yaha ca tsahá ñi.

<sup>4</sup> Caahán ndaahvi xaan ñi tsihin ndi na cuhva ndi ndatu tsa jatyinyeé ndihí ñi tsi nyivi yihí cuenda Nyoo tsa iyó ñuu Jerusalén.

<sup>5</sup> Cuaha ca javahá ñi tan ñavin ca tsa tsicá ñi maa ndi. Tyin tsa jihna ñi, nacuhvá cuenda ñi tsi ñi tsi Nyoo tsihin tsa ñi ñi añima ñi. Tacan tan nacuhvá cuenda tucu ñi tsi ñi tsi nyuhu tsa quihí ndaha ndi tsi ñi tumaa cuñí maa Nyoo.

<sup>6</sup> Tsa nyehé yu tyin tacan javahá nyivi Macedonia, tacan tan catyí yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsahá tavá ndo jahá ra.

<sup>7</sup> Tyin nyooho vaha xaan javahá ndo tandihí tyiñu. Tsinú xaan ñi ndo tsi Nyoo. Vaha xaan caahán ndo tuhun ra. Vaha cutuñí ñi ndo. Tan tsihin tsa ñi ñi añima ndo javahá ndo tyiñu ra. Tan cuñí xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

<sup>8</sup> Ña jañiñí yu tsi ndo tsa javaha ndo tsa caahán yu. Caahán yu tyehen tsihin ndo tsa cuenda tsa cuñí yu tsa nyehé ndo tsa vaha javahá nyivi yihí cuenda Nyoo Macedonia. Tyin tacan

tan javaha ndihí ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan ñi ndo.

<sup>9</sup> Tyin tsa tsitó maa ndo nácaa tsa vaha ñi Jutu Mañi yo Jesucristo tsihin yo. Maa ra cuca xaan ra, maa tyin quitsi ra nu ñuhu ñayivi ihya tan jandundaahvi ra tsi ra tsa cuenda tsa cuñí ra tsi yo tyin tacan tan cuví janducuca ra tsi yo.

<sup>10</sup> Yuhu cuñí yu tsa vaha tsa cuenda ndo, yacan cuenda cua cahan yu tsihin ndo tsa tsicá ñi yu tsa cuenda tuhun ihya. Nyooho cuví nyivi tsa quitsahá jandu iin jihna xuhun cuyava. Ñavin nyivi tavá tyiñu tsi ndo javaha ndo tacan. Javahá ndo tacan tyin tacan tsicá ñi maa ndo.

<sup>11</sup> Yacan vityin cuñí yu tsa jañihi ca ndo javaha ndo tumaa javahá maa ndo nda nu quitsahá nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo.

<sup>12</sup> Tyin tatun iin nyivi tan cuñí ñi cuhva ñi tandihí cuhva iyó tsi ñi tan cuhva ñi can tsihin tsa ñi ñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñí ra tsi yo cuhva yo tun nduve náa iyó tsi yo.

<sup>13</sup> Caahán yu tyehen tsihin ndo, maa tyin ñavin tsa cuenda tsa cuñí yu tsa jatyinyeé ndo tsi nyivi tan ndoo ndaahvi ndo tan ñi ican coo tsa coo tsi ñi.

<sup>14</sup> Tyin vityin tsa iyó luxu tsi ndo, taahán tsi jatyinyeé ndo tsi nyivi ndaahvi tsihin can. Tyin tacan tan inducu ñi coo tandihí yo. Tan inga tsaha, maa ñi cua jatyinyeé tucu tsi maa ndo tun cumañi tsa cumañi tsi ndo. Tyehen taahán tsi jatyinyeé tahan yo tsi yo tsihin tsa iyó tsi yo tyin tacan tan ña nyehé ndi intuhun yo tundoho.

<sup>15</sup> Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tsi nu tutu Nyoo.

*Nu tyaá ra Tito naha ra cuhva cuhun ra naha ñuu Corinto*

16 Tyahvi nyoo tsi Nyoo tyin tsaha ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo.

17 Tsa cahan yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñi tucu maa ra ñuhú iñi ra tsi ndo. Yacan cuenda vityin vatsi ra nu yucú ndo tsihin tsa iyó iñi maa ra.

18 Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihi nyivi yihí cuenda Nyoo.

19 Tan inga tucu tuhun tyin nacatsi vaha nyivi yihí cuenda Nyoo tsi ra yañi yo ihya tyin cuhun ndihi ra tsihin ndi cundaca ndi xuhun tsi nyivi ndaahvi iyó ñuu Jerusalén. Cuñi xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatinyee ndi tsi tandihi nyivi yihí cuenda Nyoo.

20 Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi.

21 Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

22 Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñi xaan iñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, sñi cuñi ra tyin tsitó ra tyin cua javaha ndo tsa vaha nuu Nyoo.

23 Tatun yóo tsicá tuhun tuhun ra Tito, catyi ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatinyee ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, catyi ndo tyehen tsihin ñi:

—Maa nyivi yihí cuenda Nyoo jaquitsi tsi ra naha. Tan vaha xaan

jahá tyiñu ra naha tyiñu ra Cristo —catyi ndo.

24 Yacan cuenda janaha ndo tsi ra ihya naha ra nu tuvi tyin nditsa tsa cuñi ndo tsi ra naha. Tyin tacan tan coto tandihi nyivi yihí cuenda Nyoo tyin nditsa tsa caahán yu tyin vaha javahá ndo.

## 9

*Nu tsahá cuenda ra Pablo nácaa taahán tsi jatinyee yo tsi nyivi ndaahvi yihí cuenda Nyoo*

1 Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñi tsi cahan yu tuhun can tsihin ndo.

2 Tyin tsitó yu tyin cuñi xaan ndo javaha ndo tsa vaha. Yacan cuenda sñi cuñi yu nacatyí tuhun yu tuhun ndo tsihin nyivi iyó Macedonia, tyin nyooho tsa iyó ñuu Corinto tsa canyii Acaya, nda cuyava tan quitsaha cuñi ndo jatinyee ndo tsi nyivi ndaahvi. Tan tsa cuenda yacan cuaha xaan nyivi yihí cuenda Nyoo Macedonia ndu iin ca iñi ñi tan cuñi ndihi tucu maa ñi jatinyee ñi tsi nyivi ndaahvi.

3 Vasu ndi maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñi ndo javaha ndo tsa vaha. Tyin tacan tan ña cua catyi nyivi Macedonia tyin ña nditsa yu tsa caahán yu.

4 Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javaha ndo. Tan vihi ca maa ndo. Tyin tsa yaha catyi yu tyin cuñi xaan ndo jatinyee ndo tsi nyivi ndaahvi.

5 Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan

quíví quítsi yu tandíhi tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñi tsi ndo.

<sup>6</sup> Nducuhun iñi ndo tuhun tsa catyí tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra.

<sup>7</sup> Tan intuhun intuhun yo cuñí tsi cuhva yo cuhva iyó iñi maa yo. Ñavin uvi caca iñi yo tan cuhva yo o cuhva yo tsa cuenda tyin jañiñi nyívi tsi yo. Tyin Nyoo cuñí ra tsi nyívi tsahá tsihin tsa sii cuñí ñi.

<sup>8</sup> Nyoo cuví cuhva ra tandíhi nuu tsa vaha tsi ndo, tyin tacan tan ña cumañi náa cumañi tsi ndo. Tan cuví jatyinyee tucu maa ndo tsi inga ca nyívi.

<sup>9</sup> Tumaa catyí tuhun Nyoo tyehen: Iin ra vaha tsahá ra, tsihin tsa ñi iñi ra, tsa iyó tsi ra tsi nyívi ndaahvi.

Tan tumañi iñi tsa javahá ra, ña tsinaá tsi nuu Nyoo, catyí tsi.

<sup>10</sup> Nyoo, ra tsahá tsiti tatsí yo, tsahá tucu ra tandíhi tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyívi.

<sup>11</sup> Tan coo ca tandíhi nuu tsa cuca tsi ndo, tyin tacan tan cuví jatyinyee ca ndo tsi nyívi yíhi cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi.

<sup>12</sup> Tyin tsa jatyinyee yo tsi nyívi yíhi cuenda Nyoo tsihin tsa tsahá yo tsa tsiñi ñuhu tsi ñi, tsahá tucu yo tsa nacuhva ñi tyahvi nyoo tsi Nyoo.

<sup>13</sup> Tan cua jacahnu ñi tsi Nyoo. Tyin tsihin tsa jatyinyee ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyee xaan ndo tsi maa ñi tan tsi tandíhi ca nyívi.

<sup>14</sup> Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi

ndo tsa cuenda tsa vaha tsa tsahá ndo tsi ñi jahá Nyoo.

<sup>15</sup> Tyahvi nyoo tsi Nyoo tyin tsahá ra tsa vaha xaan tsi yo, tan nda cuenda ña ñihí yo cuhva nacatyí tuhun yo itsi.

## 10

*Ra Pablo iyó ndatu tsi ra tsa jaha cuenda ra tsi nyívi tsa jacoto ra tuhun Nyoo*

<sup>1</sup> Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yíhi ndo catyí ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyíi yu tsihin ndo, ndaahvi xaan jahá yu tsi yu, catyí ndo.

<sup>2</sup> Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quíví quítsi yu nu yucú ndo tyin tsitó yu tyin cuñí tsi tsa cuxaan ñihi yu tsi juhva ndo. Tyin yíhi ndo catyí ndo tyin javahá yu tumaa javahá ra ña yíhi cuenda ra Jesucristo.

<sup>3</sup> Nditsa tyin ra ñuu ñayívi cuví ndi. Maa tyin ña cañi tahan ndi tumaa cañi tahan nyívi iyó nu ñuhu ñayívi ihya.

<sup>4</sup> Tyin tsa xaan tsa tsatyíñú ndi tsa cañi tahan ndi, ñavin tsa xaan tsa iyó nu ñuhu ñayívi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi síqui tandíhi ca tunyee iñi tsihin tsi tan nda cuenda tunyee iñi tsa iyó tsi tatyí ña vaha.

<sup>5</sup> Tan tacan cuví jaha canaa ndi tsi tandíhi tsa caahán ndasi nyívi síqui tuhun Nyoo, tan tandíhi tsa ña vaha tsa tyasí nu tyaa yahvi nyívi tuhun Nyoo. Tan tsahá ndi tsa cundaca ñaha ra Cristo tandíhi cuhva tsicá iñi ndi tyin tacan tan tyaá yahvi ca ndi tsi ra.

<sup>6</sup> Quíví cutuhva tandíhi nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaá ndi cuhva tsa tatsi tuñi ndi tsi ndo.

<sup>7</sup> Nyooho jahá ndo cuenda cuhva iyó nyívi. Tan ña jahá ndo cuenda nácaa iyó aña ñi. Tatun tsitó vaha



ndo tyin cuenda ra Cristo yihí ndo, taahán tsi coto ndihí tucu ndo tyin cuenda ra yihí tucu nyuhu.

<sup>8</sup> Ña cahán nuu yu caahán yu tsa tsaha Nyoo ndatu tsi yu tsa quihí ndaha yu tsi ndo, vasu ndi maa yaha caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñí yu jatívi yu tsi ndo.

<sup>9</sup> Ña cuñí yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo.

<sup>10</sup> Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu.

<sup>11</sup> Maa tyin nyoocho tsa caahán tacan cuñí tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

<sup>12</sup> Nditza ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha kuhva javahá inga nyívi tan ñavin kuhva cuñí Nyoo. Tan cuñí ra naha tyin vaha tsa jandu inducú ra naha tsi ra naha tsihin inga nyívi.

<sup>13</sup> Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo.

<sup>14</sup> Tun tsatyin ña jihna ca maa ndi cahán tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindaca tuhun ra Cristo nu yucú ndo.

<sup>15</sup> Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú

vaha ca iñi ndo, tacan tan cua cuví jacuaha cuaha ca ndi tuhun ra Cristo tsi ndo, maa tyin tandihí ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi.

<sup>16</sup> Tan tsicá iñi ndi cuhun ndi cucahan ndi tuhun ra Cristo nu ña tsitó nyívi tuhun ra. Tyin tacan tan ña cua catyí nyívi tyin nduyaá ndi tsihin tyiñu javahá inga ra naha.

<sup>17</sup> Nyoocho tsa cuñí nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo.

<sup>18</sup> Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

## 11

*Nu tsahá cuenda ra Pablo tsi nyívi ñuu Corinto na jaha cuenda ñi tsi ñi na ña jandaví ñaha ra vatya naha ra tsi ñi*

<sup>1</sup> Vaha xaan tun ña cundihí iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihí iñi ndo tsihin yu vasu ndi maa tuhun maa yu cuví tsi.

<sup>2</sup> Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo, tyin juvin yu cahán tuhun ra Cristo tsihin ndo nda jihna. Tan cuñí yu tsa cuñi ndo tsi intuhun ñi maa ra tumaa cuñi iin ñaha yoco tsi ra tsa cua cuví yí ña. Tyin iin ñaha yoco cuñi ña tsi intuhun ñi maa ra tsa cua cuví yí ña.

<sup>3</sup> Maa tyin tsicá xaan iñi yu tsa cuenda ndo, coto tahan ndo tumaa tahan ña Eva. Tyin ña Eva jandaví ñaha nu coo tsi ña tsihin maña nu. Tan yuhu ña cuñí yu tsa jandaví ñaha nyívi tsi ndo tan nasama ndo kuhva tsicá iñi ndo tuhun ra Cristo, tan jandihí ndo tsa jacahnú ndo tsi intuhun ñi maa ra.

<sup>4</sup> Tyin nyoocho yatyi xaan nasamá ndo kuhva tsinú iñi ndo tuhun ra Jesús tun siñ kuhva caahán nyívi tuhun ra. Tyin ñavin tuhun ra Jesús tsa jacoto ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan tsihin tuhun Tatyí Ii Nyoo tsa naquihín ndo nda jihna. Yatyi xaan natsinú iñi ndo

tuhun caahán nyívi tan ñavin tuhun, tsa jacacú ra Cristo tsi yo, tsa cahan ndi tsihin ndo.

<sup>5</sup> Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnú ca cuví ra can naha ra tan ñavin ca maa yu. Tan nyooho nyicún ndo tsi ra naha.

<sup>6</sup> Vasu ndi maa ña ñihí vaha yu cuhva caahán yu, maa tyin cutuñí vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandihí cuhva javahá ndi.

<sup>7</sup> ¿O cuñí maa ndo tyin ña vaha javahá yu tsa ña quihín yu yahvi quívi cahan yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnú xaan jaha ndo tsi yu tan nducahnu maa ndo nuu Nyoo.

<sup>8</sup> Nyívi tsa tsicá tuhun Nyoo vehe ñuhu inga ñuu jatyinyee tsi yu tsihin xuhun. Tan xuhun tsa tsahá ñi tsi yu tsatyíñu yu can quívi quítsi yu quítsi cahan yu tuhun ra Cristo tsihin ndo.

<sup>9</sup> Vasu ndi maa yihí tsaha cumañi tsa cumañi tsi yu tsa tsinyii yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihí tsa cumañi tsi yu. Tacan jahá cuenda yu tsi yu tyin ña cuñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu.

<sup>10</sup> Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyívi iyó naní Acaya.

<sup>11</sup> ¿Nacuenda caahán yu tyehen cuñi maa ndo? ¿A tsa cuenda tsa ña cuñi yu tsi ndo? Ñavin. Tyin nda maa Nyoo tan tsitó ra tyin cuñi xaan yu tsi ndo.

<sup>12</sup> Ña cua jandihí yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha.

<sup>13</sup> Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra

naha tan jahá ra naha tyin ra tsicá tyiñu ra Cristo cuví ra naha.

<sup>14</sup> Tan tsa javahá ra ican naha ra ñavin tsa iyo cuñi yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu.

<sup>15</sup> Yacan cuenda ña iyo cuñi yo tun ra nyicún tsi nu tan jahá ra naha tyin javahá ra naha tsa vaha. Co quívi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

### *Tundoho tsa nyehé ra Pablo nu tsicá ra caahán ra tuhun Nyoo*

<sup>16</sup> Inga tsaha caahán yu tsihin ndo: Ndi intuhun ndo tan ña caca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihí tucu yuhu luxu.

<sup>17</sup> Caahán yu tumaa caahán ra sana iñi tyin tacan tan cuví nduyaa yu. Ñavin maa Jutu Mañi yo catyí tsihin yu tsa javahá yu tyehen.

<sup>18</sup> Cuaha xaan ra naha catyí ra naha tyin cahnú cuví ra naha tan nduyaa ra naha tsihin tsa iyó nu ñuhu ñayívi ihya. Yacan cuenda cua jacahnu ndihí tucu yuhu tsi yu.

<sup>19</sup> Nyooho catyí ndo tyin tsitó xaan ndo. Tun nditsa ndo, ¿nacuenda tyin yatyi xaan tyaá soho ndo tsa caahán ra sana iñi can naha ra?

<sup>20</sup> Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñi ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasi cuñi ra naha nyehé ra naha tsi ndo. Tan nda cuanda cañi ndaha ra naha nuu ndo.

<sup>21</sup> ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahan nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu.

22 Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyivi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu.

23 Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyivi tsi yu tsihin yoho tan ñavin ca ra can naha ra. Cuaha ca tsaha tsinyij yu vehe caa. Tan cuaha tsaha cuñi cúu yu, maa tyin ña tsihi yu.

24 Uhin tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu.

25 Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quivi tan iin tsa cuaa.

26 Tandihí ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tahañ yu. Quita ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juvin ñi tacan javaha nyivi inga ñuu tsihin yu. Cuaha tsa tahañ yu tsitsi ñuu, nu tsiqui, nu ndutya ñuhu. Cuaha tsa tahañ yu jahá ra catyí tyin yañi yo cuví tsi ra naha tan ña nditsa ra naha.

27 Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihi yu ndutya coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

28 Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandihí nyivi yihí cuenda Nyoo, nyooho tan nyivi inga ñuu tucu.

29 Tyin tun iin ndo tan vita cuñi

ndo, tacan vita cuñi tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñi yu.

30 Tatun cuñi tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu.

31 Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu.

32 Quivi tsinyij yu ñuu Damasco ra cumi tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tñin ra naha tsi yu tan cundaca ra naha tsi yu vehe caa.

33 Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumi tyiñu ñuu can.

## 12

### *Tsa nyehe ra Pablo nda nu tsinu uñi gloria jahá Nyoo*

1 Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehe yu jahá ra.

2 Nacotó yu iin ra yihí cuenda ra Cristo tsa tsahañ andivi. Tsa iyó utsi cumi cuiya tsa quihin Nyoo tsi ra tsahañ ra nda nu tsinu uñi andivi. Maa tyin ña tsitó yu tatun tsahañ ra tsihin cuñu ñuhu ra o ñavin. Intuhun ñi maa Nyoo cuví ra tsitó.

3-4 Tsitó yu tyin tsindaca Nyoo tsi ra nda paraiso nu iyó nyivi tsihi tsa tsinu iñi tsi Nyoo. Maa tyin ña tsitó yu tatun tsahañ ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahañ ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyivi tsa nacatyí tuhun ñi tuhun can.

5 Cuví nduyaa yu tsihin tsa janahá Nyoo tsi yu quivi can. Maa tyin ña nduyaá yu tsihin tsa javahá yu tyin

nduyaaá yu maa ñi maa tsihin tsa nduve tunyee iñi maa yu iyó tsi yu.

<sup>6</sup> Tatun cua cahan yu tuhun maa yu, ñavin tsa soho cua cuvi can. Tyin tun cua cahan yu can maa ñi maa tsa nditsa cua cahan yu. Maa tyin ña cuñi yu cahan yu can coto cahnu xaan jaha nyivi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

<sup>7</sup> Nyoo ña cuñi ra tsa nduyaa yu tsihin tsa janaha ra tsi yu. Yacan cuenda tsaha ra tsa nyehé xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuvi nduyaa yu tsihin tsa janaha Nyoo tsi yu.

<sup>8</sup> Tan tsican yu uñi tsaha tsi Jutu Mañi yo na quihin nyaa ra tundoho can siqui yu.

<sup>9</sup> Maa tyin catyí Jutu Mañi yo tye-hen tsihin yu: “Yuhu cuñi xaan yu tsi un, tan yacan ñi cuvi tsa tsiñi ñuhu tsi un. Tyin nyivi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sii xaan cuñi yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu.

<sup>10</sup> Yacan cuenda sii xaan cuñi yu tsa nduve tunyee iñi maa yu iyó tsi yu. Vasu ndi maa caahán nyivi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuvi tsi yu, maa tyin sii xaan cuñi yu tsa nyehé yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

*Tsicá iñi ra Pablo tuhun nyivi yihí cuenda Nyoo ñuu Corinto*

<sup>11</sup> Tsa caahán yu tuhun maa yu nanduví yu tumaa ra sana iñi. Maa tyin maa ndo cuñi tsa cahan yu tacan tyin ña jahá ca ndo tsa ñayivi tsi yu. Maa ndo taahán tsi vaha cahan tuhun yu, vasu ndi maa ña cahnu xaan cuvi yu. Tatun yuhu tan ña cahnu cuvi yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha.

Cuñi maa ra naha tyin vaha xaan ca ra naha tan ñavin ca inga ra tsicá tyiñu Nyoo.

<sup>12</sup> Yuhu cunyeé xaan iñi yu nyehe yu tandihi tundoho quivi tsinyii yu jaha tyiñu yu tyiñu Nyoo nu yucú ndo. Cuaha xaan tsa iyo javaha yu jaha Nyoo tyin tacan tan coto ndo tyin nditsa tsa cuvi yu ra tava tyiñu ra.

<sup>13</sup> ¿A vaha ca tyaá nuu yu tsi inga nyivi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandihi ndo. Intuhun ñi tsa ña javaha yu tsihin ndo tsa tsinyii yu tsihin ndo cuvi tsa ña tsican yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javaha yu.

<sup>14</sup> Vityin tsa iyó vaha tandihi tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatynyee tsi ndo. Tyin iin ra iyó sehe, ñavin sehe ra tsahá tsa tsiñi ñuhu tsi ra. Tyin maa ra taahán tsi cuhva tsa tsiñi ñuhu tsi sehe ra. Tan tacan yuhu.

<sup>15</sup> Sii xaan cuñi yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayivi yu tsa cuenda ndo. Tan tsicá tucu iñi yu tyin tun jañihí ca yu cuñi yu tsi ndo, nyooho ña cuñi vaha ndo tsi yu.

<sup>16</sup> Tandihi ndo tan tsitó ndo tyin ña tsaha yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandavi ñaha yu tsi ndo tan ña jaha ndo cuenda.

<sup>17</sup> ¿O cuñi maa ndo tyin cahan yu cuendu tsihin ra jaquitsi yu nu yucú ndo tan jandavi ñaha ra naha tsi ndo jaha yu?

<sup>18</sup> ¿A jandavi ñaha ra Tito tan inga ra naha tsi ndo quivi quitsi ra naha nu yucú ndo jaha yu? Ña jandavi ñaha ra naha tsi ndo tyin nyuhu ña tuhvá ndi jandavi ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?.



<sup>19</sup> Vasiqui tsicá iñi maa ndo tyin tandihí tsa caahán ndi, tan caahán ndi can tsa cuñí ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñí xaan ndi tsi ndo.

<sup>20</sup> Tsicá iñi yu coto ña cua tahan iñi yu cuhva yucú ndo quivi tsa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsa yu nu yucú ndo tan ña cuiti ña ndaa yucú ndo.

<sup>21</sup> Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihí ndo ña jandihí ndo tsa javahá ndo tsa ña vaha tsa quitsaha javahá ndo nu quitsi ca tsi tyin rayii ndi tsicá nuu ra tsihin ñaha tan ñaha ndi tsicá nuu ña tsihin rayii tan náa ndihí ca maa tsa ña vaha.

## 13

*Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo*

<sup>1</sup> Tsinu uñi tsaha cuví tsi tsa cua quitsi yu ihya. Nda tacan tan cuvi cundaa tyiñu ñi tsa javahá tsa ña vaha. Maa tyin cuñí tsi uvi o uñi taahan ra cua cuvi tsandaa.

<sup>2</sup> Tyin quivi quitsi yu nu yucú ndo, catyí yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyí tucu yu inga tsaha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo.

<sup>3</sup> Tacan tan cua coto ndo tsa cuñí xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra ánima ndo. Tyin iyó xaan tunyee iñi ra tsi ndo.

<sup>4</sup> Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuvi jatyinyee ndi tsi nyooho.

<sup>5</sup> Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo ánima ndo tun nditsa tsa tsinú iñi ndo tsi ra?

<sup>6</sup> Maa tyin cuñí yu tsa coto ndo tyin nyuhu ña vatya ndi.

<sup>7</sup> Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuñí ndi catyí nyivi tyin vaha ndi. Caahán ndi tyehen tyin cuñí ndi tsa javaha ndo maa ñi maa tsa vaha. Nduve cuenda ndi tun catyí nyivi tyin vaha ndi o ña vaha ndi.

<sup>8</sup> Tyin nyaá tsi siqui ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa.

<sup>9</sup> Yacan cuenda sii cuñí ndi tsa nduve tunyee iñi iyó tsi ndi, tan nyee cuñí nyooho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunyicun vaha ca ndo tsi ra nda cuanda ña cumañi ca tsa cumañi tsi ndo.

<sup>10</sup> Jaquitsí yu carta ihya tsi ndo tsa ndi cumañi ca quitsi yu nu yucú ndo tyin janduvaha ndo tsi ndo. Tyin tacan tan ña cua cuñi tsi cuxaan yu tsi ndo quivi tsa yu nu yucú ndo. Tyin nditsa tsa tsaha Nyoo ndatu tsi yu tsa quihí ndaha yu tsi ndo. Maa tyin ña tsaha ra ndatu can tsi yu tsa janducuiiya ndihí ca yu iñi ndo. Ñihí yu ndatu can tsa cuenda tsa jatyinyee yu tsi ndo.

<sup>11</sup> Yañi, nu ndihi caahán yu ihya, catyí yu tsihin ndo, ndücu ndo kuhva ña cumañi tsa cumañi tsi ndo nuu Nyoo. Siñi cuñi ndo. Jandu iin ndo iñi ndo. Coo mañi tahan ndo. Tan Nyoo, ra cuñi xaan tsi ndo tan tsahá tsa taxin coo añaima yo, na cunyaa ra tsihin ndo.

<sup>12</sup> Kuhva tahan ndo nacumi tsi ndo tsihin tsa siñi cuñi ndo nyehé ndo tsi ndo.

<sup>13</sup> Tan jaquitsí tandihi nyivi yihí cuenda Nyoo ñuu ihya nacumi tsi ndo.

<sup>14</sup> Naquihin ndo tsa vaha coo añaima ndo jaha Jutu Mañi yo Jesucristo. Tan na coto ndo tyin Nyoo cuñi xaan ra tsi ndo. Tan nacoto tucu ndo tyin iyó Tatyí li ra tsihin ndo.

Tan na cuvi tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo Ñuu Cayucú Galacia

*Nu tyaá ra Pablo iin carta tsa cuenda nyivi yihí cuenda Nyoo ñuu cayucú Galacia*

<sup>1</sup> Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsi tsi yu tyin maa ra Jesucristo tan maa Nyoo Jutu yo jaquitsi tsi yu tan tsaha ra tyiñu ihya tsi yu. Tan juvin ra cuví ra tsa janandoto tsi ra Cristo tsa yaha tsihi ra.

<sup>2</sup> Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó ñuu cayucú Galacia.

<sup>3</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo tsi yo coo añima ndo.

<sup>4</sup> Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya.

<sup>5</sup> Yacan cuenda na jacahnu yo tsi maa Nyoo tacan ñi maa. Tan na cuvi tsi tacan.

*Nduve ca inga cuhva cuví cacu yo*

<sup>6</sup> Iyo xaan cuñi yu tyin nyooho numi xaan nacoo ndo tsi Nyoo. Juvin ra nacana tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vityin sin tuhun tsinú ñi ndo. Cuñi maa ndo tyin cua jacacu yacan tsi ndo.

<sup>7</sup> Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñi ra naha jativi ra naha tuhun Nyoo tsa jacacú ra Cristo tsi yo.

<sup>8</sup> Tun iyó yoo caahan tuhun ra Cristo tsihin ndo tan ña nacatsi tahan can tsihin tuhun tsa cahan ndi tsihin ndo, na cuhun ñi anyaya. Yoñi jaha, vasu maa ndi cuví, o iin ángel quee andivi cuví.

<sup>9</sup> Tsa yaha cahan yu tuhun ihya tsihin ndo, maa tyin cuñi yu cahan nyico yu itsi tsihin ndo inga tsaha. Tatun yoo nyivi caahan tuhun Nyoo tsihin ndo tan sin cuhva caahan ñi, na jacuhun Nyoo tsi ñi anyaya.

<sup>10</sup> Ña caahan yu tacan tsihin ndo tsa cuenda tsa cuñi yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñi yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

*Nacaa quitsaha tsicá ra Pablo tyiñu Nyoo*

<sup>11</sup> Cuñi yu tsa coto ndo yañi, tyin tuhun ra Cristo tsa caahan yu tsihin ndo, ñavin tuhun nyivi cuví tsi.

<sup>12</sup> Ñavin nyivi tsaha tuhun ihya tsi yu. Tyin juvin ñi maa ra Cristo jacoto itsi tsi yu.

<sup>13</sup> Nyooho tsiñi ndo nácaa javaha yu quivi can. Tan tsitó ndo tyin tsinyaa ndaha xaan yu tsi nyivi yihí cuenda Nyoo quivi tsa tsinyi yu cuenda ñi Israel ñuu yu. Tan nducu yu cuhva jandu uvi yu ñi ñi tsinú ñi tsi ra Cristo.

<sup>14</sup> Tan tsicoo yu cuhva iyó ñi Israel, tan yuhu cuvi ra cuahan ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu cuhva javaha tsii tsaahnu ndi.

<sup>15</sup> Maa tyin tsa ndi cumañi ca cacu yu tan Nyoo tsa nacatsi maa ra tsi yu tyin cuñi xaan ra tsi yu. Tan nda tsa tsaá maa quivi tsa tyaa ra cuhva, tan nacana ra tsi yu.

<sup>16</sup> Tacan tan janaha ra tsi Sehe ra tsi yu tan nacoto yu tsi ra, tyin tacan tan cuvi cahan yu tuhun ra nácaa jacacú ra tsi yo tsihin nyivi tsa ñavin nyivi Israel cuví. Tan quivi can ña nducu yu nyivi jacuaha tsi yu nácaa taahan tsi javaha yu.

17 Tan ndi ña tsahan yu ñuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsahan yu nda Arabia. Tacan tan cuanuhú nyico yu inga tsaha nda ñuu Damasco.

18 Tsa yahá uñi cuiya tan tsahan yu nda Jerusalén, tan nacoto yu tsi ra Pedro. Tan ndoo yu tsihin ra tsahun quiivi.

19 Maa tyin ña nyehe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyehe yu.

20 Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuví tsi.

21 Tsa yahá tsa tsahan yu ñuu Jerusalén tan tsahan yu nda Siria tan nda Cilicia.

22 Tan ra yañi yo tsa yucú vehe ñuhu ra Cristo tsa iyó ñuu tsa cayucú Judea, ña nacoto ra naha tsi yu.

23 Maa tyin ñihí tuhun ra naha tsa caahán nyivi tuhun yu, tyin catyí ñi: “Ra tsa tsinyaá ndaha tsi yo quiivi can, vityin caahán ndihi ra tsihin nyivi na tsinu iñi ñi tsi ra Cristo. Tan quiivi can cuñi ra jativi ra tuhun ra Cristo”, catyí ñi, ñihí tuhun ra naha.

24 Tan jacahnú ra naha tsi Nyoo tsa cuenda tsa javahá Nyoo tsihin yu.

## 2

*Ra cuví ityi nuu tsihin nyivi vehe ñuhu ñuu Jerusalén, ndoo ra naha vaha cuhva jahá tyiñu ra Pablo*

1 Tsa yahá utsi cumi cuiya, tan tsahan yu ñuu Jerusalén inga tsaha tsihin ra Bernabé. Tan tsahan ndihi tucu ra Tito tsihin ndi.

2 Tsahan yu ndacan tyin maa Nyoo janahá tsi yu tyin taahán tsi tsa cuhun yu. Tan ndacan quitá sñn yu tsihin ra cuví ityi nuu tsihin nyivi vehe ñuhu naha ra. Tan tsahá cuenda yu tsi ra naha nácaa tuhvá yu caahán tuhun ra Cristo tsihin nyivi tsa ñavin ñi Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu.

3 Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra.

4 Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ican naha ra quihvi xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuví ra naha. Tan cuñi ra naha tyin taahán tsi tsa cundaca ñaha ley tsahnu tsi yo.

5 Maa tyin ndi luxu tan ña tsahá ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

6 Maa tyin ra cuví ityi nuu tsihin nyivi vehe ñuhu, nduve tuhun tsa tsahá ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yoñi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo.

7 Ra cuví ityi nuu vehe ñuhu naha ra, nduve inga tuhun tsahá cuenda ra naha tsi yu tyin nacoto ra naha tyin maa Nyoo jaquitsi tsi yu tyin cahan yu tuhun ra Cristo tsihin nyivi tsa ñavin nyivi Israel cuví. Tumaa tsa jaquitsi ra tsi ra Pedro tyin cahan ra tsihin nyivi Israel.

8 Tyin juvin ñi maa Nyoo tava tyiñu tsi ra Pedro tyin cahan ra tuhun ra Cristo tsihin nyivi Israel. Tan tava tyiñu tucu ra tsi yuhu tyin cahan yu tuhun ra tsihin nyivi tsa ñavin nyivi Israel cuví.

9 Yacan cuenda ra cuví ityi nuu naha ra, ra Jacobo, ra Pedro tan ra Juan, nacoto ra naha tyin Nyoo tsahá ra tunyee iñi tsi yu tsa cahan yu tuhun ra Cristo tsihin nyivi. Tan tsahá ra naha ndaha ra naha tñn ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyivi tsa ñavin nyivi Israel cuví, tan maa ra naha cahan tucu ra naha tsihin nyivi Israel.

10 Tan cahan ra naha iin tuhun tsihin ndi, na nducuhun iñi ndi tsi nyivi



ndaahvi tan na jatyinyee ndi tsi ñi. Tan yacan cuví tsa nducú xaan yu kuhva javahá yu tandihí ñi quívi.

*Nu nduxaan ra Pablo tsi ra Pedro tyin ña vaha tsa javahá ra*

<sup>11</sup> Maa tyin quívi tsahan ra Pedro ñuu Antioquía, nuu nuu ra tan cuxaan yu tsi ra tyin ña vaha tsa javahá ra.

<sup>12</sup> Tyin tsa jihna ñi vaha javahá ra tyin tsatsi ra tsihin ñi tsa ñavin nyívi Israel cuví. Maa tyin tsa tsaá juhva ra Israel naha ra tsa jaquitsi ra Jacobo, tacan tan quitsahá jatsiyó ra tsi ra tan ña cuñí ca ra catsi ra tsihin ñi ican. Javahá ra tacan tyin yuuhví ra coto cuxaan ra tsa tsaá can naha ra tsi ra tyin ndi nyitá ñi ra can naha ra tuñi Nyoo.

<sup>13</sup> Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javahá ndihí ra naha tsa ña vaha can. Tyin javahá ra naha tumaa javahá ra Pedro vasu tsitó ra naha tyin ña vaha can. Tan nda cuanda ra Bernabé tan ndu iin ra tsihin ra naha.

<sup>14</sup> Tan nyehe yu tyin ña vaha javahá ra naha. Ñavin tumaa kuhva catyi tuhun ra Cristo. Yacan cuenda cahan yu tsihin ra Pedro nuu tandihí ra yucú ican: “Yooho cuví un iin ra Israel. Tan iyó un tumaa iyó nyívi tsa ñavin nyívi Israel cuví. ¿Nacaa tsa cuñí un jañiñi un tsi nyívi tsa ñavin nyívi Israel cuví na coo ñi kuhva iyó ñi Israel? [Tan ndi maa un tan ña javahá un tacan]”, catyi yu tsihin ra.

<sup>15</sup> Maa yo nda ndi cacú yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin nyívi Israel cuví.

<sup>16</sup> Maa tyin tsitó yo tyin ña cuví janduvaha yo tsi yo nuu Nyoo tsihin tsa nducú yo kuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi ñi yo tsi ra Jesucristo. Yacan cuenda tsinú ñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo kuhva tyaa yahvi yo tsa catyi ley can. Tyin

ndi intuhun yo tan ña nduvahá yo nuu Nyoo tsihin tsa nducú yo kuhva javaha yo kuhva catyi ley tsahnu can.

<sup>17</sup> Maa tyin vityin tatun nducú yo kuhva nduvaha yo nuu Nyoo tsa cuenda ra Cristo, cuñí tsi catyi tyin nacoto yo tyin iyó tucu cuatyí yo tumaa iyó cuatyí ñi tsa ñavin nyívi Israel cuví. Tatun tacan, ¿a cuñí tsi catyi tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan.

<sup>18</sup> Maa tyin tun cua cuita nyico ñi yo ley tsa tsa yaha nacoó yo, yacan nditsa cua coo cuatyí yo.

<sup>19</sup> Tyin ley can janahá tsi tsi yu tyin taahán tsi cúu yu tsa catyi cuatyí yu, tan yacan cuenda ña nducú ca yu kuhva cacu yu tsihin ley can, tyin tacan tan cuví coo yu tsa cuenda Nyoo.

<sup>20</sup> Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó añima yu vityin. Tan kuhva iyó yu vityin, iyó yu tsihin tsa tsinú ñi yo tsi ra tsa cuví ra Sehe Nyoo. Tyin maa ra cuñí ra tsi yu, tan tsihi ra tsacatyí cuatyí yu.

<sup>21</sup> Ña cuñí yuhu tyaa tsiyo yu tunyee ñi tsa tsaha Nyoo tsi yo. Tyin tun tsatyin cuví cacu yo jaha ley tsahnu, nduve nacatyí tsihi ra Cristo.

### 3

*Naquihín yo Tatyí Ii Nyoo tsa cuenda tsa tsinú ñi yo tsi ra Cristo*

<sup>1</sup> ¡Náa tsa soho iyó nyooho, nyívi Galacia! ¿Yoo tsa jatívi tsi ndo tan ña tyaa yahvi ca ndo tsa nditsa? Catsi xaan tsaha cuenda ndi tuhun ra Jesucristo tsi ndo. Tan cutuñi vaha ñi ndo nacuenda tsihi ra nu cruu.

<sup>2</sup> Intuhun ñi tsa cuñí yu nducú tuhun yu tsi ndo. ¿A naquihín ndo Tatyí Ii Nyoo tsa cuenda tsa javahá ndo tsa catyi ley ra Moisés, a tsa cuenda tsa tsihi ndo tuhun ra Cristo tan tsinú ñi ndo tsi ra?

<sup>3</sup> ¿Nacaa tsa soho xaan iyó ndo vityin? Tan quívi jihna ñi vaha xaan tyaa yahvi ndo tsi Nyoo tsihin tunyee ñi Tatyí Ii ra. Tan vityin, ¿nacaa cuñí

ndo coo ndo tsihin tunyee iñi maa ndo?

<sup>4</sup> ¿A tsa cuatu ñi nyehe ndo nácaa jatyinyee Tatyí Ii Nyoo tsi ndo nu nyehe ndo tundoho? Ñavin tsa cuatu ñi cuví yacan, cuñí yuhu.

<sup>5</sup> ¿Nacaa tsahá Nyoo Tatyí Ii ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñí ndo tuhun ra Cristo tan tsinú iñi ndo tsa caahán ra.

<sup>6</sup> Ra Abraham, tsinú iñi ra tsa cahan Nyoo tsihin ra, yacan cuenda Nyoo naquihín tsi ra tumaa tsatyin vaha ra.

<sup>7</sup> Yacan cuenda taahán tsi coto ndo tyin nyívi tsa nditsa cuví tata ra Abraham, juvin ñi cuví ñi tsa tsinú iñi tsi Nyoo.

<sup>8</sup> Tan tsanaha ndoo tuhun Nyoo nu tutu. Tan catyí tsi tyin nu cuahán ca tsi quívi, cua janduvaha Nyoo tsi nyívi tsa ñavin nyívi Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyívi cua nasoco yu tsi ñi tsa cuenda un”, catyí Nyoo tsihin ra.

<sup>9</sup> Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinú iñi tucu maa ra.

<sup>10</sup> Nyívi tsa nyitá iñi ley tsa tyaá ra Moisés, cua tatsí tuñi Nyoo tsi ñi. Tyin tuhun Nyoo catyí tsi. “Tandihí nyívi tsa ña tyaá yahví tandihí ley tsa nyaá nu libru ley Nyoo, cua tatsí tuñi Nyoo tsi ñi.”

<sup>11</sup> Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juvin ra cua coo ñayívi tsa ña cua naa maa”, catyí tuhun Nyoo.

<sup>12</sup> Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyívi javahá tsa catyí ley ihya, coo ñi ñayívi nyito tsa cuenda can”, catyí tsi.

<sup>13</sup> Ley can catyí tyin taahán tsi cúu yo tsa cuenda cuatyí yo, tan ña ndacá

ñaha ca tsi tsi yo tyin ra Cristo tsa tava nuña ra tsi yo. Tan maa ra naquihín tandihí cuatyí yo. Tyin catyí tuhun Nyoo: “Tandihí maa ra tsa ticaá nu yutun, tatsí tuñi Nyoo tsi ra.”

<sup>14</sup> Tacan cuví tyin tsa cuenda ra Cristo Jesús tan nasocó Nyoo tsi nyívi tsa ñavin nyívi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyí Ii tsa catyí Nyoo tyin cuhva ra tsi yo.

*Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo*

<sup>15</sup> Yañi, cua cahan yu iin cuhva tsihin ndo, cuhva iyó yo nu ñuhu ñayívi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yoñi ca cuví quihin nyaa can. Tan yoñi ca cuví natyiso juhva ca síqui can.

<sup>16</sup> Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihí ra cuví tata ra, tyin intuhun ñi ra cua cuhva ra. Tan juvin ra can cuví ra Cristo.

<sup>17</sup> Tsa caahán yu, cuví tsehe: Nyoo natuhun tahan ra tsihin ra Abraham. Tan ndoo vaha ra tuhun tsihin ra. Tacan tan yahá cumi cientu oco utsi cuiya tan tsaá ley tsa tyaá ra Moisés. Maa tyin ña cuví caní ley can tuhun tsa ndoo Nyoo tsihin ra Abraham. Tan ña cuví casi tsi nu naquihín yo tsa catyí Nyoo tyin cuhva ra tsi yo.

<sup>18</sup> Tun tsatyin tsa cuenda ley ra Moisés tan naquihín yo tsa taahán tsi tsi yo, cuatu xaan ndoo Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsahá Nyoo tsa catyí ra tyin cuhva ra tsi ra.

<sup>19</sup> Tatun tacan, ¿nacuenta vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yahá can tan tsahá ra ley can tsi ra Moisés tan janahá tsi tyin iyó cuatyí yo. Tan ángel Nyoo tsahá cuenda ley can tsi ra Moisés. Tan ra Moisés tsahá cuenda can tsi nyívi. Tan ndoo tsi nda cuanda quívi tsa quítsi ra

Cristo, ra cuví tata ra Abraham. Juvín ra cuví ra tsa catyí Nyoo tyín cua cuhva tsa vaha tsi yo.

<sup>20</sup> Tan juvín ñi maa Nyoo cahan tsihin ra Abraham quívi can. Tan ña tsiñí ñuhu tsa nducu sñin ra iin ra nacatyí tuhún tsihin ra Abraham.

<sup>21</sup> ¿A cuñí tsi catyí tyín ley tsa tyaa ra Moisés ña nacatsí tahan tsi tsihin tsa catyí Nyoo tyín cuhva ra tsi yo? Ñavin. Tun tsatyín cuví coo yo ñayívi nyito jaha ley can, cuví nduvaha yo nuu Nyoo tsa cuenda tsi. Maa tyín ña cuví.

<sup>22</sup> Tyín catyí nu tutu Nyoo tyín iyó cuatyí tandíhi nyívi. Tyín tacan tan nyívi tsa tsinú ñi tsi ra Jesucristo cuví ñihi ñi ñayívi nyito tsa catyí Nyoo tyín cuhva ra tsi yo.

<sup>23</sup> Tsa ndi cumañi ca tsinú ñi yo tsi ra Cristo, ley can yíhi ndaha tsi yo tumaa tsa tsinyí yo vehe caa. Tacan cuví nda cuanda janaha Nyoo tsi yo nácaa tan tsinu ñi yo tsi ra.

<sup>24</sup> Tan ley can cuví tsi tumaa iin nyívi jahá cuenda tsa nyíhi. Tyín jaha cuenda tsi tsi yo nda cuanda quívi quítsi ra Cristo. Tan cuví tsinu ñi yo tsi ra tan nduvaha yo nuu Nyoo.

<sup>25</sup> Tan vityín tsa tsaa quívi tsa tsinú ñi yo tsi ra Cristo, yacan cuenda ña jahá cuenda ca ley can tsi yo.

<sup>26</sup> Tyín tandíhi yo cuví yo sehe Nyoo tyín tsinú ñi yo tsi ra Cristo Jesús.

<sup>27</sup> Tan tandíhi yo tsicoondutya yo tan ndu iin yo tsihin ra Cristo, tan nanduví yo tumaa maa ra.

<sup>28</sup> Ña ñiñi xaan ca tsa cuví yo nyívi Israel, a cuví yo nyívi Grecia; a cuví yo musu, a ñavin musu cuví yo; a cuví yo rayíi, a ñaha. Yoñi ca caahán tuhún yacan, tyín tsa iin ñi cuví yo tsihin ra Cristo, intuhún ña nyívi cuví yo tsihin ra.

<sup>29</sup> Tan tatun cuenda ra Cristo yíhi ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyín cuhva ra tsi ra.

#### 4

<sup>1</sup> Cua cahan yu iin cuhva tsihin ndo. Tatun iin ra luhlu tan tsihi jutu ra, tan

nacoj jutu ra tandíhi tsa cuca ra tsi ra, ra luhlu can cua cutyíñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandíhi tsa cuca jutu ra.

<sup>2</sup> Iyó ra jahá cuenda tsi ra nda cuanda tsaa cuiya ra tsa catyí jutu ra tyín cua naquihín ra ndaha tyíñu tsa nacoj ra tsi ra.

<sup>3</sup> Tan tacan cuví maa yo. Tsa ndi cumañi ca quítsi ra Cristo, cuví yo musu cuhva iyó nyívi iyó nu ñuhu ñayívi ihya.

<sup>4</sup> Maa tyín quívi tahan tsi, Nyoo jaquítsi ra tsi Sehe ra. Tan jacacu iin ñaha tsi ra. Tan tsindaca ñaha ley tsahnu Nyoo tsi ra.

<sup>5</sup> Jaquítsi Nyoo tsi ra tyín jacacu ra tsi yo tsa ña quíhi ndaha ca ley tsi yo. Tyín tacan tan naquihín cuenda Nyoo tsi yo tumaa sehe ra.

<sup>6</sup> Tan tsa cuenda tsa nanduví yo sehe ra, Nyoo jaquítsi ra Tatyí li ra Cristo cunyaa añima yo. Tan tsa cuenda Tatyí li ra caná tsaa yo tsi Nyoo tan catyí yo: “Tyatya”.

<sup>7</sup> Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

#### *Tsicá ñi ra Pablo tsa cuenda nyívi yíhi cuenda Nyoo*

<sup>8</sup> Tan quívi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví.

<sup>9</sup> Maa tyín vityín tsa nacotó ndo tsi Nyoo. Vaha ca catyí yu, maa Nyoo nacotó ra tsi ndo. ¿Nacaa tsa cuñí ndo quihín nyico ndo tuhún ndaahvi tsa nduve tunyee ñi iyó tsi, tan cuví nyico ndo musu?

<sup>10</sup> Nyooho ndi jacahnú ca ndo quívi vico, quívi nduyutyá yoo, tan vico tandíhi ñi cuiya.

<sup>11</sup> Yuuhví xaan yu coto iin tsa cuatu ñi cuví tyíñu jaha yu tsihin ndo.

<sup>12</sup> Yañi, caahán ndaahvi yu tsihin ndo coo ndo tumaa iyó maa yu. Tyín yuhu ña yíhi ndaha ca ley tsahnu tsi

yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñí yu tsa caca iñi ndo tyin jatívi ndo tsi yu.

<sup>13</sup> Tan tsa tsitó ndo tyin quívi quítsi jihna yu ñuu ndo iyó iin cuehe tsi yu, yacan cuenda ndo yu juhva quívi tsihin ndo, tan cahan yu tuhun ra Cristo tsihin ndo.

<sup>14</sup> Tan vasu ndi maa tsa cuuhví yu tsihin cuehe can vaha naquihin cuenda ndo tsi yu tan ña tyaá tsiyo ndo tsi yu. Naquihin cuenda ndo tsi yu tumaa tun cuví yu iin ángel tan tumaa tun ra Cristo cuví yu.

<sup>15</sup> Tan vityin ¿numaa cuahán tsa sii xaan cuñi ndo tsihin yu quívi can? Tyin yuhu cuví yu tsandaa tyin quívi can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan.

<sup>16</sup> Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

<sup>17</sup> Nyívi can, cuñí xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñí ñi tsa cunyicun ndo tsi ñi tan ña tsinu ca iñi ndo tuhun caahán yu.

<sup>18</sup> Vaha tsa cuñi yo tsi nyívi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyíi ñi yu tsihin ndo.

<sup>19</sup> Nyooho ra cuatyí sehe yu, nyehé nyico yu tundoho tan tsa uhvi tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehe yu tundoho nda cuanda cuahnu ndo tsihin tunyee iñi maa ra Cristo.

<sup>20</sup> Vaha xaan tun tsatyin cuví cunyii yu tsihin ndo vityin ihya. Tyin tacan tan cuví nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

*Na coo yo tsa cuenda Nyoo tan ñavin tsa cuenda ley tsahnu*

<sup>21</sup> ¿A ñaha ca cahvi ndo tsa caahán ley tsa tsaha Nyoo tsi ra Moisés? tyin cuñí ndo cundaca ñaha can tsi ndo,

catyí tuhun ndo tsihin yu tun ñaha ca cahvi ndo can.

<sup>22</sup> Catyí tsi tyin ra Abraham tsicoo uvi taahan sehe ra. Tsicoo iin sehe ra tsihin ña Agar tsa cuví musu ñasihi ra. Tan tsicoo inga sehe ra tsihin ña Sara ñasihi vaha maa ra.

<sup>23</sup> Cacú sehe ñaha tsa cuví musu can tumaa cacú tandihí ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuví.

<sup>24</sup> Tan tuhun can iyó tsa cuñí tsi catyí tsi tsihin yo. Nduvi taahan ñi ñaha can cuví ñi tumaa nduvi taahan tuhun tsa ndoo Nyoo tuhun tsihin yo. Intuhun tuhun can cuví cuenda yucu Sinaí. Tan nyívi yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña.

<sup>25</sup> Tumaa ña Agar, tan tumaa yucu Sinaí tsa canyí Arabia, tacan cuví ñuu Jerusalén nda quívi vityin. Tyin nyívi ñuu can yihí ndaha ley tsahnu tsi ñi. Tan cuví ñi tumaa musu ley can.

<sup>26</sup> Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuví tumaa sihi yo.

<sup>27</sup> Tan catyí tuhun Nyoo tyehen: Cusi iñi yooho, ñaha tsa ña cuví coo sehe. Yooho tsa nduve sehe iyó.

Čana tsa tsihin tsa sii cuñí un, tyin ña tsitó un tsa uhvi cacú sehe un.

Cusi iñi tyin cua cuhva cuaha ca yu sehe un

tan ñavin ca ñaha iyó yíi, catyí tuhun Nyoo.

<sup>28</sup> Yañi, yoo cuví yo tumaa ra Isaac, sehe ra Abraham tyin cacú ra cuhva catyí maa Nyoo tsihin jutu ra.

<sup>29</sup> Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihya. Ra tsa cuñí tyin javaha yo tsa catyí ley, xaan iñi ra naha tsi yo tsa cuví yo nyívi cacú tsa tsihin Tatyí Ii Nyoo.

<sup>30</sup> Tan ¿náa catyí tuhun Nyoo? Catyí tsi: “Tava tsiyo tsi ñaha tsa cuví musu



can tsihin sehe ña, tyin ña cuvi naquihin sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo.

<sup>31</sup> Yacan cuenda, yañi, ña cuvi yo tumaa cuví sehe ñaha tsa cuví musu can. Tyin cuví yo tumaa cuví sehe ñasihí ra Abraham, tyin ñavin musu cuví yo. [Tan Nyoo naquihín cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

## 5

*Na tyaá yahvi yo tuhun ra Cristo tan ña cuhva yo cundaca ñaha ley tsahnu tsi yo*

<sup>1</sup> Ra Cristo tsa yaha jacacu ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musu inga tsaha.

<sup>2</sup> Tyaá soho ndo, yuhu ra Pablo caahán tsihin ndo. Tatun cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuvi jatyinyee ra Cristo tsi ndo.

<sup>3</sup> Cuñi yu cahan yu tsihin ndo inga tsaha tuhun ihya: Tandihí ra tsa cuñi cacu tsihin tsa cunyaa tuñi Nyoo tsi ra naha, cuñi tsi javaha ra naha tandihí maa tsa catyí ley ra Moisés.

<sup>4</sup> Tandihí nyooho tsa nducú nduvaha nuu Nyoo tsihin tsa javaha ndo cuhva catyí ley can, tsa quita tsiyo ndo nuu ra Cristo. Tan jaña ndaha ndo tsa vaha tsa tsahá Nyoo tsi ndo.

<sup>5</sup> Maa tyin yoo tsihin tsa jatyinyeeé Tatyí Ii Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo.

<sup>6</sup> Tyin tatun iin ñi cuví yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuví tsa tsinú iñi yo tsi ra Cristo. Tan tsihin tsa tsinú iñi yo cuvi coo yo, tan cuñi tahan ca yo tsi yo.

<sup>7</sup> Nyooho vaha xaan cuahán ndo quiví can. ¿Tan vityin yóo jandu uvi iñi ndo? Tan ña tyaá yahvi ca ndo tsa nditsa.

<sup>8</sup> Tuhun tsa janahá ñi can, ñavin tuhun Nyoo, ra tsa cana tsi yo, cuví can.

<sup>9</sup> Tyin tumaa ndaá yutsan paan jahá luxu ñi yutsan iya, tacan cuví iin nyiví caquiñi, cuaha ca nyiví cuvi jatívi ñi.

<sup>10</sup> Nyoo cua tatsi tuñi ra tsi nyiví jandu uvi iñi ndo. Nduve cuenda ra yóo ñi cuví ñi. Maa tyin yuhu tsitó vaha yu tyin Jutu Mañi yo cua jatyinyee ra tsi ndo tan ña cua tyaá iñi ndo inga cuhva tsa ña janahá yu tsi ndo.

<sup>11</sup> Tan tsa cuenda yuhu, yañi, tun tsatyin catyí yu tyin ra tsinú iñi tsi ra Cristo cuñi tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyí cuatyí yo.

<sup>12</sup> Maa tyin ra tsa cuñi jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuvi ca jandu uvi iñi ra naha tsi ndo.

<sup>13</sup> Nyooho, yañi, cana Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuví javaha ndo náa ndihí tsa cuñi cuñu ñuhu ndo. Maa tyin taahán tsi tsa jatyinyee tahan ndo tsi ndo tsa cuenda tsa cuñi tahan ndo tsi ndo.

<sup>14</sup> Tyin iyó iin ley Nyoo, tan catyí tsi: “Cuñi tahan ndo tsi ndo tumaa cuñi ndo tsi maa ndo”, catyí tsi. Tan tatun nditsa tsa cuñi tahan yo tsi yo, tsa javahá ndihí yo tandihí ca tsa caahán ley tsahnu.

<sup>15</sup> Jaha ndo cuenda tyin tatun caahán nyaa tahan ndo tsi ndo tan ndasi cuñi ndo nyehe tahan ndo tsi ndo, cua tiví nu yucú ndo.

*Cuhva cuñi cuñu ñuhu yo tan cuhva iyó yo tsihin Tatyí Ii Nyoo*

<sup>16</sup> Tsa cuñi yu cahan yu tsihin ndo cuví tuhun ihya: Coo ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñi cuñu ñuhu ndo.

17 Tyin tsa javahá yo tsa ña vaha tsa cuñí cuñu ñuhu yo, ñavin cuhva cuñí Tatyí Ii Nyoo javahá yo. Tyin Tatyí Ii Nyoo cuñí tsi tsa javahá yo tsa vaha. Tan cuñu ñuhu yo ña cuñí tsi javahá tsi cuhva cuñí Tatyí Ii Nyoo. Tsa cuñí Tatyí Ii Nyoo cañí tahan can tsihin tsa cuñí cuñu ñuhu yo. Yacan cuenda yíi javaha yo tsa cuñí yo javaha yo.

18 Maa tyin tatun tsahá yo tsi yo tsa jaquihin ityi Tatyí Ii Nyoo tsi yo, ña cua cundaca ñaha ca ley tsahnu tsi yo.

19 Ña yíi nacoto yo tsi nyívi javahá cuhva cuñí cuñu ñuhu ñi. Yihí rayíi, iyó ñasihi ra naha tan iyó inga ñaha tsi ra naha. Tan yihí ñiñaha iyó yíi ñi tan iyó inga rayíi tsi ñi. Tan yihí rayíi quixí ra tsihin ñaha tan ña cuñí ra tindaha ra tsihin ña, tan juvin ñi tacan javaha juhva ñiñaha.

20 Yihí ñi jacahnú ñi tsitoho. Yihí ñi tasi ñi. Yihí ñi ndasi cuñí ñi nyehe ñi nyívi. Yihí ñi cañí tahan ñi. Yihí ñi cuiñu ñi. Tan yihí ñi iin yaha ñi cuxaan ñi. Yihí ñi tsicá iñi ñi maa ñi tsa vaha tsi maa ñi. Tan yihí ñi natahví sava ñi nu yucú ñi tyin cañí tahan ñi. Tan tacan tan quita sín ñi.

21 Tan yihí ñi nyiyó iñi ñi tsa iyó tsi inga nyívi. Tan yihí ñi tsahñí tahan ñi. Tan yihí ñi tuhva ñi tsiñi. Tan yihí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quívi can. Tyin tandíhi ñi tsa javahá yacan, ña cua cuvi naquihin cuenda ñi nu ndacá ñaha Nyoo.

22 Maa tyin tsa tsahá Tatyí Ii Nyoo tsi yo, cuví tsa cuñí yo tsi Nyoo tan tsi nyívi, tsa síi cuñí yo, tsa taxin cuñí añaima yo, tsa nyee xaan iñi yo, tsa vaha iñi yo, tsa vaha nyívi cuví yo, tsa ña cundíhi iñi yo javahá yo tsa vaha tsihin nyívi, tsa tsinú iñi yo tsi ra Cristo.

23 Tan inga tsa tsahá Tatyí Ii Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandíhi tsa vaha ihya, ndi intuhun ley

tan ña cua cuvi catyi tsi tyin iyó cuatyí yo.

24 Tan yoo tsa yihí cuenda ra Cristo Jesús, tsa yaha jandíhi yo tuhun tsa javaha yo tsa ña vaha tsa cuñí cuñu ñuhu yo.

25 Tan tumaa tsa iyó yo ñayívi nyito tsa cuenda Tatyí Ii Nyoo, tacan cuñí ndíhi tucu tsi tsa tyaá yahvi yo tsa janahá ra tsi yo.

26 Na ña cahnu jaha yo tsi yo. Tan ña jacañi tahan yo tsi nyívi. Tan na ña nyiyo iñi yo tsa tsii inga nyívi.

## 6

### *Taahán tsi jatyinyee tahan yo tsi yo*

1 Yañi, tatun nyehé ndo javahá iin ra yañi yo cuatyí, nyoocho tsa ñihi nyaá Tatyí Ii Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahan vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndíhi nu ña vaha tsi ndo.

2 Na jatyinyee tahan yo tsi yo náa tundoho taahán yo. Tyin tatun javahá yo tacan, cuñí tsi catyi tyin tyaá yahvi yo tsi ra Cristo.

3 Tatun ndáa yo cuñí maa yo tyin cahnu nyívi cuví yo, tan nduve náa cuví yo, juvin ñi tsi maa yo jandaví ñaha yo.

4 Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusíi iñi yo. Tan ña taahán tsi nyehe yo náa javahá inga nyívi.

5 Tyin intuhun intuhun maa yo tan taahán tsi cunyeé iñi yo cuiso yo tsa taahán tsi tsi yo.

6 Tan cuñí tsi tsa jatyinyeé ndo tsi ra jacuahá tuhun Nyoo tsi ndo. Cuhva ndo náa tsiñí ñuhu tsi ra.

7 Tan ña jandaví ñaha ndo tsi juvin ñi maa ndo. Tyin Nyoo yoñi cuví vacu nducu tsi ra. Tyin tandíhi tsa tatsí nyívi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi.

8 Tacan tucu tatun iin nyívi tan javahá ñi tsa ña vaha tsa cuñí cuñu ñuhu ñi, juvin ñi maa tsa javahá ñi

cua jatívi tsi ñi. Maa tyin tatun javahá ñi cuhva cuñí Tatyí Ii Nyoo, Tatyí Ii Nyoo cua cuhva ñayívi nyito tsa ña cua naa maa coo ñi.

<sup>9</sup> Yacan cuenda janyee ndo iñi ndo javaha ndo tsa vaha. Tyin tatun ña jandíhi yo tsa javahá yo tacan, cua naquihin yo tsa vaha na tahan tsi quívi.

<sup>10</sup> Yacan cuenda tandíhi ñi tsaha tsa cuví javaha yo tsa vaha, na javaha yo itsi tsihin tandíhi ñi nyívi. Tan tsa jihna ñi taahán tsi javaha yo tsa vaha tsihin nyívi yíhi cuenda Nyoo.

*Síi xaan cuñí ra Pablo tyin nyehé ra tundoho tsa cuenda ra Cristo*

<sup>11</sup> Nyehe ndo tsa nahnu letra tyaá yu tsihin ndaha yu nu tutu ihya vityin.

<sup>12</sup> Ra tsa jañiñí tsi ndo tsa cunyaa tuñi Nyoo tsi ndo, tacan javahá ra naha tyin cuñí ra naha na catyi nyívi tyin vaha xaan ra naha. Tan ña cuñí ra naha nyehe ra naha tundoho tsa cuenda ra Cristo, ra tsa tsihi nu cruu tsa cuenda yo.

<sup>13</sup> Tyin ndi maa ra tsa nyisó tuñi Nyoo tan ña tyaá yahvi ra naha tandíhi tsa caahán ley. Cuñí ra naha tsa cunyaa tuñi Nyoo tsi nyoocho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha.

<sup>14</sup> Maa tyin yuhu ña cuñí yu cu iyo iñi yu tsi yu tsa cuenda náa ndíhi tuhun. Maa tyin cu iyo iñi yu tyin tsihi Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñí ca yu tsa iyó ñuu ñayívi ihya tyin ña ndaca ñaha ca yacan tsi yu.

<sup>15</sup> Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyívi tsa tsa cuenda ra.

<sup>16</sup> Tandíhi nyoocho tsa iyó tacan, naquihin ndo tsa taxin coo añima ndo. Tan na cundaahvi iñi Nyoo nyehe ra tsi tandíhi ndo, tyin nditsa tsa cuví ndo nyívi cuenda ra.

<sup>17</sup> Vityin tan nu cuahán tsi ityi nuu, ndi intuhun ndo tan ña cua cuhva ca ndo tsihi tsi yu. Tyin tandíhi paa tsa nyecú cuñu ñuhu yu, cuñí tsi catyi tsi tyin nditsa tsa cuví yu iin ra tsicá tyiñu Jutu Mañi yo Jesús.

<sup>18</sup> Yañi, na nasoco Jutu Mañi yo Jesucristo tsi tandíhi ndo. Tan na cuví tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

### *Nu quitsaha javahá ra Pablo carta*

<sup>1</sup> Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihya tsi ndo.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

### *Tsa iin ñi cuví yo tsihin ra Cristo, Nyoo nasocó xaan ra tsi yo*

<sup>3</sup> Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo.

<sup>4</sup> Tsa ndi cumañi ca javaha ra ñuhu ñayivi tan nacatsi ra tsi yo tyin ndu iin yo tsihin ra Cristo. Tyin tacan tan cuiti coo yo nuu ra tan ña coo ca cuatyí yo.

<sup>5</sup> Tsa cuenda tsa cuñí ra tsi yo, tyaa ra cuhva tahan tsanaha tyin nanduvi yo sehe ra tsa cuenda ra Jesucristo. Tacan javaha ra tyin tacan cacu iñi maa ra.

<sup>6</sup> Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra.

<sup>7</sup> Nyoo cuñí xaan ra tsi yo. Tan yacan cuenda tyahvi ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo.

<sup>8</sup> Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsiñi tuñi ra coo tsi yo.

<sup>9</sup> Tan tsahá ra tsa nacotó yo tuhun tsa tyihí ra cuhva tahan tsanaha tyin javaha ra tsihin ra Cristo. Tan tandihí tuhun can tsicumí xeehe ra tan ña jacotó ra can tsi nyivi tahan tsanaha.

<sup>10</sup> Maa tyin tsa cua tahan tsi quivi cundaa tuhun tsa tyihí ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

<sup>11</sup> Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsi ra tsi yo, tyin tacan tyihí ra cuhva tyin javaha ra tyin maa ra javahá tandihí cuhva nyehé ra tyin vaha.

<sup>12</sup> Javaha ra tyehen tyin nyuhu tsa natsinu jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra.

<sup>13</sup> Tan tacan tucu nyooho natsinu iñi ndo tsi ra Cristo, tan ndu iin ndo tsihin ra quivi tsa tsiñi ndo tuhun Nyoo tsa cuví tsa nditsa, tan nácaa jacacú ra tsi yo. Tan tsaha ra Tatyí Ii ra coo añima ndo, tumaa catyi ra tyin cua javaha ra tan yacan cuñí tsi catyi tyin cuví ndo nyivi yihí cuenda ra.

<sup>14</sup> Nyoo jihna ca Tatyí Ii ra tsaha ra tsi yo tyin tacan tan cuita iñi yo tandihí ca tsa cua cuhva ra tsi yo quivi jandu iin ra tandihí nyivi tsa cua cacu. Tyin tacan tan jacahnu yo tsi ra, tyin cahnu xaan cuví ra.

### *Nu tsicán ra Pablo tsi Nyoo na cuhva ra tsa tsiñi tuñi tsi nyivi tsa tsinú iñi*

<sup>15-16</sup> Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñí tahan xaan ndo tsi ndo tsa yihí ndo tuhun Nyoo.

<sup>17</sup> Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí Ii ra, tacan tan nacoto vaha ca ndo tsi ra.

<sup>18</sup> Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenta cana ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi



nyivi cuenda ra, sii xaan caá can tan cuca xaan can.

<sup>19</sup> Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú iñi tsi ra. Tan juvin ñi maa tsihin tunyee iñi cahnu can

<sup>20</sup> Janandoto Nyoo tsi ra Cristo. Tan tyaá ra tsi ra xiin cuaha ra nda gloria.

<sup>21</sup> Tan yacan cuví nu jacahnú xaan ca Nyoo tsi ra Cristo tan ñavin ca tandihi ca ra ndacá ñaha nu ñuhu ñayivi ihya tan nda andivi. Tyin yoñi yoo ra cahnu ca cuví ñuu ñayivi ihya tan ndi ñayivi tsa cua coo, tyin intuhun ñi maa ra Cristo cuví ra cahnu ca cuví.

<sup>22</sup> Tan tandihi cuii maa tsa iyó tsaha Nyoo tyin cundaca ñaha ra Cristo. Tan tsaha Nyoo tsa cuví ra jiñi tsihin nyivi tsa yihí cuenda ra.

<sup>23</sup> Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juvin maa ra janduní ra tandihi tsa iyó.

## 2

*Jacacú Nyoo tsi yo tsa cuenda tsa cuñi ra tsi yo*

<sup>1</sup> Nyoo tsaha ra ñayivi nyito coo ndo quivi ndu iin ndo tsihin ra Cristo. Maa tyin tsa ndi cumañi ca tsinu iñi ndo tsi ra Cristo ña nyito aña ndo tyin ndi iyó cuaha cuatyí ndo.

<sup>2</sup> Tan quivi can ndi javahá ndo cuhva javahá nyivi ña tsitó tsi Nyoo. Ndi tyaá yahvi ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyivi tsa ña tyaá yahvi tsi Nyoo.

<sup>3</sup> Tan juvin ñi tacan tsicoo tucu yo quivi can, tyin javahá yo tsa ña vaha tsa cuñi cuñu ñuhu yo tan cuhva tsicá iñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihi ca nyivi tsa javahá tsa ña vaha.

<sup>4</sup> Maa tyin Nyoo cundaahvi xaan iñi ra nyehé ra tsi yo tsa cuenda tsa cuñi xaan ra tsi yo.

<sup>5</sup> Tan vasu tsa tsihi aña yo jahá cuatyí yo, Nyoo janandoto ra aña yo tan tsaha ra ñayivi nyito coo yo nu jandu iin ra tsi yo tsihin ra Cristo. Tan cacu yo jahá tsa cuñi xaan Nyoo tsi yo.

<sup>6</sup> Tan tsa janandoto ra tsi yo iin caa ñi tsihin ra Cristo Jesús tyaá ra tsi yo tsihin ra nda gloria.

<sup>7</sup> Tan javahá Nyoo tyehen tyin tacan tan nu cuahán ca tsi ityi nuu cua coto tandihi ca tsa cua coo tyin vaha xaan iñi ra tsihin yo tan cahnu xaan tumañi iñi tsaha ra tsi yo tsa cuenda ra Cristo Jesús.

<sup>8</sup> Tyin tsa cuenda tsa vaha tsa tsaha Nyoo tsi yo tan cacú yo. Tan ñihi yo tumañi iñi ihya jahá tsa tsinú iñi yo tsi ra Cristo. Tan ñavin tsihin tsa javahá yo tan ñihi yo can, tyin maa Nyoo tsaha can tsi yo.

<sup>9</sup> Ñavin tsihin tsa javahá yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo iñi yo tyin cacu yo tsihin tsa javahá yo tsa vaha.

<sup>10</sup> Nyoo janduvahá ra aña yo tsihin tsa ndu iin yo tsihin ra Cristo Jesús. Tacan javahá ra tyin tacan tan javahá yo tsa vaha, tyin nda tsanaha tan tyaá ra cuhva tyin coo yo tacan.

*Cuví yo nyivi Israel, a cuví yo nyivi inga ñuu, maa tyin tsa cuenda ra Cristo iin ñi nyivi cuví tandihi yo*

<sup>11</sup> Catyí ra Israel naha ra tyin ña vaha nyooho tsa ñavin nyivi Israel cuví, tyin ña tsinyaa tuñi Nyoo cuñu ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyooho ña vaha ndo.

<sup>12</sup> Tan nducuhun tucu iñi ndo tyin nu quitsi tsi tañan tsanaha, nduve ra Cristo iyó aña ndo. Tan ndi ña iin ñi cuví ndo tsihin nyivi Israel. Tan ña tsitó ndo tuhun tsa ndoo Nyoo tsihin ra Abraham tan tsihin nyivi tata ra. Tyin iyó soho ñi maa ndo quivi can, tan nduve Nyoo nyaá tsihin ndo. Yacan cuenda nduve náa cua ñihi ndo.

<sup>13</sup> Tyin ndi luxu tuhun Nyoo tan ña tsitó ndo tañan tsanaha, maa tyin vityin ndu iin ndo tsihin ra Cristo

Jesús tyin quitsi ra tsati ra niñi ra tsa cuenda ndo.

<sup>14</sup> Tyin juvin ra Cristo tsaha tsa taxin coo yo tan jandu iin ra tsi nyooho tsa ñavin nyivi Israel cuvi tsihin nyuhu tsa cuvi nyivi Israel. Vityin iin ña nyivi cuvi yo, tyin jandihí ra tsa xaan cuñi yo nyehé tahan yo tsi yo.

<sup>15</sup> Tan tsa quitsi ra Cristo tsihi ra nu cruu, tsindihí tuhun tsahnu tsa iyó ndi tsa tyasi nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyivi cuvi yo nuu ra, tan iyó yo tsihin tsa taxin.

<sup>16</sup> Tan tsihin tsa tsihi ra nu cruu tsindihí tsa ña caahán tsihin tahan yo, tan nacoó vaha yo tsihin Nyoo jahá ra, iin ña nyivi cuvi yo vityin.

<sup>17</sup> Ra Cristo quitsi ra cahan ra tyin cuvi coo vaha yo tsihin Nyoo tan tsihin tahan yo: Cahan ra tsihin ndi tsa cuvi ndi nyivi Israel tsa tsa tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahan tsanaha.

<sup>18</sup> Tan tsa cuenda tsa quitsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí li ra iyó aña yo: a cuvi yo nyivi Israel, o ñavin nyivi Israel cuvi yo.

<sup>19</sup> Yacan cuenda nyooho ñavin ca nyivi inga ñuu cuvi ndo, tyin iin ña nyivi cuvi ndo tsihin nyivi yihí cuenda Nyoo. Tan cuvi ndo nyivi maa ra.

<sup>20</sup> Tan cuvi ndo tumaa iin vehe. Tan nyecú ndo nu sama ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuvi ra Cristo Jesús.

<sup>21</sup> Tan tsata yuu tsa cuvi ra Cristo, sii xaan cua quita vehe tsa ndi cuahán tsinú, tyin tandihí maa yo cuvi nama vehe tsa ndi tsinú can. Tan tsa cua quita tsi, cua cuvi tsi iin vehe ñuhu ii tan cua ndu iin tsi tsihin Jutu yo Nyoo.

<sup>22</sup> Tan tacan tucu nyooho ndu iin ndo tsihin tandihí nyivi yihí cuenda ra Cristo jahá Tatyí li ra, tyin tacan tan cua cuvi ndo vehe nu coo Nyoo.

*Nyoo tava tyiñu tsi ra Pablo tyin cahan ra tuhun ra Cristo tsihin nyivi tsa ñavin nyivi Israel cuvi*

<sup>1</sup> Yacan cuenda yuhu ra Pablo nyíí yu vehe caa ihya tyin jacotó yu tuhun ra Cristo Jesús tsi nyooho tsa ñavin nyivi Israel cuvi.

<sup>2</sup> Taahán tsi coto ndo tyin cahnu xaan tunyee iñi tsahá ra tsi yu tsa cuenda tsa vaha tsi ndo, tyin jacotó yu tuhun ra tsi ndo.

<sup>3</sup> Tan Nyoo janaha ra tuhun xeehe tsa tsicumí ra tsi yu, tan tyaá yu juhva tuhun can nu carta ihya tyin coto ndo.

<sup>4</sup> Tan tsa cua cahvi ndo tuhun tsa tyaá yu ihya cua coto ndo nácaa tsaha Nyoo tyin cutuñi iñi yu tuhun ra Cristo tsa tsicumí xeehe ra.

<sup>5</sup> Tyin nu quitsi tsi tahan tsanaha, ña janaha Nyoo tuhun xeehe can tsi nyivi, tumaa tsa janahá Tatyí li ra tuhun can tsi ra tava tyiñu ra Jesucristo tan ra cuvi ndusu yuhu Nyoo.

<sup>6</sup> Tan tuhun xeehe can, cuñi tsi catyi tyehen: Nyivi tsa ñavin nyivi Israel cuvi cua ñihi ndihí ñi tsa cua ñihi nyivi Israel tyin iin ña cuñu ñuhu cuvi yo vityin tsa cuenda tsa jacacu ra Cristo tsi yo. Tan cua ñihi yo tsa catyi Nyoo tyin cuhva ra tsi yo tyin natsinu iñi yo tsi maa ra Cristo Jesús.

<sup>7</sup> Nyoo tsaha ra tsa vaha tsi yu tan jatyinyeé ra tsi yu tyin tacan tan jacoto yu tuhun vaha ihya tsi nyivi.

<sup>8</sup> Yuhu luhlu xaan ra cuvi yu tan ñavin ca tandihí nyivi tsa yihí cuenda Nyoo. Maa tyin Nyoo tsaha ra tumañi iñi cahnu ihya tsi yu tyin cahan yu tuhun ra Cristo tsihin nyivi tsa ñavin ñi Israel cuvi. Tyin na coto ñi tsa cuca tsa cua cuhva ra Cristo tsi ñi.

<sup>9</sup> Tava tyiñu Nyoo tsi yu na jacoto yu tsi tandihí nyivi nácaa tyaá ra cuhva tsa cua javaha ra tsa ndi cumañi ca javaha ra tandihí tsa iyó, tyin tsanaha ña jacotó ra tuhun tsa tsicumí xeehe ra tsi nyivi.

<sup>10</sup> Tacan cuvi tan vityin tandihí ra ndacá ñaha nda andivi cua nyehe tsa vaha tsa javahá Nyoo tsihin yo tsa cuvi yo nyivi yihí cuenda ra. Tan cua

coto ra naha tyin iyó xaan tsa tsiñi tuñi tsi Nyoo.

<sup>11</sup> Tandihí tuhun ihya nacatsí tahan tsi tsihin tsa tyaá Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo.

<sup>12</sup> Tan tsa cuenda tsa tsinú iñi yo tsi ra Cristo, tsahá Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra.

<sup>13</sup> Tan tsa cuenda tsa tsahá ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

*Tsicán tahvi ra Pablo tyin na nacoto vaha ca nyivi tsi ra Cristo*

<sup>14</sup> Tan tsa cuenda tsa nducuhun iñi yu tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsicuñí tsi yu nuu ra.

<sup>15</sup> Tyin juvin ra cuví Jutu tandihí nyivi: ñi tsa cuahán andivi, tan ñi tsa yucú nu ñuhu ñayivi ihya.

<sup>16</sup> Tan tsicán yu tsi ra na jandunyeec xaan ra iñi ndo tsihin Tatyí Ii ra tsa iyó aña ndo.

<sup>17</sup> Tan na coo ra Cristo aña ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihí nyivi, tyin nyanaá vaha ndo tsi Nyoo.

<sup>18</sup> Tacan tan cua cutuñi vaha iñi ndo tsihin tandihí ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyivi nácaa tsa cuñi ra tsi ndo.

<sup>19</sup> Tsicán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

<sup>20</sup> Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihí.

<sup>21</sup> Yoo tsa cuví yo nyivi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

## 4

*Iin ñi cuví tandihí yo tsa yihí yo cuenda ra Cristo jahá Tatyí Ii Nyoo*

<sup>1</sup> Yacan cuenda yuhu, tsa nyii yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaá cuhva taahán tsi coo nyivi tsa nacana Nyoo. Tyin nacana ra tsi ndo na cuví ndo nyivi ra.

<sup>2</sup> Yacan cuenda jandundaahvi ndo tsi ndo nuu nyivi, tan vita cuhun iñi ndo. Tan ña cutyixin ndo tsihin ñi, tan ña cundihí iñi ndo nyehé ndo tsi ñi tyin tacan tan coto ñi tyin cuñi ndo tsi ñi.

<sup>3</sup> Tyin tsa taxin tsa tsahá Nyoo coo aña yu jandu iñ tsi tsi yo tan yacan cuenda nducu vaha ndo cuhva tan iñ ñi cuví ndo tsihin tsa jatyyinee Tatyí Ii Nyoo tsi ndo.

<sup>4</sup> Tandihí yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihí yo intuhun ñi Tatyí Ii Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayivi nyito coo yo.

<sup>5</sup> Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutyá yo.

<sup>6</sup> Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra aña tandihí yo, tan tsatyíñú ra tsi tandihí yo, tan jahá tyiñu yo tyiñu ra.

<sup>7</sup> Tan tsahá ra Cristo ndatu tsi tsa intuhun intuhun yo cuhva cuñi maa ra.

<sup>8</sup> Yacan cuenda catyí tsi nu tutu Nyoo tuhun ra Cristo tyehen:

Cunyeec ra jahá canaa ra tsi nu xaan iñi tsi ra, tan quihín nyaa ra tsi nyivi tsa yihí ndaha nu tan nandaá ra andivi tsihin ñi.

Tan tsahá ra ndatu tsi yo tsa jaha tyiñu yo tyiñu ra, catyí tsi.

<sup>9</sup> ¿Tan náa cuñi tsi catyí tsa “nandaá ra”? Cuñi tsi catyí tyin nuu jihna ra nu ñuhu ñayivi.

<sup>10</sup> Ra tsa nuu can, juvin ñi ra cuví ra tsa nandaá nda gloria. Tyin tacan tan

jandun# ra tandih# maa tan cunyaa ra tsihin yo tandih# ñi ityi.

11 Tan juvin ñi maa ra Cristo tsaha ndatu tsi yo. Tsi juhva yo tava tyiñu ra tsi yo tsa caca yo tyiñu ra. Tan tsi inga yo tsaha ra tsa cuv# yo ndusu yuhu ra. Tan tsi inga yo tsaha ra tyin jacoto yo tsi nyiv# nácaa jacacú ra tsi yo. Tan tsi inga yo tsaha ra tsa jaha cuenda yo tsi ñi yih# cuenda ra, tan tsi inga yo tsaha ra tsa cuv# jacuaha yo tuhun ra tsi ñi.

12 Tacan tsaha Nyoo ndatu can tsi yo tyin jatyinyee tahan yo tsi yo tan tsi inga ca nyiv# tyin tacan tan cuahnu ca yo tsihin ra Cristo.

13 Nda cuanda ndu iin tandih# yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsaa yo cuv# yo tumaa cuv# maa ra Cristo.

14 Tacan tan ña cua cuv# ca yo tumaa tsa nyihi. Tyin tsa nyihi yatyi xaan tsinú iñi tsi náa luxu tsa ñih# tuhun tsi. Tan na ña cuv# yoo tacan tyin coto jandavi ñaha nyiv# tsi yo.

15 Maa tyin tyehen cua javaha yo: cua cuñi yo tsi nyiv# tan cua cahan yo tsa nditsa tsihin ñi. Tan ndunyeec ca añima yo tsihin tandih# tsa vaha tsa iyó tsi Nyoo. Tan cuahnu yo tan cuv# yo tumaa maa ra Cristo, ra cuv# ityi nuu tsihin yo.

16 Tan tsa cuenda ra Cristo tandih# yo tsa cuv# yo cuñu ñuhu ra, iin ñi cuv# yo. Tumaa yih# tahan iin cuñu ñuhu, tan tsa iin tsa iin nu yih# tahan tsi vaha jahá tyiñu tsi. Tan tacan jatyinyee tsi tsi nan# cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tsihin tsa cuñi tahan yo tsi yo tan jatyinyee tahan yo tsi yo.

### *Tsahá ra Cristo ñayiv# nyito coo yo*

17 Tuhun ihya cuv# tsa tsahá cuenda yu tsi ndo, caty# Jutu Mañi yo. Ña coo ca ndo tumaa iyó nyiv# ña nacotó tsi Nyoo. Tyin maa ñi maa tsa ña jatyinyee tsi ñi tsicá iñi ñi.

18 Tan ña cutuñi iñi ñi, tyin ñavin ñayiv# Nyoo iyó ñi. Tyin ña tsitó ñi, tsa cuenda tsa ndava añima ñi.

19 Ña cahán ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñi ñi javaha ñi.

20-21 Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuv# tuhun maa ra Cristo.

22 Yacan cuenda ña coo ca ndo cuhva tsicoo ndo quiv# can, tan ña javaha ca ndo tsa caquiñi tsa cuñi cuñu ñuhu ndo, tyin tsanaha, jandavi ñaha xaan can tsi ndo.

23 Nacuhva cuenda ndo tsi ndo tsi Nyoo na nasama ra cuhva tsicá iñi ndo.

24 Tan coo ndo ñayiv# nyito tyin vi-tyin nyiv# tsa cuv# ndo jahá Nyoo. Tan javaha ndo maa ñi tsa vaha na nyehe nyiv# tyin iyó ndo ñayiv# nyito tyin catsi tan cuiti iyó ndo.

25 Yacan cuenda ña cahan ca ndo cuendu. Cahán ndo maa ñi tsa nditsa tsihin nyiv# tyin iin ña cuñu ñuhu cuv# tsa tandih# yo.

26 Tatun cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quih# tsihi tsi ndo nduvi.

27 Tan ña cuhva ndo ndatu tsi nu ña vaha tsa nducu cuhva nu tsi ndo.

28 Ra tsa tuhva suhu quiv# can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ra, tan cuv# jatyinyee ra tsi nyiv# tsa iyó tsa tsiñi ñuhu tsi ñi.

29 Ña cahan ndo tsa ndavaha ñi. Cahán ndo, maa ñi tsa vaha tsa cua jatyinyee tsi nyiv# tsa tsiñi tsa caahán ndo.

30 Tan ña cuhva ndo tucuihaya iñi tsi Taty# Ii Nyoo tyin Taty# Ii ra cuv# tuñi tsa tyaa ra añima yo nda cuanda ndih# jacacu ra tsi yo quiv# cua quitsi ra.

31 Ña cuxaan iñi ndo tsihi. Tan ña cuxaan ndo. Tan ña cuv# ndo nyiv# tyixin. Tan ña cahan nyaa ndo tsi nyiv#, tan ndi ña cahan ndo tsa ndavaha ñi.



<sup>32</sup> Maa tyin *cuvi* ndo *nyivi* vaha, tan *cundaahvi* *iñi* ndo tsi *nyivi*. Tan *jaha* ndo *tucahnu* *iñi* tsi *ñi*, tumaa *jaha* Nyoo *tucahnu* *iñi* tsi maa ndo tsa *cuenda* ra *Cristo*.

## 5

*Nacaa taahán tsi coo nyivi yihí cuenda Nyoo*

<sup>1</sup> Nducu ndo *cuhva* *coo* ndo tumaa *iyó* maa Nyoo, tyin *sehe* ra *cuví* tsi yo, tan *cuñi* *xaan* ra tsi yo.

<sup>2</sup> *Cuñi* yo tsi *nyivi* tumaa tsa *cuñi* maa ra *Cristo* tsi yo tan *quitsi* ra *tsihi* ra nu *cruu* tsa *cuenda* yo. Tumaa *jamañi* ra *cuví* *jutu* *mbee* *ticaty* *luhlu* nuu Nyoo, *tacan* *jamañi* ra *Cristo* tsi ra tsa *cuenda* yo. Tan *sii* *xaan* *cuñi* Nyoo *tsihin* ra tsa *cuenda* tsa *javaha* ra *tacan*.

<sup>3</sup> *Vityin* tsa *cuví* yo *nyivi* *yihí* *cuenda* Nyoo, *ña* *taahán* tsi *javahá* ndo tsa *caquiñi* *tsihin* *cuñu* *ñuhu* ndo, tan *ndi* *ña* *cuñi* ndo *coo* *cuaha* *ndaha* *tyiñi* ndo. Tan *ña* *taahán* tsi *caca* *iñi* ndo *ndi* *intuhun* *tuhun* *ihya*.

<sup>4</sup> *Ña* *cahan* ndo *tuhun* tsa *tsahá* *ticanuu* tsi yo. Tan *ndi* *ña* *cahan* ndo tsa *nduve* *yahvi* *nyaá*. Tyin *ña* *taahán* tsi *cahan* yo *tacan*. *Vaha* *ca* *cuhva* ndo *tyahvi* *nyoo* tsi Nyoo.

<sup>5</sup> Tyin tsa *tsitó* ndo tyin *tandihí* *nyivi* tsa *javahá* tsa *caquiñi*, *ña* *cua* *quihvi* *ñi* nu *ndacá* *ñaha* ra *Cristo* *tsihin* Nyoo. Ra tsa *iyó* *tsihin* *ñaha* tan *ñavin* *ñasihí* ra *cuví* *ña*, a *ñaha* *iyó* *tsihin* *rayi* tan *ñavin* *yii* *ña* *cuví* ra, tan *nyivi* tsa *cuñi* *xaan* *coo* *cuaha* *ndaha* *tyiñu*, *ña* *cua* *quihvi* *ñi* nu *ndacá* *ñaha* Nyoo tyin tumaa tsa *jacahnú* *ñi* *tsi* *toho* *cuví* *can*, tyin maa *ñi* *yacan* *tsicá* *iñi* *ñi* tan *ña* *jacahnú* *ñi* tsi maa Nyoo.

<sup>6</sup> *Ña* *cuhva* ndo tsa *jandavi* *ñaha* *nyivi* tsi ndo *tsihin* *tuhun* tsa *nduve* *yahvi* *nyaá* tsa *cahán* *ñi* tyin tsa *cuenda* *tandihí* tsa *ña* *vaha* *can* *cua* *tatsi* *tuñi* Nyoo tsi *nyivi* tsa *ña* *tyaa* *yahvi* tsi ra.

<sup>7</sup> *Yacan* *cuenda* *ña* *cütahan* ndo *tsihin* *ñi*.

<sup>8</sup> *Nyoo* *ho* *tsicoo* ndo nu naa *quivi* *can*. Tan *vityin* *ña* *taahán* *ca* tsi *coo*

ndo nu naa tyin *Jutu* *Mañi* yo tsa *tava* ra tsi ndo nu *nditsin*. *Yacan* *cuenda* *taahán* tsi *javaha* ndo tumaa *cuñi* maa Nyoo.

<sup>9</sup> Tyin Nyoo *jandunditsin* ra *añima* yo tan *janduvaha* ra *añima* yo, *yacan* *cuenda* *javaha* ndo tsa *vaha* tan *cahan* ndo maa *ñi* maa tsa *nditsa*.

<sup>10</sup> *Jañiñi* ndo *cutuhva* ndo *cuhva* *taahán* *iñi* *Jutu* *Mañi* yo.

<sup>11</sup> *Ña* *javaha* ndo *cuhva* *javahá* *nyivi* *iyó* nu naa. Tyin *nduve* *náa* tsa *vaha* *ñihí* *ñi* *tsihin* *can*. *Vaha* *ca* *jacoto* ndo tsi *ñi* tyin *ña* *vaha* tsa *javahá* *ñi*.

<sup>12</sup> Tyin *cahán* nuu yo *cahan* yo tsa *javahá* *xeehe* *ñi*.

<sup>13</sup> Maa tyin *quivi* *quita* tsa *yihí* *xeehe* nu *nditsin*, *tacan* tan *catsi* *xaan* *cua* *nyehe* yo. Tyin tsa *nditsin* Nyoo *cua* *tava* tsi *tandihí* tsa *yihí* *xeehe*.

<sup>14</sup> *Yacan* *cuenda* *iyó* nu *catyí* tsi:

*Ndoto* *yoo* *ho* tsa *quixí* *un*, *nduvita* *mahñu* nu *yucú* *ndiyi*.

Tan ra *Cristo* *cua* *jandunditsin* ra *ñuhu* nu *cuahán* *un*, *catyí* tsi.

<sup>15</sup> *Yacan* *cuenda* *jaha* ndo *cuenda* *cuhva* *iyó* ndo. Tan *ña* *coo* ndo tumaa *iyó* ra *soho*. *Coo* ndo tumaa *iyó* ra *tsitó*.

<sup>16</sup> Tan *nducu* ndo *cuhva* *cahan* ndo *tuhun* Nyoo *tsihin* *nyivi* *tandihí* *ñi* *cuhva* tsa *nuña* ndo, *cahan* ndo tyin *vityin* maa *ñi* maa tsa *caquiñi* *javahá* *ñi*.

<sup>17</sup> *Yacan* *cuenda* *ña* *soho* *coo* ndo. *Nducu* ndo *cuhva* *cutuñi* *iñi* ndo *cuhva* *cuñi* maa *Jutu* *Mañi* yo.

<sup>18</sup> *Ña* *coho* ndo *nyixi* tan *cuví* ndo ra *tsiñi* tyin *cuví* *jativí* *yacan* tsi ndo. Maa tyin *cuhva* ndo tsi ndo *cundaca* *ñaha* *Tatyí* *Ii* Nyoo.

<sup>19</sup> *Ca* *han* ndo *tsihin* *tahan* ndo maa *ñi* tsa *vaha*, tan *jacahnu* ndo tsi Nyoo. *Ca* *ta* ndo *salmo* *cuenda* ra; *ca* *ta* ndo *yaa* Nyoo; *ca* *ta* ndo tsa *tsahá* *Tatyí* *Ii* tsi ndo; *jacahnu* ndo tsi *Jutu* *Mañi* yo *tsihin* *tandihí* *añima* ndo.

<sup>20</sup> *Tacan* *ñi* *nacuhva* ndo *tyahvi* *nyoo* tsi Nyoo *Jutu* yo tsa *cuenda* *tandihí* maa, a *sii* *cuñi* ndo, o *nyehé* ndo *tundoho*. *Nacuhva* ndo *tyahvi*

nyoo tsi ra tsihin ndatu tsa tsaha Jutu Mañi yo Jesucristo tsi yo.

*Nacaa taahán tsi coo yo tsihin nyivi yo*

<sup>21</sup> Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaá yahvi ndo tsi Nyoo

<sup>22</sup> Nyooho tsa iyó yii, tyaa yahvi ndo tsa caahán yii ndo tumaa tsa tyaá yahvi ndo tsa caahán Jutu Mañi yo.

<sup>23</sup> Tyin rayii cuví ityi nuu tsihin ñasihi ra, tumaa cuví ra Cristo ityi nuu tsihin nyivi yihí cuenda ra. Juvín ñi maa ra jacacú tsi yo tsa cuví yo cuñu ñuhu ra.

<sup>24</sup> Yacan cuenda tumaa tsa cuví ra Cristo ityi nuu tsihin nyivi yihí cuenda ra, tacan taahán tsi tyaá yahvi ñaha tsi yii ña.

<sup>25</sup> Tan nyooho rayii, cuñi tsi tsa cuñi ndo tsi ñasihi ndo tumaa cuñi ra Cristo tsi yo tsa yihí yo cuenda ra, tan tsaha ra ñayivi ra tsa cuenda yo.

<sup>26</sup> Tacan javahá ra tan jandundií ra añaima yo tsihin tuhun caahán ra tsa cuví tumaa ndutya, tan nacatya ra tsi yo quivi tsa natsinu iñi yo tsi ra.

<sup>27</sup> Ndoq añaima yo tumaa ndoó iin jahma, ña nyayu ca tsi, ña tiyi ca tsi. Tyin ra Cristo jandundií ra tsi yo tsa cuví yo nyivi yihí cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo.

<sup>28</sup> Tacan taahán tsi cuñi rayii tsi ñasihi ra, tumaa tsa cuñi ra cuñu ñuhu maa ra. Tyin tatun cuñi ra tsi ñasihi ra, cuñi ra tsi maa ra.

<sup>29</sup> Tyin ndi intuhun yo tan ña cuví tsa ña cuñi yo cuñu ñuhu yo, tyin jacatsí yo tan jacunditsí yo cuñu ñuhu yo. Tan ra Cristo juvin ñi tacan javahá ra tsihin nyivi yihí cuenda ra.

<sup>30</sup> Tyin cuñu ñuhu ra cuví yo. Tan intuhun intuhun yo cuví yo juhva cuñu ñuhu ra tan yiqui ra.

<sup>31</sup> Catyí tuhun Nyoo: “Rayii taahán tsi nacoo ra tsi jutu ra tan tsi sihi ra, tan ndu iin ra tsihin ñasihi ra. Tan

intuhun ña cuñu ñuhu cua cuví tsa nduvi ñi.”

<sup>32</sup> Xeehe xaan tan cahnu xaan tuhun ihya, tan catyí yu tyin cuñi tsi catyí tyin ra Cristo ndu iin ra tsihin nyivi yihí cuenda ra tumaa ndu iin iin rayii tsihin ñasihi ra.

<sup>33</sup> Tan inga tucu tuhun, cuñi tsi catyí tyin intuhun intuhun ndo taahán tsi tsa cuñi ndo ñasihi ndo, tumaa cuñi ndo tsi maa ndo. Tan nyooho ñiñaha, tyaa yahvi ndo tsi yii ndo.

## 6

<sup>1</sup> Nyooho tsa nyihi, tyaa soho ndo tsa caahán jutu ndo tan sihi ndo. Tyin tacan taahán tsi javaha ndo.

<sup>2-3</sup> Tyin nu tutu Nyoo catyí tsi tye-hen: “Jaha tsa ñayivi tsi jutu un tan sihi un”, tan tuhun ihya cuví tsa jihna ñi catyí Nyoo tyin javaha yo tan cua ñihi yo tsa cua cuhva ra tsi yo. Tyin tyaá ra cuhva tyin tun javaha yo tacan, sii xaan cua coo yo tan cuaha xaan quivi cua coo yo nu ñuhu ñayivi ihya.

<sup>4</sup> Tan nyooho tsa iyó sehe, ña javaha ndo tsa ña vaha tsi sehe ndo tan cuxaan iñi tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

<sup>5</sup> Tan nyooho tsa cuví musu, tyaa yahvi ndo tsi ra yihí ndaha tsi ndo nu ñuhu ñayivi ihya. Jaha ndo tsa ñayivi tsi ra naha tsihin tsa ñi iñi añaima ndo. Tan nducu ndo cuhva tyaa yahvi ndo tsi ra naha tumaa tyaá yahvi ndo tsi ra Cristo.

<sup>6</sup> Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyí tsitoho ndo tyin vaha xaan ndo. Jaha tyiñu vaha nyooho tumaa tsatyin tyiñu ra Cristo javahá ndo. Tacan tan cua javaha ndo cuhva cuñi Nyoo tsihin tsa ñi iñi añaima ndo.

<sup>7</sup> Jaha tyiñu ndo tsihin tsa sii cuñi ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi.

<sup>8</sup> Tyin tsitó ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuví ndo o ñavin musu cuví ndo.

<sup>9</sup> Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña sñin caá iin nyívi tan inga ñi nuu ra.

*Tunyee iñi tsa tsahá Nyoo tsi yo tsa yihí yo cuenda ra*

<sup>10</sup> Tan vityin ço ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra.

<sup>11</sup> Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu.

<sup>12</sup> Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayívi, tyin cañi tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyívi caquiñi.

<sup>13</sup> Yacan cuenda jaha cuenda vaha ndo tsi ndo tsihin tandihi tsa jatyinyee Nyoo tsi yo. Tyin tacan tan cunyee iñi ndo quívi nducu cuhva nu ña vaha tsi ndo. Tan ña cua nduva ndo jaha nu.

<sup>14</sup> Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan caca vaha ndo ityi tsa nditsa cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra.

<sup>15</sup> Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyívi.

<sup>16</sup> Tan casi vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo.

<sup>17</sup> Ra andaru iyó iin caa ndasí jiñi ra tan jacacú can tsi ra, tacan cuví tsa jacacu Nyoo tsi yo. Cuatyíñu vaha ndo tuhun Nyoo tyin yacan cuví tumaa mityi tsahá Tatyí Ii Nyoo tsi ndo.

<sup>18</sup> Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí Ii ra tsi ndo. Yacan cuenda ña ndu uvi iñi ndo tan ço nyito vaha ndo, ndacan tahvi ndihí ndo tsi Nyoo tsa cuenda tandihí nyívi yihí cuenda ra.

<sup>19</sup> Tan ndacan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyívi. Tyin tsanaha yihí xeehe tuhun ihya tan vityin cua nacoto ñi itsi.

<sup>20</sup> Tan tsa cuenda tsa jacotó yu tuhun ra Cristo, nyíi yu vehe caa ihya vityin. Ndacan tahvi ndo tsa cuenda yu, na ña nayuhví yu, tan cahan yu cuhva taahán maa tsi cahan yu.

*Nu jacuhún ra Pablo tsi ra Tíquico nu yucú nyívi yihí cuenda ra Cristo*

<sup>21</sup> Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Nñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra.

<sup>22</sup> Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin iñi ndo.

<sup>23</sup> Na cuhva Nyoo Jutu yo tan Jutu Mañi yo Jesucristo tsa taxin coo añañima tandihí ra yañi yo naha ra tan na tsinu ca iñi ra naha tsi ra tan na cuñi ra naha tsi nyívi.

<sup>24</sup> Tan na nasoco xaan Nyoo tsi tandihí nyooho tsa cuñi tsi Jutu Mañi yo Jesucristo. Ña jandihí ndo tsa cuñi ndo tsi ra.

Tan na cuví tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo Ñuu Filipos,

*Nyii ra Pablo vehe caa, tan javaha  
ra iin carta tan jacuhun ra tsi nyivi yihí  
cuenda Nyoo ñuu Filipos*

<sup>1</sup> Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo ñuu Filipos tan cuví ndo nyivi cuenda Nyoo tan iin ñi cuví ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo ñima.

*Nu tsicán tahvi ra Pablo tsa cuenda  
ñi yihí cuenda Nyoo ñuu Filipos*

<sup>3</sup> Tandihí ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo.

<sup>4</sup> Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa siñi cuñi ñima yu.

<sup>5</sup> Tyin nda quivi jihna tsa tsiñi ndo tuhun ra Cristo tan nda vityin tan ña jandihí ndo tsa jatyinyeé ndo tsi yu. Tyin iin caa ñi jacotó yo tuhun ra Jesucristo tsi nyivi.

<sup>6</sup> Tsitó vaha yu tyin tumaa tsa quitsaha javahá Nyoo tsa vaha tsitsi ñima ndo, tacan cua javaha ca ra nda cuenda quivi quitsi ra Jesucristo inga tsaha.

<sup>7</sup> Taahán tsi tsa caca iñi yu tacan tsa cuenda ndo, tyin cuñi xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyii yu vehe caa ihya, tan vasu ndi maa cuhun yu nuu ra cumí tyiñu naha ra, maa tyin jacotó yu tuhun Nyoo tsi ra yucú vehe

caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo.

<sup>8</sup> Nyoo tsitó ra tyin cuñi xaan yu tsi tandihí nyooho tumaa tsa cuñi maa ra Jesucristo tsi ndo.

<sup>9</sup> Tan tsicán tahvi xaan yu tsi Nyoo na cuñi ca ndo tsi ra tan na cundahvi ca iñi ndo tsi nyivi. Tan nacoó ca tsa nyityi Nyoo tsi ndo, tan cutuñi ca iñi ndo,

<sup>10</sup> tyin tacan tan cuvi ñihi ndo tsa vaha tsi Nyoo. Tan ña cua coo ca cu- atyi ndo tan cuvi coo vaha ndo tsihin tuhun Nyoo nda cuenda quivi quitsi ra Cristo.

<sup>11</sup> Maa ra cua jatyinyee tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

*Maa ñi maa tyiñu Nyoo javahá ra  
Pablo tyin iyó ra Cristo ñima ra*

<sup>12</sup> Yañi, cuñi yu tsa coto ndo tyin tandihí tundo ho taahán yu, jatyinyeé xaan tsi tyin nducuaha ca nyivi tsinú iñi tuhun Nyoo.

<sup>13</sup> Tan tandihí andaru tsa iyó vehe ra cuví rey tan tandihí nyivi iyó ihya tsitó ñi tyin nyii yu vehe caa tsa cuenda tsa nyicún yu tsi ra Cristo.

<sup>14</sup> Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatyinyeé Nyoo tsi yu nu nyii yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

<sup>15</sup> Tan nditsa tyin yihí ra naha, caahán ra naha tuhun ra Cristo tsa cuenda tyin cuñi ra cunycun nyivi tsi maa ra naha. Tan yihí tucu ra naha caahán ra naha tuhun ra Cristo tsihin nyivi maa tyin tsihin tsa ñi iñi ra naha.

<sup>16-17</sup> Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsi tsi yu ihya. Tyin cahan yu tuhun ra tan jacotó yu tsi nyivi tyin nditsa tsa jacacú ra tsi yo. Tan tsa cuenda tsa cuñi ra naha tsi ra Cristo, yacan caahán ra naha tuhun



ra. Maa tyin inga ra can naha ra ñavin tsa ñi ñi ra naha tan caahán ra naha tuhun ra Cristo, tyin cuñi ra naha na cunyicun cuaha nyivi tsi ra naha tan cuñi ra naha vacu nducu ra naha tsi yu nu nyii yu vehe caa ihya.

<sup>18</sup> Tan ña ndihi ñi yuhu tatun juhva ra naha caahán ra naha tuhun ra Cristo tsihin tsa ña ñi ñi ra naha. Maa tyin yuhu sñi xaan cuñi yu tyin tuhun ra Cristo caahán tandihi ra naha, cuví ñi tsa ñi ñi ra naha caahán ra naha o ñavin.

Tan ndusi ca cuñi yu

<sup>19</sup> tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatyinyeé xaan Tatyí li ra Cristo tsi yu.

<sup>20</sup> Tsitó vaha yu tyin Nyoo cua jatyinyee ra tsi yu tan ña cua nducahan nuu yu, tan ña cua nayuhvi yu cahan yu tuhun ra Cristo tsihin tsa ñi ñi yu. Tan ña ndihi ñi yu, an coo ca yu ñayivi, o cúu yu, maa tyin cuñi yu cahan yu tuhun ra, tahan ñi cuhva tsa tuhvá yu caahán, na nyehe nyivi cuhva iyó yu tan coto ñi tyin ra Cristo cahnu xaan ra cuví ra.

<sup>21</sup> Tyin tsa cuenda yuhu ñayivi tsa iyó yu vityin, ñayivi ra Cristo cuví. Maa tyin tatun cúu yu, cua ñihi yu tsa sñi caa tsa iyó gloria.

<sup>22</sup> Tan tatun coo ca yu, vaha xaan. Tyin tacan tan cuví jañihi ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cucahan ca yu tuhun Nyoo tsihin nyivi, ña tsitó yu.

<sup>23</sup> Yñi xaan cuñi yu tan quihin yu ndáa ityi cahun yu tyin tsa cuñi yu cahun yu cunyaa yu tsihin ra Cristo. Tyin vaha ca yacan.

<sup>24</sup> Maa tyin tsa cuenda nyooho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo tuhun Nyoo.

<sup>25</sup> Yacan cuenda tsitó yu tyin cua ndoo yu juhva ca quivi ihya. Tyin cuñi tsi tsa jatyinyeé ca yu tsi ndo tan cuví cahun ndo ityi nuu ca tan cusñi ca ñi ndo tsihin tsa tsinú ñi ndo tsi

Nyoo.

<sup>26</sup> Tacan tan cua nyehe ndo tsi yu inga tsaha, tan sñi xaan ca cua cuñi ndo tsa cuenda yu tyin iin caa ñi iyó yu tsihin ra Cristo.

<sup>27</sup> Cuñi tsi tsa coo yu cuhva taahán tsi coo nyivi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñi yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu ñi nyivi tuhun ra Cristo.

<sup>28</sup> Maa tyin nyivi xaan ñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacu nyooho jahá Nyoo.

<sup>29</sup> Tyin tsahá ra ndatu tsa tsinú ñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo.

<sup>30</sup> Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehe yu tundoho, tan vityin tsitó tucu ndo tyin ña jandihí yu tsa caahán yu tuhun Nyoo.

## 2

*Cuca xaan ra Cristo, maa tyin quitsi cúu ra tumaa iin ra ndaahvi*

<sup>1</sup> Nditsa tyin ra Cristo jandu iin xaan ra ñi yo tsa iin ñi cuví yo tsihin ra. Tan vaha cuñi yo tsa cuenda tsa cuñi ra tsi yo. Tan nditsa tucu tyin iyó Tatyí li Nyoo tsihin yo. Tan nditsa tucu tsa ndaahvi cuñi yo nyehé yo tsi nyivi tahan yo. Tatun nditsa tandihi yacan,

<sup>2</sup> Cuhva ndo tsa cusñi ca ñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñi ra Cristo tsi yo. Tan iin ñi cuhva çaca ñi ndo. Tan iin ñi tsa vaha javaha ndo.

<sup>3</sup> Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyivi. Tan náa javaha ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin

vaha ca inga nyivi tan ñavin ca maa yo.

<sup>4</sup> Tan intuhun intuhun yo caca iñi yo tsa cuenda tsa vaha tsi inga nyivi, tan ñavin tsa cua jatyinyee tsi maa ñi maa yo.

<sup>5</sup> Caca iñi yo tumaa tsicá iñi maa ra Cristo Jesús.

<sup>6</sup> Tyin nu quitsi tsi tsanaha tsa ndi cumañi ca quitsi ra nu ñuhu ñayivi, cuví ra tahan ñi maa cuví Nyoo. Maa tyin ña tsicá iñi ra tsa nacoo ra yacan.

<sup>7</sup> Tan tyaa tsiyo ra tandihi tunyee iñi ra tan tandihi tsa cuca ra. Tan quitsi ra nanduvi ra iin nyivi ndaahvi nu ñuhu ñayivi ihya quivi tsa cacu ra.

<sup>8</sup> Tan tsa nanduvi ra iin rayi, tan ndaahvi jaha ra tsi ra tan tyaa yahvi vaha ra tsi Nyoo nda cuanda tsaha ra tsa cahñi nyivi tsi ra nu cruu. Tumaa iin ra caquiñi, tacan jaha ñi tsi ra, tan tahan ra ticanuu tyin tsahñi ñi tsi ra nu cruu.

<sup>9</sup> Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuví tan ñavin ca tandihi sivi.

<sup>10</sup> Tyin tatun tsiñi yo sivi ra Jesucristo, tandihi yo tan cua cuiñi tsiti yo. Tan tandihi tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihi yacan cua jacahnu tsi ra.

<sup>11</sup> Tyin tandihi tsa iyó, cua nacoto tan cua cahan tyin ra Jesucristo cuví ra ndacá ñaha tsi tandihi maa tsa iyó. Tacan tan cua nyehe tsi tyin cahnu xaan ca cuví maa Nyoo Jutu yo.

*Nyivi yihí cuenda Nyoo cuví ñi tumaa iin ñuhu tsa jandunditsín nu ñuhu ñayivi ihya*

<sup>12</sup> Yacan cuenda, yañi tsa cuñi xaan yu, tumaa tsa tyaa yahvi ndo tsi yu quivi tsa tsinyii yu tsihin ndo, tacan ñi taahán tsi tyaa yahvi ndo tsi yu vasu ndi maa tsa cañi nyii yu vityin. Nducu ndo cuhva na nyehe nyivi tyin nditsa tsa jacacú Nyoo tsi yo. Tan jaha vaha ndo cuenda cuhva coo ndo tsihin ra.

<sup>13</sup> Tyin maa Nyoo tyihí tsa vaha aña ndo. Tan jatyinyeé ra tsi ndo tyin tacan tan cuví tyaa yahvi ca ndo

tsa caahán ra tan javahá ndo cuhva cuñi ra.

<sup>14</sup> Tatun cua javaha ndo náa tsa cua javaha ndo, nducu jihna ndo cuhva tsa ña cahan yuhu tahan ndo. Tan ña cañi tahan ndo.

<sup>15</sup> Tacan tan ña cua coo cuatyí ndo. Taahán tsi cuvi ndo nyivi cuiti iyó, taahán tsi cuvi ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñi tsi tsa cuví ndo tumaa iin ñuhu tsa jandunditsín nu naa nu ñuhu ñayivi ihya.

<sup>16</sup> Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quivi cua quitsi ra Cristo, yuhu ñi vaha cua cuñi yu tsa cuenda ndo, tyin ña jacoto cuatu yu tuhun Nyoo tsi ndo.

<sup>17</sup> Tan vasu cahñi nyivi tsi yu tsa catyi tuhun Nyoo, maa tyin cua cuvi tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusii iñi yo tsihin ra.

<sup>18</sup> Tan yacan cuenda taahán tsi tsa cusii iñi ndo tsihin yu.

*Nu jacahun ra Pablo tsi ra Timoteo tan ra Epafrodito ñuu Filipos*

<sup>19</sup> Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsaa ra inga tsaha nu nyii yu sii xaan cua cuñi yu. Tyin cua nacatyí tuhun ra tsihin yu nácaa yucú ndo.

<sup>20</sup> Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yoñi inga ra tsa tsicá iñi tacan.

<sup>21</sup> Tyin tandihi ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús.

<sup>22</sup> Maa tyin tsitó ndo tyin ra Timoteo, vaha cuahán ra tsihin Nyoo, tan tsa cuenda yuhu, cuví ra tumaa sehe yu. Tan jatyinyeé xaan ra tsi yu tsa caahán ndi tuhun ra Cristo tsihin nyivi.

<sup>23</sup> Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumi tyiñu, tatun ña naha ca cunyii yu ihya.

<sup>24</sup> Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

<sup>25</sup> Tan ra Epafrodito, yañi yo tsa jaquitsi ndo tsa jatyinyee tsi yu tsihin tyiñu tsa javahá yu, iin caa ñi cuví ndi andarú ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo.

<sup>26</sup> Cuñi xaan ra quitsi nuhu ra nu yucú ndo, tyin tsicá xaan iñi ra tsa tsitó ndo tyin nacuhvi ra.

<sup>27</sup> Nditsa ñihi xaan nacuhvi ra tan tsa cua cúu maa ra cuví. Maa tyin Nyoo cundahvi iñi tsi ra, tan tsi tucu yuhu tyin na ña nducuihya xaan ca iñi yu.

<sup>28</sup> Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra.

<sup>29</sup> Yacan cuenda, naquihin ndo tsi ra tsihin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra.

<sup>30</sup> Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuuhvi xaan ra, maa tyin ña cuñi ra jandihí ra tsa jatyinyee ra tsi yu. Tyin maa ndo ña cuví quitsi ndo tan jatyinyee ndo tsi yu tyin cañi xaan yucú ndo.

### 3

#### *Nu janahá ra Pablo nácaa nduvaha yo nuu Nyoo*

<sup>1</sup> Tan vityin yañi, cusii iñi ndo tsihin Jutu Mañi yo. Tsa cuenda yuhu nduve tsihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi.

<sup>2</sup> Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo.

<sup>3</sup> Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi ra. Tan jacahnú yo tsi ra tsihin Tatyí Ii ra tsa iyó añima yo. Tan cusii iñi yo tyin cuenda maa ra Cristo Jesús yihí yo. Tan ña nyitá iñi yo tyin cacu yo tsihin náa cunyaa cuñu ñuhu yo.

<sup>4</sup> Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yaha cacu tan ñavin ca tandihí ra tsa javaha yacan vityin.

<sup>5</sup> Tyin una quivi yu tan tsinyaa tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihí yu. Juvín ñi tata nyivi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quivi can, tyin ra fariseo cuví yu.

<sup>6</sup> Tan tsa cuenda tsa cuñi yu tyaa yahvi yu ley, tan tsinyaa ndaha xaan yu tsi ñi yihí cuenda ra Cristo. Tan tyaa yahvi yu tandihí maa ley tsahnu, tyin nducu xaan yu cuhva tyaa yahvi yu tsa caahán ley can.

<sup>7</sup> Maa tyin tandihí tsa cuñi maa yu tyin cahnu xaan cuví quivi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu.

<sup>8</sup> Tan inga tucu tuhun, tandihí tsa javaha yu, tsitó maa yu tyin nduve ca yahvi nyaá yacan tyin tsa nacoto yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandihí tsa javaha yu quivi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihí can. Tyin cuñi yu coto vaha ca yu tsi ra Cristo.

<sup>9</sup> Tan cuñi yu ndu iin ca yu tsihin ra. Tsinú iñi yu tyin jacacú ra tsi yu, yacan cuenda nduvaha iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda

tsa tsinú iñi yo, ra Cristo naquihín cuenda ra tsi yo.

<sup>10</sup> Tsa coto vaha ca yu tsi ra Cristo, yacan cuví tsa cuñí yu. Tyin Nyoo janandoto ra tsi ra Cristo tsihin tunyee iñi ra. Tan cuñí yu tyin coo ca tunyee iñi can tsi yu. Tan cuñí yu cunyeé iñi yu tundoho tsa taahán tsi nyehé yu tsa cuenda ra. Tan cuñí yu nacuhva cuenda yu tsi yu tumaa maa ra Cristo nacuhva cuenda ra tsi ra tan tsihi ra.

<sup>11</sup> Tyin nducú xaan yu cuhva nan-doto yu tsa yaha cúu yu.

### *Nacaa cunyicun ñihi ca yo tsi Nyoo*

<sup>12</sup> Ña catyí yu tyin nduve ca tsa cumañí tsi yu, tan vaha xaan yu. Maa tyin cuahán yu ityi nuu ca. Tyin cuñí yu naquihin yu tsa cahan ra Cristo tyin cuhva ra tsi yu. Tyin jihna ca maa ra cahan tsihin yu.

<sup>13</sup> Yañi, ña catyí yu tsihin ndo tyin tsa ñihi yu tandihi tsa vaha can. Maa tyin iyó intuhun ñi tsa javahá yu; nacoó yu ityi tsata tandihi tsa javahá yu, tan jañiñi yu cuhun yu ityi nuu ca.

<sup>14</sup> Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

<sup>15</sup> Tacan taahán tsi caca iñi tandihi nyivi tsa ñihi nyaá tsihin Nyoo. Maa tyin tatun ñavin tacan tsicá iñi ndáa nyooho, Nyoo cua cuhva ra tsa cutuñi iñi ndo.

<sup>16</sup> Maa tyin iyó iin tsa cuñí tsi tsa tyaa yahvi vaha yo, tuhun tsa tsa yaha jacoto Nyoo tsi yo.

<sup>17</sup> Yañi, javaha ndo cuhva iyó yu tan cuhva caahán yu. Tan nyehe vaha ndo cuhva iyó nyivi iyó cuhva janahá ndi tsi tandihi nyivi.

<sup>18</sup> Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihya cuñí yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin

tumaa tsa ña cahnu cuví tsa tsihi ra Cristo nu cruu jahá ra naha.

<sup>19</sup> Maa tyin quivi quitsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñí cuñu ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihya.

<sup>20</sup> Maa tyin yoo nda gloria cuví nu iyó ñuu yo. Tan ndatú yo quivi quitsi nyico Jutu Mañi yo Jesucristo, ra jacacú tsi yo.

<sup>21</sup> Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihi tsa iyó.

## 4

### *Tacan ñi maa na cusii iñi yo tsihin Jutu Mañi yo*

<sup>1</sup> Yañi, cuñí yu tsi ndo. Tan cuñí xaan yu nyehe yu tsi ndo. Sii xaan cuñí yu tsihin ndo. Tan tsitó yu tyin ña cahan cuatu yu tuhun Nyoo tsihin ndo. Tyin ní xaan iñi ndo nyicún ndo tsi ra. Tan jañihi ca ndo cunyicun ndo tsi ra.

<sup>2</sup> Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñí Jutu Mañi yo.

<sup>3</sup> Tan yooho, yañi, tsa iin caa ñi jahá tyiñu tsihin yu, cuñí yu tyin jatyinyee un tsi ñi cuhva yo ihya. Tyin juvin ñi jatyinyee xaan tsi yu nu cahan yu tuhun Nyoo, maa tyin ñavin intuhun ñi yu jatyinyee ñi, tyin jatyinyee ndihi ñi tsi ra Clemente tan tsi tandihi ca ra tsa cutahán tsihin ndi. Tan sivi tandihi ñi tsa nyaá nuu tutu Nyoo nda gloria.

<sup>4</sup> Cusii iñi ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusii iñi ndo tsihin ra.

<sup>5</sup> Coo vaha ndo tyin tacan tan nyehe tandihi nyivi tyin nditsa tyin nyivi vaha cuví ndo. Tan nducuhun iñi ndo



tyin tsa yatyin cua quitsi Jutu Mañi yo.

<sup>6</sup> Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihí tundoho tsa iyó ndo. Tan ndacan ndo tsi ra nacuhva ra tandihí tsa tsiñí ñuhu tsi ndo. Tacan tan ña nacoo ndo tsa tsahá ndo tyahvi nyoo tsi ra.

<sup>7</sup> Tan Nyoo cua cuhva ra tsa taxin coo añima ndo. Tan cahnu xaan tsa vaha cuví yacan. Tan yoñi cuví cutuñi iñi nácaa tsa cahnu tsi. Tan tsa taxin iyó tsi Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

*Na caca iñi yo maa ñi maa tsa vaha*

<sup>8</sup> Nu cua ndihí tuhun, yañi, caca iñi ndo maa ñi tsa nditsa, maa ñi tsa ndaa, tsa cuñi iyó, tan tsa ndoo iyó. Ña caca iñi ndo tsa caquiñi. Caca iñi ndo tsa siñ caa, maa ñi tsa vaha, tan maa ñi cuhva cuví jacahnu ndo tsi Nyoo.

<sup>9</sup> Javaha ndo tsa jacuaha yu tsi ndo. Tuhun tsa cahan yu tsiñi ndo, tan tsa javaha yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

*Nu jatyinyeé nyivi ñuu Filipos tsi ra Pablo tsihin tsa iyó tsi ñi*

<sup>10</sup> Siñ xaan cuñi yu. Tan jacahnú yu tsi Jutu Mañi yo tsa cuenda tsa jatyinyeé xaan ndo tsi yu inga tsaha. Tan tsitó yu tyin ndihí ñi tsaha tan cuñi ndo jatyinyeé ndo tsi yu. Maa tyin tsicoo juhva quivi ña tsaha tsi cuhva tsa jatyinyeé ndo tsi yu.

<sup>11</sup> Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhva maa yu tsa cusí iñi yu tsihin náa tsa iyó tsi yu.

<sup>12</sup> Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha.

<sup>13</sup> Tandihí tan cuví jaha yu tsihin tunyee iñi tsa tsahá ra Cristo tsi yu.

<sup>14</sup> Tan nyooho yañi, vaha xaan tsa javaha ndo tyin jatyinyeé ndo tsi yu quivi tsa tsicoo yu tundoho.

<sup>15</sup> Tsa tsitó nyooho nyivi Filipos nácaa cuví quivi quitsaha caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuví nyivi tsa jatyinyeé tsi yu tsihin xuhun, tyin vaha xaan cuñi ndo tsa cahan yu tuhun Nyoo tsihin ndo.

<sup>16</sup> Tan tsitsi tsa nyi yu ñuu Tesalónica, ñavin intuhun ñi tsaha jatyinyeé ndo tsi yu.

<sup>17</sup> Ñavin tsa tsicá iñi yu tsa jatyinyeé ndo tsi yu, tyin tsa cuñi yu tsa jatyinyeé ndo tsihin tyiñu Nyoo, tacan tan cuaha ca cua nasoco Nyoo tsi ndo.

<sup>18</sup> Tan vityin, nduve tsa cumañi tsi yu. Nda cua ndoo ca tsa jaquitsi ndo tsi yu tsihin ra Epafrodito. Tan tsa tsaha ndo can cuví tsi tumaa xico tami, xico vaha tsa tsaa nuu Nyoo. Yacan cuví tsa taahán iñi ra.

<sup>19</sup> Tan Nyoo cua cuhva ra tandihí tsa tsiñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo.

<sup>20</sup> Na jacahnu yo tsi Nyoo Jutu yo tacan ñi maa. Tan na cuví tsi tacan ñi.

*Nu jacuhún ra Pablo nacumi tsi nyivi ñuu Filipos*

<sup>21</sup> Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsí tucu ra yañi yo tsa yucú tsihin yu ihya nacumi tsi ndo.

<sup>22</sup> Tan nyivi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyivi yihí cuenda Nyoo ñuu ihya jaquitsí ñi nacumi tsi ndo.

<sup>23</sup> Na nasoco maa Jutu Mañi yo Jesucristo tsi tandihí ndo.

Tan na cuví tsi tacan ñi.

## Carta Tsa Jacuhun Ra Pablo Tsi Nyivi Yihí Cuenda Nyoo Ñuu Colosas

### *Nu quitsaha javahá ra Pablo carta*

<sup>1-2</sup> Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo ánimo ndo.

### *Nu tsicán tahvi ra Pablo tsa cuenda nyivi yihí cuenda ra Cristo*

<sup>3</sup> Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo.

<sup>4</sup> Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo.

<sup>5</sup> Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo.

<sup>6</sup> Tan juvin ñi maa tuhun ra Cristo tsa cahan ra Epafra tsihin ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiñi ndo tuhun ra Cristo tsitó ndo tyin nditsa tsa cuñí Nyoo tsi ndo.

<sup>7</sup> Yacan janaha ra Epafra tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo.

<sup>8</sup> Tan juvin ra catyí tuhun tsihin ndi tyin cuñí xaan ndo tsi nyivi tahan

ndo, tyin maa Tatyí Ii Nyoo tsahá tsa vaha can coo ánimo ndo.

<sup>9</sup> Yacan cuenda nda quivi tsa ñihi tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí Ii ra tan coto vaha ndo náa ndihí tsa cuñí ra tyin javahá ndo.

<sup>10</sup> Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra.

<sup>11</sup> Tan tsicán tucu ndi tsi ra na jatyinyee ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundo, tan na cusí iñi ndo.

<sup>12</sup> Tan na cuhva ndo tyahvi nyoo tsi Nyoo Jutu yo, tyin maa ra tsa janduvaha ra tsi yo tyin tacan tan cuví ñihi yo tsa cua ñihi nyivi tsicá nu nditsin, tan cuñí tsi catyí nyivi tsa cuñi iyó nuu ra.

<sup>13</sup> Tyin Nyoo tava ra tsi yo nu naa tan nacuhvá cuenda ra tsi yo tsi Sehe ra tsa cuñí xaan ra tyin cundaca ñaha ra tsi yo.

<sup>14</sup> Tan jata ra tsi yo tsihin ñiñi Sehe ra tan jahá ra tucahnu iñi tsi yo.

### *Tsa cuenda tsa tsihi ra Cristo nu cruu tsacatyí cuatyí yo tan nduvaha iyó yo tsihin Nyoo*

<sup>15</sup> Nyoo ña nyehé yo tsi ra. Maa tyin nanduvi ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinú ñuhu ñayivi tan tsa iyó maa ra Cristo.

<sup>16</sup> Tan maa ra javaha tandihí tsa iyó andivi tan nu ñuhu ñayivi jahá Nyoo. Javaha ra tsa cuví nyehe yo tan tsa ña cuví nyehe yo. Javaha ra tandihí tatyí vaha tan tatyí ña vaha tsa ndacá ñaha andivi tan nu ñuhu ñayivi ihya. Tan tandihí yacan javaha ra tyin cuatyíñu ra cuhva cuñí ra.

<sup>17</sup> Tan tsa iyó maa ra tsa ndi cumañi ca coo tandihí maa tsa iyó. Tan tandihí tsi jahá tyiñu vaha tsi jahá ra.

<sup>18</sup> Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandoto tsa jihna ca, tyin tacan tan quihí ndaha ra tandihí tsa iyó.

<sup>19</sup> Tyin Nyoo cuñi ra tsa cuvi ra Cristo tumaa cuví maa ra.

<sup>20</sup> Tan tsahá ra tsi ra Cristo tsa cúu ra nu cruu tyin tacan tan cuvi coo vaha tandihí tsa iyó tsihin ra, tahan ñi tsa iyó nu ñuhu ñayivi tan andivi.

<sup>21-22</sup> Tahan tsanaha javahá ndo tsa ña vaha tan xaan cuñi ndo nyehe ndo tsi Nyoo. Maa tyin Nyoo jaquitsi ra tsi ra Cristo, Sehe ra tan tsahá cuenda ra cuñu ñuhu ra tan tsihi ra nu cruu. Tan janacoq vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra.

<sup>23</sup> Yacan cuenda jañihi ca ndo tsinú iñi ndo. Tan cuita iñi ndo tyin cua tsa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha tani cahnu ñuhu ñayivi. Tan yuhu ra Pablo jatyinyeé yu caahán yu tuhun ihya tsihin nyivi.

*Nu catyí ra Pablo tyin nyaá siqui ra tsa janahá ra tuhun ra Cristo tsi tandihí nyivi tsicá vehe ñuhu*

<sup>24</sup> Vityin sii cuñi yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehe ra tsa cuenda yo tsa cuví yo cuñu ñuhu ra. Tacan tan cua jaquita ndihí yu tundoho tsa nyehe ra.

<sup>25</sup> Yuhu cuví iin ra caahán tuhun ra Cristo tyin tacan jatyinyeé yu tsi tandihí nyivi yihí cuenda ra. Tyin maa ra Nyoo catyí tsa cahan yu tandihí tuhun ra tsa cuenda tsa vaha tsi ndo.

<sup>26</sup> Jacuahá yu tuhun tsa tsicumí xeehe Nyoo tahan tsanaha, tsa ndi cumañi ca javahá ra ñuhu ñayivi. Tan

vityin tsahá ra tsa nacoto nyivi yihí cuenda ra itsi.

<sup>27</sup> Tan nyooho tsa ñavin nyivi Israel cuví cuñi ndihí ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añaima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

<sup>28</sup> Tuhun maa ra Cristo caahán ndi. Tan tsahá cuenda ndi tuhun ihya tsi tandihí nyivi. Tan jacuahá ndi tsi tandihí ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo.

<sup>29</sup> Tan tsa cuenda tsa cuñi yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

## 2

<sup>1</sup> Tan cuñi yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihí ndo tan tsa cuenda nyivi ñuu Laodicea, tan tsa cuenda tandihí nyivi tsa ñaha ca nyehe tsi yu.

<sup>2</sup> Tsicán yu tsi ra na jandu iin ra iñi añaima ndo, tan jandu iin ra tsi ndo tsihin tsa cuñi tahan ndo tsi ndo. Tan na cuhva ra tsa cutuñi vaha iñi ndo nacuenda jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumí xeehe Nyoo tahan tsanaha, tan vityin jacotó ra itsi tsi yo.

<sup>3</sup> Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo.

<sup>4</sup> Caahán yu tyehen tsihin ndo tyin tacan tan ña jandavi ñaha nyivi tsi ndo tsihin tuhun tsa sii natuhún ñi.

<sup>5</sup> Vasu nduve yu nyii tsihin ndo, maa tyin ñuhú xaan iñi yu tsi ndo. Tan sii xaan cuñi yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

<sup>6</sup> Yacan cuenda tumaa natsinu iñi ndo tsi ra Cristo quivi nañihí ndo tsi ra, tacan cuñi tsi coo ndo tsihin ra.

<sup>7</sup> Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi

ndo tsi ra, tumaa cutuhva ndo. Tan iin nyita ñi nacuhvá ndo tyahvi nyoo tsi Nyoo.

*Ñayivi nyito tsa tsahá ra Cristo tsi yo*

<sup>8</sup> Jaha ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsiñú iñi ñi cuhva tsicá iñi nyivi.

<sup>9</sup> Yacan ña tsinu iñi ndo tsa caahán ñi tyin ra Cristo juvin ra cuví Nyoo tan cuví tucu ra nyivi.

<sup>10</sup> Tan tsitu ndo tsihin Nyoo tyin iin ñi cuví ndo tsihin ra Cristo. Tan maa ra ndacá ñaha tandihi tsa ndacá ñaha nu ñuhu ñayivi tan tandihi tatyí tsa ña nyehé yo.

<sup>11</sup> Tan tsa iin ñi cuví ndo tsihin ra Cristo, nda quivi natsinu iñi ndo tsi ra, tan nanduví ndo nyivi ra. Maa tyin ña nanduví ndo nyivi ra tsa cuenda tsa tsinyaa tuñi ra cuñu ñuhu ndo, tyin jacacu ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaá ra Cristo tsi ndo:

<sup>12</sup> Quivi tsicoondutya ndo tsitsi ndutya, tumaa tsa tsihi ndo tsihin ra Cristo tan quihvi ndo tsitsi ñuhu cuví can. Tacan tan nandoto tucu ndo tsihin ra tyin tsinú iñi ndo tyin Nyoo janandoto tsi ra tsihin tunyee iñi ra.

<sup>13</sup> Tahan tsanaha cuví ndo tumaa nyivi tsihi jahá cuatyí ndo, tyin nduve Nyoo nyaá añima ndo tan ña tsinyaa tuñi Nyoo cuñu ñuhu ndo. Maa tyin vityin Nyoo jahá ra tucahnu iñi tandihi cuatyí ndo. Tan tsaha ra tsa coo ndo ñayivi nyito tsihin ra Cristo.

<sup>14</sup> Tyin ley tsahnu jaquituví tsi cuatyí yo. Tan catyí tsi tyin taahán tsi cuhun yo anyaya tyin ña tyaá yahvi yo itsi. Maa tyin ra Cristo tsihi ra nu cruu jahá Nyoo tan tsindihí tsa cuhun yo anyaya.

<sup>15</sup> Tan tsa tsihi ra nu cruu jahá canaa ra tsi nu ña vaha tan tandihi ca tatyí ña vaha tsa ndacá ñaha. Tacan tan tsindaca ra tsi nu nuu tandihi nyivi tan nuu ángel tyin na nyehe ñi

tyin cahnu ca cuví maa ra, yacan cuenda jahá canaa ra.

*Na nanducú yo tsa vaha tsa tsahá Nyoo*

<sup>16</sup> Yacan cuenda ña taahán tsi tyaa nyivi cuatyí tsi ndo tsa cuenda tsa tsatsí ndo a tsa cuenda tsa tsihí ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutyá yoo, o quivi quitatú ñi.

<sup>17</sup> Tandihí tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yahá quitsi ra, tan juvin ra jacacú tsi yo.

<sup>18</sup> Ña cuhva ndo tsa casi nyivi nu naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can.

<sup>19</sup> Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihi yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

<sup>20</sup> Tumaa tsa tsihi cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenda tyin iyó ca ndo tumaa iyó nyivi tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu.

<sup>21</sup> Tyin catyí ñi tsihin ndo tyehen: “Ña tñin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo.

<sup>22</sup> Maa tyin ña taahán tsi casi ñi nu javahá ndo yacan tyin tsa jacuahá ñi, maa ñi tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jatívi can tsi ndo nuu Nyoo.

<sup>23</sup> Ñi tsa javahá tandihi can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundo ho cuñu ñuhu ñi.



Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá ñi ñi.

### 3

<sup>1</sup> Tsahá Nyoo ñayivi nyito coo yo tyin nandoto ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo.

<sup>2</sup> Čaca ñi ndo yacan, tan ña čaca xaan ñi ndo tuhun tsa iyó nu ñuhu ñayivi ihya.

<sup>3</sup> Tyin vityin ña javahá ca ndo tsa javahá ndo taħan tsanaha, tyin tsa tsihi ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo.

<sup>4</sup> Tan quivi cua quitsi nyico ra Cristo, ra tsa tsahá ñayivi nyito tsa iyó yo, tacan tan cua nyehe nyivi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

*Nacaa tsicoo yo nu quitsi tsi ityi tsata tan nácaa cuñi tsi coo yo tsihin Nyoo vityin*

<sup>5</sup> Yacan cuenda jandihí ndo tandihí tsa ña vaha tan tsa caquiñi tsa cuñi cuñu ñuhu ndo. Tan ña cusu ndo tsihin iin ñaha tun ñaha ca tindhaha ndo, tahan ñi rayi tan ñaha. Tan ña cuñi ndo coo cuaha ndaha tyiñu ndo tyin tun tsicá ñi ndo yacan, tsitoho jacahnú ndo tan tyaá tsiyo ndo tsi Nyoo cuví can. Tyin tacan javahá nyivi tsa ña yihí tuhun Nyoo, maa tyin nyooho ña taahán tsi javaha ndo tacan.

<sup>6</sup> Tsa cuenda tandihí tsa caquiñi ihya cuxaán xaan Nyoo tsi nyivi tsa ña tyaá yahvi tsa caahán ra. Tan cua tatsi tuñi ra tsi ñi.

<sup>7</sup> Tan juven ñi tacan javahá tucu maa yo quivi tsa ña nacotó yo tsi Nyoo.

<sup>8</sup> Maa tyin vityin ña javaha ca ndo tandihí tsa ña vaha can: ña cuxaan ca ndo. Ña xaan cuñi ndo nyehe ndo tsi nyivi tahan ndo, tan ña jacuñi nyaa ndo tsi ñi, tan ña cahan ndo cuendu siqui ñi. Tan ña cahan ca ndo tsa ndavaha ñi.

<sup>9</sup> Ña cahan tahan ca ndo cuendu siqui iin ndo tan inga ndo. Tyin tsa nacoo ndo tandihí tsa ña vaha tsa javahá ndo taħan tsanaha.

<sup>10</sup> Tyin vityin tsa nanduvi yo nyivi tsa tan iyó yo ñayivi nyito. Tan ndutsaá ca yo tumaa caá Nyoo, ra javahá tsi yo, nda cuanda coto vaha ca yo tsi ra.

<sup>11</sup> Ña ñiñi tsa cuví yo nyivi Israel, o nyivi Grecia, o nyivi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyivi catsi ñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandihí yo tsihin ra Cristo, tyin maa ra cuví tandihí tan iyó ra tsihin tandihí yo.

<sup>12</sup> Nyoo cuñi ra tsi yo tan nacatsi vaha ra tsi yo tyin cuví yo nyivi ra. Yacan cuenda coo ndo ñayivi nyito tumaa taahán tsi coo nyivi yihí cuenda ra; cundaahvi ñi ndo nyehé ndo tsi nyivi tahan ndo; cuvi ndo nyivi vaha tan ndaahvi jaha ndo tsi ndo nuu Nyoo; ndumasu ndo; cunyeer ñi ndo nyehe ndo tandihí tsihi tan tundoho tsihin tsa si cuñi ndo.

<sup>13</sup> Ña cundihí ñi ndo tsihin nyivi tahan ndo. Jaha ndo tucahnu ñi tsi ñi tatun náa javahá ñi tsi ndo. Tumaa ra Cristo jaha ra tucahnu ñi tsi maa ndo, tacan cuñi tsi javahá tucu maa ndo tsihin nyivi.

<sup>14</sup> Tyin tsa cuñi tahan yo tsi yo, yacan cuví tsa ñiñi ca cuñi tsi. Tyin yacan cuví tsa jandu iin tsi yo.

<sup>15</sup> Tan cuhva ndo tsa cundaca ñaha tsa taxin Nyoo ańima ndo, tan na jaquihin ityi tsi tsi ndo. Tyin tsa cuenda yacan, cana Nyoo tsi ndo tan jandu iin ra tsi ndo tsihin ra Cristo. Tan cuhva ndo tyahvi nyoo tsi Nyoo.

<sup>16</sup> Tan na cutu ańima ndo tsihin tuhun ra Cristo, tan jacuaha tahan ndo tuhun ra tsi ndo. Tan jandu iin tahan ndo ñi ndo tsihin tandihí tsa tsiñi tuñi tsa tsahá Nyoo tsi ndo. Čata ndo yaa tan salmo. Tan čata ndo yaa tsa tsahá Tatyí Ii Nyoo tsi ndo tsihin tsa ñi ñi ańima ndo. Tan tacan ñi nacuhva ndo tyahvi nyoo tsi Nyoo.

<sup>17</sup> Tatun náa tyiñu cua javaha ndo, o náa cua cahan ndo, javaha ndo can tsihin sivi Jutu Mañi yo Jesús. Tan juvin ñi cuhva can nacuhva ndo tyahvi nyoo tsi Nyoo tsa cuenda maa ra Cristo.

*Nu tsahá cuenda ra Pablo nácaa nducú yo cuhva coo vaha yo tsihin nyivi*

<sup>18</sup> Nyoooho tsa iyó yii cuhva ndo tsa cundaca ñaha yii ndo tsi ndo. Tacan taahán tsi coo ndo, tyin yihí ndo cuenda Jutu Mañi yo.

<sup>19</sup> Tan nyoooho rayii, cuñi ndo tsi ñasihi ndo. Tan ña cundihí iñi ndo nyehé ndo tsi ñi.

<sup>20</sup> Nyoooho tsa nyihi tyaa yahvi ndo tsi jutu ndo tan tsi sihi ndo, tyin sii xaan cuñi Jutu Mañi yo tun javahá ndo tacan.

<sup>21</sup> Nyoooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihaya xaan iñi tsi.

<sup>22</sup> Tan nyoooho tsa cuví musu, tyaa yahvi ndo tsi ra yihí ndaha tsi ndo. Ñavin tsa nyehé ñi ra tsi ndo tan tyaa yahvi ndo tsi ra naha, tan catyi ra naha tyin vaha xaan ndo. Tyaa yahvi nyoooho tsi ra naha tsihin tsa ñi iñi aña ndo vasu ña nyehé ra naha, tyin Nyoo nyehé ra.

<sup>23</sup> Tandihí ñi tyiñu javahá ndo, javaha ndo can tsihin tsa sii cuñi ndo tumaa tsa jahá tyiñu ndo cuenda Jutu Mañi yo tan ñavin cuenda nyivi.

<sup>24</sup> Tyin tsitó ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa.

<sup>25</sup> Tan tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siin caá iin yo tan inga yo nuu Nyoo, tyin tandihí yo tan inducu ñi caá yo.

#### 4

<sup>1</sup> Nyoooho tsa iyó musu, cuñi tsi cuví ndo nyivi vaha tsihin musu ndo. Nducuhun iñi ndo tyin iyó ra yihí

ndaha tucu tsi maa ndo nda gloria. Tan maa ra nyehé ra tsi ndo.

<sup>2</sup> Ndaçan tahvi ndo tsihin tsa ñi iñi ndo. Coo nyito ndo tan nacuhva ndo tyahvi nyoo tsi Nyoo tsa cuenda tandihí maa.

<sup>3</sup> Ndaçan tahvi ndo tsa cuenda ndi, tyin na nuña Jutu Mañi yo aña nyivi tan tyaa soho ñi tuhun xeehe ra Cristo tsa caahán ndi tsihin ñi. Tsacatyí tuhun ihya nyii yu vehe caa.

<sup>4</sup> Ndaçan tahvi ndo tsa cuenda yu na cuvi jacuaha yu tsi nyivi cuhva cuvi cutuñi vaha iñi ñi tuhun ra Cristo, tumaa taahán maa tsi javahá yu.

<sup>5</sup> Cuiti coo ndo tsihin nyivi tsa ña yihí tuhun Nyoo, tyin tacan tan cuvi cahan ndo tuhun Nyoo tsihin ñi.

<sup>6</sup> Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

*Nu tsahá ra Pablo nacumi tsi nyivi yihí cuenda Nyoo ñuu Colosas*

<sup>7</sup> Ra Tíquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu.

<sup>8</sup> Yacan cuenda jaquitsí yu tsi ra nu yucú ndo na jandu iin ra iñi ndo tan catyi tuhun ra tsihin ndo nácaa yucú ndi.

<sup>9</sup> Tan vatsí ndihí ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñi xaan yo tsi ra. Cua catyi tuhun maa ra naha tsihin ndo tandihí tsa cuví nu nyii yu ihya.

<sup>10</sup> Ra Aristarco, ra nyii tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto yu tsi ndo tyin tun tsa ra Marcos nu yucú ndo, vaha cahan ndo tsihin ra.

<sup>11</sup> Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihí ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iin xaan ra naha iñi yu.

<sup>12</sup> Vatsí tucu nacumi tsi ndo jahá ra Epafra, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihí cuhva cuñí ra.

<sup>13</sup> Yuhu cuví tsandaa tyin ra Epafra tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis.

<sup>14</sup> Vatsí tucu nacumi tsi ndo jahá ra Lucas, ra tsa cuví doctor tsa cuñí xaan yo, tan ra Demas tucu.

<sup>15</sup> Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihí ndo nacumi tsi ña Ninfas tan tsi tandihí nyivi yihí cuenda Nyoo tsa ndu iín yuvehe ña.

<sup>16</sup> Tatun ndihí cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihí ñi itsi. Tan na cuhva ñi carta tsa jacuhun yu tsi ñi, cahvi ndo.

<sup>17</sup> Cahán ndo tsihin ra Arquipo tan catyi ndo: “Javaha vaha tyiñu tsa tsaḥa Jutu Mañi yo tsi un tyin javaha un.”

<sup>18</sup> Yuhu ra Pablo tyaá yu nacumi ihya tsi ndo. Na ña naa iñi ndo tyin nyii yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

## Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

*Nu tyaq ra Pablo tan ra cutahán tsihin ra iin carta cuenda nyivi yihí tuhun Nyoo*

<sup>1</sup> Yuhu ra Pablo ra Silvano tan ra Timoteo, jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añima ndo.

*Vaha xaan tsinú iñi nyivi Tesalónica tsi Nyoo*

<sup>2</sup> Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo.

<sup>3</sup> Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñí ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo.

<sup>4</sup> Tyin tsitó ndi tyin Nyoo cuñí xaan ra tsi ndo, nyooho yañi, tan maa ra nacatsi vaha tsi ndo.

<sup>5</sup> Tyin quivi cahan ndi tuhun Nyoo, nácaa jacacú ra tsi yo, tsihin ndo, cahan ndi tuhun tsihin tunyee iñi Tatyí li Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoo ndi quivi tsiyucu ndi tsihin ndo. Tsicoo ndi tacan tsa cuenda tsa vaha tsi maa ndo.

<sup>6</sup> Tan quitsaha iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin si xaan cuñí ndo tyin maa Tatyí li tsahá can tsi ndo.

<sup>7</sup> Tan tsa tacan iyó ndo, jatyinyee xaan ndo tsi tandihí nyivi yihí cuenda Nyoo tan cahnu Macedonia tan tan cahnu Acaya ihya, tyin nyehe ñi cuhva iyó ndo tsihin Nyoo.

<sup>8</sup> Ñavin Macedonia tan Acaya ñi, maa tyin tandihí ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuenda ña ñiñi ca cuñí tsi cahan ndi tuhun Nyoo tsihin ñi.

<sup>9</sup> Tyin juvin ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsaha jahá tyiñu ndo tyiñu Nyoo nyito.

<sup>10</sup> Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andivi. Ra ican cuví ra tsa janandoto Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

## 2

*Tyiñu jahá ra Pablo ñuu Tesalónica*

<sup>1</sup> Nyooho yañi, tsitó ndo tyin ñavin tsa cuatu quitsi ndi cahan ndi tuhun Nyoo ñuu ndo.

<sup>2</sup> Tyin tsitó ndo nácaa nyehe ndi tundoho jahá nyivi ñuu Filipino tsa ndi cumañi ca tsa ndi ñuu ndo. Tan vasu nyehe xaan ndi tundoho ñuu can, maa tyin quivi tsa ndi ñuu ndo cahan ndi tuhun Nyoo tsihin ndo tsihin tsa ña yuuhví ndi. Tan vasu xaan xaan cuñi nyivi ñuu ndo, maa tyin jatyinyee xaan Nyoo tsi ndi tan ñi iñi ndi jacoto ndi tsi ndo cuhva jacacú ra tsi yo.

<sup>3</sup> Tyin tuhun tsa tsaha cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsica iñi ndi. Tan ndi ñavin tsa cuñí ndi jandavi ñaha ndi tsi ndo.

<sup>4</sup> Nduve tsa ña vaha cahan ndi, tyin Nyoo nyehe ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan



caahán ndi tumaa tava tyiñu maa ra tsi ndi. Tyin ña cuñí ndi tsa vaha cahan nyivi tuhun ndi, maa tyin cuñí ndi tsa vaha cahan Nyoo tuhun ndi, tyin maa ra nyehé ra cuhva iyó yo.

<sup>5</sup> Tan tsitó ndo tyin ndi iin tsaha tan ña cahan ndi tsihin tuhun tsa tyaquí xaan tsa cuñí ndi jandavi ñaha ndi tsi ndo. Tan ndi ñavin tsa cuñí ndi jaha canaa ndi xuhun tan cahan ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya.

<sup>6</sup> Tan ndi iin tsaha ña nducu ndi cuhva jacahnu nyivi tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñí ndi tsa javaha ndo tacan tsihin ndi.

<sup>7</sup> Tan vita cahan ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñí ndi jatyinyee ndi tsi ndo.

<sup>8</sup> Cuñí xaan ndi tsi ndo, tan yacan cuenda ñavin tuhun Nyoo ñi cuñí ndi cuhva ndi tsi ndo, tyin cuñí ndi cuhva tucu ndi nda cuanda ñayivi iyó ndi tsa cuenda tsa cuñí ndi tsi ndo.

<sup>9</sup> Nyooho yañi, nducuhún iñi ndo nácaa jahá tyiñu ndi tan tsatsi ndi quivi tsiyucu ndi tsihin ndo. Jahá tyiñu ndi tsinu cahñi tan tsacuaa tyin ña cuñí ndi jatyañu ndi tsi ndo tsitsi tsa caahán ndi tuhun Nyoo tsihin ndo.

<sup>10</sup> Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quivi tsiyucu ndi tsihin ndo tsa cuví ndo nyivi tsinú iñi tsi ra Cristo. Maa tyin maa ñi maa cuhva cuñí Nyoo javahá ndi, tan yacan cuenda ña cuví cahan ndo tsi ndi.

<sup>11</sup> Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee iñi tsi ndo tumaa iin rayi tsa iyó sehe tsahá ra tunyee iñi tsi sehe ra.

<sup>12</sup> Tan catyi ndi tsihin ndo, catsi coo ndo tumaa taahán tsi coo nyivi yihí cuenda Nyoo. Tyin maa Nyoo caná

tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

<sup>13</sup> Yacan cuenda iin nyita ñi tsahá ndi tyahvi nyoo tsi Nyoo, tyin quivi tsiñi ndo tuhun ra tsa cahan ndi tsihin ndo, naquihin cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayivi cuví tsi. Tan nditsa tsa tuhun Nyoo cuví tsi, tyin quitsahá tsinú iñi ndo tsi Nyoo tan nasamá cuhva iyó ndo.

<sup>14</sup> Yahá can tan nyehe tucu maa ndo tundoho jahá nyivi ñuu ndo. Tumaa tsa nyehe nyivi yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyivi Israel.

<sup>15</sup> Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahanan tsanaha. Ñi Israel can tsinyaa ndaha ñi tsi ndi. Ñavin cuhva cuñí Nyoo iyó ñi. Tan xaan iñi ñi tsi tandihí maa nyivi.

<sup>16</sup> Tatun cuñí ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

*Nu cahan ra Pablo tyin cuñí ra cunyehe ra nu yucú nyivi Tesalónica inga tsaha*

<sup>17</sup> Nyooho yañi, tsa yahá tsa quita ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa ñi iñi ndi cuñí ndi cunyehe ndi nu yucú ndo inga tsaha.

<sup>18</sup> Tan nducu ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu cuhva quitsi ndi, maa tyin tandihí ñi tsaha tsa cuñí ndi quitsi ndi, ña tsahá nu ña vaha.

<sup>19</sup> Maa tyin ¿náa ndatú ndi? Tan ¿yóo cuenda cusí iñi ndi, tan vaha cuñí ndi? ¿A ñavin tsa cuenda maa ndo cua cusí xaan iñi ndi nuu Jutu Mañi yo Jesucristo quivi quitsi ra inga tsaha?

<sup>20</sup> Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sií xaan cuñí ndi tsa cuenda yacan.

### 3

<sup>1</sup> Tan ña cunyeē ca iñi ndi tsa cuñí ndi coto ndi nácaa cuahán tsinú iñi ndo tsi Nyoo. Tan tyaā ndi cuhva tsa ndoo intuhun ñi maa yu ñuu Atenas.

<sup>2</sup> Tan jaquitsi yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsi ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca iñi ndo tsi Nyoo.

<sup>3</sup> Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooho tsitó ndo tyin nyaá tsa nyehe yo tundoho.

<sup>4</sup> Tyin nda ndi yucú ca maa ndi tsihin ndo, tan cahan ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuví.

<sup>5</sup> Ña cunyeē ca iñi yu tsa cuñí yu coto yu nácaa yucú ndo. Yacan cuenda jaquitsi yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhví yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahá tyiñu ndi nu yucú ndo.

<sup>6</sup> Maa tyin vityin tsa tsaā nuhu ra Timoteo tsa quitsi ra nu yucú ndo. Tan nacatyí tuhun ra tsihin ndi tyin ñi xaan iñi ndo tsinú iñi ndo tsi Nyoo. Tan cuñí tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñí xaan ndo nyehe ndo tsi ndi; tumaa tsa cuñí tucu maa ndi nyehe ndi tsi ndo.

<sup>7</sup> Yacan cuenda, nyooho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñí ndi tsa tsitó ndi tyin nyooho vaha tsinú iñi ndo tsi Nyoo tan ña nacoó ndo tsi ra.

<sup>8</sup> Tyin tumaa tsa ndutsaa ñayivi iyó ndi cuñí ndi tsa tsitó ndi tyin nyooho vaha tsinú iñi ndo tsi Nyoo.

<sup>9</sup> Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sií xaan cuñí ndi nuu Nyoo tsa cuenda tyin vaha cuahán ndo tsihin ra.

<sup>10</sup> Tsicán tahvi xaan ndi tsi Nyoo tsinu cahñi tan tsacuaa, tyin cuñí xaan ndi quitsi nyehe ndi tsi ndo. Tacan tan cuvi jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

<sup>11</sup> Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuvi quitsi ndi nu yucú ndo.

<sup>12</sup> Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihí ca nyivi tumaa tsa cuñi maa ndi tsi ndo.

<sup>13</sup> Tyin tacan tan cuiti coo ndo tsihin ra tyin tsa yaha janduvaha ra aña ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihí nyivi yihí cuenda ra.

### 4

#### *Nacaa taahán iñi Nyoo coo yo*

<sup>1</sup> Vityin nyooho yañi, tsihin sivi ra Jesús caahán ndaahví xaan ndi tsihin ndo tan tsicán ndi tsi ndo tsa ña jandihí ndo tsa iyó ndo tumaa tsa janaha ndi tsi ndo. Jañihi ca ndo nducu ndo cuhva coo vaha ndo nuu Nyoo tumaa taahán iñi maa ra.

<sup>2</sup> Tyin nyooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi.

<sup>3</sup> Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha aña yo nuu ra. Tan nyooho, rayi, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayi tun ñavin yi ñi cuví ra.

4 Tan nyooho yañi, intuhun intuhun ndo cuñí tsi coto ndo nácaa coo vaha ndo tsihin ñasiihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha.

5 Na caca caquiñi iñi ndo nyehe ndo tsi ñasiihi ndo, ña javaha ndo tumaa javahá nyivi ña yihí tuhun Nyoo.

6 Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasiihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahan ndi tsihin ndo.

7 Tyin Nyoo cana ra tsi yo tsa coo yo cuhva cuñí maa ra, tan ña javaha yo tsa caquiñi.

8 Yacan cuenda nyivi ña cuñí tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí Ii ra tsi yo.

9 Maa tyin tuhun tsa cuñí tahan yo tsi yo ña tsiñí ñuhu tsa tyaa yu itsi nu carta ihya. Tyin tsa janaha maa Nyoo tsi yo nácaa taahán tsi cuñi tahan yo tsi yo.

10 Tan nyooho tsa tsitó maa ndo tuhun can tyin cuñí ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi.

11 Nducu ndo cuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahan ndi tsihin ndo quivi can.

12 Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

*Nacaa cua cuvi quivi quitsi Jutu Mañi yo Jesús inga tsaha*

13 Nyooho yañi, cuñí ndi tsa coto ndo nácaa taahán nyivi tsa tsa tsihi, tyin tacan tan ña nducuihaya iñi ndo tumaa cuihaya cuñí nyivi ña cua nandoto tsa ña cua coo tsihin Nyoo.

14 Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

15 Yacan cuenda catyí ndi tsihin ndo tumaa jacuaha Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhun tan naco yoo tsi nyivi tsa tsihi.

16 Tyin juvin ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto.

17 Yaha can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuii yo tsihin ra.

18 Yacan cuenda jandu iin tahan ndo iñi ndo tsihin tuhun ihya.

## 5

1 Nyooho yañi, ña ñiñi cuñí tsi jacoto yu tsi ndo ama cua cuvi tandihi tsa tsa yaha cahan yu tuhun tsihin ndo.

2 Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihvi ñasuhu yuvehe yo tsa tsacuaa tacan cua cuvi.

3 Tyin quivi tsa catyí nyivi tyin taxin ñi caa, tan nduve maa tsa yuuhvi ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhvi tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuvi ca cunu xeehe ñi.

4 Maa tyin nyooho yañi, quivi quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihvi ñasuhu yuvehe ñi tyin nyooho ñavin ca nu naa iyó ndo.

5 Tyin tandihi yo tsitó yo nácaa taahán tsi coo yo tyin jandunditsín Nyoo ánima yo, tan ña iyó ca yo nu

naa tumaa iyó nyívi ña nacotó tsi Nyoo.

<sup>6</sup> Yacan cuenda catsi cōo ndo cōonyito ndo tan ña cusu ndo tumaa iyó nyívi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha.

<sup>7</sup> Tyin nyívi quixí, quixí ñi tsacuaa, tan nyívi tuhva tsihí nyixi, tsiñí ñi tsacuaa.

<sup>8</sup> Maa tyin yoo tsa cuví yo nyívi iyó tsinu cahñi, na catsi cōo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñí yo tsi tandihí nyívi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo.

<sup>9</sup> Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jahá ra.

<sup>10</sup> Tyin ra Jesucristo tsihí ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihí yo, a nyito yo, maa tyin tandihí yo cua coo yo iin caa ñi tsihin ra.

<sup>11</sup> Yacan cuenda jandu iin ndo iñi nyívi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

*Nu tsaha cuenda ra Pablo tsi nyívi yihí cuenda Nyoo*

<sup>12</sup> Nyooho yañi, caahán ndaahvi xaan ndi tsihin ndo, jaha ndo tsa ñayívi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha.

<sup>13</sup> Cuñí tsi tsa jaha xaan ndo tsa ñayívi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

<sup>14</sup> Tavá tucu ndi tyiñu tsi ndo yañi, jachahan ndo tsi nyívi ña cuñí jaha tyiñu. Tan jandu iin ndo iñi nyívi tsa ndu uvi xaan iñi. Tan jatyinyee ndo

tsi nyívi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihí iñi ndo tsihin nyívi.

<sup>15</sup> Jaha ndo cuenda coto javaha ndo tsa ndavaha ñi tsihin nyívi javahá tsa ña vaha tsihin ndo. Nducu ndo cuhva javaha ndo tsa vaha tsihin nyívi yihí tuhun Nyoo tsihin ndo tan tsihin tandihí ca nyívi.

<sup>16</sup> Cusiñi iñi ndo tandihí ñi quívi.

<sup>17</sup> Tan ña jandihí ndo tsa tsicán tahvi ndo tsi Nyoo.

<sup>18</sup> Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñí maa Nyoo javaha yo tsa cuví yo nyívi tsinú iñi tsi ra Cristo Jesús.

<sup>19</sup> Ña ndahva ndo ñuhú Tatyí Ii Nyoo tsa iyó añima ndo.

<sup>20</sup> Ña vacu nducu ndo tsa caahán ra cuví ndusu yuhu Nyoo.

<sup>21</sup> Nyehe jihna ndo tun tandihí tsa caahán ra tan vaha tsi tumaa tsa taahán tsi nyehe ndo tandihí inga ca tuhun. Tan naquihin ndo tsa vaha.

<sup>22</sup> Ña tyihi ndo tsi ndo nu iyó tsa ña vaha.

<sup>23</sup> Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quívi quitsi Jutu Mañi yo Jesucristo inga tsaha.

<sup>24</sup> Ra tsa caná tsi yo, cuví cuita iñi yo tsi ra, tyin maa ra cua javaha tandihí maa tsa caahán yu ihya.

*Nu ndihí cahán ra Pablo tan tsaha ra nacumi tsi nyívi*

<sup>25</sup> Yañi, ndacan tahvi ndo tsa cuenda ndi.

<sup>26</sup> Tan cuhva ndo nacumi tsi tandihí nyívi yihí cuenda Nyoo.

<sup>27</sup> Tavá tyiñu yu tsi ndo tsihin sívi Jutu Mañi yo na cahvi ndo carta ihya nuu tandihí nyívi tsa yihí cuenda Nyoo.

<sup>28</sup> Tan maa Jutu Mañi yo Jesucristo nasoco tsi ndo.

Tan na cuví tsi tacan ñi.



## Carta Tsinú Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Tesalónica

*Nu tyaq ra Pablo, tan ra cutahán tsihin ra, tsa tsinu uvi carta tsa cuenda nyivi yihí tuhun Nyoo ñuu Tesalónica*

<sup>1</sup> Yuhu ra Pablo, ra Silvano tan ra Timoteo jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo.

<sup>2</sup> Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

*Nu cahan ra Pablo nácaa cua tatsi tuñi Nyoo tsi nyivi iyó cuatyí quivi quitsi ra Cristo*

<sup>3</sup> Nyooho yañi, cuñí tsi tsa nacuhva ndi tyahvi nyoo tsi Nyoo tsa cuenda ndo tandihí ñi quivi, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quivi, tan cuñí xaan ndo tsi nyivi yihí tuhun Nyoo tsihin ndo.

<sup>4</sup> Yacan cuenda sñi xaan cuñí ndi caahán ndi tuhun ndo tsihin nyivi yihí cuenda Nyoo inga ca vehe ñuhu. Tyin nyooho cunye xaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyivi.

<sup>5</sup> Tandihí yacan janahá tyin Nyoo cuiti xaan jacutuñí ra tyin cua catyi ra tyin taahán maa tsi cuhun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

<sup>6</sup> Tan tsa cuenda maa Nyoo, taahán tsi janyehe ra tundoho tsi nyivi tsa janyehé xaan tundoho tsi ndo.

<sup>7</sup> Tan nyooho tsa nyehé xaan tundoho jahá nyivi, cua cuhva ra quitatu ndo iin caa ñi tsihin ndi quivi cua quitsi nyico Jutu Mañi yo Jesucristo

tsa quee ra andivi tsihin ñuhu tan tsihin ángel tsa iyó tunyee iñi maa ra.

<sup>8</sup> Tyin tatsi tuñi ra tsi nyivi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo.

<sup>9</sup> Ñi ican cua janyehe Nyoo tundoho tan ña cua cundihí maa tsa nyehe ñi tundoho, ña cua nyehe ñi tsi Jutu Mañi yo Jesucristo tan ña cua nyehe ñi tsa cahnu cuví ra tsihin tunyee iñi tsa iyó tsi ra

<sup>10</sup> quivi cua quitsi ra. Tyin quivi can nyivi yihí cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehe ñi tsi ra. Tan tyañu nyivi can, cua cuyucu tucu nyooho tyin tsinú iñi ndo tuhun tsa cahan ndi tsihin ndo.

<sup>11</sup> Yacan cuenda tsicán tahvi ndi tsi Nyoo tsa cuenda ndo tandihí ñi quivi, na jatyinyee ra tsi ndo. Tacan tan catyi ra tyin taahán tsi tsi ndo tsa cuví ndo nyivi cana maa ra. Tan tsicán tahvi tucu ndi tsi ra na jatyinyee ra tsi ndo tan cuví javaha ndo tsa vaha tsa cuñi ndo javaha ndo. Tan na quita vaha tandihí tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo tsi ra.

<sup>12</sup> Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

## 2

*Ra tsa nduve ley Nyoo iyó añima*

<sup>1</sup> Nyooho yañi, vityin cuñi yu cahan yu tsihin ndo tsa cuenda quivi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo,

<sup>2</sup> ña numi xaan sama ndo cuhva tsicá iñi ndo. Tan ña nayuhvi ndo tatun quita tuhun jaha tatyí ña vaha tyin tsa tahañ tsi quivi quitsi Jutu Mañi yo; vasu ndi maa nyivi caahán can, a jaquitsí ñi carta tsi ndo tan catyi ñi tyin yuhu jaquitsí carta can tsi ndo. Ña tsinu iñi ndo tandihí yacan.

<sup>3</sup> Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahan tsi quivi quitsi Jutu Mañi yo, cuaha xaan nyivi, xaan cua cuñi ñi nyehe ñi tuhun Nyoo, tan cua quituvi rayii tsa nduve ley Nyoo iyó aña, ra tsa nyaá maa cuhun anyaya.

<sup>4</sup> Ra ican cuví ra xaan iñi tsi Nyoo. Cua cañi tahan ra tsihin tandihí tsa nyisó sivi Nyoo; tan cua cañi tahan ra tsihin tandihí tsa jacahnú tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuví ra.

<sup>5</sup> ¿A ña nducuhún iñi ndo tyin nda ndi nyii ca yu tsihin ndo tan cahán yu tuhun ihya tsihin ndo?

<sup>6</sup> Maa tyin nyooho tsitó ndo náa tsa tyasí tan ñaha ca quituvi ra. Nda tahan maa tsi quituvi ra tan cua quituvi ra.

<sup>7</sup> Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyii xeehe nu, tyin iyó iin ra tsa ña tsahá quituvi nu. Maa tyin quivi cua quita ra tan cundihí tsa tyasí ra, tacan tan cua quituvi nu.

<sup>8</sup> Tacan tan cua quituvi ra tsa nduve ley Nyoo iyó aña, maa tyin Jutu Mañi yo Jesús cua cahñi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnu cuví ra quivi quitsi ra inga tsaha.

<sup>9</sup> Ra ña vaha can, nu ña vaha cua jaquitsi tsi ra. Tan cua cuhva nu tandihí tsa nyityi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi.

<sup>10</sup> Cua cuatyíñu ra tandihí nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñi ñi naquihin cuenda ñi tuhun Nyoo tsa nditsa tan cacu ñi.

<sup>11</sup> Tan yacan cuenda cua cuhva Nyoo ndatu tsa jandavi ñaha tatyí ña vaha can tsi ñi. Tan cua tsinu iñi ñi tsa ña nditsa.

<sup>12</sup> Tacan tan cua tatsi tuñi ra tsi tandihí ñi tyin ña cuñi ñi tsinu iñi ñi

tuhun nditsa. Tyin taahán ca iñi ñi javahá ñi tsa ña vaha.

*Nu cahán ra Pablo tuhun nyivi tsa nacatsi Nyoo tyin cacu ñi*

<sup>13</sup> Maa tyin tandihí quivi cuñi tsi cuhva ndi tyahvi nyoo tsi Nyoo tsa cuenda nyooho yañi. Tyin cuñi xaan Jutu Mañi yo tsi ndo. Tan nacatsi ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí Ii ra aña ndo tan tsihin tsa tsinú iñi ndo tuhun nditsa cuví cacu ndo.

<sup>14</sup> Yacan cuenda cana Nyoo tsi ndo quivi tsa cahán ndi tuhun ra tsihin ndo tyin tacan tan ñihi ndo tsa cahnu cuví Jutu Mañi yo Jesucristo coo tsi ndo.

<sup>15</sup> Yacan cuenda nyooho yañi, jandu iin ndo iñi ndo. Tan ña naa iñi ndo tandihí tsa tsaha cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña naa iñi ndo tandihí tuhun tsa tyaa ndi nu carta tsa jaquitsi ndi tsi ndo.

<sup>16</sup> Jutu Mañi yo Jesucristo tan Nyoo Jutu yo, juvin ra cuñi tsi yo; tan tsahá ra tunyee iñi tsi yo tandihí tyembu, tan tsahá ra naha tsa cuita iñi yo coo yo tsihin ra. Tandihí yacan tsahá ra tsi yo quivi tsaha ra tsa vaha tsa iyó tsi ra tsi yo.

<sup>17</sup> Na cuhva ra tsa sii cuñi aña ndo. Tan jandu iin ra iñi ndo, tacan tan cua cahán ndo tan javaha ndo tandihí tsa vaha.

### 3

*Nu tsicán ra Pablo na ndacan tahvi nyivi tsi Nyoo tsa cuenda ra naha*

<sup>1</sup> Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsaa tuhun Jutu Mañi yo tandihí ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi.

<sup>2</sup> Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihí ñi tan tsinú iñi ñi tsi Jutu Mañi yo.

<sup>3</sup> Maa tyin Jutu Mañi yo javahá ra tsa catyí ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tiin nu ña vaha tsi ndo.

<sup>4</sup> Tan nditá xaan iñi ndi tsi Jutu Mañi yo tyin tsitó ndi tyin jatyinyeé ra tsi ndo tan javahá ndo tsa catyí ndi tyin javaha ndo. Tan tsitó tucu ndi tyin ña cua jandihí ndo tsa javaha ndo tacan.

<sup>5</sup> Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyeé ca iñi ndo nyehé ndo tundoho, tumaa tsa cunyeé iñi maa ra Cristo nyehé ra tundoho.

#### *Taahán tsi tsa jaha tyiñu yo*

<sup>6</sup> Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa jacuahá ndi tsi ndo.

<sup>7</sup> Tyin tsitó maa ndo nácaa taahán tsi coo ndo tumaa tsicoo maa ndi tsa tsiyucu ndi tsihin ndo. Tyin nyuhu ña tsicá nuu utsan ndi tyin jahá tyiñu ndi.

<sup>8</sup> Tan tandihí tsa tsatsi ndi, maa ñi maa tyahvi ndi tsi ndo. Tyin jahá tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo.

<sup>9</sup> Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jahá tyiñu ndi tyin cuñi ndi janaha ndi nácaa taahán tsi coo ndo.

<sup>10</sup> Tyin quivi tsiyucu ndi tsihin ndo, cahan ndi tsihin ndo tyin nyivi ña cuñi jaha tyiñu, na ña catsi ñi.

<sup>11</sup> Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo.

<sup>12</sup> Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jahá tyiñu ndo, tan coo tsa catsi ndo.

<sup>13</sup> Nyooho yañi, ña cundihí iñi ndo javaha ndo tsa vaha.

<sup>14</sup> Tatun iyó iin ra ña cuñi tyaa yahvi tuhun caahán ndi nu carta ihya, jahá ndo cuenda ndáa ra cuví ra, tan ña cunyanaa ndo tsi ra na nducahan nuu ra.

<sup>15</sup> Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

#### *Nu ndihí cahan ra Pablo*

<sup>16</sup> Jutu Mañi yo ra iyó tsa vaha tsi, juvin ñi maa ra cuhva tsa vaha coo añima ndo tandihí ñi quivi tan tandihí ñi tsaha vasu ndi maa nyehé ndo tundoho. Tan Nyoo ndoo tsihin tandihí ndo.

<sup>17</sup> Yuhu ra Pablo tyaá yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihí carta yu. Tan tyehen tyaá yu.

<sup>18</sup> Tan na nasoco Jutu Mañi yo Jesucristo tsi tandihí ndo.

Tan na cuví tsi tacan ñi.

## Carta Tsa Jihna Ñi Tsa Jacuhun Ra Pablo Tsi Ra Timoteo

*Nu tyaq ra Pablo iin carta tsa cuenda ra Timoteo*

<sup>1</sup> Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo.

<sup>2</sup> Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinu iñi un tuhun ra Cristo tsa jacoto yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

*Nu tsaha cuenda ra Pablo tyin jaha cuenda yo tsi yo tan ña cunyicun yo tsa ña nditsa*

<sup>3</sup> Quivi quita yu ñuu Éfeso tan vatsi yu Macedonia nu nyíi yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyí yu tsihin un tyin catyí un tsihin ñi na ña jacuaha ñi tsa ña nditsa. Tan vityin juvin ñi tacan caahán nyico yu tsihin un.

<sup>4</sup> Cahan tsihin ñi na ña tyaá iñi ñi cuendu, na ña tyaá iñi ñi tuhun nyivi tsicoo tahan tsanaha. Tyin tun, maa ñi yacan tyaá iñi ñi maa cua cahan yuhu tahan ñi ñi. Tan ña cua jatyinyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuvi quita vaha tsi.

<sup>5</sup> Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa ñi iñi añima yo tsa janduvaha Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinú iñi yo tsi Nyoo.

<sup>6</sup> Maa tyin yihí nyivi naco ihñi ñi yacan, tan tsinaa ñi jahá tsa caahán yuhu tahan ñi.

<sup>7</sup> Cuñi ñi cuvi ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

<sup>8</sup> Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi.

<sup>9</sup> Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihí nyivi tsahñi nyivi.

<sup>10</sup> Iyó ley can tsa cuenda nyivi iyó tsihin rayi a ñaha tan ñavin yi ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda nyivi tsa catyí: “Naha Nyoo”, tan ña nditsa tsa caahán ñi. Tan juvin ñi iyó tucu ley can tsa cuenda nyivi caahán ndavaha ñi siqui tuhun Nyoo tsa cutuhva yo.

<sup>11</sup> Tuhun Nyoo ihya, iin ñi cuví tsi tsihin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuaha yu tuhun ihya tsi nyivi. Tan intuhun ñi maa ra taahán tsi jacahnú yo.

*Tsahá ra Pablo tyahvi nyoo tsi Nyoo tyin nyehé ndaahvi ra tsi ra*

<sup>12</sup> Tsahá xaan yu tyahvi nyoo tsi Jutu Mañi yo Jesucristo tyin tsaha ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra.

<sup>13</sup> Tacan javaha ra tsihin yu, vasu ndi maa nu quitsi tsi quivi, yuhu cahan nyaa xaan yu tsi ra. Tan tsinyaa ndaha yu tsi nyivi yihí cuenda ra, tan tsacu nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu.

<sup>14</sup> Tacan tsaha Jutu Mañi yo Jesucristo tsa vaha ra tsi yu. Tan tsinú



xaan iñi yu tsi ra jaha ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

<sup>15</sup> Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyeheh: Ra Cristo Jesús quitsi ra nu ñuhu ñayivi ihya tyin jacacú ra tsi nyivi iyó cuatyí. Tan yuhu cuví iin ra caquiñi ca tan ñavin ca tandihi nyivi.

<sup>16</sup> Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuanda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa.

<sup>17</sup> Yacan cuenda na jacahnu yo tsi ra yihí ndaha tsi yo tandihi ñi quivi, ra nduve tuhun tsihi iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihi. Na cuvi tsi tacan.

<sup>18</sup> Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsaha cuenda ra yañi yo naha ra tsi un quivi cahan ra naha tuhun un jaha Nyoo.

<sup>19</sup> Ña jandihí un tsa tsinú iñi un tsi Nyoo tan ña jandihí un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha tandihi yacan, yacan cuenda ña tsinú ca iñi ra naha tumaa taahán maa tsi.

<sup>20</sup> Tacan javaha ra Himeneo tan ra Alejandro. Yacan cuenda tsaha cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

## 2

*Nu jacuaha ra Pablo nácaa taahán tsi ndacan tahvi yo tsi Nyoo*

<sup>1</sup> Tsahá cuenda yu tsi tandihi nyivi yihí cuenda Nyoo tyin ñiñi xaan cuñi

tsi ndacan tahvi yo tsi Nyoo tsa cuenda tandihi nyivi. Tan nacuhva yo tyahvi nyoo tsi Nyoo tsa cuenda ñi.

<sup>2</sup> Na ndacan tahvi yo cuenda ra ndacá ñaha naha ra tan cuenda tandihi ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayivi vaha nuu Nyoo tan nuu nyivi. Tacan tan cua jaha ñi tsa ñayivi tsi yo.

<sup>3</sup> Tyin tacan taahán iñi Nyoo, ra tsa jacacú tsi yo.

<sup>4</sup> Tyin cuñi ra tsa cacu tandihi nyivi. Tan cuñi ra tsa coto ñi tuhun nditsa.

<sup>5</sup> Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ican cuví ra Cristo Jesús. Tan cuví ra iin nyivi tumaa maa yo.

<sup>6</sup> Juvín ra Jesucristo tsihi tsa cuenda tandihi nyivi. Tyahvi ra tsa cuenda cuatyí tandihi yo tyin tacan tan cuvi cacu yo. Tan cundaq can quivi tyaa maa Nyoo cuhva.

<sup>7</sup> Tsa cuenda yacan, tava tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuaha yu tsi nyivi tsa ñavin nyivi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

<sup>8</sup> Yacan cuenda cuñi yu tsa ndacan tahvi rayi naha ra tsi Nyoo tandihi ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo.

<sup>9</sup> Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan.

<sup>10</sup> Maa tyin na janduvaha ñi tsi

ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhva cuenda tsi ñi tsi Nyoo.

<sup>11</sup> Tan cunyecu taxin ñi tyaa soho ñi tuhun Nyoo. Tan jaha ñi tsa ñayivi tsi ra tsahá cuenda tuhun Nyoo tsi ñi.

<sup>12</sup> Tyin ña tsahá yu jacuaha ñiñaha nuu nyivi cuaha. Ndi ña tsahá yu tsa cundaca ñaha ñi tsi rayi. Taxin ñi na cunyecu ñi.

<sup>13</sup> Tyin jihna ca ra Adán javaha Nyoo, yaha can tan javaha ra tsi ña Eva.

<sup>14</sup> Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoo cuaty ña.

<sup>15</sup> Maa tyin ñiñaha nduve tsa cua tahan ñi tsa cua cacu sehe ñi, tatun jacuahnú vaha ñi tsi sehe ñi, tan tsinú vaha iñi ñi tsi Nyoo tan cuñi ñi tsi ra tan tsi nyivi, tan catsi coo ñi nuu Nyoo tan nuu nyivi.

### 3

*Nacaa taahán tsi coo ra cuví ityi nuu tsihin nyivi vehe ñuhu*

<sup>1</sup> Tuhun ihya tuhun nditsa cuví tsi: Tatun iin ndo cuñi ndo cuvi ndo ityi nuu tsihin nyivi vehe ñuhu, vaha xaan tyiñu cuñi ndo javaha ndo.

<sup>2</sup> Maa tyin ñiñi cuñi tsi tyin ra cuví ityi nuu tsihin nyivi vehe ñuhu cuñi tsi cuvi ra iin ra catsi iyó tyin tacan tan ña cuví tyaa nyivi cuaty tsata ra. Tan cuñi tsi tsa coo intuhun ñi ñasihi ra. Tan cuñi tsi tsa cuvi ra iin ra tsitó vaha cuhva coo, iin ra vaha nuu nyivi. Tan cuñi tsi vaha cahan ra tsihin nyivi tsaá yuvehe ra, tan cuví ra iin ra tsitó vaha jacuaha tsi nyivi.

<sup>3</sup> Iin ra cuví ityi nuu tsihin nyivi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñi tsi tsa cuví ra iin ra vaha iñi, iin ra ña tuhva cañi tahan. Tan cuvi ra iin ra ña nyiyo iñi xuhun.

<sup>4</sup> Cuñi tsi tsa cuvi ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan

tyaá yahvi vaha sehe ra tsi ra, tan jahá ñi tsa ñayivi tsi ra.

<sup>5</sup> Tyin tatun ña tsitó ra cundaca ñaha ra nyivi vehe ra, ¿nacaa cua quihi ndaha ra nyivi tsicá vehe ñuhu Nyoo?

<sup>6</sup> Tan iin ra ndi tsa xaan tsihin tuhun Nyoo ña taahán tsi cuvi ra ityi nuu tsihin nyivi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahá nu tsi nu.

<sup>7</sup> Tan cuñi tucu tsi tsa cuvi ra iin nyivi vaha nuu nyivi tsa ña yihí tuhun Nyoo, tyin tacan tan ña ñihi ñi náa cuaty tyaa ñi tsata ra tan ña cuvi jaha canaa nu ña vaha tsi ra.

*Nacaa taahán tsi coo ra jahá tyiñu vehe ñuhu*

<sup>8</sup> Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuvi ra naha ra tuhva tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi.

<sup>9</sup> Cuñi tsi tsa cutuñi vaha iñi ra naha nacaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo.

<sup>10</sup> Tan cuñi tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu.

<sup>11</sup> Tan tacan tucu ñiñaha, cuñi tsi cuvi ñi nyivi vaha nuu nyivi. Ña cahan ñi cuendu. Catsi coo ñi. Tan tyaa nuu vaha ñi tandi tyiñu.

<sup>12</sup> Ra jahá tyiñu vehe ñuhu na coo intuhun ñi ñasihi ra. Tan cuñi tsi tsa coto vaha ra cundaca ñaha ra tsi sehe ra tan nyivi vehe ra.

<sup>13</sup> Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa ñi iñi ra caahán ra tuhun Nyoo tyin tsinú vaha iñi ra tsi ra Cristo Jesús.

*Nu caahán ra Pablo siqui tuhun xeehe cuhva tsinú iñi yo*

<sup>14-15</sup> Vasiqui numi ñi cua quitsi nyehe yu nu nyií un. Maa tyin tun ña cuvi quitsi yu tsa numi ñi, yoñi

jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyívi cuenda Nyoo. Tyin maa yo cuví vehe ñuhu Nyoo nyito. Tan cuñí tsi tsa jañihi ca yo janaha yo tuhun Nyoo tsi nyívi. Tan naquihin vaha yo tyin tuhun nditsa cuví tsi.

<sup>16</sup> Tsa nditsa tyin yaha xaan cahnu cuví tuhun xeehe tsa jaquituví Nyoo, tyin coo yo tumaa iyó maa ra:

Nyoo nanduví ra rayíi tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyí Tatyí Ii Nyoo tyin ra nduve cuatyí cuví ra.

Tan nyehe ra cuví ángel naha ra tsi ra.

Taníi cahnu nu ñuhu ñayívi caahán nyívi tuhun ra.

Tan tsinú iñi nyívi tsi ra taníi cahnu nu ñuhu ñayívi.

Tan cuanuhu ra nda gloria.

## 4

*Nu catyí ra Pablo tyin nu cuahán ca tsi quívi yíhi nyívi ña cua tsinu ca iñi ñi tsi ra Cristo*

<sup>1</sup> Maa tyin caahán catsi Tatyí Ii tan catyí ra tyin nu cua ndihí tyembu yíhi nyívi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha.

<sup>2</sup> Cua tyaa soho ñi tuhun caahán nyívi jandaví ñaha. Tan ñi can ña tuví iñi ñi náa javahá ñi tyin tsa ndundava xaan añima ñi. Tumaa tsa cayu añima ñi jahá iin caa ihñi tan ndundava tsi.

<sup>3</sup> Cua casi ñi nu tindaha nyívi. Tan cua catyí ñi tyin ña vaha catsi yo juhva nuu nyayu. Vasu tsitó yo tyin tandihí nuu tsa tsatsí yo, Nyoo javahá itsi. Tan tandihí yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra.

<sup>4</sup> Tyin tandihí tsa javahá Nyoo tan vaha tsi. Tan ña taahán tsi catyí yo tyin ña vaha tsi. Tan cuví catsi yo tandihí tsi tun tsahá yo tyahvi nyoo tsi Nyoo tsa cuenda tsi.

<sup>5</sup> Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

*Nacaa iyó ra vaha jahá tyiñu tyiñu ra Jesucristo*

<sup>6</sup> Tatun jacuahá un tandihí tsa caahán yu ihya tsi tandihí nyívi yíhi tuhun Nyoo tsihin yo, cua cuví un iin musu vaha ra Cristo Jesús. Tan tuhun tsa tsinú iñi yo, tsihin tandihí tuhun ra Cristo tsa nyicún yo, cua jatyinyee tsi tsi un tan cuahnu ca un tsihin tuhun Nyoo.

<sup>7</sup> Maa tyin ña tyaa yahvi un tsa cuví xembulu, tuhun sana, tan tuhun tsahnu cuhva iyó nyívi. Vaha ca jañiñi un tsi un tan javaha un maa ñi maa cuhva cuñí maa Nyoo.

<sup>8</sup> Tsa jañiñi yo coo tunyee iñi cuñu ñuhu yo, juhva ñi jatyinyee tsi tsi yo. Maa tyin tsa jañiñi yo javahá yo tandihí cuhva cuñí Nyoo, jatyinyee tsi tsi yo iin cahnu ñi, tyin jatyinyee tsi tsi yo nu ñuhu ñayívi ihya. Tan jatyinyee tucu tsi tsi yo tsa coo vaha yo nu cua tsaa yo nda gloria.

<sup>9</sup> Tan nditsa, tyin tsa nditsa cuví tsi tan tandihí yo taahán tsi tsa tsinú iñi yo itsi.

<sup>10</sup> Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihí nyívi, tan jihna ca yoo tsa tsinú iñi yo tsi ra jacacú ra.

<sup>11</sup> Tuhun ihya jacuaha un tsi nyívi yíhi cuenda Nyoo, tan jañiñi un tsi ñi na cutuhva ñi itsi.

<sup>12</sup> Catsi jaha un tsi un coto ña cua jaha nyívi tsa ñayívi tsi un tsa cuenda tsa ndi tyuvaa xaan un. Jacuaha tsi ñi tsihin cuhva iyó un, tan tsihin cuhva caahán un. Jacuaha tsi ñi tsihin tsa cuñí un tsi Nyoo tan tsi nyívi, tsihin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha.

<sup>13</sup> Tan tsitsi tsa ndi cumañi ca tsaa yu nu nyíi un, cahvi tuhun Nyoo tsihin ñi yíhi tuhun Nyoo. Cuhva

cuenda ñihi tsi ñi, tan jacuaha tsi ñi nácaa cunyicun vaha ñi tsi Nyoo.

<sup>14</sup> Jaha cuenda vaha tunyee iñi tsa tsahá Nyoo tsi un quivi tyiso ndaha ra nyisó tyiñu vehe ñuhu naha ra jiñi un tan cahan ra naha tsa tsahá cuenda Nyoo tsi ra naha.

<sup>15</sup> Tyaa vaha iñi tuhun can tan javaha cuhva catyí tsi. Tacan tan cua nyehe tandihi nyivi nácaa cuahán un ityi nuu ca tsihin Nyoo.

<sup>16</sup> Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyaa soho tuhun jacuahá un.

## 5

*Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo*

<sup>1</sup> Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha.

<sup>2</sup> Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandihi tsa caahán yu ihya tsihin tsa vaha tsicá iñi un.

<sup>3</sup> Jatyinyee tsi ñiñaha ndaahvi tsa tsihi yíi tatun nduve nyivi ñi cuví jatyinyee tsi ñi.

<sup>4</sup> Maa tyin tatun iyó iin ñaha tsihi yíi tan iyó sehe ña, a sehe yañi ña, cuñí tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jaha cuenda sihi ñi tsi ñi tsa ndi nyihi ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo.

<sup>5</sup> Tan ñaha tsa tsihi yíi tan ndoo ndaahvi intuhun ña maa ña, iin ña Nyoo tyaa iñi ña tan tsicán tahvi ña tsi ra tsinu cahñi tan tsacuaa.

<sup>6</sup> Maa tyin ñaha tsihi yíi tsa cusíi iñi tsihin tsa iyó nu ñuhu ñayivi

ihya, vasu nyito ña maa tyin tsihi ña cuenda Nyoo.

<sup>7</sup> Jacoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi.

<sup>8</sup> Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

<sup>9</sup> Nu tutu tsa nyaá sivi ñi tsihi yíi, na cunyaa sivi ñi tsahnu tsa iyó ndaahvi, tatun tsa yahá uñi xico cuiya ñi, tan intuhun ñi yíi ñi tsicoo.

<sup>10</sup> Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnú vaha ñi sehe ñi, tan tsahá ñi tsa catsi nyivi tsaá yuvehe ñi, tan jahá tyiñu ñi tyiñu nyivi yihí cuenda Nyoo tsihin tsa ñi iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandihi tsa vaha, cuví cunyaa sivi ñi.

<sup>11</sup> Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quivi tan cuñi ñi coo nyico yíi ñi tan cuñí ñi tindaha ñi inga tsaha tan jandihí ñi tsa jahá tyiñu ñi tyiñu ra Cristo.

<sup>12</sup> Tan coo cuatyí ñi tyin ña javahá ñi cuhva cahan ñi tsa cua javaha ñi.

<sup>13</sup> Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi.

<sup>14</sup> Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nya nyivi xaan iñi tsi yo tsi yo.

<sup>15</sup> Caahán yu tandihi tuhun ihya tsihin un tyin yihí ñi tsa nacoo ñi tsi Nyoo tan nyicún ñi tsi nu ña vaha.

<sup>16</sup> Tatun ñi yihí cuenda Nyoo tan iyó iin nyivi ñi tsa tsihi yíi, cuñí tsi tsa jatyinyee maa ñi tsi ñi can, tan ña tyiso ñi itsi siqui vehe ñuhu. Tyin tacan tan cuví jatyinyee vehe ñuhu tsi



inga ñi tsihi yí tsa nduve ca maa nyívi iyó.

<sup>17</sup> Ra tsahnu ra nyisó tyiñu vehe ñuhu, cuñí tsi tsa jaha xaan nyívi vehe ñuhu tsa ñayívi tsi ra, tan tsa jihna ñi na jaha ñi tsa ñayívi tsi ra caahán tuhun Nyoo tan jacuahá ra naha tsi ñi.

<sup>18</sup> Tyin tuhun Nyoo catyí tsi tyehen: “Ña tyíhi un yoho yuhu indiquí nu jahá tyiñu ti, tacan tan cuví catsi ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

<sup>19</sup> Tatun tyaá nyívi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi.

<sup>20</sup> Maa tyin nyívi tsa jañihí ca javahá tsa ña vaha, cuñí tsi tsa cahan ndo tsihin ñi nuu tandihí nyívi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha.

<sup>21</sup> Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsí ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihí nyívi.

<sup>22</sup> Ña numi xaan cuhva un tyiñu tsi iin ra cuví ra ityi nuu tsihin nyívi vehe ñuhu. Coto cuhun cuatyí javaha ra síqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

<sup>23</sup> Tan tsa cuenda tsa uhvi tsitsi un, ña coho ca un maa ñi maa ndutya, coho luxu vinu na nduvaha tsitsi un.

<sup>24</sup> Yihí nyívi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi.

<sup>25</sup> Tan tacan tucu tatun javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

## 6

<sup>1</sup> Nyívi yihí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihi nyívi cuhva cahan ñi ndavaha ñi síqui

Nyoo, tan síqui tuhun ra tsa jacuahá yo.

<sup>2</sup> Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayívi tsi ra ican tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñí ra tsi ra ican. Jacuaha yacan tsi nyívi yihí cuenda Nyoo tan cuhva cuenda tsi ñi na javaha ñi cuhva catyí tsi.

*Cuhva iyó yo tsihin Nyoo tan na cusí iñi yo tsihin tsa tsahá ra tsi yo*

<sup>3</sup> Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo,

<sup>4</sup> cuví ra iin ra nduyaá ñi maa, iin ra ña tsitó. Tan tsa caahán yuhu ra síqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihi tan nyiyo iñi nyívi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñí nyívi nyehe tahan ñi tsi ñi.

<sup>5</sup> Tan maa ñi cañi tahan nyívi jahá can tyin quiñi tsicá iñi ñi, tyin ña tsitó ñi tsa vaha. Cuñí maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can.

<sup>6</sup> Nditsa tyin tsa javahá yo cuhva catyí Nyoo tan sí cuñí yo tsihin tsa tsahá ra tsi yo, cuví tsi tumaa iin tsa cuca iyó tsi yo.

<sup>7</sup> Tyin nduve náa tsaá tsihin yo quívi cacú yo nu ñuhu ñayívi ihya. Tan nduve náa cuhun tsihin yo quívi cúu yo.

<sup>8</sup> Maa tyin tatun iyó tsa catsi yo tan iyó jahma cunditsí yo, na cusí iñi yo, tan na ndoo yo vaha tsihin yacan.

<sup>9</sup> Maa tyin nyívi cuñí nducuca, nducú cuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñí ñi coo cuaha tsa coo tsi ñi. Tan jatívi can tsi ñi. Tan nu ndihí tuhun cua tívi ndihí ñi tan cua cuhun ñi anyaya.

<sup>10</sup> Tyin tsa cuñí xaan yo xuhun, yacan cuví yoho tandihí ca nuu tsa ña

vaha. Tan yihí nyivi tsa cuenda tsa cuñi xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundo ho tsi juvin ñi maa ñi tsihin yacan.

*Nacaa cañi tahan yo tsihin nu ña vaha tsihin tsa tsinú iñi yo tsi Nyoo*

<sup>11</sup> Maa tyin yoo ho cuví un iin rayi cuenda Nyoo. Quita tsiyo nuu tandihí tsa caquiñi. Coo cuiti vaha nuu Nyoo. Cüanyicun tsi Nyoo tsihin tsa ñi iñi un. Cuñi tsi nyivi. Cünyee iñi tsihin tsa vita iñi un nyehe un tandihí tsa cua tahan un. Tan ña cahnu jaha un tsi un.

<sup>12</sup> Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyi un quivi cahan catsi un nuu tandihí ra cuví tsandaa naha ra, catyi un tyin tsinú iñi un tsi Nyoo.

<sup>13</sup> Tan vityin nuu Nyoo, ra tsa tsahá ñayivi coo tandihí tsa iyó, tan nuu ra Cristo Jesús ra tsa tsaha cuenda vaha tuhun nditsa nuu ra Poncio Pilato, caahán yu tsihin un,

<sup>14</sup> javaha tandihí tsa catyi yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo Jesucristo.

<sup>15</sup> Nda tsa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihí ca ra cuví rey. Tan ra ndacá ñaha cahnu cuví ra nuu tandihí ca ra ndacá ñaha.

<sup>16</sup> Intuhun ñi maa ra cuví ra tsa nduve tuhun tsiihi iyó tsi. Tan iyó ra nu nditsin nu ña cuví cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuví nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihí tyembu. Tan na ña cundihí maa tsa ndacá ñaha ra tsi yo. Na cuví tsi tacan.

<sup>17</sup> Tan cahan tsihin nyivi tsa iyó tsa cuca ñuu ñayivi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihí can. Na cuita iñi ñi tsi Nyoo nyito, tyin maa ra cuví ra tsahá tandihí tsi yo. Tan cuví cusñi iñi yo tsihin tsi.

<sup>18</sup> Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa ñi iñi ñi tan ñavin tsihin tsa cuihaya cuñi ñi.

<sup>19</sup> Tacan tan coo tsa cuca tsa ña cuanaa maa tsi ñi, tan jatyinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

*Nu ndihí tsahá cuenda ra Pablo tsi ra Timoteo*

<sup>20</sup> Yoo ho Timoteo, jaha cuenda vaha tyiñu tsa tsaha Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyi nyivi tyin tsitó xaan ñi tan ña nditsa.

<sup>21</sup> Tyin tsa cuenda yacan, yihí nyivi tsa nacoo ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsaha ra tsi un.

Tan na cuví tsi tacan ñi.

## Carta Tsinu Uvi Tsa Jacuhun Ra Pablo Tsi Ra Timoteo

*Nu tyaa ra Pablo inga carta tsa cuenda ra Timoteo*

<sup>1</sup> Yuhu ra Pablo cuví yu iin ra tava tyiñu ra Jesucristo, tyin tacan cuñi maa Nyoo. Tyin cuñi ra tsa jacoto yu tsi nyivi tyin tsahá ra ñayivi nyito coo tandihi ñi tsa iin ñi cuví tsihin ra Cristo Jesús.

<sup>2</sup> Jaquitsí yu carta ihya tsi yooho Timoteo. Tan cuñi xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

*Nu caahán ra Pablo tsihin ra Timoteo na catyi tuhun ra tsihin nyivi tyin cuenda ra Cristo yihí ra*

<sup>3</sup> Tandihí ñi quivi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsii tsaahnu yu tyiñu Nyoo tsanaha. Tan vaha cuñi añima yu tyin vaha iyó yu nuu ra.

<sup>4</sup> Nducuhún xaan iñi yu nácaa tsacu un quivi quitá yu nu nyii un. Tan vityin cuñi xaan yu nyehe yu tsi un inga tsaha tan cusii iñi yu.

<sup>5</sup> Tan nducuhún xaan iñi yu tyin tsinú ñi vaha iñi un tsi Nyoo. Tumaa tsa tsinú iñi ña Loida tsitan un tan ña Eunice sibi un. Ñi ican vaha xaan tsinú iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

<sup>6</sup> Yacan cuenda tsahá cuenda yu tsi un jandu iin ca iñi un tan cūatyíñu ndatu tsa tsahá Nyoo tsi un tsa cahan un tuhun ra. Yacan cuví ndatu tsa tsahá ra tsi un quivi tyiso ndaha yu jiñi un.

<sup>7</sup> Nyoo ña tsahá ra tatyí ña vaha tsa jayuhvi tsi yo. Tsahá ra Tatyí li ra tsi yo tyin coo tunyee iñi cahnu

tsi yo, tan cuñi tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo.

<sup>8</sup> Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyii yu vehe caa tsa cuenda ra. Cūatyíñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsí siqui yo tsa cuenda tuhun Nyoo.

<sup>9</sup> Tyin juvin ra jacacu tsi yo. Tan cana ra tsi yo tyin coo yo ñayivi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaa maa ra cuhva javaha ra nda ndi cumañi ca tsinu ñuhu ñayivi. Tyin nda quivi can tyaa ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús.

<sup>10</sup> Tan vityin tsitó yo tsa vaha can tyin tsa quitsi ra Jesucristo jacacu ra tsi yo. Tan quihin nyaa ra tandihí tunyee iñi tuhun tsiihí. Cahán ra tuhun vaha, tan tava nditsin ra tuhun tsa coo yo ñayivi nyito tsa ña cua naa maa.

<sup>11</sup> Nyoo tava tyiñu ra tsi yu tsa cahan yu tuhun can tsihin nyivi. Tava tyiñu ra tsi yu tsa caca yu tyiñu ra, tan jacuaha yu tuhun can tsi nyivi tsa ñavin nyivi Israel cuví.

<sup>12</sup> Yacan cuenda nyehé yu tandihí tundoho. Maa tyin ña nducahán nuu yu tsa tacan nyehé yu tundoho, tyin tsitó yu yoo tsinú iñi yu. Tyin nacuhva cuenda yu tsi yu tsi ra, tan tsitó vaha yu tyin cuví jaha cuenda ra tsi yu nda cuando quivi quitsi ra inga tsaha.

<sup>13</sup> Cūanyicun tuhun vaha tsa tsahá cuenda yu tsi un. Tan coo tsihin tsa tsinú vaha iñi un tsi Nyoo. Cuñi tsi ra, tan tsi nyivi. Tyin tacan taahán tsi coo yoo tsa iyó iin caa ñi tsihin ra Cristo Jesús.

<sup>14</sup> Tan na jatyinyee maa Tatyí li tsa iyó añima yo tsi un tan jaha cuenda vaha un tsa vaha tsa tsahá Nyoo tsi un.

<sup>15</sup> Tsa tsitó un tyin nacoo ihñi ra Figelo tan ra Hermogenes tsi yu tan tandihí ca maa ra iyó ityi Asia.

16 Maa tyin ra Onesíforo na cundaahvi iñi Jutu Mañi yo tsi ra tan tsi nyivi ra tyin cuaha xaan tsaha quitsi ra jatyinyee ra tsi yu. Tan ña cahán nuu ra tsa tyeheh nyii yu vehe caa.

17 Tan quivi tsinyii ra ñuu Roma ihya, ña jandihí maa ra tsa nanducú ra tsi yu nda cuanda tsa nañihí ra tsi yu.

18 Maa Jutu Mañi yo na cundaahvi iñi ra nyehe ra tsi ra quivi cua jacutuñi ra tsi yo. Tsitó maa un nácaa jatyinyee xaan ra Onesíforo tsi yo quivi tsiyucu yo ñuu Éfeso.

## 2

### *Iin andaru vaha ra Jesucristo*

1 Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yo tsihin ra.

2 Tuhun tsa tsiñi un cahán yu nuu nyivi cuaha, jacuaha yacan tsi nyivi tsa ñi iñi tsinú iñi tsi Nyoo, ñi tsa cuví jacuaha tsi inga nyivi.

3 Tan cunyee iñi nyehe tundoho tumaa iin andaru vaha ra Jesucristo.

4 Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahán ra cuví ityi nuu tsihin ra.

5 Tan tacan tucu ra jasiquí tsihin balón, ña cuví jaha canaa ra tatun ña cunyee iñi ra jasiquí ra tumaa taahán maa tsi.

6 Iin ra jahá tyiñu tsitsi cuhu, taahán tsi tsa jaha tyiñu jihna ra, tacan tan cuví catsi jihna ca maa ra tsa quitá nu jahá tyiñu ra.

7 Tyihi tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandihí tsi.

8 Ndūcuhun iñi tsi ra Jesucristo, ra tsa nandoto tsa yaha nyehe ra tundoho tan tsihi ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsaha cuenda ra tsi yu tyin cahan yu tsihin nyivi.

9 Tan tsa cuenda tuhun can cunyeé iñi yu nyehé yu tandihí tundoho nda cuanda nuuhñi yu tsihin cadena

vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñi tsi.

10 Yacan cuenda cunyeé iñi yu nyehé yu tandihí tundoho tsa cuenda tsa vaha tsi tandihí ca nyivi tsa nacatsi maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihi yo nu si caá tsa ña cua ndihí maa coo yo.

11 Tuhun ihya tuhun nditsa cuví tsi tan cua cundaa tsi:

Tatun tsihi yo cuenda cuñu ñuhu yo, coo nyito tucu yo tsihin ra.

12 Tatun nyehé yo tundoho tsa cuenda ra, cua cundaca ñaha ndihí yo tsihin ra.

Tatun catyí yo tyin ñavin cuenda ra yihí yo, cua catyi tucu maa ra tyin ñavin nyivi yihí cuenda ra cuví yo.

13 Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

### *Tatun jahá tyiñu vaha yo, cua quita vaha yo*

14 Janducuhun iñi tuhun ihya tsi ra jacuahá tuhun Nyoo, tan catyi tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jativí ra naha tsi nyivi tyaá soho tsa caahán ra naha.

15 Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyinú vaha un tuhun nditsa cuhva taahán maa tsi, ña cua nducahan nuu un.

16-17 Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyivi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa tañan ra Himeneo tan ra Fileto.



<sup>18</sup> Tyin quita tsiyo ra naha ityi vaha tan catyí ra naha tyin tsa yaha nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyivi tsa tsinú iñi tsi Nyoo.

<sup>19</sup> Vasu yihí juhva ñi tacan quita tsiyo ñi, maa tyin Nyoo tsaquin ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyivi yihí cuenda ra tsa nditsa.” Tan catyí tucu tsi: “Tandihí ñi nyisó sivi ra Cristo na quita ñi nu iyó tsa ña vaha.”

<sup>20</sup> Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyíñu nyivi. Tyin tsatyíñu tucu ñi tsa tsinu tsihin vitu tan tsihin ñuhu quisí. Yihí can tsatyíñu ñi can cuenda tyiñu nahnu, tan yihí can ndáa tahan ñi maa tsi tsatyíñu ñi can.

<sup>21</sup> Tacan tucu maa yo tatun jahá vaha yo cuenda tsi yo, cuví yo iin nyivi tsa tsatyíñu Nyoo. Tan cuví yo tumaa iin vasu xuhun cuaan tsa ndoo vaha, tacan tan cuví cuatyíñu ra tsi yo tsa cuenda tandihí tyiñu vaha.

<sup>22</sup> Ña caca iñi un tumaa tsicá iñi ra cuatyí iyó nu ñuhu ñayivi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho coo iin ñayivi cuiti. Tsinu vaha iñi tsi Nyoo. Cuñi tsi Nyoo tan tsi nyivi. Coo vaha tsihin tandihí nyivi yihí cuenda Nyoo, tandihí ñi tsa tsicán tahvi tsi Jutu Mañi yo, ñi iyó aña vaha.

<sup>23</sup> Tan ña tyaa soho un tsa nduve yahvi nyaá tsa caahán yuhu tahan nyivi. Tyin tsitó un tyin tsihin yacan nducuaaha ca tsihi.

<sup>24</sup> Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyivi cuví ra tsihin tandihí nyivi. Tan cuñi tsi tsa ñihi vaha ra cuhva jacuaha ra tuhun Nyoo tsi nyivi. Tan cuñi tucu tsi tsa cunyeé iñi ra tsihi tsahá nyivi.

<sup>25</sup> Tan tsihin tsa vita iñi ra cuñi tsi janaha vaha ra cuhva coo nyivi ndava iñi. Tan cuatu ra tatun ndu uvi

iñi ñi tan coto ñi tsa nditsa.

<sup>26</sup> Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

### 3

*Nacaa cua coo nyivi nu cua ndihí quivi*

<sup>1</sup> Tan cuñi tucu tsi coto un tyin nu cua ndihí tyembu cua coo quivi tsa yíi xaan cua coo yo.

<sup>2</sup> Tyin cua coo nyivi nyiyo iñi, maa ñi tsa tsii maa ñi cua cuñi ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyivi ñi. Ña cua tyaa yahvi ñi tsi Nyoo.

<sup>3</sup> Ña cua cuñi ñi tsi nyivi ñi. Ña cua cuhva maa ñi coo taxin nyivi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuví. Tan ña cua cuñi ñi nyehe ñi tsa vaha.

<sup>4</sup> Cua xico ñi tsi nyivi ñi. Tan cua cana iñi ñi javaha ñi náa ndihí tsa cuñi maa ñi. Tan cahnu cua jaha ñi tsi ñi. Tan maa ñi maa tsa cuñi maa ñi cua nanducu ñi, tan ña cua nanducu ñi tsi Nyoo.

<sup>5</sup> Cua cunyicun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinú iñi ñi tsi ra.

Ña cutahan un tsihin nyivi javahá tacan.

<sup>6</sup> Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñi ñi.

<sup>7</sup> Cuahán ñi cua tyaa soho ñi tuhun tsa, maa tyin ña cuví maa cutuñi iñi ñi tsa cuví tsa nditsa.

<sup>8</sup> Tan nyivi cua coo, cua cuví ñi tumaa ra Janes tan ra Jambres, ra tasi tsa tsicoo tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyivi cua

coo nu cuahán ca tsi ityi nuu. Cua cahan ñi ndavaha ñi siqui tuhun Nyoo. Quiñi xaan cua caca iñi ñi. Tan ña cua quita vaha ñi tsihin cuhva tsinu iñi ñi.

<sup>9</sup> Maa tyin tsa cua janaha ñi, ña cua cuvi nducuaha can tyin ña xeehe caa tyin iin tsa nduve yahvi nyaá cua cuvi can, tumaa tsa javaha tucu ra Janes tan ra Jambres.

*Nu ndihí tava tyiñu ra Pablo tsi ra Timoteo*

<sup>10</sup> Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenda iyó yu tacan, tan nácaa tsinú iñi yu tsi Nyoo. Tan tsitó tucu un nácaa cunyeé iñi yu tsa cuxaán nyivi tsi yu, tan nácaa cuñi yu tsi ñi.

<sup>11</sup> Tan tsitó un nácaa cunyeé iñi yu nyehé yu tundoho tsa tsinyaa ndaha nyivi tsi yu. Tsitó un tsa tahan yu, tandihí tundoho tsa nyehé yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacu ra tsi yu tsitsi tandihí tundoho can.

<sup>12</sup> Tsa nditsa tyin tandihí yoo tsa cuñi coo cuhva cuñi ra Cristo Jesús cua janyehe nyivi tundoho tsi yo.

<sup>13</sup> Maa tyin nyivi caquiñi tan nyivi jandavi ñaha, quiñi xaan ca cua coo ñi. Tyin cua jandavi ñaha ñi tsi nyivi tan cua jandavi ñaha tucu maa nyivi tsi ñi.

<sup>14</sup> Maa tyin yooho jañiñi tsi un tan coo un tsihin tsa cutuhva un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhva un.

<sup>15</sup> Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi iñi un tan cacu un tsa cuenda tsa tsinú iñi un tsi ra Cristo Jesús.

<sup>16</sup> Tandihí tuhun tsa nyaá nuu tutu Nyoo, maa Nyoo tsahá tsi. Tan jatyinyeé xaan tsi tsi yo tsa nacoto yo nácaa taahán tsi tsinú iñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo.

<sup>17</sup> Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuvi yo iin ra cuiti yihí cuenda Nyoo tan javaha yo tandihí tsa vaha.

## 4

<sup>1</sup> Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyivi nyito tan nyivi tsihi quiñi cua quitsi ra cundaca ñaha ra tsihin tunyee iñi tsa iyó tsi ra.

<sup>2</sup> Cahán tuhun Nyoo tsihin nyivi. Tan ña jandihí un tsa jañiñi un javaha un tacan. Cahán tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, cahán tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan cunyee iñi cuatu nda nasama ñi cuhva iyó ñi. Tan jacuahá tsi ñi nácaa taahán tsi coo ñi.

<sup>3</sup> Tyin coo quiñi ña cua cunyee ca iñi nyivi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi.

<sup>4</sup> Tan cua tyaa tsiyo ñi tsa nditsa. Tan cua tyaa soho ñi tsa ña nditsa.

<sup>5</sup> Maa tyin yooho jaha cuenda tsi un tsihin tsa vaha tsicá iñi un. Cunyee iñi nyehé tundoho. Cahán tuhun Nyoo tsihin nyivi. Vaha javaha un tyiñu tsa tsahá Nyoo tsi un.

<sup>6</sup> Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu.

<sup>7</sup> Tsa yahá cañi tahan yu tumaa taahán maa tsi, tan tsa ndihí javahá yu tyiñu tsa tsahá Nyoo tsi yu tumaa iin ra tsinú suuhva, tun tsa tsaa ra nu taahán tsi cucuñi ra. Tan tacan ñi maa tsinú iñi yu tsi Nyoo.

<sup>8</sup> Tan vityin nu cuahán ca quiñi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoo yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyivi tsa ndatú tsi ra quiñi cua quitsi ra. Tyin intuhun ñi maa ra cuví ra tatsí tuñi vaha.

*Inga tyiñu tava ra Pablo tsi ra Timoteo*

<sup>9</sup> Janumi tan quitsi ñi un, quitsi nyehe un nu nyí yu.

<sup>10</sup> Tyin ra Demas nacoq ihñi ra tsi yu tyin cuñi ca ra tsa iyó ñuu ñayivi ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia.

<sup>11</sup> Intuhun ña ra Lucas nyí tsihin yu. Nanducu tsi ra Marcos tan quihin tsi ra quitsi tsihin un quivi quitsi un. Tyin cuvi jatyyee ra tsi yu tsihin tyiñu Nyoo.

<sup>12</sup> Jacuhun yu tsi ra Tíquico ñuu éfeso.

<sup>13</sup> Quivi quitsi un yaha un naquihin un jahma vixin yu tsa nacoq yu ñuu Troas vehe ra Carpo. Tan naquihin un tandihi libru yu, cundaha un quitsi tsihin un. Tsa ñiñi ca cuñi tsi cundaha un, yacan cuvi tandihi tutu yu.

<sup>14</sup> Ra Alejandro, ra cañi caa, cuha xaan tsa ña vaha javaha ra tsi yu. Maa Jutu Mañi yo cua natyahvi tsi ra tsa cuenda tandihi tsa javaha ra.

<sup>15</sup> Jaha cuenda vaha tsi un coto náa javaha ra tsi un. Tyin xaan xaan cuñi ra cuenda tuhun Nyoo tsa caahán yo.

<sup>16</sup> Tsa jihna ñi jacacu yu tsi yu nuu ra cumi tyiñu naha ra, yoñi maa jatyyee tsi yu. Tandihi ra naha nacoq ihñi ra naha tsi yu. Na jaha Nyoo tucahnu iñi tsi ra naha tsa cuenda yacan.

<sup>17</sup> Vasu ndi maa tandihi ra naha nacoq ihñi tsi yu, maa tyin Jutu Mañi yo jatyyee xaan ra tsi yu. Tan tsaha ra tunyee iñi tsi yu tan cuvi cahan catsi yu tuhun ra nuu nyivi. Tan tsiñi tandihi nyivi tsa ñavin ñi Israel cuvi tsa cahan yu. Tan jacacu Nyoo tsi yu tan ña tsatsi ndicaha can tsi yu.

<sup>18</sup> Tan maa Nyoo cua jacacu tsi yu ndaha tandihi tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndaca ñaha ra nda gloria. Tan taahán tsi jacahnu yo tsi ra tandihi ñi tyembu. Tan na cuvi tsi tacan.

*Nu ndihi cahan ra Pablo tan tsaha ra nacumi tsi nyivi*

<sup>19</sup> Cuhva nacumi tsi ña Prisca tan tsi ra Aquila tan tsi nyivi ra Onesíforo.

<sup>20</sup> Tan jacotó ndihi yu tsi un tyin ndoo ra Erasto ñuu Corinto. Tan ndoo ra Trófimo ñuu Mileto tyin cuuhvi ra.

<sup>21</sup> Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihi ca nyivi yihí cuenda Nyoo tsihin yo.

<sup>22</sup> Na quihí ndaha Jutu Mañi yo Jesucristo tsi un. Tan Nyoo nasoco tsi tandihi ndo.

Tan na cuvi tsi tacan ñi.

## Carta Tsa Jacuhun Ra Pablo Tsi Ra T̄ito

*Nu tyaa ra Pablo carta tsa cuenda ra T̄ito*

<sup>1</sup> Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñi Nyoo.

<sup>2</sup> Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandavi ñaha ra.

<sup>3</sup> Tan vityin tsa tahañ tsi quivi tsa tyaa Nyoo cuhva tyin coto yo tuhun ra. Maa ra cuví ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi.

<sup>4</sup> Jaquitsi yu carta ihya tsi un, Tito, tyin nditsa tyin cuví un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo aña un. Tan na cundaahvi iñi ra nyehe ra tsi un.

*Tyiñu tsaha ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta*

<sup>5</sup> Nacoó yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuví ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un.

<sup>6</sup> Tyin ra tsahnu cuví ityi nuu tsihin nyivi vehe ñuhu, cuñi tsi cuví ra iin ra iyó intuhun ñi ñasihhi, tan tsinú iñi tandihi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaa cuatyi siqui sehe ra. Tun tacan iyó ra, cuví cuví ra ityi nuu tsihin nyivi vehe ñuhu.

<sup>7</sup> Tyin ra cuví ityi nuu tsihin ñi yihí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuví ra iin ra cuiti iyó nuu Nyoo. Iin ra cahnu jahá tsi ña cuví cuví ra ityi nuu tsihin nyivi vehe ñuhu, ndi iin ra ndihi iñi, ndi iin ra tuhvá tsihi, ndi iin ra nducú tsihi, ndi iin ra jaha canaa xuhun tsihin iin cuhva ña vaha.

<sup>8</sup> Maa tyin cuñi tsi cuví ra iin ra siñi cuñi tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuví ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra.

<sup>9</sup> Cuñi tsi cunyicun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuaaha ra tsi nyivi caahán tyin ña nditsa tuhun caahán yo.

<sup>10</sup> Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandavi ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra.

<sup>11</sup> Cuñi tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun.

<sup>12</sup> Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyehen: “Nyivi Creta, vatya xaan ñi. Cuví ñi tumaa cuví quiti. Cuaha xaan tsatsi ñi tan jutsan xaan ñi”, catyi ra.

<sup>13</sup> Tan nditsa tsa cahan ra. Yacan cuenda cuñi tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo.

<sup>14</sup> Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñi coto tsa nditsa.

<sup>15</sup> Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñi ñi. Maa tyin tsa cuenda nyivi tsa ña tsinú iñi tan ña vaha tsicá



iñi, nduve maa iin tsa vaha cuñí ñi, tyin nda cuenda cuhva tsicá iñi ñi tan tsa tsiñi tuñi iñi ñi tan ña vaha.

<sup>16</sup> Catyí ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

## 2

### *Tuhun vaha tsa tsahq Nyoo tyin jacuahayo*

<sup>1</sup> Maa tyin yooho, jacuahá tsa vaha tsa nacatsí tahan tsihin tsa jacuahá Nyoo tsi yo.

<sup>2</sup> Jacuahá tsi ra tsahnu naha ra, na catsi coo ra naha, tyin tacan tan cua jaha nyívi tsa ñayívi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyívi. Tan cunyeer iñi ra naha tandihí náa tundoho nyehé ra naha.

<sup>3</sup> Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyívi tsihin cuhva iyó ñi.

<sup>4</sup> Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi.

<sup>5</sup> Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyívi vaha. Na cuhva ñi tsa cundaca ñaha yí ñi tsi ñi, tyin tacan tan ña cuví cahan nyívi ndavaha ñi síqui tuhun Nyoo tsa cuenda cuhva iyó ñi.

<sup>6</sup> Tacan tucu ra cuatyí naha ra. Cuhva cuenda tsi ra naha na catsi coo ra naha.

<sup>7</sup> Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuahá tsi ra naha tsihin tsa vii tan tsihin tsa vaha.

<sup>8</sup> Maa ñi tuhun vaha cahan un tyin tacan tan yoñi cuví tyaa cuatyí síqui un. Tan ra xaan iñi tsi ndo naha ra ña cua ñihi ra naha cuhva cahan ra naha ndavaha ñi síqui ndo tan cua nducahan nuu ra naha.

<sup>9</sup> Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihí tsa caahán tsitoho ra naha. Tan na ña nacahan ra naha nu caahán tsitoho ra naha.

<sup>10</sup> Tan na ña suhu ra naha tsa tsii tsitoho ra naha. Na jaha vaha ra naha cuenda tandihí ndaha tyiñu tsitoho ra naha, tyin tacan tan nyehe nyívi tyin vaha xaan tuhun Nyoo, ra jacacú tsi yo.

<sup>11</sup> Tyin Nyoo janahá ra tsa vaha tsa iyó tsi ra tsi nyívi tan cuñí ra jacacu ra tsi tandihí ñi.

<sup>12</sup> Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyívi tsa ña tsitó tsi ra, tan nacoo tucu yo tsa cuñí ñi can. Tan cuiti coo yo nu ñuhu ñayívi ihya, na cundaca ñaha vaha yo tsi yo tumaa cuñí maa Nyoo.

<sup>13</sup> Tan janahá tucu ra tsi yo nácaa cuatu yo tsa vaha tsa cua ñihi yo quívi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quívi quitsi ra cuví Nyoo yo, ra cahnu cuví, ra jacacú tsi yo.

<sup>14</sup> Tsahq ra ñayívi ra tsa cuenda yo tyin tacan tan jacacu ra tsi yo ndaha tandihí tsa caquiñi. Tan nacatyá ra tsi yo na cuví yo nyívi vaha, tan cuví yo tsii maa ra, tan javaha yo maa ñi maa tsa vaha.

<sup>15</sup> Yacan cuñí tsi jacuahá un tsi nyívi. Jandu iin iñi ñi. Tan cahan tsihin ñi tsihin sívi Nyoo. Tan ña javaha un tsa ña vaha tyin tacan tan ña ñihi nyívi nácaa cahan nyaa ñi tsi un.

## 3

### *Cuhva taahán tsi javaha nyívi yihí cuenda Nyoo*

<sup>1</sup> Janducuhun iñi tsi nyívi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi.

<sup>2</sup> Tan ña cahan ñi ndavaha ñi síqui nyívi. Ña cañi tahan ñi tsihin nyívi. Na

cuvi ñi nyivi vaha. Na masu jaha ñi añaima ñi tsihin tandihi nyivi.

<sup>3</sup> Tyin nda cuanda maa yo tan ña vaha javaha yo nu quitsi tsi. Soho xaan tsicoo yo. Ndava xaan iñi yo. Ña tsica yo ityi vaha tyin jandavi ñaha xaan nu ña vaha tsi yo. Tan tsindaca ñaha tandihi tsa ña vaha tsa cuñi cuñu ñuhu yo tsi yo. Tan javaha yo tandihi cuhva cuñi maa yo. Tan cuñi yo coo tandihi tsa iyó tsi inga nyivi tsi yo. Ndasí tsica iñi yo nyehe yo tsi nyivi yo. Tan tacan tucu maa nyivi ndasí cuñi ñi nyehe ñi tsi yo.

<sup>4</sup> Maa tyin Nyoo vaha xaan iñi ra tan jacacu ra tsi yo. Tsihin yacan janaha ra tsi yo tyin cuñi ra tsi tandihi nyivi.

<sup>5</sup> Ñavin tsa cuenda tsa vaha javaha yo tan jacacu ra tsi yo, tyin jacacu ra tsi yo tsa cuenda tsa cundaahvi iñi ra nyehe ra tsi yo. Tan tsihin niñi ra Jesús nacatya ra cuatyí yo, tan nacacu tsa yo jaha Tatyí Ii ra, tan tsahá ra ñayivi nyito coo yo.

<sup>6</sup> Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí Ii ra añaima yo.

<sup>7</sup> Tsihin tsa vaha maa ra tan janduvaha ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo.

<sup>8</sup> Tandihí tuhun ihya tuhun nditsa cuví tsi. Tan cuñi yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihí nyivi tatun tyaá yahvi ñi itsi.

<sup>9</sup> Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ícan cuñi ñi coto ñi nácaa vatsí tata nyivi. Ña tyihi un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve náa jatyinyee yacan. Tan nduve tsa tsiñi tuñi tsahá can.

<sup>10</sup> Tatun iyó nyivi cuñi natahvi sava tsi nyivi tsicá vehe ñuhu, çana tsi ñi iin

tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, çasi nu caca ñi vehe ñuhu.

<sup>11</sup> Tyin tsihin tsa javahá ñi tacan, tsa tsitó un tyin ña vaha añaima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

#### *Tyiñu tava ra Pablo tsi ra Tito*

<sup>12</sup> Cua jaquitsi yu tsi ra Artemas, a ra Tíquico nu nyii un. Tan quivi tsa ra, nducu cuhva tan cuhun un nda ñuu Nicópolis tyin ndacan cua ñihi tahan yo. Tyin tyaá yu cuhva tsa ndoo yu ndacan yoo vitsin.

<sup>13</sup> Nducu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cuhva tsa tsiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha.

<sup>14</sup> Na cutuhva nyivi yihí cuenda Nyoo javaha ñi tsa vaha tan jatyinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

#### *Nu ndihí cahan ra Pablo*

<sup>15</sup> Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñi tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandihí ndo.

Tan na cuví tsi tacan ñi.

## Carta Tsa Jacuhun Ra Pablo Tsi Ra Filemón

### *Nu quitsaha tyaá ra Pablo carta cuenda ra Filemón*

<sup>1</sup> Yuhu ra Pablo, nyii yu vehe caa tsa cuenda tsa caahan yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyi tucu ra Timoteo tyin jaquitsí ndihi ra nacumi tsi un. Cuñi xaan ndi tsi un tsa cuenda tsa iin ni tyiñu ra Cristo jahá tyiñu yo.

### *Nu quitsaha tyaá ra Pablo carta cuenda ra Filemón*

<sup>2</sup> Tan tyaá yu carta ihya tsa cuenda ña Apia tan ra Arquipo tyin jatyinyee xaan ni tsi yo tsihin tyiñu jahá yo, tan tyaá tucu yu itsi tsa cuenda tandihi nyivi ndu iin yuvehe un.

<sup>3</sup> Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo aña ndo.

### *Ra Filemón tsinú xaan iñi ra tsi ra Jesús tan cuñi xaan ra tsi nyivi*

<sup>4</sup> Tandihí ni tsaha tsa tsicán tahvi yu tsi Nyoo tan nducuhún iñi yu tsi un,

<sup>5</sup> tyin ñihí tuhun yu tyin tsinú xaan iñi un tsi ra Jesús tan cuñi xaan un tsi tandihi nyivi yihí cuenda ra.

<sup>6</sup> Tan tsicán yu tsi Nyoo tsa cuenda tandihí nyivi tsa natsinú iñi tsi ra Jesús jahá un tsihin tsa tsinú iñi un, tyin na cutuñi iñi ni tandihí tsa vaha tsa iyó tsi yo tsa cuenda ra Jesucristo.

<sup>7</sup> Tan sii xaan cuñi yu tan iin xaan cuñi yu tsa cuenda tsa cuñi xaan un tsi nyivi tsa yihí cuenda ra Cristo tan jandu iin xaan un iñi ni.

### *Nu tsicán ra Pablo tumañi iñi tsi ra Filemón tsa cuenda ra Onésimo*

<sup>8</sup> Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu.

<sup>9</sup> Maa tyin yuhu cuñi xaan yu tsi un, yacan cuenda ña cua tava tyiñu yu tsi un tyin cuñi yu ndacan yu iin tumañi iñi tsi un. Tan tsa tsitó maa un tyin

yuhu tsa tsahnu xaan yu tan nyii yu vehe caa ihya tsa cuenda ra Cristo.

<sup>10</sup> Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyii yu vehe caa ihya.

<sup>11</sup> Tahan tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatyinyee ra tsi yo, tahan ni tsi yooho tan yuhu.

<sup>12</sup> Yacan jaquitsí nyico yu tsi ra yuvehe un tan cuñi yu tsa naquihin cuenda un tsi ra tumaa tsa maa yu cuví ra.

<sup>13</sup> Tsicá tucu iñi yu tsa ndoo ra nu nyii yu vehe caa ihya tan jatyinyee ra tsi yu cahan yu tuhun Nyoo tsitsi tsa nduve un.

<sup>14</sup> Maa tyin ña cuñi yu jandoo yu tsi ra tyin ña tsitó yu nácaa cua cahan un. Tan ña cuñi yu jañiñi yu tsi un tun ña cuhva un tsa cunyi ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jahá tyiñu ra tsihin yu.

<sup>15</sup> Vasiqui maa Nyoo cuñi tsa cunu ra nuu un juhva quivi tan vityin cua tsa nyico ra yuvehe un tan coo cuii ra tsihin un.

<sup>16</sup> Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñi xaan yu tsi ra, yacan yooho taahán tsi tsa cuñi ca un tsi ra tan ñavin ca yuhu, tyin vityin ñavin musu ni un cua cuví tsi ra tyin cuví tucu ra yañi un tsa cuenda ra Cristo.

<sup>17</sup> Tun nditsa un tsa cuñi un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un.

<sup>18</sup> Tatun javaha ra iin tsa ña vaha tsi un o nyaá cuenda ra tsi un, tyahvi maa yu can.

<sup>19</sup> Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayivi iyó un tsi yu.

<sup>20</sup> Yañi, javaha tumañi iñi ihya tsi

yu, tuma ra yihí cuenda ra Cristo; na cusii ñi yu tan na ndu iin ñi ñi ñi yu tsihin tsa cua javaha un.

<sup>21</sup> Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaha ca tsa cua javaha un.

<sup>22</sup> Tan cuñi tucu yu tyin janduvaha un nu cusu yu yuvehe un tyin nyitá ñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

*Nu ndihi tyaa ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra*

<sup>23</sup> Ra Epafra tsa nyii ndihi vehe caa ihya tyin caahán ra tuhun ra Cristo Jesús jaquitsí ra nacumi tsi un.

<sup>24</sup> Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu.

<sup>25</sup> Na nasoco xaan Jutu Mañi yo Jesucristo tsi ndo.

Tan na cuvi tsi tacan ñi.



## Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

### *Caahán Nyoo tsihin yo tsihin yuhu Sehe ra*

<sup>1</sup> Tahán tsanaha cuaha xaan tsaha, tan cuaha xaan cuhva cahan Nyoo tsihin tsi tsaahnu yo. Tsa jihna ñi tsatyíñu ra tsi ra cuví ndusu yuhu ra. Juvín ra can naha ra tsahá cuenda tsi nyivi tuhun caahán Nyoo.

<sup>2</sup> Tan vityin, nu cua ndihi tyembu ihya tsatyíñu ra tsi Sehe ra tsa caahán ra tsihin yo. Iin ñi cuví ra tsihin Sehe ra tan javahá ra tandihi tsa iyó. Tan nacuhva cuenda ra tandihi can tsi Sehe ra.

<sup>3</sup> Tan maa Sehe ra janahá ra tsa sii caá ra, tyin juvin ra Sehe ra cuví tixahñu ra tyin juvin ñi cuhva caá maa ra caá ra Sehe ra. Tan tsihin tunyee iñi tuhun caahán ra, yihí ndaha ra tandihi tsa iyó. Tsa yahá tsa nacatyá ra cuatyí yo, tan tsinyaa ra xiin cuaha Nyoo nda gloria.

### *Cahnu ca cuví Sehe Nyoo tan ñavin ca ángel*

<sup>4</sup> Sehe Nyoo cahnu xaan ca cuví ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel.

<sup>5</sup> Tyin Nyoo ña catyí ra ndi iin tsaha tsihin ndi intuhun ángel tyehen:

Yooho cuví Sehe yu.

Tan tsahá yu ñayivi coo un vityín.

Tan ndi ña cahan ra tuhun ndi intuhun ángel tyehen:

Yuhu cua cuví Jutu ra.

Tan maa ra cua cuví Sehe yu.

<sup>6</sup> Maa tyin quivi jaquitsi Nyoo tsi Sehe mañi ra nu ñuhu ñayivi, catyí ra:

Tyin tandihi ángel ra taahán tsi jacahnu ra naha tsi Sehe ra.

<sup>7</sup> Tan cahan tucu ra tuhun ángel tan catyí ra:

Ángel yu cuví ra naha tumaa iin tatyí jahá yu,

jahá tyiñu ra naha tyiñu yu, tan cuví tucu ra naha tumaa ñuhu, catyí Nyoo.

<sup>8</sup> Maa tyin tuhun Sehe ra catyí ra tyehen:

Nyoo cuví un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

<sup>9</sup> Tyin cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sii cuñí un, tan ñavin ca tsi ra cutahán tsihin un naha ra.

<sup>10</sup> Tan catyí tucu Nyoo tsihin Sehe ra tyehen:

Yooho cuví Jutu Mañi tandihi nyivi. Quivi jihna ñi juvin un javahá ñuhu ñayivi,

tan tsihin ndaha un javahá un andivi.

<sup>11</sup> Ñuhu ñayivi tan andivi tan tandihi maa tsa iyó cua cundihí tsi, maa tyin yooho, ña cua cundihí un, tyin tacan ñi iyó maa un.

Tandihí maa can cua ndutsahnu can tumaa ndutsahnú jahma.

<sup>12</sup> Tan cua quihí tahnu can tumaa tyihí tahnu yo iin jahma.

Tan cua nasama can tumaa nasamá nyivi jahma ñi.

Maa tyin yooho iin ñi maa ra cuví un tan ña cua nasama un.

Tan ña cua cundihí maa ñayivi un tyin tacan ñi iyó maa un, catyí Nyoo tsihin Sehe ra.

<sup>13</sup> Nyoo ndi iin tsaha ña cahan ra tsihin ndi intuhun ángel tumaa cahan ra tsihin Sehe ra tyehen:

Cunyaa xiin cuaha yu ihya

tsitsi tsa nacuhva cuenda yu tsi nu xaan iñi tsi un nahnu tsi un.

<sup>14</sup> Tandihí ángel, tatyí cuví ra naha. Tava tyiñu Nyoo tsi ra naha tsa caca ra naha tyiñu ra tan jatinyee ra naha tsi nyivi tsa cua cacu.

## 2

### *Cahnu xaan cuví tsa jacacú Nyoo tsi yo*

<sup>1</sup> Yacan cuenda cuñí tsi tyaa yahvi xaan ca yo tuhun nditsa tsa tsiñi yo, coto nacoo ihñi yo itsi.

<sup>2</sup>Tahan tsanaha tsaha cuenda ángel ley Nyoo tsi ra Moisés. Tan janaha Nyoo tyin nditsa tan taahan tsi tyaa yahvi nyivi itsi. Tan nyivi tsa tsicoo cuatyí tan ña tyaa yahvi ley can, tatsi tuñi ra tsi ñi tumaa catyí maa ley can.

<sup>3</sup>Tun tacan tahan ñi can quivi can ¿nácaa cua javaha yoo vityin, tan cuvi cacu yo tatun ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihya. Juvín ñi maa Jutu Mañi yo Jesucristo cuví ra tsa cahan jihna tyin cuví cacu yo. Yaha can tan cahan nyivi tsa tsiñi tsa cahan ra. Nyehe ñi tyin nditsa tan nacatyí tuhun ñi itsi tsihin yo.

<sup>4</sup>Tan sñin tyin Nyoo janaha catsi ra tsi yo tyin nditsa tsa jacacú ra tsi yo. Janaha ra can tsi yo tsihin tsa javaha ra cuaha tsa iyo. Tan tsaha tucu ra Tatyí li ra tsi yo tyin jatyinyee tsi tsi yo tsa javaha yo tyiñu tsa cuñi ra javaha yo. Tan tsihin tandihi yacan janaha ra tsi yo tyin nditsa tsa jacacú ra tsi yo.

*Ra Jesucristo quitsi ra cuvi ra rayi nu ñuhu ñayivi ihya*

<sup>5</sup>Nyoo ña tsaha ra tsa cundaca ñaha ángel ñuhu ñayivi tsa tsa cua coo tsa caahan yo tuhun vityin.

<sup>6</sup>Tyin iyó iin nu tyaa iin ra nu tutu Nyoo tyehen:

Nyoo Jutu yu ¿yóo ra cuví rayi nu ñuhu ñayivi ihya tyin ñuhú iñi un tsi ra?

¿Tan yóo ra cuví ra tyin cutuñu iñi un tsa cuenda ra?

<sup>7</sup>Tyin ndaahvi ca jaha un tsi ra juhva tyembu, tan ñavin ca ra ángel naha ra.

Maa tyin jacahnu un tsi ra. Tan jaha un tsa ñayivi tsi ra.

Tan tsaha un tsa quihí ndaha ra tandihi tsa javaha un.

<sup>8</sup>Tandihí can tyaa cuenda un ndaha ra.

Tan nduve maa náa ña tsaha cuenda Nyoo quihí ndaha ra. Tan ñaha ca nyehé yo tyaa yahvi tandihi yacan tsi ra.

<sup>9</sup>Maa tyin nyehé yo tsi ra Jesús tyin nduluhlu ra jaha Nyoo juhva tyembu

tan ñavin ca ra ángel naha ra. Tan janduluhlu Nyoo tsi ra tsa cuenda tsa cuñi xaan ra tsi yo. Tan tsaha ra tsi ra Jesús quitsi ra quitsi cúu ra tsa cuenda tandihí yo. Tan vityin jahá xaan Nyoo tsa cahnu tsi ra tan jacahnú xaan ra tsi ra tsa cuenda tundoho tsa nyehe ra quivi can.

<sup>10</sup>Tandihí maa tsa iyó, tsa cuenda maa Nyoo cuví tsi. Maa ra javaha itsi. Tan cuñi ra cuhva ra tandihí tsa sñi caa tsa iyó andivi tsi tandihí sehe ra. Yacan cuenda janyehe ra tundoho tsi ra Jesucristo, ra tsa jacacú tsi yo, tan tsihin yacan janduvaha ra tsi ra.

<sup>11</sup>Ra Cristo tsa jacacú tsi yo, Sehe Nyoo tsi ra. Tan juvín ñi sehe Nyoo nanduvi yoo tsa tsinú iñi tsi ra. Yacan cuenda ña cahan nuu ra Cristo tsa caahan ra tyin yañi ra tan cuhva ra cuví tsi yo, tyin iin ñi Jutu yo tsihin ra.

<sup>12</sup>Tyin catyí ra Cristo nu tutu Nyoo tyehen:

Cua cahan yu tuhun un tsihin yañi yu.

Tan cua jacahnu yu tsi un tsihin yaa nu ndu iin yo.

<sup>13</sup>Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaha ra tsi yo, catyí ra.

<sup>14</sup>Yoo tsa cuví yo nyivi ñuhu ñayivi, iyó cuñu ñuhu yo tan niñi yo. Tacan cuvi ra Cristo, tyin tun tsa ña tsicoo cuñu ñuhu ra tan niñi ra, ña cua cuvi cúu ra tan janaa ra tsi nu ña vaha, nu tsa tsahñi tsi nyivi.

<sup>15</sup>Tacan javaha ra tan jacacu ra tsi nyivi tsa tsicoo yuuhví jaha tuhun tsihí. Cuví ñi tumaa musu nu ña vaha tyin tandihí ñi quivi tsicoo yuuhví ñi.

<sup>16</sup>Tan tsa nditsa vaha tyin ña quitsi ra quitsi jatyinyee ra tsi ángel. Tyin quitsi ra quitsi jatyinyee ra tsi nyivi tata ra Abraham.

<sup>17</sup>Yacan cuenda niñi cuñi tsi tsa cuví ra tumaa yoo tsa cuví yo yañi ra tan cuhva ra tyin tacan tan cuvi ra iin ra cundaahvi iñi tsi yo, tan cuvi ra jutu tsaahnu cuví ityi nuu tsa cuenda yo nuu Nyoo tyin jandaá ra

tandihí maa tan quihín nyaa ra cuatyí yo tsihin tundoho tsa nyehe ra.

<sup>18</sup> Tan tsa cuenda tsa nyehe ra tundoho quívi nducu cuhva nu ña vaha tsi ra, tsitó ra nácaa cuñí yo tun nyehé yo tundoho. Yacan vityin nyaá ra tsa jatyyinee ra tsi yo tun nyehé yo tundoho tsa nducú cuhva nu ña vaha tsi yo.

### 3

*Cahnu ca cuví ra Jesús tan ñavin ca ra Moisés*

<sup>1</sup> Nyooho, yañi, tsa jandu íí Nyoo, tan tsa nacatsí ra tyin coo ndo tsihin ra nda gloria, nyehe vaha ndo cuhva iyó ra Cristo Jesús, juvin ra jaquitsí Nyoo tyin caca ra tyiñu ra tan cuví ra jutu tsaahnu cuví ityi nuu tsa cuenda yoo tsa tsinú iñi tuhun ra.

<sup>2</sup> Ra Cristo javahá ra tandihí tsa cahán Nyoo tyin javaha ra, tumaa javahá tucu ra Moisés tyiñu tsa tsahá Nyoo tsi ra tsa jaha cuenda ra vehe Nyoo tsa cuví nyívi Israel.

<sup>3</sup> Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa vehe tsa javahá ra.

<sup>4</sup> Tyin maa ñi iyó ra javahá intuhun intuhun vehe, maa tyin Nyoo cuví ra tsa javahá tandihí maa tsa iyó.

<sup>5</sup> Ra Moisés tyaá yahvi ra tsi Nyoo tan javahá ra tyiñu tsa tsahá Nyoo tsi ra tyin jahá cuenda vaha ra vehe Nyoo tsa cuví nyívi Israel, tan juvin ñi jacoto tucu ra tsi nyívi tsa cua javaha Nyoo nu cuahán ca tsi.

<sup>6</sup> Maa tyin ra Cristo, Sehe Nyoo, tyaá yahvi tucu maa ra tsi Nyoo tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha iñi yo tsi ra nda cuanda nu ndihí, tan tacan ñi sñi cuñí yo ndatú yo tsa cua ñihi yo.

*Nyívi tsinú iñi tsi Nyoo, quitatú ñi tsihin ra*

<sup>7</sup> Yacan cuenda cuñí tsi jaha cuenda vaha yo tsi yo tumaa catyí Tatyí Ii Nyoo tyehen:

Tatun tsiñí ndo tsa caahán Nyoo tsihin ndo vityin,

<sup>8</sup> ña jandava ndo ánima ndo, tumaa javahá nyívi tsa ña tyaá yahvi tsi Nyoo

quívi nducu cuhva ñi tsi ra nu tsicá ñi nuu tsiquí.

<sup>9</sup> Tyehen catyí Nyoo:

Tsii tsaahnu ndo nducu cuhva ñi tsi yu,

vasu ndi maa nyehe ñi tsa javahá yu tsitsi tsa uvi xico cuiya.

<sup>10</sup> Yacan cuenda cuxaan yu tsihin nyívi can,

tan catyí yu tyehen: “Ña iin maa cuñí nyívi ihya

tan ña cuñí ñi cunyicun ñi ityi janahá yu tsi ñi.”

<sup>11</sup> Yacan cuenda cuxaan yu tsihin ñi, tan cahán catsi yu tsihin ñi,

tyin ña cua quitatu ñi tsihin yu, catyí Nyoo.

<sup>12</sup> Yacan cuenda yañi, jaha ndo cuenda tsi ndo tan ña caca uvi iñi ndo tsitsi ánima ndo coto jandihí ndo tsa tsinú iñi ndo tsi Nyoo nyito tan coto nacoo ndo tsi ra.

<sup>13</sup> Maa tyin jandu iin tahan ndo iñi ndo tandihí ñi quívi, tsitsi tsa tsahá tsi cuhva tsi ndo vityin. Tyin tacan tan ña cua ndundava ánima ndo, tan ndi intuhun ndo tan ña cua jandavi ñaha tsa caquiñi tsi ndo.

<sup>14</sup> Tyin tun ña jandihí yo tsa nyitá iñi yo tsi Nyoo nda cuanda naa ñuhu ñayívi tumaa javahá yo nda quívi quitsahá yo, cua ñihi yo tsa vaha iin caa ñi tsihin ra Cristo tyin cunyeé iñi yo ndatú yo tsi ra.

<sup>15</sup> Yacan tacan cuñí tsi jaha yo cuenda tsi yo tumaa catyí tutu Nyoo: Tatun tsiñí ndo tsa caahán Nyoo tsihin ndo vityin

Ña jandava ndo ánima ndo, tumaa javahá nyívi tsa ña tyaá yahvi tsi Nyoo —catyí tutu Nyoo.

<sup>16</sup> ¿Yóo nyívi cuví ñi tsiñi tsa cahán Nyoo tan ña tyaá soho ñi? Nyívi ihya cuví nyívi Israel tsa tava ra Moisés

Egipto tahan tsanaha. Juvín ñi can ña tyaa soho.

<sup>17</sup> Tan ¿yóo nyivi cuxaan Nyoo tsitsi tsa uvi xico cuiya? Juvín ñi maa ñi tyin tsicoo cuatyí ñi. Tan tsihi ñi nu tsiqui, juvín ñi maa nu tsica ñi.

<sup>18</sup> ¿Tan yóo tsihin cahan catsi Nyoo tyehen?:

—Ña cua quitatu ndo tsihin yu.

Juvín ñi tsihin ñi tsa ña tyaa soho can.

<sup>19</sup> Ihya nyehé yo tyin ña cuvi ñihi ñi quitatu ñi tsihin Nyoo tyin ña tsinu iñi ñi tsi ra.

## 4

<sup>1</sup> Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyin tacan tan ndi intuhun ndo tan ña cua ndoo ihñi ndo.

<sup>2</sup> Vityin yoo tsiñi tucu yo tuhun Nyoo tsa jacacú ra tsi yo, tumaa tsa tsiñi tucu maa nyivi Israel can. Tsiñi ñi itsi, maa tyin nduve nacatyí tsa tsiñi ñi itsi tyin ña tsinu iñi ñi itsi.

<sup>3</sup> Yoo tsa tsinu iñi tsi Nyoo, quitatú yo tsihin ra. [Maa tyin ña quitatu nyivi tsa ña tsinu iñi tsi ra] tyin catyí ra:

Yuhu cuxaan yu tsihin ñi tan cahan catsi yu tsihin ñi tyin ña cua quitatu ñi tsihin yu, catyí ra.

Vasu ndi maa [tacan cahan Nyoo tsihin ñi ican], maa tyin [tsa iyó tuhun tsa cuvi quitatu yo tsihin Nyoo nda quivi] ndihi jaha tyiñu ra javaha ra ñuhu ñayivi.

<sup>4</sup> Tyin yihí nu tutu Nyoo caahan tsi tyehen tuhun tsa tsinu utsa quivi nu ndihi vitya:

Tsa ndihi jaha tyiñu Nyoo, quitatú ra tsa tsinu utsa quivi.

<sup>5</sup> Tan catyí tucu tsi tyehen:

Ña cua quitatu ñi tsihin yu, catyí Nyoo.

<sup>6</sup> Nyivi tsa tsiñi jihna tuhun tsa jacacú Nyoo tsi yo ña cuvi quitatú ñi tsihin ra, tsa cuenda tsa ña tyaa yahvi ñi tsa cahan ra tsihin ñi. Maa tyin vityin ndi iyó ndatu tsa quitatu inga nyivi tsihin ra.

<sup>7</sup> Tsa yaha tsa ña tyaa yahvi nyivi Israel tsa cahan Nyoo, tan tyaa ra inga quivi cuvi quitatu yo tsihin ra, tan quivi can cuvi tyembu vityin. Tacan caahan Nyoo nu tutu ra nu tyaa ra David tyehen:

Vityin tatun nyooho tan tsiñi ndo tsa caahan yu,

Ña jandava xaan ndo aña ndo, catyí Nyoo.

<sup>8</sup> Tun tsatyin tsaha ra Josué nu quitatu nyivi Israel, ña cua cahan Nyoo tsa cuenda inga quivi.

<sup>9</sup> Yacan cuenda cuvi quitatu nyivi yihí cuenda ra tsihin ra.

<sup>10</sup> Tyin nyivi quitatú tsihin Nyoo, ña tsica iñi ñi tsa cuenda tyiñu jaha ñi tyin quitatú aña ñi tumaa quitatú Nyoo quivi ndihi jaha tyiñu ra.

<sup>11</sup> Cuñi tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javaha nyivi tsicoo tsanaha tsa ña cuñi tsinu iñi tsi ra.

<sup>12</sup> Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasiñ tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó aña yo tan tsa tsica iñi yo.

<sup>13</sup> Nduve maa tsa javaha Nyoo tan cuvi cunu xeehe can nuu ra, tyin tandihi maa tan nyehé ra. Tan juvín tsi ra cua cuhva cuenda yo tsa javaha yo.

*Ra Jesús cuvi jutu tsaahnu cuvi ityi nuu tsa cahan ndaahvi tsihin Nyoo tsa cuenda yo*

<sup>14</sup> Ra Jesús Sehe Nyoo, juvín ra cuvi jutu tsaahnu cuvi ityi nuu tsa cuenda yo, tyin quihvi ra nu nyaá Nyoo nda gloria tan caahan ndaahvi ra tsaha yo. Yacan cuenda na ña jandhi yo tsa tsinu iñi yo tsi ra.

<sup>15</sup> Tyin ra tsa cuvi jutu tsa cuenda yo cuvi naquihin ndaahvi ra tsi yo tatun cuihya cuñi yo, tyin tsitó ra



nácaa cuñí yo tun nyehe yo tundo-  
doho tyin maa ra nyehe tucu maa  
ra tandíhi nuu tundo ho quívi nducu  
cuhva nu ña vaha tsi ra, maa tyin ña  
tsicoo cuatyí ra.

<sup>16</sup> Yacan cuenda cuñí tsi nanducu  
yo tsi Nyoo tan ndacan yo tsi ra tsihin  
tsa ña yuuhví yo na cundaahvi iñi ra  
nyehe ra tsi yo tan cuhva ra tunyee  
iñi tsa iyó tsi ra tsi yo, tan jatyinyee ra  
tsi yo quívi nyehé yo tundo ho.

## 5

<sup>1</sup> Tandíhi ñi jutu tsaahnu tsa cuví  
ityi nuu tsa nacatsí Nyoo tsitsi tsa  
tandíhi nyívi Israel, nacatsí ra tsi ra  
naha tyin cahan ndaahvi ra naha  
tsaha ñi, tan cuhva cuenda ra naha  
tsa jamañi ñi tsi Nyoo, tan cahñi ra  
quíti tsa cuenda cuatyí ñi.

<sup>2</sup> Tan vatsí tsaha juvin ñi ndaahvi  
cuñí ra cuví jutu quívi nducú cuhva  
nu ña vaha tsi ra, yacan cuenda cuví  
cundaahvi iñi ra nyehé ra tsi nyívi ña  
cutuñí vaha iñi tuhun Nyoo tan nyívi  
ña nyicún vaha tsi Nyoo.

<sup>3</sup> Tan yacan cuenda tsahñí ra quíti  
tan jamañí ra can nuu Nyoo tsa  
cuenda cuatyí maa ra tan tsa cuenda  
cuatyí nyívi.

<sup>4</sup> Ndi intuhun maa nyívi tan ña  
cuví cuví ñi jutu tun ñavin maa Nyoo  
nacatsí tsi ñi. Tyin maa Nyoo cuví ra  
nacatsí tsi ra cua cuví jutu, tan tsahá  
ra ndatu tsi ra tsa cuví ra jutu, tu-  
maa javahá ra tsihin ra Aarón tahañ  
tsanaha.

<sup>5</sup> Tan tacan tucu ra Cristo, ñavin  
maa ra tyaá tyiñu can tsi ra, tyin maa  
Nyoo tsahá tsa cuví ra jutu tsaahnu  
tsa cuví ityi nuu, tumaa catyí ra:

Yooho cuví Sehe yu.

Yuhu tsahá yu ñayívi coo un vityin,  
catyí Nyoo tsihin ra Cristo.

<sup>6</sup> Tumaa catyí tucu ra tsihin ra nu  
inga nu caahán tsi tyehen:

Ña cua cundíhi maa tsa cuví yooho  
jutu,

tumaa cuví ra Melquisedec.

<sup>7</sup> Quívi tsicoo ra Cristo nu ñuhu ñayívi  
ihya, tsican tahvi ra tsi Nyoo, tsacu  
xaan ra cahan ra tsihin Nyoo tyin

juvin ra cua jacacu tsi ra ndaha  
tuhun tsihi tsihin tunyee iñi tsa iyó  
tsi ra. Tsiñi Nyoo tuhun caahán ra  
tsa cuenda tyin javahá ra tandíhi tsa  
catyí Nyoo tyin javaha ra.

<sup>8</sup> Yacan cuenda vasu ndi maa Sehe  
Nyoo tsi ra Cristo, cutuhvá ra tyaá  
yahvi ra tsi Nyoo tsihin tsa nyehe ra  
tundo ho.

<sup>9</sup> Tsa yahá tsa javahá ra tandíhi  
cuhva cuñí Nyoo tyin javaha ra, tacan  
tan tsahá Nyoo tsi ra tsa jacacú ra  
tsi tandíhi nyívi tsa tyaá yahvi tsa  
caahán ra tyin tacan tan coo cuii ñi  
tsihin Nyoo.

<sup>10</sup> Tyin maa Nyoo tava tyiñu tsi ra tsa  
cuví ra jutu tsaahnu cuví ityi nuu,  
tumaa cuví ra Melquisedec.

*Na ña jandíhi yo tsa tsinú iñi yo tsi  
Nyoo*

<sup>11</sup> Cuví cahan cuaha yo síqui tuhun  
ihya, maa tyin yí xaan nacatyí tuhun  
yu nácaa cuahán tsi, tyin nyoo ho ña  
cuñí ndo cutuñi iñi ndo.

<sup>12</sup> Tsa naha xaan yíhi ndo cuenda  
ra Cristo, yacan tsa taahán tsi jacuaha  
ndo tsi inga nyívi. Maa tyin nyoo ho  
cuví ndo tumaa cuví lee tsa tyaxín tsa  
ñaha ca cuví catsi tyin cuñí tsi tsa tyaá  
soho nyico ndo tuhun tsa tsiñi ndo tsa  
jihna ñi.

<sup>13</sup> Tyin nyívi cuñí tyaá soho tuhun  
tsa ña yí cuví ñi tumaa lee tsa tyaxín  
tyin ñaha ca cutuñi vaha iñi ñi nácaa  
coo vaha ñi tsihin Nyoo.

<sup>14</sup> Maa tyin nyívi tsa cutuñi vaha  
iñi tan tsahnú ñi tsihin tuhun Nyoo,  
juvin ñi cuví tumaa iin nyívi tsa tsatsí  
nyayu tyin nacotó ñi ndáa tsa vaha  
tan ndáa tsa ña vaha.

## 6

<sup>1</sup> Yacan cuenda ña ndoo yo vaha  
maa ñi maa tsihin tuhun ra Cristo tsa  
cutuhvá yo tsa jihna ñi; na cuhun yo  
ityi nuu ca tyin tacan tan cuahnu ca  
yo tsihin tuhun Nyoo. Na ña ndoo yo  
vaha tsihin tsa tsa yahá cutuhvá yo:  
tsa ña nducu yo cuhva nduvaha yo  
nuu Nyoo tsihin tsa javahá yo, tan tsa  
jacacú Nyoo tsi yo tsihin tsa tsinú iñi  
yo tsi ra.

2 Tan na ña ndoo yo vaha tsihin tuhun tsa cutuhva yo cuenda tsa tsi-coondutyá yo, tan tsa tyisó ndaha yo siqui nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihí nyivi tsa yaha cúu ñi, tan tsa cuenda tucu tsa cua cutuñi tandihí nyivi nuu Nyoo tan yihí ñi cua cuhun cuii ñi anyaya. Na ña ndoo yo vaha tsihin yacan ñi.

3 Nacuhun ca yo ityi nuu tatun Nyoo tsaha ra ndatu.

4 Tyin nyivi tsa tsa yaha naquihin cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí li Nyoo añima ñi.

5 Tan tsitó ñi tyin vaha tuhun Nyoo. Tan tsa nyehe ñi juhva nácaa cua cuvi tsa cua coo yo nu ñuhu ñayivi tsa, tyin ñihí ñi tunyee iñi tsa iyó tsi Nyoo.

6 Tatun tsa naquihin cuenda ñi tandihí yacan, yaha can tan jandihí ñi tsa tsinú iñi ñi tsi Nyoo, ña cua cuvi ca ndu uvi iñi ñi inga tsaha. Tyin tumaa tsa tyaá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyivi.

7 Añima nyivi cuví tsi tumaa ñuhu nu jahá tyiñu nyivi, tyin tandihí ñi tsaha tsa cuún savi, nacohó ñuhu can ndutyá savi can. Tatun vaha ñuhu can, vaha tsicoó tsa tatsí nyivi, tan nasocó Nyoo ñuhu can.

8 Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyivi tsa jandihí tsa tsinú iñi tsi Nyoo.

9 Yañi, vasu ndi maa caahán ndi tacan, maa tyin tsitó vaha ndi tyin nyoo nasocó Nyoo tsi ndo tyin jacacú ra Cristo tsi ndo.

10 Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñi xaan ndo tsi nyivi yihí cuenda ra, tan nyehé tucu ra tyin tsa yaha xaan jatyinyee ndo tsi ñi, tan ndi jatyinyee ca ndo tsi ñi vityin.

11 Cuñi ndi tsa jañihi ca ndo ndu iin iñi ndo nda cuanda quitsi Jutu Mañi

yo, tyin tacan tan ñihí ndo tandihí tsa ndatú ndo.

12 Ña cuñi ndi tsa jutsan xaan jaha ndo tsi ndo, maa tyin cuñi ndi tsa coo ndo tumaa iyó nyivi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyi Nyoo tyin cuhva ra tsi yo.

13 Tyin quivi tyihí Nyoo cuhva tyin cuhva ra tsa cua cuhva ra tsi ra Abraham, tsatyíñu ra juven ñi sivi maa ra, tyin ña cuvi cuatyíñu ra náa inga ca sivi tyin nduve nyivi cahnu ca cuví tan ñavin ca maa ra.

14 Tan catyi ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuvi jaha yu”, catyi ra tsihin ra.

15 Ra Abraham ñihí ra tsa catyi Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatú ra can.

16 Iin nyivi tun tyihí ñi cuhva tsa cuhva ñi tsa cua cuhva ñi tsi yo, tsatyíñu ñi sivi iin nyivi cahnu ca cuví tan ñavin ca maa ñi. Tsihin yacan ndoó ñi tuhun tsihin yo.

17 Nyoo tsatyíñu ra juven ñi sivi maa ra quivi catyi ra tyin cuhva ra tsa cuhva ra tsi nyivi ra. Javaha ra tacan tyin cuñi ra tsa coto ñi tyin cua jandaa ra tsa cahan ra tsihin ñi tan ña cua nasamá tuhun cahan ra.

18 Tan iyó uvi taahan tsa ña cuvi nasama. Iin tsi cuví tsa cuhva Nyoo tsa catyi ra tyin cuhva ra tsi yo, tan inga tsi cuví tsa tsatyíñu ra juven ñi sivi maa ra. Nyoo ña vatya ra. Yacan cuenda tandihí yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihí yo tsa catyi ra tyin cuhva ra tsi yo.

19 Tumaa iin yutun ndoo tsa tsicá nuu ndutyá ñuhu nuuhñi tsi tsihin iin caa vee coto cuhun tsi tsihin tatyí, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuví tsi tumaa tsa nuuhñi yo tsihin Nyoo ra nyaá Nu li Xaan inga tsiyo nu natahvi sava jahá jahma.

20 Ican quihvi ra Jesús tyin tacan

tan nuña ra ityi cahun yo nu nyaá Nyoo. Tan ña cua cundihi maa tsa cuví ra Jesús jutu tsaahnu cuví ityi nuu, tumaa cuví ra Melquisedec.

## 7

### *Ra Jesús cuví ra jutu tumaa cuví ra Melquisedec*

<sup>1</sup> Ra Melquisedec tsa caahán yu tuhun ihya, juvin ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandihi tsa iyó. Quivi tsa vatsí nuhu ra Abraham naha ra tsa yaha tsahan ra naha tsicañi tahan ra naha tsihin ra cuví rey naha ra, tan jahá canaa ra naha, ra Melquisedec jatahan ra tsi ra naha tan nasoco ra tsi ra Abraham.

<sup>2</sup> Tan cuaha tsa ñihi ra Abraham nu tsahan ra tsicañi tahan ra. Tsitsi tsa utsi utsi nuu tsa ñihi ra, tsaha ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuví tucu ra rey ñuu Salem, tan Salem cuñi tsi catyi “tsa taxin”. Yacan cuenda cuví ra: “Rey tsahá tsa taxin.”

<sup>3</sup> Ra Melquisedec nduve jutu ra tan sihi ra. Ña caahán tsi tun iyó nyivi ra, tan ndi ña caahán tsi ama cacu ra, tan ama tsihi ra. Yacan cuenda cuví jandu inducu yo tsi ra tsihin Sehe Nyoo, tyin ña tsindihi maa tsa cuví ra jutu.

<sup>4</sup> Nyehé yo ihya vityin tyin cahnu xaan cuví ra Melquisedec, tyin tsaha ra Abraham juhva tsa ñihi ra nu tsicañi tahan ra tsi ra.

<sup>5</sup> Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsaha ra Abraham juhva tsa ñihi ra tsi ra, tyin tsa yaha cuaha cuiya tan tsaha Nyoo ley tsi nyivi tata ra Abraham. Tan catyi ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyivi cuví ñi tsihin ra naha tyin juvin ñi tata ra Abraham cuví ra naha.

<sup>6</sup> Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihín cuenda ra juhva tsa ñihi ra Abraham. Tan nasoco ra Melquisedec tsi ra Abraham, ra tsa catyi Nyoo tsihin tyin cua cuhva ra tsa cuhva ra.

<sup>7</sup> Tan tsitó catsi yo tyin cahnu ca cuví ra tsa nasoco, tan ñavin ca ra tsa nasoco ra.

<sup>8</sup> Nyehé yo tyin cahnu ca cuví ra Melquisedec tan ñavin ca tandihi ra tsa quihín cuenda intuhun intuhun tsitsi tsa utsi utsi tsa ñihí nyivi, tyin rayi ñuhu ñayivi ihya ñi cuví ra naha, tan tuhvá ra naha tsihi. Maa tyin caahán tsi nu tutu Nyoo tan catyi tsi tyin ra Melquisedec nyito ra.

<sup>9</sup> Ra Leví tsihin sehe ra, tata ra Abraham cuví ra naha. Juvin ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyivi. Cuví catyi yo tyin tandihi ra can naha ra tyahvi ndihi ra naha tsi ra Melquisedec quivi tyahvi ra Abraham tsi ra.

<sup>10</sup> Cuví catyi yo tyin tyahvi ndihi tata ra Leví tsi ra Melquisedec quivi ñihi tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quivi can.

<sup>11</sup> Ra jutu tata ra Leví tsa cuví tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuví janduvahá ra jutu can naha ra tsi nyivi nyicún ley can, ña ñiñi cuñi tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec.

<sup>12</sup> Tyin tun nasamá Nyoo tsi ra cuví jutu, nasamá tucu ra ley ra.

<sup>13</sup> Jutu Mañi yo tsa caahán tutu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu.

<sup>14</sup> Tsitó vaha yo tyin Jutu Mañi yo tata ra Judá tsi ra, tan ra Moisés ña cahan ra tuhun tata ra Judá quivi cahan ra tuhun ra cuví jutu naha ra.

<sup>15</sup> Nditsa tsa nasamá Nyoo tsi ra jutu tyin jaquitsi ra iin jutu tumaa ra Melquisedec.

16 Ra jutu ihya ña quitsi ra tumaa catyi ley tsahnu, tyin ley can catyi tsi tyin maa ñi tata ra Leví taahán tsi cuvi jutu, tan ra can ñavin tata ra Leví cuvi ra. Maa tyin iyó tunyee iñi tsi ra tsa coo cuii ra, yacan cuenda juvin ra jaquitsi Nyoo.

17 Tyin tyehen caahán Nyoo tuhun ra:

Yooho ña cua ndihi maa tsa cuvi un jutu,

tyin cuvi un jutu tumaa ra Melquisedec.

18 Yacan cuenda nacoq Nyoo ley tsahnu can tyin ña cuvi jatyinyeé tsi tsi nyivi, tan ña cuvi cacu nyivi jahá tsi.

19 Ley can ña cuvi janduvaha tsi tsi nyivi nu Nyoo. Yacan cuenda tsaha ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuvi natuhún yo tsihin Nyoo. Yacan cuenda nyitá iñi yo tuhun can, tan tuhun can cuvi ra Cristo.

20 Nyoo cahan catsi ra tyin tacan cua cuvi, tan tacan cuvi.

21 Tandihí ca maa ra jutu tsa iyó vityin naha ra nduve náa cahan Nyoo tuhun ra naha. Maa tyin quivi tsaha Nyoo tsi ra Cristo tsa cuvi ra jutu, cahan catsi ra tsihin ra tumaa caahán nu tutu ra tyehen:

Cahan catsi Jutu Mañi yo, tan ña nasama ra tsa cahan ra nu catyi ra tyehen:

“Yooho ña cua ndihi maa tsa cuvi un jutu,

tyin cuvi un jutu tumaa ra Melquisedec”, catyi Nyoo.

22 Tsa cuenda tsa javaha ra Cristo, tan tsitó yo tyin vaha ca tyiñu ndoo Nyoo tsihin yo tan ñavin ca tsa jihna ñi can.

23 Jutu tsa cuvi tata ra Leví cuaha xaan ra naha tsa cuenda tyin tun tsi-ihí iin ra, nacosó inga ra.

24 Maa tyin ra Jesús nduve tuhun tsi-ihí iyó tsi ra, yacan cuenda ña tsindihí tsa cuvi ra jutu.

25 Tan tsa cuenda yacan cuvi jacacu ra tsi nyivi tsa nanducú tsi Nyoo. Tan tsahá ra tsa coo cuii ñi tsihin Nyoo

tyin tacan ñi iyó maa ra tan tsicán tahvi ra tsi Nyoo tsa cuenda ñi.

26 Ra Jesús cuvi jutu tsaahnu cuvi ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quita tsiyo ra nu iyó nyivi iyó cuatyí tan nandaq ra ityi siqui andivi.

27 Ra Jesús ñavin tumaa inga ra jutu tsaahnu can naha ra cuvi ra, tyin ra ican naha ra cuñi tsi cahñi ra naha quití tan jamañi ra naha nuu Nyoo tandihí ñi quivi. Jihna ca jamañi ra naha quití tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo.

28 Ley Nyoo tsa naquihin cuenda ra Moisés, tsahá tsi ndatu tsa cuvi ra naha jutu tsaahnu vasu ndi maa iyó cuatyí ra naha. Maa tyin tsa yaha quitsi ley can, cahan catsi Nyoo tan ndoo ra iin tuhun tsa tsihin yo. Tan tsaha ra tsi Sehe ra tsa cuvi ra jutu tsaahnu cuvi ityi nuu ca. juvin ra cuvi ra vaha tan ña cua cundihí maa tsa vaha ra.

## 8

*Quivi tsihi ra Jesús tsa cuenda yo tan ndoo Nyoo tuhun tsa tsihin yo*

1 Yacan tuhun ihya cuvi tsa ñiñi ca caahán yu: Ra jutu tsaahnu tsa iyó tsi yo ndi intuhun cuatyí ra nduve iyó, tan juvin ra tsinyaa nu tyayu tsa nyaá xiin cuaha Nyoo nda gloria.

2 Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javaha tan ñavin vehe ñuhu tsa javaha nyivi. Tyin vehe ñuhu tsa javahá nyivi cuvi tsi tixahñu tsa vaha tsa iyó nda gloria.

3 Tandihí ra jutu naha ra, cuñi tsi cahñi ra naha quití tan jamañi ra naha nu Nyoo tyin jaha Nyoo tuc-ahnu iñi tsi ra naha tan tsi nyivi. Yacan cuenda cuñi tsi jamañi ra Jesu-cristo tsa jamañi ra nuu Nyoo.

4 Tun tsatyin nyii ra nu ñuhu ñayivi ihya, ndi ña cuvi cuvi ra jutu. Tyin



nu ñuhu ñayivi ihya, iyó ra jutu tsa jamañi nuu Nyoo tsa catyí ley tsa tyaa ra Moisés tyin jamañi ra naha.

<sup>5</sup> Ra jutu tsa iyó nu ñuhu ñayivi ihya naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tahañ tsanaha quivi tsa cua javaha ra Moisés vehe ñuhu jahma, catyí Nyoo tsihin ra tyehen: “Jaha cuenda vaha, tan javaha tandihi tumaa janaha yu tsi un quivi tsañan un yucu Sinaí”, catyí Nyoo tsihin ra.

<sup>6</sup> Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoó Nyoo tuhun vaha xaan ca tsihin yo, tan vaha ca tsa tsahá ra tsi yo.

<sup>7</sup> Tun tsatyin cuví cacu yo jahá tuhun tsa ndoó jihna Nyoo tsihin yo, ña cuñí tsi tsa ndoo ra inga tuhun tsa tsihin yo.

<sup>8</sup> Maa tyin Nyoo nyehe ra tyin ña vaha javahá nyivi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsa quivi  
cua ndoo yu tuhun tsa tsihin nyivi  
Israel tan nyivi Judá.

<sup>9</sup> Maa tyin ñavin tumaa tuhun tsa ndoó yu tsihin tsii tsaahnu ñi, quivi tñin yu ndaha ñi tan tava yu tsi ñi ñuhu Egipto.

Ña javaha ñi tuhun ndoó yu tsihin ñi, yacan nacoó ihñi yu tsi ñi, catyí Nyoo Jutu yo.

<sup>10</sup> Tuhun tsa tsa cua ndoo yu tsihin nyivi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jiñi ñi,

tan cua tyaa tucu yu itsi añima ñi.

Tacan tan cua cuví yu Nyoo ñi,

tan maa ñi cua cuví nyivi yu.

<sup>11</sup> Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuví yu Nyoo ñi.

Tyin tandihi ñi tan cua nacoto ñi tsi yu,

ñi nyihi tan nda cuanda ñi tsahnu.

<sup>12</sup> Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

<sup>13</sup> Quivi tsa cahañ Nyoo tyin cua ndoo ra tuhun tsa tsihin yo, tsa jandut-sahnu ra tuhun tsa jihna ñi can. Tan tuhun tsa ndutsahnú tsa cua cundihí tsi.

## 9

*Nu janahá tsi nácaa iyó vehe ñuhu tsa iyó nu ñuhu ñayivi tan vehe ñuhu nu cuví nda gloria*

<sup>1</sup> Quivi ndoo Nyoo tuhun tsa jihna ñi tsihin nyivi, tsañ ra cuhva nácaa jacahnu ñi tsi ra, tsitsi vehe ñuhu tsa tsicoó nu ñuhu ñayivi ihya tahañ tsanaha.

<sup>2</sup> Tyehen tsicoó vehe ñuhu can: Tsitsi vehe tsa jihna ñi nyaá candileru, tan nyaá mesa nu yucu paan ii. Tan yacan tsinañi Vehe Ii.

<sup>3</sup> Tan vehe tsa tsinu uvi tsinañi Vehe Ii Xaan.

<sup>4</sup> Tsitsi vehe can tsinyaá altar xuhun cuaan nu tsahmí ra jutu cutu. Tan tsinyi tucu tsatun cuenda tsa ndoó Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyi yatsin xuhun cuaan nu yihí maná. Tan tsinyi yutun tsa tsindahá ra Aarón tsa quitá ita nuu. Tan tsiyucu tucu yuu nu nyaá tsa utsi ley Nyoo.

<sup>5</sup> Tan siqui tsatun can tsinyaá tsa caá tumaa caá ángel, tan cuñí tsi catyí tyin nyaá Nyoo ican. Nditsin ángel can tyasi nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

<sup>6</sup> Tacan tsicoó vehe ñuhu can. Tandihí ñi quivi quihví ra jutu naha ra tsitsi Vehe Ii, tan jacahnú ra naha tsi Nyoo.

<sup>7</sup> Maa tyin Vehe nu Ii Xaan, in-tuhun ñi maa ra jutu tsaahnu cuví

ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñí tsi cundaha ra niñi quití tyin jamañi ra itsi tsi Nyoo tsa cuenda cuatyí maa ra tan cuenda cuatyí nyívi, ñi tsa javahá soho ñi maa cuatyí.

<sup>8</sup> Tan tsa tacan tsicoo yacan Tatyí Ii Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe Ii cuñí tsi catyí tyin ñaha ca nuña ityi quihví ndáa nyívi tahan ñi maa tsi tsitsi Vehe nu Ii Xaan.

<sup>9</sup> Tandihí yacan cuví can tumaa tixahñu tuhun tsa tsa ndoo Nyoo tsihin yo vityin. Tahan tsanaha jamañi nyívi tsa jamañi ñi nu Nyoo maa tyin ña jatyinyee can tsi nyívi tsa jacahnú tsi Nyoo tsihin can, tsa caca vaha iñi ñi.

<sup>10</sup> Tyin tandihí tsa javahá nyívi can caahán tsi maa ñi tsa cuenda tsa tsaha Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsaha ra tsa javahá ñi tacan tsa numi ñi, nda tahan maa tsi quívi cuhva ra tsa vaha ca.

<sup>11</sup> Vityin tsa yaha quítsi ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyívi. Yacan cuñí tsi catyí tyin ñavin vehe ñuhu iyó nu ñuhu ñayívi ihya cuví nu quihví ra.

<sup>12</sup> Ra Cristo quihví ra tsitsi Vehe Ii Xaan. Maa tyin ña quihví ra tsihin tsa jamañi ra niñi mbee lee, o niñi indiquí lee. Quihví ra tsihin niñi maa ra, tan iin tsaha ñi quihví ra tan ña cuñí ca tsi tsa cuenda quihví ñi ra tyin jamañi ra niñi maa ra. Tsihin yacan jacacú cuii ra tsi yo.

<sup>13</sup> Ra jutu naha ra tuhvá ra naha quití niñi toro, niñi mbee, tan nyaa nu cayú indiquí lee tsi nyívi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá ñi.

<sup>14</sup> Tun tacan jatyinyee niñi quití can tsi nyívi, cuñí tsi catyí tyin niñi ra

Cristo cahnu ca tunyee iñi iyó itsi! Tyin nduve cuatyí ra tsicoo tan jamañi ra juven ñi tsi maa ra nuu Nyoo jahá Tatyí Ii tsa ña cua cúu maa. Tan niñi ra quihín nyaa tsa ña vaha tsa iyó ñi yó tsi anima yo tyin tacan tan ña cuita ca iñi yo ley tsa tsahá tuhun tsihi tsi yo, tan cuví jaha tyiñu yo tyiñu Nyoo nyito.

<sup>15</sup> Yacan cuenda ra Jesucristo cuví ra caahán ndaahvi tsaha yo tsa cuenda tuhun tsa tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahá yo quívi yihí ndaha tuhun jihna ñi can tsi yo. Tyin tacan tan yoo, tsa cana Nyoo cuví naquihin cuenda yo ñayívi tsa ña cua naa maa coo yo, tsa catyí ra tyin cuhva ra tsi yo.

<sup>16</sup> Tun iin nyívi tsihi tan nacoo ñi iin tutu nu tsahá cuenda ñi yóo nyívi cua naquihin tsa iyó tsi ñi, nyívi tsa cua naquihin ndaha tyiñu can cuví naquihin ñi can, maa tyin cuñí tsi janaha ñi iin tutu cuví tsandaa tyin nditsa tsa tsa tsihi ra tsa javahá tutu can.

<sup>17</sup> Maa tyin tun ndi nyito ra jatsii ndaha tyiñu can, ña cuví naha naquihin ñi ndaha tyiñu ra.

<sup>18</sup> Yacan cuenda quívi ndoo Nyoo tuhun tsahnu can tsihin nyívi Israel, tsahñi ra jutu naha ra quití tan tsatí niñi ti naha ti.

<sup>19</sup> Tsa ndihí tsaha cuenda ra Moisés ley Nyoo tsi tandihí nyívi, tan quihin ra jahma cuaaha tsa tsinu tsihin ixi mbee ticatyí tan iin soco yutun luhlu tsa nañí hisopo, jatyií ra can tsitsi nu yihí niñi indiquí lee tan niñi mbee luhlu tsa sacá nuu tsihin ndutya. Tacan tan quití ra niñi can nu libru nu nyaá ley Nyoo tan quití ndihí tucu ra can tsi nyívi.

<sup>20</sup> Tacan tan catyí ra tsihin ñi tye-hen: “Niñi ihya cuví tsandaa tsa cuenda tsa ndoo Nyoo tuhun tsihin yo”, catyí ra.

<sup>21</sup> Tan juven ñi quití tucu ra Moisés niñi can vehe ñuhu jahma can tan tandihí ndaha tyiñu tsa tsatyíñu ra jutu naha ra tsa jacahnú ra naha tsi

Nyoo.

<sup>22</sup> Tacan javaha ra naha tyin catyí ley Nyoo tyin tsa yatyin tandihí tsa iyó tan cuñí tsi nduvaha can nuu Nyoo tsihin niñi. Juvín ñi catyí tucu tsi tyin tun ña cati niñi ña cua jaha Nyoo tucahnu iñi tsi nyivi.

### *Niñi ra Cristo nacatyá cuatyí yo*

<sup>23</sup> Javaha ra jutu naha ra tacan tyin cuñí tsi tsa nduvaha tandihí ndaha tyiñu tsa cuví tixahñu tsa iyó nda gloria tsihin niñi quití. Maa tyin tandihí tsa iyó nda gloria, cuñí tsi nduvaha can tsihin niñi vaha ca, ñavin tsihin niñi quití ñi.

<sup>24</sup> Ra Cristo ña quihví ra tsitsi vehe ñuhu tsa javaha nyivi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo.

<sup>25</sup> Ra jutu tsaahnu cuví ityi nuu cuenda nyivi Israel quihví ra naha tsitsi Vehe li Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo.

<sup>26</sup> Tun tsatyin tacan, cuñí tsi tsa cuenda quitsi ñi ra nyehe ra tundoho tan cúu ra nda tsa tsinu ñuhu ñayivi tan nda cuanda vityin. Maa tyin vityin tsa tsa cuyatyin cundihí ñuhu ñayivi ihya, iin tsaha ñi quitsi ra Cristo, tan jamañi ra tsi ra tyin tacan tan cuví quihin nyaa ra cuatyí yo.

<sup>27</sup> Tumaa cua tahan yo: iin tsaha ñi cua cúu yo. Yaha can tan cua cutuñi yo.

<sup>28</sup> Tacan iin tsaha ñi tsihi ra Cristo, tan quihin nyaa ra cuatyí cuaha xaan nyivi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyivi ndatú tsi ra.

## 10

<sup>1</sup> Ley Nyoo tsa tyaá ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyivi nanducú tsi

Nyoo tyin maa ñi maa niñi quití jamañi ra jutu tsaahnu cuví ityi nuu naha ra tan iin tan iin cuiya. Tan ña cuví cacu yo tsihin yacan.

<sup>2</sup> Tun tsatyin cuví janduvaha ley can tsi nyivi, cua cundihí tsa jamañi ra jutu naha ra niñi quití tandihí ñi cuiya. Tyin tun tsa nduvaha nyivi tsa tsaha quití can iin tsaha tsa cuenda tandihí maa, ña cua caca ca iñi ñi tun iyó cuatyí ñi tan ña cuñi ca tsi tsa jamañi ra jutu niñi quití tsa cuenda ñi inga tsaha.

<sup>3</sup> Maa tyin tsa jamañi ra jutu naha ra niñi quití tan iin tan iin cuiya, janducuhún iñi tsi tsi nyivi tyin iyó cuatyí ñi.

<sup>4</sup> Tyin niñi indiqui tan niñi mbee lee, ña cuví nacatya can cuatyí nyivi.

<sup>5</sup> Yacan cuenda catyí tutu Nyoo tyin ra Cristo cahan ra tyehen tsihin Nyoo:

Ña cuñi un tsa jamañi nyivi quití nuu un,

yacan cuenda tsaha un tsa coo cuñu ñuhu yu.

<sup>6</sup> Tyin ña taahán iñi un tsa cahmi ñi quití tan jamañi ñi nuu cun tan quihin nyaa un cuatyí ñi.

<sup>7</sup> Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñi maa un tumaa nyaá tuhun yu nu libru ley maa un”, catyí ra Jesucristo.

<sup>8</sup> Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quití nuu ra. Ndi tsa cahmi ñi quití tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñi tsi jamañi nyivi quití nuu ra, catyí ra.

<sup>9</sup> Yaha can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñi maa un.” Tuhun ihya cuñi tsi catyí tyin quitsi ra jatsiyó cuii ra tsa jamañi nyivi tan jamañi ra tsa vaha ca.

<sup>10</sup> Tsa cuenda tsa javaha ra Jesucristo cuhva cuñi jutu ra tan janduvahá jutu ra tsi yo. Tsa javaha ra cuví tsa jamañi ra juvin ñi tsi maa ra. Javaha

ra tacan iin tsaha ñi tsa cuenda cuatyí nyívi.

11 Tandihí ñi quívi tan jamañi ra jutu cuenda nyívi Israel naha ra quití nuu Nyoo, tan cuaha xaan tsaha jamañi ra naha iin ñi maa nuu quití maa tyin ña cuví quihín nyaa can cuatyí nyívi.

12 Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaa ra nu tyayu nyaá xiin cuaha Nyoo.

13 Tan ndatú ra nda cuanda caquin Nyoo tsi nu xaan iñi tsi ra nahnu tsaha ra tyin cuañi ra síqui nahnu.

14 Tyin tsihin tsa jamañi ra tsi ra iin tsaha ñi tan janduvaha ra tsi nyívi yihí cuenda ra yoso cuahán quívi.

15 Tatyí li Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

16 Tuhun tsa tsa cua ndoo yu tsihin nyívi quívi can, tyehen cua cuví tsi, catyí Jutu Mañi yo:

Cua tyihi yu ley yu tsitsi añima ñi, tan cua tyaa yu itsi tsitsi tsa tsiñi tuñi iñi ñi, catyí ra.

17 Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

18 Yacan cuñí tsi catyí tyin tsa yaha jaha Nyoo tucahnu iñi tsi yo. Yacan cuenda ña cuñí ca tsi cahñi yo quití, tan jamañi yo nuu Nyoo tsa cuenda cuatyí yo.

### *Cuñí tsi nanducu yo tsi Nyoo*

19 Yacan cuenda yañi, vityin cuví quihvi yo tsitsi Vehe li Xaan nu nyaá Nyoo, tsa cuenda ñiñi ra Jesucristo tsa tsatí. Tsihin ñiñi can nacatyá ra cuatyí yo.

20 Tan nuñá ra ityi tsa, tan iin ityi cahun yo nu coo nyito yo. Tyin cuhva tsa tsihi ra tan ndatá jahma tsa tyasi tsa ña cuví quihvi yo nu nyaá Nyoo. Tsa ndatá jahma can, cuví tsa tsihi ra Cristo, tyin tacan tan cuví cahun yo nu nyaá Nyoo.

21 Ra Jesús cuví jutu tsaahnu cuví ityi nuu tsa ndacá ñaha tsi nyívi yihí cuenda Nyoo.

22 Yacan cuenda cuñí tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinú iñi yo tsi ra. Tyin maa ra janduvaha añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatyá ra cuñu ñuhu yo tsihin ndutya cuii, tan nduvaha yo nuu Nyoo.

23 Na ndu iin ca iñi yo tsinú iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo.

24 Tan cuñí tsi nanducu yo cuhva jatyinyee tahan yo tsi yo, na cuñi tahan ca yo tsi yo tan javaha yo tsa vaha.

25 Ña taahán tsi jandihí ndo tsa tsicá ndo tuhun Nyoo tumaa javahá inga nyívi tsa ña tsicá vaha. Tyin cuñí tsi jandu iin tahan yo iñi yo. Vityin tsa tsa nyehé yo tyin tsa cuyatyin quitsi nyico Jutu Mañi yo tan cua jacutuñi ra tandihí nyívi, cuñí tsi tsa jatyinyee tahan ca yo tsi yo.

26 Tyin tun tsa tsitó yo tsa nditsa tan javaha ca maa yo tsa ña vaha, nduve ca náca javaha yo tan cuví jaha Nyoo tucahnu iñi tsi yo.

27 Cua tatsi tuñi Nyoo tsi yo. Tan cua tyihi ra tsi yo nu yucú nyívi xaan iñi tsi ra. Tan ican cua cayu yo iin caa ñi tsihin ñi.

28 Tatun iin nyívi tsa nyitá iñi ley Nyoo tsa tyaa ra Moisés tan ña tyaa yahvi ñi tsa catyí ley can, tan tatun iyó uvi o uñi ra cuví tsandaa tsa cuenda tsa javaha ñi, cua cúu ñi tsa cuenda cuatyí ñi, tan yoñi maa cua cundaahví iñi tsi ñi.

29 Tan yaha ca cua tatsi tuñi Nyoo tsi nyívi caahán ndavaha ñi síqui Tatyí li ra tsa tsahá tsa vaha ra tsi yo, tan jandihí ñi tsa tsinú iñi ñi tsi Sehe ra tan jahá ñi tyin nduve yahvi nyaá ñiñi Sehe ra tsa janduvaha añima ñi. Tan tsihin ñiñi can ndoo Nyoo tuhun tsihin yo.

30 Tsitó yo tyin catyí Jutu Mañi yo



tyehen: “Maa yu taahán tsi tatsi tuñi tsi nyivi; tan juvin yu cua cahan náa taahán tsi tahan ñi.” Juvín ñi catyí tucu ra tyin maa ra taahán tsi jacutuñi tsi nyivi ra.

<sup>31</sup> ¡Cahnu xaan tundoho cua nyehe nyivi yosó ica tsi Nyoo nyito tsa cuenda cuatyí ñi!

<sup>32</sup> Maa tyin nyooho nducuhun iñi ndo nácaa cunyeē xaan iñi ndo nyehe ndo tundoho tsa yahā naquihin cuenda ndo tsa nditsin Nyoo tsitsi añima ndo.

<sup>33</sup> Yihí nyooho cahan nyivi tsi ndo, tan janyehe ñi tundoho tsi ndo nu tuvi nyivi. Tan yihí ndo cundaahvi iñi ndo nyehe ndo tsi nyivi vaha iñi tsi ndo tsa tahan juvin ñi tacan.

<sup>34</sup> Tan cundaahvi iñi ndo nyehe ndo tsi nyivi tsiyucu vehe caa. Cunyeē iñi ndo nyehe ndo tundoho tsihin tsa sñi cuñí ndo quivi quihin nyaa nyivi ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihi maa can.

<sup>35</sup> Yacan cuenda ña jandihí ndo tsa nyitá iñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú iñi ndo tsi ra.

<sup>36</sup> Cuñí tsi coo tsa taxin añima ndo tsitsi tsa cunyeē iñi ndo tyin tacan tan cuví javaha ndo cuhva cuñí Nyoo, tan naquihin ndo tsa catyí ra tyin cuhva ra tsi yo.

<sup>37</sup> Tyin nu tutu Nyoo catyí tsi tyehen:

Ña naha ca  
tan quitsi ra tsa nyaá quitsi, tan ña  
cua cucuee ca ra.

<sup>38</sup> Tan catyí Jutu Mañi yo tyehen:  
“Nyivi naquihín cuenda yu tumaa tsatyin vaha ñi, tsihin tsa tsinú iñi ñi tsi yu tan cua coo nyito ñi.

Maa tyin tatun jandihí ñi tsa tsinú iñi ñi, ña sñi cua cuñi yu tsihin ñi”,  
catyí Nyoo.

<sup>39</sup> Maa tyin yoo ña javahá yo tumaa javahá nyivi jandihí tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

## 11

*Cuhva cuñí tsi tsa tsinu iñi yo tsi Nyoo*

<sup>1</sup> Tsa tsinú iñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú iñi yo tsi Nyoo.

<sup>2</sup> Juhva nyivi yo tsa tsicoo tahan tsanaha quitā vaha ñi nuu Nyoo tyin tsinu iñi ñi tsi ra.

<sup>3</sup> Tsa cuenda tsa tsinú iñi yo tsi Nyoo, tan tsitó yo tyin javahā ra ñuhu ñayivi tsihin tuhun caahán ra. Tan tsitó yo tyin tahan tsanaha tsinu tandihí tsa nyehé yo vityin tsihin tsa ña nyehé yo.

<sup>4</sup> Tsa cuenda tsa tsinu iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihin cuenda Nyoo tsi ra tumaa tsatyin vaha ra, tan naquihin cuenda tucu ra tsa jamañi ra. Vasu ndi maa ña nyito ca ra Abel, maa tyin tsiñi yo nácaa tsinu iñi ra.

<sup>5</sup> Tsa cuenda tsa tsinu xaan iñi ra Enoc tsi Nyoo, tan naquihin Nyoo tsi ra tyin tacan tan ña nyehe ra tuhun tsiihí. Tan ña nañihí ca nyivi tsi ra, tyin cuanuhū ra tsihin Nyoo. Catyí tsi nu tutu Nyoo tyin tsa ndi cumañi ca naquihin Nyoo tsi ra, maa ñi maa cuhva taahán iñi Nyoo javahā ra.

<sup>6</sup> Maa tyin ña cuvi javaha yo tsa taahán iñi Nyoo tatun ña tsinú iñi yo tsi ra. Tyin tatun cuñí yo nanducu yo tsi ra, cuñí tsi tsinu jihna iñi yo tyin iyó ra, tan tsahá ra tsa vaha tsi nyivi nanducú tsi ra.

<sup>7</sup> Tahan tsanaha jacoto Nyoo tsi ra Noé náa cua cuvi ityi nuu. Vasu ndi maa ñaha ca coo can nyehé ra Noé, tsinu iñi ra tan javahā ra yutun ndoo tan ícan cacū ra tsihin nyivi vehe ra. Nyivi tsa ña tyaa yahvi tsa cahan Nyoo, tatsi tuñi ra tsi ñi. Maa tyin jacacu ra tsi ra Noé tan nduvahā ra nuu ra tsa cuenda tsa tsinu iñi ra tsi ra.

<sup>8</sup> Ra Abraham tsinu iñi ra tan tyaa yahvi ra tsi Nyoo quivi canā Nyoo tsi ra. Quitā ra nu ñuhu ra tan cuahán ra

nu ñuhu tsa cua cuhva cuii Nyoo tsi ra. Vasu ndi maa ña tsitó ra nu maa cuahán ra, maa tyin quitá ra nu ñuhu ra tan cuahán ra.

<sup>9</sup> Tsa cuenda tsa tsinu iñi ra Abraham tsi Nyoo, tsicoo ra nu ñuhu tsa ñaha ca nacuhva cuenda Nyoo tsi ra. Tsicoo ra tsitsi vehe jahma ñi. Juvín ñi tacan tsicoo tucu ra Isaac, sehe ra, tan ra Jacob, sehe ra Isaac. Tyin juvín ñi catyi tucu Nyoo tsihin nduvi taahan ra can naha ra tyin cua cuhva ra ñuhu can tsi ra naha.

<sup>10</sup> Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatú ra maa Nyoo tsaquin cuhva tsaha tsi tan samá itsi.

<sup>11</sup> Tan juvín ñi tsa cuenda tsa tsinu iñi ña Sara tsa cahan Nyoo tsihin ña, tsicoo iin sehe ña. Vasu ndi maa tsa tsahnu xaan ña, cuvi tsicoo sehe ña tyin maa Nyoo tsaha tunyee iñi ra tsi ña. Tacan cuvi tyin tsinu iñi ña tyin cua cundaa tsa cahan Nyoo tsihin ña.

<sup>12</sup> Yacan cuenda vasu ndi maa tsa cuñi cúu cuii ña ra Abraham, maa tyin tsicoo sehe ñasihí ra. Yahá can tan tsicoo cuaha nyivi tata ra. Tan yoñi maa cuvi nacahvi tsi ñi tyin cuaha xaan ñi, tumaa cuaha tiñuu iyó andivi tan tumaa cuaha nyiti iyó yuhu ndutya ñuhu.

<sup>13</sup> Tandihí nyivi can tan nyivi tata ñi tsihi ñi tsa ndi cumañi ca naquihín cuenda ñi tsa catyi Nyoo tsihin ñi tyin cuhva ra tsi ñi. Vasu ndi maa ña ñihí ñi can, tsinu iñi ñi tyin cua cuhva Nyoo can. Yacan cuenda sñi cuñi ñi tyin tsitó ñi tyin coo quivi cua nyehe ñi can. Tan sñi tucu cuñi ñi caahán ñi tyin yahá ñi maa ñi nu ñuhu ñayivi ihya.

<sup>14</sup> Tan tsa caahán ñi tacan, cuñi tsi catyi tyin ndi tsicá ñi nanducú ñi iin nu vaha ca coo ñi.

<sup>15</sup> Tun tsatyin ñuhú iñi ñi ñuu ñi nu quitá ñi, cuvi cunuhu nyico ñi iin yaha ñi.

<sup>16</sup> Maa tyin ña tsinuhu ñi ñuu ñi tyin cuñi ñi coo ñi ñuu vaha ca, tuhun ihya cuñi tsi catyi tyin cuñi ñi coo ñi nda andivi. Tan tsa tacan nducú ñi coo ñi nda gloria, ña cahan nuu Nyoo tsa

cuvi ra Nyoo ñi tyin tsa janduvahá ra iin ñuu nu coo ñi.

<sup>17</sup> Tsa cuenda tsa tsinu iñi ra Abraham tsi Nyoo, tyaa yahvi ra tsa cahan Nyoo tsihin ra tan jamañi ra tsi ra Isaac, sehe mañi ra, quivi nducu cuhva Nyoo tsi ra tun nditsa tsa tsinu iñi ra tsi ra. Javahá ra tacan vasu ndi maa catyi Nyoo tyehen tsihin ra:

<sup>18</sup> “Tsa cuenda ra Isaac tan cua coo nyivi tata un.”

<sup>19</sup> Vasu ndi maa cahan ra tacan tsihin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi can tsa nyaá ra Abraham tsa cahñi ra tsi ra Isaac, sehe ra. Maa tyin Nyoo nacuhva cuenda nyico ra tsi ra Isaac tsi ra. Tan cuvi can tumaa tsa janandoto Nyoo tsi ra.

<sup>20</sup> Juvín ñi tsa cuenda tsa tsinu tucu iñi ra Isaac tsi Nyoo, tan catyi ra tyin ra Jacob tan ra Esaú, sehe ra, cua ñihi ra naha tsa vaha nu cuahán ca tsi.

<sup>21</sup> Tsa cuenda tsa tsinu iñi ra Jacob tsi Nyoo, tan catyi ra tyin nduvi taahan sehe ra José cua ñihi ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnu ra tsi Nyoo tyin tsa tsahnu xaan ra.

<sup>22</sup> Juvín ñi tsa cuenda tsa tsinu iñi ra José tsi Nyoo, catyi ra tsa tsa cuñi cúu ra tyin cua quita nyivi ra, ñi Israel, ñuhu Egipto. Tan tsaha cuenda tucu ra tsi nyivi tyin quivi quita ñi na quihin ñi yiqui ra cuhun tsihin ñi.

<sup>23</sup> Tsa cuenda tsa tsinu iñi jutu ra Moisés tan sihi ra tsi Nyoo, tyihí xeehe ñi tsi ra uñi yoo tyin nyehe ñi tyin sñi xaan caá ra. Ña nayuhvi ñi tsa cahan ra rey tyin cuñi tsi cúu tandihí sehe yñi nyivi [tsa cuenda tyin tsitó ñi tyin cua jacacu Nyoo tsi ra].

<sup>24</sup> Tsinu tucu iñi ra Moisés tsi Nyoo. Yacan cuenda quivi tsahnu ra, ña cuñi ca ra cuvi ra sehe ñaha cuvi sehe ra rey ñuhu Egipto.

<sup>25</sup> Tan nacoo ra ñuhu Egipto can tyin ña cuñi ra cusñi iñi ra tsihin tsa javaha ra tsa caquiñi. Tan nacatsi ra tsa cua nyehe ra tundoho tsihin nyivi

Nyoo tan ñavin ca tsa cusii ñi ra tsihin tsa tsindihí ñi maa.

<sup>26</sup> Tsa cuenda ra Moisés, vaha ca tsa cuca ra Cristo tan ñavin ca tandihí tsa cuca tsa iyó Egipto. Yacan cuenda sii cuñi ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua kuhva Nyoo tsi ra.

<sup>27</sup> Juvín ñi tsa cuenda tsa tsinu ñi ra Moisés tsi Nyoo, ña nayuhvi ra quita ra ñuhu Egipto, vasu ndi maa cuxaan ra rey tsi ra. Tan cunyeë xaan ñi ra tyin tumaa tsatyin nyehe ra tsi Nyoo tsa ña nyehé yo.

<sup>28</sup> Juvín ñi tsa cuenda tsa tsinu ñi ra tava tyiñu ra na jacahnu tandihí nyivi Israel vico tan cahñi ñi iin mbee ticatyí luhlu. Tan tava tyiñu tucu ra na cahyi ñi ñiñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyivi Egipto, ña cahñi ra ndi intuhun sehe nuu maa ñi.

<sup>29</sup> Tsa cuenda tsa tsinu ñi ñi Israel tsi Nyoo tan yaha sava ñi nu Ndutya Ñuhu Cuaaha tumaa nu ñuhu ityi. Ra Egipto naha ra cuñi ndihí tucu ra naha yaha ra naha, maa tyin ña cuví yaha ra naha tyin nacasi Nyoo ndutya ñuhu can siqui ra naha tan tsihi ra naha jahá ndutya can.

<sup>30</sup> Juvín ñi tsa cuenda tsa tsinu ñi ñi tsico nduvi ñi utsa tsaha tsata ñuu Jericó, tan tandihí cuui maa nu sama tsaha ñuu can tani.

<sup>31</sup> Juvín ñi tsa cuenda tsa tsinu ñi ña Rahab, ñaha sii ñi tsica nuu tsa tsico Jericó, tan ña tsihi ña quivi tsihi tandihí nyivi ñuu ña. Ña tsihi ña tyin jatyinyee ña tsi ra Israel ra tsa tsahan naha ra tsinyehe ñuu ña. Tandihí ca ñi tsihi ñi tsa cuenda tsa ña tyaa yahvi ñi tsi Nyoo.

<sup>32</sup> ¿Náa ca cua cahan yu vityin? Tyin ña cuyatyí yu cahan yu tuhun tandihí ra naha, tumaa ra Gedeón, ra Barac, ra Sansón, ra Jefté, ra David, tan ra Samuel, tan ra cuví ndusu yuhu Nyoo naha ra tsahan tsanaha.

<sup>33</sup> Tsa cuenda tsa tsinu ñi ra naha tsi Nyoo, tan yihí ra naha jahá canaa ra naha tsi inga ñuu nahnu. Tan yihí

ra naha vaha xaan tsindaca ñaha ra naha nyivi cuenda Nyoo. Yihí ra naha ñihi ra naha tsa catyi Nyoo tyin kuhva ra tsi ra naha. Yihí ra naha jatyinyee Nyoo tsi ra naha quivi nducu cahñi ndicaha tsi ra naha.

<sup>34</sup> Yihí ra naha ña cayu ra naha jahá ñuhu tsitsi ono nu tyihí nyivi tsi ra naha. Yihí ra naha cacu ra naha tan ña tsahñi nyivi tsi ra naha tsihin mityi. Yihí ra naha tsaha Nyoo tunyee ñi tsi ra naha quivi nduve tunyee ñi tsicoo tsi ra naha, tan cuví cañi tahan ra naha tsihin nyivi xaan ñi tsi ra naha tan jahá canaa ra naha tsi ñi.

<sup>35</sup> Tsicoo juhva ñiñaha, tsa nandoto nyivi.

Juhva nyivi tsinuhñi ñi tan ndoho ñi jahá nyivi, maa tyin vasu ndi maa tacan tsahan ñi, cunyeë xaan ñi ñi tan ña cuñi ñi ndoo nuña ñi. Nyivi can catyi ñi tyin tun nadoo ñi tsi Nyoo ña cua nyehe ca ñi tundoho, maa tyin ñi ican ña cuñi ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayivi vaha ca.

<sup>36</sup> Inga ñi nyehe ñi tundoho jahá nyivi tyin caahán nyaa nyivi can tsi ñi tan cañi ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa.

<sup>37</sup> Yihí ñi tsahñi nyivi tsi ñi tsihin yuu. Yihí ñi tsahnya sava nyivi tsi ñi tsihin cierra. Yihí ñi nducu kuhva nyivi tsi ñi. Yihí ñi tsahñi nyivi tsi ñi tsihin mityi. Yihí ñi tsinditsi ñi ñi mbee ticatyí tan ñi mbee; nduve jahma vaha ñi tsicoo tan ndi nduve vehe ñi. Ndaahvi xaan tsicoo ñi, tan tsicoo xaan ñi tucuihaya ñi, tan nyehe ñi tundoho jahá nyivi tsa ña tsitó tsi Nyoo.

<sup>38</sup> Tan nyivi ndaahvi can vaha ca ñi nuu Nyoo tan ñavin ca inga ca nyivi. Tsica nuu ndaahvi ñi nu tsiqui tan nu iyó yucu. Tsicoo ñi tsitsi cava tan tsitsi ñuhu.

<sup>39</sup> Tandihí maa nyivi ndaahvi can vasu ndi maa vaha cahan Nyoo tuhun ñi tsa cuenda tsa tsinu ñi ñi tsi ra, maa tyin ña ñihi ñi tsa catyi ra

tyin cuhva ra.

<sup>40</sup> Tyin cuñí ra tsa ñihi ndihi ñi tsa vaha ca tsa tyaá ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

## 12

### *Na cuita iñiyo tsi intuhun ñi maa ra Jesús*

<sup>1</sup> Tandihí nyívi can quita vaha ñi nuu Nyoo tyin tsinu iñi ñi tsi ra. Tan vityin jandu iin ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñí tsi naco yo tandihí tsa jatyañú tsi yo, tan tandihí cuatyí tsa tuhvá jandavi ñaha tsi yo. Tan na cunyeé iñi yo cuhun yo ityi nuu ca tsihin Nyoo tsihin tsa taxin iyó aña yoo.

<sup>2</sup> Na nyehe yo tsi intuhun ñi maa ra Jesús tyin juvin ra jatyinyeé tsi yo tsa tsinú iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeé xaan iñi ra nyehe ra tundoho tan ña tyaá yahvi ra ticanuu tsa cua tahan ra tsa cúu ra nu cruu tumaa tsiihí iin nyívi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin sii xaan cua cuñi ra tsa yaha cúu ra.

<sup>3</sup> Jaha ndo cuenda cuhva tsicoo ra Jesús, tyin ra Jesús nyehe xaan ra tundoho jaha nyívi iyó cuatyí, maa tyin cunyeé iñi ra. Tacan tucu nyoocho, ña cundihí iñi ndo tan ña ndu uvi iñi ndo tsa nyicún ndo tsi ra.

<sup>4</sup> Tyin nyoocho ñaha ca nyehe ndo tundoho tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi.

<sup>5</sup> ¿A tsa naa iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyehen:

Sehe luhlu yu, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihaya iñi un tatun cuxaán yu tsi un.

<sup>6</sup> Tyin yuhu jaquihín ityi yu tsi nyívi cuñí yu, tan tatsí tuñi yu tsi nyívi cuví sehe yu, catyí Nyoo.

<sup>7</sup> Janyee ndo iñi ndo tan nducu ndo cuhva cutuhva ndo tun jaquihín ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyívi iyó sehe, jaquihín ityi ñi tsi sehe ñi.

<sup>8</sup> Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juvin sehe vaha ra cuví yo.

<sup>9</sup> Tan inga tucu tuhun, tsa ndi nyihi yo, jutu yo nu ñuhu ñayívi ihya jaquihín ityi ra naha tsi yo, tan jaha yo tsa ñayívi tsi ra naha. Tan vihi ca cuñí tsi tyaá yahvi yo tsi Jutu yo Nyoo, tyin tacan tan cuví coo cuii yo.

<sup>10</sup> Jutu yo tsa iyó nu ñuhu ñayívi ihya, jaquihín ityi ra naha tsi yo tsa cuenda juhva ñi quívi, tan javahá ra naha can cuhva cuñí maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra.

<sup>11</sup> Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

### *Ica xaan tun ña tyaá yahvi yo tsa caahán Nyoo tsihin yo*

<sup>12</sup> Yacan cuenda ña ndu uvi iñi ndo tsa javaha ndo tsa cuñí Nyoo javaha ndo, tan ña nducuihaya iñi ndo.

<sup>13</sup> Nducu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuihaya ca cua cuñi ndo.

<sup>14</sup> Jañiñi ndo tsi ndo tan coo vaha ndo tsihin tandihí nyívi. Nacoo ndo tandihí tsa ña vaha. Tyin nyívi tsa ña nacoo tsa ña vaha ña cuví nyehe ñi tsi Nyoo Jutu yo.

<sup>15</sup> Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihí ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi aña



ndo tan ña cua tiví ndo nuu Nyoo, tyin jahá cuenda vaha ndo tsi ndo.

<sup>16</sup> Nyoooho rayi ndi intuhun ndo tan ña çaça nuu ndo tsihin ñaha. Tacan tucu nyoooho ñaha, ña çaça nuu ndo tsihin rayi. Tan ña çaça iñi ndo tyin nduve yahvi nyaá tuhun Nyoo, tumaa tsica iñi ra Esaú, tyin ra Esaú xico ra tsa cuví ra ra tsitsa tsacatyí tsa catsi ra.

<sup>17</sup> Tsitó ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuví. Tsacu xaan ra, maa tyin ña ñihí ca ra cuhva nasama ra tsa tsa yaha javaha ra.

<sup>18</sup> Nyoooho ña taahán tsi javaha ndo tacan tyin tsa ndo nuu Nyoo, maa tyin ñavin tumaa tsa nyivi Israel nuu Nyoo quivi tsahan ñi yucu Sinaí tsa cuví nyehe yo. Nyehe ñi cayu ñuhu, tan ñihí xaan yihí tatyí xaan, tan naa xaan cuví.

<sup>19</sup> Tan tsiñi ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi

<sup>20</sup> tsa cuenda tyin ña cunyeé iñi ñi tsa tsaha cuenda ra tsi ñi Tyin catyí ra tyehen: “Nyivi natuhva tan cuañi tsaha yucu ihya cañi ndo tsi ñi tsihin yuu o tsihin lanza, tahan ñi nyivi tan quiti”, catyí Nyoo tsihin ñi.

<sup>21</sup> Nayuhví xaan ñi tsa nyehe ñi yacan, nda cuanda ra Moisés tan catyí ra: “Ñihí xaan ñihí yu jahá tsa yuuhví yu”, catyí ra.

<sup>22</sup> Maa tyin nyoooho ña nyehe ndo tsa yuuhví can tyin tsa ndo yucu nañi Sión tsa cuví ñuu Nyoo nyito. Tuhun ihya cuñi tsi catyí ñuu Jerusalén tsa canyí nda gloria, nu iyó cuenda mil ángel.

<sup>23</sup> Ndu iín ndo ican tsihin tandihí sehe Nyoo tsa iyó sivi nu libru nda gloria tan jacahnu ndo tsi ra. Natuhva ndo nuu Nyoo, ra cuví juee [tsa jandaa cuatyí] tandihí nyivi, tan natuhva ndo nuu tandihí aña nyivi vaha tsa janduvaha Nyoo.

<sup>24</sup> Natuhva tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndo Nyoo

tuhun tsaa tsihin yo. Tan niñi ra Jesús tsa tsatí tsahá tsa vaha ca tsi yo tan ñavin ca niñi ra Abel. [Tyin niñi ra Abel tsican tsi cuatyí tsaha ra yañi ra. Maa tyin niñi ra Jesús, jahá tucahnu iñi cuatyí yo.]

<sup>25</sup> Yacan cuenda cuñi tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyivi Israel tsa ña tyaa yahvi tsa cahan Nyoo quivi cahan ra yucu Sinaí nu ñuhu ñayivi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuví maa cacu yo.

<sup>26</sup> Tahan tsanaha jacanda Nyoo ñuhu ñayivi tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihí yu nda cuanda andivi.”

<sup>27</sup> Tsa caahán ra tyin cua jacanda ra inga tsaha, cuví cutuñi iñi yo tyin cua catsiyo tandihí tsa javaha ra tsa cuví nacanda. Tan cua ndoo tsa ña cuví nacanda.

<sup>28</sup> Nu ndacá ñaha Nyoo nu tsahá ra cunyece yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa ñi iñi aña yo, tan tyaa yahvi yo tsi ra, tyin yacan cuví tsa taahán iñi ra.

<sup>29</sup> Tyin Nyoo yo cuví ra tumaa ñuhu tsa tsahmí, tan cua janaa ra tandihí maa tsa ña vaha.

## 13

### *Na coo yo cuhva taahán iñi Nyoo*

<sup>1</sup> Ña jandihí ndo tsa cuñi ndo tsi tandihí nyivi yihí cuenda Nyoo tyin cuví ñi tumaa nyivi ndo.

<sup>2</sup> Ña ñaa iñi ndo tyaa nuu vaha ndo tsi nyivi tsaá vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javaha juhva nyivi.

<sup>3</sup> Ña ñaa iñi ndo tsi nyivi yucú vehe caa tumaa tsatyin yucú ndihí ndo tsihin ñi. Nducuhun iñi ndo

tsi nyivi nyehé tundo ho jahá nyivi. Cundaahvi iñi ndo tsi ñi tan jatyinyee ndo tsi ñi. Tyin tsitó ndo nácaa cuñi yo tun nyehe yo tundo ho.

<sup>4</sup> Nyoo ho nyivi tsa tsa tindaha, jaha tahan ndo tsa ñayivi tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayi tsicá nuu tsihin naha tan rayi iyó ñasihi tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayi tan ñaha tsa iyó yi tun coo ña tsihin inga rayi.

<sup>5</sup> Ña caça iñi ndo nácaa javaha ndo tan cuvi coo cuaha ca xuhun tsi ndo. Ndo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra.

<sup>6</sup> Tsa cuenda yacan cuví caahán yo tyehen tsihin tsa ñi iñi añima yo: Jutu Mañi yu juvin un jatyinyeé tsi yu, Yacan cuenda ña yuhví yu tun javahá nyivi náa javahá ñi tsi yu.

<sup>7</sup> Ndūcuhun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehé ndo tyin vaha iyó ra naha nuu Nyoo, tan cūanyicun ndo cuhva vaha tsinú iñi ra naha tsi Nyoo.

<sup>8</sup> Ra Jesucristo ña nasamá ra. Juvin ra iyó nda tsanaha, tan juvin ra iyó vityin. Tan juvin ra cua coo yoso cuahán quivi.

<sup>9</sup> Ña cūhva ndo jandavi ñaha nyivi tsi ndo tsihin tsa sñin sñin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo añima yo, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsí yo. Tan ña jatyinyeé can ndi tsi maa ñi.

<sup>10</sup> Tsati ñiñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyee ra Cristo tsi ra naha.

<sup>11</sup> Ra jutu tsahnu cuví ityi nuu cuenda nyivi Israel tsindacá ra naha ñiñi quiti tsitsi Vehe Ii Xaan tsa

cuenda cuaty nyivi, maa tyin cuñi ti tuhvá can cayú ityi tsata ñuu.

<sup>12</sup> Tacan tucu ra Jesús, tava tyiñu Nyoo tsi ra tsa nyehe ra tundo ho tan cúu ra ityi tsata ñuu Jerusalén, tyin tacan tan janduvaha ra tsi yo tsihin ñiñi ra.

<sup>13</sup> Na cunyicun yo tsi ra Cristo tan ña nducahan nuu yo vasu ndi maa vacu nducu nyivi tsi yo.

<sup>14</sup> Tyin tsa cuenda yoo nduve ñuu tsa ña cua cundihi maa nu ñuhu ñayivi ihya. Yacan cuenda nanducú yo iin ñuu tsa cua quitsi, tsa yaha naa ñuhu ñayivi ihya.

<sup>15</sup> Yacan cuenda vityin tsa iyó ra Cristo añima yo, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo.

<sup>16</sup> Ña naa iñi ndo javaha ndo tsa vaha. Tan jatyinyee tahan ndo tsi ndo tsihin tsa iyó tsi ndo, tyin yacan cuví tsa taahán iñi Nyoo.

<sup>17</sup> Tyaa yahvi ndo tsi ra jaquihín ityi tsi ndo naha ra; cūhva ndo tsi ndo cundaca ñaha ra naha tyin juvin ra naha jahá cuenda añima ndo. Tan coo quivi cua cuhva cuenda ra naha tyiñu jahá ra naha tsi Nyoo. Ndūcu ndo cuhva javaha ndo tsa vaha, tyin tacan tan sñi cua cuñi ra naha cuhva cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuihaya iñi, tan ña cua quita vaha ndo nuu ra.

<sup>18</sup> Ndācan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñi ndi javaha ndi.

<sup>19</sup> Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyi yu tsihin ndo.

*Nu ndihí cahān ra tan tsahá ra nacumi tsi ñi*

<sup>20</sup> Jutu Mañi yo Jesucristo tsa jandoto Nyoo, ra tsahá tsa taxin coo añima yo, juvin ra jahá cuenda tsi yo tsa cuví yo tumaa mbee jana ra. Tsihin ñiñi ra Cristo tsa tsati, ndo

Nyoo tuhun tsaa tsa ña cua cundihi maa tsihin yo.

<sup>21</sup> Tandihí tsa cuñí Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñí ra javaha ra. ¡Na jacahnu yo tsi ra Cristo yoso cuahán quiví! ¡Na cuvi tsi tacan ñi!

<sup>22</sup> Yañi, caahán ndaahvi yu tsihin ndo; janyee ndo ñni ndo tan javaha ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaa yu tsa cuenda ndo.

<sup>23</sup> Cuñí yu tsa coto ndo tyin ra Timoteo, yañi yo, tsa quitá ra vehe caa. Tatun yatyí tsaa ra, cua quitsi ra tsihin yu na quitsi yu quitsi nyehe yu nu yucú ndo.

<sup>24</sup> Cuhva ndo nacumi tsi tandihí ra jaquihín ityi tsi ndo, tan tsi tandihí nyiví yihí cuenda ra Cristo. Nyiví Italia nu nyíí yu, tsahá ñi nacumi tsi ndo.

<sup>25</sup> Tan na nasoco Nyoo tsi tandihí ndo. Na cuvi tsi tacan ñi.

## Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

*Nu tsahá ra Santiago nacumi tsi nyivi*

<sup>1</sup> Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsí yu nacumi tsi tandihí nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

*Tsa tsiñi tuñi tsa tsahá Nyoo tsi yo*

<sup>2</sup> Yañi, cusii ñi ndo tun cuaha tundoho nyehé ndo.

<sup>3</sup> Tyin tsitó ndo tyin tsihin tsa nyehé ndo tundoho tan cua cuahnu ca ndo tsihin tsa tsinú ñi ndo. Tan cua cunyeé ñi ndo nyehe ndo náa ndihí ca tundoho vatsí siqui ndo.

<sup>4</sup> Jaña ndo na quitsi maa tundoho can siqui ndo, tyin tun tsa cunyeé ñi ndo yaha ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihí maa tundoho tsa cua quitsi siqui ndo.

<sup>5</sup> Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyivi tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra.

<sup>6</sup> Maa tyin cuñí tsi ndacan yo itsi tsihin tsa tsinú vaha ñi yo. Tan ña caca ñi yo tyin ña cua cuhva ra itsi tsi yo. Tyin tun caca ñi yo tyin ña cua ñihi yo tsa tsicán yo, cuví yo tumaa ndutya ñuhu tsa tandahá tatyí ityi ihya tan ityi can.

<sup>7</sup> Ra tsa javahá tacan, ña taahán tsi caca ñi ra tyin cua cuhva Nyoo tsa tsicán ra.

<sup>8</sup> Tyin uvi xaan tsicá ñi ra. Ña tyaá ñi ra tsa tsicán ra, tyin ña iin cuñí ra. Vityin cuñí ra tsa cuñí ra, tan inga tsa cuñi tucu ra tyaan.

<sup>9</sup> Tatun iyó iin ra yañi yo, ndaahvi ra, na cusii ñi ra tyin cahnu cuví ra jahá Nyoo.

<sup>10</sup> Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii ñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can.

<sup>11</sup> Tyin ihñi xaan cuví tsitsi cuhu jahá ñicanyii. Tacan tan na ityi ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsiihí tsi ra tan cua cundihí tsa cuca ra.

*Nacaa cunyeé ñi yo nyehé yo tundoho*

<sup>12</sup> Sii xaan cuví tsi ra tsa cua cunyeé ñi nyehe tundoho tyin tsa yaha nyehe ra tundoho cua ñihi ra ñayivi nyito tsa catyi Nyoo tyin cuhva ra tsi ñi tsa cuñí tsi ra.

<sup>13</sup> Tatun ndáa nyooho tsicá ñi ndo tsa javaha ndo tsa ña vaha, ña cuñi ndo tyin Nyoo tsahá tsa caca ñi ndo tacan. Tyin Nyoo ña tsicá ñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha.

<sup>14</sup> Maa tyin nyooho tsa javahá tsa ña vaha, javahá ndo can tyin cuñí ndo javaha ndo can. Tan yacan cuenda tsicoó cuatyí ndo.

<sup>15</sup> Tatun cua cuhva yo tsa caca ñi yo tuhun ña vaha, coo quivi cua javaha yo cuhva tsicá ñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

<sup>16</sup> Yañi, cuñí xaan yu tsi ndo. Ña jandavi ñaha ndo tsi ndo.

<sup>17</sup> Tandihí tsa vaha tan tsa vii tsa ñihí yo, queé tsi ityi siqui tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama.

<sup>18</sup> Tan tsahá ra ñayivi tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñi maa ra.



*Ityi nditsa tsa taahán tsi cuhun yo*

<sup>19</sup> Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo.

<sup>20</sup> Tyin nyivi tsa cuxaán, ña javahá ñi tsa taahán iñi Nyoo.

<sup>21</sup> Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahvi jaha ndo tsi ndo tan tin cuenda vaha ndo tuhun Nyoo tsa tatsi ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo.

<sup>22</sup> Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatun tyaá soho ñi maa ndo itsi juvin ñi tsi maa ndo jandaví ñaha ndo.

<sup>23</sup> Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu.

<sup>24</sup> Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi.

<sup>25</sup> Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cua cuví tsi ñi ican tan cua quita vaha tandihí tsa javahá ñi.

<sup>26</sup> Tan nyivi tsa catyí tyin tuhun Nyoo yihí ñi, maa tyin yatyi xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juvin ñi tsi maa ñi jandaví ñaha ñi.

<sup>27</sup> Tyin tsa cuenda Nyoo, nyivi tsa nditsa tsinú iñi tsi ra juvin ñi cuví ñi tsa javahá tyehen: Jatyinyeé ñi tsi nyivi ndaahvi tsa tsihi yí, tan jahá cuenda ñi tsi tsa nyihí tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

## 2

*Na inducu ñi cuñi yo tsi nyivi tyin ña sin caá intuhun ñi tan inga ñi*

<sup>1</sup> Yañi, nyooho tsinú iñi ndo tsi Jutu Mañi yo Jesucristo, ra tsa cahnu

xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi.

<sup>2-3</sup> Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyaa nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsí ra jahma tyaahnyá, tan catyi ndo tsihin ra, “cunyaa nyityi juvin o cunyaa nu ñuhu ihya”.

<sup>4</sup> Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

<sup>5</sup> Yañi tsa cuñi xaan yu, tyaá soho ndo tuhun ihya: Nyoo nacatsi ra tsi nyivi ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyivi tsa cuñi tsi ra.

<sup>6</sup> Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahñi ndaahvi tsi ndo, tan tsindacá ñi tsi ndo nuu ra cumí tyiñu?

<sup>7</sup> Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

<sup>8</sup> Ley Nyoo tsa ñiñi ca catyí tsi: “Cuñi ndo tsi nyivi tumaa tsa cuñi ndo tsi maa ndo.” Tatun javahá ndo tsa catyí ley can, vaha javahá ndo.

<sup>9</sup> Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyí ley Nyoo tyin iyó cuatyí nyivi javahá tacan.

<sup>10</sup> Tyin tatun iin nyivi tsa tyaá yahvi tandihí ley, tan ña tyaá yahvi ñi intuhun tsi, cuví tsi tumaa tsa ña tyaá yahvi ñi tandihí ley.

<sup>11</sup> Tyin Nyoo catyi ra tyin ña coo inga ñaha tsi rayí, tun iyó ñasihí ra. Tacan tucu ñiñaha, tsa iyó yí, ña cuví coo inga rayí tsi ñi. Tan juvin ñi catyi tucu ra tyin ña cahñi yo nyivi. Yacan cuenda tatun iin ra nduve inga ñaha tsi ra, maa tyin tsahñi ra iin nyivi, juvin ñi ña tyaá yahvi ra tsa catyí ley.

<sup>12</sup> Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo.

<sup>13</sup> Tyin nyivi tsa ña cundaahví iñi tsi tahan ñi, Nyoo cua tatsi tuñi ra tsi ñi, tan ña cua cundaahví iñi ra tsi ñi. Maa tyin ñi tsa cundaahví iñi tsi inga ñi, cua quita vaha ñi quivi cutuñi ñi.

*¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?*

<sup>14</sup> Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinú iñi yo tsi Nyoo ñi tsi yo?

<sup>15</sup> Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un,

<sup>16</sup> Maa tyin yooho ña tsaha un jahma ra tan ndi tsa catsi ra tan catyí un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyí cahan un tacan tyin ña tsaha un tsa tsiñi ñuhu tsi ra.

<sup>17</sup> Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyivi, nduve yahvi nyaá catyí yo tyin tsinú iñi yo.

<sup>18</sup> Yihí ndo cua catyi ndo: “Yooho tsinú iñi un tsi Nyoo tan yuhu javahá yu tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyi yu tyin juvin ñi cahnu cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yu tun ña javaha un tsa vaha. Maa tyin yuhu cuví janahá yu tsa tsinú iñi yu tsi Nyoo tsi un tsihin tsa javahá yu tsa vaha.

<sup>19</sup> Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuhví nahnu tyin ña cua cacu nahnu.

<sup>20</sup> Ña soho xaan caça iñi un. Cutuñi iñi tyin tun tsinú iñi yo tan ña javahá

yo tsa vaha, nduve yahvi nyaá tsa tsinú iñi yo.

<sup>21</sup> Ra Abraham, tsii tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyí maa Nyoo tsihin ra.

<sup>22</sup> Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyí ra tsihin ra tyin javaha ra. Tan tsa javahá ra yacan, quituvi vaha tsa tsinú iñi ra tsi Nyoo.

<sup>23</sup> Tacan tan cundaá tsa catyí nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

<sup>24</sup> Tan ihya cuví nu cutuñi iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra.

<sup>25</sup> Tan tacan tucu ña Rahab tsa tsica nuu tsihin rayi. Yahá tsa javahá ña cuatyí, javahá ña tsa vaha quivi tsaha ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cuhun ra naha inga ityi. Tan tsa cuenda yacan, catyí Nyoo tyin vaha ña.

<sup>26</sup> Tan tacan tucu cuví cuñu ñuhu nyivi. Tatun nduve ca tsa nyitó ñi iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

### 3

*Nacaa jaha cuenda yo cuhva caahán yo*

<sup>1</sup> Nyooho yañi, ña yatyí xaan cuñi ndo cuví ndo ra cahan tuhun Nyoo. Tyin tsitó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyivi tsa ña caahán tuhun Nyoo.

<sup>2</sup> Tyin tandihí maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra naní cahnu cuñu ñuhu ra.

<sup>3</sup> Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnu ti.

<sup>4</sup> Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi ndáa ityi cuñí maa ra, vasu ñihi xaan yihí tatyí.

<sup>5</sup> Tan tacan tucu yaa yo, luhlu xaan tsi. Maa tyin cuaha tsa caquiñi cuví cahan yo tsihin tsi. Tumaa nu natiñin iin ñuhu luhlu iin cuhu cahnu tan cayu tandihí maa yutun.

<sup>6</sup> Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnu tsa jativí tsi nanñi cahnu cuñu ñuhu yo tan tandihí cuhva iyó yo ñayiví ihya, tyin juvin ñi maa nu ña vaha natyuhú itsi.

<sup>7</sup> Nyiví cuví jandumasu ñi tandihí maa nuu quiñi tsa iyó: saa, coo, tan quiñi tsa iyó tsitsi ndutya ñuhu.

<sup>8</sup> Maa tyin yoñi cuví jandumasu yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí ti venenu ti tsi nyiví, tan tsiihí ñi. Tacan cuví yaa yo.

<sup>9</sup> Tyin juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siqui nyiví tsa javahá Nyoo tumaa caá maa ra.

<sup>10</sup> Juvín ñi tsihin yuhu yo jacahnú yo tsi Nyoo. Tan juvin ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan.

<sup>11</sup> Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví.

<sup>12</sup> Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

### *Tsa tsiñi tuñi tsa vaha ca*

<sup>13</sup> Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin

javahá ndo can tsihin tsa tsiñi tuñi Nyoo tsa iyó tsi ndo.

<sup>14</sup> Maa tyin tatun nyiyo iñi ndo tsitsi añima ndo tan cuñí xaan ndo nduvaha ndo nu nyiví, ña cahnu jahá ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can.

<sup>15</sup> Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyiví ña tsitó tsi Nyoo tan cuhva tsica iñi nu ña vaha cuví can.

<sup>16</sup> Tyin tatun nyiyó iñi ndo tan cuñí ndo nduvaha ndo nuu nyiví, ticaña xaan tsicá iñi ndo. Tan iyó tucu tandihí inga nuu tsa ña vaha nu yucú ndo.

<sup>17</sup> Maa tyin tatun iyó tsa tsiñi tuñi Nyoo tsi ndo, cuiñi iyó ndo, catsi iyó ndo. Tan nducú ndo cuhva coo vaha ndo tsihin nyiví tsihin tsa vita iñi ndo, tan vaha nyiví cuví ndo. Tan catsi vaha tsicá iñi ndo, tan cundaahví iñi ndo tsi nyiví, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa ñi iñi ndo.

<sup>18</sup> Tatun iyó vaha yo tsihin nyiví, tan iyó taxin yo tsihin ñi, cua coo yo ñayiví cuiñi.

## 4

### *Ña taahán tsi javaha yo cuhva cuñí cuñu ñuhu yo*

<sup>1</sup> ¿Nacuenda iyó tsihi nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha.

<sup>2</sup> Iyó tsaha nda cuanda tsahñi ndo nyiví tyin cuñí ndo tsa cuñí ndo tan ña ñihí ndo can. Tatun nyehé ndo náa cuví can nyehé ndo, nyiyó iñi ndo can tan tsa ña ñihi ndo can quitsaha cañi tahan ndo. Ña ñihí ndo tsa cuñí ndo tyin ña tsicán ndo can tsi Nyoo.

<sup>3</sup> Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jativí ndo can tsihin tsa taahán iñi ndo.

<sup>4</sup> ¿Nacuenda javahá ndo cuhva cuñí nyiví, nyooho tsa ña tsinú vaha iñi tsi Nyoo? ¿A ña tsitó ndo tyin tun javahá

yo cuhva cuñi nyivi, ñi xaan iñi tsi Nyoo cuví yo?

<sup>5</sup> Tan yacan iyó cuenda catyí nu tutu Nyoo tyin Tatyí Ii tsa tsahá ra coo añima yo, cuñi xaan tsi tsi yo tan cuiñu xaan tsi tsi yo tyin cuñi tsi tsa jacahnu yo tsi intuhun ñi maa ra.

<sup>6</sup> Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyí ra tyin jatyinyeé ca ra tsi nyivi ndaahvi tsa tsitó tyin tsiñi ñuhu ra tsi ñi. Tan ña cuñi ra nyehe ra tsi ra tsa cahnu jahá tsi.

<sup>7</sup> Yacan nacuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo.

<sup>8</sup> Nducu ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyoocho, nyivi iyó cuatyí, jandundi ndo tsi ndo. Tan nyoocho tsa tsicá iñi tyin cuví javaha ndo tsa iyó nu ñuhu ñayivi ihya tan juvin ñi cuhva can tan jacahnu tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndundi ndo nuu ra.

<sup>9</sup> Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sñi cuñi ndo, vacu ndo tsihin tsa cuiihya cuñi ndo. Tan tsa sñi cuñi ndo na nanduvi tsi tucuiihya iñi.

<sup>10</sup> Ndaahvi jahá ndo tsi ndo nuu Jutu Mañi yo, tyin tacan tan janduc-ahnu ra tsi ndo.

### *Ña cahan nyaa ndo tsi nyivi*

<sup>11</sup> Yañi, ña cahan ndo ndavaha ñi siqui iin yañi yo. Tyin nyivi caahán ndavaha ñi siqui nyivi, o caahán nyaa ñi nyivi, siqui ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa tyaá yahvi yo tsa caahán ley can.

<sup>12</sup> Tyin intuhun ñi ra tsahá ley can. Tan juvin ñi ra cuví Juez. Tan juvin ra cuví ra jacacú tsi yo, o jacunaá tsi yo. Tan ¿yocho yóo ra cuví un tyin cahan

nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

### *Ña tsitó yo náa cua cuvi tsi yo tyaan, yacan cuenda ña taahán tsi cahnu jaha yo tsi yo*

<sup>13</sup> Yihí ndo catyí ndo: “Vityin o tyaan cuhun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaa soho ndo tsa cua cahan yu ihya:

<sup>14</sup> Ñayivi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuvi tyaan tan catyí ndo tyin cuhun ndo.

<sup>15</sup> Vaha ca cahan ndo tyehen: “Coo yo juhva ca quivi tan javaha yo tsehe o yacan, tun Jutu Mañi yo tan cuñi ra.”

<sup>16</sup> Maa tyin nyoocho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan.

<sup>17</sup> Tyin yoo tsa tsitó javaha tsa vaha tan ña javahá yo can, tsicoó cuatyí yo.

## 5

### *Nu tsahá cuenda ra Santiago náa cua tahan nyivi cuca*

<sup>1</sup> ¡Tyaa soho ndo tuhun caahán yu ihya, nyoocho nyivi cuca! Vacu ndo tsihin tsa cuiihya cuñi ndo, cana tsaa ndo tsa cuenda tundocho tsa cua nyehe ndo.

<sup>2</sup> Tyin tsa cuca tsa jacayá ndo, tsa ndihi can tyaahyú. Tan jahma vaha ndo, tsa ndihi maa can tsatsi tiquixin.

<sup>3</sup> Xuhun cuaan tan xuhun cuitsin ndo tsa ndihi can cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuvi tumaa ñuhu tsa cua cahmi tsi ndo. ¿Nacuenda jacayá ndo tsa cuca nu cua ndihi quivi ihya?

<sup>4</sup> Tan ña tyahvi ndo yahvi tsa taahán tsi tsi nyivi ndaahvi tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihi ángel tsa cuví andaru cuenda ra. Tan maa



Jutu Mañi yo tsiñi ra tuhun caahán ñi ndaahvi can.

<sup>5</sup> Iyó vaha xaan ndo nu ñuhu ñayivi ihya tyin cuca ndo. Tan javahá ndo cuhva cuñi maa ndo. Tumaa tuhvá nyivi janduxaahán quini tyin cuu ti, tacan javahá ndo tsihin ndo. Tan vityin tsa tsaá quivi tsa cua cuu ndo.

<sup>6</sup> Tyin tyaa ndo cuatyí tsaha nyivi vaha tan tsahñi ndo tsi ñi. Tan ndi ña cahan ñi cuatyí siqui ndo.

*Na cunyeé iñi yo cuatu yo tsi ra Cristo*

<sup>7</sup> Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihi cuun nyico tsi, tan naquihin ra tsa tatsi ra.

<sup>8</sup> Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuí quitsi ra.

<sup>9</sup> Yañi, ña tyaa ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñi quitsi ra.

<sup>10</sup> Yañi, quihin cuenda ndo cuhva tsicoo ra cuvi ndusu yuhu Nyoo tahan tsanaha. Tyin ra ican naha ra cunyeé xaan iñi ra naha nyehe ra naha tundoho quivi tsaha cuenda ra naha tuhun Jutu Mañi yo.

<sup>11</sup> Tsitó yo tyin sii xaan cuñi ra tsa cunyeé iñi nyehé tandihi nuu tundoho, tumaa tsa cunyeé xaan iñi ra Job nyehe ra tundoho. Tan nu ndihi ña, cuaha xaan tsa vaha tsaha Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahvi iñi ra nyehé ra tsi yo.

<sup>12</sup> Maa tyin yañi, ña cahan ndo: “Naha Nyoo maa”. Tan ña cahan ndo: “Tsitó vaha maa ra nyaá gloria”, tan ndi ña cahan ndo: “Tsitó vaha maa ra javaha ñuhu ñayivi”, tan ndi ña cahan ndo inga ca tuhun tahan can. Tatun nditsa tuhun caahán ndo, “nditsa” catyi ndo. Maa tyin tatun tsitó ndo tyin ña nditsa, catyi ndo tyin “ña nditsa”, coto tatsi tuñi Nyoo tsi ndo.

<sup>13</sup> Tun ndáa nyooho nyehé tundoho, ndacan tahvi ndo tsi Nyoo. Tan nyooho tsa sii cuñi, cata ndo yaa Nyoo.

<sup>14</sup> Tan nyooho tsa cuuhvi, cana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo.

<sup>15</sup> Tan tatun tsinú iñi ra naha tsi Nyoo cuhva tsa tsicán tahvi ra naha, nyivi cuuhvi can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoo ñi cuatyí, Nyoo cua jaha ra tucahnu iñi tsi ñi.

<sup>16</sup> Yacan cuenda nahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyivi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo.

<sup>17</sup> Tumaa ra Elías ra cuvi ndusu yuhu Nyoo tahan tsanaha. Cuví ra iin rayi tumaa maa yo. Tan tsican tahvi ra tsi Nyoo tyin na ña cuun savi. Tan ña cuun savi uñi cuiya sasava.

<sup>18</sup> Yaha can tan tsican tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsi nyivi.

<sup>19</sup> Yañi, tatun iin nyivi tahan ndo nacoo ñi tuhun nditsa Jutu Mañi yo, tan cuanuhu ñi ñayivi inga tsaha, tan jatyinyeé ndo tsi ñi tsa nanducu nyico ñi ityi Nyoo,

<sup>20</sup> coto ndo tyin tsa javaha ndo tacan tsihin ñi, jacacu ndo aña ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

## Carta Tsa Jihna Ñi Tsa Jacuhun Ra Pedro Tsi Nyivi Yihí Cuenda Nyoo

*Nu quitsaha tyaá ra Pedro carta tsa cuenda nyivi yihí cuenda Nyoo*

<sup>1</sup> Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví.

<sup>2</sup> Tyin nda tsanaha tan nacatsi vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsi ra tsi ndo, jatyinyee Tatyí Ii ra tsi ndo tan nacuhva ndo tsi ndo tsi ra, tan tyaá yahvi ndo tsi ra Jesucristo vityin, tan ndundií ndo tsihin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

*Cuita iñi ndo tyin cua ñihi yo ñayivi tsa coo yo*

<sup>3</sup> Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsa yo inga tsaha tyin janandotó ra tsi ra Jesucristo. Yacan cuenda cuita iñi yo tyin cua ñihi yo ñayivi tsa tsa ña cua naa maa.

<sup>4</sup> Tan tsa cuenda tsa nacacu tsa yo, Nyoo cua cuhva ra tandihi tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita.

<sup>5</sup> Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihi cacu yo. Tan cua janaha ra tsi yo náa cuñi tsi catyi tsa cacú yo nu cua ndihi tyembu tyin tsa ndatú vaha can tsi yo.

<sup>6</sup> Yacan cuenda sií cuñi ndo, vasu ndi maa nyehé ndo tandihi nuu tundoho juhva quivi vityin.

<sup>7</sup> Tyin tandihi maa tundoho can tan taahan tsi nyehe yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmi yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

<sup>8</sup> Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sií xaan sií xaan cuñi ndo nda cuanda ña cuví ñihi ndo cuhva catyi ndo najava cuhva tsa sií cuñi ndo,

<sup>9</sup> tyin nu ndihi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

<sup>10</sup> Ra ndusu yuhu Nyoo tsa tsicoo tahan tsanaha nducu tuhun ra naha nácaa cua cacu yo. Tan nducu ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo.

<sup>11</sup> Tan Tatyí Ii ra Cristo tsa iyó tsihin ra naha jacotó tsi tsi ra naha náa ndihi tundoho cua nyehe ra Cristo, tan nácaa cua jacahnu Nyoo tsi ra. Tan nducu xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyi Tatyí Ii tsihin ra naha.

<sup>12</sup> Maa tyin jacotó Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihí tsa cahan ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa cahan tuhun ihya naha ra, maa Tatyí Ii Nyoo jacahan tsi ra naha. Tan ra ángel naha ra cuñi xaan ra naha coto ra naha tuhun ihya.

*Nyoo caná ra tsi yo tyin coo yo ñayivi cuiti*

<sup>13</sup> Yacan cuenda jaha vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua kuhva Nyoo tsi yo tsa cuenda tsa vaha iñi ra.

<sup>14</sup> Coo ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoo ndo quivi tsa ndi cumañi ca nacoto ndo tsi Nyoo tyin tsanaha tsindaca ñaha tsa ña vaha tsa cuñi cuñu ñuhu ndo tsi ndo.

<sup>15</sup> Maa tyin vityin coo ndo ñayivi cuiti tyin maa Nyoo, ra tsa cana tsi ndo, cuiti iyó ra.

<sup>16</sup> Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

<sup>17</sup> Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jaha cuenda ndo tsi ndo tan jaha ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda kuhva iyó tsa intuhun intuhun yo, an cuvi yo nyivi cuca, an nyivi ndaahvi.

<sup>18</sup> Nyoo nasama ra kuhva tsa ña vaha tsicoo ndo, kuhva tsa janaha tsii tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahvi ra tan cacu yo,

<sup>19</sup> tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihi ra vasu ndi maa nduve cuatyí ra.

<sup>20</sup> Tsa ndi cumañi ca tsinu ñuhu ñayivi tsinyaa kuhva tyin tyehen cua tahan ra Cristo. Maa tyin ña cuvi tsi tsa numi ñi. Nda cuanda vityin nu cua ndihí quivi, cuvi tandihí can tsa cuenda tsa vaha tsi maa yo.

<sup>21</sup> Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yaha tsihi ra tan jacahnu ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

<sup>22</sup> Tsihin tunyee iñi Tatyí Iin Nyoo tyaá yahvi ndo tuhun nditsa. Tan tsa ndundi ndo jaha Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa ñi iñi ndo, tan tsihin tandihí tunyee iñi tsa iyó tsi ndo.

<sup>23</sup> Tyin tsa nacacu tsa ndo, maa tyin ñavin tumaa cacú nyivi nu ñuhu ñayivi ihya, tyin jutu ndo cacu ra naha jaha sihi ra naha tan tsihi ra naha. Tan nyooho vityin nacacu tsa ndo tsihin Nyoo tsa ña cua cundihí maa, tyin tacan ñi cua coo maa tsi.

<sup>24</sup> Tyin catyí tuhun Nyoo tyehen: Tandihí nyivi tsa iyó nu ñuhu ñayivi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucoyo ita can. [Tacan cuví nyivi, tyin iin yaha ñi tsiihi ñi.]

<sup>25</sup> Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

## 2

<sup>1</sup> Yacan cuenda nacoo ndo tandihí nuu tsa caquiñi. Ña jandavi ñaha ndo tsi nyivi, ña jaha ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi inga nyivi, ña cahan ca ndo cuendu.

<sup>2</sup> Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuahnu tsi ndo tan nacoto vaha ca ndo tsi Nyoo nda cuanda ndihí cacu ndo,

<sup>3</sup> tun nditsa tyin tsitó ndo tyin Jutu Mañi yo, vaha xaan ra cuví ra.

### *Ra Cristo cuví yuu nyito*

<sup>4</sup> Cunyaa naa ndo tsi Jutu Mañi yo. Tyin juvin ra cuví yuu nyito tsa ña cuñi nyivi cuatyí ñi. Maa tyin Nyoo nacatsi ra tsi Jutu Mañi yo tyin juvin

ra cuví yuu sî caá tsa yahvi nyaá tsa cuenda ra.

<sup>5</sup> Tatun nyaa naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nyaa naa vaha ndo tsi ra, cua cuví ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan sî xaan cua cuñi ra.

<sup>6</sup> Tyin catyí tucu nu tutu ra tyehen: Yuhu nacatsî yu iin yuu tsa tsiñi ñuhu ca tan sî ca caá, tan tsaquin yu yuu can nu cua javaha yu vehe yu nda Sión.

Tan nyivi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

<sup>7</sup> Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyivi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñi ra javahá vehe cuyiñu ra, yacan cuví yuu tsa tsiñi ñuhu ca, catyí tsi.

<sup>8</sup> Tan catyí tucu tsi:

Ra ican cuví yuu tsa cuaha xaan nyivi cua nañi tsaha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyivi can tyin tsiñi ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

### *Nyivi yihí cuenda Nyoo*

<sup>9</sup> Maa tyin nyooho cuví ndo nyivi nacatsî maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyivi ii ityi nuu ra tan cuví ndo nyivi maa ra, tacan tan cahan ndo tuhun vaha tsa javahá ra. Tyin juvin ra tava tsi yo nu naa tan tyihî ra tsi yo nu nditsin tan nu sî caá.

<sup>10</sup> Tsa ndi cumañi ca cuví ndo nyivi Nyoo, nduve yahvi nyaá ndo. Maa tyin vityin nyivi Nyoo cuví ndo. Quivi can yoñi cundaahvi iñi tsi ndo, maa

tyin vityin Nyoo cundaahvi iñi ra tsi ndo.

### *Nu catyí ra Pedro tyin coo yo, tan javaha yo tyiñu nuu Nyoo*

<sup>11</sup> Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayivi cuví ndo, tyin nda gloria cuví ñuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo.

<sup>12</sup> Jaha cuenda ndo tsi ndo nu iyó ndo tyañu nyivi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin quivi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

<sup>13</sup> Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca,

<sup>14</sup> a iin ra jaquitsî ra rey tyin tatsi tuñi ra tsi ra iyó cuatyî naha ra tan naquihin ndaahvi ra tsi yoo tsa javahá tsa vaha.

<sup>15</sup> Tyin Nyoo cuñi ra tsa javaha yo maa ñi maa tsa vaha tyin tacan tan ña ñihi ca nyivi soho tan nyivi ña tsitó ná cahan ñi siqui yo.

<sup>16</sup> Coo ndo tumaa iyó nyivi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra.

<sup>17</sup> Jaha ndo tsa ñayivi tsi tandihî ñi nyivi. Cuñi ndo tsi ñi yihí cuenda Nyoo. Jaha ndo tsa ñayivi tsi ra ndacá ñaha, tyin Nyoo nyehé ra tandihî tsa javahá yo.

### *Uvi taahan cuhva nyehé yo tundoho*

<sup>18</sup> Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha.

<sup>19</sup> Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsaa can nuu ra.



20 Maa tyin tatun tatsí tuñi nyivi tsi ndo tsa cuenda tsa javahá ndo tsa ña vaha tan cunyeē iñi ndo nyehe ndo tundoho, nduve náa catyi. Maa tyin tatun ña cundihi iñi ndo tan cunyeē iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo.

21 Tumaa tsa nyehe maa ra Cristo tundoho tsa cuenda yo, tacan taahán tsi cunyeē iñi yo nyehe yo tundoho tyin tsa cuenda yacan cana Nyoo tsi yo.

22 Ra Cristo ndi intuhun cuatyí ña javaha ra. Tan ndi iin tsaha tan ña jandavi ñaha ra tsi nyivi.

23 Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehe ñi tundoho tsi ra ña jayuhvi ra tsi ñi. Tyin intuhun ñi maa Nyoo cuví ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo.

24 Tyin cuhva tsa ticaá ra Cristo nu cruu can, tsicoso tandihi cuii maa cuatyí yo tsata ra. Tacan cuvi tyin tacan tan ña javaha ca yo cuatyí, tan coo yo ñayivi cuiti. Tyin tsihin tsa ñicuehe ra, tan nduvaha yo.

25 Tyin quivi can tsica nuu yo cuvi yo tumaa mbee tsa ndoo ihñi, tsa nduve tsitoho. Maa tyin vityin nacuhva cuenda yo tsi yo tsi ra Cristo, tan jahá cuenda ra añaima yo. Cuví ra ityi nuu tsihin yo.

### 3

#### *Nacaa taahán tsi coo nyivi tindaha*

1 Tacan tucu nyoocho, ñiñaha tsa iyó yñi. Tyaa yahvi ndo tsi yñi ndo tyin tatun ña tsinú iñi ra tsi ra Cristo, cua tsinu ndihi iñi ra tsi ra Cristo tsihin cuhva javahá ñi ndo tyin nyehe ra tyin vaha tsahá ndo tsa quihi ndaha ra tsi ndo. Tan ña cuñí tsi cuaha xaan cahan ndo tsihin ra,

2 tyin nyehé ra tyin catsi iyó ndo tan jahá ndo tsa ñayivi tsi ra.

3 Ña caca xaan iñi ndo janduvaha ndo tsi ndo ityi tsata ñi, tyin ña ñiñi xaan cuñí tsi tsa iyo xaan janduvaha ndo jiñi ndo, tan cuatyíñu ndo tsa

cuví xuhun cuaan tan cunditsi ndo jahma xiñu xaan. Ña nducu ndo tandihi yacan.

4 Maa tyin jandutyaqui ndo tsi ndo tsihin tsa quitá añaima ndo tyin tun cuiti iyó yo tan vita iñi yo, tan taxin iyó yo, yacan cuví tsa si ca caá nuu Nyoo. Tan ña cua tivi maa can.

5 Tyin tsihin tsehe ndutyaqui ñiñaha tsa nacoto tsi Nyoo, ñi tsa tsicoo tahañ tsanaha. Nyita iñi ñi tsi Nyoo tan tyaa yahvi ñi tsi yñi ñi.

6 Tumaa ña Sara, tyaa yahvi ña tsi ra Abraham yñi ña. Tan catyí ña: “Tata”, tsihin ra. Tatun nyoocho tan javahá ndo tsa vaha tan ndi luxu maa tan ña nayuhvi ndo, cua cuvi ndo tumaa maa ña.

7 Tan tacan tucu nyoocho, ra iyó ñasihi naha ra, cutuñi iñi ndo cuhva coo ndo tsihin ñasihi ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyoocho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayivi iyó ndo. Javaha ndo tyehen tyin tacan tan tñin cuenda Nyoo tuhun caahán ndo tsihin ra.

#### *Nu tsahá cuenda ra Pedro nácaa taahán tsi coo yo*

8 Nu ndihi tuhun, iin ñi cuhva caca iñi tandihi ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñí ndo tsi yañi ndo tsa cacu tsihin ndo. Vita cahan ndo tsihin tahan ndo, tan ña cahnú jaha ndo tsi ndo; cuvi ndo nyivi vaha.

9 Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña cahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo.

10 Tyin tuhun Nyoo catyí tsi tyehen: Nyivi tsa cuñí coo ñayivi tsihin tsa si, cuñí tsi jaha ñi cuenda yaa ñi, tan ña cahan ñi tsa ndavaha ñi, tan ndi ña cahan ñi cuendu.

11 Jandihi ndo tsa javahá ndo tsa ña vaha, tan javaha ndo tsa vaha. Nducu ndo cuhva coo taxin ndo, tan coo ndo tacan.

12 Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñi ra nyehé ra tsi ñi.

13 Ndi intuhun maa nyivi tan ña cuvi javaha ñi tsa ña vaha tsihin ndo tatun nyooho tan maa ñi tsa vaha nanducú ndo.

14 Cusi ñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo.

15 Jacahnu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Caca ñi ndo tuhun Nyoo tyin tatun ndaca tuhun nyivi tsi ndo nacuenda tsinú ñi ndo tsi ra, cuvi cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi.

16 Catsi coo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa cahán ñi siqui ndo.

17 Vaha ca nyehé yo tundoho tsa cuenda tsa javahá yo tsa vaha tatun Nyoo cuñi, tan ñavin ca tsa nyehe yo tundoho cuenda tsa ña vaha.

18 Tyin ra Cristo nyehe ra tundoho tan tsihi ra iin tsaha ñi tsa cuenda cuatyin tandihi yo. Ra vaha cuvi ra maa tyin nyehe ra tundoho tan tsihi ra tsa cuenda yo tsa cuvi yo nyivi caquiñi, tyin tacan tan cuvi tsaa yo nu nyaá Nyoo. Tsihi cuñu ñuhu ra, maa tyin nandoto nyico ra tsihin Tatyí li ra.

19 Tacan tan tsihin Tatyí li ra tsahan ra tsicahan ra tsihin añima nyivi tsa yucú anyaya.

20 Tan ñi ican cuvi ñi tsa ña tyaá yahvi tsi Nyoo quivi tsicoo ra Noé tahan tsanaha, tyin ñi tsinú yutun ndoo tacan tsa ndatu Nyoo tsa ndu uvi ñi ñi cuatyi ñi. Maa tyin ña cuaha ñi cacu quivi cuun savi cahnu tsa tsahñi ndutya ñuhu tsi ñi. Una taahan

ñi ñi cacu tsitsi yutun ndoo tyin nandaa yutun ndoo can nu ndutya ñuhu.

21 Tan tacan tucu maa yo tumaa tsa cacu ñi ican, tacan cacu yo quivi tsi-coondutya yo. Maa tyin ñavin nyahyu yo nacatya ndutya can tsa tsicoondutya yo. Yacan cuñi tsi catyi tsa tsicán tahvi yo tsi Nyoo na nacatya ra añima yo tan cacu yo jahá tsa nandoto ra Jesucristo.

22 Tan nandaa ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihi tatyí ña vaha tsa ndacá ñaha tsi nyivi.

## 4

*Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.*

1 Yacan cuenda janyee ndo ñi ndo nyehe ndo tundoho tumaa nyehe ra Cristo tundoho tsihin cuñu ñuhu ra. Tyin nyivi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñi cuñu ñuhu ñi.

2 Tyin tacan tan tandihi quivi coo ñi cua javaha ñi cuhva cuñi Nyoo, tan ñavin cuhva cuñi cuñu ñuhu ñi.

3 Vityin tsindihí tsa javahá ndo tsa caquiñi tsa taahán ñi nyivi tsa ña tsitó tsi Nyoo. Tsicoo ndo cuhva cuñi ndo, cuaha tsa caquiñi javahá ndo, tan javahá ndo tsa caquiñi tsa cuñi cuñu ñuhu ndo. Javahá ndo vico tan tsiñi ndo. Tan jacahnu ndo tsitoho tsa ña taahán tsi jacahnú ndo.

4 Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñi ñi. Tan caahán ñi ndavaha ñi siqui ndo.

5 Maa tyin tandihi tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi.

6 Yacan cuenda jacoto ra Cristo tuhun vaha tsi ndiyi. Tyin tacan tan cuvi coo añima ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsiihí tandihi ca nyivi.

7 Tsa yatyin cuii cundihí tandihi maa tsa iyó nu ñuhu ñayivi ihya. Yacan cuenda catsi coo ndo tan ña

jandihí ndo tsa ndacan tahvi ndo tsi Nyoo.

<sup>8</sup> Tsa jihna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tucahnu iñi tsi ñi.

<sup>9</sup> Tatun tsaá iin nyivi vehe ndo, vaha tyānuu ndo tsi ñi tan ña caca iñi ndo tyin jatyañu ñi tsi ndo.

<sup>10</sup> Tan cuñi tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyñu yo can tsihin tahan yo.

<sup>11</sup> Tatun tsaha Nyoo tuhun cahan un tsihin nyivi, cahan, maa tyin maa ñi tuhun tsa tsaha ra tsi un. Tatun tsaha ra tyin javaha un tyiñu nuu nyivi, javaha tsihin tunyee iñi tsa tsahá maa ra. Tandihí tsa catyí Nyoo tyin javaha ndo, javaha ndo can, tyin tacan tan jacahnu nyivi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jacahnu yo. Tan na cundaca ñaha ra tsihin tunyee iñi ra tacan ñi maa. Tan na cuvi tsi tacan.

### *Sii cuñi ndo tun nyehé ndo tundoho tsa cuenda ra Cristo*

<sup>12</sup> Yañi tsa cuñi xaan yu, ña iyo xaan cuñi ndo tatun vatsi tundoho ñihi siqui ndo. Ña cuñi ndo tyin ña taahán tsi nyehe ndo tundoho.

<sup>13</sup> Cu sii iñi ndo tyin cuvi nyehe ndo tundoho tumaa nyehe ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehe ndo tsa cahnu cuvi ra.

<sup>14</sup> Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyoocho jacahnú ndo tsi ra.

<sup>15</sup> Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javaha ndo tsa ña vaha, o tsa tyihí ndo tsi ndo nu ña taahán tsi.

<sup>16</sup> Maa tyin tun nyehé ndo tundoho tsa cuenda tsa yihí ndo cuenda

ra Cristo, ña nducahan nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

<sup>17</sup> Tyin tsa tsaá quivi tsa quitsaha jacutuñi Nyoo tsi tandihí nyivi. Tan jihna ca yoo tsa yihí cuenda ra cua cutuñi. Tatun tyehen tatsi tuñi Nyoo luxu ñi tsi yoo, znácaa cua tatsi tuñi ra tsi nyivi tsa ña tyaá yahvi tuhun caahán ra?

<sup>18</sup> Tatun yii cacú añaima nyivi vaha, znácaa cua cacu añaima ñi quiñi iyó, ñi ña vaha?

<sup>19</sup> Yacan cuenda tatun nyehé ndo tundoho cuhva cuñi Nyoo, cuñi tsi tsa jañihi ca ndo javaha ndo tsa vaha. Tan tyaa cuenda ndo añaima ndo ndaha ra tyin maa ra javaha tsi yo, tan cua javaha ra tumaa caahán ra.

## 5

### *Nu tsahá cuenda ra Pedro tsi yo nácaa coo yo*

<sup>1</sup> Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuvi tucu maa yu. Tan cuvi yu tsandaa tyin nyehe yu tandihí tundoho tsa tahan ra Cristo. Tan cua cutahan yu tsihin tandihí ca ra naha quivi quitsi ra Cristo inga tsaha tsihin tsa cahnu cuvi ra.

<sup>2</sup> Jaha cuenda ndo tsi nyivi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa ñi iñi añaima ndo tan ñavin tsihin tsa ñiñi, maa tyin cuhva cuñi Nyoo. Ña javaha ndo can tsa cuenda tsa cuñi ndo xuhun. Tandihí tyiñu javahá ndo, javaha ndo can tsihin tsa cacu iñi ndo.

<sup>3</sup> Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihi ndo tsi ñi.

<sup>4</sup> Tacan tan quivi cua quitsi ra cuvi ityi nuu tsihin nyoocho tsa jahá cuenda mbee jana Nyoo, cua cuhva ra tsa sii caá tsa ña cua tiví maa tsi ndo.

<sup>5</sup> Tacan tucu nyoocho, ra cuatyí tan ñi cuatyí, tyaa yahvi ndo tsi ra tsahnu

naha ra. Tan tandihí ndo ndaahvi jaha ndo tsi ndo tan tyaa yahvi tahan ndo tsi ndo. Tyin catyí nu tutu Nyoo tyehen:

Nyoo ña cuñí ra nyehe ra tsi nyívi tsa yaa xaan,

Maa tyin jatyinyeé ra tsi ñi tsa ña yaa.

<sup>6</sup> Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee iñi tsa iyó tsi ra, tyin tacan tan cuvi jacahnu ra tsi ndo quívi cua tahan tsi.

<sup>7</sup> Tyaa cuenda ndo tandihí tsa tsicá xaan iñi ndo ndaha Nyoo tyin maa ra jahá cuenda tsi ndo.

<sup>8</sup> Catsi cuhun iñi ndo tan jaha vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan iñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú ti tsa catsi ti.

<sup>9</sup> Ñihi cunyecu ndo tsihin tsa tsinú iñi ndo tsi Nyoo tyin tacan tan cuvi jaha ndo tsi nu ña vaha. Tyin juvin ñi tundoho tsa nyehé nyooho tan nyehé tucu tandihí ca nyívi yihí cuenda ra Cristo tani cahnu nu ñuhu ñayívi.

<sup>10</sup> Maa tyin Nyoo jatyinyeé ra tsi yo, tan tsa yaha nyehe ndo tundoho juhva quívi, Nyoo cua jacutsa ca ra tsi ndo, ñihi cunyecu ndo tsihin tsa tsinú iñi ndo, tan cua cuhva ca ra tunyee iñi tsa iyó tsi ra tsi ndo. Tan juvin Nyoo cuví ra tsahá tandihí tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu si caá tsihin ra tacan ñi maa.

<sup>11</sup> Na jacahnu yo tsi ra tan na cundaca ñaha maa ra tacan ñi maa. Tan na cuví tsi tacan.

*Nu tsahá ra Pedro nacumi tsi nyívi nu ndihí ña*

<sup>12</sup> Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin ñi xaan iñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñí xaan Nyoo tsi yo. Yacan cuenda ña ñacoo ndo itsi.

<sup>13</sup> Nyívi yihí cuenda Nyoo ñuu Babilonia tsa nacatsi Nyoo tumaa

nacatsi ra tsi nyooho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihí ra nacumi tsi ndo.

<sup>14</sup> Cuñi tahan ndo tsi ndo tan cuhva tahan ndo nacumi tsi ndo.

Na coo ca tsa taxin añima tandihí nyooho tsa iin ñi cuví tsihin ra Jesucristo.

Tan na cuvi tsi tacan ñi.



## Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

*Nu tyaá ra Pedro inga carta tsa cuenda nyivi yihí cuenda Nyoo*

<sup>1</sup> Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinü vaha iñi tsi Nyoo tumaa tsa tsinú iñi nyuhu. Inducu ñi tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo.

<sup>2</sup> Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

*Nacaa taahán tsi coo nyivi yihí cuenda Nyoo*

<sup>3</sup> Nyoo, tsihin tunyee iñi tsa iyó tsi ra, tsahá ra tandihí tsa tsiñí ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa cana tsi yo. Tyin cana ra can tsi yo tsihin tsa cahnu cuví ra tan tsihin tsa iyo tsa javahá ra.

<sup>4</sup> Tan tsihin tandihí tsa vaha can, tsahá tucu ra tsa catyi ra tyin cuhva ra tsi yo. Maa tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacoó yo tandihí tsa caquiñi tsa javahá yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya.

<sup>5</sup> Yacan cuenda cuñi tsi tsinú ca iñi yo tsi Nyoo tan ñavin yacan ñi tyin cuñi tucu tsi nducu yo cuhva coo cui tsi yo. Tan cuñi tucu tsi nducu yo cuhva

cutuñi vaha iñi yo cuhva cuñi Nyoo tsihin yo.

<sup>6</sup> Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihi iñi yo. Yaha can tan nducu yo cuhva coo yo ñayivi iyó Nyoo.

<sup>7</sup> Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñi maa Nyoo tsi tandihí yo.

<sup>8</sup> Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan.

<sup>9</sup> Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñi iñi ñi tsa taahán tsi coto ñi. Tan tsa naa iñi ñi tyin ndatsi Nyoo cuatyí ñi tahan tsanaha.

<sup>10</sup> Nyoo cana tsi ndo tan nacatsi ra tsi ndo. Yacan cuenda yañi, tun javahá ndo tandihí tsa caahán yu tuhun ihya, ña cua nduva ihñi ndo.

<sup>11</sup> Tacan tan ña yíi cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cui ndo tsihin ra.

<sup>12</sup> Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñi ndo javahá ndo tuhun nditsa tsa cutuhva ndo.

<sup>13</sup> Tan cuñi yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu.

<sup>14</sup> Tyin tsa jacotó Jutu Mañi yo Jesucristo tsi yu tyin ña naha ca tan cua nacoó yu ñuhu ñayivi ihya.

<sup>15</sup> Tan cua jañiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

*Nu nacatyí tuhun ra Pedro nacaa nyehe ra naha tsa cahnu cuví ra Cristo*

<sup>16</sup> Ñavin tsa nandacu iñi ñi maa ndi tan cahan ndi tsihin ndo quivi jacotó ndi tuhun Jutu Mañi yo Jesucristo tsi

ndo. Tsa nditsa cuví tsi tyin tsihin tinuu ndi nyehe ndi tsa cahnu cuví ra. Tan jacoto ndi tsi ndo tyin iyó xaan tunyee iñi tsi ra tan cua quitsi ra inga tsaha.

<sup>17</sup> Tyin nyehe ndi nu jacahnū Nyoo Jutu yo tsi ra tan nyehe ndi nu janduxiñū ra cuhva caá ra. Tan si xaan cuví nu cahān Nyoo tan catyí ra: “Ra ihya cuví Sehe yu, tan cuñi xaan yu tsi ra. Tan si xaan cuñi yu tsihin ra”, catyí Nyoo tuhun ra Jesús quiví can.

<sup>18</sup> Juvín nyuhu tsiñi ndusu Nyoo tsa quitsi ityi andivi quiví tsiyucu ndi yucu ii tsihin Jutu Mañi yo.

<sup>19</sup> Tuhun ihya janahá tyin nditsa tsa tyaa ra cuví ndusu yuhu Nyoo nu tutu taħan tsanaha. Tatun tyaa yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi añima yo.

<sup>20</sup> Maa tyin cuñi tsi coto ndo tyin ña cuví nacatyí tuhun tsa intuhun ñi maa yo tsa cuñi tsi catyí tsa tyaa ra ndusu yuhu Nyoo.

<sup>21</sup> Tyin ra cuví ndusu yuhu Nyoo taħan tsanaha ña cahān ra naha cuhva cuñi maa ra naha. Maa tyin cahān ra naha cuhva cuñi Nyoo tyin maa Tatyí li Nyoo jaquihín ityi tsi ra naha.

## 2

### *Ra jacuahá tsa ña nditsa (Judas 4-13)*

<sup>1</sup> Maa tyin tsicoo tucu ra cahān cuendu naha ra nu tsicoo nyivi Israel taħan tsanaha. Catyí ra naha tyin cuví ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucú ndo. Xeehe xaan cua jacuahá ra naha tsa ña nditsa tsa cuví jativí tsi ndo. Tan cua catyí ra naha tyin ña nditsa tuhun Jutu Mañi yo tan juvín ra jata tsi ra naha. Yacan cuenda numi ñi cua cunaa ra can naha ra.

<sup>2</sup> Tan cuaha xaan nyivi cua cunyi-cun tsi ra naha tsihin tsa caquiñi tsa

javaha ra naha. Tan cuaha xaan ñi cua cahān ndavaha ñi siqui tuhun tsa nditsa vaha ra Cristo.

<sup>3</sup> Tan tsa cuenda tsa cuñi ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuahá ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

<sup>4</sup> Tyin ndi ña jahā Nyoo tucahnū iñi tsi ángel tsa tsicoo cuatyí taħan tsanaha. Jacuhun ra tsi nahnu anyaya. Tsahñi ra tsi nahnu tsihin cadena, tan nacoo ra tsi nahnu nu naa nda cuanda taħan tsi jacutuñi ra tsi nahnu.

<sup>5</sup> Tan ndi ña jahā ra tucahnū iñi tsi nyivi ña vaha tsa tsicoo tsanaha. Jacuhun ra savi xaan tsahñi tsi ñi. Maa tyin jacacu ra tsi intuhun ñi ra Noé tsihin utsa taahan nyivi ra. Ra ican cahān ra tsihin nyivi na nducu ñi cuhva coo vaha ñi tsihin Nyoo.

<sup>6</sup> Tacan javahā tucu ra tsihin ñuu Sodoma tan ñuu Gomorra, janaa ra itsi. Tsahmí ra ñuu can tan nanduví tsi nyaa, tyin coto nyivi caquiñi tsa iyó vityin tan nyivi tsa cua coo náa cua taħan ñi.

<sup>7</sup> Maa tyin jacacu ra tsi ra Lot tyin vaha iyó ra nuu ra. Cuihya cuñi ra Lot nyehé ra cuhva iyó nyivi caquiñi can.

<sup>8</sup> Tandihí quiví tsa tsicoo ra Lot ñuu can, cuihya cuñi añima ra tsa cuenda tsa tsiñi ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha javahá ñi.

<sup>9</sup> Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyivi caquiñi nda cuanda taħan tsi quiví cutuñi ñi.

<sup>10</sup> Yaha ca cua tatsi tuñi Nyoo tsi nyivi tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuhva cuñi maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña

vaha.

<sup>11</sup> Tan ángel, vasu ndi maa iyó ca tunyee iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

<sup>12</sup> Maa tyin ra vatya can naha ra cuví ra naha tumaa quití tsa ña cutuñí iñi tan javahá ti naha ti tsa cuñí maa ti naha ti. Tyin quití, ¿náa cuenda iyó ti? Iyó ti tyin tñin yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñí iñi ra naha, tan cua cúu ra naha tumaa tsiihí quití can naha ti.

<sup>13</sup> Cua nyehe ra naha tundoho tsa cuenda tsa janyehé ra naha tundoho tsi inga nyivi. Si xaan cuñí ra naha tsihin tsa caquiñi javahá ra naha nu tuvi. Tsahá ra naha ticanuu nu yucú ndo nu iyó vico tatun cutahán ra naha tsihin ndo. Nyaá xaan ra naha tusi iñi. Maa tyin juven ñi tsi maa ra naha jandaví ñaha ra naha.

<sup>14</sup> Tandihí ñaha tsa nyehé ra naha, cuñí ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyivi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha.

<sup>15</sup> Nacoó ra can naha ra ityi vaha tan naquihin ra naha ityi tsa cuahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñí ra jaha canaa ra xuhun tsihin tsa ña vaha tsa javaha ra.

<sup>16</sup> Tacan tan nacahan burru jana ra tsihin ra, tumaa caahán nyivi, tan tsa nacahan ti ña tsaha ti cuhun ra javaha ra tsa ña vaha tsicá iñi ra.

<sup>17</sup> Tan tacan tucu maa ra can naha ra. Cuví ra naha tumaa iin soco ityi nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuii ra naha.

<sup>18</sup> Yaa xaan caahán ra naha. Maa tyin tandihí tsa caahán ra naha nduve yahvi nyaá can. Tan tsihin tandihí tsa

ña vaha tsa javahá ra tan tsihin tsa ña vaha tsa cuñí cuñu ñuhu ra naha jandaví ñaha ra naha tsi nyivi tsa tsa yaha quita mahñu nyivi tsa javahá tsa caquiñi.

<sup>19</sup> Catyí ra naha tsihin ñi tyin cua coo nuña ñi. Maa tyin juven ñi maa ra naha tsahá tsa cundaca ñaha tsa caquiñi tsi ra naha. Tyin tatun tsahá yo tsa cundaca ñaha tsa cundaca ñaha tsi yo, musu can cuví yo.

<sup>20</sup> Tyin nyivi tsa nacoto tsi Jutu Mañi yo Jesucristo, ra jacacú tsi yo, tsa yaha nacoó ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnu ca cuatyí ñi cua coo nu Nyoo.

<sup>21</sup> Vaha ca tun tsatyin ña nacoto ñi ityi vaha, tan ñavin ca tsa nacoó ihñi ñi tsa tsaha Nyoo tsi ñi tsa tsa yaha nacoto ñi tsi ra.

<sup>22</sup> Maa tyin cundaa tsa tuhvá nyivi caahán: “Ina tsatsí nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu.” Tacan cuví ñi can tyin javahá nyico ñi tsa javahá ñi nda jihna.

### 3

#### *Quivi cua quitsi nyico Jutu Mañi yo*

<sup>1</sup> Yañi, cuñí xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduvi taahan carta ihya tsahá cuenda yu tsi ndo na caca vaha iñi ndo tan ña naa iñi ndo tsa cutuhvá ndo.

<sup>2</sup> Ndūcuhun iñi ndo tsa cahan ra cuví ndusu yuhu Nyoo tahañ tsanaha. Tan ndūcuhun tucu iñi ndo tsa jacuahá ndi tsi ndo. Tyin cuví ndi ra tava tyiñu Jutu Mañi yo Jesucristo, ra jacacú tsi yo.

<sup>3</sup> Coto jihna ndo tyin nu cua ndihí quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñí cuñu ñuhu ñi.

<sup>4</sup> Tan cua catyí ñi: “¿Náa ra Jesucristo tsa catyí tyin cua quitsi ra inga tsaha? ¿Numaa nyií ra? Tyin nda quivi tsa tsihi tsii tsaahnu yo tan nda cuanda tsa tsinu ñuhu ñayivi tan nda

vityin caá ñi maa tahan ñi caá”, cua catyi ñi.

<sup>5</sup> Tyin maa ñi ña cuñi ñi coto ñi tyin nda tyembu tsahnu cahan Nyoo tan javaha ra andivi tan ñuhu ñayivi. Quita ñuhu ñayivi tsitsi ndutya, tan tsihin ndutya tsinu tsi.

<sup>6</sup> Tsa yaha javaha Nyoo ñuhu ñayivi juven ñi maa tsihin ndutya naa ñuhu ñayivi quivi cuun savi xaan.

<sup>7</sup> Maa tyin andivi tan ñuhu ñayivi tsa iyó vityin ndatú tsi tsa cayu tsi tumaa catyi maa Nyoo. Cua cayu andivi tan ñuhu ñayivi tsihin ñuhu quivi cua cutuñi nyivi tan cua naa nyivi caquiñi.

<sup>8</sup> Maa tyin nyoocho yañi yu tsa cuñi xaan yu, ña naa iñi ndo tyin tsa cuenda Jutu Mañi yo tsa iin quivi cuvi tsi tumaa mil cuiya, tan tsa mil cuiya cuvi tsi tumaa tsa iin quivi tsa cuenda ra.

<sup>9</sup> Vasiqui yihí ndo tsicá iñi ndo tyin maa Jutu Mañi yo ña cuñi naha quitsi. ñaha ca quitsi ra tyin ndatú jihna ra nda ndu uvi iñi tandihi nyivi tan nasama ñi kuhva iyó ñi tyin ña cuñi ra tsa cunaa ndi intuhun yo.

<sup>10</sup> Maa tyin quivi cua quitsi Jutu Mañi yo, yoñi maa cua coto tyin cua quitsi ra quivi tsa ña ndatú yo tsi ra. Cua quitsi ra tumaa iin ñasuhu. Tan ñihi cunahma tan cua naa andivi. Tan cua janaa ñuhu tandihi tsa iyó ityi siqui. Tan ñuhu ñayivi cua cayu tsi tsihin ñuhu tsihin tandihi tsa iyó nuu tsi.

<sup>11</sup> Tacan cua naa tandihi tsa iyó. Yacan cuenda cuñi tsi cuiti coo yo tumaa iyó maa Nyoo.

<sup>12</sup> Cuatu ndo quivi quitsi Nyoo. Nducu ndo kuhva quitsi ñi ra tyin quivi tsa cua quitsi ra cua naa andivi jaha ñuhu. Tan tandihi tsa iyó cua naa tsi tsihin tsa ihñi ñuhu can.

<sup>13</sup> Maa tyin yoo ndatú yo andivi tsa tan ñuhu ñayivi tsa tsa catyi Nyoo tyin kuhva ra tsi yo. Tan maa ñi maa tsa vaha tsi Nyoo cua coo ican.

<sup>14</sup> Yacan cuenda yañi, tsitsi tsa ndatú yo tsi Jutu Mañi yo, nducu ndo kuhva coo vaha ndo tsihin Nyoo, tyin tacan tan quivi quitsi ra, sih cua cuñi

yo tan cua coo taxin añima yo tyin nduve ca cuatyí yo iyó.

<sup>15</sup> Coto ndo tyin Jutu Mañi yo ña cundihí iñi ra ndatú ra tsi yo tyin cuñi ra tsa cacu cuaha nyivi. Juvín ñi tyehen caahán tucu ra Pablo yañi yo nu carta tsa jaquitsi ra tsi ndo. Tyaa ra itsi tsihin tsa tsiñi tuñi tsa tsaha Nyoo tsi ra.

<sup>16</sup> Tandihí ñi nu carta ra tan caahán ra tuhun ihya. Vasu yihí tsa yihí xaan cutuñi iñi yo. Tan nyivi tsa ña cutuñi iñi, ñi tsa ña ñihi nyaá tsihin Nyoo, siñ kuhva cutuñi iñi ñi itsi. Juvín ñi tacan javahá ñi tsihin tuhun Nyoo tsa tyaa inga ca ra naha. Tan tsa tacan javahá ñi, juven ñi tsi maa ñi jacunaá ñi.

<sup>17</sup> Yacan cuenda yañi, vityin tsa tsitó ndo tuhun ihya tsa ndi cumañi ca cuvi tsi, jaha ndo cuenda tsi ndo tan cuñi yu tsa coto ndihí ndo kuhva jandaví ñaha ra caquiñi can naha ra, tyin tacan tan ña nacoo ndo kuhva vaha tsa cuahán ndo.

<sup>18</sup> Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa.

Tan na cuvi tsi tacan ñi.



## Carta Tsa Jihna Ñi Tsa Tyaa Ra Juan

### *Cua coo yo ñayivi nyito*

<sup>1</sup> Ihya tyaá ndi tuhun ra tsa iyó nda ndi cumañi coo tandihí tsa iyó. Tsiñi ndi tsa cahan ra quivi tsica ndi tsihin ra. Nyehe ndi tsi ra tsihin tinuu ndi tan cutuñi ñi ndi yóo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaha ra ñayivi nyito iyó yo.

<sup>2</sup> Tan quivi tsaa ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaa tsi nu iyó yo.

<sup>3</sup> Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuví ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra.

<sup>4</sup> Tan tyaá ndi tuhun ihya tsa cuenda ndo tyin tacan tan coto ndo tandihí tsa tsahá Nyoo tsi ndo tan sñi xaan cua cuví tsi ndo.

### *Nyoo, ñuhu cuví ra*

<sup>5</sup> Vityin nacatyí tuhun ndi tsihin ndo tsa cahan ra Cristo tsihin ndi. Catyi ra tsihin ndi tyin Nyoo ñuhu cuví ra. Tan nduve tsa naa tsi ra, [nduve tsa ña vaha tsicá ñi ra cuví can].

<sup>6</sup> Tun catyi yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa.

<sup>7</sup> Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihí cuatyí yo tsihin ñiñi ra.

<sup>8</sup> Tatun catyi yo tyin nduve cuatyí yo, juvin ñi maa yo jandaví ñaha yo, tan nduve tsa nditsa iyó ña ña yo.

<sup>9</sup> Maa tyin tatun naahmá yo cuatyí yo nuu Nyoo, cuví cuita ñi yo tsi ra tyin cua jaha ra tucahnu ñi tsi yo tsa cuenda cuatyí yo tan cua nacatyá ra tandihí cuatyí yo tyin maa ra vaha ra tan javahá ra cuhva catyi ra tyin ña vatya ra.

<sup>10</sup> [Nyoo catyi ra tyin iyó cuatyí yo], tan tatun catyi yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó ña ña yo.

## 2

### *Ra Cristo cuví ra caahán ndaahvi tsaha yo*

<sup>1</sup> Sehe nyihi yu, caahán yu tandihí tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuiti iyó.

<sup>2</sup> Juvín ra jahá tucahnu ñi tsi yo tyin tsihi ra nu cruu tsa cuenda cuatyí yo. Tan ñavin tsa cuenda maa ñi maa yo tsihi ra, tyin tsihi ra tsa cuenda tandihí cuí nyivi iyó nu ñuhu ñayivi.

<sup>3</sup> Tatun tyaá yahvi yo tsa caahán Nyoo, nacotó yo tsi ra.

<sup>4</sup> Maa tyin tatun iin ra tsa catyi tye-hen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó ña ña ra.

<sup>5</sup> Nyivi javahá tsa caahán Nyoo, ñi ican cuví ñi cuñi tsi ra tsihin tsa ñi ñi ña ña ñi. Tan tsihin yacan tsitó yo tyin iin ñi cuví ñi tsihin ra.

<sup>6</sup> Nyivi catyi tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quivi quitsi ra nu ñuhu ñayivi ihya.

### *Taahán tsi tsa cuñi tahan yo tsi yo*

<sup>7</sup> Yañi, ñavin tuhun tsaa jacotó yu tsi ndo, tyin cuví tsi tuhun tsahnu tsa tsa tsitó maa ndo nda quitsi ca tsi. Tan juvin tsi cuví tsa tsa yahá tsiñi ndo.

<sup>8</sup> Maa tyin ña tsindihí tsa tsaa tsi tyin tyaá yahvi yo itsi tan tsa tyaá

yahvi yo itsi, cuñí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsín ñuhu tsa nditsa.

<sup>9</sup> Nyooho tsa catyí tyin iyó ndo nu nditsin, tan ndasi cuñí ndo nyehe ndo tsi nyívi yihí tuhun Nyoo tsihin ndo, ndi iyó ndo nu naa.

<sup>10</sup> Maa tyin nyívi tsa cuñí tsi nyívi yihí tuhun Nyoo tsihin ñi, iyó ñi nu nditsin. Tan nduve maa cuatyí cuvi janduva tsi ñi.

<sup>11</sup> Maa tyin nyívi ndasi cuñí nyehe tsi nyívi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehe ñi tyin tumaa tsa cuaa ñi jahá tsa naa can.

<sup>12</sup> Jaquitsí yu tandihí tuhun ihya tsi nyooho tsa ndi nacuhva cuenda tsi ndo tsi Nyoo. Tyin tsa yaha jahá Nyoo tucahnu iñi cuatyí ndo tsa cuenda tsa tsihi ra Jesucristo cuenda yo.

<sup>13</sup> Nyooho tsa tsa tsahnü tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayívi. Tan tyaá tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhva cuenda tsi ndo tsi Nyoo, tyin nacotó ndo tsi Nyoo Jutu yo.

<sup>14</sup> Jaquitsí yu carta ihya tsi nyooho tsa tsa tsahnü tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayívi. Tan jaquitsí yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó aña ndo. Tan jahá canaa ndo tsi nu ña vaha.

<sup>15</sup> Ña cuñi ndo tsa caquiñi tsa iyó nu ñuhu ñayívi ihya. Tyin nyívi cuñí tandihí yacan, ña cuñí ñi tsi Nyoo Jutu yo.

<sup>16</sup> Tyin tandihí tsa ña vaha tsa iyó nu ñuhu ñayívi ihya, tsa cuñí cuñu

ñuhu yo, tsa nyehe yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihí yacan tsahá ñuhu ñayívi ihya tsi yo, tan ñavin Nyoo Jutu yo tsahá can.

<sup>17</sup> Ñuhu ñayívi ihya cua cundihí can, tan cua cundihí ndihí tucu tandihí tsa caquiñi tsa cuñí nyívi javaha ñi. Maa tyin nyívi tsa javahá cuhva cuñí Nyoo, cua coo cuii ñi tsihin ra.

#### *Nu tsa ndasi cuñi nyehe tsi ra Cristo*

<sup>18</sup> Nyooho, tsa cuví ndo tumaa sehe yu, coto ndo tyin tsa cua ndihí quívi. Tan nyooho tsiñi ndo tyin vatsí nyívi tsa ña cuñí nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahan tsi cundihí quívi.

<sup>19</sup> Nyívi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyívi yihí tuhun Nyoo tsihin yo cuví ñi.

<sup>20</sup> Maa tyin nyooho tsa tsitó ndo tsa caahán Nyoo tyin tsaha ra Cristo Tatyí li Nyoo iyó aña ndo tan jacotó tsi tandihí tsi ndo.

<sup>21</sup> Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tsihin tuhun nditsa.

<sup>22</sup> ¿Yóo cuví nyívi vatya? Nyívi vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi ndasi cuñi nyehe tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra.

<sup>23</sup> Tan tandihí nyívi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyívi tsa caahán tsihin tsa ñi iñi aña ñi tsihin nyívi tyin ra Jesucristo cuví Sehe Nyoo, iyó Nyoo Jutu yo tsihin ñi.

<sup>24</sup> Yacan cuenda naquihin vaha ndo tsitsi aña ndo tandihí tsa tsiñi ndo nda quívi jihna ñi. Tyin tun naquihin vaha ndo itsi tsitsi aña

ndo, cua coo ndo iin caa ñi tsihin Nyoo Jutu yo tan tsihin Sehe ra.

<sup>25</sup> Tan ñayivi nyito can cuví tsa catyi ra Jesucristo tyin cuhva ra tsi yo.

<sup>26</sup> Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandavi ñaha tsi ndo.

<sup>27</sup> Maa tyin ra Jesucristo tsaha ra Tatyí li Nyoo iyó aña ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí li Nyoo jacuaha tandihi maa tyiñu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí li Nyoo tsi ndo.

<sup>28</sup> Tan vityin nyoocho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quivi tsa ra.

<sup>29</sup> Vityin tsa tsa tsitó ndo tyin vaha ra Cristo, cuñi tsi coto ndihi ndo tyin tandihi nyivi javahá tsa vaha, sehe Nyoo tsi ñi.

### 3

#### *Nyivi cuví sehe Nyoo*

<sup>1</sup> Nyehe ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra.

<sup>2</sup> Nyoocho yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quivi quitsi ra Jesucristo, cua cuví yo tumaa cuví maa ra, tyin cua nyehe vaha yo tsi ra tan cua nyehe tucu yo nácaa caá ra.

<sup>3</sup> Tandihi yoo tsa ndatú tsa cua cuvi tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

<sup>4</sup> Tandihi nyivi tsa tsicoó cuatyí, ñi ican cuví ñi tsa ña tyaá yahvi ley

Nyoo. Tyin tun javahá yo tsa ña vaha, cuñi tsi catyi tyin ña tyaá yahvi yo ley Nyoo.

<sup>5</sup> Nyoocho tsa tsitó tyin ra Cristo quitsi ra nu ñuhu ñayivi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra.

<sup>6</sup> Tandihi yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra.

<sup>7</sup> Nyoocho, tsa cuví tumaa sehe yu, coto jandavi ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo.

<sup>8</sup> Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quivi jihna ñi. Yacan cuenda quitsi ra Jesucristo, Sehe Nyoo, tyin janaa ra tandihi tsa javahá nu.

<sup>9</sup> Tandihi yoo tsa tsa yaha nacacu tsa jañi Nyoo, ña taahán ca iñi yo javahá yo tsa ña vaha, tyin iyó yo ñayivi tsaha Nyoo tsi yo. Yacan cuenda ña javahá ca yo tsa ña vaha, tyin tsa yaha nacacu tsa yo tan vityin cuví yo sehe Nyoo.

<sup>10</sup> Cuví nacotó yo ndáa nyivi cuví sehe Nyoo, tan ndáa nyivi cuví sehe nu ña vaha, tyin tandihi nyivi tsa ña javahá tsa vaha tan ña cuñi tsi nyivi yihí cuenda Nyoo, ñavin sehe Nyoo tsi ñi.

#### *Na cuñi tahan yo tsi yo*

<sup>11</sup> Tyin tsa tsiñi ndo nda quivi jihna ñi cuví: Tsa cuñi tahan yo tsi yo.

<sup>12</sup> Ña taahán tsi javaha yo tumaa javaha ra Caín, tyin ra Caín cuví ra iin ra cuenda nu ña vaha. Tan tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javaha ra tsa vaha, tan maa ra javaha ra tsa ña vaha.

<sup>13</sup> Nyoocho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo.

<sup>14</sup> Yoo tsa cuñi tsi nyivi yihí tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuví

ca yo nyivi tsihi. Maa tyin nyivi ña cuñi tsi nyivi yihí tuhun Nyoo, cuví ñi tumaa nyivi tsihi.

<sup>15</sup> Nyivi ndasi cuñi nyehé tsi nyivi, cuví ñi tumaa nyivi tsahñi nyivi. Tan tsitó ndo tyin ndi intuhun ñi tsahñi nyivi, tan ña cua cuhva Nyoo ñayivi nyito coo ñi.

<sup>16</sup> Tsitó yo náa cuví tsa cuñi tahan yo tsi yo tyin tsa yaha janaha ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuanda tsaha ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi cuhva yo nda cuanda ñayivi iyó yo tsa cuenda nyivi yihí tuhun Nyoo.

<sup>17</sup> Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra.

<sup>18</sup> Nyooho tsa cuví ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñi iñi yo.

#### *Nacaa javaha yo tan coo vaha yo tsihin Nyoo*

<sup>19</sup> Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo.

<sup>20</sup> Tatun tuví iñi tsitsi añima yo tyin iyó cuatyí yo, na ña cuita iñi yo yacan. Na cuita iñi yo tsi Nyoo tyin juvin ra tsitó tandihi tsa iyó añima yo tan cahnu ca cuví ra tan ñavin ca añima yo.

<sup>21</sup> Yañi, tatun tuví iñi yo tyin nduve cuatyí yo, na ña nayuhvi yo nyehe yo tsi Nyoo.

<sup>22</sup> Tan tandihi tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra.

<sup>23</sup> Tyin tyiñu tsa tsaha ra tsi yo yacan cuví tsa tsinu iñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tavá tyiñu ra tsi yo.

<sup>24</sup> Nyivi tyaá yahvi tyiñu tsaha ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí Ii ra tsa tsaha ra tsi yo.

## 4

### *Tatyí Ii Nyoo tan tatyí nu ña vaha*

<sup>1</sup> Nyooho yañi tsa cuñi xaan yu, ña tsinu iñi ndo tsa caahán nyivi catyí tyin tuhun Nyoo caahán ñi. Nyehé jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi.

<sup>2</sup> Cuví nacoto ndo tsi nyivi tun juvin Tatyí Ii Nyoo jacahán tsi ñi o ñavin. Ñi tsa iyó Tatyí Ii Nyoo tsihin, catyí ñi tyin quee ra Jesucristo nda gloria tan quitsi ra nu ñuhu ñayivi ihya, tan cuví ra iin rayi tumaa maa yo.

<sup>3</sup> Maa tyin tandihi nyivi tsa catyí tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

<sup>4</sup> Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yaha jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya.

<sup>5</sup> Ñi ican, cuenda nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu ñayivi ihya tyaá soho ñi tsa caahán ñi ican.

<sup>6</sup> Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaa soho ñi tsa caahán yo. Tsihin yacan cuví nacoto yo ndaa nyivi iyó Tatyí Ii Nyoo tsihin, tan caahán ñi tsa nditsa tan ndaa nyivi yihí tatyí ña vaha tan jandaví ñaha ñi.



*Nyoo cuñi xaan ra tsi tandihi nyivi*

<sup>7</sup> Nyoooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihi yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo.

<sup>8</sup> Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihi nyivi.

<sup>9</sup> Nyoo janahá ra tsi yo tsa cuñi ra tsi yo tsihin tsa tsahá ra Sehe mañi ra quitsi nu ñuhu ñayivi ihya, tyin cuhva ra ñayivi nyito coo yo.

<sup>10</sup> Nyehe ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsi ra Sehe ra tyin tacan tan cúu ra tsa cuenda yo tan quinyaa ra cuatyí yo.

<sup>11</sup> Nyoooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo.

<sup>12</sup> Ndi intuhun maa nyivi, tan ñaha ca maa nyehe ñi tsi Nyoo, maa tyin tatun cuñi tahan yo tsi yo, iyó Nyoo aña yo. Tan ñi vaha ñi yo cuñi yo tsi ra tan tsi nyivi.

<sup>13</sup> Tan tsitó yo tyin iyó vaha yo tsihin ra tan maa ra iyó ra aña yo, tyin tsahá ra Tatyí li ra iyó aña yo.

<sup>14</sup> Nyuhu nyehe vaha ndi tan cuví ndi tsandaa tyin jaquitsi Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu ñuhu ñayivi ihya.

<sup>15</sup> Tandihi nyivi tsa tsinú ñi tan caahán tyin ra Jesús cuví Sehe Nyoo, iyó Nyoo aña ñi. Tan iyó ñi iin caa ñi tsihin ra.

<sup>16</sup> Yoo tsitó yo tan tsinú ñi yo tyin Nyoo cuñi ra tsi yo, tan cuñi ra tsi tandihi nyivi. Tan tandihi yoo tsa cuñi tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi aña yo.

<sup>17</sup> Tyin tatun cuñi yo tsi Nyoo tsihin tsa ñi ñi aña yo, ña cua nayuhvi yo nyehe yo tsi ra na tahan tsi quivi cutuñi tandihi nyivi nuu ra. Tyin tumaa iyó ra Jesucristo, tacan iyó yo nu ñuhu ñayivi ihya.

<sup>18</sup> Nyoo cuñi ra tsi yo, tan tatun cuñi yo tsi ra, nduve tsa nayuhvi yo. Tatun ñi ñi yo cuñi yo tsi Nyoo ña nuña ca nu quihvi tuhun yuuhví can aña yo, tyin Nyoo jatsiyó ra tandihi maa yacan. Tyin tatun yuuhví yo, yihí can tyin tuví ñi yo tyin iyó cuatyí yo. Tan yuuhví yo tsa cua tatsi tuñi Nyoo tsi yo. Tyin tatun yuuhví cuñi yo, yuuhví yo tyin ñaha ca cuñi yo tsi Nyoo tumaa taahán maa tsi cuñi yo tsi ra.

<sup>19</sup> Yoo cuñi yo tsi Nyoo tyin jihna ca maa ra cuñi tsi yo.

<sup>20</sup> Tatun iin nyivi tan catyí ñi: “Yuhu cuñi yu tsi Nyoo”, tan ndasi cuñi ñi nyehé ñi tsi nyivi tahan ñi, nyivi vatya cuví ñi. Tyin tatun ndasi cuñi yo nyehé yo tsi nyivi tahan yo tsa tuhvá yo nyehé, ¿nácaa cua cuñi yo tsi Nyoo tsa ña cuví nyehe yo? Ña cua cuví.

<sup>21</sup> Tava tyiñu Nyoo tsi yo tyin tun cuñi yo tsi ra, tacan cuñi tsi tsa cuñi tahan yo tsi yo.

**5***Tatun ñi ñi yo tsinú ñi yo tsi Nyoo cuví jaha canaa yo tsi tsa ña vaha*

<sup>1</sup> Tandihi nyivi tsa tsinú ñi tyin ra Jesús cuví ra Cristo ra quee nda gloria jahá Nyoo, juvin ñi cuví sehe Nyoo. Tyin tatun cuñi yo tsi iin ra iyó sehe, cuñi ndihi yo tsi sehe ra.

<sup>2</sup> Tatun cuñi yo tsi Nyoo tan javahá yo tsa caahán ra, cua cuñi ndihi yo tsi nyivi cuví sehe ra.

<sup>3</sup> Tyin tsa cuñi yo tsi Nyoo yacan cuví tsa tyaá yahvi yo tsa tsahá cuenda ra tsi yo. Tan tandihi tsa tsahá cuenda ra tsi yo, ña yí javaha yo can.

<sup>4</sup> Tyin tandihi yoo tsa cuví sehe Nyoo, jahá canaa yo tsi tsa ña vaha tsa iyó nu ñuhu ñayivi ñayivi ihya. Cuví jaha canaa yo can tyin tsinú ñi yo tsi Nyoo.

<sup>5</sup> Maa ñi maa nyivi tsa tsinú ñi tyin ra Jesús cuví Sehe Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayivi ihya.

*Tatyí li Nyoo cuví tsandaa cuenda ra Jesús Sehe Nyoo*

<sup>6</sup> Ra Jesucristo quitsi ra nu ñuhu ñayivi ihya. Tan tsa tsicoondutya ra tsihin ndutya tan tsa tsati ñiñi ra janahá tyin Sehe Nyoo cuví tsi ra. Ñavin tsa tsicoondutya ñi ra. tyin nda cuanda tsa tsati ñiñi ra. Tan juvin ñi maa Tatyí Ii Nyoo cuví tsandaa tyin tacan cuvi. Tan Tatyí Ii Nyoo ña jandaví ñaha tsi.

<sup>7</sup> Nda andivi iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduñi taahan ra naha, iin ñi cuví ra naha.

<sup>8</sup> Tan nu ñuhu ñayivi ihya iyó tucu uñi tsandaa: Tatyí Ii Nyoo tsa iyó añaima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutya ra Jesús, nu catyi Nyoo tyin juvin ra Jesús cuví Sehe ra. Tan tsa tsinu uñi cuví nu tsati ñiñi ra Jesús. Tan tsa nduñi taahan yacan nacatsí tahan caahán can.

<sup>9</sup> Yoo naquihín yo tsa caahán ra cuví tsandaa nu ñuhu ñayivi ihya. Tan Nyoo cahnu ca cuví ra tan ñavin ca ra ñuu ñayivi ihya. Yacan cuenda taahán tsi naquihin yo tsa caahán ra, tan juvin ñi maa ra catyi tyin Sehe ra cuví tsi ra Jesús.

<sup>10</sup> Nyivi tsa tsinú iñi tyin Sehe Nyoo cuví tsi ra Jesús, tsitó ñi tsitsi añaima ñi tyin nditsa. Nyivi tsa ña tsinú iñi tsi ra, jahá ñi tyin vatya Nyoo, tyin ña cuñi ñi tsinu iñi ñi tsa caahán Nyoo tsandaa cuenda Sehe ra.

<sup>11</sup> Tan tyehen caahán Nyoo tsihin yo: Catyí ra tyin tsaha ra ñayivi nyito coo yo tan ñihi yo itsi tatun tsinú iñi yo tyin ra Jesucristo cuví Sehe ra.

<sup>12</sup> Nyivi iyó Sehe Nyoo añaima, iyó ñi ñayivi nyito. Tan nyivi nduve Sehe Nyoo iyó añaima, ña iyó ñi ñayivi nyito.

*Nu ndihi cahan ra Juan tan nu tsahá ra tyiñu tsi nyivi*

<sup>13</sup> Tyaá yu tuhun ihya tsa cuenda nyoocho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayivi nyito tsa ña cua naa maa.

<sup>14</sup> Ndita iñi yo tsi Nyoo tyin tatun tsicán yo tsa tsicán yo tsi ra tan cuhva

cuñi maa ra tsicán yo, tsitó yo tyin maa ra tsiñi ra tsa caahán yo.

<sup>15</sup> Tan tsa tsitó yo tyin tsiñi ra tsa tsicán yo, tsitó tucu yo tyin tsa ñihi yo tsa tsicán yo tsi ra.

<sup>16</sup> Tatun iin nyivi tan nyehe yo tyin javahá ñi cuatyí tsa ña taahán tsi cúu ñi, taahán tsi cahan ndaahvi yo tsihin Nyoo tsa cuenda ñi na jaha ra tuc-ahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi.

<sup>17</sup> Tandihí tsa caquiñi tsa javahá nyivi, cuatyí cuví can. Tan iyó tucu cuatyí tsa ña jaha Nyoo tucahnu iñi.

<sup>18</sup> Tsitó yo tyin nyivi tsa nacacu tsaaja Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tñin nu ña vaha tsi ñi.

<sup>19</sup> Yoo tsa tsitó yo tyin cuenda Nyoo yihí yo. Tan tandihí nyivi tsa taahán iñi tsa iyó nu ñuhu ñayivi ihya, nu ña vaha ndacá ñaha tsi ñi.

<sup>20</sup> Tan tsitó tucu yo tyin quitsi Sehe Nyoo, tan tsaha ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tsihin ra. Tan juvin maa ra cuví Nyoo tsa nditsa. Tan iyó ra ñayivi nyito tsa ña cua naa maa.

<sup>21</sup> Nyoocho tsa cuví tumaa sehe yu, jaha cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.

Tan na cuvi tsi tacan ñi.

## Carta Tsinu Uvi Tsa Tyaa Ra Juan

*Nu caahán ra Juan tyin cuñí xaan ra tsi nyivi yihí cuenda Nyoo*

<sup>1</sup> Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsi maa Nyoo. Cuñí xaan yu tsi ndo tsihin tsa ñi iñi añima yu. Tan cuñí ndihí tucu tandihí nyivi tsa tsitó tsa nditsa tsi ndo, yacan ñavin yuhu ñi cuñí tsi ndo.

<sup>2</sup> Cuñí ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo.

<sup>3</sup> Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi iñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

<sup>4</sup> Siñ xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tava tyiñu maa Nyoo Jutu yo tsi yo.

<sup>5</sup> Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsañ Nyoo tsi yo cuví tsi. Tyin tsa iyó maa tsi nda nu quitsaha.

<sup>6</sup> Tsa cuñí yo tsi Nyoo, yacan cuví tsa javahá yo tandihí tsa tava tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñi ndo nda quivi jihna ñi: Coo ndo tsihin tsa cuñí ndo tsi Nyoo tan tsi nyivi.

*Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha*

<sup>7</sup> Caahán yu tyehen tsihin un tyin cuaha xaan nyivi jandaví ñaha iyó nanii cahnú nu ñuhu ñayivi. Catyí ñi tyin ña nditsa tsa quitsi ra Jesucristo cacu ra tsihin cuñu ñuhu tan cuví ra

ra ñayivi. Nyivi tsa caahán tacan, ñi jandaví ñaha cuví ñi. Tan ñi ndasi cuñi nyehé tsi ra Cristo cuví ñi.

<sup>8</sup> Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihi ca ndo tandihí tsa cua cuhva Nyoo tsi ndo.

<sup>9</sup> Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi.

<sup>10</sup> Tatun tsaá nyivi yuvehe ndo, tan cuñí ñi jacuaha ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi.

<sup>11</sup> Tyin tun cuhva yo nacumi tsi ñi, cuñí tsi catyi tyin javahá ndihí yo tsa ña vaha tsa javahá ñi.

*Nu ndihí cahan ra Juan*

<sup>12</sup> Iyó cuaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaá yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusii ca iñi yo.

<sup>13</sup> Ihya vatsí nacumi tsi un jahá sehe ña tahan un tsa nacatsi ndihí maa Nyoo.

Tan na cuví tsi tacan ñi.

## Carta Tsinu Uñi Tsa Tyaa Ra Juan

*Nu caahán ra Juan tyin vaha cuahán ra Gayo tsihin Nyoo*

<sup>1</sup> Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñí xaan yu tsi un tyin iin caa ñi nyicún yo tsa nditsa.

<sup>2</sup> Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un.

<sup>3</sup> Yuhu sii xaan cuñi yu quivi quitsi juhva ra yañi yo naha ra nu nyii yu. Tan nacatyí tuhun ra naha tsihin yu tyin nditsa tsa iyó un cuhva jacuaha ra Cristo, tan nyicún un tsa nditsa.

<sup>4</sup> Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

<sup>5</sup> Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra.

<sup>6</sup> Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñi xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsiñi ñuhu tsi ra naha tumaa taahán iñi maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo.

<sup>7</sup> Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyivi tsa ña tsitó tsi Nyoo tsi ra naha.

<sup>8</sup> Yacan cuenda maa yo taahán tsi jatyinyee tsi ra naha tsihin tsa tsiñi ñuhu tsi ra naha. Tan tacan tan cahatan yo tsihin ra naha nu caahán ra naha tuhun nditsa.

*Nu caahán ra Juan tyin ña vaha javahá ra Diótfefes*

<sup>9</sup> Yuhu jacuhun yu iin carta tsi nyivi tsicá vehe ñuhu, maa tyin ra Diótfefes ña cuñi ra tyaa soho ra tsa caahán yu tyin cuñi xaan maa ra cuvi ra ityi nuu tsihin nyivi.

<sup>10</sup> Yacan cuenda tatun quitsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyivi tsicá vehe ñuhu naquihín vaha ñi tsi ra hermano can naha ra, tyasí ra Diótfefes tsi ñi, tan tavá ra tsi ñi vehe ñuhu.

<sup>11</sup> Yooho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

*Nu caahán ra Juan tyin vaha xaan tsinú iñi ra Demetrio tsi Nyoo*

<sup>12</sup> Tandihí nyivi tan vaha caahán ñi tuhun ra Demetrio. Tan vaha xaan tyaá yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

*Nu ndihí cahan ra Juan*

<sup>13</sup> Cuaha xaan tuhun cuñi yu jacoto yu tsi un, maa tyin ña cuñi yu jacoto yu can tsi un tsihin carta.

<sup>14</sup> Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo.

<sup>15</sup> Na coo tsa taxin aña un. Ra vaha iñi tsi yo tsa iyó ityi ihya jaquitsí xaan ra naha nacumi tsi un. Tan cuñi yu jaha un tumañi iñi cuhva un nacumi tsi tsa intuhun intuhun ra vaha iñi tsi yo.



## Carta Tsa Jacuhun Ra Judas Tsi Nyivi Yihí Cuenda Nyoo

*Nu tyaá ra Judas carta tsa cuenda nyivi cana Nyoo*

<sup>1</sup> Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñí xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo.

<sup>2</sup> Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñí ra tsi yo. Tan na naquihin ca ndo tsa taxin tsahá ra tsi yo coo añima ndo.

*Nu caahán ra Judas tuhun nyivi tsa jacuahá tsa ña nditsa (2 Pedro 2.1-17)*

<sup>3</sup> Tyihí yu kuhva tyaá yu iin carta tsa cuenda ndo yañi, tyin cuñí yu cahán yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña kuhva ndo tsa sama kuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi.

<sup>4</sup> Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yaha jaha Nyoo tuc-ahnu iñi tsi yo, tan yacan cuenda cuví ñi javaha maa yo tsa cuñí yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahañ tsanaha tyin ra tsa javahá tacan, cua cunaa ra naha.

<sup>5</sup> Vasu ndi maa tsa tsitó ndo tsa javahá Nyoo tahañ tsanaha, maa tyin cuñí yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacu ra tsi ñi ndaha nyivi Egipto can. Maa tyin tsa

yaha can janaa ra tsi tandihí maa ñi tsa ña tsinu iñi tsi ra.

<sup>6</sup> Tan juvin ñi tacan javaha tucu Nyoo tsihin ángel tsa ña tyaá yahvi tsi ra. Tsahá ra tyiñu tsi nahnu, maa tyin nacoq nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi.

<sup>7</sup> Tacan tucu nyivi ñuu Sodoma tan ñuu Gomorra, tan nyivi ñuu nyihí tsa tsicoq nicanduvi ñuu can. Janaa Nyoo tsi ñi tsa cuenda tsa caquiñi tsa javaha ñi. Tyin rayi can naha ra tsicoq ra naha tsihin ñaha. Tan ñiñaha tsicoq ñi tsihin iin rayi tan inga ra. Tan cuaha ca tsa caquiñi javaha ñi tyin rayi tsicoq ra naha tsihin ra ndusihi. Tan tsa cuenda yacan, nyehe ñi tundoho nu cayu ñi quivi tsahmí Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayu ñi tsihin ñuhu tsa ña cua ndahva maa.

<sup>8</sup> Vasu ndi maa tacan cuví, vityin ndi iyó ra jandaví ñaha naha ra. Cuñí ra naha tyin vaha javahá ra naha. Maa tyin jativí ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siqui ra iyó ca tunyee iñi tsi tan ñavin ca maa ra naha.

<sup>9</sup> Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi cañi tahan ra tsihin nu ña vaha tsa cuenda cuñu ñuhu ra Moisés, ña cana iñi ra cahán ra ndavaha ñi siqui nu. Intuhun ñi tsa catyí ra tsihin nu: “Na tatsi tuñi Jutu Mañi yo tsi un” catyí ángel Miguel can tsihin nu ña vaha.

<sup>10</sup> Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quití, tyin quití ña cutuñi iñi ti. Ica ñi maa ti naha ti tsa cuñi cuñu ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jativí ra naha juvin ñi tsi maa ra naha.

<sup>11</sup> ¡Ndahvi ra ndaahvi can naha ra! tyin javahá ra naha tumaa javaha ra

Caín. Tan tsa cuenda tsa cuñi ra naha jaha canaa ra naha xuhun, nacoo ra naha ityi Nyoo tumaa javaha ra Balaam. Tan cua cunaa ra naha tumaa cunaa ra Coré, tyin tsihi ra can tsa cuenda tsa ña tyaa yahvi ra tsa cahan ra cuvi ityi nuu tsihin ra.

<sup>12</sup> Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsi ra naha tan tsihi ra naha tsihin tsa sii cuñi ra naha, tan ña cahan nuu ra naha tsa ña jahá ra naha tsa ñayivi tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yihí ityi siqui tun tsa cua cuun savi tan cuahan tsi tsihin tatyí tan ña cuun savi. Cuví ra naha tumaa yutun tsa ña tsahá tsiti. Tyin yutun tsa ña tsahá tsiti cuví tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuí yoho tun.

<sup>13</sup> Tan juvin ñi cuví tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuví tucu ra naha tumaa tiñuu tsa iyó andivi tsa tsinaa. Tsa nyaá maa tsa cua ndoo cuí ra naha nu naa. Tacan ñi maa tsa cua tahan ra naha.

<sup>14</sup> Tuhun ra can naha ra cahan ra Enoc tahan tsanaha. Ra Enoc tsa tsinu utsa tsa cuví tata ra Adán. Cahan ra tuhun tsa tsaha maa Nyoo tsi ra, tan catyi ra: “Nyehe yu nu vatsi Jutu Mañi yo tan cuenda mil ángel ra vatsi tsihin ra

<sup>15</sup> tyin vatsi ra vatsi tatsi tuñi ra tsi nyivi caquiñi tsa cuenda tandihi tsa ña vaha tsa javaha ñi, tan nyivi caahan ndavaha ñi siqui ra”, catyi ra Enoc tahan tsanaha.

<sup>16</sup> Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahan ra naha tan catyi ra naha: “Yi xaan, cahnu xaan tundoho nyehé yo.” Javaha ra naha tsa cuñi cuñu ñuhu ra naha. Yaa xaan caahan ra naha. Tan tsa caahan ra naha tsa vaha tsihin nyivi, javaha ra naha can tyin cuñi ra naha tsa cahan nyivi tyin vaha xaan iñi ra naha.

### *Nu tsahá cuenda ra Judas tsi nyivi yihí cuenda Nyoo*

<sup>17</sup> Yañi, ña tyaa yahvi ndo tsi ra can naha ra. Maa tyin nducuhun iñi ndo tuhun tsa cahan ra tsa tava tyiñu Jutu Mañi yo Jesucristo,

<sup>18</sup> tyin catyi ra naha tyehen: “Nu cua ndihi quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.”

<sup>19</sup> Ra tsa cahan ra naha tuhun cuvi ra cuñi jasiñ tsi yo. Tyin tyaá yahvi ra naha cuhva cuñi cuñu ñuhu ra naha tan nduve Tatyí li Nyoo iyó tsihin ra naha.

<sup>20</sup> Maa tyin nyoocho yañi, jandu iin ndo iñi ndo tsihin tsa tsinú iñi ndo tsi ra Cristo. Ndañan tahvi ndo tsi ra tsihin tunyee iñi Tatyí li maa ra.

<sup>21</sup> Nducu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñi xaan ra tsi yo. Tan cuatu ndo quivi cahun yo coo cuí yo tsihin ra. Tyin yacan cuví tsa cua cuhva Jutu Mañi yo Jesucristo tsi yo tsa cuenda tsa cundaahvi iñi ra tsi yo.

<sup>22</sup> Cahan yuhu ndo tsihin nyivi tsa ña tsinú iñi, na tsinu iñi ñi.

<sup>23</sup> Nducu ndo cuhva cacu ñi tsa cua cayu. Cundaahvi tucu iñi ndo nyehe ndo tsi inga ñi tsa javaha tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javaha ñi, tyin nda cuando jahma nditsi ñi tan ña vaha can.

### *Nu ndihi cahan ra Judas tan jacahnú ra tsi Nyoo*

<sup>24-25</sup> Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuvi ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua cahun yo tsihin ra nu cahnu cuví nu nyaá ra. Tan sii xaan cua cuñi yo.

Na coto yo tsa cahnu xaan cuví ra. Na jacahnú yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandihi. Tyin nda nu quitsi tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

## Tsa Janaha Ra Jesucristo Tsi Ra Juan

### *Tsa nyehe ra Juan*

<sup>1</sup> Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyn cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuvi tsi yuhu, ra Juan, ra cuvi musu ra.

<sup>2</sup> Tan caahán yu tandihi tsa nyehe yu. Tan cuvi yu tsandaa tsa cuenda tuhun Nyoo tsa jacoto ra Jesucristo tsi yu.

<sup>3</sup> Si xaan cuvi tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandihi tuhun tsa nyaá nuu tutu ihya, tsa yatyn cuii cundaa tsi.

### *Nu jacuhun ra Juan tutu tsi nyivi tsa utsa taahan vehe ñuhu*

<sup>4</sup> Yuhu ra Juan jaquitsi yu tutu ihya tsi nyooho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ii tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuvi Nyoo nda tsanaha, tan vityin, tan juvin ra cua quitsi.

<sup>5</sup> Tan naquihin tucu ndo tsa vaha jahá ra Jesucristo. Tyin ra ican cuvi ra tsandaa tan tsa nditsa. Juvin ra cuvi ra tsa nandoto tsa jihna ñi. Tan ndacá ñaha ra tsi ra cuvi rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatya ra tsi yo tsihin niñi ra.

<sup>6</sup> Tan tsaha ra tsa cuvi yo rey tan cuvi yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

<sup>7</sup> ¡Nyehe jihna ndo! ¡Tsa vatsi ra Cristo nu vico andivi! Tandihí nyivi cua nyehe ñi tsi ra nda cuanda nyivi tsa jañicuehe tsi ra tan cua nyehe ñi tsi ra. Tan tandihí ñi cua vacu xaan

ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuvi. Nditsa, tacan cua cuvi, tan na cuvi tsi tacan ñi.

<sup>8</sup> Catyí Jutu Mañi yo:

—Yuhu cuvi ra jihna ñi, tan yuhu cuvi ra cua coo nu cua ndihí quivi, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: Juvin ra cuvi Nyoo nda tsanaha, tan vityin, tan juvin ra cua quitsi.

### *Nu nyehe ra Juan tsa iyo caá ra Cristo*

<sup>9</sup> Yuhu ra Juan cuvi yu yañi ndo. Tan iin caa ñi nyehé yu tundoho tsihin ndo, tan ndacá ñaha Nyoo tsi yo, tan iin caa ñi cunye xaan iñi yo náa cuvi tsi yo tyin jatyinyeé ra Jesucristo tsi yo. Nyii yu vehe caa ñuhu Patmos tsa canyí mahñu ndutya ñuhu. Nyii yu vehe caa tsa cuenda tsa caahán yu tuhun Nyoo tsa jacuhun ra Jesucristo.

<sup>10</sup> Tan iin tumbingu quivi jacahnú yo tsi Jutu Mañi yo, tui iñi yu tsa nyaá Tatyí Ii Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta.

<sup>11</sup> Tan catyí tsi tsihin yu tyehen:

—Yooho, Juan. Yuhu cuvi ra jihna ñi, tan yuhu cua coo nu cua ndihí quivi. Tyaa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

<sup>12</sup> Tacan tan nyico coo yu tyin cuñi yu nyehe yu yoo caahán tsihin yu. Tan nyehe yu utsa taahan candileru xuhun cuaan.

<sup>13</sup> Tan mahñu tsa utsa taahan candileru can, nyehe yu nyaá iin ra tsa caá tumaa caá rayi ñuhu ñayivi ihya. Nditsi ra jahma cañi nda nu tsaha ra. Tan yihí iin cinturón xuhun cuaan yiqui nyica ra.

<sup>14</sup> Tan ixi jiñi ra cuitsin tsi, tumaa cuitsin ixi mbee, tan tumaa cuitsin

catyi. Tan tinuu ra caá tsi tumaa caá nu cayú ñuhu.

<sup>15</sup> Tan xiñú xaan tsaha ra tumaa xiñú iin caa tsa nañí bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha.

<sup>16</sup> Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehé ñicanyii.

<sup>17</sup> Cuhva tsa nyehé yu tsi ra, nduva yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyi ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihi quivi.

<sup>18</sup> Yuhu nyito yu vasu tsihi yu, maa tyin vityin ña cua cundihí maa tsa iyó yu. Tan iyó ndatu tsi yu tsa catyi yu ama taahán tsi cúu nyivi, tan tatun cuhun ñi anyaya o ña cuhun ñi.

<sup>19</sup> Tyaa nu libru tandihí tsa nyehé un, tan tsa iyó vityin, tan tsa cua coo nu cuahán ca tsi.

<sup>20</sup> Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñí tsi catyi tsa utsa vehe ñuhu.

## 2

*Nu quitsaha tsahá cuenda ra Cristo tsi nyivi tsicá tsa utsa vehe ñuhu: Tsa tsaha cuenda ra tsi nyivi tsicá vehe ñuhu ñuu Éfeso*

<sup>1</sup> Jacuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyi tsihin ra tyehen: “Tyehen catyi ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan:

<sup>2</sup> Yuhu tsitó yu tandihí tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñí ndo nyehé

ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyi tyin ra tsicá tyiñu Nyoo cuví ra naha, tan tsitó ndo tyin ña nditsa ra naha.

<sup>3</sup> Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo.

<sup>4</sup> Maa tyin iyó iin tsa ña vaha javahá ndo, tyin ña cuñí ca ndo tsi yu vityin tumaa tsa cuñí ndo tsi yu quivi jihna ñi.

<sup>5</sup> Yacan cuenda nducuhun iñi ndo numaa nda nduva ndo. Tan nasama ndo cuhva iyó ndo, tan javaha nyico ndo tumaa javaha ndo quivi naquihin cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi.

<sup>6</sup> Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñí ndo nyehé ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan.

<sup>7</sup> Nyoooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu. Catyi ra tyehen: Tatun cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

*Tsa tsaha cuenda ra Jesucristo tsi nyivi tsicá vehe ñuhu ñuu Esmirna*

<sup>8</sup> Jacuhun ndihí tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyi tsihin ra tyehen: “Tyehen catyi ra cuví tsa jihna ñi, ra cua coo nu cua ndihi quivi, ra tsa tsihi tan nandoto:

<sup>9</sup> Yuhu nyehé yu tandihí tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi



Israel ndavaha ñi siqui ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañi Satanás, cuví ñi.

<sup>10</sup> Maa tyin ña nayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehe ndo tundoho. Maa tyin cuanyicun vaha ndo tsi Nyoo nda cuanda cúu ndo. Tan yuhu cua cuhva yu ñayivi coo ndo tsihin Nyoo.

<sup>11</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun cuvi jaha canaa ndo tsi nu ña vaha, ña cua cuhun ndo anyaya, quivi cúu nyivi tsa tsinu uvi tsaha.”

*Tsa tsaha cuenda ra Jesucristo tsi nyivi tsicá vehe ñuhu ñuu Pérgamo*

<sup>12</sup> Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyí tsihin ra tyehen: “Tyehen catyí ra tsa ndahá mityi tsa xaan nduvi tsiyo yuhu:

<sup>13</sup> Yuhu nyehé yu tandihi tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuvi tsandaa cuenda yu.

<sup>14</sup> Maa tyin quituví juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñi jandihí cuhva tsa javaha ra Balaam, ra tsicoo tsanaha. Tyin ra Balaam natyuhu ra tsi ra Balac, na jacatsi ra cuñu quití tsa jamañi nyivi nu tsitoho tsi nyivi Israel. Tan natyuhu ra tsi ra na catyí ra tsihin ñi tyin ñavin cuatyí cuví tun iin ñaha tan iyó ña tsihin iin rayi vasu ña tindaha ñi, tan tacan tucu ñi rayi.

<sup>15</sup> Tan juven ñi iyó tucu juhva nyivi tsa ña cuñi nacoo tsa jacuahá ra yihí cuenda ra Nicolás. Tan yuhu ndasi cuñi yu nyehe yu tsa jacuahá ra can naha ra.

<sup>16</sup> Yacan cuenda janumi ndo nasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuví tuhun] quitá yuhu yu.

<sup>17</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu: Tatun cuvi jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyií xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsa tsa yoñi tsitó; intuhun ñi nyivi tsa cua naquihin yuu can cua coto sivi can.”

*Tsa tsaha cuenda ra Jesucristo tsi nyivi tsicá vehe ñuhu ñuu Tiatira*

<sup>18</sup> Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyí tsihin ra tyehen: “Tyehen catyí Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronce tsa xiñu xaan.

<sup>19</sup> Yuhu nyehé yu tandihi tsa javahá ndo. Tan tsitó yu tsa cuñi xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsi tsi.

<sup>20</sup> Maa tyin iyó juhva tsa cuñi yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javaha] ña Jezabel [tsa tsicoo tahan tsanaha]. Ña ican jacuaha tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyivi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayi tsihin ñaha o iin ñaha tsihin rayi tun ña tindaha ñi. Tan jacuahá ña tyin cuví catsi ñi nyayu tsa jamañi nyivi tsi tsitoho.

<sup>21</sup> Yuhu tsa ndatu xaan yu tsa nasama ña cuhva iyó ña, maa tyin ña cuñi ña javaha ña can. Ña cuñi ña jandihí ña tsa tsicá nuu ña tsihin rayi.

22 Tan vityin cua quihin cuehe tsi ña tan ña cua cuvi nduvita ña. Tan nyivi javahá tsa caquiñi tsihin ña, cua cuhva yu tundoho nyehe ñi tatun ña ndu uvi iñi ñi tsa javahá ñi.

23 Tan cua cahñi yu sehe ña. Tacan tan cua coto tandihi nyivi tsicá vehe ñuhu, tyin yuhu tsitó yu tandihi tsa tsicá iñi ñi, tan tandihi tsa iyó aña ñi. Tan tsa intuhun intuhun nyooho cua cuhva yu tsa taahán tsi tsi ndo tsa cuenda tsa javahá ndo.

24 Maa tyin tandihi ca nyooho tsa iyó ñuu Tiatira, nyooho tsa ña naquihin cuenda cuhva jacuahá ña, ndi ña javahá ndo tsa catyí nyivi tyin cuví tuhun xeehe cuenda nu ña vaha, ña tyaá yu inga tsa yí siqui ndo.

25 Maa tyin jañihi ndo javaha ndo tsa vaha nda cuenda quitsi nyico yu.

26 Tan nyooho tsa jaha canaa tsi nu ña vaha, tan javahá ndo cuhva cuñí yu nda cuenda nu ndihi tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihya.

27 Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyivi. Tan cua tahvi cuatyí ndo tsi ñi tumaa tsa tahví cuatyí yo quisi.

28 Tan cua cuhva yu tiñuu cahnu tsa caná tsa naa ca coo tsihin ndo.

29 Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

### 3

*Tsa tsahá cuenda ra Jesucristo tsi nyivi tsicá vehe ñuhu ñuu Sardis*

1 Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihi tsa javahá ndo. Tan vasu catyí nyivi tyin nyito ndo, maa tyin tsa cuenda yuhu, tsa tsihi ndo.

2 Jaha cuenda vaha ndo tsa vaha tsa iyó luxu ca tsi ndo. Tyin coto ndihi ndihi tuhun yu nu yucú ndo. Nyehé

yu tyin nuu Nyoo ña vaha maa tsa javahá ndo.

3 Ndūcuhun iñi ndo tsa vaha tsa cutuhvā ndo. Cūanyicun ndo can, tan naşama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu.

4 Maa tyin iyó juhva nyooho, nyivi Sardis, tsa ña janyahyu jahma; ña javahá ndo tsa caquiñi cuví can. Tan juvin nyooho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo.

5 Tan nyooho tsa cua cuvi jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nyecú sivi tandihi nyivi cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo.

6 Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

*Tsa tsahá cuenda ra Jesucristo tsi nyivi tsicá vehe ñuhu ñuu Filadelfia*

7 Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuñá yuvehe tan ndi intuhun nyivi tan ña cuvi nacasi. Tan tatun nacasi ra, ndi intuhun ñi tan ña cuvi nuña ñi. Tyehen catyí ra:

8 Yuhu nyehé yu tandihi tsa javahá ndo. Tan nuña yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyivi, tan yoñi cuví casi tsi ndo]. Tan iyó luxu tunyee iñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu.

9 Tan nyivi yihí cuenda nu ña vaha, ñi vatya, ñi catyí tyin nyivi Israel cuví ñi, maa tyin ñavin nyivi Israel cuví ñi tsitsi aña ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñí yu tsi ndo.

<sup>10</sup> Tyin cunyeé xaan iñi ndo tumaa catyí yu tsihin ndo tyin cunyeé iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quívi cua jaquitsi yu tundo cahnú síqui tandíhi nyívi, tyin cua nducu cuhva yu tsi tandíhi ñi iyó nu ñuhu ñayívi.

<sup>11</sup> Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyívi tsa vaha tsa cua ñihi ndo.

<sup>12</sup> Nyooho tsa cua cuvi jaha canaa tsi nu ña vaha, cahnú tyíñu Nyoo cua jaha tyíñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sívi Nyoo yu tsi ndo, tan sívi ñuu Nyoo yu, ñuu Jerusalén tsa tsa cua quee nda andívi, tan juvin ñi cua tyaa tucu yu sívi tsa yu tsi ndo.

<sup>13</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

*Tsa tsaha cuenda ra Jesucristo tsi nyívi tsicá vehe ñuhu ñuu Laodicea*

<sup>14</sup> Jachun tucu tutu tsi ra caahán tuhun yu tsihin nyívi tsicá vehe ñuhu ñuu Laodicea. Tan catyí tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javaha Nyoo tandíhi maa tsa iyó:

<sup>15</sup> Yuhu nyehé yu tandíhi tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandíhi tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandíhi cuii ndo tsa tsinú iñi ndo tsi yu.

<sup>16</sup> Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo.

<sup>17</sup> Tyin nyooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuihya cuñi ndo nyehé ndo tundo

tsitsi aña ndo, ndaahvi ndo, cuaa ndo, tan tandíhi ndo tsitsi aña ndo?

<sup>18</sup> Yacan cuenda tsahá cuenda yu tsi ndo tyin tsi maa yu jata ndo xuhun cuan tsa cayú tan naa tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandíhi ndo. Tan jata ndo numeri quihví tinuu ndo tyin tacan tan cuví nyehe ndo.

<sup>19</sup> Yuhu tsahá cuenda yu tan tatsí tuñi yu tsi tandíhi nyívi tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi aña ndo tan javaha ndo tsa vaha.

<sup>20</sup> ¡Nyehe jihna! Yuhu nyaá yu yu-vehe tan cañi ndaha yu. Nyívi tsa cua cuñi ndusu yu, tan nuña ñi yuvehe, cua quihví yu tan cuxiñi yu tsihin ñi. Tan maa ñi cuxiñi ñi tsihin yu.

<sup>21</sup> Cua cuhva yu tsa cunyecú ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jaha canaa yu tsi nu, tan vityin nyaá yu tsihin Jutu yu nu ndacá ñaha ra.

<sup>22</sup> Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu” —catyí ra Jesucristo.

## 4

*Tsa cuví nda gloria*

<sup>1</sup> Tsa yaha can, tan nyehe yu ticoho iin yuvehe nda andívi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndaa nyehe tan janaha yu tsi un tsa cua cuvi nu cuahán ca tsi —catyí ndusu can tsihin yu.

<sup>2</sup> Tan juvin ñi cuhva can tan tuví iñi yu tsa nyaá Tatyí Ii Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá.

<sup>3</sup> Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan taní cahnú yuhu tyayu can tsinú

nduvi coo cuiya, tan xiñu ti tumaa xiñu yuu vaha tsa nañi esmeralda.

<sup>4</sup> Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinu nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi intuhun intuhun ra naha.

<sup>5</sup> Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyí ii Nyoo.

<sup>6</sup> Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyí.

Ñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can.

<sup>7</sup> Iin tsa nyito can caá can tumaa caá ndicaha. Tan tsa tsinu uvi tumaa caá indiqui lee. Tan tsa tsinu uñi, tumaa caá nuu rayi caá nuu can. Tan tsa tsinu cumi tumaa caá tasu tsa cuahán ndavá.

<sup>8</sup> Tan iyó iñu nditsin tsa intuhun intuhun tsa nyito can. Tan tanñi cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

<sup>9</sup> Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan,

<sup>10</sup> tsa oco cumi ra tsahnu can naha ra tsicuiñi tsiti ra naha tan jacahnú ra naha tsi ra iyó tandihí tyembu. Tan tsaquin ra naha corona ra naha nu nyaá tyayu can. Tan catyí ra naha:

<sup>11</sup> Jutu Mañi ndi, Nyoo ndi cuví un. Yooho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihí tsa iyó. Tan tsa cuenda tsa iyó iñi maa un, tan tsicoo tandihí tsa iyó, catyí ra naha.

## 5

*Nu nyehe ra Juan iin tutu tan Mbee Ticatyi Luhlu tsa cuví ra Jesucristo*

<sup>1</sup> Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu.

<sup>2</sup> Tan nyehe yu iin ángel tsa nyee xaan. Tan caná tsa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

<sup>3</sup> Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi.

<sup>4</sup> Tan tsacú xaan yu, tsa tsito yu tyin yoñi maa cuví nacani tutu can tan cuví cahvi, tan cuví nyehe nuu tsi.

<sup>5</sup> Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha [o cuñi tsi catyí, ra ndacá ñaha], ra cuví tata ra Judá, tan tata ra rey David, ra ican jahá canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

<sup>6</sup> Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyi Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tanñi cahnu nu ñuhu ñayivi.

<sup>7</sup> Tan ra Mbee Ticatyi Luhlu can tsahan ra nu nyaá ra nyaá nu tyayu can tan quihin ra tutu tsa ndahá ra can nu ndaha cuaha ra.

<sup>8</sup> Cuhva tsa quihin ra tutu can, tandihí tsa cumi tsa nyito can tan tandihí tsa oco cumi ra tsahnu can



tsicuiñi tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu gutarra. Tan tsitu cutu tsitsi copa xuhun cuaan ndahá ra naha. Tan cutu can cuví tandihí tsa tsicán tahvi nyivi yihí cuenda Nyoo.

<sup>9</sup> Tan tsitá ra naha iin yaa tsa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin niñi un jata un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó tani cahnú nu ñuhu ñayivi, nyivi caahán siin siin yuhu, tan nyivi siin siin tata.

<sup>10</sup> Tsaḥa un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

<sup>11</sup> Yaha can tan tsiñi yu ndusu tan nyehe yu nyecú cuenda millón ángel tani canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can.

<sup>12</sup> Tan ñihi caahán ángel can naha ra, tan catyí ra naha:

Ra Mbee Ticyti Luhlu tsa tsahñi nyivi,

juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihí tunyee ñi.

Na jacahnu yo tsi ra tan na jacahnu tandihí nyivi tan tandihí tsa iyó tsi ra, tyin cahnú xaan cuví ra, catyí ángel can naha ra.

<sup>13</sup> Tan tsiñi tucu yu tsa caahán tandihí tsa javaha Nyoo; tandihí tsa iyó andivi, tan nu ñuhu ñayivi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnú xaan cuví ra tsa nyaá nu tyayu.

Cahnú xaan cuví ra Mbee Ticyti Luhlu.

Tan tunyee ñi tsa iyó tsi ra naha ña cua cundihí maa tsa iyó tsi.

Tan taahán tsi tsa jacahnu yo tan tyaa yahvi yo tsi ra naha tacan ñi maa —catyí tandihí tsa javaha Nyoo.

<sup>14</sup> Tan catyí tsa cumi tsa nyito can:

—¡Na cuví tsi tacan! —catyí tsi naha tsi.

Tan tsicuiñi tsiti tsa oco cumi ra tsahnu can naha ra tan jacahnú ra naha tsi ra tsa ña cua cundihí maa.

## 6

*Nu jocon ra Jesucristo tsa utsa sellu tsa ndasí tutu can*

<sup>1</sup> Tacan tan nyehe yu nu jocon ra Mbee Ticyti Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—¡Naha, tan nyehe un! —catyí tsi tsihin yu.

<sup>2</sup> Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihí ra iin corona yihí jiñi ra, yacan jaha canaa ra, tan ndi nyaá ca cua jaha canaa ca ra.

<sup>3</sup> Tan tsa jocon ra Mbee Ticyti Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

<sup>4</sup> Tan quitá iin cuayu cuaaha. Tan ra tsa yosó tsi ti ñihí ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyivi tsi ñi. Tan ñihí ndihí ra iin mityi cahnú cundahá ra.

<sup>5</sup> Tan tsa jocon ra Mbee Ticyti Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticyta.

6 Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyívi tsi iin musu tsa iin quívi, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jatívi ndo acetye tan vinu —catyí ndusu can.

7 Tan tsa joçon ra Mbee Ticatyi Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—¡Naha, tan nyehe un! —catyí tsi tsihin yu.

8 Tan nanyehe yu, tan nyehe yu iin cuayu cuaan. Tan ra yosó tsi ti nañi ra Tuhun Tsihi. Tan tsata ra can vatsi inga ra tsa nañi Nu Yucú Añima Ndiyí. Tan ñihí ra naha tunyee iñi tsa cahñi ra naha tsa cuaha nyívi iyó nu ñuhu ñayívi. Tyin tsitsi tsa sava nyívi iyó nu ñuhu ñayívi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha cuatyí, tan tsihin tama, tan tsihin cuehe, tan tsihin quití xaan iyó nu ñuhu ñayívi.

9 Tan tsa joçon ra Mbee Ticatyi Luhlu can tsa tsinu uhun sellu can, nyehe yu xuu altar. Tan ican yucú añima nyívi tsa tsihi tsa cuenda tsa jacoto ñi tuhun Nyoo.

10 Tan caná tsaa ñi tan catyí ñi tye-hen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyívi tsa tsahñi tsi ndi tsa cuenda un? —catyí ñi.

11 Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quívi, nda cuanda cahñi nyívi tsi tandihí ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihi tucu maa ñi.

12 Tan tsa joçon ra Mbee Ticatyi Luhlu can tsa tsinu iñu sellu can, nyehe yu tyin ñihí xaan taán. Tan ndutuun ñicanyii tumaa tuun jahma nyívi iyó tucuihaya iñi. Tan yoo ndu-cuaaha tsi tumaa cuaaha ñiñi.

13 Tan tiñuu cucoyo tsi nu ñuhu ñayívi tumaa cucoyó tsiti yutya yutun tatun ñihí yahá tatyí.

14 Tan andívi tsiquihí tuvi tsi tumaa tyihí tuví yo iin ndaha tutu. Tan tandihí yucu tan ñuhu nyihí tsa cayucú mahñu ndutya ñuhu nasama nu cayucú tsi.

15 Tan tandihí rey tsa iyó nu ñuhu ñayívi tsihin ra nahnu naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihí nyívi tsa cuví musu, tan ñi tsa ñavin musu cuví, quíhví xeehe ñi tsitsi yavi yuu tan tyañu cava tsa iyó yucu nahnu.

16 Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyi Luhlu can tsi ndi.

17 Tyin tsa tsaa quívi cahnu tsa cua tatsi tuñi ra tsi ndi, tan yoñi cunyee iñi can —catyí ñi.

## 7

*Nu ñihí nyívi Israel tuñi cunyaq nutyaan ñi*

1 Tsa yaha can tan nyehe yu nyecú cumi ángel tsa ndihí tsa cumi tutun ñuhu ñayívi ityi nu tuhvá tatyí queé tyin tacan tan ña yaha tatyí nu ñuhu ñayívi tan nu ndutya ñuhu tan nu yutun.

2 Tan nyehe tucu yu queé inga ángel, ityi nu caná ñicanyii, tan ndahá ra tuñi Nyoo nyito. Tan cana tsaa ra tsi tsa cumi ángel tsa ñihí ndatu tsa jatívi nu ñuhu ñayívi tan nu ndutya ñuhu. Tan catyí ra tsihin ra naha:

3 —Ña jatívi naha ndo nu ñuhu ñayívi, ndi nu ndutya ñuhu, tan ndi nu yutun tsa ndi cumañi ca janaha ndi yoo nyívi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

4 Tan catyí ra tsiñi yu tyin cientu uvi xico cumi mil cuví nyívi Israel tsa tsinyaq tuñi can.

<sup>5</sup> Utsi uvi mil nyivi tata ra Judá tsinyaa tuñi, tan utsi uvi mil nyivi tata ra Rubén, tan utsi uvi mil nyivi tata ra Gad,

<sup>6</sup> tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés,

<sup>7</sup> tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar,

<sup>8</sup> tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaa tuñi Nyoo tsi ñi.

*Nu nyehe ra Juan tsi nyivi nditsi jahma cuitsin*

<sup>9</sup> Tsa yaha can tan nyehe yu yucú cuaha nyivi. Tan yoñi maa cuví nacahvi tsi ñi, tyin cuaha xaan ñi. Yucú nyivi quee tandihí ñuu nyihi tan ñuu nahnu tsa iyó taní cahnu nu ñuhu ñayivi. Tan yucú nyivi caahán siin siin yuhu. Tan yucú nyivi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyi Luhlu. Nditsi ñi jahma cuitsin. Tan ndahá ñi ndaha ndicaha.

<sup>10</sup> Tan tandihí ñi caná tsa ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyi Luhlu,

juvin ra naha jacacú tsi yo —catyí ñi caná tsa ñi.

<sup>11</sup> Tan tandihí ángel naha ra nyecú ra naha taní canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñi tsi ra naha tan tsaquin ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo.

<sup>12</sup> Tan catyí ra naha:

Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahvi nyoo tsi un. Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuvi tsi tacan tandihí tyembu, catyí ra naha.

<sup>13</sup> Tacan tan tsica tuhun iin ra tsahnu can tsi yu tan catyí ra:

—¿Yóo nyivi cuví ñi nditsi jahma cuitsin ihya? ¿Tan ndáa ityi quee ñi? —catyí ra.

<sup>14</sup> Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyivi ihya cuví ñi nyehe tundoho cahnu. Maa tyin nacatya ñi jahma ñi tsihin ñiñi ra Mbee Ticatyi Luhlu tan nducuitsin tsi.

<sup>15</sup> Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi.

<sup>16</sup> Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi.

<sup>17</sup> Tyin ra Mbee Ticatyi Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tsihin yu.

## 8

*Nu jocón ra Jesucristo tsa tsinu utsa sellu tan nu quitá iin ángel tsihin iin cuu xuhun cuaan*

<sup>1</sup> Tan tsa jocón ra Mbee Ticatyi Luhlu tsa tsinu utsa sellu tsa ndasí tutu can, ndutaxin nda andivi tumaa sava hora.

<sup>2</sup> Yaha can tan nyehe yu nyecú utsa ángel ityi nuu Nyoo. Tan intuhun intuhun ra naha quihin cuenda ra naha iin trompeta.

<sup>3</sup> Yaha can tan tsaá inga ángel tsa ndahá iin cuu xuhun cuaan. Tan tsinyaa nyityi ra ityi nuu altar can. Tan quihin cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo.

<sup>4</sup> Tan quitá yuhma cutu tan yuhma tsa tsicán tahvi nyiví tsi Nyoo ndaha ra, tan cuahán yuhma can nu nyaá Nyoo.

<sup>5</sup> Tacan tan ángel can quihín ra cuu can tan jacutú ra can tsihin tuun ñuhu tsa quitá nu altar can. Tan tyoso ra can nu ñuhu ñayiví. Tan quitsahá caahán savi, tan iyo cuví. Tan ñihi tatsa, tan quitsahá taán.

#### *Nu tiví ángel naha ra trompeta*

<sup>6</sup> Tacan tan tsa utsa ángel tsa ndahá trompeta can, ndatú ra naha tsa tiví ra naha can.

<sup>7</sup> Tsa tiví iin ángel can trompeta tsa ndahá ra, quitsahá cuún savi tan cucoyó yuu savi, ñihi cayú ñuhu tan sacá nuu ññi tsihin can. Tan tsa yatyin cayú sava ñuhu ñayiví, tan tsa yatyin tucu sava cuhva nyaá cuhu tsitsa tan tandihí cuhva nyaá cuhu cuii.

<sup>8</sup> Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacava can mahñu ndutya ñuhu. Tan tsa yatyin sava ndutya ñuhu can nanduvi tsi ññi.

<sup>9</sup> Tan tsa tandihí quití iyó tsitsi ndutya ñuhu can tsihí tsa yatyin sava tí naha tí. Tan tahví cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

<sup>10</sup> Tan tsa tiví tsa tsinu uñi ángel can trompeta tsa ndahá ra, nacava iin tiñuu cahnu. Cayú tsi tumaa cayú yíti. Tan nacava tsi síqui tsa yatyin ña sava yutya nahnu tan tsa yatyin ña sava nu ndohyo.

<sup>11</sup> Tan sívi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uva tsi tumaa tsa uva xaan ajenjo can. Tan cuaha xaan nyiví tsihí tyin tsihí ñi ndutya tsa ndu uva can.

<sup>12</sup> Tan tsa tiví tsa tsinu cumi ángel can trompeta tsa ndahá ra, ndu naa tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaa tsi naha tsi. Tan tsa cuenda tsa ndunaa juhva ñicanyii, ndunaa nu ñuhu ñayiví cumi hora tsa iin iin nduvi. Tan tsa cuenda tsa tiví

juhva yoo tan tiñuu, ña ndunditsin maa nu ñuhu ñayiví cumi hora tsa iin iin tsacuaa.

<sup>13</sup> Yahá can tan nyehe yu iin ángel ndavá ra mahñu andiví tan tsiñi yu tsa caahán ra. Tsihin tsa ñihi ndusu ra catyí ra:

—¡Ndahvi nyiví iyó nu ñuhu ñayiví tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

## 9

<sup>1</sup> Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andiví. Tan nacava can nu ñuhu ñayiví. Tan quihín cuenda can ndaha tucu tsa cuenda yavi cunu tsa nduve maa nuu tsindihí.

<sup>2</sup> Tacan tan nuña can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasi yuhma can nuu ñicanyii tan nasaca nuu can tsihin tatyí. Tan ndunaa nu ñuhu ñayiví.

<sup>3</sup> Tan tsitsi yuhma can quitá tica xama. Tan ndava tí naha tí nu ñuhu ñayiví. Tan ñihí tí naha tí ndatu tsa tyaa tí naha tí tsi nyiví tumaa tyaa tujuhma tsa iyó nu ñuhu ñayiví.

<sup>4</sup> Quihín tí naha tí tuhun tyin na ña jativí tí naha tí cuhu tsa iyó nu ñuhu ñayiví, ndi cuhu cuii, tan ndi yutun. Maa tyin na tyaa tí naha tí tsi nyiví tsa nduve tuñi Nyoo nyaá nutyaan.

<sup>5</sup> Ña ñihí ndatu tí naha tí tsa cahñi tí naha tí tsi nyiví, tyin tyaa ñi maa tí naha tí tsi ñi. Tan quihí xico tí tsi ñi uhun yoo. Tan xico uhvi can uhvi tsi tumaa uhví nyiví tsa tyaa tujuhma.

<sup>6</sup> Quiví can nyiví cua nanducu ñi tuhun tsiihí. Maa tyin ña cua nañihi ñi can. Tan vasu ndi maa cuñí ñi cúu ñi, tuhun tsiihí cua cunu tsi nuu ñi tyin ña cua cúu ñi.

<sup>7</sup> Tica xama can caá tí tumaa caá cuayu tsa tsicá cuatyí. Tan jiñi tí naha tí yihí tsa caá tumaa caá corona xuhun cuaan. Tan nuu tí naha tí caá tumaa caá nuu nyiví.



<sup>8</sup> Tan ixi jiñi ti naha ti caá tumaa caá ixi jiñi ñaha. Tan nuhu ti naha ti caá can tumaa caá nuhu ndicaha.

<sup>9</sup> Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí.

<sup>10</sup> Tan juhma ti naha ti caá tumaa caá juhma tujuhma, tyin yihí iñu can. Tan tsihin can cua tyaa ti naha ti tsi nyivi tsitsi tsa uhun yoo.

<sup>11</sup> Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñí tsi catyi: Nu Janaá.

<sup>12</sup> Tsa yaha iin tundoho, tan cumañi uvi taahan ca.

<sup>13</sup> Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quitá tsitsi tsa cumi ndiqui tsa nyecú tutun altar xuhun cuaan tsa nyaá ityi nuu Nyoo.

<sup>14</sup> Tan ndusu can caahán tsi tsihin tsa tsinu iñu ángel tsa ndahá trompeta can, tan catyi tsi:

—Ndatsi tsi tsa cumi ángel tsa nu-uhñi yatyin yuhu yutya cahnu Eufraates —catyi ndusu can.

<sup>15</sup> Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi.

<sup>16</sup> Tan tsiñi yu tyin uvi cientu millón andarú tsa yosó cuayu.

<sup>17</sup> Tacan nyehe yu cuayu jaha Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre.

<sup>18</sup> Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre.

<sup>19</sup> Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá

tumaa caá coo tan nuu juhma ti naha ti caá tumaa caá jiñi coo. Tan tsihin yacan jañicuehé ti naha ti tsi nyivi.

<sup>20</sup> Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuví nyehe, ndi ña tsiñi, ndi ña cuví caca.

<sup>21</sup> Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayi, tan rayi ña jandihí ra naha tsa tsicá nuu ra naha tsihin ñaha vasu ndi maa ña tindaha ñi. Tan ña jandihí ñi tsa suhú ñi.

## 10

### *Ángel tsa ndahá libru luhlu*

<sup>1</sup> Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú.

<sup>2</sup> Tan ndahá ra iin libru luhlu nuñá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi.

<sup>3</sup> Tacan tan cana tsaa ra, tumaa taná ndicaha tsa cuxaán ti. Tan cuhva tsa cana tsaa ra, tsiñi yu utsa ndusu tumaa cuví nu caahán savi, tan intuhun intuhun tsi caahán tsihin ndusu maa tsi.

<sup>4</sup> Tsa yaha tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyi tsi tsihin yu:

—Naquihin xeehe tuhun tsa cahan tsa utsa ndusu can. Tan ña tyaa un can nu tutu —catyi ndusu can.

<sup>5</sup> Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandaá ra ndaha cuaha ra ityi andivi.

<sup>6</sup> Tan ángel can catyi ra:

—Na nyehe maa Nyoo ra ña cua cundihi maa, ra tsa javaha andivi tan ñuhu ñayivi tan ndutya ñuhu tan tandihi tsa iyó nuu tsi tyin nduve ca tsa cucuee.

<sup>7</sup> Tyin cuhva tsa cua quitsaha tivi tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyi Nyoo tyin javaha ra, tumaa cahan ra tsihin ra jahá tyiñu tyiñu ra, ra cuvi ndusu yuhu ra —catyi ángel can.

<sup>8</sup> Tan ndusu tsa quita andivi, tsa cahan jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandica tsa ndahá ra ángel tsa tsañi nu ndutya ñuhu tan nu ñuhu ñayivi —catyi tsi.

<sup>9</sup> Tacan tan tsahan yu nu nyaá ángel can tan tsican yu libru luhlu can tsi ra, tan catyi ra tsihin yu:

—Juhun, catsi itsi. Vixi xaan tsi cua cuvi tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyi ra tsihin yu.

<sup>10</sup> Tacan tan quihin yu libru luhlu tsa ndahá ra, tsatsi yu. Tsa ndi nyii tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uva tsi tsitsi yu.

<sup>11</sup> Tacan tan catyi ra naha tsihin yu:

—Cuñi tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihi tan ñuu nahnu, tan nyivi caahán sin sin yuhu, tan siqui ra cuvi rey naha ra —catyi ra tsihin yu.

## 11

### *Nduvi ra tsa cuvi tsandaa naha ra*

<sup>1</sup> Tacan tan tsaha ra naha iin ndoo tsi yu. Caá tsi tumaa caá yutun tsa tuhva yo tyihi cuhva tsihin. Tan catyi ra naha tsihin yu:

—Nduvita tan tyihi cuhva un vehe ñuhu Nyoo tan altar ra, tan cahvi naja taahan nyivi jacahnú tsi ra tsitsi vehe can.

<sup>2</sup> Maa tyin ña tyihi cuhva un nuquehe vehe ñuhu can, tyin tsa cuenda nyivi inga ñuu cuvi can. Cua

vaca tsaha ñi nu ñuu ii tsitsi tsa uñi cuiya sasava.

<sup>3</sup> Tan yuhu cua jacuhun yu uvi ra tsa cua cuvi tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

<sup>4</sup> Tan tsa nduvi tsandaa can cuvi uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi.

<sup>5</sup> Tan nyivi tsa cua cuñi jañicueehe tsi ra cuvi tsandaa can naha ra, cua naa cuii nuu ñi. Tyin cua quita ñuhu yuhu ra naha, tan tsihin can cua cahmi ra naha tsi tandihi nyivi xaan iñi tsi ra naha.

<sup>6</sup> Tan iyó ndatu tsi ra naha tsa casi ra naha nu cuun savi tandihi quivi tsa cua cuhva cuenda ra naha tuhun caahán Nyoo tsihin ra naha tsi nyivi. Tan iyó tucu ndatu tsi ra naha tsa jananduvi ra naha ñiñi ndutya. Tan iyó tucu ndatu tsi ra naha tsa janyehe ra naha tundoho tsi nyivi iyó nu ñuhu ñayivi tsihin tandihi nuu cuehe. Tan cuvi javaha ra naha yacan najava tsaha cuñi maa ra naha.

<sup>7</sup> Maa tyin tsa cua ndihi cuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan ti tsihin tsa nduvi taahan ra cuvi tsandaa can. Tan cua jaha canaa ti tsi ra naha. Tan cua cahñi ti tsi ra naha.

<sup>8</sup> Tan cua cava cuñu ñuhu ra naha tsitsi calle ñuu nu tsahñi nyivi tsi Jutu Mañi yo tan tyaá ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can].

<sup>9</sup> Tan tsitsi tsa uñi quivi sasava, cua nyehe tandihi nyivi cuñu ñuhu ra naha; nyivi iyó tandihi ñuu nyihi, nyivi tandihi ñi tata, tan ñi caahán sin sin yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihii xeehe cuñu ñuhu ra naha tsitsi ñuhu.

<sup>10</sup> Tan sii xaan cua cuñi ñi tsa cuenda tsa cua cúu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa sii

cuñi ñi tsa cua cúu nduvi taahan rayi tsa cahan tuhun Nyoo tsihin ñi. Tyin cuñi maa ñi tyin tsaha xaan ra naha tundoho tsi ñi.

<sup>11</sup> Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihi nyivi tsa cua nyehe tyin cua nandoto ra naha, cua nayuhvi xaan ñi.

<sup>12</sup> Tan tsa yaha tsa tsihi ra naha tan nyehe yu nandoto ra naha, tan catyí iin ndusu ityi andivi tsihin ra naha:

—Naha ndo nyehe

Tacan tan nandaa ra naha ityi andivi tsitsi vico. Tan nyehe nyivi xaan iñi tsi ra naha nu nandaa ra naha.

<sup>13</sup> Tan ñihi xaan taan cuhva can. Tan tsitsi ñuu can tani cuaha xaan vehe. Tsitsi tsa utsi utsi vehe, tani intuhun intuhun tsi. Tan tsihi utsa mil nyivi jaha tsa taan can. Tan nyivi tsa ña tsihi, jacahnú ñi tsi Nyoo, ra nyaá andivi, tsa cuenda tsa yuuhvi ñi.

<sup>14</sup> Yacan cuví tundoho tsa tsinu uvi tsa nyehe nyivi, maa tyin tsa vatsí tsa tsinu uñi.

*Nu tiví tsa tsinu utsa ángel trompeta tsa ndahá ra*

<sup>15</sup> Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyí tsi:

Tandihí nu ndacá ñaha rey nu ñuhu ñayivi, tsa yaha nanduví tsi tsa tsií Nyoo Jutu yo tan ra Cristo.

Tan ña cua ndihí maa tsa ndacá ñaha ra naha, catyí ndusu can.

<sup>16</sup> Tacan tan tsa oco cumi ra tsahnu tsa nyecú nu nyaá Nyoo, tsicuiñi tsi ti ra naha tan tsaquin ra naha nuu ra naha nda nu ñuhu. Tan jacahnú ra naha tsi Nyoo.

<sup>17</sup> Tan catyí ra naha:

Jutu Mañi ndi Nyoo ndi. Ra iyó tandihí tunyee iñi tsi.

Tacan ñi iyó maa un. Juvín un cuví Nyoo nda tsanaha tan vityín, tan juvín un cua quitsi.

Tsahá xaan ndi tyahvi nyoo tsi un, Tyin tsa naquihín cuenda un tunyee iñi un.

Tan tsa quitsaha ndacá ñaha un.

<sup>18</sup> Tan vasu ndi maa cuxaán nyivi iyó tandihí ñuu nahnu.

Maa tyin tsa tsaá quivi tatsi tuñi un tsi ñi.

Tan tsa tsaá quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jaha tyiñu tyiñu un, ñi tsaha cuenda tuhun caahán un,

ñi tsa nacuhva cuenda añima ñi tsi un, tan jacahnú ñi sivi un.

Vasu ndi maa cahnu cuví ñi o ndaahvi ñi.

Tan tsa tsaá cuhva tsa janaa un tsi nyivi jativí tsi nyivi iyó nu ñuhu ñayivi, catyí ra naha.

<sup>19</sup> Tacan tan nuña yuvehe ñuhu Nyoo tsa iyó gloria, tan tsitsi vehe ñuhu can quituví tsatun cuenda tsa ndoo ra tyiñu tsihin yo. Tan quihvi tatsa. Tan ñihí cuvaá tan caahán savi. Tan taan. Tan ñihi xaan cucoyo yuu savi.

## 12

*Nu nducú coo xaan tsa iyó ndaha tsi ñaha*

<sup>1</sup> Tacan tan quituví tsa iyo cahnu ityi andivi. Quita iin ñaha tan nditsí ña ñicanyii tumaa nditsí yo jahma. Tan tsañi ña nu yoo. Tan yihí iin corona tsa utsi uvi tiñuu jiñi ña.

<sup>2</sup> Tan ñaha ihya ñuhú sehe ña. Tan tsacú xaan ña tsihin tsa cuuhví tsitsi ña, tyin nyehé xaan ña tundoho.

<sup>3</sup> Tacan tan quita inga tsa iyo ityi andivi. Tan nyehe yu iin coo xaan tsa iyó ndaha. Cuaaha ti tan cahnu ti. Tan iyó utsa jiñi ti, tan utsi ndiqui ti. Tan yihí corona intuhun intuhun jiñi ti.

<sup>4</sup> Tan tsihin juhma ti jacoyo ti tsa yatyin sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin cuñí ti catsi ti sehe ña náa cuhva cacu ñi maa tsi.

<sup>5</sup> Tan ñaha can jacacu ña iin rayi. Tan juvín ra cua cundaca ñaha tandihí nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin

tatun tsa cuví caa. Tan tsa yaha cacu ra, naquihin Nyoo tsi ra cuahán ra nu nyaá ra nu tyayu ra.

<sup>6</sup> Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quivi.

<sup>7</sup> Yaha can tan tsicoo cuatyí nda andivi, cañi tahan ángel Miguel tan tandihí ángel tsa cutahán tsihin ra tsihin coo xaan can. Tan coo can tsihin tandihí tatyí ña vaha tsa cutahán tsihin ti, cañi tahan ti tsihin ángel Miguel.

<sup>8</sup> Maa tyin ña cuví jaha canaa ti tsa cañi tahan ti. Tan ña ñihí ca ti nu ndoo ti nda andivi tsihin tatyí ña vaha tsa cutahán tsihin ti.

<sup>9</sup> Tacan tan tava Nyoo tsi nu coo xaan can, nu Coa Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihí nyivi iyó nu ñuhu ñayivi. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayivi.

<sup>10</sup> Tacan tan tsiñi yu iin ndusu ñihí xaan ityi andivi, tan catyí tsi:

—Vityin tsa tsaá quivi tsa jacacú Nyoo tsi nyivi. Tsa jaha canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tava ra naha tsi nu tsa tyaá xaan cuatyí siqui ñi nuu ra naha nduvi tan ñiñu.

<sup>11</sup> Tan jaha canaa ñi tsi nu tsihin niñi ra cuví Mbee Ticatyi Luhlu, tan tsihin tuhun Nyoo tsa cahan ñi tsihin nyivi. Ña nayuhvi ñi cúu ñi tan tsaha cuenda ñi ñayivi ñi.

<sup>12</sup> Yacan cuenda cusii iñi nyooho tsa iyó andivi. Maa tyin jandahvi nyivi tsa iyó nu ñuhu ñayivi tan nu ndutya ñuhu! Tyin nu ña vaha nacava nu nu ñuhu ñayivi nu yucú ñi. Tan xaan xaan cuñi nu tyin tsitó nu tyin ña cuaha ca quivi tan cundihí tsa jandaví ñaha nu tsi ñi.

<sup>13</sup> Tan tsa nyehe nu coo xaan tsa iyó ndaha can tyin nacava nu nu ñuhu ñayivi, quitsaha nyaá ndaha nu tsi ñaha tsa tsicoo sehe yii can.

<sup>14</sup> Maa tyin tsicoo uvi nditsin nahnu ñaha can tan caá can tumaa

caá nditsin tasu. Tsicoo can tyin tacan tan cuví ndava ña tan cuhun ña cunu xeehe ña nu tsiqui nu ña cuví ñihí coo can tsi ña. Ican cuví nu cua ñihí ña tsa catsi ña tsitsi tsa uñi cuiya sasava.

<sup>15</sup> Tan nu coo can tava nu ndutya tsihin yuhu nu, tyin coo yutya cahnu, tan tañi ñaha can tsitsi yutya can.

<sup>16</sup> Maa tyin ñuhu ñayivi jatyinyee tsi tsi ña, tyin ndata tsi tan nanyee yutya tsa javaha nu coo tsihin ndutya tsa quita yuhu nu.

<sup>17</sup> Tan tsa ña cuví jaha canaa nu tsi ña, quitsaha cañi tahan nu tsihin nyivi cuví tata ña, ñi tsa tyaá yahvi tuhun caahán Nyoo, tan nyicún ñi tsihin tsa ñi iñi añima ñi tsa nditsa tsa caahán ra Jesucristo.

## 13

### *Nu nyehé ra Juan uvi quití caquiñi*

<sup>1</sup> Tan tsinyaa nyityi yu nu nyiti yuhu ndutya ñuhu, nyehe yu quita iin quití caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo.

<sup>2</sup> Quití caquiñi can caá ti tumaa caá cuiñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsaha nu ndatu tsi quití caquiñi can tsa cunyaa ti nu tyayu nu. Tan tsaha nu ndatu tsi ti tsa cundaca ñaha ti.

<sup>3</sup> Tan nyaá iin nu caahvi tsa cua cahñi tsi ti jiñi ti, maa tyin ndaha nu caahvi can. Tan tsa nyehe nyivi iyó nu ñuhu ñayivi ihya can, iyo xaan cuñi ñi. Tan quitsaha nyicún ñi tsi ti.

<sup>4</sup> Tan jacahnú ñi tsi nu coo xaan can, tyin tsaha nu ndatu tsi quití can. Tan jacahnú tucu ñi tsi quití can, tan catyí ñi:

—¿Yoñi maa cuví tumaa cuví quití ihya? ¿Tan yoñi cuví cañi tahan tsihin ti? —catyí ñi.

<sup>5</sup> Tan ñihí tucu quití can ndatu tsa cahan ndasi ti tan cahan ti ndavaha



ñi siqui Nyoo. Tan cua cundaca ñaha ti uvi xico uvi yoo.

<sup>6</sup> Tacan javaha ti: Cahān ti tsi Nyoo. Cahān ti ndavaha ñi nu iyó ra, tan sivi ra, tan tsa iyó andivi.

<sup>7</sup> Tan tsicoo tucu ndatu tsi ti tsa cañi tahan ti tsihin nyivi yihí cuenda Nyoo nda cuanda cuvi jaha canaa ti tsi ñi. Tan ñihí ndatu tucu ti tsa quihí ndaha ti tsi nyivi ndihí ñi tata, nyivi caahán sñin sñin yuhu, nyivi iyó tandihí ñi ñuu nyihi, tan ñuu nahnu.

<sup>8</sup> Tan nyivi tsa ña cua coo ñayivi tsa tsihin ra cuvi Mbee Ticatyi Luhlu, ra tsa tsihi, ña cua coo ñi ñayivi tsa can tsa cuenda tyin ña tsinyaa sivi ñi nu libru ra tsa ndi cumañi ca tsinu ñuhu ñayivi. Tandihí maa ñi can cua jacahnu ñi tsi quití caquiñi can.

<sup>9</sup> Tatun yihí ndo iyó soho ndo, tyaa soho ndo tuhun ihya:

<sup>10</sup> Nyivi tyihí tsi inga nyivi vehe caa, cua cuhun tucu maa ñi vehe caa. Tan nyivi tsa tsahñi tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihí cuenda Nyoo cuñi tsi cunyeé iñi ndo tan tsinu iñi ndo tsi ra.

<sup>11</sup> Yahā can tan nyehe yu quitā inga quití caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyi luhlu. Maa tyin caahán ti tumaa caahán coo xaan tsa iyó ndaha can.

<sup>12</sup> Tan ndacá ñaha ti tumaa ndacá ñaha inga quití caquiñi can. Tan nyehé inga quití can tsa ndacá ñaha ti. Tan natyuhú ti tsi ñuhu ñayivi tan nyivi iyó nu tsi na jacahnu ñi tsi inga quití caquiñi tsa cuñi cúu jaha tsa caahvi tsa tsinyaa tsi ti.

<sup>13</sup> Tan cuaha xaan tsa iyo javaha ti nda cuanda quitā ñuhu andivi tan janacava ti can nu ñuhu ñayivi tyin nyehe nyivi.

<sup>14</sup> Tan jandavi ñaha ti tsi nyivi iyó nu ñuhu ñayivi tsihin tsa iyo tsa cuvi javaha ti nuu quití caquiñi tsa jihna ñi. Tava tyiñu ti na javaha ñi iin tsitoho quití caquiñi tsa tyahnya caahvi tsihin mityi, tan ña tsihi ti.

<sup>15</sup> Tan quití caquiñi tsa tsinu uvi can

tsicoo ndatu tsi ti tsa cuhva ti tsa coo nyito tsitoho quití caquiñi tsa jihna can tyin tacan tan cuvi cahan tsi tan cahñi tsi tsi tandihí nyivi tsa ña cua jacahnú itsi.

<sup>16</sup> Tan sñin tyin catyí tsi tyin cunyaa tuñi tsi tandihí nyivi; nyivi nyihi, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi.

<sup>17</sup> Tan yoñi maa cuvi jata tan xico tatun nduve tuñi can nyaá tsi ñi, o tatun nduve sivi ti, o número sivi ti nyaá tsi ñi.

<sup>18</sup> Tuhun ihya cuñi xaan tsi tsa tsiñi tuñi. Nyivi cutuñi iñi, na jaha cuenda ñi número quití caquiñi can. Tyin número rayi cuvi can. Tan número can cuvi iñu cientu uñi xico iñu.

## 14

*Nu tsitá cientu uvi xico cumi mil nyivi iin yaa tan jacahnú ñi tsi Nyoo*

<sup>1</sup> Yahā can tan nyehe yu tsi ra cuvi Mbee Ticatyi Luhlu, nyaá nyityi ra jiñi yucu Sión. Tan yucú cientu uvi xico cumi mil rayi tsihin ra. Ra ihya naha ra cuvi ra tsa nyaá sivi ra tan sivi Jutu ra nutyaan.

<sup>2</sup> Tacan tan tsiñi yu cucayú ityi andivi, tumaa cucayú yutya nahnu, tan tumaa caahán savi tsa ñihi xaan, o tumaa cuvi nu javacú ra naha guitarra cuaha.

<sup>3</sup> Tan tsitá ra naha iin yaa tsa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihí ra tsahnu naha ra. Tan yoñi maa cuvi cutuhva yaa can, maa ñi maa tsa cientu uvi xico cumi mil rayi tsa cacú nu ñuhu ñayivi cuvi tsitá can.

<sup>4</sup> Ra ihya naha ra cuvi ra tsa ña tsica nuu tsihin ñaha, tyin ii ra naha. Tan nyicún ra naha tsi ra cuvi Mbee Ticatyi Luhlu tandihí ñi ityi cuahán ra. Cacú ra naha tan juvin ra naha jamañi tsi ra naha nuu Nyoo tan nuu ra cuvi Mbee Ticatyi Luhlu tsa jihna ñi.

<sup>5</sup> Yoñi cuvi catyi tyin vatya ra naha, tyin tsa cuenda Nyoo nduve ca cuatyi

ra naha iyó tan yucú ra naha nu nyaá ra nu tyayu ra.

*Tuhun tsa jacoto uñi ángel*

<sup>6</sup> Tacan tan nyehe yu ndavá inga ángel ityi andivi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandihi ñi ñuu nahnu, tan ñuu nyihi, nyivi tandihi ñi tata, tan nyivi caahán sin sin yuhu.

<sup>7</sup> Tan ñihi xaan cahan ra tan catyí ra:

—Nayuhvi ndo tsi Nyoo, tan jachanu ndo tsi ra. Tyin tsa taha tsi cuhva tsa cua cutuñi nyivi. Jachanu ndo tsi ra javaha andivi tan ñuhu ñayivi, tan ndutya ñuhu tan ndohyo —catyí ángel can.

<sup>8</sup> Tan catyí inga ángel tsa vatsí nyicún tsi ra:

—Tsa nduva ñuu Babilonia tsa cuví ñuu cahnu, tsa tani tsi. Tyin nyivi iyó ñuu can jacuaha ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jaha ñi Babilonia cuví can —catyí ángel can.

<sup>9</sup> Tacan tan vatsí tsa tsinu uñi ángel, tan ñihi cahan ra tan catyí ra:

—Tatun ndáa nyivi jachanu tsi quití caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi,

<sup>10</sup> cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacoho ra vinu xaan tsi ñi nuu ángel tan nuu ra cuví Mbee Ticatyí Luhlu cuvi can.

<sup>11</sup> Tan ña cua cundihi maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jachnú tsi quití caquiñi can tan tsi tsitoho ti, tan tsaha ñi tsi ñi cunyaa tuñi sivi ti.

<sup>12</sup> Yacan cuenda nyivi yihí cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñi tsi tsa cunyeet iñi ñi —catyí ángel tsa tsinu uñi can.

<sup>13</sup> Tacan tan tsiñi yu iin ndusu tsa quee nda andivi, tan catyí tsi tsihin yu:

—Tyaa tuhun ihya: “Vityin tan ityi nuu, sii xaan cua cuvi tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, sii xaan cua cuvi tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

*Nu cua tatsi tuñi Nyoo tsi nyivi*

<sup>14</sup> Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan.

<sup>15</sup> Tan quitá inga ángel tsitsi vehe ñuhu tan ñihi xaan cana tsaa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaa cuhva, tan tsa iyó nu ñuhu ñayivi tsa tsityí tsi —catyí ra.

<sup>16</sup> Tacan tan ra tsa nyaá nu vico can jayaha ra mityi ra nu ñuhu ñayivi, tan naquihin ra tsa iyó nuu tsi.

<sup>17</sup> Tacan tan quitá inga ángel tsitsi vehe ñuhu tsa iyó andivi. Tan juvin ñi ndahá tucu ra iin mityi yacua tsa xaan.

<sup>18</sup> Tan quitá inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan cana tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu vixi tsa nañi uvas tsa iyó nu ñuhu ñayivi, tyin tsa tsityí tsi —catyí ra.

<sup>19</sup> Tan jayaha ángel can mityi ra nu ñuhu ñayivi tan tsahnya ra uvas can. Tan tyihí ra itsi iin nu tyihí ra tyin cua cuhñi ra itsi tan quita ndutya tsi. Tan yacan cuñi tsi catyí tsa cua tatsi tuñi Nyoo tsi nyivi.

<sup>20</sup> Tan nacuhñi ra uvas can ityi tsata ñuu, tan cuñi tsi catyí tyin cuaha xaan nyivi tsihi, tan nu cuvi can, cuaha xaan cuaha xaan niñi ñi tsati. Tan

tsaa tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

## 15

*Nu quitá ndihí utsa taahan ña tundoho tsa cua nyehé nyivi*

<sup>1</sup> Nyehé yu inga tsa iyo cahnu andivi tan nayuhvi xaan yu, nyehé yu utsa ángel tsa vatsí ndacá utsa taahan ña tundoho. Tsihin tundoho ihya cua cundihi tsa xaan cuñi Nyoo nyehé ra tsi nyivi tsa ña tyaá yahvi tuhun caahán ra.

<sup>2</sup> Tan nyehé tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasacá ñuhu tsihin tsi. Tan nyivi tsa cunyeé jaha canaa tsi quitá caquiñi can tan tsi tsi-toho ti, tan ña tsinyaá número sivi ti tsi ñi, tandihí ñi tan yucú ñi yuhu tsa nyehé yu can. Tan ndahá ñi tsa caá tumaa guitarra tsa tsahá Nyoo tsi ñi.

<sup>3</sup> Tan tsitá ñi yaa ra Moisés, ra jaha tyiñu tyiñu Nyoo, tan yaa ra cuví Mbee Ticatyi Luhlu. Tan catyí yaa can tyehen:

Cahnu tan iyo xaan caá tandihí maa tsa javahá un,  
Nyoo, Jutu ndi, iyó tandihí tunyee iñi tsi un.

Ndoo xaan tan nditsa xaan ityi un,  
Yooho Rey cuenda tandihí nyivi iyó nu ñuhu ñayivi.

<sup>4</sup> ¿Yóo ña cua nayuhvi tsi un, yooho Jutu Mañi ndi?

¿Yóo ña cua jacahnu tsi un?

Tan intuhun ñi maa un cuví ra ii.

Tan cua quitsi nyivi quee tandihí maa ñuu, tan cua jacahnu ñi tsi un, tyin nyehé ñi tsa vaha tsa javahá un, catyí yaa tsitá ñi.

<sup>5</sup> Tacan tan nyehé yu nuña yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu.

<sup>6</sup> Tan quitá utsa ángel tsa vatsí ndacá tsa utsa tundoho can tsitsi vehe ñuhu can. Nditsí ra naha jahma vaha, cuitsin tan xiñu. Tan yihí cinturón xuhun cuaan yiqui nyica tsa intuhun intuhun ra naha.

<sup>7</sup> Tacan tan iin tsa nyito can, tsahá can intuhun intuhun coho xuhun cuaan tsi tsa intuhun intuhun tsa utsa ángel can. Tan tsitu maa can tsihin tsa xaan Nyoo tsa cua tatsi tuñi ra tsi nyivi. Ra ícan ña cua cundihi maa tsa iyó ra.

<sup>8</sup> Tan tsitu maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quihvi tsitsi vehe ñuhu can tsitsi tsa ndi cumañi ndihí tsa utsa tundoho tsa vatsí ndacá tsa utsa ángel can.

## 16

*Coho tsa yihí tundoho tsa cua jaquitsi tsa utsa ángel*

<sup>1</sup> Tacan tan tsiñi yu iin ndusu ñihi xaan tsa quitá tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cuacoyo ndo tsa yihí tsitsi coho ndahá ndo juvin siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndusu can.

<sup>2</sup> Tacan tan tsahan iin ángel can tsicoyo ra tsa yihí tsitsi coho ra siqui nyivi tsa nyaá tuñi quitá caquiñi can tan jacahnú ñi tsi-toho ti. Tan quitá nu caahvi xaan tan uhvi xaan tsi ñi.

<sup>3</sup> Tacan tan coyó tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduví tsi niñi tumaa niñi ndiyi, tan tandihí tsa nyito tsa iyó tsitsi ndutya ñuhu can tsihi tsi.

<sup>4</sup> Tacan tan coyó tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduví tsi niñi.

<sup>5</sup> Tacan tan tsiñi yu tsa caahán ángel cuenda ndutya tan catyí ra:

—Jutu Mañi yu, yooho vaha xaan un tyin tatsi tuñi un tsi nyivi tyehen. Jutu Mañi yu, Nyoo ii cuví un tyin nda nu quitsahá tandihí tan nda cuenda vityin tacan ñi iyó maa un.

<sup>6</sup> Tatsi tuñi un tsi ñi tyin maa ñi tsatí ñi niñi nyivi yihí cuenda un tan niñi ra cuví ndusu yuhu un. Tan vityin yooho tumaa tsa jacohó un niñi tsi ñi

tyin tacan taahán maa tsi tsi ñi —catyí ángel can.

<sup>7</sup> Tan tsiñi tucu yu nacahan inga ndusu ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó tandihí tunyee iñi tsi, vityin tsa tatsi tuñi un tsi nyivi tsihin tsa nditsa tan tsihin tsandaa —catyí ndusu can.

<sup>8</sup> Tan coyō tsa tsinu cumi ángel can tsa yihí tsitsi coho ra nu ñicanyii. Tacan tan tsicoō ndatu tsi ñicanyii can tsa cahmi tsi tsi nyivi tsihin ñuhu tsi.

<sup>9</sup> Tan tandihí nyivi ndasi xaan cayu ñi jahā ñicanyii can. Maa tyin vasu ndi maa tacan tahan ñi, ña nasama ñi cuhva tsicoō ñi, tan ndi ña jacahnu ñi tsi Nyoo. Tan cahan ñi ndavaha ñi siqui Nyoo, ra tsa jaquitsi tundoho can siqui ñi.

<sup>10</sup> Tan coyō tsa tsinu uhun ángel can tsa yihí tsitsi coho ra siqui tyayu quití caquiñi can. Tan ndunaā nu ndacá ñaha ti. Tan nyivi cuenda ti, nda cuenda tsatsi yihí ñi yaa ñi tsa cuenda tsa nyehé xaan ñi tsa uhvi.

<sup>11</sup> Maa tyin vasu ndi maa tacan cuvi, ña jandihí ñi tsa javahá ñi tsa ña vaha. Tan cahan ñi ndavaha ñi siqui Nyoo, ra nyaá andivi, tsa cuenda tsa uhvi nu caahvi ñi.

<sup>12</sup> Tan coyō tsa tsinu iñu ángel can tsa yihí tsitsi coho ra nu yutya Eufrates cahnu. Tan ndocoō ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra.

<sup>13</sup> Tacan tan nyehé yu quitā tatyí ña vaha tsa caá tumaa caá sahva yuhu tsa intuhun intuhun quití. Iin can quitā yuhu quití caquiñi, inga can quitā yuhu coo xaan tsa iyó ndaha inga can quitā yuhu tsa cuví ndusu yuhu vatya.

<sup>14</sup> Tatyí ña vaha can cuví tatyí nu ña vaha, tan nahnu tsa nyityi javahá nahnu. Quitá nahnu, jandu iín nahnu tandihí rey tsa iyó nu ñuhu ñayivi, tyin cañi tahan ra naha quivi tsa quivi janaha Nyoo tyin iyó tandihí tunyee iñi tsi ra.

<sup>15</sup> Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Sii xaan cua cuvi tsi nyivi ndatú quivi quitsi yu tan tsa iyó vaha jahma ñi tyin quivi cua tsa yu ña cua nducahan nuu ñi tyin ña tandihí ñi —catyí ra Cristo.

<sup>16</sup> Tan cua ndu iin ra cuví rey naha ra nu nañí Armagedón tsihin yuhu hebreo.

<sup>17</sup> Tan coyō tsa tsinu utsa ángel can tsa yihí tsitsi coho ra nu tatyí, tacan tan quitā iin ndusu nu nyaá tyayu Nyoo tsitsi vehe ñuhu tsa nyaá nda andivi. Canā tsa tsi tan catyí tsi:

—Tsa iyó vaha vityin.

<sup>18</sup> Tacan tan vaa ña maa cuví tan caahán savi tan cañi tatsa. Tan ñihi xaan tañ nu ñuhu ñayivi. Tan ña tuhvá maa taán tacan tsa ndi quit-sahā iyó nyivi nu ñuhu ñayivi.

<sup>19</sup> Tan uñi nu ndatā ñuu cahnu Babilonia can, jahā tsa tañ. Tan tandihí ca ñuu tsa cayucu nu ñuhu ñayivi taní tsi. Nyoo ña naā maa iñi ra tsa javahā nyivi Babilonia. Yacan cuenda janyehé xaan ra tundoho tsi ñi.

<sup>20</sup> Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsinaā.

<sup>21</sup> Tan cucoyō cuaha yuu savi nahnu xaan tsa quee andivi siqui nyivi. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyivi cahan ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

## 17

*Nu cua tatsi tuñi Nyoo tsi ñuu ña vaha*

<sup>1</sup> Tacan tan quitā iin ángel tsitsi tsa utsa ra tsa ndahá coho can naha ra, natuhvā ra nu nyaá yu, tan catyí ra tsihin yu:

—Naha tyin janaha yu tsi un nácaa cua cutuñi ñaha ña vaha tsa tsicá nuu tsihin rayii, ña tsa nyaá nu ndutya cuaha.



<sup>2</sup> Tyin ra cuví rey nu ñuhu ñayivi tsi-coo ra naha tsihin ña, tan tsa cuenda ña tiví tandihi nyivi iyó nu ñuhu ñayivi —catyí ra tsihin yu.

<sup>3</sup> Tacan tan nyehe yu iin tsa janaha Tatyí li Nyoo tsi yu, tan tsindaca ángel can tsi yu nu tsiqui nu nduve maa nyivi iyó, tan juven ñi ican nyehe yu iin ñaha yosó iin quití cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiqui ti.

<sup>4</sup> Tan ñaha can nditsí ña jahma ti-jinda tan cuaaha. Tan cuaaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña.

<sup>5</sup> Tan nyaá iin sivi tsa cuví iin tuhun xeehe tsa ña cutuñi iñi nyivi nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihi ñiñaha tsa tsicá nuu tsihin rayi tan sihi tandihi tsa ña vaha tsa iyó nu ñuhu ñayivi.”

<sup>6</sup> Tacan tan nyehe yu tyin tsiñi ñaha can jahá tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahan ñi tuhun ra Jesús. Tsa nyehe yu tsi ña, iyo xaan cuñi yu.

<sup>7</sup> Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quití caquiñi tsa yosó ña, quití tsa iyó utsa jiñi tan utsi ndiqui.

<sup>8</sup> Quití caquiñi tsa nyehe un can, juven ti cuví quití tsa tsicoo tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihí. Ican nyií ti tsa ndi cumañi ca cuhun ti nu cua cundihí cuí ti. Nyivi iyó nu ñuhu ñayivi, ñi tsa nduve sivi nyaá nu libru Nyoo nda quivi tsinu ñuhu ñayivi, iyo xaan cua cuñi ñi nyehe ñi tsi quití can. Libru can catyí yóo nyivi cua coo cuí.

<sup>9</sup> Tuhun ihya cuñi tsi tsa cutuñi iñi yo itsi: Tsa utsa jiñi quití can cuñi tsi catyí tsa utsa yucu tsa nyaá ñaha can nuu.

<sup>10</sup> Tan juven ñi cuñi tucu tsi catyí can utsa rey. Uhun ra naha tsa yaha tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra.

<sup>11</sup> Tan quití caquiñi tsa tsicoo tan vityin nduve ca ti iyó, juven ti cuví iin rey tsitsi tsa utsa taahan rey can, tan cua cuví tucu ti rey tsa tsinu una. Tsa yaha cundaca ñaha nyico ti, tacan tan cua cuhun ti nu cua cundihí cuí ti.

<sup>12</sup> Tan tsa utsi ndiqui tsa nyehe un can, cuñi tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quití caquiñi can.

<sup>13</sup> Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quití caquiñi can. Tan tandihi ndatu tsa iyó tsi ra naha cua nacuhva ra naha tsi ti.

<sup>14</sup> Tan cua cañi tahan ra naha tsihin ra Mbee Ticatyi Luhlu. Maa tyin ra Mbee can, cua jaha canaa ra tsi ra naha. Tyin juven ra yihí ndaha tsi tandihi ra ndacá ñaha. Tan yihí ndaha tucu ra tsi tandihi ra cuví rey naha ra. Tan nyivi yihí cuenda ra, maa Nyoo cana tsi ñi tan nacatsi ra tsi ñi. Tan ñi xaan cuñi ñi nyicún ñi tsi ra.

<sup>15</sup> Tan catyí tucu ángel can tsihin yu:

—Nduya cuaaha tsa nyehe un can, nu nyaá ñaha tsicá nuu can, yacan cuví nyivi iyó tandihi ñuu nyihi tan ñuu nahnu, ñi caahán sñn sñn yuhu.

<sup>16</sup> Rey tsa cuví tsa utsi ndiqui quití caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoo ihñi ra naha tsi ña. Tan cua jatandii ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña.

<sup>17</sup> Tyin Nyoo tsaha ra tsa caca iñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca iñi ra naha, tan cua cuhva ra naha ndatu tsi quití caquiñi can tsa cundaca ñaha ti tumaa rey nda cuanda cundaa tuhun caahán maa Nyoo.

<sup>18</sup> Ñaha tsa nyehe un can, juvin ña cuví ñuu cahnu tsa ndacá ñaha tsi tandihí ra cuví rey nu ñuhu ñayívi.

## 18

### *Nu naá ñuu Babilonia*

<sup>1</sup> Tsa yaha yacan tan nyehe yu quee inga ángel ityi andívi tan iyó xaan tunyee iñi tsi ra. Tan ndunditsin ñuhu ñayívi jaha tsa nditsin ra.

<sup>2</sup> Tan cana tsaa ra tsihin tsa ñihi ndusu ra, tan catyí ra:

—Tsa tsindihí nuu ñuu Babilonia cahnu. Nanduví tsi nu iyó tatyí ña vaha, vehe tandihí nuu tatyí ña vaha, tan taca saa ña vaha tsa ña taahán iñi nyívi.

<sup>3</sup> Tyin tandihí nyívi tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayívi naha ra tumaa tsa tsicoo ra naha tsihin ñaha tsa cuví ñuu Babilonia can. Javaha ra naha cuatyí tsihin ña. Tan nyívi ñuhu ñayívi nducuca ñi tsihin tsa cuaha xaan tsa yahvi tsa jata nyívi ñuu can.

<sup>4</sup> Tacan tan tsiñi yu ndusu Nyoo ityi andívi, tan catyí tsi:

—Quita ndo ñuu ihya, nyooho tsa cuví nyívi yu, ña cutahan ndo tsihin nyívi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundocho tumaa nyehé maa ñi.

<sup>5</sup> Tyin tsa canyí tucuti cuatyí nyívi iyó ñuu can, nda cuanda tsaa can nu nyaá yu. Tan ñuhú iñi yu tsa ña vaha javahá ñi.

<sup>6</sup> Cuhva ndo juvin ñi maa tsa tsaha ñi tsi inga nyívi tsi ñi; cuhva ndo uvi ca tsaha siqui tsa javaha ñi. Tacan janyehe ndo tundocho tsi ñi. Cuhva ndo tundocho nyehe ñi tsa ñihi uvi ca tsaha tan ñavin ca tsa tsaha maa ñi tsi inga nyívi.

<sup>7</sup> Yacan cuenda cuhva ndo tsa iyo xaan tahan ñi tsihin tundocho nyehe ñi jaha ndo. Tahan ñi cuhva tsa jacahnú xaan ñi tsi ñi tan cusii xaan iñi ñi juvin cuhva can janyehe ndo tundocho tsi ñi. Tyin tsicá iñi tsitsi añima ñi: “Ihya nyecú yo tumaa iin reina.

Ñavin ñaha ndaahvi cuví yo, tan ndi ña cua nyehe yo tundocho”, cuñí ñi, tsicá iñi ñi.

<sup>8</sup> Yacan cuenda iin quívi ñi cua quitsi tundocho siqui ñuu can, cua quitsi tuhun tsihí, tucuihya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívi ñuu can —catyí Nyoo.

<sup>9</sup> Ra cuví rey nu ñuhu ñayívi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuihya cua cuñi ra naha na nyehe ra naha yuhma tsa cayu ñuu can.

<sup>10</sup> Tan tsa cuenda tsa yuuhví ra naha tundocho can, nda sava ñi cua cunyecú ra naha. Tan cua catyí ra naha:

—¡Ndahvi yooho, ñuu cahnu Babilonia, ñuu tsa tsicoo cuaha tunyee iñi tsi! Tyin iin yaha ñi tsaa tundocho nyehé un —cua catyí ra naha.

<sup>11</sup> Tan ra tsa xicó ndaha tyiñu naha ra, juvin ñi cua vacu xaan ra naha tan cuihya cua cuñi ra naha tsa cuenda ñuu can. Tyin yoñi ca cua jata tsa xico ra naha.

<sup>12</sup> Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandihí nuu vitu tami tan náa ndihí tsa tsinu tsihin yiqui nuu landa, tan vitu sii caá, tan caa tsa cuví bronce, tan caa tsa cuví hierro, tan yuu tsa cuví mármol.

<sup>13</sup> Tan xicó tucu ra naha canela, náa ndihí ca yucu tsa quihví tsihin tsa tsatsí yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, acetye, yutyi paan vaha, tan trigu. Tan juvin ñi xicó tucu ra naha quiti cuenda carga, tan mbee, cuayu, carreta, tan nda cuanda nyívi tsa cuví musu tan xicó ra naha.

<sup>14</sup> Tan catyí ra naha tsihin nyívi ñuu can tyehen:

—Nduve ca tsa sii caá tsa tsicoo tsi un, tsa taahán xaan iñi un. Tan

tsa tsindihí tandihí tsa cuca un. Tan ña cua ñihí ca maa un tandihí yacan —catyí ra naha.

<sup>15</sup> Ra tsa xicó tandihí can, nducuca ra naha tsa cuenda tsa jata nyivi ñuu Babilonia can tsa xicó ra naha. Nda sava cua cunyecu ra naha tsa cuenda tsa yuuhví ra naha tsa cua nyehe nyivi can tundoho. Tan cua vacu xaan ra naha tan cuihya cua cuñi ra naha.

<sup>16</sup> Tan cua catyi ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma lĩnu, jahma tijinda cuaaha. Tan cucutú ña tsihin xuhun cuaan, tan yuu s̄i caá tan perla.

<sup>17</sup> ¡Tan iin yaha ñi ndihí tsa cuca xaan can! —cua catyi ra xicó can naha ra.

Tan tandihí ra cuví capitán tsa jacacá yutun ndoo nu ndutya, tsihin nyivi yucú tsitsi can tan tandihí ra jahá tyiñu nu ndutya ñuhu naha ra, nda sava cua ndoo ñi.

<sup>18</sup> Tan tsa cua nyehe ñi yuhma tsa cayú ñuu can, cua cana tsa ñi, tan cua catyi ñi:

—¿Náa inga ñuu tsicoo tumaa ñuu cahnu ihya? Nduve —cua catyi ñi.

<sup>19</sup> Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsa ñi, tan cua catyi ñi:

—¡Ndahvi ñuu cahnu can! Tyin tsihin tsa cuca tsi tan nducuca tandihí yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naq tsi! —cua catyi ñi.

<sup>20</sup> Maa tyin nyooho cus̄i ñi ndo nyehe ndo tsa taahán ñuu can, nyooho tsa iyó andivi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihí ca nyooho tsa yihí cuenda Nyoo. Cus̄i ñi ndo tyin tsa cuenda tsa javaha ñi tsa ña vaha tsihin ndo tan tatsí tuñi Nyoo tsi ñi.

<sup>21</sup> Tacan tan iin ángel tsa iyó xaan tunyee ñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyí ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi.

<sup>22</sup> Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihí ca tyiñu. Tan ndi ña cua cucayu ca molino.

<sup>23</sup> Tan ndi ñuhú tyuma, tan ña cua cayu ca tsitsi ñuu can. Ndi ña cua cuñi ca yo ndusu nyivi nu iyó vico tindaha. Tacan cua cuví vasu ndi maa ra xicó tsa tsicoo ñuu can naha ra, cahnu xaan tunyee ñi tsicoo tsi ra naha, tan jandavi ñaha xaan nyivi iyó ñuu can tsi tandihí nyivi iyó nu ñuhu ñayivi tsihin tuhun tasi.

<sup>24</sup> Tyin cuaha xaan niñi ra cuví ndusu yuhu Nyoo canyí tsitsi ñuu can tyin tsahñi ñi tsi ra naha. Tan canyí tucu niñi inga ca nyivi yihí cuenda Nyoo, tan niñi tandihí nyivi tsa tsahñi nyivi nan̄i cahnu nu ñuhu ñayivi.

## 19

<sup>1</sup> Tsa yaha yacan, tan tsiñi yu ndusu nyivi cuaha ityi andivi. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jahnu yo, tyin iyó xaan tunyee ñi tsi ra.

<sup>2</sup> Tyin tsihin tsa vaha tan tsandaa tan tsa nditsa jacutuñi ra.

Tatsi tuñi ra tsi ñaha tsicá nuu tsa cuví ñuu Babilonia tsa jativí xaan tsi nyivi iyó nu ñuhu ñayivi tsihin tsa caquiñi tsa javaha ña tsihin ñi.

Tan tatsi tuñi ra tsi ña tsa cuenda tsa tsahñi ña tsi nyivi jahá tyiñu ra.

<sup>3</sup> Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihí maa tsa ndaa tsi ityi siqui —catyí ñi.

<sup>4</sup> Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnú ra naha tsi

Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuví tsi tacan! —catyí ra naha.

<sup>5</sup> Tan nu nyaá tyayu Nyoo, nacahan iin ndusu, tan catyí tsi: Jachanu ndo tsi Nyoo Jutu yo tandihi nyooho tsa jahá tyiñu tyiñu ra, tan tyaá yahvi ndo tsi ra, nyooho nyivi nyihi tan nyivi tsahnu.

*Nu iyó vico tindahara Mbee Ticatyi Luhlu tan nyivi tsinú iñi tsi ra*

<sup>6</sup> Tan tsiñi tucu yu ndusu tumaa cuví nu cuaha xaan nyivi yucú, o tumaa ndusu nu cuaha xaan yutya o tsa ñihi xaan caahán savi. Tan catyí tsi: ¡Cahnu xaan cuví Nyoo Jutu yo, ra iyó tandihi tunyee iñi tsi! Tyin tsa quitsahā ndacá ñaha ra.

<sup>7</sup> Na cusii iñi yo tan na cutu yo tsihin tsa sii. Na jachanu yo tsi ra, Tyin tsa tsaā cuhva tsa coo yo vico tindahara Mbee Ticatyi Luhlu.

Tan yoo cua cuví yo tumaa ñasiihi ra, tan ndatú yo quivi tindahara yo tsihin ra.

<sup>8</sup> Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñí tsi catyi tsa vaha tsa javahá nyivi yihí cuenda ra.

<sup>9</sup> Tacan tan quitsahā catyí ángel can tsihin yu:

—Tyāa tyehen nu tutu: “¡Sii xaan cuví tsi nyivi tsa cua cuhun nu tindahara Mbee Ticatyi Luhlu!”

Tan catyí tucu ra tyehen:

—Tuhun ihya cuví tuhun nditsa Nyoo —catyí ra tsihin yu.

<sup>10</sup> Tacan tan tsicuiñi tsiti yu nuu ángel Nyoo can tsa cua jachanu yu tsi ra. Maa tyin catyí ra tsihin yu:

—Ña jachanu un tsi yuhu, tyin yuhu musu Nyoo ñi cuví tucu yu tumaa yooho, tan tumaa tandihi ra yañi un tsa tsinú iñi tuhun nditsa tsa cahan ra Jesucristo. Tsi Nyoo taahán tsi jachanu yo —catyí ra tsihin yu.

Tyin tsa cahan ra Jesús, yacan cuví tsa jandu iin iñi tsi ra cuví

ndusu yuhu ra, ra tsahá cuenda tuhun caahán Nyoo tsihin yo.

*Nu nyehe ra Juan tsi ra tsa yosó cuayu cuitsin*

<sup>11</sup> Tacan tan nyehe yu ticohó andivi. Tacan tan quituvi iin cuayu cuitsin. Tan ra yosó tsi ti nañi ra Ra Nditsa Tsa Nii Iñi Jahá Tyiñu Tyiñu Nyoo. Tyin tsihin tsa ndaa jacutuñi ra tsi nyivi, tan ndaa javahá ra tsa cañi tahan ra.

<sup>12</sup> Tan tumaa caá nu cayú ñuhu, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra.

<sup>13</sup> Tan nditsí ra jahma cahyi tsihin niñi. Tan nañi ra Tuhun Nyoo.

<sup>14</sup> Tan nyicún andaru andivi tsi ra, nditsí ra naha jahma vaha tsa cuví linu, cuitsin tsi tan ña nyahyu tsi. Tan yosó ra naha cuayu cuitsin.

<sup>15</sup> Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyivi iyó nu ñuhu ñayivi. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa javahá ra tavá ndutya yucu vixi tsa cuví uva tsihin tsaha ra. Tan cua jacoho ra vinu tsa tsinú tsihin uva tsi ñi, tsehe cuñi tsi catyi tyin cuxaán Nyoo tsihin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihi tunyee iñi tsi.

<sup>16</sup> Nu jahma ra tan nu sihin ra can nyaá letra tsa catyí tyehen: “Ra ihya cuví ityi nuu tsihin tandihi rey. Tan juvin ñi ra cuví ityi nuu tsihin tandihi ra ndacá ñaha naha ra.”

<sup>17</sup> Tacan tan nyehe yu nyaá nyityi inga ángel nu ñicanyii. Tan ñihi xaan canā tsa ra tsi tandihi saa tsa ndavá ityi andivi, tan catyí ra tsihin ti naha ti:

—Nuu ndo tan ndu iin ndo tan cuxiñi ndo tsa tsahā Nyoo catsi ndo.

<sup>18</sup> Cua catsi ndo cuñu ra cuví rey naha ra tan ra cuví ityi nuu tsihin andaru naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi



ndo cuñu tandihí ra naha, ra iyó tsi-toho tan ra nduve tsi-toho, tahan ñi nyívi nyihi tan nyívi tsahnu —catyí ra tsihin saa can naha ti.

<sup>19</sup> Tacan tan nyehe yu quití caquiñi can tsihin ra cuví rey tsa iyó nu ñuhu ñayívi tsihin andaru cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andaru cuenda ra.

<sup>20</sup> Tíin ra yosó cuayu cuitsin can tsi quití caquiñi can iin caa ñi tsihin ra cuví ndusu yuhu vatya can, tyin nuu quití caquiñi can javahá ra vatya can tsa nyityi, tan tsihin yacan jandavi ñaha ra tsi nyívi tsa tsahá cunyaa tuñi quití caquiñi can, tan tsi ñi jacahnú tsi-toho ti. Tan jacuhun nyito ra tsi nduvi taahan ra naha nu ñuhu tsa cayú tsihin azufre.

<sup>21</sup> Tan tandihí ca ñi tsihi ñi tsihin mityi xaan tsa quitá yuhu ra yosó cuayu cuitsin can. Tan tandihí maa saa, tsatsi xaan ti naha ti cuñu ñi.

## 20

### *Nunyehe ra Juan tsa cuenda tsa mil cuiya*

<sup>1</sup> Tsa yahá can tan nyehe yu quee iin ángel ityi andívi, ndahá ra ndaha tucu yuvehe yavi cunu tsa nduve maa nu tsindihí. Tan ndahá tucu ra iin cadena cahnu.

<sup>2</sup> Tíin ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tsahñi ra tsi nu tsihin cadena iin mil cuiya.

<sup>3</sup> Tan jacuhun ra tsi nu tsitsi yavi cunu xaan can. Nacasí ra yuhu yavi can, tan tyaa ra iin sellu yuhu can tyin tacan tan ña jandavi ñaha ca nu tsi nyívi iyó nu ñuhu ñayívi, nda yaha mil cuiya. Tsa yaha mil cuiya can, cua ndatsi nyico nu juhva ca quívi.

<sup>4</sup> Yahá can tan nyehe yu nyecú cuaha tyayu. Tan nuu can nyecú nyívi tsa ñihí ndatu tyin tatsi tuñi ñi tsi nyívi. Tan nyehe tucu yu añima nyívi tsahnyá nyívi jiñi tsa cuenda tsa cahan ñi tuhun Nyoo tsa tsahá cuenda ra Jesús tsi ñi. Nyívi ihya ña jacahnú ñi tsi quití caquiñi can, ndi

tsi tsi-toho ti, tan ndi ña tsahá ñi cun-yaa tuñi ti nutyaan ñi, tan ndaha ñi. Nyehe yu nandoto ñi can tan tsindaca ñaha ñi tsihin ra Cristo tsitsi tsa mil cuiya can.

<sup>5</sup> Ñi ihya cuví ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can.

<sup>6</sup> ¡Sii xaan cuví tsi ñi tsa nandoto jihna tyin nacatsi Nyoo tsi ñi! Tan ña cua cuhun ñi anyaya nu tatsi tuñi Nyoo añima ña vaha tsa cua cúu nyívi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tsihin ra Cristo mil cuiya.

<sup>7</sup> Tsa yaha mil cuiya can, cua ndatsi Satanás nu nyíi nu nuuhñi nu.

<sup>8</sup> Cua quita nu, jandavi ñaha nu tsi nyívi Gog tan Magog, ñi xaan iñi tsi Nyoo tsa iyó nanií cahnu nu ñuhu ñayívi. Cua jandu iin nu tsi andaru ñi can tyin cuhun ra naha cuatyí. Cuaha xaan ra naha, tumaa cuaha nyíti yuhu ndutya ñuhu.

<sup>9</sup> Tacan tan nyehe yu quee ra naha nanií cahnu nu ñuhu ñayívi. Tan tyasi nduvi ra naha nu iyó nyívi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andívi tan tsahmi tsi tsi tandihí ra naha.

<sup>10</sup> Tan nu ña vaha tsa jandavi ñaha tsi ñi, jacuhun Nyoo tsi nu anyaya nu cayú ñuhu tsihin azufre, nu jacuhun ra tsi quití caquiñi can tan ndusu yuhu vatya can. Ican cua nyehe nahnu tundocho tacan ñi maa, nduvi tan ñiñu.

### *Nu cutuñi nyívi ityi nu nyaá tyayu cuitsin nu nyaá Nyoo*

<sup>11</sup> Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehé ra nu naa ñuhu ñayívi tan andívi. Tan ña ñihí tsi numaa cava tsi.

<sup>12</sup> Tan nyehe yu tandihí añima nyívi tsihi, tahan ñi nyívi tsahnu tan nyívi nyihi, nyecú nyityi ñi ityi nuu Nyoo. Tacan tan nuña libru tsa nyaá tandihí tsa javahá ñi quívi tsicoo ñi. Tan nuña

tucu inga libru nu nyecú sivi nyivi tsa cua coo nyito tsihin Nyoo. Ndiyi can cua cutuñi ñi tsa cuenda náa ndihi ca tsa javaha ñi tsa nyaá nu libru can.

<sup>13</sup> Tan ndutya ñuhu nacuhva cuenda tsi añaima nyivi tsa tsihi tsa cumi tsi. Tan nu yucú añaima nyivi tsihi tan Tuhun Tsiihi, nacuhva cuenda nahnu añaima nyivi tsa yihí ndaha nahnu. Tan tandihi ñi cua tahan ñi nácaa javaha maa ñi.

<sup>14</sup> Tacan tan Tuhun Tsiihi can tan nu yucú añaima nyivi tsihi can cua jacuhun ndihi Nyoo nduvi taahan can anyaya cahnu nu cayú ñuhu. Tan tsehe cuví tuhun tsiihi tsa tsinu uvi.

<sup>15</sup> Juvín ñi ícan jacuhun ra tsi nyivi tsa nduve sivi nyaá nu libru nu nyecú sivi nyivi cua coo nyito tsihin Nyoo tacan ñi maa.

## 21

### *Nu nyehé ra Juan andivi tsa tan ñuhu ñayivi tsa*

<sup>1</sup> Yahá can tan nyehe yu iin andivi tsa tan iin ñuhu ñayivi tsa, tyin andivi tan ñuhu ñayivi tsa tsicoo jihna naa tsi. Tan tacan tucu ndutya ñuhu naa tsi.

<sup>2</sup> Yuhu ra Juan nyehe yu ñuu ii tsa cuví Jerusalén tsa tsa quee nda nu nyaá Nyoo andivi, nyehe yu nuu tsi. Tan sii xaan caá cucutu tsi tumaa cucutú iin ñaha cua tindaña.

<sup>3</sup> Tan tsiñi yu iin ndusu ñihi tsa quita nda andivi, tan catyí tsi:

—¡Nyehe jihna! Iyó Nyoo mahñu nyivi. Cua coo ra tsihin ñi. Maa ñi cua cuví ñi nyivi ra. Tan cua cunyaa ra tsihin ñi, tan cua cuví ra Nyoo cuenda ñi.

<sup>4</sup> Juvín ñi maa ra cua nacuhva ndutya nuu ñi. Ña cua coo ca tuhun tsiihi tan ndi tucuihya iñi. Ña cua vacu ca nyivi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandihi tsa tsicoo, tsa tsindihí tsi —catyí ndusu can.

<sup>5</sup> Tacan tan ra nyaá nu tyayu cahnu can, catyí ra:

—Nyehe jihna. Jandutsaa yu tandihi maa tsa tsicoo.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cuita iñi tuhun ihya tyin cua cundaa tsi —catyí ra tsihin yu.

<sup>6</sup> Tsa yaha cahan ra yacan tan catyí tucu ra:

—Tsa iyó vaha tandihi vityin. Yuhu cuví ra jihna ñi, tan yuhu cuví ra cua coo nu cua ndihi quivi: tumaa letra A cuví tsi letra jihna ñi tan tumaa letra Z cuví tsi letra nu ndihi ña. Nyivi tsa na ityi iñi cua cuhva yu ndutya coho ñi; tuhun ihya cuñi tsi catyí: Ñi cuñi tyaa soho tuhun yu, cua cuhva yu ñayivi tsa ña cua naa maa coo ñi, tan nduve yahvi tsi cua coo.

<sup>7</sup> Nyivi jahá canaa tsi nu ña vaha, cua ñihi ñi tandihi tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu.

<sup>8</sup> Maa tyin nyivi yuuhví xaan, ñi ña tsinú iñi, ñi quiñi iyó, ñi tsahñi, ñiñaha tsicá nuu tsihin rayii, tan rayii tsicá nuu tsihin ñaha, ñi tasi, ñi jacahnú tsi-toho, ñi vatya; tandihi maa nyivi ihya taahán tsi cuhun ñi anyaya cahnu nu cayú ñuhu tsihin azufre, nu cuví tsa tsinu uvi tuhun tsiihi, nu tatsí tuñi Nyoo aña vaha.

### *Nu nyehé ra Juan nácaa cua cuví ñuu Jerusalén tsa*

<sup>9</sup> Tacan tan tsitsi tsa utsa ángel tsa ndahá coho tsitú tsihin tundoho, quita iin ra tan natuhva ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasihi ra Mbee Ticatyi Luhlu —catyí ra tsihin yu.

<sup>10</sup> Tan janaha Tatyí Ii Nyoo tsi yu tyin tsindaca ángel can tsi yu iin yucu sucun tan cahnu. Tan janaha ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa quee tsi andivi nu nyaá Nyoo.

<sup>11</sup> Xiñu xaan ñuu can tsihin tsa sii caá Nyoo. Xiñu xaan tumaa iin yuu vaha tan sii caá, tumaa yuu jaspe,

tumaa nyehé yo tsa nyaá inga tsiyo tsihin yutyi, tacan caá tsi.

<sup>12</sup> Nñi canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsi tsaahnu yo naha ra.

<sup>13</sup> Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii.

<sup>14</sup> Utsi uvi yuu yihí nu cacu tsaha tsi. Tan nuu yuu can nyecú sivi tsa utsi uvi ra tsa tava tyiñu ra Mbee Ticatyí Luhlu.

<sup>15</sup> Tan ángel tsa cahan tsihin yu, ndahá ra iin metru tsa tsinu tsihin xuhun cuaan, tsihin yacan tyihí cuhva ra ñuu can, tan yuhu cora can tan nanñi canduvi cora ñuu can.

<sup>16</sup> Iyó cumi taahan tutun ñuu can. Tan inducu ñi tsa quiihin tan tsa cañi tsi. Tan tyihí cuhva ángel can ñuu can tsihin metru xuhun cuaan can. Tan quitá uvi mil uvi cientu kilómetro. Iin ñi cuhva tsa cañi tan tsa sucun tan tsa quiihin.

<sup>17</sup> Tacan tan tyihí cuhva ra cora ñuu can. Tan quitá uñi xico cumi metru tsa quiihin, tyihí cuhva ra tumaa tyihí cuhva nyivi.

<sup>18</sup> Tsihin yuu jaspe samá cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyi tun ndoó vaha tsi.

<sup>19</sup> Tan tsaha cora can samá tsi tsihin tandihí ñi nuu yuu sñi caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda;

<sup>20</sup> tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu ñin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihí ña cuví amatista.

<sup>21</sup> Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa

iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

<sup>22</sup> Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee iñi tsi, tan ra Mbee Ticatyí Luhlu cuví vehe ñuhu ñuu can.

<sup>23</sup> Ña tsiñí ñuhu tsa jandunditsín ñicanyii ñuu can tan ndi tsa jandunditsín yoo. Tyin juvin ñi maa tsa nditsin Nyoo tan tsa nditsin ra Mbee Ticatyí Luhlu jandunditsín tsitsi ñuu can.

<sup>24</sup> Tandihí nyivi tsa cacu añima, cua caca nuu ñi nu nditsin can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandihí tsa cahnu cuví ra naha ñuu can.

<sup>25</sup> Ña cua cundasi yuhu cora tsa tsinu cahñi, tan ña cua coo tsacuaa ñuu can.

<sup>26</sup> Tan tandihí tsa cuca, tan tsa cahnu, tsa iyó nu ñuhu ñayivi cua tsa tsi ñuu can.

<sup>27</sup> Maa tyin ña cua cuví quihvi tsa caquiñi, ndi intuhun nyivi javahá tsa caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticatyí Luhlu cua cuví quihvi, tan cua coo nyito tsihin ra tacan ñi maa.

## 22

<sup>1</sup> Tacan tan janaha ángel can iin yutya cuii xaan tsi yu. Nduya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyí Luhlu.

<sup>2</sup> Mahñu tsitsi ityi cahnu ñuu can tan nduvi tsiyo xiin yutya can, nyecú yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi.

<sup>3</sup> Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyí Luhlu. Tan cua jacahnu nyivi yihí cuenda ra tsi ra.

<sup>4</sup> Tan cua nyehe tsihin nuu ñi tsi ra. Tan cua cunyaa sivi ra nutyaan ñi.

<sup>5</sup> Ña cua coo ca tsacuaa ican. Tan nyivi tsa cua coo ican ña tsiñi ñuhu ñuhu candili tsi ñi, ndi ñuhu ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

*Nu janahá tsi tyin tsa cuyatyin quitsi ra Cristo*

<sup>6</sup> Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahān tsihin ra cuví ndusu yuhu ra tahān tsanaha, juvin ra jacuhun ángel ra, tyin janaha ra tsi nyivi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

<sup>7</sup> —¡Tsa cuyatyin quitsi yu! —catyí ra.

¡Sii xaan cuví tsi nyivi tsa javahá cuhva caahān tuhun Nyoo tsa nyaá nu libru ihya!

<sup>8</sup> Yuhu ra Juan, tsiñi yu tan nyehe yu tandihi tuhun ihya. Tsa yaha nyehe yu tan tsiñi yu itsi, tsicuiñi tsiñi yu tsaha ángel tsa janahā itsi tsi yu, tyin jacahnu yu tsi ra.

<sup>9</sup> Maa tyin catyí ra tsihin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandihi ca ra yañi un tsa cuví ndusu yuhu Nyoo, tan tumaa tandihi ca nyivi tyaá yahvi tuhun nyaá nu libru ihya. Intuhun ñi Nyoo taahān tsi jacahnu yo —catyí ra tsihin yu.

<sup>10</sup> Tan catyí tucu ra tsihin yu:

—Ña tyihi xeehe un tuhun Nyoo tsa nyaá nu libru ihya, tyin tsa yatyin cuii cundaa tsi.

<sup>11</sup> Maa tyin jaña ndaha tsi nyivi caquiñi, na javaha maa ñi cuhva cuñi maa ñi. Tan nyivi iyó cuatyí, na coo ca cuatyí ñi. Maa tyin nyivi javahá tsa vaha, na jañihi ca ñi javaha ñi tsa vaha. Tan nyivi tsa jandu íí Nyoo, na cunyicun vaha ca ñi tsi ra —catyí ra tsihin yu.

<sup>12</sup> Tan Jutu Mañi yo catyí ra:

—Nyehe ndo. Tsa cuyatyin quitsi yu. Tan tyahvi yu tsi intuhun intuhun nyivi tsa cuenda tsa javahá ñi, a javahá ñi tsa vaha o tsa ña vaha.

<sup>13</sup> Yuhu cuví ra jihna ñi, tan yuhu cuví ra cua coo nu cua ndihi quivi, tsa iyó maa yu nda nu quitsahā tandihi tan tacan ñi maa cua coo yu nu cua ndihi tumaa letra A cuví tsi letra jihna ñi tan letra Z cuví tsi letra nu ndihi ña —catyí Jutu Mañi yo.

<sup>14</sup> Sii xaan cuví tsi nyivi tsa nacatyá jahma, [ñi janduvahá añima], tyin cua ñihi ñi ndatu catsi ñi tsiñi yutun tsa tsahá tsa coo nyito añima yo. Tan cuví quihvi ñi yuhu cora ñuu can.

<sup>15</sup> Maa tyin nyivi javahá tsa caquiñi, tumaa ñi tasi, rayi tsa tsicá nuu tsihin ñaha tan ñiñaha tsa tsicá nuu tsihin rayi, tan ñi tsahñi, tan ñi jacahnú tsitoho, tan tandihi ñi vatya, tan ñi jandaví ñaha; tandihi maa ñi can, ña cua quihvi ñi tsitsi ñuu can.

<sup>16</sup> Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihi tuhun ihya tsi nyivi tsicá vehe ñuhu. Yuhu cuví nyivi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

<sup>17</sup> Tatyí Ii Nyoo tan nyivi yihí cuenda ra, ñi tsa cuví tumaa ñasiñi ra Mbee Ticatyí Luhlu, catyí ñi tyehen:

—Ñaha ñi, Jutu Mañi yu —catyí ñi.

Tan nyivi tsa tsiñi tuhun ihya, na catyí ndihi ñi:

—Ñaha.

Tan nyivi na ityi iñi tan tandihi nyivi cuñi quitsi, na quitsi ñi tan coho ñi ndutya tsa tsahá tsa coo nyito añima yo, tan nduve náa cua tyahvi ñi.

<sup>18</sup> Tan tandihi nyooho tsa tsiñi tuhun Nyoo tsa nyaá nu libru ihya, cuñi yu catyí yu tsehe tsihin ndo: Nyivi tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siqui ñi.

<sup>19</sup> Tan nyivi tsa cua quinyaa juhva tuhun Nyoo tsa nyaá nu libru ihya,



Nyoo cua quinyaa ra tsa taahán tsi tsi ñi tsa nyaá nu libru tsa caahán yóo nyivi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun.

<sup>20</sup> Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuyatyn

quitsi yu —catyí ra.

Tan yuhu catyí yu:

—Na cuvi tsi tacan. Naha ñi, Jutu Mañi yu, Jesús —catyí yu.

<sup>21</sup> Na naquihin tandihi ndo tsa vaha tsa tsahá Jutu Mañi yo Jesucristo tsi yo.

Tan na cuvi tsi tacan ñi.